


Noquen hihbaan
joi



New Testament in Capanahua (PE:kaq:Capanahua)

Noquen hihbaan joi

New Testament in Capanahua (PE:kaq:Capanahua)

copyright © 2008 Wycliffe Bible Translators, Inc.

Language: Capanahua

Translation by: Wycliffe Bible Translators, Inc.

Capanahua [kaq], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Capanahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022
8b744608-7540-59b5-a4b9-20fb46e3f9c5

Contents

MATEO	1
MARCOS	44
LUCAS	69
JUAN	114
HAHNIBO	144
ROMANOBO	181
1 CORINTO	201
2 CORINTO	217
GALATABO	228
EFESIOBO	234
FILIPOS	241
COLOSAS	245
1 TESALONICABO	249
2 TESALONICABO	253
1 TIMOTEO	255
2 TIMOTEO	260
TITO	264
FILEMON	266
HEBREOBO	267
SANTIAGO	280
1 PEDRO	284
2 PEDRO	289
1 JUAN	292
2 JUAN	296
3 JUAN	297
JUDAS	298
JAYAXIHQUIBO	300

MATEO

Mateonen huishani joi siri

Jesucriston xohtabo (Lc 3.23-38)

¹ Jahuen xohtabo toponpaquexon ta Jesucristo David jaa xohtahi non honanai. Jatón hepa coin ta Abraham janishqui.

² Abrahanen baque ta Isaaque janeya janishqui. Isaaquen baque cahen Jacobo. Jacobon baque cahen Judá. Judapan huetsabo rihbi jai. ³ Judapan baque cahen Fares betan Zara. Tamara qui jan baquejani rabe ta jaabo qui. Faresen baque sca cahen Esrom. Esromana cahen Aram. ⁴ Aramana cahen Aminadab. Aminadabena cahen Naason. Naasomana cahen Salmon. ⁵ Salmonena cahen Booz, Rahaba qui jan baquejani. Boozena cahen Obed, Rut qui jan baquejani. Obedina cahen Isaí. ⁶ Isainena cahen David, quiquin hapo. Davidinina cahen Salomon, Uriásnen haibo qui jan baquejani.

⁷ Salomonena cahen Roboam. Roboamena cahen Abías. Abíasnena cahen Asa. ⁸ Asana cahen Josafat. Josafatena cahen Joram. Joramana cahen Uzías. ⁹ Uzíasnena cahen Jotam. Jotamana cahen Acáz. Acazena cahen Ezequías. ¹⁰ Ezequíasena cahen Manases. Manasesena cahen Amon. Amomana cahen Josías. ¹¹ Josíasena cahen Jeconías, Jeconías huetsabo rihbi. Babilonia mai janin hapón hiohah ta jano sca jihuenishqui.

¹² Babilonia mai janinxon sca ta Jeconíasnen Salatiel baquejanishqui. Salatielnin baque cahen Zorobabel. ¹³ Zorobabelnina cahen Abiud. Abiudena cahen Eliaquim. Eliaquimina cahen Azor. ¹⁴ Azorona cahen Sadoque. Sadoquena cahen Aquim. Aquimana cahen Eliud. ¹⁵ Eliudena cahen Eleazar. Eleazarnena cahen Matan. Matamana cahen Jacobo. ¹⁶ Jacobonena cahen José. José ta Marían bene janishqui. María cahen Jesusen mama. Jesus cahen Cristo.

¹⁷ Jaa rahsi toponpaquehah ta catorce joni jaiqui, Abraham janinxon David caman toponpaquehah. David janinxon sca Babilonia mai janin caníbo caman toponah ta catorce rihbi qui. Babilonia mai janin caníbo janinhax Cristo caman cahen catorce rihbi.

Jesucristo baquexo cainai (Lc 2.1-7)

¹⁸ Jesucristo ta nescari cainnishqui. Marían papabaan ta jatón baque hihbojamanishqui, José hinanyahnoxon. Josen bihriyamahiya ta Dios Yoshiman María baque hinannishqui. ¹⁹ Josen hahcama bi jahuen haibo jan bihyaxihqui ma tohoyahi jixon bihtima shinanscaquin. Bihcatsihyamascaxon bi ponte joni hihxon, jahuen haibojati rabinmacatsihyamaxon, tsoabi yohixonma jenebahinti shinanscaquin. ²⁰ Jascajati shinan shinanson sca namaquen Papan yonoti jisquin. Sanarenenax jaa yonoti yohuani:

—Josen. Davidi baquen. Miin haibo María bihresscahue. Bihti qui raqueyamahue. Jahuen xahquin janin nanescai ta Dios baque qui, Dios Yoshiman baquejahah. ²¹ Bebo baque ta bihyaxihquiqui. Jaa bebo baquen ta jahuen jihuetahbo mahnebohaxon jihuemayaxihquiqui, jato xahbanen sca jatón tiromajanicabo paquenon. Jaa copi tah min jaa Jesus janeya jayaxihqui —hahquin.

²² Papan jato yohiha jahuen joi yohinicabaan yohini quescabijaquin janon ta Papan jascajanishqui.

²³ Jaabaan huishani ta nea qui:

Jisnahue. Bebaan honanahma bi ta xontaco tohoxon baque bihyaxihquiqui. Cainscaiya ta Emmanuel jaa janeyaxihcanihqui.

Emmanuel ta Papa Dios ta noque betanbi hihquiqui hihcatsihquiqui.

²⁴ Namacax mohi sca jaax, caxon jahuen haibo bihquin, noquen Hihbaan yonotinin yohihah quescabijaquin bihresscaquin. ²⁵ Haibo bihres sca jaax bi hahbe hoxayamatahbi, jahuen baque jan bihnon caman. Cainscaiya, jahuen jane sca Jesus.

2

Huishi honanmisbo

¹ Herodes quiquin hapo jai tian ta Judea mai janinxon Jesusen maman jaa bihnishqui, Belen jema janinxon. Jaatian hocho quehax, bari cainai quirihax, jonibo nocoti. Huishi honanmisbo Jerusalem janin nocoti becani. ² Quiquin hapón xoboho mapexon yocacquin:

—Mato judiobaan quiquin hapo baquexo cainhoh tah non jisi jahui. ¿Jahuerahnon hin? Bari cainai quirixon tah non jahuen huishi jisoqui. Jaa copi tah non hahqui raboxonen tisquihahpaquehi jahui —hihcani.

³ Jascaraiboya quiquin hapo Herodes rahte rahteti. Jerusalem janin jihuetaibo rihbi rahte rahtecani. ⁴ Jahuen quiquin sacerdoteboya judiobaan quirica honanbo quenamaxon sca Herodesnin jato yocaquin:

—¿Jahuerahnonxon Cristo baquexo bihti quin? Yohinahue —hahquin.

⁵ —Judea mai janin, Belen jema janinxon rahan. Jascajaquin ta Papan joi yohinication huishanishqui.

⁶ Belen. Mia tah min Judapan mai meha jema qui. Caibo Judea jemabo mia mentan hashoan hani que bi ta mia rihbi jaabo mentan hashoan hani qui. Mia janinhax ta quiquin hapo jayaxihquiqui. Jaan ta heen israel jonibo jihuemayaxihquiqui.

Papan joi yohinication ta jascajaquin huishanishqui —hihcani.

⁷ Nocotaibo quenabohanxon sca honaxonbi Herodesnin yocaquin, sirijaquin honancat-sihquin:

—¿Jahuentian man jahuen huishi jisoquin? —hahquin. ⁸ Honanxon sca, jato yohiquin:

—Belen janin bonahue. Nocotax, sirijaquin honannoxon yocacahnaxahnahue, jahuerahnon hin jaa baquexo. Meraxon hea yohihi sca beribiyaxahnahue, hean rihbi hen jaa bebonxon raboxonen tisquihahpaquehi canon —jato jaquin.

⁹ Jascajaquin yohihah, boresscapani. Picoxon nai bejsahtanaibaan bi bari cainai quiri janinxon jisobo huishi xabaribihhi. Xabacanahi cahi, jato bebon cahax, baquexo machi sca nihreneni. ¹⁰ Jaa huishi merarihbihax hihti jenimacani. Coin coinsacani. ¹¹ Nocotax xoboho mapexon jahuen mama Mariaya baquexo meracanquin. Raboxonen nihxon hahqui tisquihahpaquexon, jaton bohnantibo quehpenxon jaa bexonaibo hinancanquin. Oro, hahan hiniñjatibo rihbi, hiniñjanoxon hahan rasquitiñho rihbi hinancanquin. ¹² Jaatian sca namaquen joi nincacanquin, Herodes janin catima sca Papan jato yohihah. Jaa copi ta jaton main caribinoxon huetsa bahin sca bocannishqui.

Egipto main cahibo

¹³ Jatón main boresscaiboya sca, noquen Hihbaan yonoti hahqui sanareneni jahui namaquen Josen jisribiquin.

—Catanhue. Jahuen mamayabi baquexo botanhue, Egipto main histon cahax jano jihuehue, hen mia janohax cati yohinon caman. Baquexo rehtenoxon ta Herodesnin benanoxihquiqui —hahquin yonotinin. ¹⁴ Huenixon sca baquexoya jahuen mama yamebi hioquin. Egipto main nocoti cahi cahi. ¹⁵ Nocotax janobi jihuetai, Herodes hihnon caman. Jascari ta Papan joi yohinication huishani joi jai quesca jaresscanishqui: Egipto mai janinhah tah hen heen baque quenamaniqui hihqui jaa huisha.

Baquebo rehtetannahue hahxon Herodesnin jahuen sontarobo yonohi

¹⁶ Egipto mai janin José cariyamahiya ta hocho quehax jahuiho Herodes janin cayamascanishqui. Hea yohihi joyaxahnahue Herodesnin jato jaipi bi huetsa bahin cahi jaa tecayacahini cahi. Jatón main boresscaibohi honanax sca, Herodes sina sinati. Jato yocacahitipixon, jaatihi basi sca huishi jismenonibo jai honanxon, jahuen sontarobo sca yonoquin.

—Belen jema janin jai baquebo rehtetannahue, rabe bari jaibo, hashoan naman hihquibo rihbi rehtetannahue, Belen senen jai jemabo quiha baquebo rihbi rehtetannahue jatihibi —jato jaquin, Herodesnin. ¹⁷ Jaa copi ta Papan joi yohinica Jeremiasnen huishani joi quesca sca janishqui. Jaa joi ta nescari qui:

¹⁸ Ramá janin ta sai saihihquibo qui. Huinihibo, huaohihquibo hichahi. Raquel ta jahuen baquebo qui huinihiqui. Jenquetsahaxon sirijaquin shinanmatimascai, jahuen baquebo yamahiya, rehtenahbo quen hihqui jaa huisha.

¹⁹ Baquebo jascajaquin rehtemanish ta Herodes sca mahuanishqui. Jaa mahuataiya ta Egipto mainxon namaquen Papan yonoti Josen jisnishqui.

²⁰ —Caresscatanhue. Israeli main canoxon miin haiboya jahuen baquexo hiorihbitanhue. Baquexo rehtecatshiquibo ta mahuascai qui —yonotinin jaquin.

²¹ Mohiyahxon sca jahuen baquexoya jahuen haibo boresscaquin. Israeli main cahi cahi. ²² Nocoxon sca chanihibo nincanquin. Jahuen papa Herodes xohtahi ta Arquelao sca Judea mai quiquin hapo qui, hihqui chanihah Judea mai qui cati raquescai. Namaquen sca, Jano cayamahue yohihi nincacax Galilea main sca cahi cahi. ²³ Nocotax Nazaret janeya jema janin sca jihuetai. Jano Jesus jihuescai copi ta Papan huishani joi quesca bihi janishqui. Jaa ta Nazareno hihyaxihquiqui hihqui jaa huishani joi.

3

*Nashimanica Juan yohuanai**(Mr 1.1-8; Lc 3.1-9, 15-17; Jn 1.19-28)*

¹ Jascanihbo cahchiqui sca ta tsoa jano yamahiton nashimanica Juan nihpahonishqui, Judea main. Yohuancanahi cah nihnichi.

² —Maton shinan tiromabo jenebahinquin shinan siribo sca bihnahue. Papan mato jihuemati nete ta nea pishca sca jaonahiqui. ³ Papan joi yohinica Isaiasnen huishaxon yohini quesca ta Juan janishqui.

Jano tsoa jihuetaitonma tah hen yohuancanahi. Noquen Hihbo hahan jonon bahixon-nahue, pontequin bahixonnahue, hih tah hen jai

hihqui jaa huisha.

⁴ Juaman ta camelo rani chopajaxon sahuepahonishqui. Histon nihnoxon rihbi yohina bichi quexen jahuen tari pishnexehti. Champobo res ta pipahonishqui, champoya bona-jene. ⁵ Jaa nincaqui sca ta Jerusalem janin jihuetaibo bocannishqui. Judea main jihuetaibo jatihibi, Jordan huean patax jihuetaibo rihbi jaa nincaqui bocani. ⁶ Juan yohuanai nincaxon, jaton yorabi yohihi jaton hohchabo yohipaguesacanquin, Juaman jato jeneho hihquimatannon.

⁷ Jano jan jato nashimahi janin fariseobo betan saduceobo rihbi hicha hahqui nocohih-nati. Nocohihnataibo jixson, Juaman jato yohiquin:

—¡Rono baquebon! ¿Tsoan mato neno jabaquihrani joti yohihaxquin, Papan mato casticanmis hihquish man jonon? ⁸ Maton shinan tiromabo potaxon shinan siribo sca bihnahue. Sirijaquin shinanax res sca jihuenahue hih ca hen jahihsen. ⁹ Noque caya tah non Abrahamen baquebo qui hihamaribinahue. ¡Man yohinani jascamis! Abraham baquebo jacatsihquin ta nea man jisi macanbo Papan jonijati hahtipahiqui, Abraham baquebo sca janon. ¹⁰ Jihui reranoxon hahcajaquin ta jahuen yami bihxon Papan tarescaiqui. Bimiyosma jihuiro reraxon mapojaquin hahcajaquin ta tiroma shinaryahpabo Papan casticanscaiqui. Shinannahue. ¹¹ Maton shinan man pontehiya tah hen jenen res mato nashimahi. Huetsa joni rihbi ta joresscaiqui. Hea mentan hashoan coshi. Jaa hihti siri copi tah hen jahuen sapato boxonti senenyamahi. Jaan ta jahuen yoshin siri mato hinantihiqui. Chihhi rihbi ta mato maracantihiqui. ¹² Bimi berobo tsinquin, chishpo potaquin hahcajaquin ta Papan xecoscaiqui. Jahuen bimi siribo rahsi tsinquin sca jahuen jano bexojati janin bexojaquin hahcajaquin ta Papan jahuen baquebo tsinquihiqui. Chishpo cahen nocayosma chihin mapojayaxihquiqui —jato jaquin Juaman.

*Juaman Jesus jeneho hihquimatana**(Mr 1.9-11; Lc 3.21-22)*

¹³ Jaatian ta Galilea mai janinhax Jesus noconishqui. Juaman jaa nashimaquin hihquimatannon hihquish, Jordan huean qui jahui, jano Juaman nashimahi janin. ¹⁴ Hea nashimahue hahca bi Juan queenyamahi.

—Mian caya hea nashimahue. ¿Mian hea nashimatihbi bi min Hea nashimahue hah min hea jai nan? —hihqui Juan.

¹⁵ —Jaabi hea nashimahue. Min hea nashimati ta Papa queenih qui. Papan yohihi jatihibi hean nincanica hihnon hea nashimascahue —Jesusen jascahah, Juaman jeenhahquin. Jeenhaxon, nashimaquin. ¹⁶ Hueaman nashimaha Jesus mapescai. Jaatian ta nai cohin potabohanahcamahi quehpemehtaiya bochiqhix nobex botopaquetai quesca Dios Yoshin hahqui botopaqueti jahui Jesusen jishishqui. ¹⁷ Naihoh quehax yohuanai rihbi nincanquin.

—Nea ta hahan hen queenai heen baque qui. Hahan tah hen hihti jenimahi —hihqui.

4

*Satanasnen Jesus tanahi**(Mr 1.12-13; Lc 4.1-13)*

¹ Jaa pecaho ta jano tsoabi yamahi janin Dios Yoshiman Jesus hionishqui. Jordan huean janinhax cahchiho jan canon, hioquin, janoxon sca tiroma yoshiman jahuen shinan tananon.

² Jano cuarenta neten piyamabahinaxon piyamashinahax hihti picatsihscai. ³ Hihti picatsihscaiya ta tiroma yoshin sca joxon yohinishqui, hohchamacatsihquin:

—Papa Diosen baque hihxon, toa macan toncobo yohihue, piticahinsanon —hahquin.

⁴ —Papan huisha janin ta nea joi jaiqui: Piti res jaax jihuetima tah man jai. Papan yohihi joi jatihibi nincaqui jihuenahue hih ta Papa janishqui —Jesusen jaquin.

⁵ Jaatian ta Jerusalem janin sca tiroma yoshiman hionishqui, Papa yocati xobo janin. Xobo mamacanya manimaxon sca yohiquin:

⁶ —Papa Diosen baque hihquish, naman paquehue. Jahuen huisha janin ta Papan yohihiqui:

Jahuen yonotibaan ta mia coirantihiqui. Jatón mequemanbi ta mia bihinihnicantihiqui, macan qui min joxcorohyamanon —hahquin yoshiman.

⁷ —Huetsa Papan quirica janin ta nea jaiqui: Hea cahra hahxoncointihiquin hihxon miin Hihbo Dios tanayamahue —hahquin Jesusen. ⁸ Jaatian, tiroma yoshiman boribiquin, queya mahchi janin sca. Manimaxon sca hocho jismaquin jatihibi jemabo jan jisnon. Jatón jahuaborayabi jato jismaquin. Jismaxon yohiquin:

⁹ —Min hehqui raboxonen tisquihahpaquehiya tah hen jaa jatihibi mia hinantihí —hahquin.

¹⁰ —Catanhue, Satanas. Papan huisha janin ta nea joi jaiqui: Miin Hihbo Dios huesti qui tah min raboxonen tisquihahpaquetihí. Jaa huesti tah min nincatihí —Jesusen jaquin.

¹¹ Jascajaquin yohihah ta tiroma yoshin caresscanishqui. Jaa xahbanen cahen Papan yonotibo nocohihnati. Nocohihnaxon, piti hinancanquin.

Galilea mainxon Jesusen jato yohimenohi

(Mr 1.14-15; Lc 4.14-15)

¹² Cahchihoh quehax joxon, quiquin hapon sontarobaan Juan bichipi joi nincacax, Galilea main sca Jesus cahi jahui. ¹³ Nazaret jema janinhax Capernaum jema janinbo sca baneti cahi, hian quexa. Jano Zabulonbo betan Neftalíbo jihuetaibo janin jihuetahbahi.

¹⁴ Jaa copi ta Papan joi yohinica Isafasnen yohini quescanishqui:

¹⁵ Zabulon mai janinhahbon, Neftalí mai janinhahbon, jatón hian janin jaibo rihbi Jordan huean hoque quexa jihuetaibon, Galilea main jihuetai judiomabon,

¹⁶ Bahquish chian jihuetaibaan bi ta hani xaba jiscannishqui. Mahuati qui raquetaibaanbi ta xaba paquenishqui, mahuapan jato bihpanan hihqui jaa huisha.

¹⁷ Jano ta Jesusen yohimenonishqui:

—Matón shinan pontemabo potaxon shinan siribo bihnahue. Papan mato jihuemati nete ta nea pishca sca jaonahiqui —hahquin.

Yapa bihnicahbo Jesus betan cahi

(Mr 1.16-20; Lc 5.1-11)

¹⁸ Jaatian sca Galilea hian quetanbahini caquin bi tarrafa pota potahi joni rabe meraquin. Huetsa, Simon. Huetsa, jahuen jochica Andres. Yapa bihnica rabe.

¹⁹ —Hehbetanbi bonahue, jonibo sca hen mato tsinquimanon —jato jaquin.

²⁰ Yohihah ta jatón tarrafa jenebahini caquin chibanbahincannishqui, hahbetanbi sca nichí.

²¹ Caribixon sca huetsa rabe rihbi meraquin. Jacobo betan jahuen jochica Juan, Zebedeonen baque rabe. Jatón papa betan nontinxon jatón tarrafa hona honahiton jato merabonaquin. Jaabo rabe sca jascajaribiquin yohiquin. ²² Jan yohihah, jacahini caquin jatón papaya jatón nonti jenebahinxon Jesus chibanrihbicanquin.

Jonibo Jesusen haxemahi

(Lc 6.17-19)

²³ Galilea mai janinbo yohihí cahi ta bocannishqui. Jema qui nocotax judiobaan tsinquiti xoboho hihcoxon Papan joi jato honanmaquin. Papan jato jihuemati nete nea pishca sca jaonahi yohixon, hisinaibo jatihibi rohajaxon, yosmabo rohajaxon coshi jato hinanquin, Jesusen. ²⁴ Jato honanmaxon rohajahiya ta hocho bi res Siria maibo janin jatihibi jaya yohuanchanicannishqui, jano jihuetaibo. Jaa copi ta jaa janin jatón hisinyahpabo hiocannishqui, hihti hisin tenehibo, mesco hisinyahpabo, mahua hisinyahpabo, tiroma yoshiman hihbojahibo, mapo masataibo, yora honanyamajaquetaibo rihbi. Jaa rahsiya behiboya jato rohajaquin. ²⁵ Hihti caibo sca jaa chibani becani, Galilea mai mehabo, Decápolis jemabo janinhahbo, Jerusalem janinhahbo, Judea mai mehabo, Jordan huean hoque quexa quehabo rihbi.

5

Mahchinxon Jesusen jato haxemahi

¹ Nocohihnatax hahqui tsinquijaquetaibo jisish ta mahchi janin Jesus manihihnannishqui. Jano tsahotaiya sca ta jahuen haxenicabo jaa patax nincaqui behinihnacannishqui. ² Jato haxemaquin ta nescajaquin jato yohinishqui:

Hahan jenimati jaibo

(Lc 6.20-23)

³ Caibo ta jahuaborajoma quescapah qui, jaton jahuabora shinanyamahi. Jascapahbo ta hahan jenimati jaiqui, jato jihuemaxon Papan jato jahuen jihue hinanyaxihquibo.

⁴ Caibo ta benatihqui. Jascapahbo ta hahan jenimati jaiqui, Papan jato shinanmaquin sirijatihiqui.

⁵ Caibo ta mehcayahpa qui, hahxonnicca. Jascapa ta hahan jenimati jaiqui. Papan ta nai naman meha mai jatihibi jato hihbomayaxihquiqui.

⁶ Papa queenai quescajati ta caibo hihti queenihqui. Papan jato jascajaquintihi quen ta jascapahbo hahan jenimati jaiqui.

⁷ Caibo ta yanapanmisbo qui, huetsahon shinanxon hahxonnicahbo. Jascapahbo ta hahan jenimati jaiqui, jatoxon shinanxon Papan rihbi jato hahxonyaxihquibo.

⁸ Caibo ta siri shinanyahpabo qui, hohchati shinanjomabo. Jascapahbo ta hahan jenimati jaiqui. Noquen Papa Dios ta jis yaxihcanihqui.

⁹ Sinataibo sirijaquin yohuanquihnxon ta caibaan jato sina tantimahi. Jascapahbo sina tantimanicahbo ta hahan jenimati jaiqui, Mato tah man heen baquebo qui, Papa jaiya.

¹⁰ Papa queenai quescajaquin man hahcaí copi mato tiromajahah tah man tiroma teneti jai. Jascajaquin tenehibo ta hahan jenimati jaiqui, jato jihuemanoxon ta jahuen jihue Papan jato hinanyaxihquiqui.

¹¹ Man hea nincacoinaiya quesabaan mato hichacax, mato qui tiromahi yohuan yohuanxon, mato tiromajanxon chibanbonahiya tah man hahan jenimati shinan man jatihi. ¹² Jenimanahue. Man tenexonai copi Papan mato jahuen hinantibo naiho bexojaxonai quen hihti coin coin jihuenuhue. Jascajaquin rihbi ta Papan joi yohinicabo tiromajacanhonishqui. Jaa copi mato qui tiromabo tenenuhue.

Non xaba quescaja; tashi quescaja rihbi

(Mr 9.50; Lc 14.34-35)

¹³ Jatihibi jonibaan tashi quescaja tah man qui. Tashi jahuijoma sca tah non jenquetsahaxon bi hahquirihbi jahuijatimahi. Jascapa tashin tah non jahuabi tashin hahtimahi. Potati sca tah qui, huinoquin jonibaan jama jamanon.

¹⁴ Mato tah man mai mehabaan xaba qui, jatihixonbi jisti. Mahchi maracahtai jema ta hochoxon jisti qui, jenquetsahax jonetimahi. ¹⁵ Johue quetjaxon rihbi ta tsoanbi quantipan mahpoyamahihqui. Jahuen tsahotinin tah non johue tsahonai, xoboho jaibo rahsichin jahuen xaba jison. ¹⁶ Jascajaquin xabajahibo jihuenuhue, man sirijaquin shinanxon joni huetsa hahxonai jisxon jatihibichin mato honanon. Man jascapahbohi jisish ta maton naiho queha Papa qui siripi yohuan yaxihcanihqui.

Moises joi honanahbo jato haxemahi

¹⁷ Papan huishamani joibo hean mato potamahi jahui shinanyamanahue. Moises jan huishamani, texe jahuen joi yohinicabo jan huishamani, jaa joibo mato potamahi tah hen joyamaniqui. Papan joi potamanoxonma bi tah hen jan yohini quescabijanoxon jahui.

¹⁸ Hen mato yohicoinnon nincanahue. Naiyahpa mai queyonon caman ta Papan huisha quiha ni huesti bero pishca, ni huesti reshpi pishca rihbi manotimahiqui. Jan yohini jatihibi janon caman ta jahuen huisha jascabi jatihiqui, queyocahinyamahi. ¹⁹ Jaa copi ta huesti res Papan noque yohihi joibo potaxon caibo rihbi potamahax mia hashoan naman sca hihyaxihqui. Jascajahax tah man Papan jihuetahbahax bi texe jahuen jihuetahbo mentan hashoan jahuama sca jayaxihqui. Papan yohihi quescajaxon jaxon caibo rihbi jahuen joi haxemahax tah min hihti siri sca min jatihi, Papan jisi. ²⁰ Fariseoboya jaton haxemanicahbo mentan hashoan nincacoinnica hihyamahax tah man jahuentianbi Papan jihuematí janin nocotimahi. Jaa hen mato yohihi copi Papan joi queyotimahibo shinanbehnoyamanahue.

Sinayamati Jesusen yohihi

(Lc 12.57-59)

²¹ Noquen xenibo ta Papan yohinishqui: Min tah min joni huetsa rehtetimahi, hahquin. Jaa copi ta rehtehi joni Papan casticanyaxihquiqui. Jaa joi tah man honanscai. ²² Man honanyamani joi sca tah hen heanbi mato nincamahi: Miin huetsa qui min sinataiya ta jaa copi mia casticanti jatiqui. Jointi xahbanen hah min miin huetsa hichaquin jaiya ta tsiniquixon mia casticanti jaticaniqui. Shinanjoman hah min hichaquin jaiya tah min jaa copi chihí janin sca cati jaresscai.

²³ Jaa copi jahuabora pishca Papa hinancatsihxon shinanahue. Hinani joxon bi jano hinanti janinxon sca miin huetsan mihqui sirijaquin shinanyamahi shinanrenenxon, janobi miin hinanti jenebahinuhue. ²⁴ Miin hinanti janobi jenebahini caxon miin huetsa pari sirijaquin yohuanquihnax hahbe bexohue, bexohi sirixon sca miin hinanti pishca hinannoxon.

²⁵ Mia demandanaiboya bahin caquin bi histon bi res hahbe bexohue, mia tininti janin bomis. Tinintinin mia policia bihmaxon sipo xoboho mia tsahonah tah min hohmis hohmistihi. ²⁶ Yohicoin tah hen mia jai, jan mia yohihi tihibi copijanoxon caman tah min jano hihtihi.

Tsiniyamahabo Jesusen yohihi

²⁷ Tsiniyamanahue Papan mato jai tah man honanrihbihi. ²⁸ Hean tah hen nea sca mato yohihi: Haibo jisish hahbetan hihcatsihqui tah min miin jointi janin tsini sca jai.

²⁹ Jaa copi miin mecayaho beron mia hohchamahiya jaa miin bero tsecaxon potahue. Jayajoma hihqui siri que ma bi ta mia chihi janin moanma potahah hihti tiroma qui. ³⁰ Miin mecayaho mequeman yometsohtax hohchamis hihxon, mextexon potahue. Jayajoma hihqui siri que ma bi ta mia chihi janin moanma potahah hihti tiroma qui.

Haibo potatima Jesusen yohihi
(Mt 19.9; Mr 10.11-12; Lc 16.18)

³¹ Huetsa yohini joi jai: Miin haibo potaxon jahuen quirica hinanahue, min queenyamascai honanahbo. ³² Jascanihbaan bi tah hen hean mato yohihi: Jan tsinihi ma bi miin haibo potaxon tah min mianbi jaa tsinimahi. Huetsa jonin potahi haibo hihquihinx tah min miabi tsiniscail, hohchaya.

Quesatima Jesusen yohihi

³³ Huetsa noquen xenibaan yohini joi rihbi tah man honanscai: Noquen Hihbaan janen quenaxon yohiquin tah min parantimascai. Jahuen janen quenaxon yohihi tihibi tah min hahcointihi. ³⁴ Jasca janibaan bi tah hen hean mato yohihi: Noquen Hihbaan janen quenaxon yohitima tah man jai. Jahuabi quenaxonma yohiti tah man jai. Naihoh quehabo quenayamanahue. Jaa ta janoxon Papan yonohi qui. ³⁵ Mai mehabo quenahaxma rihbi yohuannahue. Jaabo ta jahuen hahqui tapiti qui. Jerusalem jema rihbi quenahaxma yohuannahue. Jaa ta quiquin hapon jema qui, Papan raanyaxihqiton jema. ³⁶ Miin mapo rihbi quenahaxma yohuanhue. Ni huesti boobi tah min joxocahinmatimahi. Huisocahinmati rihbi tah min hahtipahyamahi, ni huestibi. ³⁷ Yohicatsihquin tah min yohirestihi. Jeenhihyamahax, Hihyamahi rahan hihreshue hihcointi yohuan. Jahuabora quenati shinanbo ta tiroma yoshiman hinanah shinanbo qui.

Copiyamanahue hihqui Jesus
(Lc 6.29-30)

³⁸ Huetsa yohini tah man honanrihbihi: Bero copiquin tah min bero poshabahintihi. Xeta copiquin tah min xeta potamatihi. ³⁹ Jascari janibaan bi tah hen hean mato yohihi. Mia tiromajahahbo bi tenereshue. Mecayaho mia bebasah bi ramiho sca jismahue. ⁴⁰ Mia demandanxon miin camiseta mia bichincatsihquiboya, hinanahue. Hinanxon miin coton rihbi hinanahue. ⁴¹ Mia yonoxon, Huesti hora hea papixonhue hahca, rabe hora jaa papixonhue. ⁴² Mia yocacah hinanahue. Hea hinantahhue hahca, Nea tah qui hahhue.

Maton rahuibohon shinannahue hihqui Jesus
(Lc 6.27-28, 32-36)

⁴³ Huetsa yohini joi tah man honanrihbihi: Miin hahbe jihuetaibohon queenxon bi tah min miin rahuibo jistahihmatihi. ⁴⁴ Jascari janibaan bi tah hen hean mato yohihi: Maton rahuibohon shinannahue. Mato tiromajahahbo bi jato yocaxonnahue. ⁴⁵ Jascajaquin jaax tah man maton naihoh queha Papan baquebo man jatihi. Jahuen barin ta jatihibi xabajaxonihqui, siriboya tiromabo. Jaan raanah ta hoi rihbi joxonihqui, siribo betan tiroma jonibaan jene bihnon. ⁴⁶ ¿Matohon queenaibohon res man shinanaia jahua Papan mato hinantihiquin? Coriqui cobrannicabaan bi ta jascajaquin jatohon queenaibohon res shinanihqui. ⁴⁷ ¿Maton huetsabo res man Johue hahcaiya, man jaa copi hihti siribo quin? Nahuabo ta jascapah qui. ⁴⁸ Hen mato yohihi nincacax shinancoinyahpanahue, maton naihoh queha Papa shinancoinyahpa hihqui quescari.

6

Sirijaquin hahxoncoinhue hihqui Jesus

¹ Caibo yanapananquin hahcoinnahue. Jonibaan jison hihxon res man hahmis. Man hahxoncoinyamahiya ta maton naihoh queha Papan mato jahuabi hahxontimahiqui. ² Pishinaibo yanapannoxon jato pishca hinancatsihquin, tsoabi yohixonma hinancoinhue, yanapancoinquin. Shinancoinihcamahibaan hahcai quescajayamahue. Jaabaan hinanai ta tsinquti xoboho jahuibo yohixon bahin cahibo rihbi yohicaniqui, siri joni hihqui shinannahbo hihxon. Nincanahue hen mato yohinon: Jato qui siripi yohuanai pishca res ta jatihiqui. Papan ta jato jahuabi hinantimahiqui. ³ Jaa copi tsoabi yohixonma

hahxoncoinhue, miin huetsa bocabi tah min yohitimahi. ⁴ Tsoan honanahma bi joni huetsa min yanapancoinaia ta Papan mia jisiqui. Jaan ta mia hashoan siribo sca hinanyaxihquiqui.

Papa yocati Jesusen haxemahi
(Lc 11.2-4)

⁵ Papa yocanoxon tsinquitax, shinancoinhcamahibo quescayamanahue. Huetsabaan jato jisnon hihquish ta tsinquit xobohoxon yocati queencaniqui. Jano jonibo huinotai janin nihxon rihbi ta yocati costancaniqui, caibaan jato jisnon hihquish. Nincanahue hen mato yohinon: Papan ta jascapahbo jahuabi hinantimahiqui. ⁶ Papa Dios yocacatsihquish, tsoa jano yamaha janin chiqueho hihquixon, xehpoti xehpoxon, Papa yocahue. Jaan ta mia jisiqui. Mia ta hahxontihiqui.

⁷ Tsinquixon Papa yocaquin, yanca res joi tsamanyamarihibinahue. Nincacoinyamahibaan hahcai quescajayamaquin. Joi tsamanxon Dios nincamati shinan ta jacanihqui, jascajati que ma bi. ⁸ Jaa copi jaabaan yohihi quescajayamanahue. Man yocarihyamahi bi ta maton Papan jahua man pishinain hihxon honanscaiqui. ⁹ Jaa copi nescajaquin yocanahue:

Noquen naihoh queha Papan, mia Papa Dios jai honanahbo jahue.

¹⁰ Miin jihuetahbo non janon, noque hihbojahue. Min nai hoque hahcai quescajaquin neno rihbi hahhue, mia queenai quescabijaquin.

¹¹ Nea neten piti noque hinanhue.

¹² Noquen hohcha rihbi sohuahue. Noque qui tiromahibaan bi tah non jaa shinanxonma jato sirijaquin yohuanquihnai. Jascajaquin rihbi noquen hohcha sohuaxon jaa shinanyamascahue, Papan.

¹³ Satanasnen noquen coshi tanatihi janin noque hioyamahue, Papan. Satanas noque bihmayamahue.

¹⁴ Joni huetsa mato qui tiromahi bi jaa tiromahi man shinanxonma sirijaquin yohuanquihnaiya ta maton naihoh queha Papan rihbi man tiromahi shinanyamahiqui. ¹⁵ Mato qui tiromahibo man shinanparihiya ta maton hohcha rihbi maton Papan shinanparihiqui. Jaa copi hen mato yohihah quescajaquin yocanahue.

Piti tenehibo

¹⁶ Piti tenecatsihquin shinanihcamahibo quescajayamanahue. Benati hihcamahax ta behcashcainax huetsapahcaniqui, caibaan jato jisnon hihquish. Nincanahue hen mato yohinon: Papan ta jato jahuabi hahxontimahiqui. ¹⁷ Piti tenecatsihquin jaabaan hahcai quescahaxma bohuehextax bepanohtax nihnahue. ¹⁸ Man piti tenescai jismaxonma maton Papa huestichin mato jisnon hihxon hahnahue. Jatihibi jisnicahxon ta maton Papan mato hahxonyaxihquiqui.

Naihoh Papan bexojaxonai
(Lc 12.33-34)

¹⁹ Mai meha jahuaborabo hichajanoxon tsinqui tsinquieramanahue. Mai mehabo ta mahsaman pihiqui, yamibo rihbi ta pohihiqui, texe rihbi ta yometsohbo hihquixon bohancaniqui. ²⁰ Naihoh caya bexojanahue, jano hicha jayanoxon. Jano ta mahsamanbi pitimahiqui, jahuabi rihbi pohiyamahi, jahuabi rihbi tsoanbi hihquixon bichinyamaquin. ²¹ Jano man bexojahi janin tah man maton shinan camatihi. Jaa copi tah hen mato yohihi.

Noquen jointi xabajahi joi
(Lc 11.34-36)

²² Noquen shinan ta noquen bero quesca qui. Noquen bero siripan jisquin hahcajaquin tah non noquen shinan siripan shinanax nichu. Yohuashihyamahi. ²³ Miin bero tiro-mayaxon jiscatsihxon min jaamajaquin jisi quescajaquin rihbi tah min tiroma shinaman shinanax yohuashihscai. Jascapa shinanyahpahax tah min bahquish chian baneparihi, hihti yametai janin.

Noquen Hihbo huesti hahxonti
(Lc 16.13)

²⁴ Patoroyapascaxon tah min jaa sirijaquin teexonhanan huetsa patoro rihbi jaatianbi sirijaquin teexontimahi. Huetsa queenxon bi tah min huetsa sca jistahihmatihi. Jascayamaxon tah min huetsa sca hahxonquin sirijaxon bi huetsa rihbi nincayamascatihi. Jascajaquin rihbi tah man jahuaborabo tsamannoxon jano maton shinan camahahan, maton Papa Dios teexontimahi.

Papan jahuen baquebo coiranai
(Lc 12.22-31)

²⁵ Jaa copi tah hen mato yohihi: Maton piti copi masa shinanyamanahue. Jahua hen piyaxihquin jahua hen xehayaxihquin hihxon masa shinanyamanahue. Jahua hen sahueyaxihquin hihyamaribihi. ¿Pihí res non jihuetaín? ¿Chopa sahuenoxon res non yora jain? ²⁶ Hihسابo jai shinannahue. Jaabaan ta banayamahihqui. Tsinquiyamaquin. Piyanoxon jahuenbi rihbi bexojayamaquin. Maton naiho queha Papan ta jato coiraniqui. Mato rihbi ta hahxontihiqui. Mato tah man pehiyahpabo mentan hashoan copi qui. ²⁷ Heen shinaman bi hashoan queyanihpan hihquish bi tah min jahuabi queyanihtimahi.

²⁸ Jascajaquin rihbi ta chopa copi masa shinannahue yanca res qui. Joa siribo jenquetsax hanihiquin hihxon shinannahue. Jahuabi ta teeyamacaniqui. Toroxahcaxma bi ta siri chopayahpa quesca hihhi siribo qui. ²⁹ Hen mato yohinon nincannahue: Quiquin hapo Salomon hicha chopa siribo japahonish bi ta jahuen raotiyahpahax huesti joa betan senenyanamishqui. ³⁰ Nihi naman joabo hicha joconax cainipi bi tah non huaijaxon jato coharesai, copima copi. ¿Copi que ma bi Papan jato sirijati shinannihxon mato sca jan hashoan sirijaxonti shinantimahiquin? Jaan mato hahxontihí honancoinnahue. ³¹ Jaa copi masa shinanyamanahue. Hahrai, jahua non piyaxihquin, Jahua non xehayaxihquin, Jahua non sahueyaxihquin hihxon masa shinanyamanahue. ³² Nincayosmabaan ta jascajaquin masa shinanihqui. Mato tah man jascajatimahi. Man pishinaí ta maton naiho queha Papan jatihibi honanscaiqui. ³³ Papan jihuetahtboti pari shinannahue. Jahuen jihuetahtboxon jaa queenajitibo pari shinannahue. Jaatian ta man pishinaíbo jaan mato hinantihiqui, jatihibi. ³⁴ Jaa copi, Bahquish jahua jayaxihquiquin hihxon masa shinanyamanahue. Bahquish jayaxihquibo nocohihnataiya pari tah man jaa tenetihi. Man bahquish teneyaxihqui tah man rahma shinanti pishinyamahi.

7

Joni huetsa non join namanjatimahi

(Lc 6.37-38, 41-42)

¹ Min hahcai quescajayamaquin caibaan huetsapahaquin hahcai jisish, Jaa ta tiroma joni qui hihyamahue, min shinanai quescajaquin rihbi Papan mia jascajaribixonnon. ² Man huetsa joni jisxon shinanai shinaman ta Papan rihbi mato jascajaquin rihbi yohitihiqui. Man caibo hahxonai quescajaquin rihbi ta Papan mato hahxontihiqui. ³ ¿Miin bero qui jihui jai bi miin huetsan bero qui jai poto pishca min jistihin? Miin bero qui jai jihui pari shinanhue. ⁴ ¿Miin bero qui jihuinhhuan jaiya miin huetsa min yohitihin, Miin bero qui jai poto pishca hen tsecanon tenehue hah min jatihin? Min tah min jascatimahi. ⁵ Jisyamaxon bi jahuen poto tsecacatsihquin tah min hahcoinicamahi. Miin bero qui jai jihuinhhuan pari potahue. Jaatian tah min jisti hahtipahscaxon jahuen bero quiha jaa poto pishca tsecatíhi.

⁶ Papa qui hinantibo hochiti qui hinanyamanahue. Maton hihti copibo rihbi cochi hinanyamanahue. Man hinannah, jaa jama jamaxon mato sca picanmis.

Non yocacah Papan noque hinantíhi

(Lc 11.9-13; 6.31)

⁷ Papa Dios yocannahue jan mato hinannon. Manotaíbo bena benaquin quescajaquin yocannahue jan mato meramanon. Jahuen xehpoti ton tonhahquin hahcajanahue yocaquin jan mato hinannon. ⁸ Yocanica rahsichin ta bihtihiqui. Benanicaten ta meratihiqui. Ton tonhahnica ta Papan hinantihiqui.

⁹ ¿Miin baquen mia piti yocacah bi macan sca min jaa hinantihin? Jascapa bebo ta yamahihqui. ¹⁰ ¿Min mishquitanaí yapa mia yocacah min rono hinantihin? ¹¹ Man tah man jascapahbo hinantimahi. Jaa copi shinancoinnahue. Tiromaboxon bi maton baquebo siri jahuaborabo hinanti man honanaiya, ¿maton naiho queha Papan mato hashoan siribo rihbi hinantimahiquin man yocacah?

¹² Jaa copi nea shinan bihnahue: Hea hahxonahue jacatsihxon jato pari jascajaquin hahxonhue. Moisesnin huishani ta jascarihibi qui. Texe Papan joi yohinicabaan huishani, jascarihibi.

Papan bahi hexti pishca

(Lc 13.24)

¹³ Papan bahi qui hihquiti ta hexti pishca qui. Jano hihquinahue. Queyonicabo janin cahi bahi ta hihquiti hanyahpa qui. Jaa bahi ta hihtihosí bahi qui, jahan cahibo rihbi hicha. ¹⁴ Papan jihuetahtbo janin cahi bahi ta hexti pishca cainih qui, jahuen bahi rihbi hanitahma pishca. Jahan cahibo ta hicha yamahiqui.

Bimi jisxon non jihui yora honanai

(Lc 6.43-44)

¹⁵ Papan joi yohiquin bi quesajahibo qui coiramenahue. Maton huetsabohihcamahax ta bemacanya mato quescapahbo qui. Mato paraxon ta mato tiromajascatihqui. ¹⁶ Jaa copi jenquetsih jihuetihquin hihxon jaton shinan honanquin sirijanahue. Pani moxa quilha ta tsoanbi xexon bimi bihtimahiqui. Bocon jihui quilha rihbi ta tsoanbi binon bimi bihyamahiqui. ¹⁷ Jascarihbi ta jatihibi siri jihui bimi siriyahpa qui. Xanascai jihui ta tiromabo bimiyahpa rihbi qui. ¹⁸ Siri jihuin ta jahuen bimi tiromajati hahtipahyamahiqui. Xanascai jihui rihbi ta siri bimiyahpatimahiqui. ¹⁹ Bimi sirijoma jihui jatihibi ta Papan reraxon cohayaxihquiqui. ²⁰ Jascajaquin jaton bimi tanaxon jihui yora honanquin hahcajaquin mato qui nocotaibo honannahue, jaton shinan honanquin.

Papa janin nocoyamahibo
(Lc 13.25-27)

²¹ Hea Hihbon Hihbon hahcaibo ta caibo Papan jihue janin nocoyamayaxihquiqui. Heen naihoh queha Papa queenai quescajahibo res ta jano nocotihiqui. ²² Jato casticanti nete nocotaia ta hichaxon hea quenayaxihquiqui: Hihbon, Hihbon. Miin janen tah non jonibo miin joi yohiniqui. Tiroma yoshinbaan joni hihbojahiya tah non miin janen sca jaa tiroma yoshinbo camaniqui. Miin janen tah non hicha hahan rahtetibojaniqui, Hihbon. ²³ Jaatian tah hen jato yohiyaxihqui: Mato tah hen jahuentianbi honanyamaniqui. Nenohax botannahue, tiromahibaan.

Xobojahi rabe
(Lc 6.47-49; Mr 1.22)

²⁴ Caibo jascapahbo copi tah hen nea mato yohihi: Hean yohihi joi nincaxon hen yohihi quescabijaquin hahcai joni ta shinayahpa qui. Shinanyahpaton hahni quescajanica. Shinanyahpaton ta xobo jihui bo nichinnoxon mixan mai caman poquinxon xobojanishqui. ²⁵ Hoi sca ta quexto paquenishqui. Jenenhuan sca jahui. Nihue rihbi coshin bi res jahui. Jene betan nihuen tsahca tsahcaxon bi ta jaa xobo potayamanishqui, mixan mai caman jahuen xobo jihui nichinipi quen. ²⁶ Hean yohihi nincaxon bi hen yohihi quescajama jaibo ta jascapahmabo qui. Jaabo cahen honanma joni quescapahbo. Honanmanen cahen neminna poquinxon mashin xobojanish. ²⁷ Jaatian ta hoi quexto paquenishqui. Jenenhuan jahui. Nihuenhuan rihbi jahui. Joxon jahuen xobo hueranxon poxabahinquin. Champacahinax ta xobo metisihscanishqui.

²⁸ Jesusen jato jascajaquin haxemaha ta tsinquijaquetaibo rahte rahtenishqui. ²⁹ Jaton haxemanicahbaan haxemahi quescajamaquin bi ta yohiti shinan Papan hinanah jaanbi honanxon jato yohinishqui. Jaa copi rahtecani.

8

Sipiyah Jesusen rohajani
(Mr 1.40-45; Lc 5.12-16)

¹ Jato haxemahax, mahchi janinhax botopaquetax jahuiya sca ta hicha jonibo hahqui tsinquijaquexon chibanbenacannishqui. ² Jahuiton sca ta huesti sipiyahpa joni behchihi cahax jaa bebonbi betihihpaquexon, yohinishqui:

—Hihbon. Mian tah min hea rohajati hahtipahi. Jeenhixon res tah min hea rohajatihi, Hihbon —hahquin. ³ Sipiyahpa mehaxon, Jesusen sca yohiquin:

—Jeen. Roha sca jahue —hahquin. Jan yohihitianbi ta sipiyahpa rohacahinnishqui.

⁴ —Hen mia yohinon nincahue. Tsoabi yohihaxma caxon sacerdote jismatanhue. Moisesnin yohini quescabijaquin hinanti pishcaya cahue, rohacaxon hinanti. Jascjaxon tah min jato nincamatih —hahsaquin Jesusen.

Capitanen joni Jesusen rohajahi
(Lc 7.1-10)

⁵ Capernaum jema janin sca nococani. Jema janin nocotaia bi ta sontaro capitan joxon hihti yocanishqui.

⁶ —Hihbon, heen joni ta yoran honanyamajaquetax heen xoboho racatihqui. Hihti hisin ta jaiqui —hahquin.

⁷ —Hen tah hen rohajahi cah —hahsaquin Jesusen.

⁸ —Hea tah hen jahuama qui, Hihbon, heen xobo janin mia mapeti tah hen rabinai. Min rahma nich i janinxonbi yohihue. Min yohihah ta heen joni rohanoxihquiqui. ⁹ Hen tah hen honanai. Heen hapon hea yohihah tah hen hahcai. Heen sontarobo rihbi tah hen jai. Cahue hean jaah ta heen sontaro cahiqui. Huetsa hen Johue hahca ta jahuiqui. Heen joni rihbi tah hen Nescajahue hahcai. Yohihah ta hen yohihi quescajaquin hahquiqui —hahsaquin capitanen. ¹⁰ Capitan yohuanai nincacax ta Jesus rahtenishqui. Chibanaibo sca yohiquin:

—Mato yohinon nincanahue. Nescapa shinancoinnica tah hen mato Israeli baquebo merayamahi. ¹¹ Mato tah hen yohihi, nincanahue. Hocho quehax ta maton nahuabo beyaxihcanihqui, caibo bari cainai quirihax, caibo bari hihquihi quirihax. Bexon ta Papan jihuetahboxon jahuen jihue janinxon Abraham betan piyaxihcanihqui. Isaque betan Jacobo rihbi ta fiestajaquin manayaxihcanihqui. ¹² Papan jihuetahbo man hihtih bi ta bahquish chian mato potayaxihqui, jahuen jihuemati quihah. Jano tah man coshin huaohihanan xeta yeres yeresahyaxihqui. ¹³ Jato jascajaxon, capitan sca yohiquin:

—Cahue. Min hihcoinjaquin shinanai quescabijaquin tah hen hahxonai —hahquin. Jaatianbi ta jahuen joni rohacahinscanishqui.

Pedron haita Jesusen rohajahi

(Mr 1.29-31; Lc 4.38-39)

¹⁴ Jaa pecaho ta Pedron xobon sca mapexon Pedron haita yona yonatai Jesusen meranishqui, hisini racatai. ¹⁵ Jahuen mequen qui Jesusen mehehah ta yona tantiscanishqui. Rohacahinax huenixon jahuen haitan jato pitijaxonquin.

Hicha hisinaibo Jesusen rohajahi

(Mr 1.32-34; Lc 4.40-41)

¹⁶ Huetsa neten bepichaiya sca ta yoshiman hihbojahibo hihuecannishqui, hihti caibo. Hisinai rahsi. Yohixon res ta jaton tiroma yoshinbo potanishqui. Hisinaibo rihbi rohajaquin, jatihibi. ¹⁷ Jascajaquin ta Papan joi yohinica Isaiasnen yohini quescas sca janishqui: Noquen hisinbo ta jaanbi bichinxonnishqui. Non hahan hisinaibo jaan potaxonquin hihqui Isaias joi.

Jesus chibancatsihquibo

(Lc 9.57-62)

¹⁸ Jonibo hahqui tsamajaquetai jisxon:

—Hoque quexa canon bonahue —Jesusen hahquin jahuen haxenicabo. ¹⁹ Cahi cahiya sca, jaton huisha honan huesti joxon Jesus pataxxon, yohiquin:

—Jatihibi janin min cahi tah hen mia manahi catihi, Maestron —hahquin.

²⁰ —Mari ta mai quiniyahpa qui. Hihسابo rihbi ta nahayahpa qui. Hea cahen jascayamahi. Hea noque baque cahen jano hoxati yamahan —hahscaquin Jesusen. ²¹ Huetsa rihbi sca jahuen haxenica jahui. Joxon:

—Hihbon, mihbetan capanan tah hen heen papa mahuataiya mihinax pari hen cayaxihqui mihbetan —hahquin.

²² —Hea manahi jotatahhue. Hahbe mahuayaxihquibaan mahuataibo mihinnon jenehue —hahquin Jesusen.

Nihueyahpa behchon Jesusen tantimahi

(Mr 4.35-41; Lc 8.22-25)

²³ Jaatian sca, nontin nanetaiya, jahuen haxenicabo rihbi hahbetan naneti. ²⁴ Cahiboya sca nihuehnhan jahui. Behchon hanibo nihuen potajaquetana nonti mahpohah nonti hihquicatsihscas. Hihcax bi Jesus racapaquetax hoxascai. ²⁵ Mohinxon sca yohicanquin:

—Non tah non hihquihi, Hihbon. Noque jahueja ra jaxonhue —hahcanquin. ²⁶ Mohinahbo sca:

—¿Jahua jenquetsih man raquetain? Hihcoinai shinanxon bi tah man hicha nincayamahi —jato jaquin. Huenixon sca nihue yohixon hian rihbi yohiquin tantiscahabo. Yohihah, tanticahinscai. Siriscai. ²⁷ Hian tantihi jisish, rahte rahtecani.

—¿Jahuentiho coshiyahpa cohren jaa quin? Hianbocabi ta yohihiqui. Nihue rihbi ta jaan yohihiqui —hihcani.

Gadara janinhah yoshinyahpa

(Mr 5.1-20; Lc 8.26-39)

²⁸ Hoque quexa sca nococani, Gadara mai janin. Mapetaiya sca jaa behchihi rabe joni jahui, yoshiman hihbojahi joni rabe. Tsahon tocan mehax rabebi jahui, sinabo rabe, hihti coshi. Sinataibo copi ta jano huinotai bahin tsoabi cati hahtipahyamapahonishqui. ²⁹ Sai saihihxon coshin quenacanquin:

—¿Jahuejahi min noque jai jahuin, Diosen baquen? ¿Noque potati nete nocorihyamahi bi min noque potahi joresscain? —hahcanquin. ³⁰ Jaa hoque tocan ta hicha cochi repinica phi nihninishqui. ³¹ Jaa cohibo qui sca hihquinoxon, yoshinbaan hihti yocascaquin:

—Noque potaxon, hoa cohibo qui noque raanhue —hahcanquin.

³² —Botannahue, tahca —hahscaquin. Jaa jonibo jenebahini sca cochi qui sca bocani. Yoshin jato qui nocotah, cahi, bishquihicanahi cahi, tirisihpaquetax jene qui paquetax hahsacani, jatihibi.

³³ Jatón cochi coirannicahbo sca jabacahini caxon jema janin yohibonaquin. Jatihibi yohicanquin, yoshinyahpa hihpahoni rabe rohascai yohirihbicanquin. ³⁴ Yohihahbo picoscacani, jano jihuetaibo jatihibi. Jesus behchihí caxon, meraxon:
—Noquen maibo jenebahini catahtanhue —hahcanquin.

9

Yora honanyamajaquetai Jesusen rohajahi
(Mr 2.1-12; Lc 5.17-26)

¹ Nanetax sca, pohquequihranax Jesus jano jihuepahoni jema qui sca nococani. ² Jano ta yora honanyamajaquetax racatai joni sca Jesus qui hihuecannishqui. Jahuen racatininbi huaquehihnixon hihuecanquin. Jaa jan jato rohajaxontihi shinancoinai jisxon, racatai joni Jesusen yohiquin:

—Raquyamahue, baquen. Miin hohcha tah hen sohuaxonai.

³ Jan jascahiya, jano jai jonibo shineamehti, jatón huisha honanbo. Jatón jointinin yohuancani. Nea joni ta Dios yohuanihcamahi yohuanihqui, hihcani. ⁴ Jahua jatón jointinin shinanihquin honanxon, Jesusen jato yocaquin:

—¿Jahua copi man matón jointinin tiromajaquin shinainai? ⁵ ¿Jahuemeha hashoan teema yohiti quin? ¿Miin hohcha tah hen sohuaxonai hahquin? ¿Huenihihnatax nihaquetanhue hahquin? ⁶ Jaabi, noquebaque hihxon hean mainxonbi hohcha sohuaxonti hahtipahi honanxonon, jisnahue —hahxon sca, yoran honanyamajaquetai yohirihbiquin:

—Huenihihnaxon miin cacajati bihbahini miin xobon catanhue —hahquin. ⁷ Jascahah, huenicahini jahuen xobon cahí. ⁸ Jaa jisibo ta rahte rahtenishqui. Rahte rahtetax bi noquen Papa qui siriresi yohuancani.

—Noquen Papan coshin hahxonai tah non jisi. ¿Yotiho coshi Papan jaa hinanihquin? — hihcani.

Jesusen Mateo quenahi
(Mr 2.13-17; Lc 5.27-32)

⁹ Janohax caxon, tininti cobranxonai joni Jesusen meraquin. Jano tsahoxon cobranti misa janin tsahotaiton meraquin Mateo janeya joni. Meraxon:

—Hehbe cahí johue —hahquin. Jascahah, huenicahini jaa manahi cahí.

¹⁰ Jaatian, Mateon xoboho pihi cahax, pihiboya hicha jonibo jato manahi becani, cobranxonnicabo betan hohchayahpabo. Pihi benahue hahca becani. Jahuen haxenicabo betan Jesusen pihiya jato manahi becani. ¹¹ Jascapa mesco jonibo jisxon sca, fariseobaan jahuen haxenicabo yocaquin:

—¿Jahua copi cobrannicaboya hohchayahpabo betan matón haxemanicahten pihiquin?

¹² Yocacaibo nincaxon, Jesusen jato yohiquin:

—Hisinyamahibo ta rahonnica pishinyamahiqui. Hisinyahpabo caya ta rahonnica pishinihqui. ¹³ Nea huisha joi jahua hihcatsihquiquin honantannahue: Man joni huetsahon shinanti tah hen queenai. Matón hohcha copi man hea jahuara hinanti tah hen queenyamahi. Jaa huisha honantannahue. Pontebo quenahima bi tah hen pontemabo quenahi joniqui —jato jaquin.

Non piti tenetihin hihquibo
(Mr 2.18-22; Lc 5.33-39)

¹⁴ Jaa pecaho sca Juaman haxenicabo Jesus qui nocoti. Nocoxon yocacanquin:

—¿Jenquetsahpahi noquen non hicha piti tenehi bi miin haxenicabaan piti teneyamahiquin? ¿Jenquetsahpahi fariseobaan rihbi hicha piti tenehi bi miin haxenicabaan piti teneyamahiquin? —hahcanquin.

¹⁵ Jascahahbo Jesusen jato yohiquin:

—Jatón huetsa huanomahi caxon ta tosanbi huanomahanan benáyamahiqui. Huetsatian ta jatón huanomati yamascatihiqui, Papan jato bichinah. Jaatian pari ta piti teneyaxihcanihqui.

¹⁶ Chopa payo honacatsihquin tah non hotsihahma chopa behna bihxon jayaxon coton payo honayamahi. Jayaxon honahah bi ta hotsiscaxon chopa behnapan payo huaxarihbiscatihiqui, hashoan hani sca jahuen huaxa janón. ¹⁷ Noquen xehati behna rihbi tah non bichi borasa payo qui bochojayamahi. Non bochojaha bi ta xehati pahescaiya borasa pohtoshihtihiqui, noquen xehati yohyocohscanon, noquen borasa rihbi tiromascanon. Behna borasa qui tah non behna xehati bochojahi, rabebi manoyamanon.

Chixanan hisinai haibo Jesusen rohajahi; hihresscai xontaco Jesusen teehihmahí
(Mr 5.21-43; Lc 8.40-56)

¹⁸ Jesusen jato jascajaquin yohihiya bi huesti hapo nocoti joxon, raboxonen tisquihahpaquexon yohiquin:

—Heen baque haibo ta rahma hea mahuaxonaxqui. Jaabi cahue. Miin mequeman mehaxonhue. Mian mehehah ta teehihribitihiqui —hahquin.

¹⁹ Jan jascahah, huenicahuanax hahbetanbi Jesus cahi. Jahuen haxenicabaan rihbi chibanbahinquin. ²⁰ Bohibaan bi huesti haibo rihbi cahi, Jesus pataxcatsihqui. Doce bari sca jimi pota potahi haibo. Hahchonbi caxon jahuen coton quexa mehequin. ²¹ Jahuen coton res mehexax tah hen rohatihi hihxon, mehequin. ²² Jaatian rabejaquexon jaa haibo jisxon, Jesusen yohiquin:

—Raqueyamahue, baquen. Shinancoinax copi tah min roha sca jai —hahquin. Jaatianbi ta haibo rohanishqui.

²³ Jaatian hapon xoboho Jesus mapeti. Rehue hahcaibo betan corotaibo tsamatai meraxon:

²⁴ —Botannahue. Xontaco ta mahuayamahaxqui. Hoxa res ta jaiqui —jato jaquin. Jato jascahah bi hosan hosancanquin. ²⁵ Tsamataibo picohax, chiqueho hihquixon, xontaco mehuetanah, huenicahuani. ²⁶ Jan jascajaquin jaa teehihmahah ta jaa mai jatihibi janin yohuanchanicanacannishqui, jano jihuetaibo.

Rabe benche Jesusen rohajahi

²⁷ Janohax Jesus cahiya sca benche rabechin chibanxon quenabonaquin.

—Noquehon shinanhue, Davidi baquen. ²⁸ Jahuen xoboho Jesus nocotah pecaho sca benche rabe rihbi nocoti.

—¿Hen mato hahxonti man shinancoinain? —jato jaquin.

—Shinancoinquin rahan, Hihbon —hahcanquin. ²⁹ Jaton bero mehaxon sca:

—Man shinanai quescabi janoxihnahue —jato jaquin. ³⁰ Jato yohihah, jisresscacanquin.

—Tsoabi yohiyamanahue, mato tah hen yohihi —Jesusen jato jaquin, hihti yohiquin.

³¹ Yohiyamahue hahca bi ta janobo jatihibi janin caxon jan jato hahxonah yohibonacannishqui.

Joyo Jesusen rohajahi

³² Jaa benche rabe jahuen xobo janinhax picotaiya bi ta joyo joni hihuecannishqui, yoshiman hihbojahi joni. ³³ Jahuen yoshin potamaha ta yohuanscanishqui. Jaa copi ta tsamajaquetaibo rahtenishqui.

—Jascajaquin hahcai joni ta noquen xenibaan jahuentianbi jiszymanishqui —hihcani.

³⁴ Jascaraibaan bi fariseobo jascayamahi:

—Tiroma yoshiman yanapana ta yoshinbo camahihqui —hihcani.

Jatohon Jesusen shinanai

³⁵ Jano jai jemabo jatihibichin ta Jesus nihnishqui, hani tahma jemabo janin rihbi. Jaton tsinquiti xoboho jato betan tsinquixon jato honanmaquin. Papan jihuemati nete ta nea pishca sca jaonahiqui jato nincamaxon jaton hisinbo jatihibi rohajaquin. Jatihibi yosmahibo sirijaquin rohajaquin. ³⁶ Tsamataibo jisxon ta jahuen jointinin jatohon shinannishqui. Jaan jisi ta tiromajaquin rishquiha quescapahbo jacannishqui. Jaton coirannica yamahiya carnerobo jabisai quescapahbo. ³⁷ Jato jisxon ta jahuen haxenicabo yohinishqui:

—Papa bihxonquin tsinquiti ta hicha qui. Tsinquinica bo res ta hichayamahiqui. ³⁸ Jaa copi tsinquimanica yocanahue hashoan hicha jan raannon, jahuen tee hahxonni behábo.

10

Jahuen haxematibo Jesusen caisai

(Mr 3.13-19; Lc 6.12-16)

¹ Jaa pecaho sca jahuen doce haxenicabo quenamaxon, hahan yoshin tiroma potati coshi jato hinanquin. Hisinaibo rohajati coshi rihbi hinanxon, yosmahibo coshijati rihbi hinanquin.

² Jahuen haxenicabo ta doce janishqui. Jato bebohi ta Simon janeya janishqui, Pedro ca, jahuen jane huetsa. Huetsa cahen Andres, Simoman jochica. Huetsa cahen Jacobo, Zebedeon baque. Huetsa cahen Juan, Jacobon huetsa. ³ Huetsa cahen Felipe. Huetsa cahen Bartolomé. Huetsa cahen Tomás. Huetsa cahen Mateo, coriqui cobrannica hihpahoni. Huetsa cahen Jacobo, Alfeon baque. Huetsa cahen Tadeo. ⁴ Huetsa cahen Simon, Cananica hahcaibo. Huetsa cahen Judas Iscariote. Jesus paraxon bihmani.

Yohitannahue jan jato jai

(Mr 6.7-13; Lc 9.1-6)

⁵ Jaa rahsi jahuen doce haxenica ta Jesusen raannishqui.

—Nahuabo qui cahi bahin boyamanahue. Samaritano jemabo janin rihbi boyamanahue. ⁶ Janoboma bi Israeli baquebo qui botannahue. Jaabo ta noquen behnotai yohinahbo qui, carnero hahcaibo. ⁷ Jato qui caxon yohinahue, Papan jihuemati nete ta nea pishca sca jaonahiqui hahquin. ⁸ Hisinaibo jaiya, jato rohajanahue. Mahuataibo teehihmanahue. Sipiayahpabo rohajaxon sirijanahue. Yoshin tiromabo rihbi potannahue. Mato tah hen jaa coshi hinanresai. Jahuabi copi yohixonma jayaxon jato hahxonresnahue.

⁹ Jaya cati coriqui bihyanamahue. Coriquijoma tah man catihi, hanibo boxonma coriqui romishin boyamaribinahue. ¹⁰ Jaya cati borasa rihbi tah man botimahi. Coton huetsa boyamaquin. Zapato huetsa rihbi boyamaquin. Mepiti rihbi boyamaquin. Maton tee copi ta nincacaibaan mato pimatihiqui. Jaa copi tah man jaa rahsi botimahi.

¹¹ Jema qui nocoxon jaa hihamahiya xobo qui nocoxon tsoa jano shinayahpa joni jaiquin hihxon jato yohinahue. Jano mato Benahue jaibo janin jihuetahxon jato nincamanahue. Caribinoxon caman jaa xobohobi hoxanahue. ¹² Xobo qui mapenoxon jano jaibo yohinahue: Papan mato hahxonnon hahquin. ¹³ Mato Mapenahue jaiboya ta Papan jato hahxontihiqui, man yohihah quescajaquin. Mato Mapenahue jayamahiboya ta Papan jato hahxontimahiqui. ¹⁴ Jano mato nincacatsihyamahibo janinhax caxon, jeman nihxon maton zapato qui hueotai mai poto jato qui tahabahintannahue, jaton mai poto bocabi boyamanoxon. ¹⁵ Hen mato yohicoinnon nincanahue: Nete queyotaiya ta Sodon jema janin jihuepahonibo casticanxon, Gomorra jema janin jihuepahonibo casticanquin bi hashoan hihtijaquin jaabo mato nincacatsihyamahibo Papan casticanyaxihquiqui.

Noque tiromajayaxihquibo

¹⁶ Jistahi man. Hinobo tocan carnerobo canon quescas tah hen mato raanai. Jaa copi honanbo hihnahue, ronobo honan hihqui quescari. Hihcaxbi joni piyosma nobex hihqui quescari tiromabojatimabo janahue. ¹⁷ Jonibo qui coiramenahue. Mato bihxon ta jaton tintintibo qui mato hinantihiqui. Jaton tsinquiti xobohoxonbi ta mato rishqui rishquiyaxihquiqui. ¹⁸ Jaton hapobo qui ta mato botihiqui, jaton quiquin hapobo qui rihbi ta mato botihiqui, man heen jihuetahbo copi. Jano tah man heen joi jato nincamaxon, nahuabo rihbi man nincamatihi, Hen tah hen honanyamanihqui, Hihbon hihamahabo. ¹⁹ Mato bihmahah, masa shinani ¿jahua hen yohitihin, jenques hen jatihin yohuani? jayamanoxahnahue. Papan ta mato yohuanti shinanmatihiqui man jato yohinon. ²⁰ Man jaatian yohuanyaxihqui ta matonahma qui. Dios Yoshin ta maton janaya yohuanyaxihquiqui.

²¹ Heen joi nincacai copi ta huetsa jahuen huetsanbi hapobo bihmatihiqui rehtehahbo. Huetsa rihbi ta jahuen papanbi jascariibitihiqui. Caibo rihbi ta jaton baquebaanbi jato rehtetihiqui, jato qui sinaxon. ²² Man heen janen cahi quen ta jatihibichin mato jistahihmatihiqui. Mato jascajahibaan bi ta hen mato jihuemanoxon bihtihhi. Hen jonon caman man tenehiya ta hea janin sca Papan mato jihuemayaxihquiqui. ²³ Jaabi, mato tiromahiboya huetsanco botannahue. Yohicoin tah hen mato jai: Israeli jemabo jatihibi janin man cariyamahi bi tah hen joribiyaxihqui, hea noquebaque. Jaa copi tah hen mato yohihi: huesti jema janin mato tiromajahiya huetsa janin sca botannahue.

²⁴ Haxenica ta jahuen haxemanica mentan hashoan siri hihamahiqui. Teexonnicah rihbi ta jahuen patoro mentan hashoan hapo hihamaribihiqui. ²⁵ Maton haxemanica tiromajapahoniboya mato rihbi sca jascajahibaan bi jenimanahue. Maton hihbo tiromajapahoniboya mato rihbi jascajahabaan, heen hihbo jascáhahnibo quescas cahra hea jacanihquin hihquish jenimanahue. Tiroma yoshiman hah ta hea jacanihqui xobo hihbo que bi. Hea jascajahiboya ta mato heen teexonnicahbo hashoan rihbi sca jacantihiqui.

Noquen Hihbo huesti qui raqueti

(Lc 12.2-9)

²⁶ Jaa copi jato qui raqueyamanahue. Jonexon hahcaibo jatihibi ta Papan janibijayaxihquiqui. Jonetax yohuanai joi jatihibi ta jaabo yohuanai Papan janibijaquin nincamayaxihquiqui. ²⁷ Hen mato yamebo yohihi joibo neten rihbi jato yohiyaxahnahue. Hen baxexi jai joibo rihbi coshin nincamayaxahnahue. ²⁸ Rehtenoxon caman mato yora tiromajabahinti hahtipahibo qui raqueyamanahue. Maton yoshin ta jahuejati hahtipahyamacaniqui. Mato rehtexon ta maton yoshin rihbi chihi janin potati hahtipahi ta huesti qui. Hahqui caya raquenahue.

²⁹ ¿Huesti soro copi non rabe hihsa romishin maroyamahin? Copi que ma bi ta huesti res mahuataiya Papan jaa shinanbehnotimahiqui. ³⁰ Maton boo rihbi ta jahuentihhi jaiquin hihxon Papan honanihqui. ³¹ Jaa copi jahua qui raqueyamanahue. Mato tah man hicha hihsa mentan hashoan hihti copi qui.

*Cristonahbo**(Lc 12.8-9)*

³² Jonibaan nincanon hihquish Hea tah hen Cristonah qui hihqui jonibo jatihibi ta henabo qui. Heen naihoh queha Papa bebonxon tah hen Jaa ta hena qui hahtihí. ³³ Jonibaan nincanon hihquish Hea tah hen Cristonahma qui hihquibo rihbi ta henamabo qui. Heen naihoh queha Papa bebon tah hen jaabo yohíhi, jaabo ta henamabo qui hen hihtihí.

*Jesus qui raeyamahibo**(Lc 12.52-53; 14.26-27)*

³⁴ Joni huetsa betan siripi jihuetaibo rahsi janon hihquish hea jahui shinanyamanahue. Siripi jihuetaibo rahsi janonma bi sinacahinax rehtenanaibo janon tah hen joníqui. ³⁵ Jahuen papa qui huetsa sinanon tah hen joníqui. Haibobo rihbi ta jaton mamabo qui sinanica qui. Jahuen hihni rihbi ta jahuen yaya qui sinatihiqui. ³⁶ Huetsanah ta jahuen jenahaxbi jahuen rahuibo jatihiqui.

³⁷ Jahuen papa sinamis hihquish, jaa hihiyahahiya jahuen mama sinamis hihquish hehon queenyamahí joni ta henama qui. Jahuen bebo baque sinamis hihquish, jaa hihiyahahiya jahuen baque haibo sinamis hihquish hehon queenyamahí joni ta henama qui. ³⁸ Hea rehtehebaan bi tah hen heen Hihbaan joi jenetimahi hihxon hea chibanyamahax tah man henabo man hihtimahi. ³⁹ Noque rehtecanmis hihxon hea hihbomayahibo ta jascabiscatihiqui mahuatai. Heen joni jan hihqui copi rehtehebo ta hehbe jihuenica jascabi sca jatihiqui.

*Papan noque hinanyaxihqui**(Mr 9.41)*

⁴⁰ Mato Benahue hahcaibaan ta hea jascajaribicaniqui. Hea johue hahcaibaan ta hea raanni heen papa jascajaribicaniqui. ⁴¹ Papan joi yohinica jan copijahi quescajaribiquin ta jahuen joi yohinica Johue hahcaibo Papan copijayahiqui. Pontejaquin shinanai joni jan copijahi quescajaribiquin ta jaa ponte joni Johue hahcaibo Papan copijayahihiqui. ⁴² Heen haxenicaxon copi man nescapa baque pishca jiricatsihquiton jene paxa xehamanixon tah man Papan copijahah biyahaxihqui. Jaa man biyahaxihqui ta jenquetsahpabi manotimahiqui.

11*Nashimanica Juaman raanaibo**(Lc 7.18-35)*

¹ Jascajaquin jahuen doce haxenicabo haxemaquin queyohax res sca, janohax sca huetsa jeman haxemahi Jesus cahí.

² Jesusen jahuen coshiyaxon hahcaiya ta sipo xobohoxon joi nincaxon, jahuen haxenicabo Juaman raannishqui yocaqui bohábo. ³ Nocoxon:

—¿Hoa jahui joni hen yohini mia quin? ¿Jahui jatihquin huetsa, non mananon? — hahcanquin, Juan chaninoxon.

⁴ —Man jison nincacai Juan yohitannahue. ⁵ Benchebaan ta jisresscaiqui. Chantobo ta nihresscaiqui. Sipiayahpabo ta rohascaiqui. Pabebaan ta nincascaiqui. Mahuatahbo ta hahquirihbi teehihscáiqui. Jahuaborajomabaan ta joi siri nincáquihqui. ⁶ Heen joi nincacoinai joni rihbi ta hahan jenimati jaresscaiqui, jascajaquin yohitannahue—Jesusen jato jaquin.

⁷ Boresscaiboya, Juan jahua joni hin honanahbo hihxon jano tsinquitaibo Jesusen yocaquin:

—¿Jahua jisi man jano tsoa jaitonma caniquin? ¿Nihuen xayanaí tahuá jisi man catannihquin? ⁸ ¿Jahua cahra man jisi caniquin? ¿Hihiti siri chopá sahuehí joni nan? Hihiti siri chopá sahuehíbo ta quiquin hapon xoboho pari man meratihí. ⁹ ¿Jahua copi man caniquin? ¿Papan joi yohinica jisi nan? Jaa rahan. Mato yohinon nincannahue. Papan joi yohinica hax bi ta yohinica mentan hashoan coshi joibo jaa jaiqui. ¹⁰ Jaa yohihí ta nea huisha jaiqui:

Jise. Mia bebon canon tah hen heen raanti joni raanaí. Mia bahi bexojaxoni ta catihiqui, min jahan canon

hihqui jaa joi. ¹¹ Nincannahue hen mato yohicoinnon. Nashimanica Juaman yohihí joi mentan hashoan siri joi yohinica ta jahuentianbi jayamanishqui. Papan jihuetah res ta hashoan siri yohiti jaiqui. Caibo Papan jihuetahbo texe mentan hashoan namanhax bi ta hashoan siribo yohiti jaiqui.

¹² Nashimanica Juan jomenoni bi ta rahma caman jahuen hahbe jihuetihbo Papan coshin tsinquihiqui. Mohi mohinihbaan ta jaa joi histon bichiqui, jahuen jihuetahbocat-sihxon. ¹³ Juan yohihí jonon caman ta Cristo jotihí Papan joi yohinicabaan huishaxon

yohipahonishqui. Moisesnin huishani janin ta jascarihibihiqui, jaa joi rihbi. Jaa copi ta Juaman jato yohihah histon sca bihcanihqui. ¹⁴Nincati shinanyahpaxon nea nincanahue. Elías janeya ta joyaxihquiqui hahquin ta Papan joi yohinicabaan huishanishqui. Juan ta jaa Elías qui. ¹⁵Pabinquiyahpaxon nincanahue, hen mato yohihi.

¹⁶Rahma jihuetai bo jahua quescapahbo hin hen mato nescajaquin yohinon nincanahue. Baquebo jaabo rahsi shirohi notsihi sinacananai quescapahbo ta jaabo qui. ¹⁷Man bairahnon hihxon non rehue hahcai bi tah man bairahyamahi. Non huinihah bi tah man huaohiyamahi hih ta jacanihqui notsihi. Rahma jaibo ta jascarihibihiqui. ¹⁸Joxon ta piti siribo Juaman piyamanishqui. Xehati rihbi ta xehayamapahonishqui. Jaa copi ta Yoshiman ta jaa hihbojahiqui hihcanihqui. ¹⁹Hea noquebaque joxon tah hen pixon xeharihibi. Jaa copi yohuanrihbicani. Jise, jaa joni ta pihanhuan qui hih ta jacanihqui. Xehanhuan tah qui. Coriqui cobrannicabo ta jahuen hahberabetibo qui. Hohchayahpabo ta jahuen hahberabetibo qui hihricani, hea yohihi. Tsoa ponte shinayahpa quin hihxon tah man joni huetsa jixson, jan hahcai jixson man honantihi —jato jaquin Jesusen.

*Nincayosmabo
(Lc 10.13-15)*

²⁰Jaatian sca jano jahuen coshiyaxon jan jato hicha hahxonrahsihi jemabo sca jaan yohicoinquin, jaton shinan ponteyamahiya jato yohicoinquin.

²¹—Hahrai hih tah man jatihi, corazinobon. Hahrai hih tah man jatihi betsaidabon. Mato tocanson heen coshiyaxon hen hahrahsihi quescajaribiquin, Tiro jemanxon hahxon, Sidon jemanxon hen hahcaiya cahen neateman jaton hohcha copi benaxon hahan benati chopa sahuehax chihi mapo mapocohax tsahoxon jaton shinan pontehan. ²²Jaton shinan pontehaxma mahuanihbo casticanson bi ta mato sca hashoan rihbi Papan casticanyaxihquiqui. ²³Capernaum janinhahbon, ¿naihō jihueti quescarax maton jema janin jihuetai shinan man jain? Matoyabi ta maton jema panteon hiyaxihquiqui. Heen coshin mato hahxonni jai quescajaquin Sodom jema janin rihbi jascaxaxonah cahen rahma caman jaton jema jaquehniqui. ²⁴Jaabo tiromabo copi jaton jema Papan yamajabahinni bi ta jahuen casticanti neten jato casticanquin mato sca hashoan rihbi casticanyaxihquiqui.

*Tantiti benahue hihqui Jesus
(Lc 10.21-22)*

²⁵Jaa pecaho sca Papa yocaxon Jesusen yohiquin.

—Hahxon tah min hea jai, Papan. Mia tah min naiyahpa mai hihbo qui. Shinamahnuanyahpabo betan honanbaan honancasquimanon tah min jato pantexon miin baquebo sca honanmahi. ²⁶Mian jisi, jascajaha siri quen tah min jato jascaxaxonai, Papan.

²⁷Papan ta hea jatihibi hinanihqui. Jahuen baque tsoa quin ta tsoanbi honanyamahiqui. Heen Papa huestichin ta honanihqui. Tsoa heen Papa quin tah hen jahuen baque hihxon hea huestichin honanai. Caibaan ta honanyamahiqui. Hea nincacaibaan res ta honanihqui, hean jato honanmahah. ²⁸Benahue, teetaibon. Benahue, hihue papihibon, jatihibi. Mato tah hen tantimatih. ²⁹Hen mato hihbonon benahue. Hen mato nincamanon benahue, man honannon. Honaxon bi hen mato yohinon. Mah hohmis hohmisai honanai tah hen qui. Benahue, hen mato shinan siricahinanon. ³⁰Hen mato yonohi quescahah ta teema qui. Hen mato yohihah tah man histon hahtihi. Heen jihuetahbohi benahue —jato jaquin.

12

*Tantiti neten trigo rebex tesabonahibo
(Mr 2.23-28; Lc 6.1-5)*

¹Jaton tantiti neten sca ta Jesus betan bahin caquin trigo huai nabebacahini caquin, picatsihxon jahuen haxenicabaan huestibo bero pasquebonaxon bishquihahxon pinishqui.

²Jascajahibo jixson, fariseobaan sca yohiquin.

—Jise. Tantiti neten jascajatimahi bi ta miin haxenicabaan bero bichiqui.

³Jascahah sca:

—¿Jahuen jonibo betan caxon, picatsihxon, jahua Davidinin janishquin? ¿Papan joi jixson man honanyamahin? ⁴Picatsihquish ta Papan xoboho hihcoxon yocacah, Papa pejanxonti paan hinanah bixhon pinishqui. Jaa ta jaan pitima piti qui. Jahuen hahbe cahibaan pitima rihbi. Yohuanxonnicahbaan piti res ta jaa qui. ⁵Tantiti netenbi ta Papan xoboho Papa bebon yohuanxonnicahbo teetihqui. Jaa netenbi jaabo jaton tee jaah ta siri qui, Papan jisi. ¿Moisesnin huishani joi jixson bi man jaa rihbi honanyamahin? ⁶Nincanahue hen mato yohinon. Papan xoboho teeti joi jai copi res ta tantiti netenbi jahoxon teexoncaniqui. Rahma ta jahuen xobo mentan hashoan coshi joiyahpa neno qui. ⁷¿Nea huisha jahua hihcasihquiquin man honanyamarihibihin? Man joni huetsahon shinanti tah hen queenai.

Maton hohcha copi man hea jahuara hinanti cah hen queenyamahi. ⁷Jaa joi hen jahua hihti quin? Honanxon cah man ponte jonibo qui tiromahi yohuanymahan. ⁸Noquebaquehax tah hen tantiti nete hihbo qui, hah tah hen mato jai, man honannon —jato jaquin.

Meyosma joni

(Mr 3.1-6; Lc 6.6-11)

⁹Janohax caparihax sca, jaa fariseobaan tsinquiti xoboho nococani. ¹⁰Mapetaibaan bi joni meyosma jano tsahoti. Jesus caheti shinanxon, yocancanquin, jano jaibaan:

—⁷Tantiti neten non joni rohajatihin? —hahcanquin. ¹¹Jascajaquin yocacahbo jaan sca jato yohiquin:

—⁹Maton carnero hina tantiti netenbi mai quiniho paquetaiya man bihxon tse-cayamahin? ¹²Joni ta carnero mentan hashoan jihuemati qui, hah ca hen mato jai. Jaa copi tah non tantiti neten joni huetsa yanapantih.

¹³Jato jascaxon meyosma sca yohiquin:

—Miin mequen hehqui pontehue.

Yohihah, hahqui jahuen mequen pontehax rohascai. Huetsa jahuen mequen hihqui quescapi, siribehcoinscai. ¹⁴Jaatian picotax, fariseobo yohinani. Jenquetsaha non jatihin jaa rehtenoxon, hihceni.

Jesus yohihi Isaiasnen huishani joi

¹⁵Rehreti shinanaibohi honanax, janohax Jesus caresscai. Cahiton sca hihti caibaan chibanbahinscaquin. Jato tocan jai hisinaibo ta jatihibi rohajapaquenishqui. ¹⁶Rohajaxon ta jato hihti yohinishqui, jan jato rahonah tsoabi yohiyamahabo. ¹⁷Isaiasnen huishani quesca sca janon ta jato yohinishqui. Jaa joi ta nesca qui:

¹⁸Jisnahue. Jaa ta hen caisai heen joni qui. Hahan hen hihti queenai heen joni tah qui. Hahan hen jenimahi. Heen yoshin tah hen hinanai. Jayaxon ta jatihibi nahuabo yohiyaxihiqui, jato hihboscanoxon.

¹⁹Tsohbetanbi ta sinacananantimahiqui. Sai saihihima ta qui. Bahin cahibaan nincacah ta jahuabi quenayamahiqui.

²⁰Tahua moshitai quescapahbo meraxon bi ta jaan tehcamahiqui. Lamparin huaxmen nocahax cohina quescapahbo ta jaan nocajayamahiqui. Quiquin hapoxon jan tiromabo casticannon caman ta jasca jatihiqui.

²¹Hahqui ta jatihibi nahuabaan jaton shinan camatihiqui, jaan jato jihuemayahiqui copi hihqui Isaiasnen huisha.

Yoshiman yanapanai tah qui hihquibo

(Mr 3.19-30; Lc 11.14-23; 12.10)

²²Jaatian ta yoshiman hihbojahi joni hihuecannishqui. Yoshiman hihbojahah benche sca banetax, joyoscai. Jesusen rohajaha jisresscaquin, yohuanrihbiscai. ²³Rahte rahtetax sca tsamajaquetaibo yohinani.

—⁷Jaa tsi ra Davidi xohta hihyamahiquin? —hihscacani.

²⁴Nincaxon sca fariseobaan jato yohiquin:

—Neatohon ta tiroma yoshiman coshiyahpaxon yoshinbo potahiqui. Beelzebú ta jahuen hihbo qui, tiroma yoshin —hahcanquin.

²⁵Jasca jaibaan bi jaabaan shinanai honanxon Jesusen jato yohiquin: Hapon jihuetaibo jaabo rahsibi rehtenanaiya ta jaton hapon yonoti queyotihiqui. Jema ta jascarihbihiqui. Xobo jascarihbih. Jaabo rahsibi rehtenanax jahuabi baneyamascai. ²⁶Satanas hahbe Satanasnén potahah ta Satanasbo rehtenanscaiqui. ²⁷Jenquetsahax sca jahuen yonoti banetihiquin? ²⁷¿Beelzebú coshiyahpaxon tiroma yoshinbo hean potahiya jahua coshiyahpaxon cahra maton baquebaan jato potahiquin? ²⁸Jenquetsahax shinanya man quin? Maton baquebaanbi ta mato yohitihiqui. ²⁸Dios Yoshinyaxon hean jato potahi honanscanahue: Papan jihuemati nete ta mato qui noco sca jaiqui, shinanscanahue.

²⁹Coshi jonin jahuen xobo coiranaiya jenquetsahax hihcoxon huetsan jahuen jahuaborabo bichintihiquin? Xobo hihbo nexaxon pari ta jahuen jahuabora bichintihiqui. Shinanscanahue.

³⁰Hehbetan teeyamahax tah man heen rahuibo qui. Hea tsinqixonyamaquin tah man jabisahi.

³¹Jaa copi tah hen mato yohihi: Papan ta jatihibi tiromabo sohuati hahtipahiqui. Jaton shinaman tiromajaquin hahcaibo, Papa qui tiromahi yohuanaiibo, jato jatihibi sohuatihiqui, yocacah. Jahuen Yoshin siri qui tiromahi yohuanaiibo res ta jato sohuaxontimahiqui.

³²Hea noquebaque qui tiromahi yohuanaiibo ta Papan sohuatihiqui. Dios Yoshin qui tiromahibo ta jascayamahiqui. Jascapahbo ta jahuentianbi sohuatimahiqui. Rahma sohuayamarihiquin. Nete queyotai bi sohuayamarihiquin.

Jahuen bimi jisxon honanti
(Lc 6.43-45)

³³ Jihui honanquin hahcajaquin honannahue. Siri jihui tah qui hih tah man jai, siri bimiyaipahi honanax. Tiroma jihui tah qui hih tah man jaribihi, tiromabo bimiyaipahi honanax. Jahuen bimi honanxon tah man jahuen yora yohihi. ³⁴ Jascajaquin rihbi hea honannahue, rono janayahpabon. ¿Jenquetsahax man tiromabohax siripi yohuantihin? Maton shinan tiroma hichahi quen tah man tiroma yohuanyahpabohi. ³⁵ Siri jonibo ta siri shinan hicha qui, jaa copi siripi yohuani. Tiroma jonibo rihbi tiroma shinan hichahax jaya yohuanrihbihi. ³⁶ Hihresi yohuanaiboya ta jatihibi jaton joi tiroma copi Papan jato casticanyaxihquiqui, jahuen casticanti neten. ³⁷ Tiroma yohuan japahonibo ta casticanyaxihquiqui. Yohuan siriyahpabo ta jaton yohuan copi casticantimahiqui —jato jaquin.

Hahan honanti jismahue hahcaibo
(Mr 8.12; Lc 11.29-32)

³⁸ Jaatian jaton huisha honanbo betan fariseobaan yocascaquin.
—Maestron. Papan shinan coshiyaxon min hahcai tah non jiscatsihqui, mia Papan raanai joni hihqui honannoxon.
³⁹ Yocacahbo sca jato yohiquin:

—Tiromaboxon tah man jascajaquin shinanai. Tsiniti shinanyahpaboxon tah man jascajaquin hea yocacai. Papan coshiyaxon hen hahcai man jiscatsihqui bi ta Papan mato jismatimahiqui. Hahan hea honanti mato hinanquin bi ta jahuen joi yohinica Jonas jan huinomani quescapah res huestijaquin res Papan mato jismatihiqui. ⁴⁰ Yapahhahnen xehahah, quimisha nete jahuen poco janin Jonas hihbahinahax quimisha yame rihbi hihshinahax piconi quescarihbihi tah hen noquebaque mai chicho quimisha neten quimisha yame rihbi hea jatihi. Jasca hen jaiya ta hahan hea honanti qui. ⁴¹ Papan casticanti neten ta Ninive jema janin jihuepahonibaanan mato metoxon yohiyaxihquiqui. Jonasen noque yohihah tah non noquen shinan pontenihqui. Jonas mentan hashoan nincati jonin mato yohihah bi tah man nincayamanihqui. Mato tah man noque mentan hashoan nincayosmabo qui hih ta jayaxihcanihqui, man nincayosmabo quen. ⁴² Etiopia mai janin japahoni quiquin hapo haibaanan rihbi ta casticanti neten mato jisxon jascajaquin rihbi mato yohiyaxihquiqui. Hocho bi res hihquish bi tah hen Salomon yohuanai nincaqui caniqui, Salomonen honanax yohuanai nincacatsihquish. Salomon mentan hashoan honanai jonin mato yohihah bi tah man nincayosmabo qui hih ta jayaxihquiqui.

Catani joribihi tiroma yoshin
(Lc 11.24-26)

⁴³ Jan coiranai joni jenehax ta tiroma yoshinbo nihnichiqui, jano hotati yamahi janin nihnichax bi jahuenbi tantitimahiya shinanscaquin. ⁴⁴ Janohax hen jahui janin caribitanpan, heen xobon, hihcacinax ta caresscaiqui jahuen xoboho. Nocoxon ta hihbojoma siri merahiqui. Matsó siri meraquin, bexojaxonah siri. ⁴⁵ Jaatian sca caxon, hashoan tiromabo yoshinbo rihbi benaxon, siete merahax jaya joribiscai, jano jihuenoxon. Jaatian ta hashoan tiromacanahi sca jaa joni jatihiqui, hicha yoshiman sca hihbojahah. Huestichin hihbojamenoha bi hashoan tiromascai —jato jaquin.

Jesusen mama betan jahuen huetsabo nocotai
(Mr 3.31-35; Lc 8.19-21)

⁴⁶ Tsamajaquetaibo haxemahi yohuanparihiya, jahuen mamaya jahuen huetsabo nocotai jahueq jeman nichish hahbetan yohuancatsihqui.

⁴⁷ —Miin mama betan miin huetsabo ta jeman nichiqui. Mia ta yohuanquihncatsihcanihqui —hahquin huetsan. ⁴⁸ Jascahah:

—¿Tsoa hin, heen mama? ¿Tsoa hin, heen huetsabo? —jato jaquin. ⁴⁹ Jato jascjaxon jahuen haxenicabo metoxon: —Jisnahue. Neabo ta heen mama qui. Neabo ta heen huetsabo qui. ⁵⁰ Heen naihoh queha Papa queenai quescabijaquin hahcai joni ta heen huetsa qui. Jascapah ta heen choca qui. Jascapah ta heen mama qui —Jesusen jaquin.

13

Mihсахahnica joi
(Mr 4.1-9; Lc 8.4-8)

¹ Jaatian ta hian patax tsahoti Jesus canishqui, xobohoh quehax picotax. ² Hian quetsahotaiya sca hihti caibo hahqui tsinquijaqueti becani. Jaa copi ta nontin sca nanenishqui, nontin tsahoxon quexa nichibo haxemanoxon. ³ Haxemaquin ta jaa patax queha joibo jato hicha yohinishqui. Nescajaquin jato yohiquin: Huesti huaijanicah ta jahuen trigo banahi

canishqui. ⁴ Huai chian sca trigo berobo mihsahahbonahi cahi. Mihsahahbonahah cahen caibo berobo bahin paquecanahi. Jascapa ta pehiyahpabaan topiquin queyonishqui. ⁵ Caibo berobo rihbi cahen chahoma main paquenish. Bemacanya mashi jai. Mai chicho hihamahax copi cahen jascapa histon joconish. ⁶ Bari xanasciaya sca cahen joconaibo histon xanahi, mai chicho jaton tapon cayamaahiya. ⁷ Caibo moxa chian paqueti. Jaabo joconai bi cahen moxan rishiquin, hashoan hani sca hihxon. ⁸ Caibo berobo rihbi cahen mai siri janin paqueti. Jaabo cahen joconax, hanihax bimiscai. Caibo cahen huesti bero potahah cien beroyahpascai. Caibo cahen sesenta beroyahpascai. Caibo cahen treinta beroyahpascai. ⁹ Hahan nincati pabinquiyahpaboxon nincanahue —hahquin.

Jaa patax queha joi Jesusen yohihi
(Mr 4.10-12; Lc 8.9-10)

¹⁰ Jaa pecaho sca jahuen haxenicabo jaabo rahsibi Jesus qui caxon yocacanquin:
—¿Jahua copi min jaa patax queha joibo res yohiquin jato haxemahin? —hahquin.
¹¹ Yocacahbo sca: —Papan jihuemati jenquetsahpa quin man honannon hihxon tah hen jaa patax queha joi yohihi. Hoa caibaan nincaxon bi honanyamanon hihxon tah hen jascajahi. ¹² Jaton jointi janin Papan shinan pishca jaibo tah hen hashoan hinantih, hicha bi res jan janon. Jaton jointi janin jai shinan yamahibo tah hen jaa jaibo pishca rihbi jato bichintih. ¹³ Jaa copi tah hen jaa patax queha joi jato yohihi. Jaatian ta jisquin bi jistimacantihiqui. Nincacquin bi ta nincarestihiqui, honanyamaquin. ¹⁴ Isaiasnen huishani joi jai quesca sca ta jaresscaiqui.
Pabinquin nincaxon bi tah man honantimatihi. Beron jisquin bi tah man jistimatihi.
¹⁵ Nincayosmaboxon copi tah man jascajatihi. Pabinquiyaxon bi hochoxon nincacai quescajaquin. Jistihi bi tah man bero rahcohi, jismis hihxon. Nincamis hihxon rihbi, jointinin nincaxon, shinan pontehax rohahax jihuemis hihxon tah man jascajahi. hih ta jaiqui Isaiasnen huishani joi.
¹⁶ Jahuerohajaquin tah man jascaxonma beron jisxon jiscoinai. Jahuerohajaquin tah man pabinquiyahpaboxon nincacoinai. ¹⁷ Man jisibo ta hicha Papan joi yohinicabo jisti queenpahonishqui. Pontajaquin shinanaibaan hihti jiscatsihxon bi man jisi jisyamaquin. Man nincacai joibo hihti nincacatsihquibaan bi ta Papan jato nincamayamanishqui. Jaa copi sca Jahuerohajaquin ta Papan noque jismahiqui, Jahuerohajaquin ta noque nincamahiqui, hihnahue.

Mihsahahnica jahuaahi jaiquin hihxon jan yohihi
(Mr 4.13-20; Lc 8.11-15)

¹⁸ Bananica joi jahua hihcatsihquiquin mato hen yohinon nincanahue. ¹⁹ Papan jihuemati joi yohihah bi honanyamahi joni ta bahinbi bero paquetai quesca qui. Jahuen jointi janin banaquin hahcajaquin non nincamaha bi cahen joxon, non yohiha joi tiroma yoshiman bichinbahinquin. ²⁰ Chahoma main bero paquetai ta nincamenoxon jenimaxon bichi quescapah qui. ²¹ Jahuen tapon chicho cayamaahi quesca sca basiyamaahi. Jaa joi jan bihcoinai copi caibaan hosan hosanquin. Hosanah sca histon jenescaquin. Masa tenetihi bi jenebahini caresi. ²² Moxa chian paquetaibo ta joi bihcoinxon bi huetsa shinanoya jaxon caijayamahibo quescascai qui. Nincacoinxon bi ta mai mehabaan shinanai quescajaquin shinanxon, jaton jahuaborabo rihbi shinanxon jaa joi caimayamahiqui, bimijoma quesca sca jan janon. ²³ Mai siripan banaha bero ta nincanica joni quescapah qui. Joi nincaxon, jahuen shinaman nincacoinxon, shinan caijaquin. Bero caichi jai quescarihibi jahuen shinan, caibo quiha cien bero sca, caibo quiha sesenta, caibo quiha treinta.

Trigo tocan huasi joconcanahi

²⁴ Huetsa jaa patax quehah joi rihbi ta nescajaquin jato yohinishqui. Papan jihuemati ta bananica jai quesca qui. Jahuen huai chian caxon cahen banaquin jahuen berobo mihsahahbonaquin. ²⁵ Mihsahahquipish yame hoxahiya sca jahuen rahui jahui. Joxon, jaa huai chian sca banahipibo bero tocan jahuen huasi bero mihsahahbonahax caresscai. ²⁶ Trigo bero joconax hani sca jaax beroyahpa sca jaiya bi cahen huasi jascarihibi, beroyahpascai. ²⁷ Trigo tocan huasi jai jisxon ta jahuen jonibaan sca yocatihiqui:
—¿Siri bero rahsi min banayamahohquin, Patoron? ¿Siri rahsi potahi shinanah bi jenquetsahpi huasi sca jaiquin? ²⁸ Jaatian ta jaton patoronen jato yohitihiqui:
—Jaa ta noquen rahuin noque jascajanhoxqui —hahquin.
—¿Hoa huasibo non mexahi catimahin —hih sca jacani.
²⁹ —Mexayamaquin rahan. Huasi mexaquin bi jayabi trigo rihbi man mexamis.
³⁰ Jatihibi haninon jenenahue. Trigo tsinquit tian pari caxon tah non tsinquixonnicahbo yohitih. Huasi pari mexanahue. Huasi mexaxon nexaxon cohati sca tsamanhihinnahue.

Trigo bero rahsi sca tsinquin jano bexojati xobo janin bexojaxonnahue —hah sca jato jatihi.

Jaton moxo bero

(Mr 4.30-32; Lc 13.18-19)

³¹ Huetsa jaa patax queha joi rihbi ta jato yohinishqui. Papan jihuemati ta moxo bero pishca jai quescarihibihiqui. Jascapa bero pishca cahen huai chian hihbaan banahah joconi. ³² Caibo bero mentan hashoan hexti pishcahax bi ta joconax hani sca jaax texe banabo mentan hashoan hani sca jaiqui. Jihuiscaiya ta hihsabo joxon jahuen mebibu janin sca nahajatihiqui.

Hahan paan soohihmati

(Lc 13.20-21)

³³ Huetsa jaa patax queha joi rihbi ta nescajaquin yohinishqui. Paan hahnica haibaan ta jahuen paan soohihmanoxon hahan soohihmati bihnicah qui. Jascapa bihxon cahen huesti paniro tihopa tonco janin niaquin. Jano niahah ta tonco jatihibi soohihtihiqui. Papan jihuemati ta jascarihibihiqui, non honanaima bi hanihi —jato jaquin.

Jaa patax queha joi rahsi

(Mr 4.33-34)

³⁴ Jascapahbo jaa patax queha joibo ta Jesusen jato haxemanishqui, tsinquitax tsama-jaquetaibo yohiquin. Jaa patax joibo rahsichin ta jato haxemanishqui. Jayajoma jahuabi jato yohiyamaquin. ³⁵ Jaa copi ta Papan joi yohinicateen huishani jai quescas janishqui. Jaa patax queha joibo yohiquin tah hen jato haxemahi. Jahuentianbi nincanihmabo joi tah hen jato nincamahi hih ta jaiqui huishani joi.

Huasi jahua hihcasihquiquin hihxon jan yohihi

³⁶ Tsamataibo potabahini sca Jesus cahi, xoboho hihcohi. Jano rihbi ta jahuen haxeni-cabo hihconishqui, yocacatsihqui.

—¿Huasi bero joi jahua hihcasihquiquin? Noque yohihue —hahcanquin.

³⁷ —Nesca tah qui, jisnahue —jato jaquin. — Siri berobo banahi joni ta noquebaque qui. ³⁸ Jahuen huai ta nai naman yohihi qui. Jahuen bero siribo ta Papan jihuetahbo qui. Huasibo cahen tiroma yoshiman jonibo. ³⁹ Jahuen rahui cahen Satanas. Jahuen tsinquitai tian cahen nea nete queyotai hihcasihqui. Jahuen tsinquinonnicahbo cahen Papan yonotibo. ⁴⁰ Jascarihibi, huasi mexaxon cohahi jaibo quescarihibi ta nea nete queyotaiya jayaxihiqui. ⁴¹ Noquebaque hihxon tah hen heen yonotibo raanyaxihqui. Caxon ta hohchamanicahboya tiromajahibo tsinquiyaxihcanihqui. Jascapahbo ta Papan jihuematima janin boyaxihcanihqui. ⁴² Jato boxon ta johuehnhatai chihhi janin jato potayaxihcanihqui. Jano ta sai saihiyaxihcanihqui. Jaton xeta yeres yeresahquin, hisin tenequin. ⁴³ Jaatian ta bari coshi xaba jai quescarihibi, Papan jihuetahbo siribo coshi shinanyahpa hihyaxihcanihqui, Papan jihuemati janin. Pabinquiyahpaxon nincanahue.

Jonenihbo coriqui

⁴⁴ Papan jihuemati ta nahue chian tsama coriqui jonenoxon mihinnihbo quescapah qui. Jaa mihinnihbo meraxon cahen huetsa jonin mahporihbihax hihti jenimahi caxon jan jai jatihibi maromatihi. Maromaxon ta coriqui bihxon jahan sca jaa nahue marotihiqui, jaa mihinnihbo jahuenah sca hihnon.

Copi moro

⁴⁵ Papan jihuemati ta marocatsihquin moro copibo benahi maronica nihni-chi quescapah rihbi qui. ⁴⁶ Huesti moro hihti siri, hihti queenti siri meraxon cahen caxon jan jai jatihibi maromaxon sca jaa moro siri maroscaquin.

Mesco yapa rahcaxon caisaibo

⁴⁷ Papan jihuemati ta tarrafa quescas rihbi qui. Tarrafa cahen hian janin potaxon mesco yapa rahcocanquin. ⁴⁸ Bochoscaya ninixon mapemaxon yapa tscapaquescanquin. Tscapaquexon caispaquescanquin. Tsahoxon sca tasa qui siribo nanehihniquin, tiromabo potapaquexon. ⁴⁹ Nete queyotaiya ta jascaya rihbi Papan jayaxihiqui. Joxon ta Papan yonotibaan tiromabo bihyaxihcanihqui, siribo tocan nihyamascanon. ⁵⁰ Johuehnhatai chihhi janin ta jato potayaxihcanihqui. Jano ta sai saihiyaxihcanihqui. Xeta ta yeres yeresahyaxihcanihqui, hisin tenequin.

Behnaboya xenibo jismahibo

⁵¹ —¿Hen mato yohihi jatihibi man nincaxon nincacoinain? —jato jaah:
—Nincaquin rahan —hihcani.

⁵² —Jaa copi tah man Papan jihuetahbhohax jahuen jihuetahbo haxescaxon caibo rihbi sca man haxematih. Jaatian tah man hicha jahuaborayahpa hani patoro quesca man jatihi. Jascapah cahen jahuen bexojati chiqueho caxon behnaboya xenibo siribo cainmatischeni —jato jaquin.

Nazaret janin Jesus nocorihbihi

(Mr 6.1-6; Lc 4.16-30)

⁵³ Jascajaquin jaa patax queha joibo jato yohiquin queyohax, janohax Jesus cahi. ⁵⁴ Jahuen main cahi. Cahu nocotax jaton tsinquiti xoboho mapexon janoxon jahuen caibo Papan joi yohiquin. Jaan jato haxemaha, rahte rahtecani.

—¿Jahuerahnon haxenihxon hen neatohon yotiho honannishquin? ¿Jenquetsahaxon coshi bihxon jonibo rohajahiquin? ⁵⁵ ¿Xobojahnicaten baque ma hin? ¿María janeya jahuen mama ma quin? ¿Jacobo, José, Simón, Judas jahuen huetsaboma quin? ⁵⁶ ¿Jahuen chocabo jatihibi noque betanbi jihueyamacaniquin? ¿Jahuen sca hen jahuen shinan bihnishquin? —hihcani.

⁵⁷ Jaa copi nincacoinyamacanquin. Nincacoinyamahibo copi sca Jesusen jato yohiquin:

—Papan joi yohinichon huetsancohabo queenaibaan bi ta jahuen mai janinhahbo jahan queenyamacaniqui. Jahuen jenabo, jahuen xobo janinhahbo, jaabo jahan queenyamaribihbi —jato jaquin.

⁵⁸ Nincayosmabo copi ta jahuen coshiyaxon jaton jema janin jato hicha hahxonyamanishqui.

14

Nashimanica Juan mahuatái

(Mr 6.14-29; Lc 9.7-9)

¹ Janobo jahuen coshiyaxon Jesusen jato hahxonai ta caibaan sca quiquin hapo Herodes yohinishqui.

² —Nashimanica Juan tah qui. Yamanicahax bi ta hahquirihbi teehihscaiqui. Jaa copi ta coshiyahpa qui —hih sca Herodes jai, Jesus yohihi. Jahuen jonibo betan yohuani ta Herodes jascanishqui. ³ Neateman Juan rehtehox copi jascari yohuani. Jasca jayanoxon pari ta Juan bihxon sipo xoboho Herodesnin tsahonnishqui, Herodesnin huetsan haibo Herodias copi. ⁴ Jaa ta miin haiboma qui. Min tah min hahbetan tiromahi, Juaman yohihah copi sipo xoboho tsahonquin.

⁵ Juan rehtecatshxon bi jonibo sinamis hihxon rehteyamaquin. Jaa ta Papan joi yohinica qui hihquiboya sinacannis hihxon rehteyamaquin.

⁶ Jahuen bari senenjahiya ta xehahibo Herodesnin xehaquihnnishqui. Jahuen haibaan baque haibo chirinai jixon, Herodesnin costan costanquin. ⁷ Costanxon, Dios quenaxon sca jaa xontaco yohiquin:

—Min queenaibo hea yocareshue. Mia tah hen hinantih —hahquin. ⁸ Juaman mapo yocahue jahuen maman jaá sca, jahuen mama queenai quescajaquin xontaconen yocaqin:

—Juaman mapo quencha qui nanexon hea bexonahbo yohihue —hahquin.

⁹ Xontaconen yocacah sca quiquin hapo benacahinscai. Min yocacai tah hen mia hinantih hahxon bi masa shinanscaquin. Masa shinanxon bi Dios quenaxon yohixon copi jeenhahquin, hichaxon nincacaibo jai copi rihbi jeenhahquin.

—Textetannahue —hahquin jato. ¹⁰ Caxon sca sipo xobohoxon bi Juan textecanquin. ¹¹ Quencha qui sca jahuen mapo nanexon, bexon, xontaco hinanquin. Jaan sca jahuen mama hinanquin.

¹² Juaman haxenicabo ta jahuen yora bichi bocannishqui. Bihxon mihinquin. Mihintani joxon, Jesus yohicanquin.

Cinco mil jonibo Jesusen pimahi

(Mr 6.30-44; Lc 9.10-17; Jn 6.1-14)

¹³ Yohihahbo nontin nanetax janobihax Jesus cahi. Jano tsamataibo yamahi janin jahuen haxenicabo betan yohuani cahi. Jano tsoa yamahiton nocoti cahi. Jano ta Jesus cahiqui chanihbo nincacax sca, jano jai jemabo janinhax tsama jonibo cahi. Hian quetanbahini sca Jesus chibani bocani. ¹⁴ Taxnatax mapexon jonibo tsamascai Jesusen meraquin. Jatohon hihti shinanxon, jaton hisinbo rohajaquin. ¹⁵ Bepiscaiya joxon jahuen haxenicabaan yohiquin:

—Neno ta tsoabi jihueyamahiqui, Hihbon. Bari rihbi ta hihquicatsihscaiqui. Nea jonibo raanscahue, honobo jai jemabo janin caxon jaton piti pishca maroscatanahbo —hahcanquin.

¹⁶ —Jahua copi catima ta jacanihqui. Piti jato hinannahue, matonbi —jato jaquin Jesusen.

¹⁷ —Neno tah non pichca paan pishca res jai, rabe yapa xohi rihbi. Jahua hashoan tah non piti yamahi —hihcani.

¹⁸ —Jaa hea bexonnahue —hahquin jato.

¹⁹ —Janobi tsahopaquenahue —jonibo jaxon, jaa pichca paanya rabe yapa bihxon, nai bejisihnixon, Papa yohiquin. Piti tehcaxon sca jahuen haxenicabo hinanpaquequin, jaabaan sca jonibo hinanhihnon. ²⁰ Pihni yanichahinscacani. Texejahabo tsingixon doce tasa bocho bihcanquin. ²¹ Jaa pihibo ta hicha janishqui. Haiboboya baquebo toponyamahah bi bebo rahsi toponah ta cinco mil janishqui.

Hian benichi Jesus jahui
(Mr 6.45-52; Jn 6.16-21)

²² Jaa pecaho ta jahuen haxenicabo yohinishqui:

—Hean hen nea jonibo camanon nontin nanetax pohquejaquescanahue —hahquin jato yohiquin. ²³ Tsamataibo camahah sca, jano jai mahchi manihihnati cahi, jaa huesti caxon Papa yocanoxon hihquish. Yamescaia sca jaa huesti jano baneti. ²⁴ Jahuen nonti pohquejaqueti cahi hochoscai. Behchoman tsahcahah huinahabbo bi cacasquimahi. Nihuen jato behchihah huinacasquimacanquin. ²⁵ Xaba jahui hochoma sca hian benichi jato qui Jesus cahi. ²⁶ Hian benichi jahui jisish, jahuen haxenicabo hihti raqueti. Yoshin tah qui hihquish, raquetax sai saihcani.

²⁷ Jaatian:

—Raqueyamanahue. Hea tah hen qui. Rahteyamanahue —hahquin jato.

²⁸ —Mia hihxon hea yohihue, Hihbon, hen jene benicanaxon mia behchihi canon —hahquin Pedronen.

²⁹ —Johue —jaáh sca picotax jene benichi Jesus qui cahi. ³⁰ Caquin bi behchon jisish, raquerihbiscai. Jene meran hihquicatsi sca jaax sai saihquish:

—Hihbon, hea bihhue —hih sca jai. ³¹ Mehuetanxon huenihihnixon sca:

—Hicha tahma res tah min shinancoinai. ¿Jahua jenquetsahin min shinancoinyamahin? —hahsaquin Jesusen.

³² Nontin nanexon sca nihue tantinon yohiquin. ³³ Jaa jisxon, hahbe cahibaan hahqui raboxonen tisquihahpaquexon:

—Mia coin tah min Papa Diosen baque qui —hahcanquin.

Genesaret janinhabbo jan rohajahi
(Mr 6.53-56)

³⁴ Hoque quexa nocotax sca Genesaret jema qui nococani. ³⁵ Janohahbaan sca jaa nocotaibo jisxon, Jesus honanxon janobo jai jemabo janin quenamacanquin, hisinyahpabo benon hihxon. Jaa copi jascapahbo becanquin. ³⁶ Jesus qui caxon, hihti yocacanquin.

—Miin coton quexa pishca res hea mehemahue, hen rohanon —hahcanquin. Mehehax res sca hisinyamascai. Siricahin sca jacani.

15

Hahan jointi rishtajatibo
(Mr 7.1-23)

¹ Jerusalem janinhax sca caibo nocoti becani. Fariseobo betan jaton huisha honanbo. Nocoxon sca:

² —Miin haxenicabaan ta mechoquihxonma pihiqui. ¿Jahua copi jascacanicuin, noquen xenibaan yohini quescajayamaquin? —hahcanquin yocaquin.

³ —Maton caya tah man Papa Diosen yohini quescajayamanoxon huetsajaquin jonibo haxemahi. ¿Jahua copi man jascajahin? ⁴ Papan ta yohinishqui: Miin papahon queenhue; miin mamahon rihbi queenhue hahquin. Huetsa rihbi jan yohini: Jahuen papa qui tiromahi yohuanai joni queyocahinnon tah man rehtetih. Jahuen mama qui tiromahi yohuanai joni jascajaribiquin. ⁵ Papan mato jascajaquin yohinih bi tah man huetsajaquin jonibo yohihi. Jaton mamaboya jaton papabo yanapanyamahabo hihxon tah man jato yohihi, Maton papabo man yanapanpanan Papa Dios hinantijanahue hah tah man jato jai. ⁶ Jascajaquin tah man maton haxemati joiyaxon Papan joi nincayamamahi, jonibaan nincapanan. ⁷ ¡Nincacoinihcamahibon! Mato yohihi ta sirijaquin Isaíasnen yohinishqui:

⁸ Jaton janan nea jonibo hehqui siripi yohuanih bi ta jaton jointinin jahuabi nincayamahiqui.

⁹ Nescajaquin Papa Dios hahxonahue hihxon bi ta jonibaan shinanax yohuanai joi res haxemacanicui. Jaa copi ta yanca bi res hea yocanicui —jato jaquin.

¹⁰ Tsamataibo sca Benahue hahxon:

—Nincaxon nincaguin sirijanahue. ¹¹ Piquin non noquen poco janin nanehiton ta noquen jointi rishtajayahiqui. Noque jointi rishtajahi ta noquen jana janinhax picotaibo qui —jato jaquin. ¹² Jahuen haxenicabo sca jaa pataxi becani. Pataxxon sca:

—¿Min yohihi nincacax fariseobo sinascaí min honanyamahin? —hihcani.

¹³ —Jahuen huai janin jaan banayamani meraxon ta heen Papan mexabahinxon potatihiqui. ¹⁴ Sinaresnon jato jenenahue. Benchexon bi ta bahi jismahi bebobonacaniqui. Benchen hahbe benche hiohax ta rabebi xanqueman paquetihiqui.

¹⁵ —Min noque yohiha jaa patax queha joi, jahua hihcatsihquiquin? Noque yohihue —hahquin Pedronen.

¹⁶ —¿Maton rihbi man honanyamaparihin? ¹⁷ ¿Noquen jana janin hihquihax noquen poco janin huinotax pohi sca jatihibi piti picotihqui man honanyamahin? ¹⁸ Noquen jana janinhax cainaibo ta noquen jointi janinhax cainihqui. Jascapahbaan ta noquen jointi rishtajahiqui. ¹⁹ Noquen jointi janinhax cainai ta shinan tiromabo qui. Joni rehetti, tsiniti, haiboya shiroti, yometshti, joni huetsa qui quesahi yohuanti, Papa qui tiromahi yohuanti. ²⁰ Jascapahbo shinan ta hahan jointi rishtatih qui. Mechoquihxonma piquin bi tah non jascajaquin noquen jointi rishtajatihahi —jato jaquin.

Jesus nincacoinai jaton nahua haibo

(Mr 7.24-30)

²¹ Janohax picotax sca Tiro jema janinbo sca Jesus heban bocani, Sidon jema janinbo cahi, Jesus betan. ²² Jesus nocotai merahax Cananeo haibo sca jahui, jano jihuetai haibo. Quenáhonahi joxon hihti yocaquin.

—Hehon shinanhue, Hihbon, Davidinin baquen. Yoshiman hihbojaha ta heen baque haibo hihti hisiniqui —hahquin.

²³ Hihti yocacah bi jahua hihyamahi. Jahuen haxenicabaan sca Jesus pataxxon yohiquin: —Yohihue, jan catannon. Sai saihihanen ta noque chibanbenahiqui —hahcanquin.

²⁴ —Noquen nahuabo qui ma bi manotai Israeli baquebo qui res hen jonon ta Papan hea raannishqui —Jesusen jaquin.

²⁵ Jaa bebon sca joxon betihhpaquexon haibaan yohiquin:

—Jenquetsaha ra hea jaxonhue, Hihbon.

²⁶ —Baquebo bichinxon hochiti jaton piti hinanah ta tiroma qui —Jesusen jaquin.

²⁷ —Tiroma rahan, Hihbon. Jaabi ta jaton hihbaan misa janinhax paquetai teque romishin hochitinin piti qui —hahquin haibaan.

²⁸ —Min tah min shinancoinai, haibon. Min yocacai quescabijaquin tah hen mia hahxonai —Jesusen jaquin. Jaatianbi ta jaa haibaan baque siricahinnishqui, rohascai.

Mesco hisinyahpabo Jesusen rohajahi

²⁹ Janohax cahax sca, Galilea hian quetanbahini cahax, mahchi manichish jano Jesus tsahoti. ³⁰ Hihti caibo jonibo jahui, jaa chibanbenahi. Jaton hisinyahpabo hihuecanquin, chantobo, benchebo, meyosmabo, joyobo, mesco hisinyahpabo hicha bi res becanquin. Jesus bebonbi jato taracanrenencanquin, jato jatihibi rohajscanon. ³¹ Jato rohajahiya ta tsinquijaquetaibo rahte rahtenishqui. Joyobo yohuanscai, meyosmabo siricahinscai, chantobo nihresscai, benchebaan jisresscaiya, rahtetax:

—Noquen Papa Diosen ta hihtijaquin noque hahxonihqui —hihcani.

Cuatro mil bebobo Jesusen pimahi

(Mr 8.1-10)

³² Jahuen haxenicabo quenabohanxon sca Jesusen jato yohiquin.

—Nea tsinquijaquetaibohon tah hen shinanai. Quimisha neten sca ta nenobi banecaniqui, pihan ta hihcanihqui. Pihaxma cati tah hen jato yohicatsihyamahi. Bahin cahi bi pihaxmahuan hihquish nocoyamacanmis. Jatohon tah hen shinanai —jato jaquin.

³³ —¿Jahuerahnon non tsoabi jano jihueyamahi janin hicha piti marotihin? Jaabo ta hicha qui —hah sca jacaquin jahuen haxenicabaan.

³⁴ —¿Jahuentihi paan man jain? —jato jaquin.

—Siete res ta qui. Yapa pishca rihbi —hahcanquin.

³⁵ Tsamajaquetaibo mihtsahoti yohiscaquin, Jesusen. ³⁶ Yohixon jaton siete paanya yapa pishca bihxon Papa yohixon tehcapaquexon jahuen haxenicabo hinanquin, jaabaan sca jonibo hinanpaquerihbinon. ³⁷ Pihax yanicahinaibaan bi texejaribicanquin. Texejahabo tequebo tsinquixon siete tasa bocho bihcanquin. ³⁸ Haiboboya baquebo toponyamah bi bebo rahsi toponah ta cuatro mil joni janishqui. ³⁹ Jonibo camahah cahiya sca ta nontin nanetax Magdala jema janin taxnati bocannishqui.

16

Miin coshi noque jismahue jaibo

(Mr 8.11-13; Lc 12.54-56)

¹ Fariseobo betan saduceobo sca becani. Jesus qui joxon:

—Papan coshiyaxon hahhue —hahcanquin, jan hahcai jisxon hahqui chaniscanoxon sca jascajaanquin.

² —Bepichaiya tah man nai jisish, Nai ta joshinjaquetihqui. Bahquish ta nete siri janoxihquiqui hih man jai. ³ Xaba paquetaiya sca tah man nai jisish, Rahma ta hoi nete qui, nai ta joshinihqui hih man jai. Nai jisxon tah man nete yohiti honanai. Nete joibo yohiti honanxon bi tah man Papan hahxonai jisxon jahueja Papan noque janoxihquiquin hihxon man joni huetsa yohiti honanyamahi. ⁴ Tiromaboxon tah man hea yocacai, hahan honantijaquin Papan coshiyaxon hen mato jismati hea yocacain. Tsiniti shinanyahpa quescapahbo hihquish tah man hean mato jismati man queenai. Jahuabi hahan honanti ta Papan mato jismatimahiqui. Jonas huinoni quescapa huesti ta Papan mato jismatihiqui —Jesusen jato jaquin. Jato jascajaanquin yohihax caresscaci.

Fariseobaan joi cachapa

(Mr 8.14-21)

⁵ Hoque quexa sca Jesus betan jahuen haxenicabo cahi, pohquejaqueti. Caquin bi jaya cati piti shinanbehnobahincanquin.

⁶ —Coiramenahue. Fariseobo betan saduceobaan jai hahan paan soohihmati qui coiramenahue. Jistahin man —Jesusen jato jaquin.

⁷ —Non pitijoma jahui copi rah ta noque jascajahiqui —hih sca jacani jaabo rahsibi yohinani.

⁸ Jahua yohuan jaabo jai jahuen jointinin honanxon sca:

—¿Jahua copi man pitijoma non jahui copi rah ta qui hih man jain yohinani, ¿man hih-coijnajaquin shinanymahin? ⁹ Pichca paanyaxon non cinco mil joni pimahipi man shinan-behnoscain? ¿Tezejahabo tequebo jahuentihi tasa tsinguihipixon man shinaryamascaín? ¿Man honanyamahin? ¹⁰ ¿Siete paanyaxon non cuatro mil jonibo pimahipi man shinan-behnorihbiscain? Tezejahabo man jahuentihi paniro tsinguihipi man shinanbehnoscaín? ¹¹ Fariseobo betan saduceobaan jai hahan paan soohihmati qui coiramenahue, hen mato jaáh ta maton piti copima qui. ¿Jenquetsahpahin man honanyamahin? —Jesusen jato jaquin.

¹² Jaatian pari ta honancannishqui. Hahan paan soohihmati jan hihqui bi fariseobo betan saduceobaan haxemahi joi qui coirameti jan yohiha honancanquin. Hahan paanjati jan yohiyamahi honanscacanquin.

Papan caisah tah min qui hihqui Pedro

(Mr 8.27-30; Lc 9.18-21)

¹³ Cesarea de Filipino jema janin sca nococani.

—¿Hea noquebaque hen jahua joni quin, jahua jacanihquin? —Jesusen jato yocacain.

¹⁴ —Caibaan shinanah ta mia nashimanica Juan qui. Caibaan rihbi shinanah cahen Elias yamanica. Caibaana cahen Jeremías yamanica. Jaa hihiyamahax cahen, huetsa rihbi Papan joi yohinica japahoni —hihcani.

¹⁵ —¿Maton cahran? ¿Maton shinanah hea jahua quin? —jato jaquin.

¹⁶ —Mia tah min noquen Papan caisni joni qui, mia joti neateman jan yohini —hih sca Simon Pedro jai.

¹⁷ —Mia tah min hahan jenimati jai, Simoman, Jonasen baquen. Jonibaan res mia shinanmahama bi heen naiho queha Papan mia shinanmaha tah min honanai. ¹⁸ Mia tah hen Pedro janehi. Mixan main xobojaquin hahcajaquin tah hen heen jihuetahbo rahsi huesti yorajatihi. Min yohiha join jato jihuetahboxon tah hen jato huesti yorajatihi. Tiroma yoshiman ta jato teneti hahtipahtimahiqui. ¹⁹ Hahan quehpenti hinanquin hahcajaquin tah hen mia yohihi, min heen jihuemati janin jonibo hihquimanon. Mainxon min jonibo yohiyaxihqui ta Papan yohihah quescasca sca jatihiqui, jascabi sca janon. Mainxon min nexabo pecaquin hahcajaquin yohihi rihbi ta Papan yohihi quescasca sca jatihiqui —Jesusen Pedro jascajaanquin.

²⁰ Jaatian sca Jesusen yohiquin sirijaquin: Hea Cristo hihqui tsoabi yohiyamanahue.

Hen tah hen mahuyaxihqui hihqui Jesus

(Mr 8.31-9.1; Lc 9.22-27)

²¹ Jaatian pari jato yohimenoxon ta hashoan sirijaquin sca jato yohibenanshqui, jaa mahuyaxihqui honanahbo. Jerusalem janin jaa cati jai, jano jan hicha tiromabo teneti jai, judio hapobaan tiromajahah bi jan teneti jai, sacerdote hapobaan tiromajahah jan teneti

jai, jaton huisha honanbaan tiromajahab bi jan teneti jai, tenehax bi jan mahuatíhi, mahuatípish bi jahuen quimisha neten sca jan teehihribiyaxahnon jato yohiquin. ²² Nincaxon, hahmebi yohicatsihquin Jesus ninibohanxon sca Pedronen yohiquin:

—Jascari yohuanyamahue, Hihbon. Papan ta mia jascajatimahiqui. Min yohihi quescaja ta mia jatimahiqui.

²³ Pedro bejixxon sca:

—Hea jenebahini catanhue, Satanás. Papa queenai quescajayama hen janon hihxon tah min hea pantecatsihqui. Papan shinanai quescajaquinma bi tah min jonibaan shinanai quescajati honanai.

²⁴ Jascajaquin Pedro yohixon, texe rihbi sca jahuen haxenicabo yohirihbiquin:

—Hehchon jocatsihxon tah man matobi man queenaima sca man hahtíhi. Hea rehtehebaan bi tah hen heen Hihbaan joi jenetimahi hihxon tah man hen mato yohihi quescahijatihi. ²⁵ Mahuati qui raquetaiabo ta mahuatíhiqui. Jascapahbo jihuetimahi bi ta hea copi mahuataibo queyoyamanox manatíhiqui. ²⁶ ¿Nea mai jatíhobi hihbohax bi mahuatax jahuaya sca man banetihin? ¿Jabiyahpa queyóscaxon jahua man jatíhin? ¿Jabiyahpa queyoyamanoxon man jahua Papa hinanti hahtipahin? ²⁷ Heen Papan coshi xabaya tah hen joribiyaxihqui. Jahuen yonotiboyabi tah hen jotíhi. Joxon tah hen jatíhibi jonibo tsinquixon jaabo hihpahonibo quescajajaquin jato hahxontíhi, caibo copijaquin, caibo casticanquin. ²⁸ Hen mato yohinon nincanahue. Caibo neno nichibaan tah man mahuaxonma hea quiquin haposcaax jahui man jis yaxihqui —jato jaquin.

17

Jesus huetsapahcahíni

(Mr 9.2-13; Lc 9.28-36)

¹ Jato jascahipi seis dias sca Pedro, Jacobo, Jacobon huetsa Juan, jaabo rahsi quenaxon mahchi janin Jesusen jato hioquin. Jano tsoa yamaha janin mahchi queya jato maniquih-nquin. ² Jano sca ta jaton jisnon bi Jesus huetsapahcahinnishqui. Jahuen bemanan xabati, bari xabati quesca sca jai. Jahuen chopá rihbi pehnecahíni, xaba quescahíni. ³ Jaabaan jisi bi yamanihbo Moises betan Elías jano rihbi nihrescai. Jesus betan yohuan yohuani rabebi jano nichí. Jato jisxon Pedronen sca Jesus yocaquin:

⁴ —Hihbon. Non neno jahue ta siri qui. Mia queenaiya tah non quimisha tapastíhi, mina huetsa, Moisesnina huetsa, Elíasena huetsa rihbi —hahquin Pedronen.

⁵ Pedro yohuanparíhiya xabatai nai cohiman jato mahporenquin. Jaa nai cohin chicho quehax yohuanai sca nincacanquin:

—Nea ta hen queenai heen baque qui. Hahan tah hen híhti jenimahi. Jaa nincanahue.

⁶ Jaa yohuanai joi nincacax, jahuen haxenicabo híhti rahtetax betíhíhpaquecani. ⁷ Joxon sca jato mehaxon:

—Raquetaxma huenihíhnanahue —Jesusen jato jaquin.

⁸ Huenixon jisi bi tsoabi yamascai, Jesus huesti res.

⁹ Mahchi janinhax botopaqueti caquin sca:

—Man rahma jisí tsoabi yohiyamaxahnahue. Mahuatípish hen hahquirihbi teehihnon caman tsoabi yohiyamaxahnahue.

¹⁰ —Mia noque jihuemanica hihqui bi ta noquen huisha honanbo huetsa yohuan jaiqui. Elías pari ta joribitíhiqui, chíni sca noque jihuemanicah híh ta jacaníqui. ¿Jahua copi jascacaníquin? —Jesus yocacaníquin.

¹¹ —Hihcoini. Elías ta joribíxon jatíhibi bexoja sca jaiqui. ¹² Man honannon hihxon tah hen mato yohiscai: Elías ta moa joribiscanishqui. Jahuiton bi ta jaa hihqui honanyamacanishqui hapobaan. Jaa honanxonma ta queenaibo quescajaquin jahancanhoxqui. Jascaja rihbi ta hea yayaxihcaníhqui —jato jaquin.

¹³ Jaatian ta Elías jan híhqui bi nashimanica Juan jan yohihi honanscannishqui.

Jomiyahpa Jesusen rohajahi

(Mr 9.14-29; Lc 9.37-43)

¹⁴ Botopaquetax cahax tsama manahítaibo qui nococani. Jesus behchíhax jaa bebonbí huesti jonin raboxonen tsíquihahpaquexon:

¹⁵ —Hihbon, jenquetsaha ra heen baque hea jaxonhue. Tehquehíhqui ta híhti jomíhiqui. Hícha coti ta chíhi janin paquetíhqui. Jeneho rihbi ta paqueresíqui. ¹⁶ Miin haxenicabo qui hen híhuehax bi ta rohajati hahtipahyamacanaxqui —hahquin.

¹⁷ —¿Shinancoinjomabon! Shinanquin sirijayamahíbo tah man qui. ¿Jahuentího basi hen mato betan híhquiya pari man pontetihin? ¿Jahuentího basi cahra hen mato teneti jain? Jaa híhuenahue —Jesusen jato jaquin.

¹⁸—Jaa jenebahinhue —Jesusen coshin jaáh sca ta jaa baque jenebahini tiroma yoshin canishqui. Jaatianbi rohacahinscai, siriscái, jaa baque.

¹⁹Jesus qui sca jaabo rahsibi jahuen haxenicabo tsinquijaquexon yocacanquin:

—¿Jahua jenquetsahiya non camati hahtipahyamahaquin? —hihcáni.

²⁰—Man hicha shinancoinyamahi copi, rahan. Hen mato yohihah nincanahue: Moxo bero hexti pishca hihqui quescapi maton shinan hicha tahma pishca res jaxon cah man nea mahchi yohirestihi. Join res potati tah man hahtipahquehahnai. Catanhue man jaah cahen cahan. ²¹Jaatian man hahtipahyamahibo yamahan —jato jaquin.

Mahua tah hen jayaxihqui hihribihi Jesus

(Mr 9.30-32; Lc 9.43-45)

²²Galilea hian qui nocorihbixon sca: —Hea bihnon ta hapobo bihmayaxihcanihqui, hea rehteahabo hihxon. ²³Rehtehipibaan bi tah hen quimisha neten hihquish hahquirihbi teehiyaxihqui —Jesusen jato jaquin. Yohihah benáscacani. Hihti benati.

Papan xobo bexojati copi yocacahtaibo

²⁴Janohax Capernaum jema janin sca bocani. Nocotaiya Papan xobo bexojati cobrannicabaan Pedro yocaquin:

—¿Papan xobo bexojati coriqui maton haxemanicahten copijayamahiquin?

²⁵—Copijaquin rahan —hihcáhini sca Pedro cahi. Jano Jesus jai xoboho mapetai bi Jesusen pari jaa yocaquin:

—¿Min jenquetsahpa shinanain, Simoman? Hea yohihue: ¿mai meha quiquin hapobaan tsoabo cobraniquin? ¿Jatonah bi jaton baquebo nan? ¿Huetsabo nan?

²⁶—Huetsabo rahan, Hihbon.

—Hihcoini. Jaton baquebo ta cobrantimabo qui. ²⁷Jaabi, sinayamahahbo hiaman mishquitanhue. Mishquixon min bihmenohi yapa bihxon, jaxbaxon, jahuen jana janin jai coriqui bihhue. Jaa bihxon tah min noque rabebi copijaxontihí —Jesusen jaquin.

18

Tsoa non hashoan yohuan hihbo quin hihquibo

(Mr 9.33-37; Lc 9.46-48)

¹Jaatian jahuen haxenicabo sca joxon, Jesus yocacanquin: —¿Papan jihuemati janin tsoa non hashoan yohuan hihbo quin, hihbon?

²Baque pishca quenabohanxon sca jato tocanbi nichinquin. ³Naponbi nichinxon sca: —Hen mato yohinon, nincanahue. Baque pishca quescanahue. Shinan ponteyamahax tah man Papan jihuemati janin nocotimabirestihi. ⁴Jahuen hapoti coshi yamahi ta nea baque pishcaten honaniqui. Jascajaquin shinanaibo ta Papan jihuemati janin hashoan yohuan hihbo qui. ⁵Nescapa baque pishca huesti res heen janen sirijaquin bihxon yanapanquin tah man hea rihbi jascajahi.

Hohchapan man paquemis hihqui.

(Mr 9.42-48; Lc 17.1-2)

⁶Nescapa hea nincacoinai baque pishca hohchamahi joni ta hihti hohcha jaiqui. Hihtihosi macan renti qui tenexxon hian naponbi potahah jenimatihihma bi ta nescapa pishca jan hohchamani copi Papan casticanah hihti tiromati qui. ⁷Mai mehabo ta hahraai hihyaxihquiqui, huetsabo hohchamanish. Hohchati qui caibo tecayacahinti hahtipahyamahibaan bi ta jato hohchamanibo hashoan hahraai hihyaxihquiqui, Papan casticanti jato qui paquetah.

⁸¿Miin mequeman min hohchatain? Mextehue. ¿Miin taken min hohcatain? Taxtehihxon potahue. Mento hihyamahax chantohax queyoyamanox manatah cahen tiromama. Rabe mequenyahpahax rabe taheyahpa chihi qui potahah cahen hihti tiromahan. ⁹¿Miin beron mia hohchamahiquin? Tsecaxon potahue. Rabe beroyahpahax bi johuehinhatai chihi perehiqui janin cahá ta tiroma bi res qui. Benchexax bi queyoyamanox manatah cahen hashoan siri.

Manotai carnero

(Lc 15.3-7)

¹⁰Coiramenahue. Nescapa baque pishca jahujajoma hihqui man shinanmis. Naihohon ta jato coiranquin jascabijaquin heen naihoh queha Papa yocaxoncaniqui jahuen yonotibaan. ¹¹Manotaibo jihuemahi tah hen joniqui.

¹²Huesti joni cien carnerobo jai quescá tah qui. Huesti jahuen carnero cahen manotan. Noventinueve pasto janinbi potabahini ta manotai huesti benahi sca catihiqui. ¹³Caxon merahax ta jahan hihti jenimatihiqui. Texe behnotaxma pasto chian nichí copi jenimahax

bi ta manotai rahma merahax hashoan jenimascaiqui. Jasca coin tah qui. ¹⁴ Ni huestibi nescapa baque pishca manotima ta maton naihoc queha Papa queenihqui.

Jascabi sca janon jenehue, non jatihi
(Lc 17.3)

¹⁵ Miin huetsa mihqui hohchataiya jaa benahi caxon, jaa huesti yohuanquihnxon jan hohchatai yohihue. Mian yohihah jaan nincacaiya tah min miin huetsa meraribhi sca jai, jan manoquehana. ¹⁶ Min yohihah bi nincacatsiyamahiya huetsa rihbi miin huetsa benatahhue. Huesti hihyamahiya rabe meraxon, hioxon, jaton nincanonbi miin huetsa yohirihbihue. Huishani joi jai quescaquin hahhue, Yohicoi sta jaaxqui jaabo hihxon rabe hioxon man yohuanai nincamaquin. ¹⁷ Jaabaan rihbi yohihah bi nincacatsiyamaparihiya, miin huetsabo jatihibi sca yohihue. Jatihixonbi sca yohihah bi nincayosmaparihiya, nahua tah qui hihxon jenebahinscahue, miin caibohax bi nahuascai quescanon.

¹⁸ Hen mato yohinon nincanahue. Jascabi sca janon man mainxon jascajaquin yohihi jatihibi ta naihocxon jascarihbhi yohihah sca jatihiqui. Man mainxon yohixon bexojahi jatihibi ta naihocxon rihbi bexojaha sca jatihiqui.

¹⁹ Huetsa rihbi hen mato yohinon: Huesti shinanyaxon man joni huetsa betan tsiniquixon yocacah ta man yocacai jatihibi heen naihoc queha Papan mato hahxontihiqui. ²⁰ Jano man rabe hihyamahax quimisha joni heen janen tsinquitai janin tah hen hea rihbi hihtihi. Jaa copi Papan mato hahxontihiqui honannahue —jato jaquin.

²¹ Jesus patax nihquirani joxon Pedronen yocaguin:
—¿Jahuentihi coti noquen huetsa noque qui tiromahah bi non hahan shinanxon, jascabi sca janon jenehue non jatihin, Hihbon, noque qui jan tiromahi non shinanyamascanon? ¿Hasta siete coti non jascajatihin?

²² —Siete coti res ma bi setenta coti siete janaxon toponah, jano caman, rahan.
²³ Papan jihue cahen quiquin hapon hahcai quescapah. Jaa quiquin hapon cahqui jaton cuenta copi jahuen jonibo betan bexohah. ²⁴ Jaton cuenta toponhihnihiya bi jaton hani coriqui huesti mil ribinai joni jahui. ²⁵ Jahuatohonbi jahuen ribin copijatimahiya sca:

Hina sca jaabo nea joni maromanahue, jahuen haiboya jahuen baquebo rihbi maromaxon jahuen jahuaborabo jatihibi maromanahue, jan ribinai copi hen coriqui bihnnon hah ca hapon jai. ²⁶ Jaatian ta raboxonen nihxon jahuen jonin hihti yocatihiqui:

Hea tenehue, hihbon. Mia tah hen jatihibi copijayaxihqui.

²⁷ Hahan shinanxon sca ta Jascabi sca janon jenehue jahuen hapon jatihiqui, ribinjoma sca jan janon. ²⁸ Ribinjoma caxon sca cahen jahuen hahbe teenica cien coriqui res jaa ribinai meratithi. Meraxon texecobahinxon, Min hea ribinai hea copijatahi tsoh hahtithi.

²⁹ Raboxonen nihxon sca ta jahuen hahbe teenicaton hihti yocatihiqui: Hea tenehue. Mia tah hen copijayaxihqui. ³⁰ Jan hihti yocacah bi cahen jeenhahyamaxon bi policia bihmaxon jatihibi jan copijanon caman sipo xoboho tsahontithi. ³¹ Jan jascajahi jisish texe jahuen hahbe teenicabo hihti benati. Benatax ta jaton hapo yohihi caxon jatihibi yohicantihiqui. ³² Jahuen joni quenamaxon sca ta jahuen hapon yohitihiqui: Tiroman, min hea hihti yocacah tah hen mia Jascabi sca janon jenehue hahcaqui. ³³ Hen mia jascaxaxonah cahen mian rihbi sca miin hahbe teetai joni mian hahxontithi, hahquin. ³⁴ Sinaxon sca ta jahuen sipo xobo coirannicabo jaa joni hinantihiqui, jahuen ribin jatihibi copijanon caman.

³⁵ Maton huetsa mato qui tiromahah bi man maton jointiboyaxonbi man jaa hohmismayamahiya ta heen naihoc queha Papan maton hohcha shinanbehnoyamarihbithiqui —Jesusen jato jaquin.

19

Noquen hihquihinti non potatimahi
(Mr 10.1-12; Lc 16.18)

¹ Jato jascajaquin yohihax sca Galilea mai janinhax cahax Judea main sca cahi cahi. Nocotax Jordan huean janinbo cahi, hoque quexa. ² Hihti caibo rihbi jaa chibani bocani. Hahqui nocotai boya, janoxonbi jaton hisinbo jaan rohajaquin.

³ Fariseobo rihbi sca jahui, Jahuen yohuan copi rehtenoxon hihxon, Jesus yocacanguin:
—¿Queenxon copi res noquen haibo potacatsihquin non potatimahin? —hahcanguin.

⁴ —¿Jonijamenoquin haibo betan bebo Papan jato jonijani man jahuen quirica janin jisyananiquin? ⁵ Jaa copi ta jahuen mama jahuen papa jenebahini sca jahuen haibo betan jihueti jahuen bene catihiqui. ¿Rabehax bi huesti yora sca jaabo rabe sca janon jahuen haibo bebaan hihquihinti Papan yohihi man honanyamahin? ⁶ Jaa copi ta rabehax bi huesti yora sca qui. Papan ta jato huesti yorajahiqui. Jaan huesti yorajaha tsoanbi jenemayamanahue hih ca jaihshen —Jesusen jato jaquin.

⁷ —¿Jascahiya jahua copi sca noquen haibo potanoxon non jahuen jaya cati quirica huishaxon potati Moisesnin yohinishquin? —hahcanquin.

⁸ —Mato nincayosmabo copi ta Moisesnin mato jascajaquin yohinishqui. Noquen haibo non potanon Papan noque jonijani que ma bi ta maton haibo man potacatsihqui copi mato jascajanishqui. ⁹ Hean sca tah hen mato yohihi: Maton haibo tsinihima bi jaa potaxon huetsa sca bichish tah man jaa copi hohchayahpaboscai —jato jaquin.

¹⁰ —Noquen haibo non potatimahiya ta haibojoma jihueta hashoan siri qui —hihcani jahuen haxenicabo sca.

¹¹ —Jaa man yohuanai ta jatihibi jonibaanan shinantimahi qui, caibaanan res. Jascari jahue Papan jaah ta caibaanan res jascajaquin shinantihiqui. ¹² Queejomabo ta mesco jaiqui. Caibo cahen jascapahbo caini. Caibo cahen huetsabaanan jato jascapahhue hahca queejoma sca baneti. Caibo rihbi cahen Papan jihuemati joi yohinoxon queejoma banetan. Nincati hahtipahxon nincanahue —jato jaquin.

Baque romishin Jesusen yocaxonai

(Mr 10.13-16; Lc 18.15-17)

¹³ Jaatian baquebo sca Jesus qui becanquin. Jan jato mehaxon Papa yocaxonnon hihxon hihuecanquin. Hihuehimaan bi jahuen haxenicabaanan jato Jaya beyamanahue hahquin.

¹⁴ —Jaya behábo jato panteyamanahue. Joresnon, jotima yohiyamanahue. Jascapahbo ta heen Papan jihue janin canicahbo qui —Jesusen jato jaquin. ¹⁵ Jato jascajaquin yohixon baquebo sca mehaxon janoxonbi Papa jato yocaxonquin.

Coriquiyahpaton Jesus yohuanquihnai

(Mr 10.17-31; Lc 18.18-30)

¹⁶ Huetsa joni sca jahui, beronan tahni.

—Maestron, ¿queyoyamanox mananoxon jahua siri shinanti hen pishinain? —hahquin yocaquin.

¹⁷ —¿Jenquetsahpahiya min hea sirijati joibo yocacain? Huesti res ta siri qui. Queyoyamanox manacatsihquin Papan mia yohini quescajahue —hahquin Jesusen.

¹⁸ —¿Jahua jan yohini nan? —hahscaquin.

—Rehteyamahue. Tsiniyamahue. Yometsohyamahue. Quesayamahue. ¹⁹ Miin papaya miin mamahon queenhue. Mihmebi min queemehti hihqui quescarihibi joni huetsahon queenhue —hahquin Jesusen.

²⁰ Jatihibi tah hen jaresscai. ¿Jahua hashoan hen pishintihin? —hahquin beronanen.

²¹ —Jahuabi pishinyamacatsihxon miin jahuaborabo maromatanhue. Maromaxon jahuaborajomabo jaa coriqui hinanhue. Jaatian tah min naihhoh hicha jahuabora jatihi. Jato hinanax, hehbetan cahi sca jotanhue —Jesusen jaa jaquin. ²² Jascahah, benacahini beronan caresscai, jahuen jahuaborabo hicha jaax copi. ²³ Jaa benatax cahiya, jahuen haxenicabo sca Jesusen yohiquin:

—Man honannon hihxon tah hen mato yohihi. Coriquiyahpabo Papan jihuemati janin hihquiti ta tee bi res qui. ²⁴ Hen mato yohirihbinon: Xohmox bero qui hahua huinomati tee que bi ta Papan jihuemati janin coriquiyahpabo cati hashoan tee bi res qui.

²⁵ Jesus jascari yohuanai nincacax ta jahuen haxenicabo rahte rahtenishqui.

—¿Coriquiyahpabo cati tee hihquiya tsoa non Papan jihuemati janin catihin? —hihcani.

²⁶ Jato jatihibi bejisxon sca:

—Jonibo hahmebi jano nocoti hahtipahyamahi bi ta Papan jatihibijati hahtipahiqui —Jesusen jato jaquin.

²⁷ —Noquen caya tah non noquen jahuaborabo jatihibi jenebehnaxnon mia chibanai, Hihbon. ¿Jahua sca non bihyaxihquin? —hahscaquin Pedronen.

²⁸ —Nincanahue, hen mato yohinon. Hea chibanai hihquish tah man nete behna tian sca hapobo sca man jihuetihi. Quiquin hihbo hihxon hen jatihibi hihbojahi tian tah man Papan israeli baquebo jatihibi jixxontih, hapo rahsixon. ²⁹ Hea hahxonnoxon jaton jihuebo jenebahinaibo, jaton huetsabo jenebahinaibo, jaton chocabo jenebahinaibo, jaton papa jaton mama jenebahinaibo, jaton banabo jenebahinaibo, jascapahbo tah hen hashoan hicha hinantih. Huesti jan jenebahinni tah hen cien sca jaa hinantih. Queyoyamanox manataibo rihbi ta jaabo jatihiqui. ³⁰ Hen jascajaquin hahxontih bi nincanahue, hen mato yohinon: Hicha bebohibo ta chinibo sca hihyaxihquiqui. Hicha chini chininish ta bebocahinyaxihcanehiqui.

20

Teexomnicahbo

¹ Papan jihuemati ta huai hihbaanan hahcai quescapah qui. Jaa copi tah hen mato yohihi. Jaa huai hihbo cah hen yamequiri cahan, jahuen bimi tsiniquixomnicahbo benahi.

² Teexonnicaḥbo meraxon, huesti neten teexona patorobaan copijahi tihibi copijatijaxon, jahuen huai janin jato raanquin. ³ Bari nai pohahihnataiya sca caxon, huetsa teenicabo rihbi meraquin, jaton nihti janin cahuan cahuanresaibo. ⁴ Jaabo rihbi quenaxon:

—Heen huai chian botannahue mato rihbi. Ponte shinanxon tah hen mato copijatitih —jato jaquin. ⁵ Jahuen huai chian sca bocani. Barin manan tsahcahiya sca caribixon huetsabo meraxon jascajaribiquin. Bari racacahuanaiya sca jascajaribiquin, caibo rihbi sca meraxon. ⁶ Bari hihquiscai cahiya sca caxon, nihresaibo merarihbxon jato yocaquin:

—¿Jahua copi man jeman res nihbahinahin?

⁷ —Tsoanbi ta noque teemayamahi —hahcanquin.

—Heen huai chian teeti botannahue, mato rihbi —jato jaquin. ⁸ Bari hiquihiya sca jahuen teemanica yohiquin:

—Noquen jonibo quenahue. Chini hihquihahbo pari copijahue, jascajaquin teemenohibo chini sca copijanoxon.

⁹ Bari hihquicatsicaiya cahabo jahuiya sca jato copijapaquequin, joni tihibi huesti neten teexonbahinaha patorobaan copijahi tih copijaquin. ¹⁰ Chini sca teemenohibo jahui. Noque rah ta hashoan hicha copijanoxihquiqui hihcane. Jascaraibaan bi jaabo rihbi jatihi rihbi copijaquin. ¹¹ Jaton coriqui bichish sca, huai hihbo qui sinati yohuancanacani.

¹² —Hoa chini hihquihahbo ta huesti hora res teecanaxqui. Non tee teexon bari tenebahinahi bi ta jatihi res noque copijahiqui —hihcane. ¹³ Huai hihbaan sca yohiquin:

—Mia tah hen tiromajayamahi, chahin. ¿Jaatihi canannoxon huesti neten teebahinati min yohiyamahahquin? ¹⁴ Miin coriquiya catanhue. Hen mia hinanai tih rihbi tah hen chini hihquihahbo hinanai, queenxon copi. ¹⁵ Heabi hen queenai quescajaquin hen coriqui hen hinanti hahtipahyamahin? ¿Hen huetsa joni hicha hinanai copi min sinatani? —hahscaquin hihbaan. ¹⁶ Jascajaquin rihbi ta chinitaibaan bebonyaxihquiqui, bebohibo rihbi ta chinyaxihquiqui —Jesusen jaquin.

Hen tah hen mahuyaxihqui hihqui Jesus

(Mr 10.32-34; Lc 18.31-34)

¹⁷ Jaa pecaho sca Jerusalem jema janin Jesus cahi cahi. Bahin caquin, jahuen doce haxemanicahbo quenabohanson, jato yohiquin:

¹⁸ —Jerusalen janin tah non cahi. Jano ta sacerdote hapobaan hea bihyaxihquiqui, caibaan hea jato bihmahah. Jaton huisha honanbo betan yohuanxon ta hea reheti yohiyaxihcanihqui. ¹⁹ Hea rehtehahbo hihxon ta nahuabo hea hinanyaxihcanihqui. Hea hosan hosanson, rishqui rishquixon jihuin hueonxon hea rehtenon ta jascajayaxihcanihqui. Rehtehahbo bi tah hen quimisha neten hihquish hahquirihbi teehiyaxihqui. Man honannon hihxon tah hen mato yohihi —jato jaquin.

Jacoboya Juaman mamanyocacai

(Mr 10.35-45)

²⁰ Jaatian Zebedeon baquebaan mama sca jahui. Jahuen baque rabeya joxon jan queenai yocanonon Jesus bebon raboxonen nichu.

²¹ —¿Jahua min queenain? —Jesusen jaquin.

—Mia noquen quiquin hapo hihqui tian, nea heen baque rabe mia namanbi hapo rabe hihnon yohixonhue. Huetsan mia mecayahoxon yononon, huetsan mia memihoxon yononon yohixonhue —hahquin haibaan.

²² —Min yocacai tah min honanyamahi. ¿Hean xehayaxihqui mocani jaabaan xehati hahtipahiquin? —Jesusen jaquin.

—Hahtipahquin rahan —hahquin.

²³ —Hean xehahi mocani tah man xehatihi. Man jaa tenehi bi ta hea pataxxon hehbe hapoti hen mato yohiti hahtipahyamahi. Heen Papan ta hea jascajati yohiyamahiqui. Jaan honanaibo qui ta Papan jaa hinanyaxihquiqui, jato jascajati yohinihxon —hahquin. ²⁴ Texe jahuen haxemanicahbaan sca nincaxon Zebedeon baque rabe sinajacquin. ²⁵ Jato sinajahibaan bi Jesusen jato yohiquin:

—Hen mato yohinon benahue —hahxon— nahua hapobaan jaton caibo yono yonohi tah man honanai. Jato ta hihbojancaniqui jaton hapobaan. ²⁶ Maton tah man jascajatimahi. Hapocatsihxon texe hahxoncoinnahue yanapanquin. ²⁷ Bebonicacatsihquish, jaton yonotinahue. ²⁸ Jonibaan hea hahxonnon hihquish tah hen joyamaniqui. Jato hahxonnoxon hihquish tah hen joniqui, noquebaque hihqui bi. Hicha jonibo jihuenon hihxon tah hen hehri jato rehtemahi. Hen jato hahxonti shinanai quescajaquin shinannahue —jato jaquin.

Rabe benche Jesusen rohajahi

(Mr 10.46-52; Lc 18.35-43)

²⁹ Jericó jema janin nocotax sca, janohax Jerusalem quiri jahuiton sca hihti caibo jato chibanbenahi becani. ³⁰ Jaa bahi quexabi ta rabe benche janishqui, huinotaibo nincareni tsahotai. Huinotai ta Jesus qui, hihquibo nincacax sca quenácahincani.

—Hihbon, noquehon shinanhue, Davidinin baquen —hihcani. ³¹ Jascari quenataibaan bi Netenahue hahcanquin, huinotaibaan. Netenahue hahcabo bi hashoan sca quenacani: —Noquehon shinanhue, Davidinin baquen.

³² Nihrenenxon sca Jesusen jato quenaquin.

—¿Hen mato jenquetsahaxonti man queenain? —hihqui.

³³ —Non jisnon noquen bero rohajahue, Hihbon —hahcanquin. ³⁴ Jaatian jatohon hihti shinanxon, bero qui jato mehaxon jato rohajaquin. Jatón bero siricahinax, hahbetanbi sca becani, rabebi.

21

Jerusalen janin Jesus nocotai

(Mr 11.1-11; Lc 19.28-40; Jn 12.12-19)

¹ Jerusalem hochoma sca becani. Betfagé jema pishca qui nocotax, Olivo manan qui nococani. Janoxon sca jahuen haxenica rabe raannoxon yohiquin.

² —Hoa hoque jai jema janin caxon tah man caballo meraxihqui. Nexa tah man meraxihqui, jahuen baqueyabi. Rabebi pecaxon jahuen baqueyabi hea bexontannahue.

³ Jahueja man jain hahcá, Noquen Hihbo ta nea pishinihqui hihnahue. Jaatian ta mato bexonmatihiqui —jato jaquin.

⁴ Neateman Papan joi huishanicabaan yohini quescabijaquin janon ta jato jascajanishqui.

⁵ Jerusalem janin jihuetaibo nescajaquin yohinahue: Jisnahue. Maton quiquin hapo ta nocoti jahuiqui. Quiquin hapobo jahui quescarihma bi joni quesca jahuiqui, caballo cahtsahotax. Caballo baque res cahtsahotax ta jahuiqui, noquen jahuaborabo noque papixonnica caballo baquen ta jahuiqui hihqui jaa huisha.

⁶ Jan yohihah quesca sca caxon, nexa sca caballo meracanquin jahuen haxenicabaan. ⁷ Pecaxon, jahuen baqueyabi becanquin. Caballo baque jatón chopa cahpohenxon, jano Jesus cahtsahonbenacanquin. ⁸ Hihti caibaan jatón cotoño pecaxon jano Jesus jonoxihqui bahinbi mijancanquin, hahan jonon. Caibaan rihbi jepe pehi xatexon jascajaribiquin, mijanquin. ⁹ Caibo bebóhi becani, caibo rihbi hahchon becani. Quenáhonahi becani:

—David xohtahi ta jahuiqui. Hahxonhue. Papa Diosen janen ta jahuiqui. Papan shinanya ta jahuiqui. Jaa hahxonhue, Papan —hihcani.

¹⁰ Jascahah, Jerusalem janin hihcohi. Jaa jema janinhahbo jatihibi rahte rahtetax:

—¿Tsoa hin? —hihcani.

¹¹ —Nea ta Papan joiya jahui joni qui, Jesus. Galilea mai mehax nocoti jahui, Nazaret jema janinhax nocoti jahui —hihcani, tsamajaquetaibo.

Papan xobo janin tiromabo jan camahi

(Mr 11.15-19; Lc 19.45-48; Jn 2.13-22)

¹² Papan xoboho sca Jesus mapeti. Mapexon, janoxon marohiton jonibo meraxon, maromahiton rihbi meraxon, jascapahbo jatihibi camaquin. Jato picomaxon, jatón coriqui mahnenanti mesabo behonxon, nobex maromanicahbaan tsahotibo hueranbohanxon, jato yohiquin:

¹³ —Papan huishani joi janin ta nea jaiqui: Heen xobo ta janoxon hea yohiti xobo qui. Jascapa xobo hihqui bi tah man jano yometso tsamati jaa xobo jai —jato jaquin. ¹⁴ Jaatian sca bencheboya chantobo jaa xoboho mapeti, Jesus jano jai copi. Jato jisxon, jaan jato rohajaquin. ¹⁵ Jahuen coshi shinaman jan jato hahxonai jisxon sacerdote hapobo betan jatón huisha honanbo sinati. Papan xoboho baquebo quenatai, Davidi xohta hahxonhue hihquibo nincacax, sina sinacani. ¹⁶ Sinaxon, Jesus yocacanquin:

—¿Jaabo yohuanai min nincayamahin? —hahcanquin.

—Nincaquin rahan. ¿Baquebo tah min mihqui siripi yohuanmahi, baquexobo rihbi, hihqui Papan huishani joi, man jahuentianbi jaa jisyaniquin? —jato jaquin. ¹⁷ Jato jenebahini sca picoti cahax huetsa jema janin cahi, Betania jema. Jano sca hoxashinahi.

Jesusen jihui xanamahi

(Mr 11.12-14, 20-26)

¹⁸ Xaba paquetaiya sca jahuex Jerusalem janin nocotax picatsihscái. ¹⁹ Bahi quexabi bimi jihui huesti meraxon, bimi bichi caha bi yamahi. Pehi rahsi jai.

—Jahuentianbi bimiyamaxihhue —hahquin, jihui. Jan yohihah, xanacahinscái. ²⁰ Jan yohiha jihui choshihí jisish, rahte rahtetax jahuen haxenicabo yohuani:

—¿Jenquetsahpi jaa jihui xanacahinihquin? —hihcani.

²¹ Yohuanai nincaxon, jato yohiquin:

—Man honannon hihxon tah hen mato yohihi. Papan mato hahxoncointihi honannon, hahxonyama rah ta hea jatihiqui shinanyamaxon tah man jascapa yohiti hahtipahtih. Jascapah res ma bi tah man hoa manan quescapahbo rihbi yohitih, Huenihihnatax hoa hiaman paquehue. Shinancoinxon man yohihah ta man yohihi quescatihiqui. ²² Papan mato hahxonthi honancoinxon man yocacai jatihibi ta jaan mato hahxonyaxihquiqui.

Tsoan yohihah min jascajahin hihquibo

(Mr 11.27-33; Lc 20.1-8)

²³ Jaatian sca nocotax Papan xoboho mapexon jano nocohihnatai jonibo haxemaquin. Jato haxemahiya bi sacerdote hapobo becani, jaton hahbe hapobo betan. Joxon:

—¿Tsoan mia jascajahue hahca min neno jascajahipiquin? —hahcanquin.

²⁴ —Mato rihbi tah hen huestijaquin yocatih. Man hea yohihiya tah hen tsoan hea jascajahue hahcai hen mato yohirihbitih. ²⁵ ¿Tsoan yohihah Juaman nashimapahonishquin? ¿Papan yohihah nan? ¿Jonibaan res yohihah nan? —jato jaáh bi jahuahihyama sca jacani. Jaabo rahsibi res yohinani.

—Papan yohihah rahan hih non jaiya ta noque yocaxihquiqui, Jahua copi sca man Juaman yohihah bi nincayamanihquin. ²⁶ Jonibaan res rahan hih tah non jatimaribih. Tsamataibaan noque jenquetsah ra jamis. Juan Papan joi yohinica hihpahoni ta shinancaniqui —hihcani, jaabo rahsibi yohinani.

²⁷ Yohinanxon sca:

—Non tah non honanyamahi —hahcanquin Jesus.

—Hean rihbi tah hen tsoan hea jascajahue hahcai mato yohiyamarihbihi —jato jaquin.

Rabe bebo baqueya

²⁸ Man jaa shinannon tah hen mato yohihi. Rabe bebo baqueya joni ta japahonishqui. Jahuen beboquiha baque ta yohinishqui:

—Rahma noquen huai chian teetanhue, baquen —hahquin. ²⁹ Jascahah bi:

—Hen tah hen queenyamahi —hihqui. Jascarax bi chini sca pontejaquin shinanax, teeti cahi, huai chian. ³⁰ Jahuen chini sca jahuen papan jascajaquin rihbi yonoquin.

—Teeti rahan, Papan —hahcax bi jahuen chini baque cayamaribih. ³¹ Hea yohinahue: ¿Jahuemehaton jahuen papan yohiha quescabijanishquin?

—Jahuen baque beboquihaton rahan —hahcanquin.

—Hihcoini. Jascarihbihi ta coriqui cobranmisboya tsini haibobo mato bebohi bocanihqui Papan jihuemati janin cacatsihqui. ³² Papan bahin canoxon ponte jihueti Juaman mato yohihah bi tah man nincayamanihqui. Coriqui cobranmisbaan caya ta nincanishqui. Tsini haibobaan rihbi. Jaabaan nincacoinscai jisxon maton rihbi chini sca pontejaquin shinannon nincacointih bi tah man nincacoinyamahi.

Tiromabo teexonnicahbo

(Mr 12.1-12; Lc 20.9-19)

³³ Huetsa jahan haxeti joi nincanahue. Huesti jonin ta hani huaijanishqui. Jahuen huai banaxon, jahuen senenjatibo honantijanoxon chiquebohanxon, hahan bishtaxmatijaxon, janoxon coiranti xobojaxon, jahuen huai coirantibo yohihax joribiyaxon cahi caresscai.

³⁴ Jahuen huai tsinquit tian sca, jahuen jonibo raanquin, jahuen coirannicahban jahuen bimi hinannon hihxon. ³⁵ Raanah sca nococani. Nocotaiton bi jahuen coirannicahbaan jato yahtanquin. Huetsa rishquixon, huetsa rehtexon, huetsa rihbi macaman tsacaquin rehtecanquin. ³⁶ Jaa pecaho sca huetsa jahuen jonibo sca huai hihbaan raanrihbiquin, hashoan hicha sca. Raanah nocotaiton jato jascajaribicanquin. ³⁷ Chini sca jahuen baquebi raanquin. Heen baque ta nincayaxihcanihqui hihxon jaa raanquin. ³⁸ Jahuen baque nocoti jahui merahax, yohinancani:

—Nea ta huai hihbo hihyaxihquiqui, jahuen papa mahuataiya. Jaa rihbi rehtenon benahue noquenah sca jahuen huai hihnon —hihcani. ³⁹ Nocotaiton sca yahtanxon, huai mapoho boxon rehtecanquin. ⁴⁰ ¿Joxon sca jaa huai hihbaan jahua jato jati quin? —Jesusen jato jaquin.

⁴¹ —Jato ta tiromajaquin rehtetihiqui. Jahuen huai rihbi ta huetsa coirannicahbo hinantahtihiqui, bimi jai tian jahuenah hinanyaxihquibo —hahcanquin.

⁴² —¿Papan huishani joi janin man nea jahuentianbi jisyananiquin?

Tiroma tah qui hihxon xobojahibaan potani xobo jihui ta hahqui xobojati qui. Papa Diosen ta jaa caisihqui. Jan hahcai shinanax tah non rahtetai hihqui jaa joi.

⁴³ Jaa copi tah hen mato yohihi: Papan ta mato jahuen jihue bichinyaxihquiqui. Mato bichinxon ta maton nahuabo sca hinanyaxihquiqui, jahuen joi jai quescabijahibo. ⁴⁴ Jaa jihui qui paquetaibo ta tobitihiqui. Jato qui jaa jihui paquetah ta moshi moshitaibo jayaxihquiqui —jato jaquin. ⁴⁵ Hahan haxeti joi jan yohihi nincaxon, jato qui jan jayaxon yohihi jaton hapobaan honanquin. ⁴⁶ Jaa bihcatsihquish bi jonibo qui raqexon bihymacnquin. Papan joi yohinica tah qui hihquibo sinacahincanmis hihquish raquecani.

22

Huanomahi

¹ Yahtancatsihquibaan bi Jesusen jato yohipariquin hahan haxeti joi jato nincamaquin.

² Papan jihuemahi ta huesti quiquin hapon hahní quescapi qui. Jahuen baque huanomayaxonon ta jato hichaxon pitijati yohinishqui. ³ Piti hicha jaiya sca, jan yohihipibo yohitanon, jahuen jonibo raanscaquin. Huanomaquin pihi benahue hahca bi queenyamacani. ⁴ Huetsabo sca jaton hapon raanrihbiquin.

—Hen yohihipibo yohitanahue. Piti ta hihresscaiqui. Heen torobo rehtexon, xoa toro baquebo rehtexon, pitijaha ta jatihibi hihresscaiqui. Pihihue jato jatannahue —jato jaquin. ⁵ Caxon yohihah bi nincacatsihyamacani. Huetsa janin resbojaquetancani. Huetsa jahuen huai chian cahí. Huetsa jahuen tee janin cahí. ⁶ Caibaan rihi jahuen jonibo bihxon, jato sinajaxon rehtecanquin. ⁷ Jaa copi ta sinaxon sca jaton quiquin hapon jahuen sontarobo sca raanxon hoa rehtemisbo rehtexon jaton xobobo mapojaribinishqui. ⁸ Jato jascjaxon sca jahuen jonibo yohirihbiquin:

—Noquen piti hihresscai bi ta non jato yohihipibo tiromabo qui. ⁹ Hoque cahí bahin sca botannahue. Man jano merahi jatihibi jato yohibonanahue, pihi behabo. ¹⁰ Yonohah sca bocani. Bahin caquin jonibo meraxon chanixon jahuen huanomati janin jato becanquin. Siriboya tiromabo mesco jato becanquin, jahuen huanomati piti janin hihti caibo sca joni janon. ¹¹ Pihibo jisi caxon sca jayaxon huanomati chopá sahuehaxma huesti joni pihi tshotaiton hapon meraquin. ¹² Meraxon:

—¿Jenquetsahpahi min jayaxon huanomati chopá sahuehaxma neno hihcohin, hiconin? —hapon jaáh bi jahuahiyamahí. ¹³ Piti metexonaibo sca quenaxon:

—Nea menexxon tanexnahue. Nexaxon nenoma qui bahquish chian potanahue. Jano bahquish chian potahabo ta saisaihihquiqui, hisinxon xeta tais tais hahquin. ¹⁴ Hicha quenamaha bi ta huestibo res hihquinica qui —Jesusen jato jaquin.

Non hapo copijatihin hihquibo

(Mr 12.13-17; Lc 20.20-26)

¹⁵ Yohihah, yohinani fariseobo caresscai. Jahuen joi copi rehtenoxon jenquetsahaxon non tiroma yohuanmatihin hihcani. ¹⁶ Jatonahbi jaton haxenicabo sca raancanquin, herodianobo betan caxon Jesus yocacahbo. Cahí nocoxon sca, yocacanquin:

—Mian tah min sirijaquin yohihi, maestron. Non tah non honanai. Mian tah min noque Papan bahi sirijaquin honanmahi. Tsoa qui bi raqexonma tah min jaabijaquin noque yohihi. Noquen bemanan res tah min jisyamahí; noquen shinan rihihi tah min honanai. ¹⁷ Jaa copi tah non mia yocacai. ¿Quiquin hapo Cesaronen noque cobranah non copijati jaton? ¿Non copijatimahin? Noque yohihue —hahcanquin.

¹⁸ Tiromabohi honanxon, jato yocaquin: —¿Jahuejanoxon man shinancoinhcamaxon hea tanahin? ¹⁹ Hahan copijati coriqui hea jismanahue —hahquin.

Yohihah, jaa coriqui bexon hinancanquin. ²⁰ Bihxon, sanahihnixon jato yocaquin:

—¿Neno tsoan mapo jaiquin? ¿Tsoan huishani neno jaiquin?

²¹ —Cesaronena rahan —hihcani.

—Jahuena hihquiya, jahuena hinannahue. Noquen Papa rihihi jahuena hinannahue —jato jaquin. ²² Nincacax, rahtecani. Joihaxma sca bocani.

Non teehihribitihin hihquibo

(Mr 12.18-27; Lc 20.27-40)

²³ Jaatian saduceobo rihihi yocaqui becani. Jaabaan shinanah, mahuatax non tsoabi hahquirihbi teehihtimahi. Jaabaan sca yocaquin:

²⁴ —Maestron, Moisesnin ta noque yohinishqui, noquen bocha baquejahaxma hihxon-aia non jahuen yononma bihxon hahqui sca noquen bocha non baquejaxonti. ²⁵ Neno noquen chahin baquebo ta siete janishqui, bebo rahsi. Jahuen beboquiha baque haibo bichish bi baquejahaxma hihqui. Jahuen chinipan sca jahuen yononma hihquihinquin. ²⁶ Jaa jascarihibihi; baquejahaxma mahuati. Huetsa sca jascarihibihi. Huetsa sca jascarihibihi, jaton chini caman sca. Jaa jascarihibihi. ²⁷ Jaton yononma sca mahuaribiscái. ²⁸ ¿Papan jihue janin sca teehihribihax jihuetaiboya, tsoan haibo jaa yononma jatihiquin? Jatihibichin jaa hihquihinish bi —hahcanquin Jesus.

²⁹ Jasca jaiboya, jato yohiquin:

—Papan huishamani joi honanyamaxon tah man honanai shinanxon bi honancoinyamahi. Papan coshi rihbi honanyamaxon tah man shinancoinyamahi. ³⁰ Papan jihue janin sca teehihribihibaan ta haibo bihyamayaxihquiqui. Haibobo rihbi ta benoyamayaxihquiqui. Papan naihoh jai yonotibo hihqui quescapi ta jayaxihcanihqui. ³¹ Mahuanihbo ta hahquirihbi teehihtimahiqui hih man jai bi tah hen mato yohihi ζ nea Papan huishamani joi man jisyamaniquin?

³² Hea tah hen Abrahanen Papa Dios qui. Isaaquen Papa Dios tah hen qui. Jacobon Papa Dios tah hen qui.

Jaa joo joo joo. Jaa copi honannahue. Papa Dios ta mahuanihbaan Papa Dios hihpahoni ma qui. Jihuetibaan Papa Dios ta jaa qui —jato jaquin. ³³ Jesusen jato yohihi ta tsamajaquetaibaan rihbi nincanishqui. Nincacax bi ζ jasca hin? hihquish rahte rahtecani.

Jaa pari nincati joi

(Mr 12.28-34)

³⁴ Saduceobo rihbi jan yohixon netemahi chanihahbo sca fariseobo jaabo rahsi sca tsiniquicani. ³⁵ Yohinanax, jato quiha huesti jahui, Moisesnin huishani joi honan. Jesus tanacatsihquin nescajaquin yocaquin:

³⁶ —Maestron, ζ jahue meha non Moisesnin huishani joibo jaa pari hashoan nincati jain? —hahquin.

³⁷ —Miin Hihbo Diosohon tah min miin jointiboyabi queentih, miin yoshinboyabi, miin shinanboyabi tah min jahan queentih. Jaa pari nincati joi ta jaa qui. ³⁸⁻³⁹ Jaa pecaho ta huetsa jascapah rihbi qui: Mihbe jihuetaibohon tah min queenrihbitih, mihri min queemehti hihqui quescarihbih. ⁴⁰ Jaa joi rabe janinhax ta texe Moisesnin huishani joi jahuiqui. Texe Papan joi yohinicabaan huishani joi rihbi janohax jahui.

Cristo tsoan baque quin Jesusen jato jai

(Mr 12.35-37; Lc 20.41-44)

⁴¹ Caibo rihbi sca fariseobo nocohihnataiya Jesusen jato yocaquin.

⁴² —Hean sca tah hen mato yocacai: ζ Tsoan baque Cristo quin? ζ Jahua man shinanain? —hahquin.

—Davidina rahan —hihcani.

⁴³ —Davidina hihquiya, ζ jenquetsahpahiya quenaquin Hihbon Davidi janishquin, Dios yoshiman huishamahah?

⁴⁴ Jaa jan huishani ta nesca qui:

Heen Hihbo Diosen ta heen hihbo yohinishqui. Hihbonoxon hea mecayaho tsahoti johue, miin rahuiho miin hinabo sca hen hihmanon caman hihbohue.

⁴⁵ Jahuen hihbo hihqui Davidi yohuani jaiya, ζ jenquetsahpax jahuen baque hihti quin? —jato jaquin. ⁴⁶ Yocacah bi jahua yohiti honanyamacanquin. Jato jascajaquin yocarihbimis hihxon rabinxon jahuabi yocayamascanquin, jahuentianbi.

23

Jesusen fariseobo cahehi

(Mr 12.38-40; Lc 11.37-54; 20.45-47)

¹ Jaa xoboho hihti caibo jaiya sca, jahuen haxenicabo rihbi jano jaiya, jatihibixonbi nincanon Jesusen yohiquin.

² Fariseobaan ta Moisesnin huishani joiyaxon mato haxemahiqui. Jaton huisha haxemanicahbaan ta jascaribihiqui. ³ Jaa copi jato nincannahue. Jaabaan mato yohihi jatihibi jointinin nincaxon hahnahue. Jaabaan yohihi quescajaxon bi jaabaan hahcai quescajayamahue. Janan sirijaquin yohixon bi ta jascajayamacaniqui. ⁴ Patorobaan jaton jonibo hihuenhuan papimahi hahcajaan ta yohiquin tee joibo tsamancaniqui, man rehbo rehbocanascanon. Mato jascapa hihuebo yohixon bi ta ni huesti metotininbi jahuabi mato yanapanyamacaniqui. ⁵ Caibaan jisnon hihxon res ta hahcanihqui, siri hihqui shinanaambo hihxon. Jisibo hihxon res ta jaton benexehtibo pextinjacaniqui, hahqui huishaxon Papan joi shinantihibi. Jaton rajoti jisibo hihxon res ta jaton coton quexabo quenejaxon hanijacaniqui. ⁶ Huanomati hihamahiya huetsa copi hichaxon pitijahibo jai nincacax ta cahax xobo hihbo pataxibi tsahocatsihcanihqui, huetsanco tsahocatsihyamahi. Papan joi nincaqui cahax bi, jascarihbican, hapon tsahotinin res tsahocatsihqui. ⁷ Huinotaiton caibaan jato saludanxon Hapon hahca ta costancaniqui.

⁸ Tsoabi mato Hapon hahmayamanahue. Maton hapo ta huesti res qui, mato haxemahi. Mato tah man noque huetsa rahsi qui. ⁹ Tsoabi rihbi tah man main jaibo Papan hahtimahi. Maton naihoh queha Papa huesti res ta maton Papa qui. ¹⁰ Tsoabi rihbi mato Maestron hahmayamanahue. Cristo huesti ta maton maestro qui. ¹¹ Maton huetsabo man hashoan

hahxonaiya tah hen hashoan shinanya joni mato jisyaxihqui. ¹² Jaa copi ta rahma caibo mahuinti shinanai joni hean hihpaquemayaxihqui, naman sca jaa janon. Naman mehabo quescaxon joni hahxonaibo tah hen hinahihnamayaxihqui, shinan siriya jaa hihnon.

¹³ Hahrai hahrai hih tah man jayaxihqui, fariseobon. Judio joi xeni honanmanicabon, hahrai hih tah man jayaxihqui, Papan casticanah. Shinancoinihcamaxon paranaibo tah man qui. Jonibo Papan jihue janin capanan tah man jato bahi xehponai. Papan jihue janin hihcocatsihquibaan bi tah man jato pantehi, mato rihbi hihcocatsihyamaxon.

¹⁴ Yomanahtai yononmabo jaton jahuaborabo bichinxon bi tah man Papa yocaquin joi tsamanscai.

¹⁵ Hahrai hih tah man jayaxihqui fariseobon. Mato judio joi xeni haxemanicabon. Man tah man jascarihibiyaxihqui, Papan casticanah. Shinancoinihcamaxon paranaibo tah man qui. Huesti joni haxemanoxon tah man mai nabebacahinax hian pohquejaquexon haxemahi. Man haxemaha sca ta man tiromajaquin hahcai quescajaquin bi rabejaquin hashoan tiromaja sca jaiqui, maton tiroma shinanyaxon mato mahuinquin.

¹⁶ Hahrai hih tah man jayaxihqui. Benchexon bi tah man caibo hioti shinanai. Nesca tah man yohuani jai: Papan xobo hihcoinnicahton xobo hihqui quescarihibi tah hen hihcointi yohuanai hihquish bi non quesahah ta tiroma ma qui, hih tah man jai, paranquin. Papan xobo janin jai oro hihcoinnicahton oro hihqui quescarihibi tah hen hihcointi yohuanai hihquish tah non quesatima sca jai hih tah man jai. Jascari yohuanquin tah man joni huetsa paranai. ¹⁷ Shinanjomabon. Benchebon. ¿Jahuemeha hashoan coshi quin? ¿Oro nan? ¿Oro hihbo nan? ¹⁸ Jano Papa racanxonti ta hihcoinnica racanxonti qui hihquish bi quesascaax tah non tiroma yamahi hih tah man jai, parani. Jaa racanti janin racatai tah non hihcoinnica hinanai hihquish tah non quesatimasci hih tah man jai. ¹⁹ Shinanjomabon, ¿Jahue meha hashoan coshi quin: non hinanai jahuaborabo nan? ¿Racanxonti hihbo nan? ²⁰ Jaa copi ta jaa racanxontiya yohuanai joni jahuen racanxontiya res yohuanyamahiqui. Jano racatai jahuen hinantiyabi ta yohuanihqui. ²¹ Papan xoboya yohuanai joni ta jaya res ma bi jaa chicho jai boya yohuanihqui. ²² Naiya yohuanai joni rihbi ta jaho jai boya yohuanihqui: janoxon ta Papan noque jisiqui. Jaa copi ta jascari yohuanai joni noquen Papa Diosyabi yohuanihqui.

²³ Hahrai hih tah man jayaxihqui, fariseobon. Hahrai hih tah man jayaxihqui, judio joi xeni honanmanicabon. Hihcoinnihcamaxon tah man paranai. Maton haxé pehi tah man texe pishca jahuena noquen Papa hinanxon, cahua meso rihbi pishca hinanxon, comino pehi rihbi pishca hinanxon jai. Jascajahax bi tah man Papan hani joibo, non jaa pari nincati jai joibo, man nincati pishinai. Non pontejaquin shinanti jai joibo, non joni huetsahon shinanti jai joibo, non Papan joi nincacointi jai joibo. Jaa joibo caya tah man shinancointi, hoa hanitahmabo jenexonma. ²⁴ Benchexon bi tah man joni hioti shinanai. Naca pishca xehamis hihxon maton xehati tohaxon bi tah man moanman hahua xeharesai.

²⁵ Hahrai hih tah man jayaxihqui, fariseobon. Mato jascarihibi, judio joi xeni haxemanicabon. Shinancoinihcamaxon tah man jonibo paranresai. Pinaxon tah man tason rahchoxon quenchábo rahchocai. Chicho rihbi nahpantahin: jano ta yometsohtiya bihresti shinanbo bochohiqui. ²⁶ Shinanjoma fariseon. Chicho pari miin tasonbo nachohue, chixama rahpanah siri sca hihnon.

²⁷ Hahrai hih tah man jayaxihqui, judio hapobon. Hahrai hih tah man jayaxihqui, fariseobon. Shinancoinihcamaxon tah man jonibo paranresai. Tsahon quescapahbo tah man qui. Tsahon ta bemacanya sirijaquin bexojahah bi chicho sca mahuatipi pisi bochohi qui, rahntitibo bochohi. ²⁸ Mato tah man jascapahbo rihbi qui, rahmacanya ponte joni quescapahax bi jointi janin tiroma shinanbo bochohi, paranti shinanbo bochohi.

²⁹ Hahrai hih tah man jayaxihqui, judio hapobon, fariseobon, shinanihcamaxon paranicabon. Papan joi yohinicabo tah man jaton tsahon xobojaxonai. Sirijaquin Papan joi yohipahonihbo copi tah man jaton tsahon sirijaquin bexojahi. ³⁰ Jascajahax tah man yohuanai. Noquen papabo jihuetai tian jihuexon cah non jaaban rehteni quescajayamaquehahnai, Papan joi yohinicabo rehteyamaquin. ³¹ Jascari yohuanxon tah man Papan joi yohinicabo rehtepahonihbaan baquebo man hihqui man honanmahi. ³² Maton papabaan rehtequin texejani senenjascanahue, hah ca hen mato jaihsen.

³³ Ronobon. Toahihca baquebon. Man tah man jenquetsahaxon bi maton casticanti mato xahbanjamatimahi. Tiromabo casticanti tian ta Papan mato tiromajayaxihquiqui. ³⁴ Man jato tiromajanon tah hen heen raantibo mato qui raanai, heen joi yohinicabo hen mato qui raanai, honanbo hen mato qui raanai, heen joi huishahibo hen mato qui raanai. Caibo tah man rehtetihi. Caibo tah man jihuín hueonxon rehtetihi. Caibo tah man maton tsinqitui xobohoxon bi rishqui rishquitihi. Caibo rihbi tah man huesti jema

janinxon huetsa caman chibantihî tiromajacatsihquin. ³⁵ Jaa copi tah hen mato hihti casticanyaxihqui. Abel janeya siri joni rehtemenonihxon texe siri jonibo rehtepahonihxon, Berequiasnen baque Zacarias sca man rehtenihqui. Jaa tah man racanxonti janinhax Papan xobo janin cahiton man rehtenihqui. ³⁶ Hen mato yohinon nincanahue: Jaa jatihibi copi ta Papan mato casticanyaxihqui —jato jaquin.

Jerusalen jonibohon Jesusen masa shinanai
(Lc 13.34-35)

³⁷ Jerusalen janin jihuetaibo sca yohihi:
—Jerusalen janinhahbon, Papan joi yohinicabo tah man rehtehi. Jan mato qui raanaibo tah man macaman tsacaxon rehtehi. Hatapanen jahuen baquebo paxajaquin hahcajaquin hicha coti sca hen mato tsiniquihah bi tah man queenyamahi. ³⁸ Jisnahue, Maton jihue ta boncoscaiqui. Jonijoma sca ta jaiqui. ³⁹ Man tah man hea jisyamascatihi. Hea hahquirihbi jahui merahax tah man Papan shinanya ta joxonihqui. Papan janen ta jorescaiqui hih tah man jayaxihqui. Hen joyaxahnon caman tah man hea jisyamascatihi —jato jaquin.

24

Papan xobo tiromajayaxihquibo
(Mr 13.1-2; Lc 21.5-6)

¹ Papan xobo janinhax picotax sca bahin cahi cahi. Hahbetan caquin, jemanxon Papan xobobo jixson, jahuen haxenicabaan metoxon hani xobo siribo jismacatsihquin yohicanquin. ² Jishue, Hihbon jaábo bi:

—Hen mato yohinon nincanahue. Nea man jisi rahsi ta potojaquequin queyobahinyaxihcanihqui. Nea macan tsamanxon xobojanibo bi ta ni huesti macan huetsa cahchian tsahoyamascayaxihqui.

Nete queyoti hochomahiya non jisyaxihquibo
(Mr 13.3-23; Lc 21.7-24; 17.22-24)

³ Jato jascabajahini cahax, Olivoya manan manichish Jesus tsahoti. Jaabo rahsibi sca jahuen haxenicabo hahqui tsiniquiaquexon yocacancin:

—Noque yohipishcahue. ¿Min yohiha jahuentian jayaxihquiin? ¿Jahua huinotai jixson non mia joribiti nea pishca sca jai non honantihin? ¿Nete queyoti neno pishcasca jai honannoxon jahua non jistihin?

⁴ Yocacahbo sca: —Coiramenahue. Mato parancanmis. ⁵ Hea hihquicamahax ta hicha jonibo jayaxihqui. Hea tah hen Cristo qui hihxon ta hicha joni paranyaxihcanihqui.

⁶ Rehtenanaibo tah man nincayaxihqui. Huetsa janin rehtenanaibo jai chanihi tah man nincarihbiyaxihqui. Nincaxon bi masa shinanyamanahue. Nete queyorihyamanon bi ta jascapahbo jatihiqui. ⁷ Jaa rehtenanaibo janon ta huetsa nahuabo jaton nahuabo betan rehtenani boyaxihcanihqui. Jatón sataroboya cahax ta quiquin hapobo hahbe quiquin hapobo betan rehtenanyaxihcanihqui. Huetsa janinbo ta pihan hihquish mahuayaxihcanihqui. Huetsa janinbo rihbi ta mai mihuanyaxihqui. ⁸ Jaa rahsi ta pehocohyaxihqui, nete queyoscayaxahnon.

⁹ Jaatian ta mato bihxon mato tiromajayaxihcanihqui. Mato ta rehteyaxihcanihqui. Man hea hihbomahi copi ta jatihibi nahuabaan mato jistahimayaxihcanihqui. ¹⁰ Jaa copi ta nincapahonixon bi hihti caibaan hea jenebahinyaxihqui. Hea jenexon ta paraxon jaton hahbe nincacoinnibabo rihbi polisia bihmayaxihcanihqui. Jascapah ta jistahihmanani jayaxihcanihqui. ¹¹ Papan joi yohihicamahax ta hicha quesabo jaresscathiqui. Tsama jonibo ta paranyaxihcanihqui. ¹² Tiromabo hashoan hicha sca jaiya ta joni huetsahon shinanyamahibo hashoan hichayaxihqui. Shinanyahpabo cahen huestibo res. ¹³ Jabi ta maton nete queyonon caman man tenehiya Papan mato jihuecoinmayaxihqui. ¹⁴ Papan mato jihuemayaxihqui joi siri ta jatihibi janin chanihi boyaxihcanihqui, jatihibi nahuabo nincamaquin. Jaatiansca ta nete queyoscayaxihqui.

¹⁵ Jaa copi Danielnin huishani joi jixson, honannahue. Papan joi yohinixon ta huishanishqui, Papan jati janin ta non rahninai joni nihyaxihqui, hihqui jaa huisha. Jascapa jano nichî jixson sca honannahue. ¹⁶ Jaa jisish, jabatax mahchibo janin joneyaxahnahue, Judea mai mehabon. ¹⁷ Miin xobo pemacanya tsahotax, botocahintanhue histon. Miin xoboho jai jahuaborabo bichishma hishtocahintanhue. ¹⁸ Miin huai chian cotonjoma teetax carestanhue, miin coton benahi joribiyamatanhue, carestanhue. ¹⁹ Jaa netebaan ta tohoyabo huaohicanahi cayaxihqui. Xoma hahmahibo jascarihbihi. ²⁰ Jenetian jabayamanoxon Papa yocayaxahnahue, tantiti neten rihbi jabayamanoxon yocayaxahnahue. ²¹ Jaatian ta hihti tiromajayaxihcanihqui. Nete jamenoni rahma caman tsoan jisnima tiromabo ta jayaxihqui. Jahuentianbi jascapahbo hahquirihbi yamascanon ta jaatian jayaxihqui. Jaa copi jascajaquin Papa yocayaxahnahue. ²² Jascapa tiroma

netebo hashoan hichahiya cahen tsoabi jihueyamahan. Jaa copi ta jahuen caisahbohon shinanxon jascapa tiromabo basi jatima Papan yohiyaxihquiqui.

²³ Jaatian, Neno ta Cristo qui hihquiboya jato nincayamaxahnahue. Hono tah qui hihquiboya nincayamaxahnahue. ²⁴ Hea tah hen Cristo qui hihqui quesahibo ta joyaxihquiqui. Papan joi yohinica tah hen qui hihquibo quesahi. Jaton coshiyaxon hahan honantijaquin hahcajaquin ta jonibo rahteyaxihcanihqui, jato parannoxon. Hahtipahxon cahen nincacoinnicabo rihbi bahinmahhuan nichinbohanan. ²⁵ Jascapahbo jayaxihqui tah hen mato yohiscái. Jato honanyaxahnahue. ²⁶ Jisnahue, Cahchiho ta Cristo nichiqui hihquibaan bi jato honanax jisi boyamanoxahnahue. Xobo chicho tah qui, hihquibaan bi jato honanax. ²⁷ Bari cainai quirihax rihbi hihquihí janin caman cana bacahi xabatani jai quescapi tah hen sanarenyaxihqui. Jaa honanxon jato nincayamanoxahnahue. ²⁸ Jano mahuatipi racatai janin ta hishmin tsinquitihqui, hih ca hen jaihsen.

Noquen Hihbo joyaxihqui

(Mr 13.24-37; Lc 21.25-33; 17.26-30, 34-36)

²⁹ Jascapa nete tiromabo queyoscaiya ta bari xehpo sca jaax xabayamascatihiqui. Hoxne rihbi ta xabayamascatihiqui. Naihoh quehax ta huishibo rihbi paqueyaxihquiqui. Naiho jai coshibo ta Papan tahayaxihquiqui. ³⁰ Jaatian tah man nai bejisxon hahan honanti jisyaxihqui, hea joribiscanon. Jaatian ta jatihibi janin jaibo huaohihyaxihcanihqui. Naihoh quehax botopaqueti jahui sca ta hea noquebaque jisyaxihcanihqui, nai cohiman jahui ta hea jisyaxihcanihqui, hihti xabaya hihti coshiya jahui ta jisyaxihcanihqui. ³¹ Corneta rehue coshin res corotai bi tah hen heen yonotibo raanyaxihqui, jatihibi janin jai heen caisahbo tsinquinon. Nai chibechijaquetancahuanai janin cahí, ramiho jascarihbi, jatihibi janin jato tsinquixonquin.

³² Xono jihui ta hahan haxeti qui, honannahue. Bochocohax pehihscaiya ta bimi bero tsinquiti netebo nocoti jahui non honanai. ³³ Jascajaquin rihbi hen mato yohihahbo jarescaí jixxon, maton xoboho hihcohi jahuicamahi hen hochoma pishca jahui honannahue. ³⁴ Man honannon hihxon tah hen mato yohihi: Hen mato yohihah quescabihi jarescaiya pari ta nete queyoyaxihquiqui. ³⁵ Jaatian ta naiya maibo queyocahinyaxihquiqui. Naiya maibo queyocahinai bi ta heen joi jahuentianbi queyotimahiqui.

³⁶ ¿Jahuentian nete queyoyaxihquiquin? ¿Jahuen bari hihquiya queyoyaxihquiquin? Tsoanbi tah non honanyamahi. Naihohxon Papan yonotibaan honanyamaribhinon tah hen hean rihbi honanyamahi. Papa huestichin ta honanihqui. ³⁷ Jahuentian queyoyaxihquiquin honanxonma bi nea honannahue: Noen jihuetai tian japahonibo quescarihibi ta hea sanareneni jonon caman jayaxihcanihqui jonibo. ³⁸ Jenen jato mahponon caman ta pipi pipichi xeha xehahi jihuecanpahonishqui. Jahuen nontin Noen nanenon caman ta bebaan hahuinjanon haibobo rihbi benonon huanomacanhonishqui. ³⁹ Jahuentian jene paquexihquiquin honanxonma ta jascajacanhonishqui, paquerenenxon sca jenen jato bonon. Jascarihibi ta hea joti jayaxihquiqui, tsoan honanaima bi histon. ⁴⁰ Jaatian ta jaton huai chian rabe joni teetai jayaxihquiqui, huetsa hioxon tah hen huetsa jenebahintihí. ⁴¹ Jaton rentin rabexon rene renehiton bi tah hen huetsa bihxon huetsa jenebahintihí.

⁴² Coiramenahue tahca. Jahua netenbi maton hihbo mato bichi jahuiquin man tah man honanyamahi. ⁴³ Jahua neten hen jotihiquin man tah man honanyamahi. Mato qui ta nococahintihiqui. Jaa tah man honanscaí. Jahua hora jahuen xoboho yometso hihquicahintihí honanxon cahen xobo hihbaan coiranon. Coiranxon cahen jahuen xoboho hihquimayamahan. ⁴⁴ Jaa copi coiramenahue. Rahmabi ta joyamahiqui hih man jai bi tah hen joresscatihí.

Siri betan tiroma teexonai

(Lc 12.41-48)

⁴⁵ Jahuen patoronen yohihi quescabijaquin hahxonai joni ta siri joni qui, shinanyahpa. Jascapa cahen jahuen patoronen yohitihí, texe jahuen jonibo jan jixxonnon. Jaton piti tian jan jato pimanon. ⁴⁶ Jascaxonaaiton jahuen patoro joxon merahah ta hahan jenimati jaiqui, jahuen patoronen siri joni jisi copi. ⁴⁷ Jascapa joni ta jahuen patoronen yohitihiqui, jatihibi jahuen xoboyabi jahuen jonibo jan jixxonnon. ⁴⁸ Jascapa hihyamahax bi tiroma joni hihquish cahen Heen patoro ta basixihquiqui hihxon, ⁴⁹ jahuen hahbe jonibo rishquithiqui. Jato rishquixon sca ta piquin sirijaxon xehahax pahenscatihiqui. ⁵⁰ Joriyama ta jatihiqui hih jahuen joni jaitianbi ta pahenscaiton jahuen patoronen merahi jotihiqui. ⁵¹ Joxon ta jaa joni caxquepaquexon jahuen tequebo potatihiqui. Jano nincacoinhcamahibo jaiton potaquin. Jano ta saisaihiqui, xeta tais tais hahcaíbo rahsi jayaxihquiqui.

25

Diez xontacobo

¹ Jahuen jihuemahi Papan jihuemahi jahui ta diez xontaconen hahni quescatihiqui. Jatón johue bihbahini caxon cahen huanomanoxon jatón tsaben benejati jahui behchihi bocani. Jan huanoxihqui bepi jascacani. ² Pichca xontaco shinanjoma janon cahen jatíhi rihbi shinanyahpa jaribinish. ³ Honanma xontacobaan cahen jatón johuebo bihbahini caxon bi jatón nachiti boyamanish. ⁴ Shinanyabaan jatón johue boxon bi jatón nachiti rihbi boquin. ⁵ Jatón tsaben benejati basihya sca, manatax hoxacatsihquish racapaqueceni. ⁶ Yame pochinicon sca quenatai nincacanquin. Jo ta jaiqui. Behchitannahue, hahquin. ⁷ Huenicahuaxon sca jatón johue cohuasquin. Cohuasxon nachicanquin.

⁸ —Matón nachiti noque hinannahue. Noquena ta nocahiqui —tanamabaan jatón huetsabo jaquin.

⁹ —Noquena xabanon matonah rihbi xabati rah ta noquen nachiti senentimahiqui. Jano marohibo janin matón nachiti marotannahue, hih ca hen jai lisen —shinanyahpabaan jato jaquin. ¹⁰ Marohi bohoboya sca jatón patoro nocoti. Jaa manatax, huanomahi hahbetan hihcocani johueyahpabo. Mapescaiboya sca coirannicahban xehpoti xehpoquin. ¹¹ Chini sca nachiti marotani jahui xontacobo nocorihbihi. Nocoxon, jemanxon quenacanquin:

—Patoron, noque quehpenxonhue, patoron.

¹² Chichoxon sca ta jaan jato yohitihiqui:

—Mato tah hen honanyamabiresai —hahquin. ¹³ Jaa copi coiramenahue. Heen joti nete, heen joti hora tah man honanyamahi.

Hinantahbahinaibo

¹⁴ Papan jihuemahi ta huesti joni hocho canoxon jai quesca qui. Jaan cahen jahuen jonibo quenaxon jahuen jahuaborabo hinantahban.

¹⁵ Huetsa cahen pichca borasa coriqui hinanan. Huetsa cahen rabe res. Huetsa cahen huesti res. Jaabo jaya teeti hahtipahi tihí jato hinanpaquequin, jatón shinan tihí coriqui senenjaquin. Jato hinanbahini caresscai. ¹⁶ Pichca borasa bichish, jan hinanmenoha jahuen coriquiya caxon, jahuaborabo maromaribinoxon maroquin. Basi jascaxon huetsa pichca borasa rihbi coriqui bochojaribiquin. ¹⁷ Rabe borasa hinanah jascajaribiquin. Jatíhi rihbi bochojaquin maroxon maromaxon coriqui bihxon, cajfaxon rabe bochojaquin. ¹⁸ Huesti borasa hinanah cahen jascayamahi. Jaan cahen jahuen borasa bichish, caxon, mai poquinxon, jano jahuen patoronen coriqui jonequin.

¹⁹ Basihax sca jatón patoro joribiscái. Nocoxon, jato betan bexonoxon jato quenama-paquequin. ²⁰ Quenamaha jan pichca borasa bocho hinantahni pari jahui. Jan cananxonai pichca borasa bocho bexon jahuen patoro jismaxon:

—Pichca tah min hea hinantahbahinnihqui, Hihbon. Jatíhi rihbi tah hen jayaxon mia cananxonai.

²¹ —Siri tah qui. Mia tah min siri joni qui. Sirija tah min jai. Mia tah hen hicha tahma hinantahbahinniqui. Rahma tah hen hicha sca mia hinanai. Hea jenimahi hihqui quescari hehbetanbi jenimahue. ²² Rabe borasa jan hinantahbahinni sca jahui.

—Rabe tah min hea hinantahbahinniqui, hapon. Jatíhi rihbi tah hen mia cananxonai.

²³ —Siri tah qui. Mia tah min heen joni siri qui. Sirija tah min jai. Hicha tahma tah hen mia hinantahniqui. Hicha sca tah hen mia hinanai. Hea hen jenimahi hihqui quescari hehbetanbi jenimahue. ²⁴ Huetsa sca jahui, huesti borasa bihnish.

—Hapon, mia yonomis hihqui tah hen honannihqui. Mianbi banahamabo tah min tsiniqui. Mianbi jahuen chishpo potaxonma tah min bichi. ²⁵ Jaa copi tah hen raquexon miin coriqui mihinnihqui. Nea tah qui, jise. Bihhue. ²⁶ Jaatian ta jahuen patoronen jaa yohitihiqui:

—Joni tiroman, chiquishin, ¿heanbi bananixonma hean tsinquihí min honannihquin nan? ¿Jano heanbi jahuen chishpo potayamahi janin hen bichi chahi min honannihquin nan? ²⁷ ¿Hea jascapah honanxon heen coriqui jaya teenica hinantahtahin min janiquin jan jaya teenon? Jaatian tah hen joxon heen coriquinin cananai hashoan hicha bihquehahnai. ²⁸ Heen coriqui jaa bichinnahue, hah ca mato jaihsen. Jaa bichinxon hoa chonga borasayahpa hinannahue. ²⁹ Hicha jaibo tah hen hashoan hicha rihbi hinanxihqui, jan tsama sca janon. Jahuabi yamahibaana tah hen jaabo jai pishca jato bichintihí. ³⁰ Hojri bahquish chian sca nea chiquish potannahue. Jano ta saisaihihxon xeta tais tais hahcaibo rahsi jatihiqui.

Jonibo casticanti nete

³¹ Heen joti neten ta heen coshi xabaya hea noquebaque joyaxihqui. Heen yonotibo rihbi tah hen hahbeyaxihqui. Joxon ta heen quiquin hapo tsahotinín tsahoxon jatihibi

quenamayaxihqui. ³² Jaatian ta jatihibi jonibo hea bebonbi tsinquiyaxihcanihqui. Carneroboya chibo jai bi carnerobo rahsi jano huesti janon jaton hihbaan jato caisai hahcajaquin ta ramiho huesti tsama janon ramihoh rihibi texe hean nichinbohanyaxihqui. ³³ Heen carnerobo ta heen mecayaho nihyaxihquiqui. Chibobo cahen memiho. ³⁴ Mecayaho nichibo sca tah hen quiquin hapo hihxon yohiyaxihqui:

Benahue. Heen Papa ta matohon hihti queenihqui, man jenimanon. Man jano jihuenon jan mato bexojaxonai janin benahue, matonah sca jahuen jihue janon. Naiyahpa mai jariyamahiyabi ta mato jaa bexojaxonnishqui. ³⁵ Mato tah man hea pimanihbo qui. Picatsihquiton tah man hea pimanihqui. Jiricatsihquiton tah man hea xehamaniqui. Maton nahua hihqui bi tah man sirijaquin hea maton xoboho mapemaniqui. ³⁶ Chohanma hihquiton tah man hea sahuemaniqui. Hen hisinaiya tah man hea jisi caniqui. Sipo xobo tsahotaiton tah man hea yanapanniqui, hah tah hen jato jayaxihqui. ³⁷ Jaatian ta jahuen siri jonibaan yocayaxihquiqui:

¿Jahuentian mia picatsihqui jisxon non mia pimanihquin, Hihbon? ¿Jahuentian mia xehacatsihquiton non mia xehamaniquin? ³⁸ ¿Jahuentian non mia noquen nahua quescapa mapemaniquin? ¿Jahuentian non mia chohanma jaiton sahuemaniquin? ³⁹ ¿Jahuentian mia hisini jai, jaa hiyahamahax sipo xoboho tsahotai non mia jisi caniquin? ⁴⁰ Jaton quiquin hapo hihxon tah hen jato yohiyaxihqui:

Man honannon tah hen mato yohihi. Nea heen huetsabo romishin jascaxaxonquin tah man hea rihibi hahxonnihuri.

⁴¹ Memiho quehabo sca tah hen nescajayaxihqui: Botannahue, tiromabon. Satanas jahuen tiroma yoshinbo betan jano cati chihhi janin botannahue. ⁴² Hen picatsihqui bi tah man hea pimayamanihqui. Hen jiricatsihqui bi tah man hea xehamayamaniqui. ⁴³ Maton nahua quesca jahuiton bi tah man hea mapemayamaniqui. Chopa bocabi tah man hea sahuemayamaniqui, hisinax, sipo xoboho tsahonah racatai bi tah man hea jisi cajaquetanyamanihqui. ⁴⁴ Jato jascajaha ta yocaticaniqui.

¿Jahuentian non mia picatsihqui jisniquin, Hihbon? Picatsihqui, jiricatsihqui, xobojoma, chohanma, hisinai, sipo xoboho tsahotai jahuentian non mia jascapa jisxon bi non mia hahxonyamanihquin? ⁴⁵ Jasca jaiboya tah hen jato yohitihhi:

Man honannon tah hen mato yohihi. Nescapa pishcabo maton jisi, jahuama quescapahbo, jato hahxonyamaquin tah man hea rihibi hahxonyamanihqui.

⁴⁶ Jato jascaxaxon tah hen jato potascatihi, jascabijaquin casticanahbo sca janon. Heen siri jonibo tah hen queyoyamanox manati janin hiotihhi.

26

Jesus rehteti shinanaibo

(Mr 14.1-2; Lc 22.1-2; Jn 11.45-53)

¹ Jato jascajaquin haxemaquin queyoxon sca:

² —Hoqueha bahquix ta pascua fiesta hihyaxihquiqui. Man tah man honanscai. Jaa neten ta hea jihuin hueonxon retehahbo hihxon hea bihmayaxihcanihqui —jahuen haxenicabo Jesusen jaquin. ³ Jaatianbi ta Caifas janeya hapon xoboho sacerdote hapobo betan jaton hahbe hapobo tsinquinishqui. Caifas jaton yohuan hihbo copi jano tsinquicani, yohuannoxon. ⁴ Quexexon Jesus paraxon bihxon rehteti yohinanax, jeenhiquinannancani. ⁵ Fiesta naponbi tah bihtima qui. Jonibo sinayohuanax noque potacatsihcanmis hihcani.

Jesus boshmashimahi haibo

(Mr 14.3-9; Jn 12.1-8)

⁶ Betania jema janin sca Jesus cahi, sipiya hihpahoni jonin xoboho nocoti, jahuen jane cahen Simon, xobo hihbo. ⁷ Jato betan pihhi tsahoti Jesus jaiya sca huesti haibo jahui. Hahan hininjatiya joxon, jahuen pomo quihua xenin Jesus boshnashimaquin. Hihti copi jahuen hininjati. ⁸ Jesus machicai jisish, sinatax yohuancani:

—¿Jahua copi jaa jatihibi yohyoquihquin? ⁹ Maromaxon ta hicha coriqui bihquehah-niqui, jahuaborajomabo yanapannoxon —hihcani. ¹⁰ Jaabo yohuani jai honanxon sca:

—¿Jahua copi man jaa haibo jatsanjahin? Hea ta sirijaquin hahxonaxqui. ¹¹ Jahuaborajomabo ta jascabi jatihiqui, man jato yanapannon. Hea tah man huetsatian jisyamascatihi. ¹² Hea tsahonahbo ta hea hininjahaxqui. ¹³ Nincanahue hen mato yohinon: Jano heen joi siri nincacaibo janin jatihibi ta neatohon hea hahxonai yohuanchaniyaxihcanihqui. Jaa copi ta jaa shinanbehnoyamayaxihcanihqui —jato jaquin.

Judas betan bexohibo

(Mr 14.10-11; Lc 22.3-6)

¹⁴ Jaatian ta jahuen haxenica huesti picoti canishqui, Judas Iscariote. Sacerdote hapobo janin cahi. ¹⁵ Jato qui nocoxon: —¿Hen mato bihmanon jahua man hea hinantihin? — jato jaquin. Coriqui toponxon sca janacanquin, treinta libra jan bihnon. ¹⁶ Bichish, cahi. Caxon, jahuentian cahra bihmahah siritihiquin hihxon shinanquin.

Posen pihibo

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Jaton fiesta nocotai neten sca, jahuen haxenicabo joxon Jesus yocaquin:

—¿Jahuerahnnonxon pinoxon non mia fiesta neten pitijaxontihin, Hihbon —hahcanquin.

¹⁸ —Hoa non honanai joni yohitannahue jema janin. Heen nete ta nea pishcascaiqui. Miin xobohoxon tah hen heen haxenicabo betan fiesta pinoxihqui hih ta maestro jaiqui. Jascajatannahue.

¹⁹ Jesusen raanah sca, bocani. Jan yohiha quescajaxon janoxon fiesta neten pitijacanquin.

²⁰ Bepi sca jaiya jahuen haxenicabo betan janoxon piquin. ²¹ Piresscaiboya jato yohiquin:

—Man honannon hihxon tah hen mato yohihi: Nenohah ta huesti jaiqui, hea jato bihmaxihqui.

²² Hihti benatax sca tsoan jascajatihiquin hihquish huesti huestibo yocacancani:

—¿Hea nan, Hihbon? —hihcani.

²³ —Hehbetanbi nea quenti qui piti bichi joni ta hea bihmanica qui. ²⁴ Papan huishamani joi jai quesca ta noquebaque janoxihqui. Hea jascajati jai bi ta hea bihmahi joni Hahrai hihyaxihqui. Jahuen papan jaa baquejayamahah cahen siripan —jato jaquin.

²⁵ Jaa bihmanoxihqui hihxon Judasen sca yocaquin:

—¿Hea hin, Maestron?

—Mia rahan —Jesusen jaquin.

²⁶ Pihiboya sca posen bihxon, Papa yocaxon, tehaxon, jato hinanxon:

—Bihnahue pinoxon. Nea ta heen yora qui —jato jaquin.

²⁷ Tason rihbi bihxon, Papa yocaxon, jato hinanrihbiquin:

—Nea xehanahue, jatihixonbi. ²⁸ Heen jimi tah qui. Jonibaan hohcha copijaquin tah hen heen jimi potaxihqui. Mahuaquin tah hen mato hahxonbahinai. Jaa shinanahnan xehati ta nea qui. ²⁹ Mato betan huetsapahaquin xehayahnoxon caman tah hen nea xehati hahyamascatihi. Heen Papan jihue janin mato jihuemahi tian pari tah hen mato betan huetsapahaquin xehayaxihqui —jato jaquin.

Jesus qui Pedro paranahxihqui

(Mr 14.26-31; Lc 22.31-34; Jn 13.36-38)

³⁰ Pihax, behuahax, olivo janeya manan qui sca bocani. ³¹ Janoxon sca jato yohiquin:

—Nea yamebi tah man jatihibichin hea jenebahinnoxihqui, Papan huishani joi jai quesca tah man jatihi. Carnero coirannica tah hen rehtexihqui, heen carnerobo potojah-tannon hihqui jaa joi. ³² Jaabi tah hen hahquirihbi teehihquish Galilea main sca catihi, mato rihbi man jano hea merahi canon —jato jaquin.

³³ —Caibaan mia jatihixonbi jenebahinai bi tah hen hean mia jenetimahi, hihbon — Pedronen jaquin.

³⁴ —Quimisha coti hatapa queorihyamahi bi tah min nea yamebi heen joni hihtima min yohixihqui —Jesusen jaquin.

³⁵ —Hea rehtehibaan bi tah hen miin joni hihti ma hen yohitimabirestihi —hahscaquin Pedronen. Jatihixonbi sca jascajaribiquin.

Getsemani nahue chianxon Jesusen yocacai

(Mr 14.32-42; Lc 22.39-46)

³⁶ Getsemani janeya nahue chian sca becani, Jesus betan.

—Neno tsahopaxonenahue, Papa yocaqui hen hori canon —jato jaquin.

³⁷ Jato jascajaxon Pedroya Zebedeon baque rabe hori boquin. Jano sca Jesus hihti benati, hihti masa shinanquin.

³⁸ —Mahuabena tah hen jai, hihti masa shinanquin. Nenoxonbi hea manahi banenahue, hea coirannoxon.

³⁹ Jato jascabajahini cahax, hori pishca beho racaxon Papa yohiquin:

—Papan. Hea janoxihquibo jatimajahue, jatimajati hahtipahxon. Jaabi hea queenai quesca yamahahi bi mia queenai quesca janon hihmahue.

⁴⁰ Yocacax joxon sca hoxahiton jahuen haxenicabo meraquin.

—¿Huesti hora pishca hea mananoxon man hoxa teneti hahtipahyamahin?

⁴¹ Hoxa tenexon Papa yocanahue, tiroma yoshiman mato tiromamacatsihquin tanayamanon. Maton shinaman man teneti shinanai bi tah man hahan teneti coshi yamahi.

⁴² Jascacahini sca Papa yocaqui caribihi.

—Papan, hea janoxihquibo jatimajati yamahiya mia queenai quesca janon jahue —hahquin.

⁴³ Joxon sca, hoxahiton jato merarihbiquin. Jatón bero quextojaquetax hoxa hoxacani.

⁴⁴ Jato mohinaxma caribixon jahuen quimisha sca jascajaquin yocaribhiquin. ⁴⁵ Joxon sca: —¿Man hoxaparihin? ¿Tanti tanti pari man jain? Jisnahue. Hohchayahpabaan bihnon bihmahi ta berescacanihqui. ⁴⁶ Hueninahue. Caresscatannon benahue. Hea bihmahi jahui ta nea nocoscai qui —Jesusen jato jaquin.

Jesus bichibo

(Mr 14.43-50; Lc 22.47-53; Jn 18.2-11)

⁴⁷ Jato yohihiyabi jahuen haxenica huesti jahui, Judas. Hahbetan rihbi hicha becani, caibo machitoya, caibo chantiya. Sacerdote hapobaan raanah becani, judio hapobaan raanah becani. ⁴⁸ Jato betan joriyamaxon ca Judasen jato yohihah:

—Hen meraxon betsohahquin hicotanai joni tah qui. Hen betsohahquin hicotanai bihtannahue.

⁴⁹ Nocotax sca ponte res Jesus qui jahue, Min jascabi jayamahin hahxon, betsohahxon hicotanquin. Hicotanahbi:

⁵⁰ —¿Jahuejahi min jahuin, amigon? —Jesusen jaa jaquin. Jaatian nihquirani joxon bihxon Jesus menexcanquin.

⁵¹ Jasca jaibaan bi huesti jahuen haxenicaton machito tsecaxon sacerdote hapon joni marequin bi cahnexon jahuen pabingui paxtebahinquin.

⁵² —Miin machito bexojahue. Machitonen rehtenanai bo ta jahanbi mahuatihiqui.

⁵³ ¿Heen Papa hean yocacah jan jahuen yonotibo sesenta mil raantihiqui min honanyamahin? ⁵⁴ Hea nescajayaxihquibo ta Papan huishani joi jaiqui. ¿Hen yocacaiya jenquetsahpax jan yohini quesca jatihiquin? —Jesusen jaa jaquin. ⁵⁵ Yahtannicabo sca yohiquin:

—¿Jahua copi man rehtemis joni yahtanquin hahcajahin, machitoyaxon chantiyaxon hea chibanbenahin? Netetihibi Papan xoboho tsahoxon haxemahi bi tah man hea bihyamahipiqui. ⁵⁶ Papan huishani joi jai quesca janon tah man nescajahi —hahquin jato. Jaatianbi jahuen haxenicabo jatihibi jabacani. Jesus yahtanahbo jenebahini bocani.

Hapobo janin Jesus bohobo

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Menexxonsca sacerdote hapo Caifas janin Jesus bocanquin. Jaa xoboho jatón huisha hapobo jatón hanibo tsinguiquiranscai. ⁵⁸ Jano Jesus hiohiboya hocho sca jato chibanquin Pedronen. Sacerdote hapon xoboho jaabo mapenon, jeman res Pedro nihnich. Jatón sontaro tocan jano tsahoti, jahueja janoxihcanihqui hihquish manati.

⁵⁹ Chicho cahen sacerdote hapoboya texe judio hapobo yohuancani. Jaa copi rehteti janon hahqui yohuanai quesabo quenamacanquin. ⁶⁰ Hicha quesabo jano mapetai bi jahua copi rehteti merayamacanquin. Chini sca huetsa quesca rabe nocoti.

⁶¹ —Toa joni tah non yohuanai nincaquipiqui. Papan xobo tah hen potojaquetanxon quimisha neten hahquirihbi jaa xahnen xobojati hahtipahi hih ta jaipishqui —hihcani.

⁶² Jatón quiquin sacerdote sca huenicahinxon Jesus yocaquin:

—¿Min jahuabi yohiyamahin? ¿Jaabo mihqui yohuanai bi min jahuabi yohiti yamahin?

⁶³ Yocacah bi jahuahihyamahi. Jahuabi yohiyamahiya, hapon yohirihbiquin:

—Quiquin Dioscoinyaxon tah hen mia hihti yohihi quesaxonma min yohicoinnon. ¿Mia min Diosen baque Cristo quin? Noque yohihue.

⁶⁴ —Min yohihi quesca rahan. Hashoan rihbi tah hen mato yohihi: Papan mecayaho jahuen quiquin hapo tsahotai tah man hea noquebaque jisaxihqui. Nai cohiman jahui tah man hea jisaxihqui —Jesusen jaquin sacerdote hapo.

⁶⁵ Nincaxon, jahuen coton huaxabahinxon, jato yohiquin:

—Dios qui ta tiromahi yohuanihqui. ¿Jahua hashoan non nincati pishinain? Jan tiromahi yohuanai tah man nincascai. ⁶⁶ ¿Jahua shinan man jain?

—Jan yohuanai copi non rehteti jai rahan —hahcanquin.

⁶⁷ Jahuen bemanan qui toshbanhahxon, copasxon beshrishquicanquin. ⁶⁸ Rishquixon yocacanquin:

—Yohihue, Criston. ¿Tsoan mia rishquihiquin?

Jaa tah hen honanyamahi hihqui Pedro

(Mr 14.66-72; Lc 22.56-62; Jn 18.15-18, 25-27)

⁶⁹ Jasca jaabo jai bi jemanhihti janin Pedro tsahoti. Jano tsahotaiton huesti haibaan joxon yohiquin:

—Mia rihbi tah min hoa Galilea mai meha Jesus betan nihراسي.

⁷⁰ Jano jaibaan sca jatihixonbi nincanon jahuen joni hihtima yohiscaquin:

—Min yohuanai tah hen honanyamabiresai —Pedronen jaquin.

⁷¹ Nichibo tocan mehax huetsa haibo rihbi joxon, Pedro jisquin sirijaxon, jato yohiquin: —Nea coin ta Jesus Nazareno betan nihcachihiqui.

⁷² Hahquirihbi jahuen joni hihtima Pedronen yohiquin. Dios quenaxon:

—Jaa joni tah hen honanyamabiresai —hahquin.

⁷³ Basiyamahax jano nichibosca joxon:

—Hihcoini. Mia rihbi tah min jahuen haxenica qui. Min yohuanai tah non honanai. Janoha joni quescapah tah non mia nincacai —Pedro jacaquin.

⁷⁴ Dios quenaxon, hihcoinyamahax hea mahuapahinon hihxon jascajaribiquin:

—Jaa joni tah hen honanyamabiresai —Pedronen jaquin. Jaatianbi sca hatapa queoti.

⁷⁵ Jesusen yohiha joi shinanrenescapah. Hatapa queorihyama jai bi tah min quimisha coti heen joni hihtima min yohixihqui. Jesus jascari yohuanah shinanax, picocahini cahax coshin huaohihscai.

27

Pilato janin Jesus bohibo

(Mr 15.1; Lc 23.1-2; Jn 18.28-32)

¹ Xaba paquescaiya sca sacerdote hapobo betan judio hapobo tsinquirihbixon sesion haxon sca Jesus rehteti yohicanquin jatihibichin. ² Menexrihbixon jaton gobernador janin sca Jesus hiocanquin Pilato janeya gobernador janin.

Judas rehtehtai

³ Jaan bihmahah Jesus rehtenoxihquibohi jisxon, masa shinanxon sca Judasen jahuen treinta coriqui hinanrihbihi caxon, sacerdote hapoboya judio hapobo hinanrihbiquin.

⁴ —Hohchajoma joni mato bihmahi tah hen hohchatai —jato jaquin.

—¿Min jascahah bi jahueja non noquen jatihin? Mianbi jise —hahcanquin.

⁵ Papan xoboho jaa coriqui potaquin potojaquetanbahini Judas caresscai. Cahax risbipan tenexentax rontamehscai.

⁶ Jahuen coriqui topihax sca sacerdote hapobo yohuani:

—Hahan mahuamati coriqui tah qui. Papa hinanti bohnanti qui tah non nanetimahi —hihcani.

⁷ Jaa copi ta jahanbi mai maroti yohinannishqui. Caxon sca huesti quentjanicaton mai maroncanquin, jano nahuabo mihinti janon. ⁸ Jaa copi ta jaa mai jimin mai hahcanihqui, rahma caman. ⁹ Jasca ta janishqui Papan joi yohinica Jeremiasnen yohini quescabi: Joni ta jaathi copitihqui hih Israelibo hapobo jaiya ta treinta coriqui bihcanihqui.

¹⁰ Jahanbi ta quentjanicaton mai marocaniqui, heen hihbaan hea yohini quescabijaquin hihqui Jeremiasnen huishani joi.

¹¹ Jaatian gobernador bebon Jesus nichu. Jano hihuehahbo Gobernador yocacahti Jesus:

—¿Mia min judiobaan quiquin hapo quin? —hahquin.

—Min yohihi quescari rahan —hahquin Jesusen.

¹² Judio hapobo rihbi hahqui chanihah bi Jesus jahuabi yohuanyamascai. ¹³ Pilatonen sca yocaribiquin:

—¿Mihqui hicha chanihibo min nincayamahin? —hahquin.

¹⁴ Jabi ni huesti jaton joi qui Jesus yohuanyamahi. Jaa copi ta gobernador rahtenishqui.

Jesus rehteti yohihibo

(Mr 15.6-20; Lc 23.13-25; Jn 18.38-19.16)

¹⁵ Jaa fiesta hahqui nocotai tihibi ta gobernadornen sipo xoboho tsahonnibo huesti jato picoxonpahonishqui, fiestajahibaan caisxon jaa jane yohihiya jaa jato picoxonquin. ¹⁶ Jan jano tsahonni ta tiroma shinanya joni janishqui jatihixonbi honanaibo. Jahuen jane cahen, Barrabas. ¹⁷ Fiestajahibo tsinquijaquetaiton sca Pilatonen jato yocaquin.

—¿Tsoa hen mato picoxonti man queenain? ¿Barrabas nan? ¿Jesus, Cristo hahcaibo nan? —jato jaquin.

¹⁸ Notsixon copi judiobaan Jesus hinanah ta Pilatonen honannishqui. Honanxon copi ta jonibo jascajaquin yocanishqui.

¹⁹ Janoxon joni ponteti sca Pilato tsahoscai. Jano tsahotai bi ta joni raanxon jahuen haibaan yohinishqui:

—Siri joni tah qui. Jahuabi jahua hahyamahue. Rahma jaya namaxon tah hen hihti masa shinanai.

²⁰ Jascajaquin jahuen haibaan Pilato yohinon bi ta judio hapobaan tsamajaquetaibo nescajanishqui: Barrabas mato picoxonnon Jesus rehteti yocanahue, hahcanquin.

²¹ Quenataibo nincaxon sca gobernadornen jato yocaquin:

—¿Rabe jai bi jahuemeha hen mato picoxonti man queenain?

—Barrabas rahan —hihcani.

²² —¿Cristo hahcaibo Jesus cahran? Jaa hen jahuejati man queenain? —Pilatonen jato jaquin.

—Jihui qui hueonhue —hahcanquin jatihixonbi.

²³ —¿Jahua copi nan? ¿Jahua tiroma janishquin? —jato jaquin.

Jato jascahah bi hashoan sca quenacani:

—Jihuin hueonnue.

²⁴ Jan jano jahuabi hahyamahi bi hashoan sca corocanahibo jai jisxon, jeneya benahue jaax jaton jisnon bi mechoquihti.

—Jahuen jimi ta hehqui hueoyamahiqui. Mato quibi ta paquetihqui, jisnahue —jato jaquin.

²⁵ Tsinquijaquetaibo jatihibi sca nescari coshin yohuani:

—Noque qui jahuen jimi paquenon, noquen baquebo qui rihbi jahuen jimi paquenon —hihcani.

²⁶ Jaatian Barrabas jato picoxonxon, Jesus rishquihahbo jahuen sontarobo yohixon jato hinanquin jihin hueonahbo.

²⁷ Jahuen sontarobaan sca Jesus bihxon, gobernador xobo chicho hioxon, jaton hahbe sontarobo quenacanquin. ²⁸ Jahuen chopa potamaxon joshin coton sca sahuemacanquin.

²⁹ Moxa maitijaxon, maimaxon, tahua xecomaxon, jaa bebon raboxonen nihxon hosan hosancanquin.

—Jee, judiobaan quiquin hapon —hahcanquin. ³⁰ Jascajaxon, hahqui toshbanhahxon, jahuen tahua bichinxon hahanbi mashrishquiquin. ³¹ Hosan hosanson jaa joshin coton pecaxon jahuen coton sahuemaribixon, jihin hueonnoxon sca Jesus bocanquin.

Jihin hueonaibo

(Mr 15.21-32; Lc 23.26-43; Jn 19.17-27)

³² Jemama qui picoti caxon sca Simon janeya joni meracanquin, Cirene mai meha joni. Jaa jahuen coros hiamacanquin.

³³ Manan qui nococani, Golgota ta mapo xao manan hihcatsihquiqui. ³⁴ Xehati mocani xehanon hinanahbo bi tanahax queenyamahi.

³⁵ Jihui qui tasaxon rontanxon sca jahuen chopa metisahnoxon tsoan bihtihiquin hihxon borasa qui macan bero nanexon chichoh, huetsa macan pari cainaiya huetsan bihnon, huetsa macan pari cainaiya huetsan bihquin. ³⁶ Coirani sca sontarobo tsahopaqueti. ³⁷ Jaa bochihori ta quirica hueoncannishqui, jaa copi rehteja joibo jano janon. Nea ta Jesus qui, Judiobaan quiquin hapo, hihqui jaa quirica.

³⁸ Yometso rabe rihbi sca tasaxon rontancanquin jaa senenbi. Ramiho huetsa, ramiho huetsa. ³⁹ Jano huinotaibaan ta hosan hosancannishqui, jaton mapo bose bosehicanaxon.

⁴⁰ —Papan xobo potojaquetanxon quimisha neten jaa xahnen hahquirihbi xobojanica hihquish, janohax siri sca johue Papan baque hihquish, jaa jihui janinhax botoquihranhue —hahcanquin.

⁴¹ Sacerdote hapobo betan texe judio hapobaan ta jascajaquin rihbi hosancannishqui.

⁴² —Huetsabo jihuemati hahtipahxon bi ta hahri jihuemati hahtipahyamahiqui. Israelibaan quiquin hapo hihquish, jan coros janinhax botopaquenon. Jaatian tah non nincacointihi. ⁴³ Papa Diosen baque hihqui ta shinannishqui. Queenxon, Papan jaa botonxon rohajascanon. Hea tah hen Diosen baque qui jan jaipi hih ca hen ja hisen —hihcani.

⁴⁴ Jascajaquin rihbi ta hahbe hueonahbaan hichaquin hosannishqui.

Jesus mahuati

(Mr 15.33-41; Lc 23.44-49; Jn 19.28-30)

⁴⁵ Barin manan tsahcahiya sca ta yamecahinnishqui, jatihibi mai janin. Nai pohapaque bari janon caman bahquishihpi. ⁴⁶ Bari nai pohapaquetaiya sca ta coshin bi res Jesus yohuannishqui:

—Eli Eli lama sabactani. Papan, Papan, ¿jahua copi min hea jenebahinain? hihcatsihqui.

⁴⁷ Nincacax:

—Elias ta quenahiqui —hihcani jano nichibo.

⁴⁸ Huesti bishquihicanahi caxon, taco quescapa bihxon, xehati cachaqui maosahxon tahua qui queonxon sananhinixon xehamaquin. ⁴⁹ Caibaan sca:

—Jenehue. Jaa botoni Elías jotihiquin non tah non jiscatsihqui —hahcanquin.

⁵⁰ Hahquirihbi coshin bi res quenatax sca Jesus mahuati.

⁵¹ Jaatianbi ta Papan xoboho hahan chiqueti chopa rontamehtai huaxacahinnishqui, bochiquihax naman caman, rabe teque sca janon. Mai rihbi ta mihuannishqui. Macamahnhanbo rihbi ta caxquecahinnishqui. ⁵² Cristo hihquipish bi teehihribihi pecaho ta tsahonbo rihbi quehpemehnishqui, neateman hihni Papan baquebo yorayabi teehihribihax huenihhnatax bocani. ⁵³ Jaabo ta jaa jema janin nichí bocannishqui, hihti caibaan jisnonbi.

⁵⁴ Jesus mahuataiya jascapa huinotai jisish ta jano coiranai sontaro capitán hihti raquenishqui, jahuen sontarobo rihbi hihti raqueti.

—Jaa ta Papan baque coin hihnishqui —hihcani.

⁵⁵ Hochoxon rihbi ta hichaxon haibobaan coiranxon jisnishqui. Jaabaan ta Galilea mai janinhax Jesus betan jahui haibobo janishqui, pitijaxonaibo. ⁵⁶ Huetsa ta María Magdalena janeya janishqui. Huetsa cahen María Jacobon mama, Josepan mama. Huetsa cahen Zebedeon baquebaan mama.

Jesus tsahonaibo

(Mr 15.42-47; Lc 23.50-56; Jn 19.38-42)

⁵⁷ Bepi sca Arimatea jema janinhax coriquiyahpa patoro jahui, José janeya. Jesusen haxemaha nincacoinni joni. ⁵⁸ Pilato janin caxon sca ¿Jesusen yora hean bihtimahin hahca, Pilatonen Bihhwe hahquin. ⁵⁹ Jahuen yora botonxon sca sabana pahtsacah siripan rahcoquin. ⁶⁰ Rahcoxon boxon, tsahomehyanoxon jano jan macan manan xangueman poquinipi janin mihinquin. Heen tsahonti janinbi tsahonpan hihxon jano Jesus mihinquin. Tsahon xehponoxon sca hihtihosi macan taranbohaxon xehpoquin. Macaman xehpobahini sca caresscai. ⁶¹ Jaa tsahon patax sca María Magdalena betan huetsa María manati tsahoti.

Tsahon coiranai sontarobo

⁶² Jatón tantiti nete janón jaa nete queyotaiya sca sacerdoté hapobo betan fariseobo Pilato janin bocani. ⁶³ Nocoxon:

—Hapon, hoa paranmis bihyamaparixon tah non yohuanai nincaquipi qui. Jaa tah non rahma shinanai. Quimisha neten hihquipish tah hen teehihribiyaxihqui hih ta jaipishqui. ⁶⁴ Jaa copi yohihue, jahuen quimisha neten caman jahuen tsahon coiranahbo. Jonetax jahuen yora yometsohtax teehihribi ta jaipishqui —hih jahuen haxenicabo jamis, jonibo parani. Jascajaquin paranah ta jan jato paranmenopahoni mentan hashoan tiroma jatihiqui —Pilato jacaquin.

⁶⁵ —Hoa cahisen, sontarobo. Jato boxon, man honanai quescajaquin jato coiranmatannahue —jato jaquin. ⁶⁶ Caxon sca, hahan xehpoti macan boyacanquin. Boyaxon honantijaxon coiranahbo sontarobo quenimacanquin.

28

Jesus teehihqui

(Mr 16.1-8; Lc 24.1-12; Jn 20.1-10)

¹ Jascahipibo pecaho jatón tantiti nete huino sca jaipi quen xaba paqueti hochoma sca María Magdalena betan huetsa María cahi, tsahon jisi. ² Cahiboyabi naiho quehax Papan yonoti huesti botopaqueti jahuiya coshin bi res mai mihuani. Botopaquexon hahan xehpoti macamahnhan taranbohanax jaa cahtsahoscai. ³ Jahuen yora cana bacahi quescari xabati. Jahuen chopá cahen joxo bi res joxo. ⁴ Jaa jisish ca hihti raquetax tastahihcanahax sontarobo racareneni mahuataibo quescapahax. ⁵ Haibobo nocotaiya:

—Raqueyamanahue. Rehtepibo Jesus benahi man jahui tah hen honani. ⁶ Nenoma ta qui. Jan yohipi quescari ta teehihribihaxqui. Jano racanipibo jahuen tsahon jisi benahue. ⁷ Histon caxon sca jahuen haxenicabo yohitannahue. Hihquipish bi ta hahquiribi teehihquishqui. Mato bebohi ta Galilea main cahiqui. Jano tah man jaa jisi catihi. Mato tah hen yohiscai, jato jascajaquin yohitannahue —Papan yonotinín jato jaquin.

⁸ Histon sca bocani. Tsahon janinhax hishtocanahi cahi, raqueya jenimahax jahuen haxenicabo yohihi bocani. ⁹ Cahitonbi jato behchihí Jesus jahui.

—¿Man jascabi jayamahin? —jato jaquin. Jato jascahah bi pontecahini caxon jaa bebon betihihpaquexon taxecocanquin.

¹⁰ —Raqueyamanahue. Galilea main bohábo heen huetsabo yohitannahue. Jano ta hea jis yaxihcanihqui.

Yohihi sontarobo bocani

¹¹ Jato yohihi haibobo bohoboyabi sca tsahon janinhax sontarobo rihbi bocani. Jeman caxon rahma huinotah jatihibi sacerdote hapobo yohicanquin. ¹² Judiobaan hapobo betan tsinquixon sca jahueja sca non jatihin hihquish yohinanxon sontarobo hicha coriqui hinancanquin. ¹³ Coriqui hinanxon:

—Non yame hoxahiya ta jahuen haxenicabo joxon jahuen yora bichincanaxqui hih-nahue. ¹⁴ Man jascari yohuani jai chanihah noquen gobernador sinataiya tah non jaa rihbi raejatihi, mato jahuejayamanon —sontarobo jacanquin sacerdotebaan.

¹⁵ Jaa coriqui bichish sca jascari yohuani bocani, sacerdotebaan yohihah quescari. Jascari yohuannihbo copi ta rahma caman jatihibi Judea mai janin jascari yohuanchan-icaniqui.

Jahuen raantibo Jesusen raanai

(Mr 16.14-18; Lc 24.36-49; Jn 20.19-23)

¹⁶ Galilea main sca ta jahuen haxenicabo bocanishqui, once joni. Jano nocoyaxahnahue Jesusen jato yohipi manan janin nococani. ¹⁷ Jano Jesus meraxon, hahqui raboxonen tisquihahpaquehcanquin. Jesus tah qui hih caibo janon bi jaa hin Hen tah hen honan-coinyamahi hih caibo jaribihi. ¹⁸ Jato qui joxon sca:

—Papan ta hea jatihibi hihbomascai qui, naiho jai jatihibi, main jaibo jatihibi rihbi. ¹⁹ Jaa copi jatihibi mai janin caxon jano jaibo haxematannahue. Heen Papan janen, jahuen baquen janen rihbi, jahuen yoshin siripan janen rihbi jato nashimatannahue, heen jihue-tahbo. ²⁰ Jascajanahue hahquin hen mato yohiphoni joibo jatihibi jato haxemanahue, jascajahabo. Nete queyonon caman hen mato betan jascabihi jayaxihqui honannahue.

MARCOS

Marcosnen huishani joi siri

Juan cahchiho yohuani cahi

(Mt 3.1-12; Lc 3.1-9, 15-17; Jn 1.19-28)

¹ Papan baque Jesucristo joi siri ta nescari pehocohnishqui. ² Papan joi yohinica Isaiasnen pari ta nescajaquin huishanishqui:

Jise. Mia bahixonnon hihxon tah hen heen joi yohinica pari raanai.

³ Jaa ta cahchiho jano tsoa jihueyamahiton nichish coshin yohuanyaxihqui: Bahixon-nahue jahan hihbo jonon. Jahuen bahi najisti chaibo hahxonahue hih ta jaa jayaxihqui

hihqui Isaiasnen huishani joi.

⁴ Isaiasnen yohini quescajaquin nashimahi ta Juan cahchiho jano tsoa jihueyamahiton canishqui. Cahax coshin yohuani:

—Papan maton hohcha sohuanon maton shinan pontenahue hen mato nashimanon — hahquin. ⁵ Jascajahiya ta Judea mai mehabo, Jerusalem jema janinhahbo rihbi Juan qui bocannishqui jatihibi. Jaton hohcha Papa Dios yohihiya cahen Juaman jato nashimaquin Jordan huean janinxon. ⁶ Juaman ta camello rani chopa sahuepahonishqui. Bichi cinturonen chinexehi. Champo pipahoni. Bona jaene rihbi zehapahoni.

⁷ —Hehchon ta hea mentan hashoan shinanya noque joyaxihqui. Jaa hihti siri copi tah hen chiquerehue tsahopaquexon jahuen sapato risbi pecaxonti betan hea senenyamahi. ⁸ Hean hen mato jenen nashimahi bi ta jahuen jonibo man jai honanahbo hihxon Papan mato jahuen Yoshin hinanyaxihqui, nashimaquin hahcajaquin hicha hinanquin —Juaman jato jaquin.

Juaman Jesus nashimahi

(Mt 3.13-17; Lc 3.21-22)

⁹ Jascascaiya Galilea mai meha Nazaret jema janinhax Jesus jahui. Jahuiya ta Juaman jaa nashimanishqui Jordan huean janinxon. ¹⁰ Nashimaha cahen jene janinhax mapexon nai huiso quehpemehtai Jesusen jisquin. Dios Yoshin nobex quescapah hahqui botopaquetai jisquin.

¹¹ Jaatian:

—Mia tah min hen hihti queenai heen baque qui. Mihon ta hen jenimahi —hihqui naihoh quehax yohuanai joi.

Yoshiman Jesus tanahi

(Mt 4.1-11; Lc 4.1-13)

¹² Jaa pecaho ta Dios Yoshiman Jesus cahchiho camanishqui. ¹³ Cuarenta neten cahchiho Jesus nichu yohinahbo tocan. Jano nichiton ta Satanasnen hohchamacsihquin tananishqui. Papan yonotibaan sca ta Jesus pimanishqui.

Galilea janin Jesus teemenohi

(Mt 4.12-17; Lc 4.14-15)

¹⁴ Jaatian sca Juan sipojahipibo pecaho sca Jesus caribihi Galilea main. Papan joi siri yohibonahi cahi.

¹⁵ —Papan mato hahxonti nete ta nocoscaiqui. Papan jihuemahi joti ta nea pishca sca jaonahiqui. Maton shinan pontenahue. Papan joi siri bihocinnahue —jato jaquin.

Yapa bihnicahbo Jesusen caisai

(Mt 4.18-22; Lc 5.1-11)

¹⁶ Galilea hian quexa sca quetanbonahi cahi. Caquin bi Simon jahuen huetsa Andres betan jisbonaquin. Tarrafa potahiton jato jisbonaquin, yapa bihnica rabe.

¹⁷ —Hehbe bonahue, joni hionica sca hen mato hihmanon —jato jaquin.

¹⁸ Jascaha jaton tarrafa potabahini sca hahbe bocani.

¹⁹ Jaatian caribiquin bi Zebedeon baque Jacobo jisbonaquin. Jahuen huetsa Juan betan nontinxon jaton tarrafa honahiton jisbonaquin. ²⁰ Jisxon jato quenaquin. Quenaha jahuen jonibo betan jaton papa nontinbi banenon Jesus betan sca bocani.

Tiroma yoshinyahpa

(Lc 4.31-37)

²¹ Capernaum jema janin sca nococani. Tantiti neten sca haho tsinquiti xoboho hihcoxon Jesusen jato haxemaquin. ²² Haxemaha rahtecani. Huishani honanbaan haxemahi

quescajaquinma bi hapon hahcai quescajaquin jato haxemaha ta rahtecannishqui. ²³ Jaa xoboho rihbi cahen tiroma yoshinyahpa joni huesti jai. Jaan cahen joi coshin yocaquin:

²⁴ —¿Min noque jahuejatihin, Nazaret janinha Jesusen? ¿Min noque queyohi jahuin? Min tsoa quin hen ta hen honanai. Diosen raanai tah min qui —hahquin yoshiman.

²⁵ Jesusen sca jaa yohiquin:

—Netetax jahuen yora janinhax picohue —hahquin. ²⁶ Jan jascaha jaa joni tastahihmahax sai saihihquish tiroma yoshin picoti. ²⁷ Jatihibi sca rahtetax yocacahanani:

—¿Teeee, jahua joni hin? Honanmati joi behna tah qui. Hapon hahcai quescajaquin ta haxemahiqui. Yoshin tiromabo ta yohihiqui. Jaan catanhue hahca ta bocaniqui —hihcani.

²⁸ Janohax cahen histon bi res Jesus qui yohuanscacani Galilea mai jatihibi janinhahbo.

Simoman haita Jesusen rohajahi

(Mt 8.14-15; Lc 4.38-39)

²⁹ Jaatian sca haho tsinquit xobohoh quehax cainax Andres betan Simoman xoboho hihcocani Jesus, Jacobo, Juan. ³⁰ Simoman haita cahen yonatax racati. Jesus yohiscanquin, Jaa ta hisiniqui, hahquin. ³¹ Yohihahbo metsontanxon hueniquin. Huenihah rohacahinxon jato pimascaquin.

Hisinaibo Jesusen hicha rohajahi

(Mt 8.16-17; Lc 4.40-41)

³² Jaa bepi bari hihquiscaya sca ta hisinyahpabo, tiroma yoshinyahpabo rihbi jato jatihibi Jesus qui hiocannishqui. ³³ Jaa jema janinhahbo jatihibi Jesus janin xehqui patax tsamajaqueti. ³⁴ Jano cahen mesco hisinyahpabo Jesusen rohajaquin hihti caibo. Hicha tiroma yoshinbo rihbi netemaxon picoquin. Jaa honanaibo copi jato netemaquin.

Galilea main caxon Jesusen haxemahi

(Lc 4.42-44)

³⁵ Mohiyahtax hihari sca xaba paqueri jaima huenitax Jesus cahi jano tsoabi yamahiton. Janoxon sca jahuen Papa yocaquin. ³⁶ Jaatian sca Simon, jaabo, Jesus benahi cahi.

³⁷ Meraxon yohicanquin:

—Jatihixonbi ta mia benacanicu —hahcanquin.

³⁸ —Huetsa jemabo janin sca canon bonahue, jano rihbi Papan joi yohinon. Jaa copi tah hen jahuequi —jato jaquin.

³⁹ Jato jascahah Galilea janin sca Jesus nihnihi jatihibinco. Haho tsinquit xobohoxon Papan joi yohibonahi cahi. Tiroma yoshinbo rihbi picoquin.

Sipiyah rohajahi

(Mt 8.1-4; Lc 5.12-16)

⁴⁰ Jaatian cahen huesti sipiyahpa joni Jesus qui joxon hihti yocaquin. Raboxonen tisquihahpaquexon yocaquin:

—Queenxon ta mian hea rohajatihi —hahquin.

⁴¹ Jan hihti shinanxon mehanchinxon mehaxon Jesusen sca yohiquin:

—Queen tah hen jai. Rohaschahue —hahquin.

⁴² Jan jascahah hisinyamascai, rohascai. ⁴³ Jaatianbi jaa catannon sca Jesusen hihti yohiquin:

⁴⁴ —Tsoabi yohihaxma sacerdote qui catanhue, min rohascai jismahi. Min rohahi copi Moisesnin yohini hinanti hinantanhue min rohascai honanahbo —hahquin.

⁴⁵ Jesusen jascahah bi cahi. Jan rohascai yohibonahi cahi. Yohibonahiya cahen jema janin jahuibo hichahiya jeman cati Jesusen hahtipahyamascaquin, jaa yocacatsihquibo hichahiya. Hueneman res cahi. Jatihibi janinhax sca Jesus qui bocani.

2

Yora honanyamajaquetai rohajahi

(Mt 9.1-8; Lc 5.17-26)

¹ Huetsa neten sca cahen Capernaum janin hahquirihbi Jesus nocoti cahi. Jahuen xobon jaa nocoscai cahen nincacanquin janohahbaan. ² Hicha joni tsamajaquetaiya cahen xobo senenyamascai, xehqui pataxbi jahuenbi nihcahuantimahi. Jaan ca Papan joi jato yohiquin. ³ Jahuen yora honanyamajaquetai joni sca hihuehi becani, chosco joni.

⁴ Joni tsamajaquetaiboya Jesus pataxti hahtipahyamaxon Jesus mahchi xobo pemacanya tsecaquin. Quinijaxon jahuen cacajatiyabi jaa joni botonpaquedanquin. Yora honanyamajaquetai joni hahan racatai bi botonpaquedanquin. ⁵ Rohajatihi shinancoinaibo jixxon yora honanyamajaquetai joni sca Jesusen yohiquin:

—Miin hohcha ta sohuá scah qui, baquen —hahquin.

⁶ Jano rihbi cahen jaton jointinin shinani tsahocani huishani joi honanbo.

⁷ —¿Jahua jenquetsahin nea jonin jascajaquin yohihiquin? Tiromahi ta yohuanihqui. Papa huestichin ta hohcha sohuati hahtipahiqui —hihcani jaton jointinin.

⁸ Jaton jointinin jascajaquin shinanaiboya jahuen shinaman honanscaxon Jesusen jato yohiquin:

—¿Jahua jenquetsahin man jascajaquin shinanain maton jointinin? ⁹ ¿Jahue meha joi nea yora honanyamajaquetai joni yohiti hashoan teema quin? ¿Miin hohcha ta sohua scah qui hihqui nan? ¿Huenihue, miin cacajati bichish caresscatanhue hihqui nan? ¿Jahue meha hashoan yohiti teema quin nan? ¹⁰ Nai nequebihoxon hohcha sohuati hihbo hea jai man honannon hihxon tah hen nea sca yohihi —jato jaxon yora honanyamajaquetai joni sca yohiquin:

¹¹ —Mia ta hen yohihi. Huenihue. Miin cacajati bichish miin xobon caresscatanhue —hahquin. ¹² Yohihah huenixon jahuen cacajati bichish res sca jaton jisnonbi caini. Jatihixonbi jisish rahtetax siripi Papa qui yohuancani:

—Jahuentianbi tah non jascajahi jisyamaniqui —hihcani.

Levi Jesusen quenahi

(Mt 9.9-13; Lc 5.27-32)

¹³ Hian quexa sca cahen Jesus caribihi. Jatihibi jonibo hahqui tsamajaquetai, jaan jato haxemanon. ¹⁴ Jano huinoquin bi Levi sca meraquin Alfeonen baque. Janoxon coriqui cobranti janin hapobaana cobranxonni tsahotai meraquin. Meraxon:

—Hehbe cahue —hahquin. Jan jascahah huenicahuanax hahbetan cahi.

¹⁵ Pihí benahue hahca Levin xoboho sca jahuen haxenicaboyabi Jesus cahi. Jesus betan hicha joni bocani. Nocotax pihí tsahoti hicha cobranxonaiboya hicha hohchayahpabo rihbi jano tsahoti. ¹⁶ Hohchayahpaboya cobranxonaibo betan Jesusen pihí jisxon huishani joi honan fariseobaan jahuen haxenicabo yocacanquin:

—¿Jahuejanoxon cobranxonaiboya hohchayahpabo betan pihiquin? —hahcanquin.

¹⁷ Jascajaquin yocacaibo nincaxon Jesusen jato yohiquin:

—Hisinjomabo pishinaima bi ta hisinyahpabo rahonica pishinihqui. Hohchajoma jonibo quenahima bi tah hen hohchayahpabo quenahi joniqui —jato jaquin.

Non piti tenetimahin hihquibo

(Mt 9.14-17; Lc 5.33-39)

¹⁸ Jaatian sca cahen Juaman haxematibaan piti tenenish. Fariseobaan rihbi piti tenequin. Jesus qui caxon fariseobaan Jesus yocaquin:

—¿Jahua jenquetsahin Juaman haxenicabaan piti tenenon fariseobaan haxenicabaan rihbi tenehi bi minabaan piti teneyamahihquin? —hahcanquin.

¹⁹ Jesusen jato yohiquin:

—¿Jato betan huanohi joni hihparihiya huanquin quenamahibaan piti tenetihiquin? Jato betan huanohi joni hihparihiya ta piti tenetimahihqui. ²⁰ Huetsatian ta jatoma qui huanohi joni hionyaxihcanihqui. Jaatian pari ta piti teneyaxihcanihqui quenamahibaan. ²¹ Tsoanbi ta hotsinica chopan chopa payo honayamahihqui. Jascajaquin honahah ta hona teresihqui hashoan huaxascaí. ²² Tsoan rihbi ta hompa rahma nehsehiqui bichi borasa xeni qui mahneyamahihqui. Jascahah ta hompa pohoshihmatihiqui, xehati yohyocohnon borasa rihbi masascanon. Hompa rahma nehsehiqui ta borasa behna qui mahneti qui —hahquin Jesusen.

Tantiti neten bimi bihbonahi

(Mt 12.1-8; Lc 6.1-5)

²³ Huesti tantiti neten sca cahen trigo huai nabebacahini cahi. Hahbetan caquin jahuen haxenicabaan trigo bimi tesabonaquin. ²⁴ Fariseobaan sca Jesus yohiquin:

—Jise. ¿Jahua jenquetsahin jaabaan jascajahiquin, tantiti neten jascajatima joi jai bi? —hahcanquin.

²⁵ Jascahahbo jato yohiquin:

—¿Jahua pitimahiya hahbe cahibo rihbi pihan hihquiya jaa rihbi pihan hihxon Davidinin hahni man jisyamaniquin huishani joi janin? ²⁶ Abiatar sacerdotebaano hapo hihqui tian ta Papan xoboho David hihconishqui. Jaa paan sacerdotebaano res piti que bi jaan piquin. Jahuen jonibo rihbi piqihinquin —jato jaquin.

²⁷ Jato jascaxon yohirihbihquin:

—Tantiti nete copi joni jaima bi ta joni copi tantiti nete jaiqui. ²⁸ Jaa copi ta hea noque baque tantiti nete hihbo qui —jato jaquin.

3

*Meyosma**(Mt 12.9-14; Lc 6.6-11)*

¹ Jaton haho tsinquiti xoboho cahen Jesus hihcorihbihi. Meyosmahi noque jano rihbi jai.
² Jesus jisquin sirijascacquin.

—Rohaja ra ta jatihiqui tantiti neten hihqui bi —hihxon jiscanquin jaya yohuanti janoxon cahecatsihquin.

³ Jesusen sca meyosmahi yohiquin:
 —Noque tocanbi johue —hahquin.

⁴ Jascaxon tsahotaibo yocaquin:

—¿Tantiti neten sirijati joi jaiquin? ¿Masajati joi jaiquin? ¿Teehimati joi jaiquin? ¿Rehleti joi jaiquin? —jan jascahah bi jahua hihyamacani. ⁵ Benaya bi sinaxon sca Jesusen jato bejispaquequin. Jointi chahomayabo copi benati. Meyosmahi sca yohiquin:

—Miin mequen sanahihnihue —hahquin. Sanahihnihax rohascai. ⁶ Jaa rohajahi jisish cainax herodianobo betan sca fariseobo hahqui yohuancani:

—¿Jenquetsahaxon non Jesus mahuamatihin? —hihcani yohuani.

Hian quexa tsamajaquetaibo

⁷ Hian janin sca jahuen haxenicabo betan Jesus caresscai. Hahchon bocani hicha jonibo tsama bi res. Galilea mai mehax, Judea mai mehax. ⁸ Jerusalem janinhax, Idumea janinhax, Jordan hoque quexa quehax, Tiro janinbohax, Sidon janinbohax. Tsama bi res hahqui cahax tsamajaqueti. Jatihibi jan hahcaibo nincacax tsamajaqueti hashoan nincacatsihqui. ⁹ Main tsamajaquetaibo hahqui tsehquesihquiboya jahuen haxenicabo sca yohiquin:

—Nonti jistannahue non hahan canon —hahquin. ¹⁰ Jan hicha rohajahipi copi hisinyahpabaan jatihixonbi Jesus mehecatsihquish hahqui tsamajaquetax tsehquesihqui.

¹¹ Yoshin tiromabaan rihbi Jesus jisish hahqui bethipaquetax joi coshin yohuani:

—Mia tah min Diosen baque qui —hihcani. ¹² Jonibaan yoshin jascari yohuanai nincayamanon hihxon, jato hihti yohiquin:

—Yohuanyamanahue —hahquin.

*Jahuen doce raantibo Jesusen caisai**(Mt 10.1-4; Lc 6.12-16)*

¹³ Mananahbo sca cahi. Caxon jan caisaibo quenaquin. Quenahah hahqui bocani. ¹⁴ Doce joni cahen caisquin, hahbetan nihnon. Papan joi yohinicabo raannoxon jato caisquin. ¹⁵ Tiroma yoshin potati hihbobo hihnon jato caisquin. ¹⁶ Huetsa cahen Simon. Jaa cahen Pedro janequin. ¹⁷ Huetsa cahen Jacobo, Zebedeon baque. Huetsa cahen Juan Jacobonen huetsa. Jabo rabe Jesusen Boanerges janequin. Boanerges cahen terenhicha baquebo hihcatsihqui. ¹⁸ Huetsa cahen Andres, huetsa cahen Felipe, huetsa cahen Bartolomé, huetsa cahen Mateo, huetsa cahen Tomas, huetsa cahen Alfeon baque Jacobo, huetsa cahen Tadeo, huetsa cahen Simon Celador, ¹⁹ huetsa cahen Judas Iscariote, Jesus bihmanica. Jaa rahsi caisquin, doce joni.

*Mia tah min Satanas coshiyah qui hihquibo**(Mt 12.22-32; Lc 11.14-23; 12.10)*

²⁰ Xobon sca Jesus cahi. Hahquirihbi tsamajaquetaiboya piti hahtipahyamascaquin. ²¹ Jascasci nincacax jaa bichi sca jahuen jenabo cahi.

—Tehquehih sca ta jaiqui —hihxon jaa bichi bocani. ²² Jerusalem janinhax jahuex huishani joi honanbo rihbi yohuani:

—Tiroma yoshin hapon yanapana ta tiroma yoshin picohihqui. Beelcebunen ta jaa hihbojascai qui —hihcani.

²³ Jascahiton:

—Benahue —jato jaquin. Jahuiboya sca jaa patax queha joibo sca jato yohiquin:

—¿Jenquetsahaxon Satanasnen Satanas picotihiquin? ²⁴ Huesti mai mehax jaabo rahsibi rehtenananax ta queyoscatihiqui. ²⁵ Huesti xobo mehabo jaabo rahsibi rehtenananax ta jaabo queyoscatihiqui. ²⁶ Satanas hahbe Satanas betan rehtehahax cahen jaabo queyoscaan, hahri queyocani. ²⁷ Coshi jonin xoboho ta tsoabi yometsohti hihcoti hahtipahyamahiqui, hihbo nexayamahax. Hihbo nexaxon pari ta jahuen jahuaborabo bichintihiqui, jatihibi queyobahinnoxon. ²⁸ Yohicoin ta hen mato jai: jatihibi hohcha ta jonibo sohuatihiqui. Papa qui tiromahi yohuanaibo rahsi rihbi ta sohuatihiqui. ²⁹ Jascapahbo sohuaxon bi ta Dios Yoshin qui tiromahi yohuanaibo Papan jahuentianbi sohuatimahiqui. Jascapa hohcha ta jascabihi sca banetihiqui —jato jaquin.

³⁰ Jaa ta tiroma yoshinyahpa qui jaabo jai copi cahen jato jascajaquin.

*Jesusen mama betan jahuen huetsabo**(Mt 12.46-50; Lc 8.19-21)*

³¹ Jahuen mama betan jahuen huetsabo sca nocoti. Jemanhihti janin nihxon Jesus quenamacanquin. ³² Tsamajaquetax tsahotaibaan sca yohixonquin:

—Miin mamaya miin huetsabo ta jeman qui. Mia ta quenamacaniqui —hahcanquin.

³³ Jaan sca joi bichinquin:

—¿Tsoa heen mama quin? ¿Tsoa heen huetsabo quin? —hahquin.

³⁴ Tsahohahtancahuanaibo bejspaquexon sca:

—Neabo ta heen mama heen huetsabo qui. ³⁵ Papa queenai quescajanicahbo ta heen huetsa, heen choca, heen mama qui —jato jaquin.

4*Mihsahahnica**(Mt 13.1-9; Lc 8.4-8)*

¹ Jaatian sca cahen hian quexaxon Jesusen jato haxemaribiquin. Hicha joni hahqui tsamajaquetaiya nontin nanetax tsahoti tsamajaquetaibo hian quexa banenon. ² Janoxon sca hicha jaa patax queha joi jato haxemaquin.

³ —Nincanahue. Mihsahahnicahton cahen jahuen bimi bero mihsahahbonahi cahan. ⁴ Jan mihsahahca can caibo bero bahinbi paqueti. Jano paquetaibo topibonahi sca hihsabo cahi queyobonahi. ⁵ Mai chahoma janin caibo rihbi paqueti. Hihquiyamahax histon joconi. ⁶ Joconai bi barin hahca hashoan xanahax jahuen tapon chicho cayamahax pehuahax res sca xanahi. ⁷ Moxa tocan rihbi caibo bero paqueti. Moxa pari hanixon rishquihah bimi yamahi. ⁸ Mai siri janin rihbi caibo paqueti. Hanihax bimihi siripi. Jaa bero hanihax bimihi caibo quiha treinta bero, caibo quiha sesenta bero, caibo quiha cien bero sca jai. ⁹ Hahan nincati pabinquiyahpaxon nincanahue —jato jaquin.

*Jaa patax joi jan haxemahi**(Mt 13.10-17; Lc 8.9-10)*

¹⁰ Tsamajaquetai jonibo boresscaiya Jesus qui banejaquetax jahuen doce jaabo yocacahcani. Jan yohiha jaa patax queha joibo honancoincatsihqui yocacahcani. ¹¹ Yocaca jato yohiquin:

—Papan jihuemahi jone joi mato honanmaxon tah hen jaa patax queha joi rahsi jaabo nincamahahi nincayosmabo quen. ¹² Jis jisxon bi jisyamahabo, ninca nincaxon bi nincayamahabho, jaton shinan pontehax jaton hohcha yamamis hihxon nincayamahibo copi tah hen jaa patax queha joi rahsi jato nincamahahi —jato jaquin.

*Mihsahahnica joi Jesusen honanmahi**(Mt 13.18-23; Lc 8.11-15)*

¹³ Jato jascajaxon Jesusen yocaquin:

—¿Hen rahma yohiha jaa patax queha joi man honanyamahin? ¿Jenquetsahaxon sca man jatihibi jaa patax queha joi honantihin? ¹⁴ Bero mihsahahquin hahcajaquin ta mihsahahnicahton joi yohibonahihqui. ¹⁵ Bahinxon nincacaibo ta nescapah qui. Yohibonahi joi nincacaibaan bi ta Satanas joresscaxon jaa joi jato bichiniqui. ¹⁶ Jascajaquin rihbi ta mai chahoma janinxon joi nincamaha jenimarenenscacaniqui. Nincacoinax, jenimacani. ¹⁷ Jenimahax bi jaton tapon chicho cayamahax quescaxon basimaxon jenescaanquin. Jaa joi jaiton caibaan jato hosana hosana jenescaanquin. Nincacaibo copi caibaan tiro-majacatsihquin chibana jenescaanquin. ¹⁸ Caibo rihbi ta yohibonahi joi moxa tocanxon nincacaibo qui. ¹⁹ Jahuen teebo jan shinanai ta moxa quessa qui. Coriquiyahpati shinanax paramehti, jahuaborabo jan hashoan queenyorahi rihbi ta moxa quessa qui. Jaan rishquihah bimiyamascai. ²⁰ Mai siri janin joi nincamaha ta nincacoinnicabo qui. Bimihi siripi. Huesti bero joconax caichi, caibo quiha treinta, caibo quiha sesenta, caibo quiha cien bero —jato jaquin.

*Johue**(Lc 8.16-18)*

²¹ Jaatian sca jato yocaquin:

—¿Jahuejahi non johueyahpa chiqueho jotihin? ¿Quenti behonbohana naman tsahonih nan? ¿Jano hoxati tapo naman tsahonih nan? ¿Jano johue tsahonti janin tsahoni non jaaya joyamahin? ²² Yohiyamayaxihqui jone joi ta yama qui. Joneha jismayamayaxihquibo yamaribihibi. ²³ Hahan nincati pabinquiyahpaxon nincanahue. ²⁴ Man nincacai nincaquin sirijanahue. Man hinannoxon toponaitihi ta jatfhi rihbi mato hinantihiqui. Hashoan rihbi sca ta mato hinantihiqui. ²⁵ Jaibo bi ta hashoan jaan hinantihiqui. Yamahibo bi ta jaabo jai pishca jato bichintihiqui —jato jaquin.

Bero joconai

²⁶ Jascajaxon jato yohirihbiquin:

—Papan jihuemahi ta nescapah qui. Huesti jonin cahen bimi bero main mihsahabonahan. ²⁷ Hoxashinahax mohiyahtax, jasca jan hicha neten jaiya, jan mihsahabonahi bero joconscaax hanihi. Jenquetsahax hanihiquin jaan honanyamaquin. ²⁸ Main joconoibo ta hahmebi bimihihqui. Pehi pari caini, bimihax res sca bero canisca. ²⁹ Canihiton ta tsinquiscanoxon xatebonacaniqui —jato jaquin.

Moxo bero

(Mt 13.31-32; Lc 13.18-19)

³⁰ Jascajaxon jato yohirihbiquin:

—¿Papan jihuemahi ta nescapah qui hihxon non jahua yohuan jatihin? ¿Jahua jaa patax queha joi non jatihin, Papan jihuemahi joi nincamanoxon? ³¹ Papan jihuemahi ta moxo bero quescapah qui. Main banahah bi ta jatihibi jihui bero mentan moxo bero hashoan hexti romishin qui. ³² Jascapah cahen banahi joconi. Hanihi. Jatihibi banabo mentan hashoan hanihi. Hihtihosi mebihi, hotahi joxon hihsabaan sca jano nahajanon —jato jaquin.

Jaa patax queha joi haxemahi

(Mt 13.34-35)

³³ Jascajaquin hicha jaa patax queha joi yohixon Papan joi jato nincamaquin jaabaan nincati hahtipahi tih. ³⁴ Jaa patax queha joi rahsi jato yohiquin. Huetsa jonibo jato betan hihyamascaiya cahen jahuen haxenicabo rahsi jatihibi yohiquin sirijascaquin.

Nihueyabi behchon Jesusen tantijahi

(Mt 8.23-27; Lc 8.22-25)

³⁵ Jaa neten bari hihquiscaiya cahen jahuen haxenicabo yohiquin:

—Hoque quexa pohquejaqueti bonahue —hahquin. ³⁶ Tsamajaquetaibo jenebahinax res sca hahan jan tshotai nontin Jesusyabi pohquejaquecani. Huetsa nontibo rihbi hahchon pohquejaqueti. ³⁷ Nihuehnhuan sca jahui. Behchoman nonti tsahcaquin. Nonti qui nachicohti jene bochonon. ³⁸ Jascarai bi Jesus nonti chishqui quiri hoxahi. Nonti tshahotinin racatax tepitinin tepihax hoxahi. Mohinxon sca yocacanquin:

—Maestron, ¿non mahuatai ya mia jahua hihtimahin? —hahcanquin. ³⁹ Mohinah nihueyahpa hian yohiquin:

—Tantiscahue. Behchonyamascahue —jan jascahah nihue tantihi, behchon yamascai.

⁴⁰ —¿Jahua jenquetsi man raquetain? ¿Man shinancoinyamahin? —jato jaquin. ⁴¹ Jan jascahah rahtetax yohinanancani:

—¿Jahua hihxon yohihah nihuen bocabi nincaquihquin? ¿Hiaman bocabi nincaquihquin? —hihcani.

5*Gadara joni yoshinyahpa*

(Mt 8.28-34; Lc 8.26-39)

¹ Hian hoque quexa Gadara mai qui sca nococani. ² Nonti janinhax mapetaiton yoshin tiromayahpa joni Jesus behchihi jahui. Tsahonnihbo janin cahuan cahuani jihuetax joxon behchiquin. ³ Tsahonnihbo janin jaa cahuan cahuani nihrasihi. Tsoanbi nexati hahtipahyamahi joni, cadenanen bocabi nexatimahi. ⁴ Hicha coti cadenanen tanexxon menexahbaan bi jaan cadenabo tehcaquin, hahan tanexahbo tehcapaquequin. Jaa xecoti tsoabi coshi yamahi. ⁵ Jascabi tsahon tocan nichish mahchi rihbi manichish sai saihihshinahax sai saihihbahinahax hahmebi macaman tsehuérahsihi. ⁶ Jaan cahen hochoxon Jesus jisish hishtoquihrani jahuex hahqui betihihpaqueti.

⁷ Picohue Jesusen jaá bi betihihpaquexon coshin bi res yohiquin:

—¿Hea min jahuejatihin, Jesusen, queya queha Diosen baquen? Diosen noque jisnon tah hen mia hihti yocacai: hea tiromajayahue —hahquin.

⁸ —Jahuen yora mehax picohue, yoshin tiroman —Jesusen jaá jascajaquin. ⁹ Jesusen sca yocaquin:

—¿Mia min jahua jane quin? —hahquin.

—Heen jane ta Legion qui, noque non hichahi copi —hahquin. ¹⁰ Jascajaxon yoshiman hihti yocaquin, huetsa main jato camayamanon. ¹¹ Jano rihbi ta hicha repinica cochi janishqui mananan pibonahibo.

¹² —Cochi qui sca noque camahue, jato qui non hihquinon —hahquin yoshiman hihti yocaquin. ¹³ Jascajaha Jesus jeenhihqui. Yoshin tiromabo picotax res sca cochi qui sca

hihquih. Hihquihiboya jaa repinica dos mil rocohihcanahax quempe janinhax cayahax jenenencanya hihquihax hahsatax mahuati.

¹⁴ Cochi coirannicahbo sca jabaxon yohibonaquin jema janinxon, huenemanxon rihbi. Jaabaan yohihah cahen jahuaahi jacanaxquin hihquish honani sca bocani jano jihuetabo. ¹⁵ Jesus qui nocoxon yoshinyahpa hihrasih joni jiscanquin. Chopayahpahax res sca tsahotai jahuen shinan siriscas jiscanquin. Jisish raquecani. ¹⁶ Jan cochi qui yoshin mahnebohanxon yoshinyahpa joni rohajahi jisibaan ja to yohihah hihti raquecani. ¹⁷ Nincacax raquexon sca Jesus hihti yocascacanquin. Noquen mai mehax catanhue hahcanquin.

¹⁸ Nontin Jesus nanetaiton cahen yoshinyahpa hihrasihon hihti yocascaquin, hahbetan cacatsihquin. ¹⁹ Jan jascahah bi Jesus jeenhilyamahi.

—Miin caibo yohihi miin xoboho catanhue. Mihon shinanxon miin hihbaan mia hahxonai jatihibi yohitanhue —hahquin.

²⁰ Jan jascahah yohihi caxon yohibonaquin. Decápolis jemabo janinhahbo yohiquin. Jatihibi Jesusen jaa hahxonai yohibonaquin. Jan yohibonaha jatihibi rahtecani.

Jairon baque; chixanan hisinai haibo
(Mt 9.18-26; Lc 8.40-56)

²¹ Jaatian sca Jesus hoque quexa nontin pohquerihbihiya hicha joni hahqui tsamajaqueti. Hian quexa sca cahen jaa nich. ²² Hapo sca nocoti. Jairo janeya, haho tsinquiti xobo hapo. Jesus jisish jahuen tahe qui betihpaquexon hihti yocaquin:

²³ —Heen baque haibo pishca ta mahuacatsihquiqui, hapon. Miin mequeman mehaxoni cahue. Rohahax jihuenon —hahquin. ²⁴ Hahbetan sca Jesus cahi. Cahiya hichaxon Jesus chibancanquin. Tsehquesihcanahi bocani. ²⁵ Jato betan rihbi huesti haibo cahi, doce bari sca jimihis hisinish. ²⁶ Hicha rahonnicabaan rahonah bi rohayamahi, hohmis hohmisi, jahuen coriqui queyoquin. Rahonahbaan bi jascabi hisini, nanocohcanaribih. ²⁷ Jesusen hahcai nincacax tsamajaquetaibo tocan nichish hahchon cahi. Hahchon caquin sca jahuen chopa mehequin. ²⁸ Jahuen yora meheyamaxon bi jahuen chopa pishca mehexax tah hen rohascatih, hihxon mehequin. ²⁹ Mehexax jimi tantiscas. Jahuen hisin rohascai jahuen jointinin honanquin. ³⁰ Jesusen sca jahuen yora janinhax coshi cahi jahuen jointinin honanxon tsamajaquetaibo tocan rabejaquecahuanxon jano nichibo yocaquin:

—¿Tsoan heen chopa mehexaxquin? —jato jaquin.

³¹ Jahuen haxenicabaan sca yohiquin:

—¿Nea tsamajaquetaibo mihqui tsehquesihqui jisi bi min Tsoan hea mehexaxquin hihqui yocacatain? —hahcanquin. ³² Jascajahibaan bi Jesusen jisjaquehtanquin, honanxon. ³³ Jan hahxonah honanax raquetax tastahihcanahi jahue Jesus qui betihpaquexon hihcoinjaquin sca haibaan jatihibi yohiquin. ³⁴ Jaa cahen Jesusen yohiquin:

—Baquen, min shinancoinai copi tah min rohascai. Shinanquin sirijahax caresscatanhue, miin hisin rohascaax caresscatanhue —hahquin. ³⁵ Jan yohuanai betanbi hapon xobo janinhax jahuibo nocoti. Nocoxon tsinquiti xobo hapo yohicanquin:

—Moa ta miin baque mahuascaaxqui. ¿Jahuejanoxon sca min maestro jatsanjahin? —hahcanquin. ³⁶ Jascajahibo nincaxon Jesusen jaa hapo yohiquin:

—Raquexonma shinancoinhe —hahquin. ³⁷ Caquin sca tsoabi hahbetan camayamaquin. Pedro, Jacobo, Jacobonen huetsa Juan, jaabo rahsi Jesusen boquin. ³⁸ Cah, hapon xoboho nococani, haho tsinquiti xobo coiranicahton xoboho. Nocoxon corotaibo jisbonaquin, huaohihquiboya hihti huinihibo. ³⁹ Hihcoxon Jesusen jato yocaquin:

—¿Jahua jenquetsahin man huaohihqui coro corotain? Mahuatihma bi ta xontaco hoxahihqui —jato jaquin. ⁴⁰ Jascajahiton hosancanquin. Hosan hosana Jesusen jato jatihibi jeman cainmaquin. Jahuen papa, jahuen mama, hahbe jahuibo, jaabo rahsi cainmayamaquin. Jano xontaco racataiton sca jato betan Jesus hihcohi. ⁴¹ Xontaco metsonxon:

—Talita, cumi —hahquin. Haibo pishcan, mia tah hen yohihi huenihue, hihcatsihqui. ⁴² Jan jascahah huenitax nich. Doce bari jai xontaco. Jisish rahte rahtecani. ⁴³ Jan xontaco hahxonai tsoabi yohiyamahahbo cahen Jesusen jato hihti yohiquin. Jascaxon:

—Xontaco piti hinannahue —jato jaquin.

6

Nazaret janin Jesus nocotai
(Mt 13.53-58; Lc 4.16-30)

¹ Janohax res sca cahen jahuen mai janin sca Jesus caribihi. Jahuen haxenicabo rihbi hahbetan bocani. ² Tantiti neten sca haho tsinquiti xobohoxon jato haxemaquin. Nincacax hicha jonibo rahte rahteti.

—¿Jahuerahnohax nescapa yohuan haxenishquin? ¿Jenquetsahpa shinan bihnishquin? ¿Jahua coshin jahuen mequeman hahquiquin? ³ ¿Hoa carpinteroma hin? ¿Marian baquema hin? ¿Jacobo, José, Judas, Simon jahuen jochicaboma hin? ¿Jahuen chocabo neno noque tocan jihueyamahiquin? —hihcani hahqui sinati.

⁴—Huetsancohobo Papan joi yohinica hon queenaibaan bi ta jahuen mai janinhahbo res jahan queenyamahihqui. Jahuen jenabo, jahuen xobo janinhahbo rihbi jahan queenya-macani —Jesusen jato jaquin.

⁵ Jaa jema janinxon ta jahuen coshin jato hahxonti hahtipahyamanishqui, huestibo res hisinaibo mehexon rohajaquin. ⁶ Hihcoina jabaan shinaryamahi copi Jesus rahteti. Jemabo janin sca haxemabonahi cahi.

Yohitannahue jaah bohobo

(Mt 10.5-15; Lc 9.1-6)

⁷ Jahuen doce quenaxon yoshin tiromabo picoti jato hihbomaxon rabe rabebo jato raanquin. ⁸ Raannoxon jato hihti yohiquin, mequen botanahbo, huesti hahqui paxati mepitiya res bohobo. Piti boyamanon, borasa, jaya cati coriqui rihbi boyamanon. ⁹ Sapato sahuequin bi rabe coton sahueyamanon.

¹⁰—Xoboho hihcohax janobi banenahue, jaa jema janinhax canoxon caman. ¹¹ Mato J hue hahyamaxon mato nincacatsihyamahiboya janohax caquin maton sapato qui hueotai mai pototo jato qui tahabahini botannahue yohitimabohi honanahbo —jato jaquin.

¹² Jaa jascajaha boressacani, shinan pontenahue jato jabanahi bocani. ¹³ Hicha yoshin rihbi picocanquin. Hicha hisinyahpabo rihbi xeniyaxon bemanxon rohajacanquin.

Nashimanica rehtehebo

(Mt 14.1-12; Lc 9.7-9)

¹⁴ Jascajahiboya cahen Jesusen joi jatihixonbi nincacanquin. Herodes janeya quiquin hapon rihbi nincanquin. Jesus yohihi cahen caibo nescari yohuannish:

—Nashimanica Juan ta mahuatipish bi teehihribihiqui. Jaa copi ta jascajaquin coshin hahquiqui —hihcani.

¹⁵—Elias yamanica tah qui —hihqui caibo rihbi.

—Papan joi yohinica tah qui. Neateman Papan joi yohipahoni quescapah tah qui —hihqui caibo sca. ¹⁶ Jesusen hahcai nincacax Herodes sca jascarihbihi:

—Juan ta jihuerihbihiqui. Hean rehtequin textebahinhoh bi ta teehihribihiqui —hihqui.

¹⁷ Jascari yohuanyahnoxon ta Herodias copi Juan bihmaxon Herodesnen Juan sipojan-ishqui. Herodias Felipenin haibo que bi ta Herodesnen bichinnishqui. Jahuen huetsan haibo bichinquin. ¹⁸ Bichinaiton cahen Juaman Herodes yohiquin:

—Miin huetsan haibo bichintima joi ta jaiqui, noquen nincati joi —hahquin.

¹⁹ Jan jascajah Herodesnen haibo Herodias Juan qui rainyamahi jihuexon rehtecatsihquin bi hahtipahyamaquin, jahuen benen pantehah. ²⁰ Juan ponte jihueti hohchajomahi honanax Juan qui raquequin Herodesnen coiranquin, caibaan rehtemis hihxon. Juan nincaxon jahua shinanti honanyamaquin bi nincanquin, coin coinxon. ²¹ Jahuen bari nocotai neten sca cahen Herodesnen fiestajaquin. Pihijahuebo jahuen tinintibo quenamaquin, jahuen sontaro hapobo quenamaxon Galilea mai meha patorobo rihbi quenamaquin. Fiestajahiboya jahuen haibaan Juan copicatsihquin shinanquin: Rahma caya tah hen Juan rehteti hahtipahscai hihqui. ²² Fiestajahibo qui hihcohax Herodiasnen baque xontaco jato bairahxonaiya hahan Herodes hihti jenimahi, jan quenamahabo rihbi. Jenimaxon Herodesnen yohiquin:

—Min queenaibo hea yocareshue, hen mia hinannon. ²³ Jascajaxon Papa Dios quenaxon sca xontaco yohirihbiquin:

—Min hea yocacaibo tah hen mia hinantih, heen yonotibo jatih hena hihnon jatih rihbi mina hihnon caman —hahquin. ²⁴ Yohiha jahuen mama yocacui sca caresscai.

—¿Jahua yocapan? —hahquin.

—Nashimanica Juaman mapo rahan —hahquin jahuen maman.

²⁵ Hapo qui histon caribixon sca yohiquin:

—Nashimanica Juaman mapo tah hen queenai rahmabi. Quencha qui nanexon min hea hinanti tah hen queenai —hahquin.

²⁶ Yocacah sca hapon masa shinanquin. Hihtijaquin masa shinanxon bi Dios quenaxon yohixon copi jahuen joi huetsajati hahtipahyamaquin. Jan quenamahibaan nincacah copi rihbi jeenhahscaquin. ²⁷ Jeenhixon, rehtexonnica sontarobo sca raanquin, jahuen

mapo bihtanahbo. Raanah caxon carcel janinxonbi Juan textecanquin. ²⁸ Quencha qui jahuen mapo nanehax jaya joxon xontaco hinancanquin. Xontaconen sca jahuen mama hinanrihbiquin. ²⁹ Jascajahibo nincacax ta Juaman haxenicabo jahuen yora bichi canishqui. Jahuen yora bihxon tsahoncanquin.

Cinco mil Jesusen pimahi

(Mt 14.13-21; Lc 9.10-17; Jn 6.1-14)

³⁰ Jesusen jato raanah catanipish Jesus qui jahuen raantibo joribihi. Joxon jaabaan hahtanipi yohixon jaabaan haxemataniipi yohirihbiquin jatihibi. ³¹ Yohihiboya Jesusen jato yohiquin:

—Mato rahsibi tantihi bonahue jano tsoabi yamahiton —jato jaquin. Cahi jahuibo hichahiya ta pinoxon bocabi tantiti hahtipahyamacannishqui. ³² Jano tsoabi yamahiton sca nontin bocani jaabo rahsibi. ³³ Jaabo cahi cahen hichaxon jiscanquin. Jato honancanquin. Jatihibi jema janinhax quetanpaquebahini cahax jaabo pari nocoti, jano nontin cahi janin. ³⁴ Nocoxon hicha tsamascabo Jesusen jisbonaquin. Coiranyamaha carnerobo behnocanahi quescapahbo jato jisquin. Jatohon shinaxon hicha jato haxemarihbiquin. ³⁵ Bepiscaiya sca hahqui joxon jahuen haxenicabaan yohiquin:

—Neno ta jahua yamahihqui. Bepi rihbi sca ta jaiqui. ³⁶ Jano huaiyahpabo jaiton jato raanscahue, hochoma jemabo janinxon rihbi jaton piti marohi cahabo —hahcanquin.

³⁷ Jascahahbo:

—Piti hinannahue, matonbi —jato jaquin.

—¿Non doscientos denario copi paan marohi catihin, jato pimanoxon? —hahcanquin.

³⁸ —¿Jahuentihi paan man jain? Jistannahue —jato jaquin. Jistani jahuex sca:

—Pichca rahan. Rabe yapa rihbi —hihcani.

³⁹ Jato jatihibi sca Jesusen yohiquin, cincuenta cincuentaboya cien joni rahsi jano huasi mipaxbihtaiton tsahonon. ⁴⁰ Jascari tsinquitax tsahocani cincuenta cincuentabo, cien cienbo. ⁴¹ Jaton pichca paan bihxon jaton rabe yapa rihbi bihxon nai bejisihnixon Papa yocaxon paan tehcapaquexon jahuen haxenicabo hinanscaquin, tsamajaquetaibo hinanpaquehahbo. Yapa rabe rihbi jatihibi hinanpaquemaquin. ⁴² Hinanah jatihixonbi pihi yanicachini. ⁴³ Paan tequeboya yapa tequebo tsinquirihbixon sca doce tasa bohasjacaquin. ⁴⁴ Paan pihibo cahen cinco mil bebobo. Hichaxon bi jatihitasa bocho texejacaquin.

Jesus jene benichi cahi

(Mt 14.22-27; Jn 6.16-21)

⁴⁵ Jaatian sca chini canoxon jahuen haxenicabo yohiquin, nontin nanetax Betsaida jema janin pohquejaquenon. Jaabo cahiya cahen tsamajaquetaibo Jesusen yohiquin xobon caresscatannon. ⁴⁶ Jato yohihax manan manixon Papa yocaqui cahi. ⁴⁷ Yamescaiya cahen nonti caresscai bi Jesus huesti main baneti. ⁴⁸ Nihuen tsahcahah huinacasquimahibo bi jaan jato jisquin. Xaba paqueri jaima sca jato qui cahi, jene benicanahi. Jato huinobahincatsihqui bi jaabaan meraquin. ⁴⁹ Jene benicahinquiranai jisish, Yoshin tah qui, hihquish sai saihhcani. ⁵⁰ Jatihixonbi jisish hihti raquecani.

—Jointi coshijanahue. Hea tah hen qui. Raqueyamanahue —jato jaquin. ⁵¹ Jato qui nontin nanetaiya cahen nihue tantiscas. Nihue tanticahinaiya hihti rahtescacani. ⁵² Paan tehcapaquexon jahuen coshi jan jato jismahipi bi honanyamacanquin, jaton shinan chahomahiya.

Genesaret janinhahbo Jesusen rohajahi

(Mt 14.34-36)

⁵³ Pohquejaquetax Genesaret main taxnati. Taxnaxon nonti nexacaquin. ⁵⁴ Nonti mehax bototaiton janohahbaan Jesus honancanquin. ⁵⁵ Honanax jatihibinco hishtocahini caxon hisinyahpabo jaton cacajatinin racatai hihuecanquin. Jano Jesus jai nincaxon jano becanquin. ⁵⁶ Jatihibinco jan cahi, hanitahma jemabo janin, hani jemabo janin, huenenaiton rihbi, hisinyahpabo bexon jano maronicabo tsinquitai hueneman jato racanquin. Racanahbo Jesus yocacaquin jahuen chopaquechon bocabi mehenoxon. Jaa mehehibo jatihibi ta rohanishqui.

7

Jahan noquen jointi rishtatibo

(Mt 15.1-20)

¹ Jaatian sca huishani honanbo betan fariseobo Jesus qui tsinquin, Jerusalem janinhax jahui honanbo. Tsinquin jahuen haxenicabaan pihi jiscanquin.

² Mechoquihxonma jaton mequen rishtayaxon texe jahuen haxenicabaan pihibo

jiscanquin. ³ Mechoquihyamaxon ta fariseobaan piyamahiqui, jatihibi judiobaan rihbi jascarihibiqui. Jaton xenibaan hahpahoni quescajaquin ta jacanihqui. ⁴ Jano piti maroti janinhax joxon ta nashiyamaxon piyamacaniqui. Hicha jascapahbo japahoni ta jacanihqui. Pinixon ta posillobo, poobo, yami quentibo qui jene jasiacanihqui. ⁵ Fariseobo betan huishani joi honanbaan sca Jesus yocaquin:

—¿Jahua jenquetsahin miin haxenicabaan noquen xenibaan hahpahoni quescajayamahiquin? Mechoquihxonma ta picanihqui. Jaton mequen qui hueotai hohchayabi ta picanihqui —hahcanquin.

⁶ Jascahahbo jato yohiquin:

—Ponte bi res ta mato qui yohuanquin Isaiasnen huishanishqui:

Nea jonibo jaton janan siripi hehqui yohuanai bi ta jaton shinan hocho bi res qui, hehon queenyamacani.

⁷ Papan joi haxemahicamaxon bi ta jonibaan joi honanmacanihqui. Yanca bi res ta hehqui bethipaquecanihqui

hah ta Isaiasnen janishqui. ⁸ Jonibaan hahpahoni quescajaquin hahnoxon tah man Papan yohini joi jenehi.

⁹ Jato jascaxon jato yohirihbiquin:

—Sirija ra tah man jai, maton xenibaan hahpahoni quescascanoxon Papan joi jenequin.

¹⁰ Moisesnin ta yohinishqui: Miin papahon queenhue, miin mamahon queenhue. Huetsa jan yohini ta nea qui: Tiromahi jahuen papa qui yohuanai joni tah man rehteti jai, jahuen mama qui tiromahi yohuanai rehtequin cahneyamaquin. ¹¹ Jaan jascajani que bi tah man matonbi yohihi: Maton papa, maton mama yohinahue Jaa hen mia hinanpanan ta Corban qui, hahquin. Corban ta Papa qui hinanah hihcatsihqui. ¹² Jascari yohuanmaxon tah man jaton mama hahxontima haxemahi, jaton papa hahxontima haxemahi. ¹³ Jascaxon tah man Papan joi pantehi, maton xenibaan hahpahoni quescajaquin tah man maton rihbi maton baquebo haxemahi. Jascapajahi tah man jai hicha —jato jaquin.

¹⁴ Jonibo quenarihbixon sca jato yohiquin:

—Hea nincanahue, jatihixonbi honannahue. ¹⁵ Jahuabi ta noque chicho quehama noque qui nanexon noque rishtajatimahiqui. Noquen jointinin non shinanaiton ta noque rishtajahiqui. ¹⁶ Hahan nincati pabinquiyahpaxon nincahue —jato jaquin. ¹⁷ Jato potabahinax xobohoh hihcohiton jan jato yohiha jahuen haxenicabaan yocaquin, min yohiha jahua hihcatsihqui, hahquin. ¹⁸ Yocaca jato yohiquin:

—¿Mato rihbi man honanti pishinain? Noque chicho quehamabo ta noque qui nanexon noque rishtajati hahtipahyamaquini. ¿Man honanyamahin? —jato jaquin, jatihibi pitibo hahan jointi rishtajatima sca janon. ¹⁹ Jaatian sca:

—Noquen jointi qui hihquihima bi ta poco janin res nanetihqui. Poco janin nanetax jaroma caini —jato jaquin.

²⁰ Jato yohirihbiquin:

—Noquen jointinin non shinanaiton ta noque rishtajahiqui. ²¹ Noquen jointinin tah non shinana: tiroma shinambo, benejomabo betan hihti, queejomabo betan hihti, yometsothi, joni rehteti, benoyahpabo betan hihti, queeyahpabo betan hihti ²² caibaan jahuequibo bichinti, tiromajati, taranti, tsiniti, notsi notsi, joni qui tiromahi yohuanti, yohitimabohi, honanmabohi. ²³ Jascapa tiromabo rahsi tah non noquen jointinin shinanxon hahcai rishtascanoxon —jato jaquin.

Jesus nincacoinni nahua haibo

(Mt 15.21-28)

²⁴ Jato jascahah janohax Tiro jema janinbo sca caresscai. Nocotax bi jan jano hihqui honanyamahahbo xoboho hihcocani. Hihcohax bi jenquetsahax jonetimahi. ²⁵ Jesus nocotai joi nincacax huesti haibo jahui, jahuen haibo baque pishca yoshiman hihbojahi. Jahuex Jesusen tahe qui betihihpaqueti. ²⁶ Jaa haibo ta judiobaan nahua hihpahonishqui, sirofenicabaan jena. Jahuen baque janinhax yoshir picoxonti jaan hihti yocaquin.

²⁷ —Baquebo pari pimanon. Baquebaan paan pihi bichinxon tah non hochitinin pinon potantimahi —hahquin Jesusen.

²⁸ —Jascari rahan, Hihbon. Jaabi ta baquebaan paquehi paan tomes misa namanxon hochitinin pihiqui —hahquin haibaan.

²⁹ —Jascarax tah min caresscatihi. Yoshin ta miin baque janinhax picoscai qui —haibo jaquin. ³⁰ Jan jascahah xoboho caxon jahuen baque bachihho racatai meraquin, siri scah.

Jesusen joyobo rohajahi

³¹ Jaatian sca Tiro janinbohax cahi Sidon jema nabebacahini, Galilea hian janin carihbihi, Decapolis maibo nabebacahini cahi. ³² Cahiton bi pabe joni Jesus qui hiocanquin. Pabehax bi joyorihbi. Jesusen mehenon sca yocaxoncanquin. ³³ Tsamajaquetai boma qui

pabe nihcahuancahuanquihnixon jahuen pabinqi janin jahuen metoti niaquin. Toshbanhahxon jahuen jana mehequin. ³⁴ Nai bejisihnixon jointi xecahihnixon:

—Efata—hahquin. Quehpemehhue hihcatsihqui. ³⁵ Jascahiya jahuen pabinqi quehpemehscai, jahuen jana janpequehtax yohuani siriscai. ³⁶ Jaa rohascaiya cahen Jesusen jato hihti yohiquin tsoabi yohiyamanon. Jan hihti yohihah bi hashoan hicha sca yohicanquin. ³⁷ Hihti rahtetax yohuancani.

—Jatihibijaquin ta sirijahiqui. Pabehibo nincamaquin. Joyobo yohuanmaquin —hihcani.

8

Cuatro mil Jesusen pimahi (Mt 15.32-39)

¹ Jascasca jaiya hicha joni tsamajaquetaiya jahua pitimahiya jahuen haxenicabo que-naxon jato yohiquin:

² —Nea tsamajaquetaibahon tah hen shinanai. Quimisha neten sca hehbetan hihxon bi ta jahuabi piyamacanihqui. ³ Pihaxma jaton xobon cahabo raanah ta bahin mehax jaton yora yosmajaquexihcanehqui, caibo rihbi hocho quehabo —jato jaquin. ⁴ Jascaha jahuen haxenicabaan:

—¿Jenquetsahaxon non nea jonibo pimatihin, neno tsoabi jihueyamahiton? —hahcanquin.

⁵ —¿Jahuentihi paan man jain? —jato yocaquin.

—Siete rahan —hihcani. ⁶ Tsamajaquetaibo sca jaan yohiquin, main tsahonon. Jaton siete paan bihxon Papa yocaxon tehcapaquexon jahuen haxenicabo hinanquin, jonibo sca hinannon hihxon. Bihxon sca jato hinanpaquécancanquin. ⁷ Yapa romishin huestibo rihbi cahen jaabo jai. Jaa bihxon Papa yocaxon jato hinanmarihbiquin. ⁸ Hinanah pihhi yanicahincani. Texehi tequebo tsinquirihbixon siete tasa bohasjacaquin. ⁹ Cuatro mil jonibo jano hihqui bi jato pimaxon cahabo jato mascacaquin. ¹⁰ Jaatian sca jahuen haxenicaboyabi nontin nanetax Dalmanuta main sca cahi.

Hahan honanti yocacahtaibo (Mt 16.1-4; Lc 12.54-56)

¹¹ Fariseobo sca ta Jesus qui jonishqui. Joxon Jesus yohuanquihnquin, joi bichinanancatsihquin. Papan hinanah hahan honanti jan jato jismanon hihxon yocacanquin.

¹² Jascahiboya jointi hihti xecahihnixon jato yohiquin:

—¿Jahua jenquetsahin nea rahma jihuetai jonibaan hahan honanti jiscatsihquiquin? Yohicoin tah hen matojai: jahuabi hahan honantibi ta mato jisimatimahihqui —jato jaquin. ¹³ Jato banescaax nontin nanerihbihax ramiho quexa sca cahi cahi.

Fariseobo qui coirameti yohihi (Mt 16.5-12)

¹⁴ Caquin bi piti boti shinanbehnocanquin. Huesti paan res nonti janin jai. ¹⁵ Coirametaibo jato yohiquin:

—Jisnahue. Fariseobaan hahan paan soohihmati qui raquenahue. Herodesnen hahan paan soohihmati qui raquenahue —jato jaquin. ¹⁶ Jaa jan yohihi jaabo rahsibi sca yocacahcani:

—Non paan yamahaia cahra noque yohihihquin —hihcani. ¹⁷ Jascajaquin shinanaibo honanxon Jesusen sca jato yocaquin:

—¿Jahua jenquetsahin man paan yahahi yocacahnananain? ¿Man jiscoinyamaparihin? ¿Man honancoinyamaparihin? ¿Maton shinan chahoma sca quin? ¹⁸ ¿Beroyahpaxon bi man jisyamahin? ¿Pabinqiyahpaxon bi man nincayamahin? ¿Cinco mil jonibo pimanoxon pichca paan hen tehcapaquehiya texehi teque tsinquirihbixon jahuentihi tasa man bohasjahoquin? ¿Man shinanyamahin? —jato jaquin.

¹⁹ —Doce rahan —hihcani.

²⁰ —¿Siete paan cahran, hahan hen cuatro mil pimahiya texehi teque tsinquixon jahuentihi tasa man bohasjahipiquin? —jato jaquin.

—Siete rahan —hihcani.

²¹ —¿Man honancoinyamaparihin? —jato jaquin.

Betsaida benche Jesusen rohajahi

²² Betsaida jema janin sca nococani. Nocotaiboya benche joni Jesus qui caibaan hiocanquin. Hioxon hihti yocacanquin, mehaxonhue hahquin. ²³ Yocacah benche metsonxon hiobonahi jemama qui cahi. Benchen bero qui toshbanhahxon mequeman mehaxon sca yocaquin:

—¿Min jisyamabiresain? —hahquin. ²⁴Jari jisxon:
 —Jihui nihcahuanai quescapahbo ta hen joni jisi —hahquin. ²⁵Jaatian sca jahuen bero meherihbihah coshichinxon jisribiquin. Siriscaxon jatihibi sca jisquin sirijaquin. ²⁶Jahuen xobon sca jan catannon:
 —Jema janin hihquihaxma catanhue —Jesusen jaquin.

Mia tah min Cristo qui Pedro jai
(Mt 16.13-20; Lc 9.18-21)

²⁷Jaatian sca jahuen haxenicaboyabi Jesus cahi, Cesarea de Filipino mai meha jemabo janin sca. Caquin jato yocaquin:

—¿Hea tsoa hihqui shinancaniquin? —jato jaquin.

²⁸—Nashimanica Juan yamanica tah qui hih ta caibo jaiqui. Elías yamanica tah qui hih ta caibo rihbi jaiqui. Papan joi yohipahoni yamanica tah qui hih ta huetsabo rihbi jaiqui —hihcani jahuen haxenicabo. ²⁹Jaan sca jato yocarihbiquin:

—¿Maton cahran? ¿Hea tsoa hihqui shinan man jain? —jato jaquin.

—Mia tah min Cristo qui —hahquin Pedronen.

³⁰—Tsoabi jascajaquin yohiyamanahue —jato jaquin Jesusen.

Jan mahuayaxihqui Jesusen yohihi
(Mt 16.21-28; Lc 9.22-27)

³¹Jaatian sca jato sirijaquin yohiquin:

—Hea noque baque ta tiromajayaxihcanihqui. Hehon ta queenyamayaxihcanihqui hanibo, sacerdote hapobo, huishani honanbo. Hea ta rehteyaxihcanihqui. Rehtehipibo bi tah hen quimisha netenax hahquirihbi hueniyaxihqui —jato jaquin. ³²Jahuabi joi jonexonma jato jascajaquin. Jesus quenabohanxon sca Pedronen yohiquin:

—Jascari yohuanyamahue —hahquin. ³³Rabejaquexon jahuen haxenicabo jisxon Pedro yohiquin:

—Jascayamahue. Hea janinhax catanhue, Satanas. Papan shinanai quescajaquinma bi jonin shinanai quescajaquin tah min shinanai —hahquin.

³⁴Jahuen haxenicaboya tsamajaquetai jonibo nincaqui jonon sca jato quenaquin. Jato quenaxon:

—Hehchon jocatsihxon tah man matobi man queenaima sca man hahtih. Hea rehte- hibaan bi tah hen heen Hihbo jenetimahi hihnahue, nete tihibi jascanahue. Jaatian tah man heen jihuetaho jatih. ³⁵Non mahuamis hihquibo ta mahuatihiqui. Hehqui hiname- hxon heen joi siri nincacoinaibo ta rehtehah bi jihuetihiqui. ³⁶¿Mai jatihobi hihbojahax bi mahuatax jahuaya sca man banetihin? ³⁷¿Hahquirihbi tehihnoxon non copijaquin jahua hinantihin? ³⁸Rahma jaibo ta tsini tsinihibo qui, hohchapan baquebo. Hehqui hihtimahpai joni qui tah hen hea rihbi hihtimahyaxihqui. Heen joi qui hihtimahpai joni qui rihbi tah hen hea noquebaque hihtimahyaxihqui Papan yonotibo betan Papan shinanya jahuex jato qui hihtimahpi —jato jaquin.

9

¹Jascajaxon:

—Mato ta hen yohicoinal: jahuen coshin Papan jihuemahi joresscai jisyanoxon caman ta texe neno nichibo mahuayamayaxihquiqui.

Jesus xabayahpacahini
(Mt 17.1-13; Lc 9.28-36)

²Jato jascahah seis neten sca hihxon Pedro, Jacobo, Juan jaabo rahsi Jesusen boquin. Hani mahchi jato maniquihquin jaabo rahsibi. Jatoyabi maniscaax jaton jisnonbi huetsapahcahini. ³Jahuen chopa xabareneni joxoshamani. Jascapa joxojahti ta tsoanbi main jihuetai pahtsanicon hahtipahyama hiqui. ⁴Elías yamanica betan Moises yamanica sca jato qui cainax Jesus betan yohuan yohuani. ⁵Yohuanaibaa bi Pedronen sca Jesus yohiquin:

—Maestron, noque neno hihqui ta siri qui. Quimisha tapasnonhue. Mina huesti, Moisesnina huesti rihbi, Eliasnena huesti rihbi —hahquin. ⁶Jahua yohiti honanyamahax jascari yohuani. Hihti rahtecani. ⁷Jato bochiqui cahen nai cohin maracahti. Nai cohin chicho quehax sca yohuani jai:

—Nea ta hen hihti queenai heen baque qui. Jaa nincanahue —hihqui. ⁸Nincaxon jisbohanrenenxon bi tsoabi jisyamacanquin. Jesus huesti jano jai meracanquin. ⁹Jaa pecaho sca mahchi mehax botopaquexon Jesusen jato hihti yohiquin:

—Man rahma jisí tsoabi yohiyamanahue. Hea noquebaque hihquipish bi hahquirihbi hueninon caman yohiyamanahue —jato jaquin. ¹⁰Jan jascahah tsoabi yohiyamacanquin.

Hihquipish bi hahquirihbi huenitihi jan hihqui bi jahua hihcatsihquiquin hihquish jaabo rahsibi yocacahanancani. ¹¹ Jesus sca yocacanquin:

—¿Jahua copi Elías pari ta jotihiqui huishani honanbaan jaiquin? —hahcanquin. ¹² Jaan sca:

—Hihcoini. Elías pari joti jai. Jatihibi rohajahi jahui. Hean sca hen mato yocanon: ¿Jahua yohihi nea huishani joi jaiquin? Noquebaque ta hihti tiromajayaxihcanehiqui, hosan hosan rihbi ta jayaxihcanehiqui. ¹³ Mato ta hen yohihi. Elías ta moa joresscanehiqui. Jahuiton bi ta jaabo queenai quescajaquin jaabaan janishqui jayaxihquibo Papan huishani quescajaquin —jato jaquin.

Yoshinyahpa beronan rohajahi
(Mt 17.14-21; Lc 9.37-43)

¹⁴ Jahuen haxenicabo qui nocoxon sca jato qui hicha tsamajaquetaibo meracanquin. Huishani honanbo jato betan joi bichinanaiton jiscanquin. ¹⁵ Jesus jahui jisish rahtetax jatihibi tsamajaquetai jonibo sca hahqui bishquihihcainxon hicotancanquin. ¹⁶ Jaatian sca jaan jato yocaquin:

—¿Jahua yohuan man jato betan jain? ¹⁷ Yocacah sca tsamajaquetaibo meha huestichin yohiquin:

—Heen baque ta hen mihqui hihuehahqui, Maestron, joyo yoshiman hihbojani quen. ¹⁸ Jan janoxon shinanaiton bi ta hueran paquehihqui. Bacox jancharahicahini. Jahuen xeta yeres yeres hahquin. Jahuen yora jestancahini. Picoxonhue hah hen miin haxenicabo jaah bi ta hahtipahyamacanaxqui —hahquin.

¹⁹ —Nincayosmabon, jascapahbo tah man qui. ¿Jahuentiho basi hen mato betan jatihin? ¿Jahuentiho basi hen mato tenetihin? Neno hehqui hihuenahue —jato jaquin. ²⁰ Hahqui hihuescacanquin. Jesus meraxon cahen tiroma yoshiman beronan tastahihmaquin. Tastahihquish maihi taramehcanahi, bacox jancharahiquish. ²¹ Jahuen papa Jesusen yocaquin:

—¿Jahuentiho basi nescari jihuescaiquin? —hahquin.

—Baque pishcabihaxbi rahan. ²² Hicha coti ta chihi janin hueranrahsihiqui, jenenencana rihbi hueranquin rehtecatsihquin. Hahtipahxon noque yanapanhue noquehon shinanxon —hahquin jahuen papan.

²³ —¿Hahtipahxon nan? Shinancoina joni jisi ta jatihibi jati hahtipahti qui —hahquin Jesusen. ²⁴ Yoshinyahpaton papa sca coshin yohuani:

—Hen ta hen shinancoina. Hen hashoan sca nincacoionnon hea yanapanhue —hahquin.

²⁵ Hicha bishquihihcainquiranax jahuex tsamajaquetaibo jisxon tiroma yoshin Jesusen yohiquin:

—Joyo yoshiman, pabe yoshiman. Mia ta hen yohihi. Jahuen yora mehax picohue, jahuentianbi hahqui joyamascanxon —hahquin Jesusen. ²⁶ Sai saihihquish coshin tastahihmahax picoti. Beronan mahuati quescapi racati. Jatihibi sca yohuanquehancani: —Mahua sca ta jaiqui —hicanani. ²⁷ Jesusen sca metsonxon huenihihnihah huenisca. ²⁸ Xoboho Jesus mapescaya sca jahuen haxenicabaan jaabo rahsichin yocaquin:

—¿Jenquetsahpahin non picoti hahtipahyamahaquin? —hahcanquin.

²⁹ —Jascapa tah man Papa yocaxon res picotihi. Huetsajaxon tah man jenquetsahaxon bi picotimahi.

Jan mahuayaxihqui jan yohirihbihi
(Mt 17.22-23; Lc 9.43-45)

³⁰ Janohax Galilea mai nabecahini bocani. Jaabo jano cahi tsamajaquetaibaan honanti Jesus queenyamahi. ³¹ Jahuen haxenicabo res haxemabonanxon jaabo rahsi nihquihinquin. Jato nihquihinquin yohiquin:

—Jaton jonibaan hea bihnon ta hea hinanyaxihcanehiqui. Bihxon sca tah hea rehteyaxihcanehiqui. Rehtehabbo sca tah hen quimisha neten hihquish hahquirihbi hueniyaxihqui —jato jaquin. ³² Jan jascahah bi honancoinyamacanquin. Yocacahcatsihqui bi raquecani.

Tsoa non coshi quin hihquibo
(Mt 18.1-5; Lc 9.46-48)

³³ Capernaum jeman sca nococani. Xobohoxon sca Jesusen jato yocaquin:

—¿Jahua yohuan man jaonahin? —hahquin. ³⁴ Yocacah bi jahua hihyamacani. Tsoa non hashoan coshi quin yocacahananahonahax bi rahma jahua hihyamasci. ³⁵ Tsahoxon jahuen doce joni quenaxon sca jato yohiquin:

—Bebocatsihqui joni ta chiniti jaiqui, jatihixon bi yononica —hahquin. ³⁶ Huesti baque pishca bihxon naponbi nichinxon hicobehnanxon jato yohiquin:

³⁷—Nescapa baque pishca heen janen johue hahcai jonin ta hea rihbi johue hahquiqui. Hea johue hahcai jonin ta hea que ma bi hea raanni johue hahquiqui —jato jaquin.

Noque panteyamahibaan ta noque yanapaniqui
(Mt 10.42; Lc 9.49-50)

³⁸Juaman sca yohiquin:

—Huesti joni tah non merahipiqui, Hihbon. Miin jane yohixon tiroma yoshinbo picohi. Noque betan ta nihyamahiqui. Noque chibanyamahiya ta non jascajayahue hahquipiqui —hihscai Juan. ³⁹Jesusen yohiquin:

—Jascajaquin yohiyamanahue. Heen jane yohixon coshin hahcai joni ta hahcax res sca hehqui tiromahi yohuantimahiqui. ⁴⁰Noque panteyamahibaan ta noque yanapanihqui.

⁴¹Yohicoïn tah hen mato jai: mia Criston joni copi hahxoncatsihquin mia jene pishca xehamahi joni ta copijacoinyaxihquiqui.

Huetsa joni hohchamamis hihxon jan haxemahi
(Mt 18.6-9; Lc 17.1-2)

⁴²Nescapa hea nincacoinai baque pishca hohchamahibo ta Papan hihti tiromajayahiqui. Jascapahbo macanya tenexxon jenenencanya potahah sirijaquin shinantimahi bi ta Papan casticana hihti tiromajaquin shinanyaxihquiqui. ⁴³Miin mequeman tiromajanicahax mextehiihue. Mento jihuenish bi queyoyamanox manatah tiroma que ma bi ta rabe mequenyabi nocayosma chihî janin potahah hihti tiroma bi res qui. ⁴⁴Jano ta jaton xena jahuentianbi mahuayamahiqui. Jaa chihî rihbi ta jahuentianbi nocayamahiqui.

⁴⁵Miin tahen tiromajanicahax taxtehiihue. Tanto jihuenish bi queyoyamanox manatah tiroma que ma bi ta rabe taheya chihî janin potahah mia hihti tiromascatihi. ⁴⁶Jano ta jaton xena jahuentianbi mahuayamahiqui. Chihî rihbi jahuentianbi nocayamahi. ⁴⁷Miin beron tiromajanicaxon miin bero tsecahue. Huesti beroya jihuenish queyoyamanox manatah tiroma que ma bi ta rabe beroya chihî janin potahah mia hihti tiromascatihi. ⁴⁸Jano ta jaton xena jahuentianbi mahuayamahiqui, chihî rihbi jahuentianbi nocayamahi. ⁴⁹Tashi nepocah quesca ta jatihibi jonibo chihin jatiqui. ⁵⁰Tashi ta siri qui. ¿Tashi jahuiyamascaïton jahuïnon hihxon jenquetsahaxon man hahquirihbi jahuïjatihin? Tashiyahpa jihuenahue. Joni huetsa betan siripi jihuenahue.

10

Noquen hihquihinti potatima
(Mt 19.1-12; Lc 16.18)

¹Janohax caresscai Judea mai janin, Jordan hoque quexa rihbi. Jano rihbi hahqui tsamajaquecani. Jan hahrasihî quescajaquin sca jato haxemarihibiquin.

²Hahqui joxon sca tanacatsihquin fariseobaan yocaquin:

—¿Bebaan jahuen haibo potati joi yama quin? —hahcanquin.

—¿Jahua Moïsesnin huïshanishquin, man jascajanon? —jato jaquin.

⁴—Jascajati queenaïbo ta Moïsesnin yohinishqui: Bebaan ta jahan jahuen haibo potati quirica huïshaxon jahuen haibo potatihiqui —hihcani.

⁵Jesusen sca:

—Man jointi chahomahi copi ta jascajaquin huïshanishqui. ⁶Nete jamenohi tian ta bebo betan haibo Papan jato jonijanihqui. ⁷Jaa copi ta jahuen papaya jahuen mama jenebahinax jahuen haibo betan sca bebo jihueti canicah qui. ⁸Jaabo rabehax bi huesti yora sca jihueti. Rabe hihyamascai, huesti yora sca jai. ⁹Jaa copi jaabo rabe Papan huestijaha tsoanbi potamayamaxahtahi man —jato jaquin. ¹⁰Xoboho sca jahuen haxenicabo jaa joi hahquirihbi yocacahti. ¹¹Jaan sca jato yohiquin:

—Jahuen haibo potaxon huetsa haibo bichi joni ta jahuen haibo qui hohchati jihueti-hqui, tsinihi. ¹²Jahuen bene potaxon huetsa bebo bichi haibo rihbi ta jahuen bene qui hohchati jihuethiqui, tsinihi —jato jaquin.

Baquebo Jesusen yocaxonai
(Mt 19.13-15; Lc 18.15-17)

¹³Jaatian sca Jesus qui baquebo hihuecanquin jato mehaxonnon. Hihuehiton jahuen haxenicabaan yohiquin:

—Jascapahya joyamanahue —hahcanquin.

¹⁴Jascajahibo jisish sinaxon jato yohiquin:

—Panteyamanahue, hehqui baquebo behabo. Jascapah ta Papan jihuemati qui.

¹⁵Nincanahue hen mato yohinon: baque pishcaten Papa Dios hihbojamahi quesca-jayahamahax tah man Papan jihue janin jahuentianbi catimahi. ¹⁶Jato jascjaxon baquebo hicotanxon mehaxon Papa yocaxonquin.

*Jesusen coriquiyahpa yohuanquihnai**(Mt 19.16-30; Lc 18.18-30)*

¹⁷ Carihbihi bi huesti joni bishquihhahinxon hahqui raboxonen tisquihahpaquexon yocaquin:

—¿Jenquetsahax hen queyoyamanox manatihin, maestro siripan? —hahquin.

¹⁸ Jesusen sca yohiquin:

—¿Jahua copi min hea siripan hahcain? Tsoabi ta sirima qui. Papa huesti ta siri qui. ¹⁹ Papan joi tah min honanai. Rehteyamahue. Tsiniyamahue. Yometsohyamahue. Caibo qui quesahi yohuanyamahue. Paranson bichinyamahue. Miin papa, miin mama nincacoinhue —hahquin.

²⁰ —Beronan pishcahax bi ta hen jascari jihuescai —hihqui yocanica. ²¹ Sirijaquin bejixson sca jahan queenxon Jesusen yohiquin:

—Huesti tah min pishinparihi. Jatihibi miin jahuequibo maromaxon jahuabijomabo coriqui hinantanhue naihoq uehax bi sca min hicha bi res jayaxahnon. Jascajatanax joribihue hehbe canoxon —hahquin. ²² Jan jascajaha jahuen jahuequibo hichahi copi met-samarenenax masa shinanbahini caresscai. ²³ Jato jispaquexon sca jahuen haxenicabo Jesusen yohiquin:

—Jahuequi hichayahpa joni jano Papan jihuemahi janin hihquiti ta tee bi res qui —jato jaquin Jesusen. ²⁴ Jan jascajaha jahuen haxenicabo rahtecani. Rahtetaiton Jesusen jato yohirihbiquin:

—Jano Papan jihuemahi janin hihquiti ta tee bi res qui, heen baquebaan. ²⁵ Hahua xohmox bero chirehuinti tee que bi ta jahuequi hichayahpa joni jano Papan jihuemahi janin hihquiti hashoon tee qui —jato jaquin. ²⁶ Jan jascajaha hihti rahtetax yohuancani:

—¿Jascahiya tsoa non queyoyamanox manatihin? —hihcani. ²⁷ Jato jisxon Jesusen yohiquin:

—Jonibaan hahtipahyamahi bi ta Papan hahtipahiqui. Papan ta jatihibijati hahtipahiqui —jato jaquin.

²⁸ —Jise. Jatihibi jenebahinax tah non mihbetan sca cahi —hihscai Pedro.

²⁹ —Hen mato yohinon nincanahue. Jahuen xobo, jahuen huetsabo, jahuen chocabo, jahuen mama, jahuen papa, jahuen baquebo, jahuen huaibo, jaa rahsi hea copi, heen joi siri copi rihbi jenebahinai jonin ta jan potabahinai quescahpabo rihbi bihyaxihquiqui. ³⁰ Bih ta jatihiqui xobobo, huetsabo, chocabo, mamabo, baquebo, huaibo. Huesti jenebahinnixon ta cien sca bihribiyaxihquiqui. Rahma tahni ta jascapahbo bihyaxihquiqui, caibaan sca jato tiromajacatsihquin jatsanjanon. Papan jihuemahitian rihbi ta queyoyamanox manatihiqui. ³¹ Hicha bebocanahibo ta chinijaquexaxihquiqui. Chini-taibo ta beboyaxihquiqui —jato jaquin.

*Jan mahuayaxihqui Jesusen yohirihbihi**(Mt 20.17-19; Lc 18.31-34)*

³² Jaatian sca bahin cahax, Jerusalem janin bocani. Jesus bebohi. Jano cahiya ta jan honanmahibo rahtecannishqui. Chibanaibo rihbi raquecani. Hahquirihbi jahuen doce joni quenabohanson jaa huinoyaxihquibo jato yohiquin.

³³ —Jisnahue. Jerusalem janin tah non cahi. Jano ta sacerdote hapobo, huishani honanbo rihbi hea hinanyaxihcanihqui. Hinanahbo ta Rehteti ta jaiqui hihxon nahuabo jaabaan sca hinanyaxihquiqui. ³⁴ Hea hosanson ta hehqui toshbanhahxon rishquixon rehteyaxihcanihqui. Rehtehipi bi tah hen quimisha neten hihquish hahquirihbi hueniyaxihqui —jato jaquin.

*Jacobo betan Juan yocacatai**(Mt 20.20-28)*

³⁵ Jaatian sca Zebedeon baque rabe Jacobo betan Juan Jesus betanbi pecantaba cahi, yohuancanahi:

—Non mia yocacai noque hahxonhue, Maestron —hahcanquin.

³⁶ Jaan sca:

—¿Jahueja mato jaxonti man queenain? —jato jaquin.

³⁷ —Min jihuemahi tian noque tsahomaxahnue, huetsa mia mecayaho, huetsa mia memiho —hahcanquin.

³⁸ Jesusen jato yohiquin:

—Man yocacai tah man honanyamahi. ¿Hean xehahi mocani man maton rihbi xehati hahtipahin? ¿Hahan hea nashimahiton mato rihbi nashimaha man teneti hahtipahin? —jato jaquin.

³⁹ —Tenequin rahan —hihcani.

—Hean xehahi mocani tah man maton rihbi xehatihi. Hahan hea nashimahiton ta mato rihbi nashimayaxihcanihqui. ⁴⁰ Hea mecayaho tsahomati hihboma tah hen qui, hea memiho rihbi. Jano tsahonica rahsi ta jano tsahotihqui —jato jaquin. ⁴¹ Jacobo betan Juan jascaraiya nincaxon jahuen diez jonibo jato qui rainyamacani. ⁴² Jato quenaxon Jesusen yohiquin:

—Nahua hapobaan ta jaton jonibo jihuematih bi yono yonohihqui man tah man honanai. Jaton patorobaan rihbi jato coshin yonohi ta man honanrihbihi. ⁴³ Mato tah man jascapabo jatimahi. Maton hapocatsihqui ta maton yonoti jatihiqui. ⁴⁴ Maton cacannicatsihqui ta jatihibichin teexonnica jatihiqui. ⁴⁵ Jascarihbih tah hen hahxoni joniqui, yonohima. Hicha jihuetaho tah hen mahuati joniqui, jaton ribin copijaxoni quesqari.

Bartimeo benche Jesusen rohajahi
(Mt 20.29-34; Lc 18.35-43)

⁴⁶ Jericó jema janin sca nococani. Jahuen haxenicaboyabi cahax hicha joniboya rihbi janohax cahiya, bahimahhuan hihquicahuanax Timeon baque Bartimeo tsahoti. Bartimeo cahen benche joni, coriqui yocanica joni. ⁴⁷ Jesus jano huinotai yohihahbo coshin quenaquin:

—Hehon shinanhue, Jesus, Davidinin baquen —hahquin.

⁴⁸ Jascaraiton:

—Jascaramahue. Netehue —hahcanquin hichaxon. Jascahahbo hashoan coshin sca yohuani:

—Hehon shinanhue, Davidinin baquen —hahquin. ⁴⁹ Nihrenenxon Jesusen yohiquin:

—Jaa quenannahue —jato jaquin. Benche joni sca quenacanquin:

—Jenimahax huenihue. Mía ta quenamahiqui —hahcanquin. ⁵⁰ Jahuen rahcoti potabahnax histon huenicahuanax Jesus qui cahí. ⁵¹ Nocotaiton Jesusen yocaquin:

—¿Mía jahuejaxonti min queenain? —hahquin.

—Heen bero hea rohajahue, Hihbon —hahquin benche jonin.

⁵² —Caresscatanhue. Hihcoijnahquin shinanax tah min rohascai —hahscaquin Jesusen. Rohascaxon Jesus chibanbonascaquin.

11

Jerusalen janin Jesus nocoti
(Mt 21.1-11; Lc 19.28-40; Jn 12.12-19)

¹ Jerusalem hochoma sca Betfagé jema patax Betania jema patax rihbi Olivos mahchi janin nocoxon Jesusen jahuen haxenica rabe raanquin.

² —Man jano nichí hoque jema janin catannahue. Nocoxon tah man cabacho baque nexa meraxihqui, hahan tsoabi cahtsahoyamaparihi. Pecahax jaya jonoxannahue. ³ Jahuejanoxon man jascajahin jaiboya, Noquen Hihbo ta nea pishinihqui. Rahmabi ta mihqui raanrihbinoxihquiqui, hahnahue —jato jaquin.

⁴ Caxon cabacho baque xehqui patax nexa meracanquin. Janibi bahin nichí meracanquin. Meraxon pecacanquin. ⁵ Pecahiton jano nichibaan jato yocaquin:

—¿Jahua man jain? ¿Jahuejanoxon man cabacho baque pecahin? —hahcanquin. ⁶ Hihbaan yohiha quescajaquin sca jato yohicanquin. Yohiha jeenhahscanin, jaabo jaya catannon. ⁷ Cabacho baque sca Jesus qui hihuecanquin. Cabacho jaton chopabo cajanxon sca Jesus cahtsahoncanquin. ⁸ Caibaan rihbi jaton chopo bahinbi cacajaquin. Caibaan rihbi nahue chian pehi bihtanxon bahinbi cacajaquin.

⁹ Bebohibo betan chini cahibo coshin yohuanbonacani:

—Hahxonhue, Papan. Nete Hihbaan raanah ta jahuiqui. Miin shinan siri jaa hinanhue, Papan. ¹⁰ Noquen xohta Davidinin jahuen jihuetaho jihuemapahoni quescajaribiquin ta janoxihquiqui, jahuen shinan Papan hinanah. Jaa hahxonhue, Naihoh quehan.

¹¹ Jerusalem jema janin hihquihax sca Papan xoboho Jesus hihcohi. Jatihibi jispaquehax moa bepiscaya Betania jema janin caribihi jahuen doce jonyabi.

Bimijoma jihui qui Jesus yohuani
(Mt 21.18-19)

¹² Hoxashinahax mohiyahtax sca Betania janinhax cahax pihan hihqui. ¹³ Hoxoxon bimi jihui pehiyahpa jisxon bimijoma hin hihquish jisi cahí. Jihui qui nocoxon jahuabi merayamaquin pehi rahsi, jahuen bimiti tian nocorihyamahiya.

¹⁴ —Jahuentianbi sca miin bimi tsoanbi piyamanoxihnon —hahscaquin. Jihui yohiquin jan jascajahí jahuen haxenicabaan nincaquin.

*Jesusen yometsohbo camahi**(Mt 21.12-17; Lc 19.45-48; Jn 2.13-22)*

¹⁵ Jerusalem janin nocorihbihax Papan xoboho hihcohi. Hihcoxon janoxon maro-hibo cainmaquin. Maromahibo picomaquin. Coriqui mahnenanaibaan misabo behon-janaquin. Nobex maromahibaan tsahotibo rihbi behonjanaquin. ¹⁶ Jaa xobon tsoabi jaton jahuahora papihibo huinomayamaquin. ¹⁷ Honanmaquin sca jato yohiquin:

—Jatihibi mai mehabaan janoxon yocati xobo ta heen xobo jayaxihquiqui. ¿Jascapa huisha yama quin? Jai bi tah man jano yometsohtaibo joneti xobo man heen xobo jai —jato jaquin. ¹⁸ Jan jascajahi sacerdote hapobo betan huishani honanbaan nincaquin. Jatihibi tsamajaquetai jonibo jahuen honanmati joi qui rahtetaiya hahqui raquexon jenquetsahaxon non jaa rehtetihin hihxon shinancanquin. ¹⁹ Bepiscaiya jema janinhax bocani.

*Jihui xanahi**(Mt 21.20-22)*

²⁰ Yamequirihbi huinonbahinxon tapon caman bimi jihui xanascai meracanquin. ²¹ Jan yohuanipi shinanrihbixon sca Pedronen yohiquin:

—Jise, Hihbon. Hoa bimi jihui min hahqui yohuanipi ta pehua sca jaiqui —hahquin.

²² Jesusen jato yohiquin:

—Papahon shinancoinnahue. ²³ Hen mato yohinon nincanahue: jahuen jointinin shinancoinyamaxonma bi shinancoinai jonin nea mahchi nescajaquin yohihiya, Huen-itax, hian janin hueramehhue, jan yohihi quescabijaquin ta Papan hahxontihiqui. Jan yohihi Papan jascascajatihi shinancoinaiya ta Papan hahxontihiqui. ²⁴ Jaa copi tah hen mato yohihi. Papa yocaxon man yocacaibobi man bihtihhi shinancoinnahue. Jascajaquin yocaxon ta man bihtihhi. ²⁵ Nihxon Papa yocaxon mato qui hohchataibo shinanyamas-canahue. Maton Papan rihbi naihoxon man hohchataibo shinanyamascanon. ²⁶ Jascapa man shinanyamascatihi bi man shinanparihiya ta maton Papan rihbi naihoxon man hohchataibo shinanbehnotimahihqui —jato jaquin.

*Jesus hapohax yohuani**(Mt 21.23-27; Lc 20.1-8)*

²⁷ Jerusalem janin sca boribicani. Papan xoboho Jesus nichiya hahqui bocani sacerdote hapobo, huishani honanbo, judiobaan hanibo. ²⁸ Hahqui caxon yocacanquin:

—¿Jahuaxon min jascajahin? ¿Tsoan jascajahue hahca min jascajahin? —hahcanquin.

²⁹ —Mato rihbi ta hen yocacai. Man hea yohihiya tah hen jahuaxon hen nescajahi hean rihbi mato yohitihhi. ³⁰ ¿Tsoan raana Juaman nashimapahonishquin? ¿Papan nan? ¿Jonibaan nan? Hea yohinahue —jato jaquin.

³¹ Jaabo rahsi sca yocacahnancani:

—Papan rahan, hih non jaiya ta jaan sca noque yocatihiqui, Papan raana Juaman nashimahiya jahua jenquetsahin sca man jaa nincacoinyamanihquin? ³² ¿Jonibaan rahan, hih cahra non jatihin? —hihcani tsamajaquetai jonibo qui raquetax. Papan joi yohinica Juan jai jatihixonbi shinanai copi jato qui raquecani. ³³ Yocacahnancanxon Jesus yohican-quin:

—Non tah non honanyamahi —hihcani.

—Hean rihbi ta hen mato yohiyamahi, jahuaxon hen nescajahi —jato jaquin Jesusen.

12*Tiromajaquin teexonnica**(Mt 21.33-46; Lc 20.9-19)*

¹ Jaa patax queha joi sca Jesusen jato yohiquin:

—Huesti jonin cahen huai banahan. Banaxon chiquequin. Chiquexon macan quencha-jaquin, bimibo jentsinnoxon. Janoxon huai coirannoxon sca tapojascaquin.

Banaquin queyoxon sca caibo jahuen huai hinantahquin. Huai hihbo sca huetsa main cahi. ² Bimi tian jan hinantaho hihbobo qui jahuen joni raanquin, bimi texe hinanahbo. ³ Nocotaiton rishquixon jahuabi bimijoma raanscacanquin. ⁴ Mequen bi res nocotaiya huetsa jahuen joni sca raanrihbiquin. Nocotaiton mapo qui tsehuejaxon tiromajacanquin. ⁵ Huetsa jahuen joni rihbi hapon raanrihbiquin. Jaa rehtecanquin. Huetsa rihbi jascaja-canquin, caibo rishquixon caibo rehtequin.

⁶ Huesti sca jai, hahan jan shinanai jahuen baque huesti sca. Chini sca jaa jato qui raanquin, heen baque ta nincatihcaniqui, hihxon. ⁷ Nocotaiya hinantaho hihbobo yohinani: Nea ta jahuen papan huai hihboyaxihquiqui. Jaa rehtehi canon bonahue jahuen huai noquenah sca janon, hihcani. ⁸ Jaa bihxon rehtexon huai behro potacanquin.

⁹ ¿Jahueja jascapahbo huai hihbaan jatihiquin? Joxon ta hinantaho hihbobo rehtheyaxihquiqui, huetsabo sca huai hinantahnoxon.

¹⁰ ¿Nescajaquin huishani joi man jisyamaniquin?

Tiroma ta jaiqui hihxon xobojahibaan potabohannihbo jihui ta hahqui xobojati jihui qui.

¹¹ Papan ta jascajahiqui. Jan jascajahi jisish tah non rahtetati —jato jaquin.

¹² Jahuen huai joi jan yohihi jatoya jan joihi honanxon jaa xecotancatsihquibo bi tsamajaquetaibo qui raquetax jaa janinhax boresscacani.

Hapo copijati jaiquin hihquibo
(Mt 22.15-22; Lc 20.20-26)

¹³ Yohuanquihnahbo jaamahi yohuanaiton bihnon fariseoboya herodianobo sca raanquin. ¹⁴ Raanahbo hahqui caxon yohicanquin:

—Mian ta min ponte yohihi, Maestron. Non tah non honanai. Rabinxonma tah min honanmahi. Tsohqui raquexonma tah min jatihibi jonibo min yohihi. Jahuabi joi huetsajaxonma tah min ponte res noque yohihi. Papan joi ta min honanmacoinai. Cesaronen noque cobranah noquen copijati joi jaiquin? ¿Yamahihquin? ¿Non copijatihin? ¿Non copijatimahin? —hahcanquin.

¹⁵ Jaabo hihcoinicamahi yohuanai honanxon jato yohiquin:

—¿Jahuejanoxon man hea tanahin? Huesti coriquiya benahue hen jisnon —jato jaquin.

¹⁶ Huesti bohioya jato yocaquin:

—¿Tsoana hin, nea mapo? ¿Nea huisha cahran? —jato jaquin.

—Cesarona rahan —hihcani.

¹⁷ —Cesaronabo Cesaro hinanrihbinahue. Papanahbo Papa hinannahue —jato jaquin Jesusen.

Jan jascaraiya hahqui raquecani.

Non teehihtihin hihquibo
(Mt 22.23-33; Lc 20.27-40)

¹⁸ Saduceobo sca Jesus qui bocani. Tsoabi ta hahquirihbi huenitimahiqui hihquibo. Nocotax yocacahcani:

¹⁹ —Moisesnin ta noque huishaxonnishqui, Maestron. Jahuen huetsa baquejahaxma mahuataiya ta jahuen yononma jahuen chinipan bihtihiqui, jahuen bochan baque janon hahqui baquejanoxon hahquin huishaquin. ²⁰ Siete huetsabo ta janishqui. Beboquihahnen ta haibo bihnishqui. Bichish bi mahuati, baquejahaxma. ²¹ Jahuen chinipan sca ta jahuen yononma bihnishqui. Bichish bi mahuati, baquejahaxma. Jahuen jochica jascarihibi. ²² Siete rahsi jascari mahuati, baquejahaxma. Chini sca haibo rihbi mahuati. ²³ ¿Papan noque hahquirihbi huenihi tian jahuemehatona jaa haibo hihyaxihquiquin, siete jatihixonbi haibojani? —hahcanquin.

²⁴ Jesusen jato yohiquin:

—Papan huishamani joi honanyamahax tah man jascarai, jahuen coshi rihbi honanyamahax tah man ponte yohuanyamahi. ²⁵ Mahuataibo hahquirihbi huenihi tian ta Papan yonotibo naiho queha jai quescapahbo bebobo jayaxihquiqui huanohahmabo. Haibobo rihbi ta benayahpatimahiqui. ²⁶ ¿Mahuanihbo hahquirihbi huenitimahiquin? ¿Papan Moises yohini man jisyamaniquin, Moisesnin huishani janin hoa jihui namantiha pishca joibo jaiton? Papan ta Moises yohinishqui: Abrahanen Papa Dios tah hen qui, Isaacuen Papa Dios, Jacobon Papa Dios hahquin. ²⁷ Mahuataibaanama bi jihuetaibaan Papa Dios ta jaa qui. Jaamajaquin tah man shinanai —hahquin jato.

Non hihti nincati
(Mt 22.34-40)

²⁸ Jaatian sca huishani honan huesti jato pataxi jahui. Jaabo yohinanai nincaquin. Jesusen jato yohiquin sirijahi jisxon Jesus yocaquin:

—¿Papan yohini joi non jahuemeha hihti nincatihin? —hahquin.

²⁹ Jesusen sca yohiquin:

—Hihti nincati joi ta nea qui. Nincannahue, Israelibaan. Noquen hihbo Papa Dios ta jaa huesti hihbo qui. ³⁰ Miin Hihbohohon shinanhue miin jointiboyaxonbi, miin yoshinboyaxonbi, miin shinanboyaxonbi, miin coshiboyaxonbi. ³¹ Jaa pecaho ta nea qui. Mihbe jihuetaibohon shinanhue, mihmebi min shinamehti hihqui quescarihbijaquin. Nea rabe joi mentan ta hashoan hani joi yama qui —hahquin.

³² Jascajaha huishani honan joni sca yohuani:

—Ponte ta min jai, Maestron. Papa Dios huesti tah qui. Huetsa yamaha, jaa huesti. Hih-coin tah min jai. ³³Noquen jointiboyaxonbi noquen shinanboyaxonbi noquen coshiboyaxonbi noquen Papahon shinantixon, non noquebi shinamehti hihqui quescarihbiijaquin noquen hahbe jihuetaibohon shinanti ta Papa qui hinanti jatihibi mentan hashoan siri qui. Jatihibi hinábo rehtexon Papa qui hinanti mentan hashoan siri —hihqui.

³⁴Jan honanax yohuanai jisxon Jesusen sca jaa yohiquin:

—Papan jihuemati hochoma ta mia qui —hahquin.

Jaa pecaho yocati qui raquecani jatihibi.

Cristo yocacahtai: ¿tsoan baque hea quin?

(Mt 22.41-46; Lc 20.41-44)

³⁵Papan xobohoxon honanmahahnan Jesusen jato yocaquin:

—¿Jenquetsapahin huishani honanbaan nescajahiquin: Cristo ta David xohta qui hahquin? ³⁶Dios Yoshiman shinanmaha ta Davidininbi yohinishqui:

Papan ta heen hihbo yohinishqui: Hea mecayaho tsahohue, miin rahuibo hen mia namanjaxonnon caman.

³⁷Jaa yohihi, Heen hihbo, ta Davidininbi janishqui, jaanbi. ¿Jenquetsahax sca jahuen xohta hihtihiquin? —jato jaquin.

Coin coinxon hicha tsamajaquetaibaan nincacanquin.

Jaton haxemanicahbo Jesusen cahehi

(Mt 23.1-36; Lc 11.37-54; 20.45-47)

³⁸Honanmaquin jato yohirihbiquin:

—Huishani honanbo qui raquenahue. Chopa nenque sahuehax ta nihni costancaniqui. Janoxon maroti janin caibaan jato hapon hahti rihbi ta costancaniqui. ³⁹Jaho tsinquiti xoboho ta hashoan siribo tsahotibo rihbi queencaniqui. Fiesta tian ta jano hashoan cacannicabo tsahotai janin tsahocatsihcanihqui. ⁴⁰Haibo yononmanen xobo ta jahuen jahuequiboyabi bichincaniqui. Caibaan jato jisnon hihxon res ta chaijaquin Papa yocaniqui. Jascapahbo ta hashoan casticanyaxihquiqui —jato jaquin.

Yononmanen jan jai pishca hinani

(Lc 21.1-4)

⁴¹Jano Papa Dios hinanti coriqui naneti hoque tsahoxon jaton coriqui nanehibo Jesusen jisquin. Coriquiyahpa jonibaan ta hichaxon hicha coriqui nanecannishqui. ⁴²Jahuabijoma haibo yononma huesti joxon cahen nanequin, rabe coriqui pishca huesti soro copitai. ⁴³Jahuen haxenicabo quenaxon sca Jesusen jato yohiquin:

—Nincanahue, mato yohinon. Jatihibi coriqui nanehibo mentan ta nea yononmanen hashoan nanehiqui. ⁴⁴Hicha jaxon ta jaabaan nanecaniqui. Jahuabi jaxonma bi ta neatohon jan jai pishca queyobahiniqui nanequin —jato jaquin.

13

Papan xobo huaxeyaxihquibo

(Mt 24.1-2; Lc 21.5-6)

¹Papan xobohoh quehax cainaiton sca jahuen haxenica huestichin yohiquin:

—Maestron, yotihoparahbo macanbo, yotihoparahbo xobo jise —hahquin. ²Jesusen sca jaa yohiquin:

—¿Nea hihtihosi xobobo min jisn? Ni huesti macanbi ta huetsa cahchian cahtsahoyamascatihiqui. Jatihibi ta potapaqueyaxihcanihqui —Jesusen jaquin.

Nete queyoti jaonahi honanti

(Mt 24.3-28; Lc 21.7-24; 17.22-24)

³Picotax sca Papan xobo hoque tocan Olivos manan janin tsahotaiton Jesus yocacanquin Pedro, Jacobo, Juan, Andres, jaabo rahsichin.

⁴—Noque yohihue. ¿Jahuentian jascajayaxihcanihquin? ¿Jahua hahan honanti jayaxihquiquin, min noque yohiha quescabi janon? —hahcanquin.

⁵Jesusen jato yohiquin:

—Jisnahue. Mato parancanmis. ⁶Jaa ta hen qui hihquish ta heen janen joyaxihcanihqui hicha. Hicha jonibo ta paranyaxihcanihqui. ⁷Rehtenanaibo nincacax, hocho rehtenanaibo joi rihbi nincacax raqueyamanahue. Nete queyorihyamanon ta jascatihiqui. ⁸Nahuabo ta hahbe nahuabo betan rehtenantihiqui. Quiquin hapon jonibo ta huetsa quiquin hapon jonibo betan rehtenantihiqui. Huetsancobo ta mai mihuanayaxihquiqui. Piti ta yamayaxihquiqui pihan hihquibo. Jascaraiboya ta hohmis hohmisti pehocohitiqui.

⁹Matobi coiramenahue. Casticannicahbaan tananon ta mato hinanyaxihcanihqui. Haho tsinquiti xobohoxon ta mato rishquiyaxihcanihqui. Tinintibo bebon tah man

nihyaxihqui, quiquin hapobo bebon rihbi. Man tah man jato yohicoinyaxihqui. ¹⁰ Heen joi siri ta jatihibi jonibo pari yohiti jaiqui. ¹¹ Mato yahtanxon hinanaiya, jahua non jatihin hihxonma masa shinanyamanahue. Mato jaatianbi hinanai yohuan yohiyaxahnahue. Matonbi shinanaxma bi Dios Yoshiman yohuanmaha ta man yohuan yaxihqui. ¹² Huetsa jonin ta jahuen huetsabi hinanyaxihqui, rehtehahbo. Huetsa papan ta jahuen baquebi jascajaribiyaxihqui. Jaton papa, jaton mama rihbi rahuijaxon ta baquebaan jato rehtemayaxihqui. ¹³ Jatihixonbi ta mato jistahihmayaxihcanihqui man heen jane jai copi. Jascahahbo bi ta mahuanoxon caman tenehi joni hean teehihmayaxihqui.

¹⁴ Jan jano nihtima janin rahninti masajanica nichiton merahax mahchi quiri jabayaxahnahue, Judea mai mehahbon. Honanhue, nea quirica jisnican. ¹⁵ Xobo pemacanya janinhax jahuequi bihbahini xoboho hihcopaqueyamayahnhue. ¹⁶ Huai chian teetax rahcoti bichi joribiyamascayahnhue. ¹⁷ Tohoyabo betan xoma hahmahibo ta hohmis hohmisyaxihqui. ¹⁸ Matsi tianbi jascayamaxahcabo Papa yocanahue.

¹⁹ Papan jato jonijamenoni yamanish ta rahma caman tsoan jisyanambo tiromabo netebo jayaxihqui. Jaax ta jahuentianbi jascapa hahquirihbi jaribitimahiqui. ²⁰ Jaa netebo noquen hihbaan basimayama hiya cahen tsoabi baneyamahan. Jan caisnibohon shinanxon ta jaa netebo basimayamayaxihqui. ²¹ Jise, nea ta Cristo qui hihqui boya nin-cayamanahue. Jise, hoa tah qui, hihqui boya hihcoina shinanyamanahue. ²² Cristohaxma bi Cristohicamahi Papan joi yohihicamahibo rihbi ta jatihiqui. Hahan honantibo ya hahan rahtetibo ta mato jismatihiqui, hahtipahxon Papan caisaibo parannoxon. ²³ Jisnahue. Jascapahbo jatihibi jariyamanon ta hen mato yohiscai.

Noquebaque joyaxihqui

(Mt 24.29-35, 42-44; Lc 21.25-36)

²⁴ Jaa hihti tiromabo pecaho ta bariyahpanbi bari xabayamascatihiqui. Hoxne nete rihbi ta yamascatihiqui. ²⁵ Naihoh quehax ta huishibo paqueyaxihqui. Hani huishmabo ta bahinma sca cayaxihqui. ²⁶ Jaatian ta nai cohin tocan hihti coshi shinanya hihti xabatai hea noquebaque jahui hea jis yaxihcanihqui. ²⁷ Jaatian tah hen heen yonotibo raanyaxihqui. Raanah ta reboqui caxon, chiponqui caxon bari cainai quiri caxon bari hihqui qui quiri caxon jano nai chibechijaquetancahuanaiton caxon jahuen caisaibo tsiniquiyaxihqui.

²⁸ Pesto jihui jisquin hahcajaquin honannahue. Pesto pereocotax bochocohiya tah man jene tian rahma jahui man honanai. ²⁹ Jascajaribiquin hen mato yohihi quiesca sca jai jisxon hea noquebaque neno pishca sca jaonahi honannahue. ³⁰ Man honannon hihxon tah hen mato yohihi: rahma chini jihuetaibo queyorihyama jai bi ta hen mato yohihi quiesca sca jayaxihqui. ³¹ Naiya mai queyocahinai bi ta heen joi jascabayaxihqui.

³² ¿Jahuentian jascapahbo jayaxihqui? ¿Jahua neten, jahua hora? Tsoanbi ta honanyamahiqui. Papan naihoh quehabaan yonotibaan bocabi honanyamaquin. Papan baquen rihbi honanyamaribiquin. Papa huestichin honanquin.

³³ Jisnahue. Jahuentian jaa nete jotihiquin honanaxma coiramenahue. ³⁴ Huesti joni hocho catani jahuicama tah hen jatih. Jahuen xobo janinhax cacatsihxon cahen jahuen jonibo tee hihbomapaquequin. Huetsa jahuen tee, huetsa rihbi jahuen tee, jatihibi jaton tee jato hihbomapaquequin. Xehpoti coirannicah rihbi yohiquin coiranhue, hahquin. ³⁵ ¿Jahuentian xobo hihbo joyaxihqui? ¿Yamescaiya, yame pochinicon, hatapa queotaiya, xaba paquetaiya? Man tan man honanyamahi. Jaa copi coramenahue. ³⁶ Man shinanyamahi tianbi joxon hoxahiton mato meramis. ³⁷ Jatihibi jonibo hen yohihi quiescajaquin tah hen mato jai: coiramenahue.

14

Jesus bihti yohinanaibo

(Mt 26.1-5; Lc 22.1-2; Jn 11.45-53)

¹ Pascua fiestaya chahoma paan fiesta rihbi nocoti rabe nete pishinaiya cahen sacerdoté hapobo betan huishani honanbo yohinani:

—¿Jenquetsahaxon non Jesus paranxon bihtihin rehtenoxon? ² Fiesta jai tian bihtima ta jaiqui, hoa fiestajahi jonibo rehtenanmis —hihcani yohuani.

Haibaan Jesus hiniñahi

(Mt 26.6-13; Jn 12.1-8)

³ Jaabo jascarai bi Betania jema janin Jesus pihitahoti Simoman xoboho. Simon ta sipi pahayahpa japahonishqui. Pihitahoti huesti haibo jahui, hahan hininti nardo xeniyahpa pomoya, hihti copi bi res hahan hininti. Jahuen pomote retequebahinxon Jesusen mapo qui nardo xeni machiquin. ⁴ Machicaiya caibo rainyamahi:

—¿Jahuejanoxon nea hahan hininti xeni jascajaquin yohyoquihquin? ⁵ Jaa nardo xeni maromaxon ta trescientos denarios, hashoan rihbi, bihquehaniqui jahuabijomabo sca coriqui pishca hinannoxon —hihcani, haibo qui rainyamahi.

⁶ Jesusen jato yohiquin:

—Jenenahue. ¿Jahua jenquetsahin man jaa jatsanjain? Jan hea jascaxonah ta siri bi res qui. ⁷ Mato tocan ta jahuabijomabo jascabihi jatihiqui. Man queenai tianbi tah man jato yanapanti hahtipahi. Huetsa tian ta mato tocan hea hihiyamascati. ⁸ Jan hahtipahi quescaja ta haibaan jaxonaxqui. Hea tsahonyahnoxon ta heen yora hea hininjahiqui. ⁹ Yohicoin ta hen mato jai: jatihibi mai janinxon heen joi siri yohixon ta jaan hea jascaxonni yohiyaxihcanihqui, jaa haibo shinanxon.

Judasen Jesus paraxon bihmahi

(Mt 26.14-16; Lc 22.3-6)

¹⁰ Jaatian sca Judas Iscariote cahi. Jaa cahen Jesusen haxemati huesti, sacerdote hapobo qui cahax jato Jesus hinanyahnoxon jato betan bexohi. ¹¹ Jan jascacatsihqui nincacax coincoinxon yohicanquin:

—Mia tah non coriqui hinantih —hahcanquin. Jenquetsahaxon hen hinantihin hihxon Judasen shinanscaquin.

Cristo shinanhahnan piti

(Mt 26.17-29; Lc 22.7-23; Jn 13.21-30; 1 Co 11.23-26)

¹² Chahoma paan fiesta pehocohti neten sca pascua carnero baque rehtehiboya Jesusen haxenicabaan yocaquin:

—¿Jahuerahnon non catihin, pascua fiesta mia pitijaxonnoxon? —hahcanquin.

¹³ Yocacah cahen rabe jahuen haxenicabo raanquin yohixon:

—Jema janin botannahue. Janoxon ta jeneyahpa poo maibehnani jahui jonin mato behchixihquiqui. Hahbe botannahue. ¹⁴ Jan hihcohi janin xobo hihbo yocanahue: Noquen maestron ta mia yohihiqui, Jahuerahnon hin, janoxon piti chique, janoxon heen haxenicabo betan hen pascua fiesta pinon. ¹⁵ Bochiquiha hani chique ta mato jismaxihquiqui, misayahpa, tsahotiyahpa, moa hihrescai. Janoxon noque pitijaxontannahue—jato jaquin.

¹⁶ Raana jema janin nocoti bocani. Jan yohihi quescabijaquin meracanquin. Pascua fiesta sca pitijaxoncanquin.

¹⁷ Bepiscaiya jahuen doceyabi Jesus nocoti. ¹⁸ Pihhi tsahoxon jato yohiquin:

—Man honannon hihxon tah hen mato yohihi: mato quihua huestichin ta hea bihmahiqui, hehbetan pihhi huestichin.

¹⁹ Masa shinanxon jatihixonbi yocapaquecanquin:

—¿Hea hen quin? —hahcanquin.

²⁰ —Heen doce quihua huesti tah qui. Hen poseman netinai tason qui ta jaan rihbi hehbetanbi jahuen poseman netiniqui. ²¹ Hea yohihi huishani joi jai quescari tah hen mahuanoxihqui. Hahraai hih ta jatihiqui, hea bihmahi joni. Jahuentianbi jonijayamaha ta jaa hashoan siribiresquehanihqui —jato jaquin.

²² Pihanan sca posen bihxon Papa yocaxon tehcapaquexon jato hinanpaquequin.

—Bihnahue. Nea ta heen yora qui —hahquin. ²³ Tason rihbi sca bihxon Papa yocaxon jato hinanquin. Hinana jatihixonbi hahqui xehaquin.

²⁴ —Nea ta heen jimi qui. Hicha jonibaan hohcha copijaquin tah hen heen jimi potaxihqui. Mahuaquin tah hen mato hahxonbahinai. ²⁵ Yohicoin tah hen mato jai: nea xehati tah hen hahquirihbi xehayamascati. Janoxon Papan jihuemahi janinxon pari ta hen behna sca xehayaxihqui —jato jaquin.

Pedro paranahxihqui

(Mt 26.30-35; Lc 22.31-34; Jn 13.36-38)

²⁶ Papa qui behuahax sca Olivos manan janin boribicani. ²⁷ Janoxon sca jato yohiquin: —Jatihixonbi tah man hea potabahinnoxihqui, huishani joi jai quescajaquin: Carnero coirannicah ta hen rehtetih carnerobo potojahtani jabisihcani. ²⁸ Hihqui bi hahquirihbi huenihah tah hen hea pari Galilea main cayaxihqui, man chini canon —jato jaquin.

²⁹ Pedronen sca yohiquin:

—Jaabaan jatihixonbi mia potahi que bi tah hen heen mia potatimahi —hahquin.

³⁰ —Yohicoin ta hen mia jai: hatapa rabe coti queori jaima tah min heen joni hihtima min quimisha coti yohinoxihqui nea yamebi —Jesusen jaquin. ³¹ Jascajaha coshin sca yohuani: —Hea miayabi rehtehibaan bi tah hen miin joni hihtima hen yohitimahi —hihqui. Jatihibi sca jascarih.

Getsemani huai chianxon Jesusen yocacai

(Mt 26.36-46; Lc 22.39-46)

³² Getsemani janeya huai janin sca bocani. Nocoxon sca jahuen haxenicabo yohiquin: —Nenobi tsahopaquenahue, hen Papa yocatannon.

³³ Jascaxon Pedro, Jacobo, Juan, jaabo rahsi boquin. Hihti masa shinascaquin Jesusen. Rahte rahteti.

³⁴ —Heen jointiboyabi tah hen bena benatai, hahan mahuati bena tah hen jai. Nenobi banexon coirannahue —jato jaquin.

³⁵ Hogue pishca cahax beho racaxon Papa yocaquin, janoxihquibo jatimajati yocaquin.

³⁶ —Papan, hea janoxihquibo jayamanoxahnon jahue, jatimajati hahtipahxon. Mian tah min jatihibi hahti hahtipahi. Jaabi hea queenai quescayamahi bi mia queenai quescahue —hahquin.

³⁷ Joribixon jaabo hoxahiton meraquin. Hoxahiton meraxon Pedro yohiquin:

—¿Min hoxayamahin, Simoman? ¿Huesti hora pishca min coiranti hahtipahyamahin?

³⁸ Coiranhanan Papa yocannahue mato hohchati queenmayamahabo. Maton shinaman man coshiti shinanai bi tah man shinan coshi yamahi —jato jaquin.

³⁹ Hahquirihbi caxon Papa yocarihbiquin. Jan yocacah quescajaquin yocarihbiquin.

⁴⁰ Joribixon sca jato hoxahiton merarihbiquin, jaton bero quextojaqueti. Yocacah bi jahua yohiti honanyamacanquin. ⁴¹ Jahuen quimisha coti sca catani joribixon jato yohiquin:

—¿Man tanti tantihi hoxaparihin? Senen ta jaiqui. Hora ta nocoscaiqui. Hea noquebaque ta hohchayahpabo jonibo hinannoxihquiqui, bichibo hihxon. ⁴² Huenitax canon bonahue. Jisnahue, hea bihmanica ta jahuiqui.

Jesus menexxon bohobo

(Mt 26.47-56; Lc 22.47-53; Jn 18.2-11)

⁴³ Jan jascajahi betanbi Judas nocoti, jahuen doce quihua huesti. Hicha joni machitoyahpabo huinoyahpabo rihbi hahbetan becani. Sacerdote hapobaan raanah becani. Huishani honanbo betan judiobaan hanibaan rihbi raanah becani. ⁴⁴ Jato betan bexohax bihmanica jato bebobi jahui. Hahan Jesus honanahbo jato yohibenana:

—Hen hicotannoxihqui joni tah qui. Jaa bihxon coiranxon hiotannoxahnahue —jato yohibenani jahui. ⁴⁵ Nocotax res sca Jesus qui joxon:

—Hihbon —hahxon hicotanquin. ⁴⁶ Hicotanaiya Jesus bihcanquin.

⁴⁷ Jesus bichiboya jaa patax nichí huestichin jahuen machito tsecaxon sacerdote hapon yonoti reraquin bi jahuen pabinqui res paxtebahinquin. ⁴⁸ Jesusen sca jato yocaquin:

—¿Yometso bihquin hahcajaquin man hea bichin, machitoyahpa joxon, huinoyahpa rihbi joxon? ⁴⁹ Netetihibi Papan xobohoxon honanmahanan hen mato betan hihrahihi bi tah man hea bihyamahipiqui. Jaabi huishani joi jai quescabi janon tah man nescajahi —jato jaquin.

⁵⁰ Jato jascajanon jatihixonbi jaa potabahini jahuen haxenicabo jabati.

Jabatai beronan

⁵¹ Huesti beronanan cahen jahuen rahcoti res sahuexon Jesus chibanquin. ⁵² Jaa rihbi sca bichibaan bi jahuen rahcoti potabahinax chopanma sca hishtocanahi jabati cahi.

Tsinquixon Jesus cahehobo

(Mt 26.57-68; Lc 22.54-55, 63-71; Jn 18.12-14, 19-24)

⁵³ Sacerdote hapo janin sca Jesus hiocanquin. Sacerdote hapobo, judiobaan hanibo, huishani honanbo jatihibi jano tsiniquicani. ⁵⁴ Hiohibo bi hochoxon Pedronen jato chibanbonaquin sacerdote hapon xobo jemanhihti janin hihconoxon caman. Jemanhihtin sca sacerdote hapon yonotibo betan pechihí tsahoti.

⁵⁵ Xobohoxon cahen sacerdote hapobo betan tsinquitaibaan jatihixonbi Jesus qui yohuancointi joi benacanquin, cahexon rehtemanoxon. Benaxon bi merayamacanquin.

⁵⁶ Hahqui yohuancoinihcamahe quesahi yohuanaibo hichahi. Jaa joiya huesti yohuancoinyamacani. ⁵⁷ Caibo nihinahtax hahqui yohuancoini quescari quesahi yohuani.

⁵⁸ —Nea mequeman xobojanihbo Papan xobo tah hen potapaqueyaxihqui. Quimisha neten potahipixon tah hen huetsa rihbi sca xobojayaxihqui, mequeman hahcahma sca, hih ta jaipishqui noquen nincanonbi —hihcani.

⁵⁹ Jascaraibaan bi jaa joiya huesti yohuancoinyamacani.

⁶⁰ Naponbi nihxon sca sacerdote hapon Jesus yocaquin:

—¿Min jahua yohiti yamahin? ¿Jahua yohuan neabo mihqui jaiquin? —hahquin.

⁶¹ Jascahah bi jahua hihyamahi. Neteti. Sacerdote hapon yocarihbiquin:

—¿Mia min Cristo quin? ¿Mia min noquen Papan siripan baque quin? —hahquin.

⁶² —Jaa tah hen qui. Coshiyahpaton mecayaho hea noquebaque tsahotai tah man jisayaxihqui. Nai cohin tocan jahui rihbi ta man hea jisayaxihqui —jato jaquin Jesusen.

⁶³ Jan jascajahiya sacerdote hapon sca jahuenahbi jahuen chopa huaxabahinxon yocaquin:

—¿Jahua copi non hashoan rihbi hahqui yohuanti benaparitihin? ⁶⁴ Jan tiromahi Papa qui yohuanai ta man nincascai. ¿Jahuejati man shinanain? —hahquin.

—Rehteti ta jaiqui —hihcani jatihibi.

⁶⁵ Caibo hahqui toshbanhihcchini. Jahuen bemanan beracohxon rishquixon yocacquin:

—¿Tsoan mia rishquihiquin? Noque yohihue —hahcanquin.

Sacerdote yonotibaan sca bihxon rishqui rishquirihbiquin.

Pedro paranahti

(Mt 26.69-75; Lc 22.56-62; Jn 18.15-18, 25-29)

⁶⁶ Naman jemanhihti janin Pedro nichiya sacerdote hapon yonoti haibo jano cahi. ⁶⁷ Pedro pehchihi jixxon bejisquin sirijaxon yohiquin:

—Mia rihbi tah min Nazaret janinha Jesus manahi nihراسي —hahquin. ⁶⁸ Jascajaha jeenhiyamahi:

—Jahua rah tah min jai. Min yohuanai ta hen honanyamahi —hihqui. Jemanhihti xehpoti janin sca Pedro nich cahiya hatapa queoscai. ⁶⁹ Jan cahi jixxon yonoti haibaan jano nichibo sca yohiquin:

—Jaa ta jato betan nihnicah qui —hahquin. ⁷⁰ Haibaan jascajahi bi Pedro jeenhiyamahi. Jascama ta qui hihresi. Jaa pecaho pishca jano nichibaan sca Pedro yohirihbiquin:

—Hihcointi tah min jato betan nihnicah qui. Mia ta min Galilea mai meha qui —hahquin.

⁷¹—Hen yohuancoinyamahiya Papan hea rehtenon. Papan hea jiscoinah tah hen yohuancoina. Man yohihi joni tah hen honanyamabiresai —jato jaquin. ⁷² Jahuen rabe coti sca hatapa queoti. Queotaiya cahen Jesusen yohiha joi Pedronen shinanscaquin: Hatapa rabe coti queori jaima tah min heen joni hihtima min quimisha coti yohinoxihqui. Jaa joi shinanax hihti benatax huaohihscai.

15

Pilatonen Jesus yocacai

(Mt 27.1-2, 11-14; Lc 23.1-5; Jn 18.28-38)

¹ Xaba paquescaiya sacerdote hapobo, judiobaan hanibo, huishani honanbo, jaabo rahsibi tsinquitax yohinani. Jesus menexxon hioxon Pilato hinancanquin. ² Pilatonen sca yocaquin:

—¿Mia min judiobaan quiquin hapo quin? —hahquin.

—Min yohihi quesca rahan —hahquin.

³ Hahqui tiromahi yohuanquin sca cahen sacerdote hapobaan joi tsamanscaquin. ⁴ Pilatonen sca jaa yocarihbiquin:

—¿Min jahua yohiti yamahin? ¿Mihqui hicha yohuanquin joi tsamanaibo min nincayamahin? —hahquin. ⁵ Yocacah bi Jesus jahua hihyamascaiya Pilato rahteti.

Jesus rehtetijahibo

(Mt 27.15-31; Lc 23.13-25; Jn 18.38-19.16)

⁶ Pascua fiesta tian ta jan sipojani huesti Pilatonen jato picoxonpahonishqui, jaabaan yocacai huesti picoxonquin. ⁷ Jaton quiquin hapo potacatsihquin, rehtenaxon huetsa jonibo rehtehiton jan sipojanibo jai. Huesti cahen Barrabas janeya. ⁸ Tsamajaquetai jonibo mapexon sca, jan jato hahxonpahoni quescajaquin Pilatonen jato hahxonnon yocacquin. ⁹ Yocacatsihquibo bi jaan pari yocaquin:

—¿Judiobaan quiquin hapo hen mato picoxonti man queenyamahin? —hahquin.

¹⁰ Sacerdote hapobo notsi notsixon hinanai honanscaxon jascajaquin. ¹¹ Jascahah bi cahen sacerdote hapobaan tsamajaquetaibo yohuanquihnquin sinamaquin, Jesus yocaita shinanahbo. Sinaxon sca Jesusma bi Barrabas jan jato picoxonnon yocacquin. ¹² Jascajahiton Pilatonen jato yocarihbiquin:

—¿Barrabas picoxonti man queenaiya maton quiquin hapo hahcaibo joni cahran? ¿Jaa hean jahuejatihin? —jato jaquin.

¹³—¿Jihuin hueonhue —hahcanquin coshin bi res.

¹⁴—¿Jahua copi nan? ¿Jahua tiroma jaiquin? —jato jaquin Pilatonen. Jan jascahah bi hashoan coshin sca yohuancani:

—¿Jihuin hueonhue —hahcanquin. ¹⁵ Jenimahabo sca Pilatonen Barrabas jato picoxonquin. Jesus rishquimaxon, jihuin hueonnon hihxon, bihnahue jato jaquin.

¹⁶ Bihnahue hahca hapon xobo chicho sca sontarobaan Jesus hioquin, pretorio janeya xoboho. Jano hioxon sca hahbe sontarobo jatihibi quenacancuin. ¹⁷ Yancon chopa sahuemaxon moxa maitijaxon maimacancuin.

¹⁸ —Jihuehue, judiobaan quiquin hapon —hahcancuin hapojahicamaxon. ¹⁹ Jascjaxon jihui taxon marishquicancuin. Hahqui toshbanhihcani. Hapojahicamaxon hahqui raboxonen tisqueihahpaquēcancuin. ²⁰ Hosancuin queyosaxon yancon chopa pecaxon jahuen chopa sahuemacancuin. Sahuemaxon jihuin hueonoxon sca hioancuin.

Jihuin hueonaibo

(Mt 27.32-44; Lc 23.26-43; Jn 19.17-27)

²¹ Simon janeya joni cahchihoh quehax jahuex jano huinotaiton jahuen coros hiamacancuin. Jaa ta Alejandro betan Rufo jaton papa hihpahunishqui, Cirene mai janinhah.

²² Jano Gólgota jane jaiton hioancuin. Gólgota cahen mapo xaoya manan hihcatsihqui.

²³ Mirra rahoya vino mescoxon xehamacatsihquibaan bi queenyamahi. ²⁴ Jihuin hueon-sacancuin. Jahuen chopabo metisahcancuin. Tsoana banethiquin hihxon macan bero borasa qui nanexon chíchoha huetsa pari cainaiya huetsan bihnon, huetsa macan pari cainaiya huetsan sca bihnon.

²⁵ Bari hihinahtaiya hueoncancuin. ²⁶ Jahua copi rehtehiquin honanahbo hihxon quirica sca hueoncancuin. Judiobaan quiquin hapo, hihqui jaa quirica. ²⁷ Rabe yometsoh rihbi hueoncancuin, huetsa jahuen mecayaho, huetsa jahuen memiho. ²⁸ Jaatianbi ta huishani joi quesca sca janishqui: Hohchataibo betan hihqui shinaxon rehtehah ta qui, hihqui jaa joi.

²⁹ Jano huinotaibaan sca jaton mapo bose bosehichahinxon hosancuin.

—Heeen. Papan xobo potapaquehipixon tah hen quimisha neten hihxon jaa xahnen hen huenerihbiyaxihqui hih ta min jaiipiqui. ³⁰ Coros janinhax bototax mihmebi sca teehihhue —hihcani.

³¹ Sacerdote hapobo, huishani honanbo betan jascarihibi yohuani. Hosancancuin.

—Caibo teehihmaxon bi ta hahmebi teehihti hahtipahyamahi. ³² Criston, Israelibaan quiquin hapon, coros janinhax rahmabi botopaquequihranhue, botoquihranai mia jixxon non mia nincacoinnon —hihcani. Hahbe hueonahbaan rihbi hosancuin.

Jesus mahuascai

(Mt 27.45-56; Lc 23.44-49; Jn 19.28-30)

³³ Barin manan tsacahiya sca jatihibi mai bahquishihcainscai, bari racapaquenon caman. ³⁴ Bari racapaquetaiya sca Jesus coshin yohuani:

—Eloi, Eloi, ¿lama sabactani? —hahquin. Papan Dios, Papan Dios, ¿jahua jenquetsahin min hea jenescaín? hihcatsihqui. ³⁵ Jan jascahi nincaxon:

—Jisnahue, Elías ta quenahiqui —hahcancuin jano nichibaan. ³⁶ Hishtocahinxon huesti jonin xehati cachani qui taco quescapah maosaxon jihui taxo qui queonxon sananhinixon xehamaquin. Xehamaxon:

—Mananahue. Jaa botonnoxon Elías jahui non jisnon.

³⁷ Jaatian sca saisaihihquish Jesus mahuascai. ³⁸ Jaatianbi ta Papan xobo janin rontamehtai chopa chique huaxacahinnishqui, bochiqui janinhax naman caman. ³⁹ Jesus bebon nihxon jan jascari mahuatai jisish capitan sca yohuani:

—Hihcoini, nea ta Diosen baque qui —hahquin.

⁴⁰ Haibobaan rihbi ta hochoxon jisnishqui. Huetsa cahen María Magdalena, huetsa cahen María, hoa chinitai Jacoboya José jaton mama, huetsa cahen Salomé. Jano nihxon ta jiscannishqui. ⁴¹ Galilea janin Jesus nichiya cahen jaabaan jaa chibanpahonish. Jaa pimarihbihpahonish. Jesus betan Jerusalem janin jahuipi haibobo rihbi ta jano nihxon jiscannishqui, hichaxon.

Jesus tsahonaibo

(Mt 27.57-61; Lc 23.50-56; Jn 19.38-42)

⁴² Yantanscaiya cahen bahquish tantiti neten piyanoxon pitijacancuin, jaton pitijati neten. ⁴³ Jaa copi jahuen raque potahax Pilato janin caxon Jesusen yora Josepan yocaquin. Jaa José ta Arimatea janinhah hihpahunishqui hahbe hapobo tsinquinica, shinanyahpa joni. Papan jihuemahi jiscatsihqui jaan rihbi manaquin. ⁴⁴ Jesus mahuascai nincacax Pilato rahteti. Capitan quenaxon sca yocaquin:

—¿Mahua sca jaiquin? —hahquin.

⁴⁵ —Mahua sca ta jaaxqui —capitan jaiya jeenhiscascai, Josepan jahuen yora bihnon.

⁴⁶ Sábana maroxon Jesus botonpaquexon sabananen rahcoxon macan xanquen poquinipibo tsahon chicho racancuin. Macan taranxon sca tsahon quini behpoquin. ⁴⁷ Jan jano tsahonai ta María Magdalena betan Josepan mama Marian jisnishqui.

16

*Jesus teehihribihi**(Mt 28.1-10; Lc 24.1-12; Jn 20.1-10)*

¹ Tantiti nete huinoscaiya hiniñjahi canoxon hahan hininti marocanquin, María Magdalena, Jacobon mama María, Salomé, jaabo rahsibichin. ² Hahan semana pehocohtai neten sca xaba honanax yamequiribi tsahon janin bocani. ³ Yohuanbonacani:

—¿Hahan tsahon behpohipi macan tsoan noque taranbohanxontihiquin? —hihcanahi.

⁴ Jaa macan cahen hihtihosi. Jari jisxon moa taranbohanah meracanquin. ⁵ Tsahon chicho hihcoxon joxo tariyahpa beronan mecayaho tsahotai meracanquin. Merahax rahte rahtecani. ⁶ Jaan jato yohiquin:

—Rahteyamanahue. Man tah man Jesus benahi Nazaret janinha Jesus hueonipibo. Jaa ta huenitaxqui. Nenoma sca tah qui. Neno racanipi jisi benahue. ⁷ Yohihi sca botannahue: Mato rihbi canon ta Galilea main Jesus caresscaiqui. Janoxon tah man jaa jistihi, jan mato yohihipi quescabijaquin. Jahuen haxenicabo, Pedro rihbi yohitannahue —jato jaquin.

⁸ Yohihah rahte rahtetax tastahiquish tsahon janinhax picotax bishquihihcanahi bocani. Raquetax tsoabi yohibonahaxma bocani.

*María qui sanareneni**(Jn 20.11-18)*

⁹ Hihquipish bi hahan semana pehocohtai neten hihari huenitax roqui María Magdalena qui pari Jesus cainnish. Jaa haibo janinhah roqui siete tiroma yoshin jaan piconish.

¹⁰ Caxon qui jaa Marian Jesus betan nihcahchihibo huinihi huaohihquiton meraxon yohiquin:

¹¹ —Hahquirihbi ta teehihquiqui. Hen ta hen jistanai —hah qui jan jai bi qui hihcoinaí shinanyamacanquin.

*Jahuen haxenica rabe qui caini**(Lc 24.13-35)*

¹² Jaa pecaho roqui huetsapahax sca huetsa rabe qui caini, jemama qui cahiton. Jahuen haxenica rabe. ¹³ Jaabo rabechin qui caxon texe yohihahbaan bi hihcoinaí shinanyamarihbicanquin.

*Jesusen raantibo raanai**(Mt 28.16-20; Lc 24.36-49; Jn 20.19-23)*

¹⁴ Jaa pecaho sca roqui jahuen once qui cainrihbihi pihi tsahotaiton. Hihquipish bi hahquirihbi teehihscái jisxon yohihahbaan bi hihcoinaí shinanyamahiboya roqui jato hihti yohiquin, hihcoinaí shinanyamahibo copi, jaton jointi chahomahi copi rihbi.

¹⁵ —Jatihibi main caxon jatihibi jonibo heen joi siri yohihi botannahue.

¹⁶ Nincacoinaiton man nashimahibo tah hen teehihmatihi. Nincacoinyamahibo tah hen casticanyaxihqui. ¹⁷ Heen janen tah man caibaan tiroma yoshinbo picoyaxihqui. Joi behnapan ta caibo yohuanyaxihquiqui. ¹⁸ Ronobo bichish bi ta hisinyamayaxihcanihqui. Hahan mahuati paheyahpabo xehahax bi ta hisinyamayaxihcanihqui. Hisinaibo ta mequeman meheyaxihcanihqui rohahahbo.

*Jesus hinahihnascai**(Lc 24.50-53)*

¹⁹ Jato yohi sca jan jaiya qui noquen hihbo Jesus naihoxon Papan bihinihnish, jahuen mecayaho sca tsahonon. ²⁰ Jaabo sca ta jatihinco caxon Papan joi haxemacannishqui. Noquen Hihbaan ta jato yanapanquin hahan honantijaxonnishqui, jaabo hihcoinaí yohuanai honanahbo.

LUCAS

Lucasen huishani joi siri

Teofilon honannon jan yohihi

¹ Mihqui tah hen nea joi raanai, señor Teofilon. Neno jenques japahonishquin hihxon hichaxon huishati shinannihbaan bi tah hen hean sca huishaxon mia yohicatsihqui. ² Cristo jomenoni jisnicahboxon ta jahuen joi yohinicabaan noque jaa joi honanmascanishqui, jaabaan jisnixon. ³ Min honannon hihxon tah hen hean rihbi huishapaqueti shinanaí. Neateman pehocohnish rahma caman jenques jaiquin jatihibi honanquin sirijaxon tah hen huishaxon mia yohihi. ⁴ Jenquetsahpa yohuan jacoinnishquin min mian rihbi honancoinnon tah hen nea huishahi.

Nashimanica baquexo picoyaxihqui

⁵ Judea main Herodes quiquin hapo japarihiya ta Zacarías janeya joni janishqui. Noquen Papa noque yocaxonnica, jahuen joi haxemanicah. Abías baquebo betan teenica. Jahuen haibo ta Elisabet janeya janishqui, yocaxonnica Aaroman chini baque. ⁶ Jaa haibo betan bebo cahen rabebi pontejaquin shinanaibo, Papan yohini joibo nincacoinaibo. Papan yononi quescabijaquin hahcaibo. Jascajati ta jaiqui hihxon Papan yohihi quescabijaxon rabebichin jahua joibi pishinmayamaquin. ⁷ Jascapahbohax bi baquejomabo. Jahuen haibo baquayosma, yoxaboscai, jaa rihbi yosiboscai.

⁸⁻⁹ Hen mia yohihi quescari jaton coiranti nete nocotaiya cahen Abías baquebo Papan xobo coirani jaax bocani. Jaton tee hahqui jano Zacarías cahi. Papan xoboho hahan hininjati quetejatanhue hahca jano mapescai. ¹⁰ Chichoxon Zacarías huestichin quetejahiya bi ta jemanhihti janin texe jonibo tsamajaquenishqui. Quetejati hora nocotai nen jemanhihtinin tsinguijaquexon Papa yocacanquin. ¹¹ Janoxon quetejati janin nihxon sca, Papan yonoti hahqui sanareneni jahui Zacaríasnen jisquin. Jahuen hininjati pataxbi nihrenenai jisquin. ¹² Jisish rahte rahteti. Hihti raqueti.

¹³ —Raquyamahue, Zacarian. Min yocacai ta Papan nincaquihqui. Min hahqui baquejaha ta miin haibaan tohosaxon baque bihyaxihqui. Jaa pishca tah min Juan janeyaxihqui. ¹⁴ Jaa baque copi tah min jenimayaxihqui, hihti coincaini. Jan cainaiya ta hicha jonibo rihbi jenimayaxihcanihqui. ¹⁵ Papan jisí ta haniscaax shinanya joni sca jayaxihqui. Pahe xehayosma. Mae, hompa, jascapa pahebo xehayamaquin. Cainrihyamahiton bi ta Dios Yoshiman jaa hihbojayaxihqui. ¹⁶ Jaa copi ta hanisaxon jaan yohihah miin caibaan hichaxon jaton shinan ponteyaxihqui, jaton Papa Dios qui hinamehxon. ¹⁷ Jahuen hihbo bebohi ta miin baque nihyaxihqui. Elías yamanicator coshi shinanya ta nihyaxihqui. Jahuen yoshin siri Papan Elías hinanni quescajaquin rihbi ta jaa rihbi hinanah jaaya nihyaxihqui, jonibo shinan hinanbonahi nichí. Jaton baquebohon shinanahbo jato shinan hinanquin. Hihti sirijaquin shinan sca jaábo nincayosmabo yohibonaquin. Jaton Hihbo nincacatsihquibo jaábo hihxon ta jato yohibonayaxihqui —hahquin Papan yonotinin.

¹⁸ Jascari Papan yonoti yohuani jaiya:

—¿Min hihcainai hen honannon, jahua min hea jismatihin? Jise. Hea tah hen yosiboscai. Heen haibo rihbi yoxaboscai —hahquin Zacaríasnen.

¹⁹ Jaatian sca:

—Hea tah hen Gabriel qui, noquen Papa Dios bebon nihnicah. Yohitanhue hea Papan jaah tah hen mia yohihi jahui. Jaa copi tah hen mia joi siri yohihi. ²⁰ Hen mia yohihah nincahue. Joyo sca tah min jatihí. Hen mia yohihi nocoyaxahnon caman tah min yohuantimacahinscatihi, hen yohihah bi hihcainai shinanyamahax. Hen mia yohihi quescabi ta jayaxihqui, jahuen nete nocotaiya —hihqui Papan yonoti.

²¹ Zacarías piconon caman jaa manati jemanhihtinin jonibo nichí. Papan xoboho jan basihya rahtecani. ²² Jaatian sca picoscai. Picotax bi joyoscai, Jascabi yohuantimacahinxon behantanresquin. Jan behantan behantanaiya ta chichoxon Papan jismaha jan jahuaa jisbenanai honanscannishqui.

²³ Jaa pecaho sca jahuen xobon cati nete nocoscaiya jahuen xobon caresscai. ²⁴ Jahuen xobon jan nocotipi pecaho hahbetan hihquish jahuen haibo Elisabet tohoscai. Tohoxon bi pichca hoxne jahuen toho paxajaquin jisyamahabo. Tsoabi yohiyamaquin. ²⁵ Papan ta hea hahxonihqui. Jonibo tocan hen hihtimahyamascanon ta jaa queenai tianbi hea hahxonihqui, hihqui.

Jesus cainyaxihqui

²⁶ Jan Elisabet yohiho seis hoxne sca ta Nazaret janeya jema janin sca Papan yonoti canishqui, Papan raanah. Gabriel janeya, Papan yonoti. ²⁷ Jano cahax huesti haibo qui nocoti cahi. María janeya haibo. Bebaan honanahma. Jaa bihyaxihqui joni ta José janishqui, Davidinin chini baque. ²⁸ Nocoxon sca Papan yonotinin yohiquin:

—¿Min jascabi jayamahin, haibon? Mia ta noquen Hihbaan shinanihqui. Mihbetanbi ta hihquiqui —hahquin.

²⁹ Jan jascahah, haibo rahte rahteti. Jan jascarai jahua hihcatsihquiquin hihqui, jahuen jointi chicho res. ³⁰ Rahtetaiton sca:

—Raqueyamahue, Marian, noquen Papa ta mihon jenimahiqui. ³¹ Jise. Min tah min tohoscayaxihqui. Bebo baque bihxon sca tah min jaa Jesus janeyaxihqui. ³² Jaa ta shinanya joni bihyaxihquiqui. Papa naihoh quehaton baque tah qui hih ta jayaxihcanihqui. Jahuen xohta yamanica Davidinin jihuetahbo ta Papa Diosen jaa hinanyaxihquiqui, ³³ queyotaxma jan jascabi sca judiobaan quiquin hapo hihnon —hahquin Papan yonotinin.

³⁴ Jascahah Marian yocaquin:

—¿Jenquetsahaxon hen heen bene yamahi bi hen baque bihtihin? —hahquin.

³⁵ Jaatian sca:

—Dios Yoshiman ta mia hihbojahiqui. Papan coshi shinaman ta mia coiraniqui. Jaa copi ta min bihyaxihqui baque yohihi, Jaa ta Papan baque qui, Diosen baque, bihyaxihcanihqui. ³⁶ Jise. Miin tsabe Elisabet rihbi ta yoxabohax bi tohoyascai qui. Baquejoma hihpahnish bi ta jahuen seis hoxne tohoya sca jaiqui. ³⁷ Papan ta jatihbijati hahtipahiqui —María jaquin Papan yonotinin.

³⁸ Jascahah:

—Hea tah hen qui, hih ca hen jai sen, heen Hihbaan jihuetah. Min hea yohihah quescajaquin jan hea janon —hahquin Marian. Jaatian Papan yonoti caresscai.

Elisabet jisi María cahi

³⁹ Papan yonoti jascaripei pecaho Judea main sca histon cacatsihquish María caresscai. Mahchibo jano jaiton cahi, jan honanai jema janin nocoti cahi. ⁴⁰ Nocotax sca Zacarían xoboho mapeti. Min jascabi jayamahin, tsaben hahquin Elisabet hicotanquin. ⁴¹ Min jascabi jayamahin tsaben hahcai betan bi jahuen xahquin janin jahuen baquexo tehquexihtani Elisabetnin honanquin. Dios yoshiman hihbojaha sca Elisabet coshin yohuani:

⁴² —Hihti hahxon ta noquen Papan mia jaiqui. Miin xahquin janin jai baquexo ta jaan mia hahxoniqui. ⁴³ ¿Hea jahua que ma bi min heen hihbaan mama hihquish min hehqui jahuin? ⁴⁴ Hihcoin tah hen jai. Jise, min hea yohihi hen nincacai betan bi ta coincoinax heen xahquinhoh quehax heen baquexo tehquexihtanaxqui. ⁴⁵ Noquen Papan mia hinantjaxon yohihipi nincacoinax tah min hihti jenimascatihi —hahquin Elisabetnin.

⁴⁶ María sca noquen Papa qui siripi yohuani:

Mia tah min hihti siri qui, Papan, hih tah hen jai, heen jointiboyabi.

⁴⁷ Noquen Papa ta hea jihuemanicah qui. Jahan tah hen hihti jenimahi hih tah hen jai noquen Papa yohihi.

⁴⁸ Jahuen hina pishca res hen hihqui bi ta hehon shinanihqui. Hehon shinaxon jan hahxonai copi ta jayaxihquibo yohuancoinsca jayaxihcanihqui. Papan ta jaa hahxonnishqui hih ta jayaxihcanihqui hea yohihi.

⁴⁹ Jahuen coshi shinaman ta hea hihti hahxonihqui. Jaa ta Papa Dios coin qui.

⁵⁰ Jan yohihi quescabijaquin non hahcaiboya ta noquehon jascabijaquin Papan shinanihqui.

⁵¹ Jahuen mequen siripan hahxonquin ta jahuen coshi noque jismahiqui. Nincayosmabo ta jaan rabinmahiqui.

⁵² Hani quiquin hapobo namanjaxon ta jaton yohuanbo jato jenebahinmahiqui. Jahuab-orabojomabo rihbi ta mehehiqui, hihti meyayahpa quescapahbo sca jaábo.

⁵³ Pihan hihquibo rohahihrisanon jato piti siribo pimaxon bi ta hicha jahuequiyahpabo picatsihcanahabo jato camahiqui.

⁵⁴ Israeli baquebo hahxontijanixon ta jan yohini quescabijaquin noque yanapaniqui, noque jahuen jonibo quen.

⁵⁵ Abraham yohinixon ta noquen xohtabo rihbi sca hahxontijanixon jan yohini quescabijaquin hahxonscaiqui, jascabi sca janon hihqui María.

⁵⁶ Elisabet janin cahen quimisha hoxnebo sca María jihueti. Janohax res sca jahuen xobon caribiscái.

⁵⁷ Jan cahipi cahchiqui sca jahuen tsaben jahuen baque bihresscaquin, bebo baque pishca. Bichish, hihti jenimahi. ⁵⁸ Hahbe jihuetaibo betan jahuen jenabo rihbi jenimacani. Hahan shinanxon ta noquen Hihbaan hihti hahxonihqui, hihcani. ⁵⁹ Huesti semana huinoscaax jaya jahuen mama, jahuen papa cahi, jahuen jane huishamahi. Janoxon honantijati janin caxon, hahan judiobaan honantijahahbo hihxon jaton baquexo jismaquin. Janohahbaan sca:

—¿Jahuen papan janeya janon non Zacarías huishatihin? —hahcanquin.

⁶⁰ —Hahyamaquin rahan. Jahuen jane ta Juan qui —hihqui jahuen mama.

⁶¹ —Jaa janeya ta miin jenabo yamahihqui, tsoabi —hahscacanquin.

⁶² Jaatian sca jahuen papa cohantanquin yocacanquin:

—¿Mian min jahua janecatsihquin?

⁶³ Jahuen papan sca huishaquin hahcajaquin tabla pishca yocaxon bihxon, hahqui huishaquin. Jahuen jane ta Juan qui hahquin huishaquin. Rahte rahtescacani, jan huishahi jane jisish. ⁶⁴ Jaatianbi jahuen jana choyocahinax Zacarías yohuanscai.

—Hahxon tah min hea jai, Papan —hihscai. ⁶⁵ Jan yohuanscai nincacax, jaton hahbe jihuetaibo rahte rahtescai. Jenquetsahax jahuen baquexo jarescaiquin hihquish janohahbo yohuan chanicahaniboya sca Judea mahchi janinbo jihuetaibo jaya res yohuan yohuancani. ⁶⁶ Chanihibo nincaxon shinancanquin: Hahan Papan shinanai baque tah qui, Jenquetsahpa joni jaa jayaxihquiquin, hihxon shinan shinancanquin.

Zacarías yohuanni

⁶⁷ Dios Yoshiman hihbojaha jahuen papa yohuanai joi rihbi nincascacanquin. Jaa Zacarías yohuanni ta nesca qui:

⁶⁸ Hahxon tah min noque jai, Papan. Non tiromabohi copi noque casticanquin mahua-mathi bi tah min noquehon shinanxon hahqui paxacahuanti joni noque hinanscai.

⁶⁹⁻⁷⁰ Neateman miin joi yohinication janan min yohuanni quescabihi tah min rahma jai. Davidinin chini baque tah min noque hinanai, quiquin hapoxon noque jihuemahi jan jayaxahnon tah min noque hinanai.

⁷¹ Noquen rahuibaan noque hihbojapanan ta jaan noque xahbanjamayaxihqui. Noque jistahimahi jatihibi ta jaan pantetihiqui, noque jahuejayamascaábo.

⁷² Noquen xohtabohon shinanxon min jato hahxontijani quescabijaquin tah min noque hahxonscai, Papan. Min jato yohini quescabijaquin tah min noque hahxonscai.

⁷³⁻⁷⁴ Jaton rahuibo qui hen jato xahbanjamahah ta raqexonma sca miin chini baquebaan hea teexonyaxihqui hah tah min noquen xohta Abraham janiqui, Papan, noque yohiquin.

⁷⁵ Jaa yohicoinnixon tah min noque hahxoncoinscai, Papan. Sirijaquin shinanhahnan sca non janon. Tiroma shinanjomabo non jihueti hahtipahscanon. Mahuanoxon caman non jascabi sca mia shinanhahnan jihuenon tah min noque hahxonai, Papan Papa Dios jaxon, jahuen baquexo rihbi sca Zacaríasnen yohiquin:

⁷⁶ Naihoh queha Papan joi yohinica ta mia hihtihi, baquexon. Noquen Hihbo beboxoni tah min nihyaxihqui, jonibo yohiquin shinan hinanbonaquin. Noquen Hihbo nincati shinan jato hinanbonaquin.

⁷⁷ Jatohon shinanxon noquen Papan jaton hohcha sohuaxona jahuen baquebo sca jihuenon tah min jato honanmabonayaxihqui.

⁷⁸ Noque jisi noque qui botopaquexon ta Xaba Hihbaan noque xabajayaxihqui.

⁷⁹ Bahquish chian jihuetaibo ta xabajaxonyaxihqui. Mahuati qui raqueti jihuetaibo ta xabajaxontihiqui, hahan jihueti bahin sca nichíbo hihqui Zacarías.

⁸⁰ Jascapa cainnish cahen jahuen baque hanicahuani. Jahuen shinan caícanahi. Jahuen Hihbaan joi yohiti nete janon caman cahchiho res nichí jihueti.

2

Jesus cainai

(Mt 1.18-25)

¹ Jaatian ta Cesaro Agostonen jahuen jonibo yohinishqui, jatihibi jonibaan jane huishapaguehahbo. ² Jascajati jan yohimenoni tah qui, Siria main Cirino jaton tintinti hihpahoni tian. ³ Cesaronen jascajaquin yonohah ta jaton jemabo janin jatihibi jonibo bocannishqui, jaton jane huishahahbo. ⁴ Galilea mai janinhax José rihbi cahi, Nazaret jema janinhaxbi. Judea main cahax, jahuen xohta Davidinin jema janin nocoti cahi. Jaa jema ta Belen janeya qui. Davidinin chini baquehax copi ta jano canishqui. ⁵ Tohoyascai jahuen haibo hihyaxihqui ta María hahbetanbi canishqui. Jaan jaa bihyaxihqui copi jahuen jane rihbi jahuen benenahyabi huishahbo. ⁶ Jano nocoxon Marian jahuen baque jan

bihnoxihqui honanscaquin. ⁷ Jano jai xobo bocho rahsi jaiya jahuenrahnon hoxatimahiya ganado xobohoxon sca jahuen bihmenohi baquexo bihxon, chopan rahcoxon, vacan piti racanxonti janin racanquin.

Carnero coirannicahbo qui Papan yonotibo cainai

⁸ Jaatian rihbi ta jaa maibo janin carnero coirannicahbo janishqui. Jatón xobo hochó copi ta pastochianxon jatón carnerobo coiranshinacannishqui. ⁹ Yame coiranaítón jato qui Papan yonoti cainquihrani. Papan xaba rihbi jato janin xabarenenaiya rahte rahtecani.

¹⁰ —Raquyamanahue. Joi siri mato yohihi tah hen jahui, jatihibichin nincacax jenimahabo. ¹¹ Nea netenbi ta Davidinin jema janinxon huesti haibaan jahuen baque bichishqui, mato jihuemanica coin noquen Hihbo Cristo. ¹² Hahan honanti sca tah hen mato yohihi: chopan rahcohad vacan piti racanxonti janin racatai tah man jaa meratihi. Jistannahue —hahquin Papan yonotinin.

¹³ Jaatian sca hahchonquihrani hicha Papan yonotibo sanareneni. Papa qui yohuani siricani.

¹⁴ Noquen naihoh queha Papa ta hihti coshi shinanya qui. Nai nequebihahbohon hihti shinanxon ta hahan sirijaquin shinanti shinan jato hinanihqui, hihcani.

¹⁵ Papan yonotibo naihoh boresscaiboya sca carnero coirannicahbo yohinancani:

—Noquen Hihbaan noque honanmaha jison bonahue. Belen janin canon bonahue —hihcani.

¹⁶ Bishquihicanahax sca nocoxon Mariaya José meracanquin. Jisíbo bi vacan piti racanxonti janin baquexo racati. ¹⁷ Honanscaax janohax joquin sca Papan yonotinin noque yohihah tah non jistanai, hihxon sca jatihibi jonibo yohibenacanquin. ¹⁸ Yohihahbo jatihibi rahtecani. Coirannicahbo yohuanai joi jahua hihcatsihquiquin hihcani, rahtetax. ¹⁹ Rahtetaibaan bi María rahteyamahi. Jaan cahen jahuen jointinin shinanresquin, chanihibo joibo shinanquin. ²⁰ Jaatian sca coirannicahbo jatón pasto janin nocorihbicani. Noquen Hihbo ta coshi shinanya qui hihcani.

—Min noque yohihihi jatihibi tah non jistanahqui, Papan. Min noque yohihihi quescabi tah qui. Hahxon tah min noque jai —hihcani.

Jesus baquexo jismahibo

²¹ Jan cainipi huesti semanán sca honantijamaxón Jesus janecanquin. Jahuen maman xahquinho jahuabi nanéyamaparihiya, Jaa tah man Jesus janeyaxihqui, Papan yonotinin jato jaho quescabijaquin janescacanquin, Jesus janeya janón.

²² Man baquexo janeho huesti hoxne senennon caman tah man Papan xobo qui samatihi hahquin ta Moisesnin huishanishqui. Jaa copi jascajacanquin. Jahuen hoxne senenscaiya Papa hinani sca baquexoya bocani, Jerusalem janin. ²³ Papan joi janin ta jascajati huisha jaiqui: Jahuen maman bihmenoho bebo baque jatihibi yohihi tah man Papanah ta qui hih man jatihí, Papa hinani. ²⁴ Huetsa rihbi ta jaiqui, Papan huishamani: Haibaan baquexo bichipi copi rabe nobex hinanyamaxón rabe coma pishca mohitahpa noquen Papa Dios hinanxon rehtexonquin, hihqui jaa huisha.

²⁵ Jascajati joi copi Jerusalem janin bocani. Jaatian rihbi ta Jerusalem janin Simon janeya joni janishqui. Pontejaquin shinanai joni. Noquen Papahón shinanai joni. Noque jahuen jonibohon shinanxon noque jihuemanica Papan raantihi honancoinax manatai joni. Jaa hihbojaxón ta Dios Yoshiman honanmanishqui. ²⁶ Papan raanai joni jisishma mahuati tah min jatimahi, hahquin Dios Yoshiman. ²⁷ Papan xoboho sca Dios Yoshiman hihuehah Simon nocoti. Jaatianbi jano Papan huishamani joi jai quescabijahi Jesusen papa betan jahuen mama rihbi jahui, Jesus hihuehi. ²⁸ Jaya mapetaítón sca jatón baquexo bichinxón Simoman hicotanquin. Chihtoxón noquen Papa yohiquin.

²⁹ Hihti sirijaquin sca tah hen shinanai, Hihbon. Hea yohinihxon tah min jaabijahi. Mihqui caresscanoxahnpán.

³⁰ Min raanai noque jihuemanicah tah hen jisresscai, Papan.

³¹ Jatihixonbi jisíbo hihxon tah min raanscai.

³² Mía honanyamapahonihxon bi ta nea baque copi noquen nahuabaan rihbi mia honanscatihiqui. Noquen caibo rihbi ta miin jonibohon nea jisish hihti siribohi yohuanaxihcanihqui, Papan hihqui Simon.

³³ Jatón baquexo yohihi Simon jascaraiya jahuen papa betan jahuen mama rahteti. Rahtetaiboya:

³⁴ —Noquen Papan ta matoxon shinanihqui —hihxón, baquexón mama bejisahnán sca, jahuen baquexo yohihi yohuani— Jise. Nea copi ta hicha noquen caibo jascabi behnoti sca jaticaniqui. Hicha rihbi ta nea copi jascabi sca jihuetihiqui. Hahqui ta caibo rihbi tiromahi yohuanaxihquiqui. Noquen Papa hahan honantihi bi tiromabohi yohuani. ³⁵ Jonibo

jenquetsahpa shinanyahpabohin non honannon ta neatohon noque yohiyaxihquiqui. Mian rihbi tan min jointi machexehxon masa shinanyaxihqui —hihqui Simon.

³⁶ Jano rihbi ta huesti haibo janishqui, Ana janeya. Fanuelnin baque, Aserin chini baque. Papan shinanmahah yohuannica haibo. Xontacohax jahuen bene betan siete bari jihuenuish bi jahuen bene mahuataiya yononma sca banenish yoxaboscai. ³⁷ Ochenta y cuatro bari jai bi sca yoxabohax bi Papan xoboho nihxon bariyahpan, yame rihbi piti tenehahnan Papa yocaquin. ³⁸ Simon betan nichibo merahax:

—Hahxon tah min noque jai, Papan. Jaa jisish tah hen hihti jenimahi —hihqui haibo. Jerusalem janin jihuetaibo sca yohihi cahi. Papan jihuemanica jopahinon hihquish manataibo jatihibi sca ta yohinishqui, Jaa ta jaresscaiqui, hahquin.

Nazaret janin boribihibi

³⁹ Jaatian sca Papan yohinih quescabijaquin queyohax Galilea main sca cahi Jesusen mama betan jahuen papa caribihibi. Cahipish Nazaret jema janin jaton xobon nocorihbis-cacani. ⁴⁰ Jano jihuenuish sca jaton baque haniscaax coshiscaci. Hihti honan. Hahan Papan hihti shinanai joni.

Papan xoboho Jesus nocotai

⁴¹ Jatihibi bari tian ta Jerusalem janin jahuen mama betan jahuen papa capahonishqui. Pascua fiesta tian jano fiesta huinoti bocani. ⁴² Doce bari Jesus jaiya sca jaabo hihpahoni quescari fiesta huinoti jano bocani. Jaa rihbi jato betan cahi. ⁴³ Fiesta queyoscaiya sca jaton xoboho jonoxon beribicani. Jema janin jaton baque banetai bi honanaxma jahuen papabo joribicani. ⁴⁴ Jahuen chahibo betan jaa rihbi jahui shinanax nihbahinahi becani. Bepi sca jaton baque yamajaxon jato betan jahuiibo janin sca benacanquin. Jaton jenabo yocacah bi yamahi. ⁴⁵ Benacasquimahax sca Jerusalem janin benahi boribicani, rabebi.

⁴⁶ Jano quimisha neten benacasquimacanquin. Benabonaxon sca Papan xoboho haxemanicahbo betan jaa tsahotai meracanquin. Haxemanicahbo yohuanai nincanoxon, jano jaa tsahotai merascacanquin. Hashoan honancatsihquin jato yocarihibiquin. Jato betan yohinani tsahotai. ⁴⁷ Jan honanxon yohuanquihna haxemanicahbo rahteti. Nincacqui jano tsahotai rihbi rahteti. ⁴⁸ Papan xobo janin jahuen haxemanicahbo yohuanquihnaiton merahax jaabo rabe rihbi rahte rahteti.

—¿Jenquetsahpahin min noque betan cayamahipiquin, baquen? ¿Min honanyamahin? Masa shinanhahnan tah non mia benacasquimahipiqui —hahquin jahuen maman.

⁴⁹ —¿Jahua copi man hea benarahsihin, maman? ¿Heen Papan teebo jisti hea jai man honanyamahin? —jato jaquin. ⁵⁰ Jascajaha bi jan yohihi jahua hihcatsihquiquin honanyamacanquin.

⁵¹ Jaatian sca Nazaret janin jato betan caresscaci. Nococani. Jano jihuescacani. Jahuen papan, jahuen maman yohihah quescabijaquin hahquin. Hicha bari huinoscaci bi hen huishaxon mia yohihi jatihibi jahuen maman shinanpariquin. ⁵² Jano jihuetax ta Jesus haninishqui. Jahuen shinan rihbi caicanahi. Jano jaibaan jisi ta siri joni jaa janishqui. Papan jisi siririhbihibi.

3

Nihi naman mehax Juan yohuanai

(Mt 3.1-12; Mr 1.1-8; Jn 1.19-28)

¹ Jasca sca janibaana ta huetsa quiquin hapo jaresscansihqui, Tiberio janeya. Quince bari sca jaa jaton hapo jaiya cahen jonibo jixsonnicah rihbi jai, jahuen gobernadorbo. Judea main jahuen gobernador ta Poncio Pilato janeya janishqui. Jaatian rihbi ta Galilea main Herodes haponishqui. Herodesnin huetsa Felipe ta Iturea main sca haponishqui. Traconite janinbo rihbi jahuen mai, jaa hihboti. Janohax ta Abilinia janinbo Lisanasnen hihboti janishqui. ² Anas betan Caifas rihbi ta judiobaan quiquin yohuan hihbobo janishqui. Jaabo rahsi hapobo jaiya sca ta jano tsoa jihueyamahi janin jihuexon noquen Papa yohuanai Juaman nincansihqui. Jaa Juan cahen Zacariasnen baque. Papa yohuanai nincacax jaa joi yohihi sca nich. ³ Jordan huean janinbo sca nihnich. Quetanhihni-bahinxon quetanpaquebahinrihbiquin. Yohibonahi nich.

—Noquen Papan maton hohcha sohuanon shinan siri sca bihnahue. Shinan behnayahpa man jaiya hen mato nashimanon benahue —Juaman jaquin yohibonaquin. ⁴ Isaíasnen rihbi ta Papan joi yohinicaxon jaa yohihi neateman huishanishqui.

Jano tsoa jihueyamahi janin tah hen quenahi: Noquen Hihbo hahan jonon bahixonahue. Pontequin bahixonquin.

⁵ Mai xanquen jatihibi tah man bochojabonatihibi. Mahchi jatihibi rihbi tah man mapaquin mispanjabahintihibi. Mayabo rihbi tah man pontetihibi. Xanquen xanquenaibo rihbi sirijabonaquin.

⁶ Jaatian ta Papan raanah jihuemanica joresscai jatihibi jonibaan jisyaxihquiqui hah ta Isaíasnen janishqui huishaquin.

⁷ Isaíasnen jascajani copi ta nashimamahi behibo Juaman yohinishqui:

—Papan ta mato casticantihiqui. ¿Tsoan mato Papan mato castanmis yohihah man neno jabaquihrani jahuin, rono papayahpabon? ⁸ Maton shinan pontejacoinax siri shinanya sca jihuenahe hih ca hen jai sen, maton shinan honanahbo. Noquen Papa ta Abraham qui hihyamarihbinahue. Nea macanbo ta Papan jonijati hahtipahiqui, Abrahamen baquebo sca janon, hahan Papa jenimahibo sca janon. ⁹ Jihui reranoxon hahcajaquin ta jahuen yami bihxon Papan tarescaiqui. Siri bimijomabo tarexon cohaquin hahcajaquin ta tiroma shinanyahpabo Papan casticanscaiqui. Shinannahue —jato jaquin. ¹⁰ Jascahah yocascacanquin.

—¿Hicon nan? ¿Jahueja sca non jatihin?

¹¹ Yocacahbo sca jato yohiquin:

—Rabe cotonyahpaxon cotoñoma joni huesti hinannahue. Pitiyahpaxon, jascajaquin rihbi pitijoma joni hinannahue jan pinon —jato jaquin.

¹² Jaatian sca coriqui cobranabo rihbi becani. Jaan jato hihquimatanquin nashimanon hihquish becani. Nocoxon sca yocacanquin:

—¿Noquen non jahuejatihin? —hahcanquin.

¹³ —Hapon mato yohihi tihi res cobranannahue. Man mahuinmamis —jato jaquin.

¹⁴ Sontarobaan rihbi sca yocaquin.

—Noque rihbi sca yohihue. Sontaroxon non jenuetsahatihin —hahcanquin. —Man tah man tsoabi tahtijaxon jahuabi bichintimahi. Quesaxon bichintimarihbihi. Maton hapobaan mato copijahi res bihxon jaa res bihti shinannahue —jato jaquin.

¹⁵ Juaman jascajahiya manahihti quenichibo shinehehti:

—Jaa tsi ra Papan caisai joni quin —hihcani, Juan yohihi jaton jointinin shinehehti.

¹⁶ Jascaraiboya:

—Hean hen mato jenen nashimahi bi ta hea mentan hashoan coshi joni jahuiqui. Ni jahuen sapato risbi pecaxonti tah hen senenyamahi jaa hihti siri copi. Jaan ta jahuen yoshin siri mato hinantihiqui chihbi rihbi mato maracanquin. ¹⁷ Chishpo nihuen potanon hihxon bero romishin potaquin hahcajaquin ta Papan xecoscaiqui. Bero rahsi tsamatai tsinxiixon sca jahuen bexoñati janin niaxon bi ta nocayosma chihin chishpo mapojayaxihquiqui —jato jaquin.

¹⁸ Jascapahbo joibo ta jato hicha yohinishqui, nincacoinahbo. Joi siri jato nincamaquin.

¹⁹ Siri joibo jan yohihi que bi ta quiquin hapoxon Herodesnin bihmaxon sipo xoboho Juan tsahonnishqui. Jascatimahi bi tah min miin huetsan haibo betanbi hihqui, Juaman jaho copi Herodesnin jaa sipo xoboho tsahonquin. Jatihibi jan tiromajaquin hahni Juaman yohiho copi rihbi sipo xoboho tsahonquin. ²⁰ Hihti tiromaxon bi ta hashoan sca tiromajaquin Herodesnin Juan bihnishqui.

Juaman Jesus nashimahi

(Mt 3.13-17; Mr 1.9-11)

²¹ Jaabi, sipo xoboho Herodesnin jaa tsahonyaxahnon ta Juaman jato nashimapa-honishqui, jato nashimanon hihquish hahqui nocotaibo. Jascapahbo nashimaxon ta Jesus rihbi nashimanishqui. Nashimaha ta noquen Papa yocanishqui. Yocacahan, nai quehpemehtai jisquin. ²² Jaton jisnonbi sca naihoh quehax nobex quescapah botopaqueti jahui jisquin. Naihoh quehax yohuanairihbi nincacanquin. —Mia tah min jahan hen queenai heen baque qui. Mihon tah hen hihti jenimahi —hihqui.

Jesucriston xohtabo

(Mt 1.1-17)

²³ Jaa pecaho ta joi siri yohibonahi sca Jesus nihnishqui, treinta bari jaax. Jonibaan jisí cahen jaa Josepan baque. Jahuen चाहिता cahen Helí. ²⁴ Helí sca cahen Mataten baque. Matat cahen Levin baque. Leví cahen Melquin baque. Melqui cahen Janan baque. Jana cahen Josepan baque. ²⁵ José cahen Matatiasnen baque. Matatias cahen Amosen baque. Amos cahen Nahuman baque. Nahum cahen Eslin baque. Eslí cahen Nagainin baque. ²⁶ Nagái cahen Maaten baque. Maat cahen Matatiasnen baque. Matatias cahen Semeinin baque. Semei cahen Josepan baque. José cahen Judapan baque. ²⁷ Judá cahen Joananen baque. Joana cahen Resan baque. Resa cahen Zorobabelnin baque. Zorobabel cahen Salatielnin baque. Salatiel cahen Nerin baque. ²⁸ Neri cahen Melquin baque. Melqui cahen Adin baque. Adi cahen Cosamam baque. Cosam cahen Elmodamen baque. Elmodam cahen Erin baque. ²⁹ Er cahen Josuepan baque. Josué cahen Eliezerin baque. Eliezer cahen Joriman baque. Jorim cahen Matatinin baque. Matat cahen Levin baque. ³⁰ Leví cahen Simeonen baque. Simeon cahen Judapan baque. Judá cahen Josepan baque. José

cahen Jonaman baque. Jonan cahen Eliaquim baque. ³¹ Eliaquim cahen Meleanen baque. Melea cahen Mainanen baque. Mainan cahen Matatanen baque. Matata cahen Nataman baque. Natan cahen Davidinin baque. ³² David cahen Isaipan baque. Isai cahen Obedin baque. Obed cahen Boozen baque. Booz cahen Salmonen baque. Salmon cahen Naasonen baque. ³³ Naason cahen Aminadab baque. Aminadab cahen Adminen baque. Admin cahen Arnin baque. Arni cahen Esroman baque. Esrom cahen Faresen baque. Fares cahen Judapan baque. ³⁴ Judá cahen Jacobon baque. Jacobo cahen Isaaquen baque. Isaaque cahen Abrahamen baque. Abraham cahen Tarepan baque. Taré cahen Nacoren baque. ³⁵ Nacor cahen Seruquen baque. Seruque cahen Ragaunen baque. Ragau cahen Peleg baque. Peleg cahen Eberin baque. Eber cahen Salan baque. ³⁶ Sala cahen Cainanen baque. Cainan cahen Arfaxad baque. Arfaxad cahen Seemin baque. Seem cahen Noeman baque. Noem cahen Lamequen baque. ³⁷ Lamec cahen Matusalenen baque. Matusalé cahen Enoquen baque. Enoc cahen Jaretan baque. Jaret cahen Mahalalelnin baque. Mahalalel cahen Cainanen baque. ³⁸ Cainan cahen Enosen baque. Enos cahen Setin baque. Set cahen Adaman baque. Adam cahen Papa Diosen baque.

4

Tiroma yoshiman Jesus tanahi (Mt 4.1-11; Mr 1.12-13)

¹ Dios Yoshiman shinanyahpahax sca Jordan huean janinhax Jesus cahi. Cahí, Dios Yoshiman jano cahue hahca, jano tsoa jaitonma sca cahi. ² Cuarenta neten jano nihnixon bi ta jahuabi piyamanishqui. Tiroma yoshiman sca ta hohchamacatsihquin tana tananishqui. Jahuen cuarenta neten sca hihti picatsih sca jaiya sca Satanasnen tanarihbiquin.

³—Papa Diosen baquexon, toa macan yohihue, piticahinscanon —hahquin.

⁴Jascajaha:

—Piti res jaax jihuetima tah man jai hah ta Papan janishqui huishamaquin —hahquin Jesusen.

⁵Jaatian sca queya maniquihnxon bochiqixxon sca jatihibi mai janin jai jemabo Satanasnen jismarenenquin.

⁶—Hoa jatihibi ta Papan hea hinannishqui. Queenxon tah hen mia hinantihí, mian sca jato hihbojanon. Jatón jahuabora jatihibi mina sca hihnon. ⁷Hea bebon min miin raboxonen nichish betihihpaquexon yocacah tah hen mia hinantihí —hahquin Satanasnen.

⁸Jascahah:

—Miin Papa Dios huesti tah min yocatihí, jaa huesti qui tah min betihihpaquetihí hih ta Papa jaiqui jahuen huisha joi janin —hahquin Jesusen sca.

⁹Jaatian Jerusalem janin sca Satanasnen hioquin. Jano sca Papan xobo pemacanya Jesus penimaxon:

—Papa Diosen baque hihquish nenohax cayahue. ¹⁰Jahuen yonotibo ta Papan yohitihiquí, mia coiranabo hih ta jaiqui Papan huishani janin. Cayahue. ¹¹Jahuen mequeman ta mia bihtihiquí, macan qui min joxcorohyamanon hih ta jaribinishqui jahuen quirica janin —hahquin Satanasnen.

¹²Jascahah bi:

—Hea cahra hahxoncointihiquin, tanapan hihxon, Miin Hihbo Dios tanayamahue hah ta Papan janishqui —hahscaquin Jesusen.

¹³Satanasnen hohchamacatsihquin bi jenuetsahaxon bi hohchamatimahiya sca Jesus jenebahini caresscai, joribiyaxhapan hihquish.

Galilea mainxon Jesusen yohimenohi (Mt 4.12-17; Mr 1.14-15)

¹⁴Jaatian Jesus rihbi joresscai. Dios Yoshiman coshi hinanah, Galilea main sca cahi jahui. Nocotaiya, Papan coshiyahpa ta jaa qui hihqui jano jihuetaiibo sca yohuan chanicanahi bocani jatihibi janin. ¹⁵Jatón tsinquití xoboho mapexon ta jato haxemapahonishqui. Jan yohihí nincacax, nea ta Papan raanai joni qui hihscacani.

Nazaret jema janin Jesus nocotai (Mt 13.53-58; Mr 6.1-6)

¹⁶Jaa pecaho Nazaret jema janin sca Jesus nocotí cahi, janohax jan hanini janin sca nocotí. Jan japahoni quescá sca tantiti neten jatón tsinquití xobo janin jato betan tsinquití cahi. ¹⁷Tsinquitaibaan sca noque nincamarohahue hahxon Isaiasnen huishani quirica hinancanquin. Jato nincamanoxon sca nihxon quirica quehpenxon jano nea joi jai benaxon jato nincamaquin.

¹⁸Dios yoshiman ta hea hihquihiniqui. Jahuajomabo joi siri hen yohinon ta hea caishiquí. Caisnixon ta hea raannishqui, hinábo hen piconon hináboma sca jaábo.

Benchebo rihbi hen yohinon ta hea raannishqui hahquirihbi jisti hahtipahabo. Tiroma hihboyahpabo hen piconon ta hea raanishqui, hinábomascanon.

¹⁹ Papan jisí ta rahma jahuen joi siri nincamaha hihti siri qui hahquin jato nincamaquin.

²⁰ Jascajaquin nincamaxon jahuen quirica xehpoxon quirica coiranxonnica hinanrihbi-hax tsahopaque sca jai. Tsahotaiya jaa bejisi manacani. ²¹ Jaatian sca:

—Nea hen mato nincamaha joi ta rahma maton nincanonbi jascacoinscaiqui, Papan yohini quesca sca —jato jaquin.

²² Jan yohihah nincamaquin sirijahax rahte rahtescacani. Papan noque hahxoncoinaí joi ta noque nincamahaxqui hihquish rahte rahtecani. Jaatian sca shinanax:

—Nea Josepan baquema quin —hihscacani.

²³ Jascari yohuananaiboya:

—Hea rah tah man jatihixonbi hea nescajaquin yohiyaxihqui. Rahomehue, rahonnican hah ra tah man hea jayaxihqui. Capernaum jema janinxon roqui miin coshiyaxon min jato jenguetsaja ra jaxonipi. Neno miin mainxon sca noque jascajaxonhue hah tah man hea jaribitihí —jato jaquin.

²⁴ Jato jascjaxon jato hihti yohiscaquin:

—Jaabi tah hen mato yohicoinaí. Jahuen main cahiton ta Papan joi yohinica jahuen caibaan sirijaquin bihtimahiqui. ²⁵ Hihcoinja tah hen mato jai. Elías yamanica jihueni tian ta basi hoi paqueyamanishqui, quimisha bari seis hoxnerihbi hoi yamanon. Jatihibi janin ta hihti pihaxmahnhuan sca hihcannishqui. ²⁶ Hicha maton caibo yononmabo jaatian rihbi janí que bi ta jato qui Papan Elías raanyamanishqui. Jato qui ma bi ta Sarepta jema janin Papan raannishqui, huesti sidono yononma haibo qui caxon piti caijaxonnon. ²⁷ Jascajaquin rihbi ta Eliseo jihuenitian sca hicha maton caibo sipiyahpabo janí que bi jatoma bi Siria mai janinha huesti res Papan rohajanishqui —jato jaquin.

²⁸ Jatón nahua Papan hahxonai nincacax sinacahincani, tsinquiti xoboho jaibo rahsibi sina sinati. ²⁹ Bihtanxon sca jemama qui Jesus bocanquin. Jano jai hani xanquen janin boxon rehtenoxon naman potacatsihquibo. ³⁰ Rehtecatsihquibaan bi jato nabebacahini cahax Jesus caresscai.

Yoshiman hihbojahi joni

(Mr 1.21-28)

³¹ Capernaum jema janin sca cahí, Galilea mai janin. Nocotipixon jatón tantiti neten jato haxemaquin. ³² Jan yohihah nincacax ta rahtecanishqui, shinan hihboxon jaan jato honanmaha copi.

³³ Jatón tsinquiti xoboho rihbi ta tiroma yoshinyahpa joni mapenishqui. Jesus yohuanai nincacax coshín sai saihihscái.

³⁴ —¡Hahraíl! ¿Noque jahuejahi min jahuin, Jesus Nazarenon? ¿Noque queyohi min joresscaín? Mia tah non honanai. Mia tah min Diosen baque qui —hahquin yoshinyahpaton.

³⁵ Jascahah bi:

—Jascaraxma netetax jaa jenebahini catanhue —hahquin Jesusen. Catanhue hahca yoshiman jaa joni tapon hueranbohanquin, jato tocan racanon. Jahuabi tiromajaxonma sca jaa joni jenebahinquin. ³⁶ Jaa jisish raqueya sca hihcáni jaa xoboho jaibo rahsi. Raquetax yohinanancani.

—¿Jenguetsahpa coshi shinanya jaa jaiquin? ¡Jistan! Jahuen coshiyaxon ta catanhue hahquiqui. Jaan yohihah ta tiroma yoshinbo boresscaiqui —hihcáni.

³⁷ Jaa copi ta jaya joihi hicha bocannishqui, janobo jaibo chanicatsihqui xobo tihibi mapecanahi.

Pedronen haita Jesusen rohajahi

(Mt 8.14-15; Mr 1.29-31)

³⁸ Jatón tsinquiti xobo janinhax sca Simoman xobon Jesus cahí. Nocotaiya bi Simoman haita yona yonati racati. Jaa copi, Rohajaxonhue, hahcanquin, nocoscaiton. ³⁹ Hihcohax jaa racatai patax nihrenenxon sca jahuen hisin Jesusen yonoquin jenebahinhue, hahquin. Yonohah, yonayamascacahini. Rohascaax huenitax jato pitijaxoní mehca mehcascai.

Hicha hisinaibo Jesusen rohajahi

(Mt 8.16-17; Mr 1.32-34)

⁴⁰ Bari hihquiscaíya sca jatón hisinyahpabo hihuecanquin. Hihuehibo mehaxon sca jato rohajapaquequin. ⁴¹ Hicha tiroma yoshinbo rihbi ta jaan camanishqui. Jenebahini catanhue jan jaah sai saihihcáni. Mia tah min Diosen baque qui hihcáhini boresscáni. Jaabo hashoan coshín yohuanpanan ta jato netemanishqui. Jaa Cristo hihqui honanax yohuanaiibo copi jato netemaquin.

Galilea main sca Jesus cahi yohihi

(Mr 1.35-39)

⁴²Xaba paque sca jaiya sca jano tsoa jaitonma sca Jesus cahi. Tsamajaquetaibo caxon jaa benabonaxon merahax hahqui nocohihnati.

—Noque jenebahini cayamascahue, hihbon. Noque qui banejaquerohahue —hahcanquin. ⁴³Noque qui banejaquerohahue hahcabo bi:

—Huetsa jemabo janin rihbi tah hen Papan joi yohibonahi cati jai, Papan jihuemati joi honanahbo. Jaa copi tah hen jahui —jato jaquin. ⁴⁴Jaa pecaho sca judiobaan tsinquiti xobobo mapecanaxon Papan joi siri jato yohibonaquin.

5

Jahuen coshiyaxon jan yapa bihmahi

(Mt 4.18-22; Mr 1.16-20)

¹Jaatian sca Genesaret hian quexa sca cahax, nihxon jano jaibo honanmaquin. Nincatsihquish sca tsama jonibo hahqui tsinquijaqueti. ²Nincatsihquibo tshquesihquin hueranbonaha jisi bi nonti rabe quexa racatai. Nonti racatai bi yapa rahconicabo yamahi, yapa rahcotani jahuex jaton tarrafa pahtsaqui mapescaibo. Huetsa nonti ta Simomana janishqui, huetsa nonti cahen jahuen companihrobaana. ³Simoman nontin nanéxon sca: —Napon hori noque hueranbohanhue —hahquin Simon yohiquin. Jaatian sca nontin tsahoxon sca quexa nichibo haxemaquin. ⁴Yohuanquin janquenjaxon sca Simon yohiquin.

—Nemin janin sca noque hioxon maton tarrafa potanahue, yapa bihnoxon —hahquin.

⁵—Pota potashinaxon bi tah non jahuabi bihyamahaqui, maestron. Jaabi, mian yohihah tah hen potahi —hahquin Simoman.

⁶Potaxon sca hicha yapa rahcoquin. Yapa hashoan hichahiya jaton tarrafa huaxacatsihscai. ⁷Mapo behue behuehaxon sca jaton companihrobo quenacanquin, huetsa nontin joxon jato yanapanabo. Joxon rabebi jaton nonti bochojabahincanquin hihquicatsihscanon caman. ⁸Yotih ra jisish raquescaax Jesus bebonxon raboxonen tisquihahpaquexon:

—Hea jenebahinhue, Hihbon. Hea tah hen hohchayahpa joni qui —hahquin, Simon Pedronen.

⁹Huestijaquin potaxon bi yotih ra yapa bichish Pedro raquescai, hahbe yapa bihnicahbo rihbi. ¹⁰Zebedeon baque rabe rihbi ta jascarihibi raquenishqui, Jacobo betan Juan, Simoman companihrobo rabe. Raquescaiboya:

—Raquyamahue, Simoman. Rahma tah min joni bihnicah sca jatihi —hahquin Jesusen.

¹¹Taxnaxon sca cahen jaton nontibo jatihibi jenebahini sca Jesus manahi sca bocanni.

Sipiyahpa Jesusen rohajahi

(Mt 8.1-4; Mr 1.40-45)

¹²Jaa pecaho sca ta janobo jai jemabo qui nocoti canishqui. Huesti jema qui nocoxon sca sipiyahpa joni behchiquin. Sipiyahpaton sca Jesus merahax taracahpaquexon Jesus hihti yocaquin.

—Jeen hihxon res tah min hea rohajatih, Hihbon. Mian tah min hahtipahi —hahquin.

¹³Jascajaha, mehaxon sca:

—Queen ta jai. Rohascahue —hahquin. Jaatianbi jahuen bichi siricahinscai, behna sca.

¹⁴—Hen mia rohajaha tsoabi yohiyamaxahatahi min. Min yohimis. Tsoabi yohixonma, sacerdote jismatanhue, Moisesnin yohini quescabijaquin hinanti pishcaya catanhue, rohasaxon hinanti pishca. Jascajaquin tah min jato nincamatih, jonibo tocan hahquirihbi jihueti hahtipahnoxon —hahscaquin Jesusen.

¹⁵Yohiyamahue hahca bi hashoan sca jonibo yohibonaquin, Jaan ta hea rohajahaxqui hahquin. Jaa copi hihti caibo sca becani. Jesus yohuanai nincanoxon rahomehti becani.

¹⁶Jan cahá cahchiqui nocotahbo jaa huesti Jesus cahi. Jano tsoa jaitonma cahax basihi, Papa yocaqui basihi.

Yora honanyamajaquetai Jesusen rohajahi

(Mt 9.1-8; Mr 2.1-12)

¹⁷Huetsa neten sca ta jato haxemarinishqui. Jato yohihi bi ta fariseoboya jaton haxemanicahbo nocohihnatax nincaqui tsahopaquēcannishqui. Galilea mai mehax jahuibho, Judea mai mehax jahuibho rihbi, Jerusalem jema janinhax jahuibho rihbi nincaqui tsahocani. Papan coshiyaxon jan rohajahi sca jiscanquin. ¹⁸Tsinquijaquetaiboya sca jahuen yora honanyamajaquetai joni becanquin. Jahuen cacajatiyaxonbi hihuxon Jesus bebonbi janacatsihquibaan bi joni hichahiya jenquetsahax hihcotimahi. ¹⁹Jenquetsahaxonbi mapematimahiya sca jayabi xobo pemacanya hinaxon xehuabo xecabohanxon jahuen

cacajatinin sca rontanpaquebohanxon Jesus bebonbi sca racanpaquecanquin. ²⁰ Jan jato rohajaxontihî shinancoinaibohî jisxon, racatai joni Jesusen yohiquin:

—Miin hohcha tah hen mia sohuaxonai, hiconin.

²¹ Jaatian jano tsahotai fariseoboja jaton haxemanicahbo jaabo rahsibi yohinancani.

—¿Jahua hihqui shinanax Diosihcamahi yohuanihquin? Papa Dios huestichin ta hohcha sohuaati hahtipahiqui. ¿Neatohon rihbi hahtipahiquin? —hihcani.

²² Jaya baxexaibo honanxon Jesusen jato yocaquin:

—¿Jahua yohuan man maton jointinin jain? ²³ ¿Jahuemeha hashoan teema yohitihquin? ¿Miin hohcha tah hen sohuaxonai hihqui nan? ¿Huenihihnatax nihaquetanhue hihqui nan?

²⁴ Jaabi, noquebaque hihxon hen mainxonbi hohcha sohuaxonti hahtipahi honannoxon jisnahue—hahxon sca yora honanyamajaquetai yohirihbiquin:

—Mia tah hen yohihî. Huenihihnaxon miin cacajati bihbahini caresscatanhue, miin xobon—hahquin.

²⁵ Yohihah sca jaton jisnonbi huenicahuanxon jahuen cacajati bichish jaya cahî caresscai. Jahuen xobon cahî.

—Papa Diosen ta hea rohajahaxqui—hihcanahi cahî. ²⁶ Nincacax rahte rahtecani.

—Papan ta hahxoncoiniqui—hihcani. Caibo rihbi hihti raquetax:

—Tsoan jisnîma tah non rahma jisiqui—hihcani.

Jesusen Levi quenahi

(Mt 9.9-13; Mr 2.13-17)

²⁷ Jaa pecaho sca caxon, tininti cobranxonai joni Jesusen meraquin, Levi janeya. Jahuen janoxon cobranti misa janin tsahotaiton meraquin. Meraxon:

—Hehbe cahî johue—hahquin.

²⁸ Jascajaha huenixon jatihibi potabahini cahî, Jesus manahi sca.

²⁹ Jaatian sca jahuen xobo janin sca hani fiesta hahqui jonon Levin Jesus quenamaquin.

Jaen quenamaha hahbe cobrannicabo rihbi hicha jano jai, jaton hahberabetibo rihbi.

³⁰ Jaabo rahsi jaa manahi tsahotaiya sca fariseobo betan jaton haxemanicahbo reren rerenxon, Jesusen haxematibo cahecanquin.

—¿Jahua copi man cobranmisboya hohchayahpabo betan man pihî tsahotain? ¿Jahua copi man jascapa betan xehahin?—hahcanquin.

³¹ Jesusen sca jato joi bichinquin.

—Hisinjomabo ta rahonnica pishinyamahihqui. Hisinyahpabo caya rahonnica pishinîh.

³² Pontebo quenahîma bi ta pontemabo quenahi hea jonîqui, shinanquin pontejahabo—jato jaquin.

Non piti tenetihin yocacahtaibo

(Mt 9.14-17; Mr 2.18-22)

³³ Jaatian:

—Juman haxenicabaan ta hicha piti tenehiqui. Hicha rihbi ta Papa yoca yocacaniqui. Fariseobaan haxematibaan ta jascajaribicaniqui. Minabaan ta jascajayamacaniqui. Minabaan ta pipi pipixon xeha xehacaniqui—hahcanquin.

³⁴ —Jaton huetsa huanomahi caxon ta huanomahanan piti tenetima jacanihqui.

³⁵ Huetsa tian ta jaton huanomati yamascatihiqui, Papan jato bichinah. Jaatian pari ta benáxon piti teneyaxihcanihqui—hahxon, honanahbo hihxon sca jaa patax queha joi jato yohiquin. ³⁶ Nescajaquin jato yohiquin:

—Chopa payo honacatsihquin tah non hahan honanoxon hotsihahma chopa behna non teque huaxayamaha. Behna chopayaxon honanoxon non huaxahah ta behna chopa tiromascatihiqui. Payo honahah bi ta behna hotsihax chopa payo betan senenyamarihbiscatihiqui. ³⁷ Noquen xehati behna rihbi tah non xeni bichi borasa qui non bochojayamaha. Non bochojaha bi ta pahescaxon borasa pohtoshihmahax noquen xehati yohyocohtihiqui, noquen borasa rihbi tiromascanon. ³⁸ Xehati behna tah non hestenica borasa behnabo qui bochojati jai. ³⁹ Xehati pahe xehahax tah non bata queenyamarihbîhi. Pahe ta nohuepihqui hihquish—hahquin Jesusen.

6

Tantiti neten bero pibonahibo

(Mt 12.1-8; Mr 2.23-28)

¹ Jaatian sca tantiti neten sca bahin cahax trigo huai nabebacahini cahî. Hahbetan caquin, jahuen haxenicabaan huestibo bero tesabonaxon, bishqui bishquihahxon oxaxon picanquin. ² Jascajahiton fariseobaan jato yocaquin:

—¿Jahua copi man jascajahin, tantiti neten non piti tsinquitimahi bi?—hahcanquin.

³ Jesusen sca jato yohiquin:

—¿Papan joi jisquin man Davidinin hahní honanyamahin? Hahbetan cahibo picatsihquiya jaa rihbi picatsihquish, ⁴ Papan xobo janin hihcoxon Papa jismanoxon pejanxonti paan hinanah bihxon, pixon, hahbe nichibo rihbi jan hinanni man honanyamahin? Jascapa ta tsoanbi pitimahiqui, Papa yohixonnica huestichin ta jaa piti hahtipahiqui —hahquin Jesusen.

⁵ Sirijaquin yohiquin sca jato yohirihbiquin:

—Hea ta hen noquebaque qui, tantiti nete hihbo —jato jaquin.

Meyosmahi

(Mt 12.9-14; Mr 3.1-6)

⁶ Huetsa tantiti neten rihbi sca jaton tsinquiti xoboho mapexon jato haxemaribiquin. Huesti meyosma joni rihbi jano tsahoti, mecayaho jahuen mequen yosmahi. ⁷ Tantiti neten ta rahonnicabaan tsoabi rahontimahihqui, tantiti netenbi jaa rohajatihiquin hihxon ta jaton haxemanicahbo betan fariseobaan jisishquish. Hahan cahenoxon jisiscanquin. ⁸ Jahua yohuan jaabo rahsi jaiquin jahuen jointinin honanxon ta jaton nincanonbi meyosma joni sca yohinishqui:

—Huenihhnatax naponbi nihhue —hahquin. Jascajaha huenihhnatax jato tocanbi nihrenenscai. ⁹ Reren rerenaibo sca Jesusen yocaquin:

—¿Tantiti neten non siribojaxontimahin? ¿Tantiti neten non tiromajatihin? ¿Joni huetsa non tantiti neten jihuematihin? ¿Non mahuamatihin? Hea yohinahue —hahquin Jesusen. ¹⁰ Jato jispaquexon meyosma sca yohiquin:

—Miin mequen sanahihnihue —hahquin. Yohihah mehanscaax rohacahinscai. ¹¹ Roha sca jaa jai bi jano tsahotaibo sina sinati. Jesus qui yohuan yohuanscacani, jahueja non jaa jatihin, hihqui.

Doce haxenicabo Jesusen caisai

(Mt 10.1-4; Mr 3.13-19)

¹² Jascaripish noquen Papa yohihi sca mahchi manichi Jesus cahi. Yametai bi janoxonbi Papa Dios yoca yocashinaquin. ¹³ Xabacoscaiya cahen jahuen haxenicabo quenascaquin. Hahqui jahuiton doce res caisxon:

—Mato tah man heen raantibo qui —hahquin. ¹⁴ Jan caisni ta neabo qui: Simon, jahuen jane huetsa cahen Pedro. Jahuen huetsa Andres rihbi, Jacoboya Juan jaabo rabe rihbi, Felipe, Bartolomé. ¹⁵ Mateo, Tomas, Santiago Alfeon baque, Simon Zelotes hahcaibo ¹⁶ Judas Santiagonen baque, Judas Iscariote, jaabo rahsi. Judas Iscariote cahen Jesus paranxon judiobo

Hicha jonibo Jesusen haxemahi

(Mt 4.23-25)

¹⁷ Jato betan botoquihrani jahuex sca mai mispani janin nihrenenai bi hicha haxehibo becani. Nincanqui becani, hihti caibo. Jaabo cahen Judea mai mehax behibo, Jerusalem janinhax behibo. Tiro jema janinhahbo, Sidon jema janinhahbo, quebijistima hian quexa jihuetabo. ¹⁸ Jesus nincacatsihqui jahuibio, rahomehti jahuibio. Caibo rihbi tiroma yoshinbaan hihbojani bi becani. Jascapahbo rihbi ta Jesusen rohanjanishqui. ¹⁹ Jesus mehehax jahuen coshin rohanibo rahsibo quen jano jaibo rahsichin jaa mehecatsihscacani.

Hahan jenimatiboya hahan benatibo

(Mt 5.1-12)

²⁰ Jato honanmaxon bejisquin sca jato yohiquin:

Jenimanahue jahuaborajomabon. Papan ta mato jihuematihiqui. Mato cah man jahuen jihuetahbo.

²¹ Jenimanahue pihan hihquibon. Man tah man yanixahiqui, rohahihrichi.

Jenimanahue huinihibon. Man tah man coin coin bitsayaxihqui.

²² Jonibaan mato jistahimaha jenimanahue. Mato yohuanquihnyamascaxon bi mato roa roahahbo bi jenimanahue. Man hea nincacoinai copi maton janeya tiromahi yohuan-naiboya jenimarihbinahue. ²³ Mato jascahibaan bi hihti coincoinnahue. Jaton sohtabaan ta Papan joi chaninicabo jascajaribinishqui. Naihoh sca ta janoxon mato hinantibo Papan mato hicha bexojaxonihqui. Jaa copi jenimanahue.

²⁴ Jascapahbo hahan jenimati jaibo bi ta hicha coriquiyahpahax man ¡Hahrai! hihyaxihqui. Maton jahuaboraya jenimati shinanxon bi tah man jahuabi hashoan bihtimahi.

²⁵ Rahma yanitax bi tah man Hahrai hihyaxihqui hihti pihaxmahhuan hihquish.

Rahma bitsatax bi tah man Hahrai hihyaxihqui bena benatax huaohihquish.

²⁶ Jatihibi jonibo mato qui siripi yohuanaiya Hahrai hihnahue. Papan joi yohihicamahi quesahiboya ta maton papabo jato qui jascarihbihi siripi yohuanpahanishqui.

*Rahuibohon non shinantihi**(Mt 5.38-48; 7.12)*

²⁷ Mato tah hen yohihi, nincanahue. Maton rahuibohon shinannahue. Mato jistahihmahibaan bi jato sirijaquin hahxoncoinnahue. ²⁸ Mato roahibaan bi jato qui Papa yocaxonnahue. Mato tahtijahibaan bi jato yocaxonnahue. ²⁹ Mia copasah bi copixonma ramiqui sca jismahue. Miin coton mia bichincatsihquiya jaa hinanax miin camiseta rihbi yohuashihyamahue. ³⁰ Mia yocacaibo jatihibi hinanhue. Mia bichinai bi bichinyamasc-ahue. ³¹ Hea hahxoncanpahinon hih min jain, jato pari hahxonhue, min jato hahxonai quescajaribiquin mia hahxonnon.

³² Matohon queenaibohon tah man copinani queenai. ¿Jaa copi man shinanyahpabo hihqui man shinanain? Nincayosmabo rihbi ta jascanica qui, jatohon queenaibohon queeni copinani. ³³ ¿Caibaan rihbi mato siribojaxonah, copinanquin sca jato siribojaxon-quin bi man jaa copi hicha shinanyahpabo man jihuetai man shinanain? Nincayosmabaan rihbi ta jascanica qui. ³⁴ ¿Jan mato hinanrihbitihi honanxon man joni huetsa coriqui hinantahbax man jaa copi shinanyahpa sca jain? Nincayosmabaan rihbi ta hahbe nincayosmabo hinantahbahiqui, jatihibi bihribiyaxonon. ³⁵ Jaabo jascahi bi tah man maton rahuibohon man shinantihi. Jascapahbo siribojaxonnahue. Hinantahxon bihribiti masa shinanyamanahue. Naihohxon sca ta Papan mato hinanrihbiyaxihqui, hashoan hicha sca. Bihribiti shinanxonma hinantahbax tah man noquen naihoh queha Papan baquebo jihuetihi. Jaan rihbi ta jahuen sinatahbohohon shinanihqui, jahuen tiromabohon bi shinanquin. ³⁶ Yomanahatibohon shinannahue, maton naihoh queha Papan hahcai quescajaquin. Hohmis hohmisaibohohon bi maton naihoh queha Papan jatohon shinanquin hahcai quescajarihbinahue.

*Joni huetsa qui tiromahi yohuantima**(Mt 7.1-5)*

³⁷ Min hahcai quescajayaquin bi jaan hahcai quescajaquin joni huetsan jahuab-
rajahi jisish, Jahuejanoxon jascajahiquin, tiroma joni tah qui hihiyamanahue. Jaatian ta mato rihbi Papan jascajayamayaxihqui. Caibaan mato tiromajanih bi jaa tiromani shinanyamanahue, maton Papan rihbi man tiromani shinanyamanon. ³⁸ Pishinaibo hinannahue, maton papan ta mato hinanrihbiyaxihqui. Yohuashihxonma ta tasa bochojaxon bishtaxpaquexon tsahonpaquexon shaconxon hahquirihbi matsanhihnixon mato hinanrihbiyaxihcanihqui. Hinannoxon man toponai quescajajaquin ta maton Papan mato hinanrihbiyaxihqui —hahquin Jesusen.

³⁹ Jato jascajaxon jaa patax queha joi sca jato nincamaquin. Benchen ta hahbe benche bahi jismatimahiqui. Jismacatsihqui bi ta mai xanquen qui rabebi paquetihiqui. ⁴⁰ Haxenica ta jahuen haxemanicah mentan hashoan honan hihiyamahiqui. Sirijaquin haxemaha pari ta jahuen haxemanicah quesca sca jatihiqui.

⁴¹ ¿Jenquetsahaxon min miin bero janin jihuihhuan jaxon bi miin huetsan bero qui jai pota pishca min yohitihin? ⁴² Miin bero janin jihui jaxon jenquetsahaxon sca min miin huetsa yohitihin, Miin bero janin jai pota pishca hean tsecanon tenehue huetsan, hah min jatihin? ¿Quesan! Miin bero qui jai jihui pari tah min potatihu. Jaatian pari tah min jisquin sirijaxon miin huetsa bejistihu, jahuen pota bero pishca tsecanoxon.

*Bimibo jisxon non jihui honanai**(Mt 7.17-20; 12.34-35)*

⁴³ Jihui siribo ta bimi tiromayahpa yamatihiqui. Jihui payo rihbi ta bimi siriboya jatimahiqui. ⁴⁴ Jenquetsahpa jihui hin hihxon tah non jahuen bimi jisxon jatihibi jihui honanai. Moxayahpa jihui queha tah non pama tsinguitimahi. Moxayahpa yora quihai rihbi tah non xexon bihtimahi. ⁴⁵ Noquen jointi janin siri shinanbo jaiya tah non siri yohuan noque jai. Jascarihibi tah non tiroma jonihax noquen jointi janin tiroma shinanboya tiroma yohuan rihbi jai. Noquen jointi janin jai shinanboya tah non yohuanai.

*Xobojahibo rabe**(Mt 7.24-27)*

⁴⁶ ¿Hen jahuejanon hihxon man hea Hihbon Hihbon hahcain, hen mato yohihah hea nincaxonma bi hea quenaquin? ⁴⁷ Hehqui joxon hen yohihi nincaxon jaabijaquin hah-caibo rahsi jenquetsahpabo hin hihxon tah hen mato yohihi. ⁴⁸ Jascapa hihquish tah min xobojahi joni quesca qui. Xobo jihuiho nichinnoxon ta nincacoinnicaton nemin pari mai poquiniqui, minquex mai qui nocoxon xobo jihui nichinnoxon. Jaatian ta jenehhuan joxon mai mahpobahinxon bahiquin xobo bocatsihquin bi hahtipahyamahiqui, sirijaquin jan xobo jihui nichinai copi. ⁴⁹ Hen yohihah nincaxon bi hahyamahi joni ta mashin

xobojanoxon bemacanya poquinxon jihui nichinai quescapah qui. Jenehhuon joxon maimahah ta xobo paquerestihiqui, jenen huaxa huaxascanon —jato jaquin Jesusen.

7

Capitanen joni Jesusen rohajahi (Mt 8.5-13)

¹ Jato nincamaquin queyohax sca Capernaum jema janin cahi. ² Jano ta huesti sontaro capitan rihbi jihuenishqui. Hahan jan hihti shinanai jahuen joni jai bi jaa jahuen joni hisini. Mahuati hisini racati. ³ Jesus nocoscai chanihi nincaxon jahuen joni rohaxoni Jesus jonon hihxon judio hapobo sca raanquin yohitannahue hahxon. Raanah bocani. ⁴ Jesus qui nocoxon sca hihti yocacanquin.

—Jaa hahxonrohahue, Hihbon. Nahuahax bi ta siri joni qui. ⁵ Noquen caibohon ta queenihqui. Noquen tsinquti xobo rihbi ta jaanbi noque hahxonnishqui —hahcanquin.

⁶ Jascajaha jato betan Jesus cahi. Capitanen xobo qui nocoti cahiboya sca capitanen raanah caibo sca jato behchihhi jahui. Behchixon yohicanquin:

—Hehon shinanax bi paxquini hocho joyamahue, Hihbon, hih ta jaiqui, Hihbon. Hea ta hen jahuama qui. Heen xobo janin mia hihquiti tah hen senenyamahi. ⁷ Jaa copi tah hen heabi mihqui cayamahaqui. Jano xonbi yohireshue. Min yohihah ta heen joni rohaxihiqui. ⁸ Hen tah hen honanai. Hean rihbi tah hen heen hapon yohihah hen hahcai, heen sontarobo rihbi tah hen jai, hean yonohibo. Hean cahue hahca ta catihiqui. Huetsa rihbi cahen johue hahca jahui. Nescajahue hahca cahen hean yohihi quescajaquin, hih ta jaiqui, Hihbon —hahcanquin yohixonquin.

⁹ Capitan yohuanai chanihahbo Jesus rahteti. Janobi rabejaquexon chibanaibo sca yohiquin:

—Mato yohinon nincacoinnahue. Jascapa nincacoinnica tah hen ni huestibi Israeli baquebo merayamanihqui —hahquin.

¹⁰ Jesusen yohihah sca ta capitan janin boribixon jahuen joni rohascai meracannishqui.

Yononmanen baque Jesusen teehimahi

¹¹ Hoxashinahax mohiyahtax res sca ta Nain hahcaibo jema janin Jesus cahi canishqui. Jahuen haxenicabo betan hicha jonibo rihbi Jesus manahi bocani. ¹² Jema xehqui qui nocoti caquin sca tsahoni jahuibo behchicanquin. Mahuatipi hiabenahibo behchicanquin. Jaa huesti jahuen baque mahuatipi quen cajon hiacaibo jahuen maman chibanbenaquin. Jahuen bene yamahi, yononma. Jema mehabo rihbi hicha jaa manahi becani. ¹³ Yononma jixxon hahan shinanxon:

—Huaohiyamahue —hahquin noquen Hihbaan.

¹⁴ Yohixon caxon sca cajon mehequin. Jan mehehiya hiacaibo janobi nihreneni.

—Beronan. Mia tah hen yohihi, huenihue —hahquin.

¹⁵ Jan yohihah mahuatipi tsahohihnasci. Tsahohihnatax yohuanscaiya jahuen maman bihnon:

—Miin baque bihhue —hahquin. ¹⁶ Hihti rahte sca jacani.

—Papan ta noque hahxoniqui. Jahuen joi nincamanica janon ta noque quiha huesti Papan caisnishqui —hahcanquin, Jesus yohihi.

—Noque jahuen jonibohon ta Papan shinanihqui —hihcanahi boribicani.

¹⁷ Yohuanchanicannahiboya sca ta Judea mai janinhahbaan jatihixonbi nincanishqui, chanihahbo, jaa senenbi jihuetaibaan rihbi nincaquin.

Nashimanicahen raanaibo (Mt 11.2-19)

¹⁸ Juaman haxenicabaan rihbi Juan yohiquin. Nincaxon rabe jahuen haxenica Juaman raanscaquin. ¹⁹ Noquen Hihbo yocaqui cahábo hihxon jato raanquin.

—¿Hoa jahui joni Papan noque yohini mia quin? ¿Jo hen jatiquin huetsa, non mananon? hahquin yocatannahue —hahquin. ²⁰ Jaan raanah cahax nocoxon yohicanquin.

—Nashimanicá Juaman ta noque raanaxqui non mia yocanon. ¿Hoa jahui joni Papan noque yohini mia quin? ¿Jo hen jatiquin huetsa, non mananon? —hahcanquin.

²¹ Jatón jisnonbi sca hicha hisinaibo jaan rohajaquin. Hohmis hohmisaibo rihbi rohaxon tiroma yoshiman jatsanjahibo rihbi rohajaquin. Hicha benchebo rihbi rohajaquin, jisbo sca. ²² Jaatian yocacabo sca jaan yohiquin:

—Man jixxon nincacah Juan yohitannahue. Benchebaan ta jisresscaiqui. Chantobo ta nihresscaiqui. Sipiypahabo ta siricahinscaiqui. Pabebaan ta nincascaiqui. Mahuatipibo ta jihuierihbiscaiqui. Jahuaborajomabaan ta joi siri nincaquihqui, hahquin yohitannahue. ²³ Hen yohihi nincacoinaibo ta hahan jenimati jaiqui —jato jaquin.

²⁴ Juan yohihi boressca jaiboya sca Juan tsoa quin honanahbo hihxon tsinquijaquetaibo noquen Hihbaan yocaquin:

—¿Jahua jisí man jano tsoa jihuetaitonma caniquin? ²⁵ ¿Tahua huesti nihuen xayanaí nan? ¿Jahua cahran man jisi caniquin? ¿Chopa siri sahuehi joni nan? Hihti siri chopayahpabo tah man hapobaan xoboho pari man meratihi. ²⁶ ¿Jahua cahran man jisi caniquin? ¿Papan joi yohinica nan? Jaa rahan. Mato yohinon nincanahue. Yohinica res ma bi ta yohinica mentan hashoan coshi joibo jaa jaiqui. ²⁷ Hahqui ta huishacannishqui:

Jise: Mia bebon canon tah hen heen raanti joni raanai. Mia ta bahi bexojaxoni catihiqui mia hahan canon

hih ta jaa yohihi Papan joi janin jaiqui. ²⁸ Nincanahue, hen mato yohinon. Juaman yohihi joi mentan hashoan siri joi yohiti ta tsoabi yamahihqui. Papan jihuetaibo res ta jahuamahax bi Papan jihuemaha hashoan siri joi yohiti jaiqui —jato jaquin.

²⁹ Jan yohihi nincacax Juaman nashimanibo sca:

—Papan ta noque hihti hahxonihqui —hihscai. Coriqui cobranxonaibo betan tsinquijaquetaibo jascacani. ³⁰ Fariseobo betan jaton haxemanicahbo jascayamaí. Juaman jato nashimati queenyamanish, rahma Papa queenai quescajati rihbi queenyamaribicani.

³¹ —Rahma jihuetaibo ¿jenquetsahpabo quin? Jahua quescapahbo hin hen mato yohinon nincanahue. ³² Mato tah man baquebo jaabo rahsibi shirohi quescapahbo qui, notsi notsihi nescari yohinanaibo: Man bairahnon hihxon non rehue hahcai bi tah man bairahyamaí. Non huiniah bi tah man noque betan huaohiyamaí hihqui ta notsihi quenananiqui. Jascapahbo tah man qui, rahma jaibo. ³³ Joxon ta piti siribo Juaman piyamahishqui, xehati rihbi xehayamaquin. Jan piyamahiya tah man hahqui yohuanpahonihqui, tiroma yoshinyahpa tah qui, hihqui. ³⁴ Hea sca joxon tah hen pixon xehar-ihbihi. Hen jascajahiya tah man Hoa pihanhan jisnahue. Xehanhan tah qui. Coriqui cobranxonnicahbo ta jahuen hahberabetibo qui. Hohchamisbo ta jahuen hahberabetibo qui hih tah man janiqui, hea yohihi. ³⁵ Tsoa ponte shinayahpa quin hihxon ta jenques jihuethquin hihxon jisxon pari non honantihi hih ta jacanihqui. Jascatihi bi tah man hehqui yohuanresai —jato jaquin.

Fariseon xoboho Jesus nocotai

³⁶ Jaatian sca:

—Heen xobo janin pihi canoxahnhue —hah huesti fariseo jonin sca jaah, jano cahax mapetax Jesus hisquen racati, pinoxon. ³⁷ Jaa jema janin rihbi huesti hahresti haibo jai. Fariseonen xobohoxon Jesusen pihi honanax jahui, pomo xecobenahi. Jahuen hahan hininjati rahoya pomo. ³⁸ Mapetax Jesus cahchiqui nihrenenax jahuen tahe qui cahcopaquetax huaohihqui. Huaohihqui bi jahuen beró jenen jahuen tahe qui toisihqui. Jahuen boon sca tasoxon, tahe qui tatsohahxon jahuen hinintinin jahuen tahe hininjaquin. ³⁹ Jaa jisish, jahuen jointi chicho fariseo yohuanscai:

—Papan joi chaninicaion ta neatohon honanquehanihqui. Hoa haibo jenquetsahpa quin, jenquetsahpaton mehehiquin hihxon cahen honanquehan, hohchayahpa haibo can —hihqui jahuen jointinin. ⁴⁰ Fariseo jascaraion sca:

—Mia ta pishca yohicatsihqui, Simoman —hahquin Jesusen.

—¿Jahua hin, maestron? Hea yohiroahahue —hahscaquin.

⁴¹ —Coriqui jan jato hinantahni cahen rabe jonibaan jaton patoro ribinnish. Huetsan cahen rabe bari teexon copijati ribinish. Huetsan cahen rabe hoxne teexon copijati ribinnish. ⁴² Copijati hahtipahyamahiboya cahen jaton patoronen jato Jascabi sca janon, jenenahue hahcan. Jato jascajaquin hahxonah sca jahuemaha hashoan jahuen patorohon queennishquin? Yohihue —hahquin Jesusen.

⁴³ —Hean shinanah ta hoa hashoan ribinpahoni hashoan rihbi sca jahuen patorohon queennishqui —hahquin Simoman.

—Hihcoini. Pontejaquin tah min shinanai —hih sca Jesus jai. ⁴⁴ Haibo jisxon sca Simon yohirihbiquin:

—Nea haibo jise. Miin xoboho mapetaion tah min hea tachoquiti hinanyamahahqui. Neatohon caya jahuen bero jenen hea tacho tachoxon jahuen boon sca hea tasohihqui. Mapetaion tah min hea mehuetyamahahquin. ⁴⁵ Neatohon ta hihcaxon tahe qui hea tatsohahquin jeneyamahiqui. ⁴⁶ Hahan boo masquiti min hea jahuabi hinanyamahah bi ta neatohon hea hahan hinintinin tasquihiqui. ⁴⁷ Jaa copi tah hen mia yohihi, jahuen hohcha hichahi bi tah hen jatihibi sohuahi, jan hihti queenscanon. Non hichatahma sohuaxonah ta hichatahma rihbi noquehon queencaniqui —hahquin. ⁴⁸ Haibo sca yohiquin:

—Miin hohcha tah hen sohuaxonai —hahquin. ⁴⁹ Hahbetan pihi tsahotaibo sca jaton jointi chicho yohuani.

—¿Jahua hihxon hohcha sohuaxonti jaan shinanihquin? —hihcani. ⁵⁰ Jascaraiboya bi haibo yohirihbiquin.

—Hen mia hahxontihi min shinancoinai copi ta miin hohcha yama sca qui. Sirijaquin shinani sca cahue —hahquin.

8

Jesus yanapanaibo haibobo

¹ Janohax cahax res sca janobo jai jemabo janin caxon joi siri Jesusen jato yohiquin. Hani jemabo, hanitahma jemabo, jatihibi janin Papan jihuemati joi jato nincamaquin. Jahuen doce haxenicabo rihbi jaa manahi bocani. ² Haibobo rihbi jan rohajaho jato betan bocani. Tiroma yoshiman jispahoni haibobo rihbi jan rohajaho jato manahi bocani. Huetsa cahen Maria Magdalena, siete tiroma yoshiman hihbojani bi jaan rohajaha rohascai. ³ Huetsa cahen Juana, Cusan haibo. Jaa Cusa ta Herodesnin tininti hihpahonnishqui. Huetsa rihbi cahen Susana. Huetsa haibobo rihbi cahen hicha. Huaiyahpaxon jato pitijaxonai haibobo.

Mihsahahbonnicah

(Mt 13.1-9; Mr 4.1-9)

⁴ Jemabo janinhax jonibo hahqui tsinquijaqueti nocoscaax hichascaiton sca ta jaa patax queha joi jato nincamanishqui. Nescajaquin jato yohiquin:

⁵ Jahuen huai banahi cahen huesti joni canish. Jahuen huai chianxon sca bero romishin banaquin mihsahahbonaquin. Mihsahahbonahah cahen caibo bero bahinbi paqueti, jahuibaan jamabonascanon. Hihsabaan rihbi joxon topibonaquin queyoquin. ⁶ Caibo bero rihbi cahen chahoma main paqueti. Jaabo cahen joconax bi bamacanya hihquish xanahi pehuacanascai. ⁷ Caibo bero rihbi moxa bero tocan paqueti. Moxa bero betanbi joconax bi hanihiton moxan sca rishquiquin. ⁸ Caibo bero rihbi siri main paqueti. Jaabo cahen joconax, hanihax bimih, hichahi. Huesti bero potaho joconax bimiyahpascaax cien beroyahpascai. Berotihibi jascari —hahquin.

Jaa joi jato nincamaxon coshin sca yohiquin:

—Hahan nincati pabinquiyahpaxon nincanahue —hahquin.

Honanyamahiboya pontejaquin jan yohihi

(Mt 13.10-17; Mr 4.10-12)

⁹ Jaatian jahuen haxenicabaan sca yocaquin:

—¿Jahua noque haxemacatsihquin min jascarain, Hihbon? —hahcanquin.

¹⁰ —Papan jihuemati jenquetsahpa quin man honannon hihxon tah hen jaa patax queha joi yohihi, caibaan honannonma hihxon. Jisxon bi jisyamahabo hihxon. Nincaxon bi nincayamahabo hihxon tah hen jascapa yohihi.

Mihsahahnica jahuahi jaiquin hihxon jan yohihi

(Mt 13.18-23; Mr 4.13-20)

¹¹⁻¹² Nea tah qui. Jaa bero ta Papan joi qui. Jonibo cahen bahinxon nincacaibo. Nincascaibaan bi ta nincacoinax Papan baquebo sca jamis hihxon tiroma yoshiman jato jaa joi bichinihqui jaton jointi janin yamascanon. ¹³ Chahoma main paquetaibo ta joi siri nincacax coin coinxon bichibo qui. Bamacanya jaton tapon jai quescaxon ta basima tahni bichipixon jenebahinaibo qui. ¹⁴ Moxa chian paquetaibo ta nincacoinaibo qui. Nincacoinxon bi ta huetsa shinanbo rihbi sca bihcaniqui, masa shinantibo, jahuabora tsamanti shinanbo, mai mehabo costan costanti shinanbo. Jascapa shinanbo jointi qui bochohax ta shinan siri caitimahi qui, jahuama quesca sca jai. ¹⁵ Siri main paquetaibo ta sirijaquin bihxon nincacoinxon jeneyamahibo qui. Jascapah ta bimi hichayahpa qui.

Johue

(Mr 4.21-25)

¹⁶ Tsoanbi tah non johue quetejaxon quentipan sca mahpobahinyamahi. Quetejaxon tah non tapo naman rihbi tsahonyamahi. Jahuen tsahonti janin caya tah non johue tsahonai, jahuibaan sca jahuen xaba jisnon hihxon. ¹⁷ Man jonexon hahcai ta janibi sca Papan yohipaquexaxihqui. Jan yohiyamaxihqui ta yama qui, jonexon hahcaibaan bi. Jaan honantima jonexon hahcai ta yama bi res qui. Jatihixonbi honanahbo sca ta jonexon hahcaibo jaan yohipaquexaxihqui, jahuabi jone yamascanon.

¹⁸ Jaa copi nincacoinnahue. Nete queyoscaiya ta nescajayaxihqui: Papan hinanah min jaiya ta hashoan sca jaan mia hinanyaxihqui. Jaan hinanah bi min yamahiya ta min jai pishca rihbi mia bichintihqui —hahquin.

Jesusen mama jahuen huetsabo betan nocotai

(Mt 12.46-50; Mr 3.31-35)

¹⁹ Jaatian jahuen mama betan jahuen huetsabo nocoti jahui. Joxon bi jonibo tsamatai ya Jesus yohuanquihti hahtipahyamacanquin. ²⁰ Caibo sca chanihi jahui.

—Miin mama betan miin huetsabo ta jemanhihtinin nichiqui. Mia ta jiscatsihcanihqui —hahcanquin. ²¹ Jasca jaiboya sca:

—Hean yohihi nincaxon hahcainaibo ta heen mamaya heen huetsabo qui —hahquin.

Nihueya behchon tantijahi

(Mt 8.23-27; Mr 4.35-41)

²² Huetsa neten sca ta jahuen haxenicabo betan nontin naneti canishqui. Nanexon sca: —Hian pohquejaquenahue —jato jaquin. Pohqueti caquin hoque quexa sca chibi-bonacanquin. ²³ Nihuen xotonah sca pohquecanahi cahi, pohquecanahi cahi, nontinbi sca Jesus hoxascanon. Hian naponbi sca nihuehuan jato qui paqueti. Behchoman bochojaha nonti hihquicatsihscái. ²⁴ Jesus qui caxon sca mohinxon:

—Hihbon. ¡Non tah non hihquiscái, Hihbon! —hahcanquin. Huenicahuanxon sca nihueya behchonbo yohiquin. Tantinahue jan jaiya tanticahinscái. Jahua nescascái. Jaatian hahe cahibo sca:

²⁵ —¿Man nincacoinyamabiresain? —hahquin. Jaabo rahte rahtetax yohuan yohuanaiton jato jascajaquin.

—¿Jahua joni cohren jaa quin? Jaan yohihah ta nihuen rihbi nincaquihqui. Jaan yohihah ta behchoman rihbi nincaquihqui —hihcani.

Gadra joni yoshinyahpa

(Mt 8.28-34; Mr 5.1-20)

²⁶ Jaatian sca nocotax Gadara main sca taxnacani, Galilea mai hoque quexa. ²⁷ Bototax mapescaiton sca jaa behchihi yoshinyahpa joni jahui, janohahbaan caibo. Tiroma yoshiman hihbojani cahen basi sca chopanma nihpahonish. Jahuen xobon jihueyamahi. Tsahon tocanbo cahuan resí. ²⁸ Jesus nocotai merahax bishquihihan sai saihihonahi jahuex raboxonen nichish betihihpaqueti. Coshin sai saihihqui.

—¿Hea jahuejahi min jahuin, Jesusen? Mia tah min naihoh queha Diosen baque qui. Mia tah hen hihti yocacái. Hea tiromajayamahue —hahquin.

²⁹ —Jaa joni jenebahini catanhue, tiroma yoshiman —Jesusen jaah sca yoshin jascari sai saihihqui. Hicha coti jahuen yoshiman yahtanxon bohá cahen basi sca jaa joni hohmis hohmispahoni. Cadenanen menexxon tanexxon coiranabaan bi cahen cadena tesabahnax jano tsoa jaitonma jabapahonnish, yoshiman jatsanjahah. ³⁰ Jascapa hihqui bi Jesusen yocaquin.

—¿Mia min jahua jane quin? —hahquin.

—Hea ta legión qui —hihqui. Jaa janin hicha yoshin nocohihnaxon hichaxon hihbojani cahen jaa janeya janish. ³¹ Picotax botannahue hahcá sca hihti yohiscacanquin yoshinbaan:

—Noquen quinhuan janin, jano Diosen noque potayaxihqui janin noque potayamahue —hahcanquin. ³² Jano rihbi cochi repinica jai, pihi manichi hichahi.

—Hoa cochi qui non canon yohirohahue —hahcanquin yoshinbaan.

³³ —Botannahue —hahca sca jaa joni jenebahini bohax cochi qui sca hihquihí bocani. Yoshin jato qui hihquihah sca mapoho rocohihcanahi cahi, jene qui paquetax hahsacani cochibo.

³⁴ Jascahibo jisish cochi coirannicahbo jacahini caresscái. Caxon jema janin jihuetaibo yohi yohixon hocho jihuetaibo rihbi nincamacanquin. ³⁵ Yohihah sca jisi becani. Jahua jaaxquin hihquish becani. Jesus qui nocoxon sca jaa patax tsahotai jaa joni meracanquin, jahuen yoshin tiroma yamascai. Chopayahpahax res sca sirijaquin shinani tsahotaiton meracanquin. Jaa jisish rahte rahtecani. ³⁶ Raqueya sca jaibo bi caibaan sca jan rohajahi jisxon yohirihbicanquin:

—Jascajaquin ta yoshinyahpa joni rohajahaxqui —hahcanquin. ³⁷ Jaatian tsinquijaquexon Gadara janinbo jihuetaibaan sca Jesus yohiquin, Noque jenebahini catanhue, hahcanquin. Hihti raquexon Jesus camati shinaxon jascajacanquin. ³⁸ Jaatian nanetax cacatsihqui bi yoshin tiroma potamaha joni rihbi hahbetan cacatsihqui. —Hea rihbi hiohue —hahca bi jeenhayamaquin.

³⁹ —Miin xobon caxon Papan mia hahxona jato yohihue —hahquin. Jascajaha jatihibi janin sca yohibonahi cahi, Jesusen ta hea rohajahaxqui, hihcanahi.

Jairon baque; chixanan hisinai haibo

(Mt 9.18-26; Mr 5.21-43)

⁴⁰ Hoque quexa Jesus nocotaiton sca janohahbaan johue hahquin sirijaquin. Jaa joti manarahsihimaan jaa bihquin sirijaquin. ⁴¹ Jaatian jaton tsinquiti xobo hihbo jahui,

Jairo janeya. Jesus bebon miracahpaquexon, Heen xoboho johue, hihxon hihti yocaquin.
⁴² Jaa huesti jahuen baque haibo hisinai quen hihti yocaquin. Doce bari jahuen baque jai mahuacatsihscai. Jeenhihquish hahbetan caresscai bi jonibo hichahi. Tsinquitax hueranhahnanax Jesus qui tsehquesihcanahi bocani.

⁴³ Jaatian jano rihbi huesti haibo jai, hisinax jahui. Doce bari sca jimi pota potahi haibo. Tsoanbi jaa rohajati hahtipahyamahiya, hahchon nihxon Jesusen coton quexa mehequin.

⁴⁴ Mehehax rohacahin sca jai, jimi tanticahinscai.

⁴⁵ —¿Tsoan man hea mehehahquin? —hahscaquin Jesusen.

—Hen tah hen hahyamahaqui —hahcaibo rahsi jaiya sca Pedronen yohiquin:

—Hichaxon ta mia tejabohanxon mia tsahca tsahcahahbonacaniqui, maestron —hahquin.

⁴⁶ —Tsoan rah ta hea mehehaxqui. Heen coshi hahqui cainai tah hen honanahqui —hahquin.

⁴⁷ Joneti hahtipahyamahax, raqueyahax saqui saquihihquish, jahuex jaa bebon raboxonen nihxon sca, Hisinnixon tah hean mia mehehahqui, Hihbon, hahquin haibaan yohiquin sirijaquin. Jatihixonbi nincanon sca yohiquin, jan rahma rohacahinscai yohiquin sirijaquin.

⁴⁸ —Shinancoinax copi tah min roha sca jai, baquen. Jascabi roha sca jahue —hahquin Jesusen sca.

⁴⁹ Jaa jan jascajaquin yohiparihiya bi tsinquiti xobo hihbo yohihi jahuen joni nocoti jahui.

—Miin baque ta mahuascaaxqui. Noquen haxemanica jatsanjayamascahue —hahquin.

⁵⁰ Jaa yohihi nincaxon tsinquiti xobo hihbo jisanan:

—Masa shinanyamahue. Shinancoinreshue. Roha ta jatihiqui —hahquin Jesusen.

⁵¹ Jahuen xoboho mapexon sca hahbe nichibo Jesusen mapemayamaquin. Pedro, Juan, Jacobo, xontaconen papa, jahuen mama, jaabo rahsi res hahbetan hihcomaquin. ⁵² Texe jano tsamataibo cahen jaya huinihi. Jaya huaohihqui.

—Huaohihyamanahue. Mahuatihma bi ta hoxaresiqui —hahquin Jesusen. ⁵³ Jascajaha bi xontaco mahua sca jai honanxon Jesus hosancanquin. ⁵⁴ Xontaco mehuetanxon sca coshin yohiquin:

—Huenihue, baquen —hahquin Jesusen. ⁵⁵ Jahuen yoshin joribiscaax xontaco huenicahuanscai.

—Piti hinanhue, jan pinon —hahscaquin Jesusen. ⁵⁶ Jahuen papa betan jahuen mama rahte rahteti. Jenquetsahaquin rohajahaxquin yohiyamahahbo sca jahuen papaya jahuen mama hihti yohiquin:

—Tsoabi yohiyamanahue —hahquin Jesusen.

9

Jahuen haxenicabo Jesusen raanai

(Mt 10.5-15; Mr 6.7-13)

¹ Jahuen doce raantibo sca quenamaxon cahen coshi shinan jato hinanquin. Jatihibi tiroma yoshinyahpabo rohajati, jatihibi hisin rihbi rohajati coshi hinanquin. ² Hinanxon Papan jihuemati joi yohihahnan hisinaibo rohajabonanon hihxon jato raanquin.

³ —Jaya catibo bichishma botannahue. Mepiti tah man botimahi, borasa boyamaribiquin. Ni piti ni coriqui boyamaribiquin. Rabe cotonya rihbi tah man catimahi.

⁴ Xobon mato mapemaha janobinahue. Caribinoxon caman tah man jaa xoboho hoxatihi.

⁵ Mato mapenahue hahyamahiboya tah man jaton jema potabahini caquin sca maton sapato qui hueotai jaton mai pota jato qui tahabahintihi, nincayosmabohi honanahbo hihxon —jato jaquin. ⁶ Cahax sca jema tihibi qui nocoxon Papan joi siri yohihahnan hisinaibo rohajacnquin.

Juan rehtehox yohuanaibo

(Mt 14.1-12; Mr 6.14-29)

⁷ Herodes janeya quiquin hapo sca caibaan yohiquin, Jasca roqui Jesus jaiqui hahquin, jatihibi yohixon.

—Caibaan shinanah ta Juan mahuanish bi jihuerihbiscaiqui —hihquiboya caibo sca:

⁸ —Elías yamanica rah ta noque qui caini joribiscaiqui —hihcani, Jesus jaa hihqui shinanax.

—Neateman jihuepahonish bi teehihribiscail Papan joi yohixonnica ra tah qui —hihqui caibo rihbi sca. Jascapa nincaxon Herodesnin masa shinanquin.

⁹ —Juan tah hen textenihqui. ¿Nea yohihibo Jesus jahua joni jatihiquin? ¿Jenquetsahaxon hen jaa jistihin? —hihxon shinanquin.

*Cinco mil Jesusen pimahi**(Mt 14.13-21; Mr 6.30-44; Jn 6.1-14)*

¹⁰ Jesusen raanipi hahqui beribixon sca jaabaan caxon hahtanipi jatihibi yohicanquin. Jato canon benahue hahxon sca jaabo rahsibi sca hahbetan canon Betsaida jema janin jato hioquin. ¹¹ Jahuen bocanaxquin honanax texe rihbi jano bocani. Nocotaiton jato Benahue hahxon Papan jihuemati joi Jesusen jato honanmaquin. Hisinaibo rihbi rohajaquin jatihibi. ¹² Bepiscaia jahuen raantibo joxon yohicanquin:

—Nea jonibo camahue, Hihbon, nenobo jai jemabo janin caxon huaiyahpabo janin rihbi caxon jano hoxati sca benahahbo. Jano jaton piti benahahbo. Neno ta jahuabi yamahihqui —hahcanquin. ¹³ Jascajahabo bi:

—Maton caya jato piti hinannahue —hahquin.

—Noque tah non piti yamahi. Pichca paan pishca, rabe yapa rihbi, jaa res. Jahua hashoan tah non yamahi. ¿Yotihixon piti marohi non catihin? —hahcanquin. Cinco mil bebobo jano jai quen jascajacanquin.

¹⁴ —Cincuentabo rahsi tsahojacetannon jato mitsahohmanahue —hahquin jahuen haxenicabo. ¹⁵ Yohihah sca jascajacanquin mitsahohmaquin. ¹⁶ Jaton pichca paanya rabe yapa bihxon sca nai bejisihxon Papa yohixon tehaxon jahuen haxenicabo metisahpaquequin. Hinanah, jaabi rihbi jonibo sca hinanpaquecanquin. ¹⁷ Bihxon yaninoxon caman jatihixonbi picanquin. Pixon bi texejaribicanquin. Yapaya paan tequebo piquin texejahiboya sca doce tasa bocho tsinquirihbicanquin.

*Mia tah min Cristo qui Pedro jai**(Mt 16.13-19; Mr 8.27-29)*

¹⁸ Jaa pecaho sca Papa yohihi jaa huesti cahiya jahuen haxenicabo sca hahqui bocani. Noco sca jaiboya sca jato yocaquin:

—¿Hea jahua joni hihqui shinancanquin? —hahquin.

¹⁹ —Mia roqui Juan yamanica qui, hoa nashimapahoni. Caibaan shinanah cah min mia Elías yamanica. Caibaan rihbi jisí cah min neateman japahoni Papan joi nincamanah, hahquirihbi teehihqui —hihcani.

²⁰ —¿Maton shinanah cahran? ¿Hea tsoa quin? —jato jaquin.

—Mia tah min Papan raanai qui, min jotihí jan neateman yohini tah min qui —hahquin Pedronen sca.

*Jan mahuayaxihqui Jesusen yohihi**(Mt 16.20-28; Mr 8.30-9.1)*

²¹ —Tsoabi jascajaquin honanmayamanahue. ²² Hicha pari tah hen teneti jai, noquebaque hen jai copi. Hapobo rihbi ta Jaa ta tiroma qui hihiyaxihquiqui, hea yohihi. Jaton haxemanicahbaan rihbi ta jascajaribiyaxihquiqui. Jascajaxon ta hea rehtescayaxihcanihqui. Rehtehipibaan bi tah hen quimisha neten hihquish hahquirihbi teehihtihí —jahuen haxemanicabo jaquin.

²³ Jano jaibo rahsi sca yohirihbiquin:

—Hehchon jocatsihxon tah man matobi man queenaima sca man hahtihí. Hea rehte-hibaan bi tah hen heen Hihbo jenetimahi hihnahue nete tihibi. Jaatian tah man heen jihuetaho jatihí. ²⁴ Mahuati qui raquetaibo ta mahuatihiqui. Jascapa jihuetimahi bi ta hea copi mahuataibo queyoyamanox manatihiqui. ²⁵ ¿Nea mai jatihobi hihbojahax bi mahuatax sca jahuaya man banetihin? ¿Jaabiyahpa queyoscaxon man jahua jatihin? ²⁶ Hea hihbomacatsihyamahibo tah hen noquebaque hihxon Mia tah min henama rihbi qui hah hen jatihí. Heen joi qui hihtimahpaibo rihbi tah hen jascajatihí. Coshi shinanya joxon tah hen jascajatihí, noquebaque hihxon. Papan xabaya joxon, hicha naihoh queha yonotibo rihbiya joxon tah hen jascapa jascajatihí. ²⁷ Hihcoinja tah hen mato jai. Caibo neno nichibaan tah man mahuaxonma Papan jihuemati man jistihí —hahquin.

*Jesus xabayahpacahinai**(Mt 17.1-8; Mr 9.2-8)*

²⁸ Jato jascahipixon ocho netebo hihxon Pedro, Juan, Jacobo jaabo quimisha hioquin. Papa yohinoxon mahchi janin cahi. ²⁹ Janoxon Papa yohihahnan sca jahuen bemanan huetsapahcchini. Jahuen chopa rihbi pehnecahini, cana bacahi quescapi. ³⁰ Jaatian rabe joni hahbetan yohuani sanareneni jahui, huetsa cahen Moises yamanica, huetsa cahen Elías yamanica. ³¹ Jaabo rabe rihbi xabayahpahax hahbetan yohuani. Jerusalem janin jan mahuayaxihqui yohuancani. ³² Yohuan yohuaniboya bi Pedro jaabaan hoxan hihxon bi tenexon jahuen xaba jisquin. Hahbe yohuanai xabayahpa rabe rihbi jiscanquin. ³³ Yamanica rabe caresscacsihquiya sca Pedronen Jesus yohiquin.

—Noque neno jaah ta siri qui, maestron. Quimisha tapasnonhue, mina huesti, Moisesnina huesti rihbi, Eliasnena huesti rihbi —hahquin, jahua yohuanti honanxonma jascajaquin. ³⁴ Pedro jascari yohuanaiya bi nai cohiman jato mahporenenquin. Cohiman mahpobahinah raquecani. ³⁵ Jaatian cohiman mehax yohuanai sca nincacanquin:

—Nea ta hen caisni heen baque qui. Jaa nincanahue.

³⁶ Jascari yohuanai nincaxon jisibaan bi Jesus huesti sca jai. Jascapa jisipixon bi ta tsoabi yohiyamacannishqui. Jisyamahicamacani. Chiní sca ta yohicannishqui.

Yoshiman hihbojani Jesusen rohajahi
(Mt 17.14-21; Mr 9.14-29)

³⁷ Jaa mahchi janinhax bototipish hoxashinahax mohiyahtax cahiton sca jato behchihi tsama jonibo becani. ³⁸ Jato tocan huesti joni coshin yohuanhonahi jahui.

—Maestron, mia tah hen hihti yocacai. Heen baque jisxonhue. Jaa huesti heen baque tah qui. ³⁹ Yoshiman hihbojaha ta sai saihhcahinax jomi jomihax bacox jancharahihquiqui, hihbon. Jenexonma ta yoshiman rishqui rishquihihqui. ⁴⁰ Jahuen tiroma yoshin potamax-onnahue hen jaah bi ta miin haxenicabaan hahtipahyamahipicanaxqui —hahquin.

⁴¹ —¡Nincacoinyosmabon! ¿Jenquetsahpahi man shinancoinyamahin? ¿Jahuentiho basi hen mato betan hihquiya pari man pontetihin? ¿Jahuentiho basi cahran hen mato teneti jain? Miin baqueya johue —hahscaquin Jesusen. ⁴² Jan jaya jahuiyabi yoshiman sca main huer-anbohanxon jomimaribiquin. Jascaraiton sca yohixon tiroma yoshin jenemabahinxon:

—Nea ta miin baque qui, bihhue —hahscaquin Jesusen. ⁴³ Jan jascaxonai jisish rahte rahtecani jano jaibo jatihibi.

—¿Jahuentiho coshi Papan shinanyaxon noque hahxonihquin? —hihcani.

Jan mahuayaxihqui Jesusen yohirihbihi
(Mt 17.22-23; Mr 9.30-32)

Jan jato hahxonai jatihibi jisish rahte rahtetaibo rahsi. Jaatian sca jahuen haxenicabo jaa yohiquin.

⁴⁴ —Hen mato yohinon nincquin sirijanahue. Jaabaan hea jahuejara janon ta jonibaan hea bihmayaxihcanihqui. Jaabaan hea bihti ta hochomascaiqui —jato jaquin. ⁴⁵ Jan yohihah jahua hihcatisihquiquin cahen honanyamacannish. Jaton jointi xehpotaiya cahen honancasquimacannish. Jahua hihcatisihquiquin hihxon hihbo yocatihí bi yocati qui raquecani.

Tsoa hashoan hapo quin hihquibo
(Mt 18.1-5; Mr 9.33-37)

⁴⁶ Jaa pecaho sca jaabo rahsibi yocacahanani. Tsoa non hashoan hapotihin hihcani. ⁴⁷ Jaton jointi chico yohuanaibo joi honanxon, jano nichí baque pishca bihxon jaa pataxxon jato yohiquin:

⁴⁸ —Nea baque pishca heen janen bichi jonin ta jascajaquin hea bichiqui. Hea bichi jonin ta hea raanni rihbi bichiqui. Mato tocan hashoan hahxonnica joni ta hihti shinanya joni qui —hahquin.

Noque panteyamahibaan noque yanapanai
(Mr 9.38-40)

⁴⁹ —Maestron, tiroma yoshinbo miin jane yohixon camahi joni tah non jisiqui. Jaa tah non Jascajayahue hahbenanai, jan noque betanbi nihyamahi copi —hahscaquin Juaman. ⁵⁰ Jascajaha:

—Jascapa panteyamanahue. Mato panteyamahibaan ta mato yanapaniqui —hahquin Jesusen.

Jacoboya Juan Jesusen hihti yohihi

⁵¹ Jahuen Papa qui cati hochoma sca jaonahiya sca Jerusalen janin cati shinanax, jano res cahí cahí. ⁵² Jano jan nihnoxihqui janin pari canon, jonibo raanquin. Jaan raanah bocani. Samaritano jema qui nocoscaxon noquen hihbo jano hoxati benaxonabo bi jano hoxati hinancatsihyamacani, samaritanobo. ⁵³ Jerusalen janin jan cahí honanax jano hoxamati queenyamacani. ⁵⁴ Jano nocoscaxon jascapahbohi jisxon rabe jahuen haxenicabaan yocaquin:

—¿Naihoh quehax jato qui chihi paquexon jato queyobahinti non Papa yocatomahin, hihbon? —hahquin Jacobo betan Juaman. ⁵⁵ Jato qui rabejaquexon:

—Hahyamaquin rahan —hahxon pontequin jato hihti yohiquin. ⁵⁶ Yohiquin sirijaxon jaa jema huinobahini caresscaax cahí. Huetsa jema qui sca nococani.

Jesus betan nihcatisihquibo
(Mt 8.19-22)

⁵⁷ Janohax boribicani. Huinotaiton sca huesti jonin Jesus yohiquin:

—Jano mia cahi tihibi tah hen mia manahi catihi, miin joi yohinicanoxon —hahquin.

⁵⁸ Jascahiya:

—Caman hinobo ta jaton mai quini jaiqui. Pehiyahpabo rihbi ta nahayahpa qui. Hea noquebaque tah hen jascayamahi. Hea noquebaque tah hen jahuenbi hoxati yamahi —hahxon, huetsa sca yohiquin:

⁵⁹ —Heen joi yohinicanoxon hehbe johue —hahquin. Hehbe johue hahcá bi:

—Heen papa pari hen mihintahyaxahnnon, hihbon —hahquin.

⁶⁰ —Mahuataibaan hahbe mahuataibo mihinnon jenehue. Papan jihuemahi joi yohibonahi cahi johue mia —hahscaquin noquen Hihbaan. ⁶¹ Huetsa sca yohuani:

—Mihbetan tah hen catihi, hihbon. Heen jenabo pari hen yohitannon manatah hue —hahquin. ⁶² Jaa sca yohiquin:

—Miin tee queyoyamaxon bi min japahoni janin sca miin shinan camahax tah min Papan teexonnica mia jatimahi —hahquin.

10

Setenta Jesusen raanai

¹ Jasca jaipixon sca huetsa jonibo sca joi yohibonatannahue hahquin. Jascjaxon setenta raanquin, rabe rabe bohábo hihxon. Jano jaabi nocoyaxihqui xobo jatihibi qui canon jato raanquin, jano jan nocoyaxihqui jema tihibi. ² Jato raannoxon yohiquin:

—Banaho huai johuescaax tsinquiti hicha jai bi ta teexonnica hbo huestibohiqui. Jaa copi huai hihbo yocanahue, tsinquixonnica hbo jahuen huai chian jan raannon. ³ Jistahi man. Hinobo tocan man carnerobo canon quesca tah hen mato coiranhanan raanai. ⁴ Coriqui boyamanahue. Ni borasabi, ni sapatobi, boyamanahue. Bahin caxon jonibo behchixon yohuanquihnxonma huinóbahintannahue. ⁵ Xobo qui nocoxon tihibi, Papan hahxonah man neno jascabihi jayamahan, hahnahue sirijaquin. ⁶ Mato sirijaquin bichiboya ta man yohihah quesca sca Papan jato hahxonyaxihquiqui. Mato sirijaquin johue hahyamahiboya ta man jato sirijaquin yohiyamahah quescatihiqui. ⁷ Mapetax tah man jaa xoboho sca jihuetahtih. Jano jihuetahxon jaton piti mato hinanahbo pinahue. Jaton xehati xehaquin. Teexonnica copijaha tah qui. Jaa copi jatona pinahue. Xobo tihibi tah man piquin betsatimahi. ⁸ Jemabo janin rihbi nocotaiton mato sirijaquin benahue hahca jaa xoboho hoxanahue. Mato hinanai pitibo pinahue. ⁹ Jano jaibo rohajaxon, Papan mato jihuemati ta nocoscaiqui, jato janahue. ¹⁰ Jemabo qui nocotaiton bi mato benahue hahyamahiboya tah man jaton jemanhihtibo janin nihxon man yohitih: ¹¹ Noquen tahe qui hueotai mai pota tah non mato qui tahabahinai man jascapahbo copi. Jaabi honannahue. Papan jihuemati ta hochoma sca jaonahiqui. ¹² Mato tah hen yohihi. Casticanti neten ta sodomitobo Papan casticanai mentan hashoan coshin jaton jema jaan casticanyaxihquiqui.

Nincayomabo

(Mt 11.20-24)

¹³ ¡Hahrai hih tah man jayaxihqui, corazino jonibon! Jascarihbi tah man jayaxihqui, Betsaida jonibon. Mato tocanxon heen coshiyaxon hen hahní quescajaribiquin hen Tiro jema janinxon hahcaiya cahen neateman jaton hohcha copi benaxon hahan benati chopa sahuehax chih mapo mapocohtax tsahoxon jaton shinan pontehan. ¹⁴ Tiro joniboya Sidono jonibo jan casticanyaxihqui bi ta hashoan hihtijaquin sca Papan mato casticanyaxihquiqui. ¹⁵ ¡Capernaum jonibon! ¿Naihoh jihuetax quescari man maton jema janin siripi jihueta shinanain? Maton jema ta maton tsahon baneyaxihquiqui —jato jaquin.

¹⁶ Jascjaxon jahuen raantibo yohirihbiquin:

—Man yohihah nincacaibaan ta hea nincacuihqui. Man yohihah bi nincacatsihyamahibo ta hea rihbi nincacatsihyamahiqui. Hea nincacatsihyamahibo ta hea raanni heen papa rihbi nincacatsihyamacaniqui —hahquin.

Jahuen setenta beribiscái

¹⁷ Raanah, botanipish, jahuen setentabo jenimahonahi beribicani. Nocoxon:

—Yoshinbobi tah non miin janen yonohipi qui, Hihbon —hahcanquin.

¹⁸ —Naihoh quehax cana bacahihcamahi tah hen Satanas potahah paquetai jisniqui. ¹⁹ Nincanahue. Hean raanah caquin man rono jamabahinti coshi tah hen mato hinanipiqui. Nibo jamabahinti rihbi. Satanasnen yoshinbaan mato jahuejati hahtipahyamanon tah hen mato coshi hinanipiqui. Ni jahuatohonbi ta mato tiromajatimahiqui. ²⁰ Tiroma yoshinbo man camati hahtipahi bi tah man jaa copi jenimatimahi. Naihohxon maton jane huishá sca jai copi jenimanahue —jato jaquin.

*Jahuen Papa betan jahuen baque**(Mt 11.25-27; 13.16-17)*

²¹ Jato jascjaxon Dios Yoshiman hahan jenimati hinanah hihti jenimaxon noquen Papa sca yohiquin:

—Hahxon tah min hea jai, Papan. Mia tah min naiyahpa mai Hihbo qui. Shinamanhuanyahpabo betan honanbaan honancasquimanon tah min jato pantexon, miin baquebaan sca honannon min jato honanmahi, Papan. Mian jisi jascapa siri quen tah min jascjaxonai, Papan.

²² Papan ta hea jatihibi hinaniqui. Jahuen baque tsoa hin ta tsoanbi honanyamahihqui. Papa huestichin ta honaniqui. Tsoa heen Papa quin tah hen jahuen baque hihxon hea huestichin hen honanai. Caibaan ta honanyamahihqui. Hean yohihah res ta caibaan rihbi honanscaiqui —hahquin. ²³ Jascaxon jahuen haxenicabo rahsi sca yohirihbiquin:

—Man jisibo jisish jenimanahue. ²⁴ Man rahma jisi ta Papan joi yohixonnicaambo betan quiquin hapobo hichaxon jiscatsihxon bi hahtipahyamacannishqui. Man nincacai ta nincacatsihxon bi nincayamacanpahonishqui —jato jaquin.

Samaritano

²⁵ Jaatian nihxon judiobaan haxemanicahton jenquetsahaxon yocaxon non Jesus tiromahi yohuanmatihin hihxon yocascaquin:

—Maestron, ¿jenquetsahax hen queyoyamanox manatihin? —hahquin.

²⁶ —¿Papan joi janin jahua huisha jaiquin? ¿jahua min jano jisin? —hahscaquin Jesusen.

²⁷ Jaan yocacah sca:

—Miin Hihbo Diosohon tah min miin jointiboyabi queentih, miin yoshinboyabi, miin coshiboyabi, miin shinanboyabi tah min jahan queentih. Mihbe jihuetaibohon tah min queenrihbitih, miabi min queemehti hihqui quescaih —hahquin.

²⁸ —Hihcoini. Jihuenox hihqui jascahue —hahscaquin. ²⁹ Jascajanicaah sca jan hihqui Jesus shinanmacatsihxon sca Jesus yocarihbiquin:

—¿Tsoa heen hahbe jihuetaibo quin nan? —hahquin.

³⁰ —Nesca tah qui. Huesti joni cahen Jerusalem janinhax Jericó jema janin cahi cahpaquehti. Cahiton sca cahen tiromabaan bihxon jahuen chopa bichinxon, rishqui rishquixon hahan mahuati tsehueya sca potabahincanquin. ³¹ Sacerdote huesti sca jano huinoti jahui. Bahin joxon jahuen caibo jano miracahtai merahax tecayacahini caresscai.

³² Levito baquebo huesti sca jascarihibi, jahuen caibo. Jano nocoxon merahax tecayacahini caresscai. ³³ Samaritano huesti sca hocho quehax jahui, jahuen nahua sca. Hahqui nocoxon jahan shinanxon bihtanxon, rahonquin. ³⁴ Olivo bimi xeniya vino rahojaxon jayaxon jahuen tsehue rahonquin. Jahuen cabacho charracaxon sca jano hoxati xobo janin sca hioquin. Janoxon sca rahonxon coiranshinaribiquin. ³⁵ Xaba paque sca jaiya sca rabe neten teexon cananai tih coriqui hinanxon sca xobo hihbo yohiquin: Jaa hea coiranxonhue. Jaa coiranquin min hashoan sca coriqui castanaiya tah hen joribixon mia copijatih. ³⁶ Jascajaquin yohixon sca Jesusen yocaquin:

—Yometsohbaan tsehuejaha racatai qui cahen quimisha joni nocoti. Mian shinanah, jahuemeha jahuen hahbe jihuetah quesca janishquin? Hea yohihue —hahquin haxemanica yocaquin.

³⁷ —Hoa jahan shinanxon hahxonai rahan —hahscaquin.

—Mian rihbi jascajatanhue —hahscaquin Jesusen.

Martaya Maria janin Jesus nocoti

³⁸ Janohax Jesus, jaabo, boresscaax huetsa jema janin nococani. Jano cahen Marta janeya haibo jihuenish. Jaan Mapehue hahquin jahuen xobon Jesus mapenon. ³⁹ Jahuen shara rihbi cahen jano jihuepahonish, Maria janeya. Jesusen haxemahi nincacatsihqui cahen jaa patax tatsahoxon jan yohihi Marian nincacatin sirijaquin. ⁴⁰ Jahuen tee hichahiya Marta tee teeti. Piti qui jaa mehca mehcatai bi Marian nincacatin. Martan sca yocaquin:

—¿Hea huesti hen tee teenon heen sharan hea yanapanyamahi min jisyamahin, Hihbon? Yohihue, jan hea yanapannon —hahquin Martan.

⁴¹ —Hicha tah min masa shinanai, baquen. Miin tee hichahi tah min jatsanai. ⁴² Huesti shinanyati ta jaiqui, Papan joi nincati res. Marian ta sirijaquin shinanax nincati queenihqui. Jan queenai ta tsoanbi bichintimahi —hahquin.

11*Papa yocati Jesusen haxemahi**(Mt 6.9-15; 7.7-11)*

¹ Huetsa neten sca cahen huetsa janin caxon janoxon Papa yocanish. Papa yocaquin queyoscaiya huesti jahuen haxenicaton yohiquin:

—Juaman ta jahuen haxenicabo Papa yocati haxemanishqui, Hihbon. Jascajaquin rihbi noque haxemahue, non Papa yocanon.

² Haxemahue hahcá jato haxemaquin nescajaquin:

—Papa yocacatsihquin nescajanahue.

Papan, mia Papa Dios jai honanahbo jahue. Miin jihueta hbo non janon noque hihbojahue. Min naihoh hahcai quescajaribiquin neno rihbi hahhue.

³ Nea neten piti noque hinanhue, Hihbon.

⁴ Noquen hohcha sohuahue. Mihqui non hohchani min shinanyamascai quescajaribiquin tah non joni huetsa tenexon noque qui tiromahibaan bi jato sirijaquin yohuanquihnai. Jascajaquin rihbi noquen hohcha sohuaxon jaa shinanyamascahuae, Papan. Satanasnen noquen coshi tanatihini janin noque hioyamahue, Papan. Satanas noque bihmayamahue

hahquin yocanahue —jato jaquin.

⁵ Jascajaquin haxemaxon sca jato yohiscaquin:

—Mihqui nocotaibo pimacatsihquish rah tah min yame pochinicon miin huetsan xobo janin caxon min yocatihini: Huetsan, quimisha pichanti pishca hea hinanhue, huetsan.

⁶ Noquen jenabo ta hocho quehax jahuex hehqui nocotaxqui. Jahuabi tah hen jato pimati yamaha. ⁷ Chichoaxon sca cahen mia yohihan: Hea jatsanjayamahue. Heen xehpoti tah hen moa xehposcai. Heen baquebo rihbi ta moa hoxascaiqui. Mia hinantihini bi tah hen picotimahi ¿hah mia jatihiquin?

⁸ Nincatahi man. Mia jahuen huetsa que bi hinanti queenyamaxon bi ta min hiiti yocacai copi mia hinantihiqui, min yocacai tihini.

⁹ Man honanon hihxon tah hen mato yohihi. Papa yocanahue. Mato ta hinantihiqui. Benanahue. Papan ta mato meramatihiqui. Xehpoti ton ton hahnahue. Papan ta mato quehpenxontihiqui.

¹⁰ Yocacai tihibichin ta bihtihiqui. Benahi tihibichin ta meratihiqui. Ton ton hahcai tihibi ta mapetihiqui.

¹¹ ¿Miin baquebo mihqui caxon min mishquitana yapa pishca mia yocacah bi min rono hinantihin?

¹² ¿Hatapa bachi yocacah bi min nibo hinantihin? ¹³ Honannahue. Tiromaboxon bi tah man maton baquebo qui siribo hinanti honana. ¿Man yocacah maton naihoh queha Papan hashoan rihbi sca jahuen yoshin siri mato hinantimahiquin? —jato jaquin.

Yoshinyahpa tah qui hihquibo

(Mt 12.22-30; Mr 3.19-27)

¹⁴ Huetsa tian sca ta yoshiman bihni joni rihbi jahuen tiroma yoshin camaxon rohanishqui. Tiroma yoshiman hihbojaha jayo sca banenish. Jayo banenish bi jahuen tiroma yoshin camaha yohuanscai. Jan yohuanai jisish rahte rahtecani tsamajaquetaibo. ¹⁵ Caibo rihbi hahqui yohuani:

—Quiquin yoshin Beelzebunen coshi hinanah ta tiroma yoshinbo camahiqui —hihcani.

¹⁶ Caibaan rihbi sca jahuen coshi tanacatsihquin:

—Miin naihoh queha coshin haxon noque jismahue —hahcanquin. ¹⁷ Yocacahbo bi jaton shinan honanxon Jesusen jato yohiquin:

—Jahuen jihueta hbo jaabo rahsi bi rehtenanaiya ta hapon yonoti queyotihiqui. Jaton caibo betan rehtenancanahibo ta queyonicabo qui, jahuabi yamascanon. Jaa copi honannahue. Satanasnen ta jahuentianbi jahuen hahbe yoshin tiromabo picotimahiqui.

¹⁸ Satanas hahbe Satanas betan rehtenaxon cahen jenquetsahxon bi sca jahuen yonotibo yonoyamahan. Jascama ta qui. Satanasnen coshiyaxon hen tiroma yoshinbo camahi hih man jai copi tah hen mato yohihi.

¹⁹ ¿Tiroma yoshiman coshiyaxon hean tiroma yoshinbo camahi man jaiya, jahuatohon cahran maton baquebaan jato camahiquin? ¿Jenquetsahpa shinanya man quin? Jaabaanbi ta mato yohiyaxihquiqui.

²⁰ Papan coshiyaxon tah hen hean yoshinbo camahi. Jaa copi honannahue: Papan jihuemati nete ta mato qui noco sca jaiqui.

²¹ Nesca tah qui, jisnahue. Coshi jonin cahen jahuen toohahtiyahpaxon jahuen xobo coiranah. Coiranah cahen jaho jaibo tsoanbi meheyamahan.

²² Hashoan coshi joni pari joxon ta xobo hihbo bihxon jahuen toohahti bichinnica qui, jayaxon coiranti jaa xobo hihbaan shinanah bi. Jahuen jahuaborabo rihbi bichinxon ta jahuenahbi jahuen jonibo qui sca jaan metisahpaquenica qui. Jascapah tah hen qui.

²³ Hehbe hihyamahax tah man henaboma qui. Hea tshinquonyamaquin tah man jabismahi.

Joribinica yoshin

(Mt 12.43-45)

²⁴ Tiroma yoshin ta joni jenebahini cahax jano jahuabi jaitonma cahax jano jihueta benahi cahuan cahuan caxon bi merayamahax janohax hen jahui janin caribitanpan hihcahini cahiqui.

²⁵ Caxon ta matso siri sca jahuen xobo merascaiqui, bexojaxonah sca. ²⁶ Jaatian ta caxon hashoan tiromabo hahbe yoshin rihbi benatihiqui, siete hahbe

yoshinbo. Jatihibi sca jahuex ta jaa jonin jointi janin sca jihuetihiqui. Jaa copi ta jaa joni hashoan tiromacanahi sca jatihiqui, hicha yoshiman hihbojaha sca.

Jenimacointi

²⁷ Jato jascajaquin yohi yohihiya sca ta tsinquijaquetaibo tocanxon huesti haibaan coshin yohinishqui:

—Mia baquexo bihni haibo ta hihti jenimati jaiqui. Mia chocho hahmani ta hihti jenimati jaiqui —hahquin. ²⁸ Jascajaha sca:

—Jaama bi ta Papan joi nincaxon bihcoinaibo caya, hahan jenimati jaiqui —hahquin.

Jahuen coshi jisti yocacaibo

(Mt 12.38-42; Mr 8.12)

²⁹ Hihti caibo sca nocohihnataiya jato yohiquin nescajaquin:

—Rahma ta jonibo shinan tiromayahpabo qui. Non mia nincanon hahan honanti noque jismahue hah tah man jai. Man jascarai bi ta huestijaquin res hahan honanti Papan mato jismatihiqui, Jonas jani quescapah res tah man jistihí, jaa jisxon honanti. ³⁰ Jonas jisxon ta ninevitobaan honannishqui. Jaa Jonasbi ta hahan honanti janishqui. Jascapahribihi tah hen hea noquebaque hahan honanti qui. ³¹ Jonibo casticanpaqueti nete noco sca jaiya ta chiponquiha quiquin hapo yamanica nihxon rahma jai jonibo yohiyaxihiqui: Mato tah man nincayosmabo qui hahquin. Jaa ta hocho quehax jonishqui, shinanyahpahax Salomon yohuanai nincaqui jahui. Salomon hihpahoni mentan hashoan coshi shinanya rahma neno jai bi tah man nincacatsihyamahi. ³² Papan casticanti neten ta Níneve jema janin jihuepahonihbaan mato metoyaxihiqui, Jonasen yohihah jaton shinan pontenihxon. Mato tah man noque mentan hashoan nincayosmabo qui. Jonas mentan hashoan nincati jonin mato yohihah bi tah man nincayamanihqui hah ta jayaxihcanihqui, mato yohiquin.

Non johue quescapahi

(Mt 5.15; 6.22-23)

³³ Tsoanbi tah non johue quetejaxon joneyamahi. Quetejaxon tah non quentipan mahpoyamarihbihi. Quetejaxon tah non jahuen tsahotinin tsahonai mapetaibo rahsichin jahuen xabajisnon. ³⁴ Noquen yoran johue ta noquen bero qui. Miin bero siripaiya tah min xabapan nichí. Miin bero tiromahiya tah min bahquish chian nichí. ³⁵ Jistahi man. Maton shinan janin xaba jai man shinanah bi bahquishcahinmis. ³⁶ Miin shinan xabayahpa hihquish, jahuabi miin shinan bahquishihyamaha tah min sirijaquin xabajaxonah sca min jatihi, johuepan xabajaha quescapi —hahquin.

Jaton haxenicaboyabi Jesusen fariseobo cahehi

(Mt 23.1-36; Mr 12.38-40; Lc 20.45-47)

³⁷ Jascajaquin jan yohihiya, fariseo jonin sca:

—Heen xobon pihí cahue —hahquin. Jascahah hahbetan cahax mapetax pihí tsahopaqueti. ³⁸ Piríyamahax jan mechoquihyamahi quen fariseo rahyeti. ³⁹ Rahtetaiton:

—Mato fariseobaan tah man chichoma maton tasonbo rahchoxon maton platobo rahchocai. Maton jointi nahpamehtan; jano tah man tiroma shinanbo bochohi, yometsohti shinanya hihti tiromabo shinanbo. ⁴⁰ ¿Maton mequen mato hinanxon maton jointi rihbi Papan mato hinanyamanishquin, honanmabon? ⁴¹ Maton jointiboyaxonbi jahuaborajomabo yanapancoinnahue. Jaatian tah man jahuabi sca rishtaya hihqui man shinanyamascatihí. ⁴² ¡Hahrai! hih tah man jatihi, fariseobon. Maton haxe pehi romishin tah man texe Papa jahuenta hinanxon, cahua meso rihbi texe pishca hinanxon, huai bimi rihbi texe hinanxon bi Papan yohihí quescajati man pishinmahi. Joni huetsa yanapantihí bi tah man tiromajahi. Joni huetsahon shinanti Papan mato yohihah bi tah man hahyamahi. Man hinanaibo Papa hinanquin jenebahinxonma caibo rihbi yanapantihí bi tah man hahyamahi. ⁴³ ¡Hahrai! hih tah man jayaxihqui, fariseobon. Tsinquiti xobo janin tah man hapobo tsahotai janin tsahoti queenbiresai. Jemanhihti janin tsinquijaquetaibaan mato saladanti rihbi tah man queenyorahi. ⁴⁴ ¡Hahrai, hahrai! hih tah man jayaxihqui. Mato tah man tsahonipibo quescapahbo qui. Tsahonipi maníxon bi tah non jenquetsahpa pisi chicho jaiquin non honanyamahi —jato jaquin.

⁴⁵ Noquen Hihbaan jascajaquin yohihiya sca Moisesnin joi haxemanica huesti jano tsahoxon yohiquin:

—Maestron, jascajaquin yohiquin tah min noque rihbi cahehi —hahquin.

⁴⁶ —¡Hahrai! hih tah man mato rihbi jayaxihqui, haxemanicahbon. Jonibo hihuehuan papima papimaquin hahcajaquin tah man joi tsamanxon jato yohihí. Yohixon bi tah man maton metotinin bocabi mehaxon jato yanapanyamahi. ⁴⁷ ¡Hahrai! hihnoxihnahue. Maton papabaan ta Papan joi yohinicabo rehtepahonishqui, maton sca man Papan joi

yohinicabaan tsahon qui tsahonxobojanon. ⁴⁸Jascajaquin tah man maton shinanbo noque jismahi. Maton papabaan hahpahoni quescajaribiquin tah man shinanai. Jaabaan reht-enihbo tah man maton sca man tsahonxobojaxonai, hahbe rehtemisboxon. ⁴⁹Jaa copi ta honanxon Papan yohihiqui: Jato qui tah hen heen joi yohixonnica boya heen raantibo hean raanai. Hen raanah cahiton ta texe rehtexon texe rihbi tiromajayahicanihqui, hahquin. ⁵⁰Rahma jihuetaibo yohihi sca ta Papan nescajaquin yohihiqui: Maton tah man heen joi yohixonnica hbo rehtennihqui. Hen raanmenoni rehtennixon tah man rahma caman jato jatihibi rehtenpaquehi, hahquin. ⁵¹Abel rehtennixon tah man caibo sca rehtexon, jato rehtepaquehi. Janoxon Papa yocaxonti janin jan nichu que bi Zacarías sca rehtenoxon caman tah man jato rehtenpaquehi. Mato ta Papan casticanyaxihqui, hih ca hen jai sen, jaton jimi man potamani copi. ⁵²¡Hahrai! hih tah man jayahixhqui, haxemanicahbon. Jayaxon Papa honanti huisha joiyahpaxon bi tah man honancatsihyamahi. Jascaxon tah man caibo rihbi sca man pantehi, honanpanan —jato jaquin.

⁵³Jascajabahini caressca jan jaiya cahen jaton haxemanicahbo betan jaton fariseobo sina sinati. ⁵⁴Hashoan sca yocacanquin. Jahuemeha jahuen yohuan copi non rehteti hahtipahitihin hihxon hicha yocacanquin.

12

Hahcointi Jesusen yohihi

¹Quexehibaan bi hicha bi res jonibo jano tsinquijaqueti. Hihti caibo tsamatax, joni huetsa qui tsehquesihcanahi bohiboja jahuen haxenicabo Jesusen yohiquin, behna joi sca:

—Coirametahi man. Fariseobaan coro pahe mato qui mahnemis —hahquin, fariseobaan hahcoinicamati shinan yohiquin.

²—Rahma jonexon hahcaibo jatihibi ta Papan janibijaquin yohiyaxihquiqui. Jone-tax hihquibo jatihibi ta jaan yohipaquexaxihquiqui jatihixonbi nincacahbo. ³Tsoanbi nincayamanon hihquish man bahquish chian yohuanni joibo ta xaba chianxon jaan jato nincamayaxihquiqui. Maton xobo chicho baxexai joibo ta xobo manixon coshin nincamaquin hahcajaquin jatihibi nincamayaxihquiqui.

Tsohqui raqueti

(Mt 10.28-31)

⁴Caibaan ta mato rehtexon bi jahua hashoan mato tiromajati hahtipahyamahiqui, hea huetsabaan. Jascapahbo qui raqueyamanahue. ⁵Huetsan ta mato rehtexon mato casticanti rihbi hahtipahiqui. Hahqui raquenahue, bihxon chihhi janin mato potamis. Hahqui caya raquenahue. ⁶¿Rabe soro copi non pichca hihsa romishin maroyamahin? Copi que ma bi ta jascapa mahuataiya mi huestibi Papan jato shinanbehnoyamahihqui. ⁷Maton boo rihbi ta jahuentihi jaiquin Papan honaniqui. Raqueyamanahue hah ca hen mato jai sen. Mato tah man hicha hihsa mentan hashoan copi qui.

Cristonahbo

(Mt 10.32-33; 12.32; 10.19-20)

⁸Jonibaan nincanon hihquish Hea ta Cristonah qui hihquibo jatihibi tah hen hean rihbi Papan yonotibo tocanxon rihbi Jaabo ta hena qui, hen jatihhi, jaabo yohihi. ⁹Jonibaan nincanon hihquish Hea ta Cristonahma qui hihquibo rihbi tah hen Papan yonotibaan nincanonbi Jaabo ta henama qui hen jatihhi. ¹⁰Man hehqui tiromahi yohuanai bi tah hen jaa mato sohuaxonti hahtipahitihhi. Dios Yoshin qui man tiromahi yohuanai ta jascayamahi qui. Jaa ta hen mato sohuaxontimahi. ¹¹Jaton tsinquiti xobo janin mato hiohax, jaton hapobaan mato casticannon hihquish quesahiboja, jahua yohuan japan, jahua hen yohitihin hihyamayahannahue. ¹²Jaatianbi ta Dios Yoshiman mato yohuan hinantihiqui —jato jaquin.

Masa shinantima

¹³Jaatian, tsinquijaquetaibo tocan nihxon, huesti jonin yohiquin:

—Maestron, heen bocha yohihue, noquen papa yamanicaton jahuaborabo jan hea texe hinannon —hahquin.

¹⁴—Maton jahuaborabo hinannicama tah hen qui. Mato jascajaquin ponteti ta Papan hea yohiyamahiqui —jaa jascaxon tsamataibo sca yohirihbiquin:

¹⁵—Jistahi man. Coiramenahue, jahuaborabo tsinquiti shinan man bihmis. Maton jahuaborabo hichahax jihuetai siriti shinanyamanahue —hahquin.

¹⁶Jahan haxeti joi sca jato yohiquin:

—Huesti jonin cahen huai banahoxon tsama bi res bimibo tsinquiscaan. ¹⁷Tsinqui tsinquihax ¿Jahuejascapan? Heen bimibo hichahi copi tah hen jahuerahnon bexojatimascái,

hihqui. ¹⁸ Shinanax sca, Heen jano bexojati xobobo huaxepaquexon hihtihosi xoboja sca janoxahpan. Jascajati ta jaiqui. Jano sca heen beroboya heen bimibo tsamanquin bochojascaax tah hen jenimatihi. ¹⁹ Hicha bari jihuexon piti tah hen tsinqui sca jai. Tanti tantihahan pipi pipixon xeha xehascapan, coin coin, hih tah hen jatih, hihqui shinehti. ²⁰ Jahuen jointinin jan jascari yohuanaiya bi ta Papan yohinishqui: Shinanjoman, nea yamebi tah hen mia mahuamanoxihqui. Min bexojahibo tsoa sca hihbotihiquin? hahquin. ²¹ Man jascapa honanma jamis, main jihuexon, hahan jihuexahpan hihxon tsinqui tsinquixon bi Papa janin hicha tsinquiyamahi —jato jaquin Jesusen.

Papan coiranaibo
(Mt 6.25-34)

²² Jahuen haxenicabo sca yohiquin:

—Masa shinanyamanahue, hih ca hen jai sen. Jahua pitima ta jaiqui, jahua pipan hihyamanahue. Chopa tah hen yamahi, jahua hen sahuetihin hihyamarihbinahue. ²³ ¿Pinoxon res non jihuetai? ¿Chopa sahuenoxon res non yora jain? ²⁴ Hihsaaban hahcai shinannahue. Jaabaan ta banayamahihqui. Bimi ta tsinquiyamarihbianiqui. Piyanoxon bexojacatsihxon bi cahen jahuerahnobi bexojati yamahi. Jatón bexojati xobo yamahi bi ta Papan jato piti pishinmayamahiqui. Mato tah man hihsabo mentan hashoan copi qui, hah ca hen mato jai sen. Papan ta mato jistihiqui. ²⁵ Heen shinaman bi hashoan queyanihpan hihquish bi tah min min queyanihtimahi. ²⁶ ¿Jascati hahtipahyamaxon jahuejanoxon man texe copi man masa shinantihin?

²⁷ Joabo rihbi jenquetsahpabo hin hihxon shinannahue. Jaabaan ta yomenjayamahiqui. Chopa rihbi hahyamahax bi ta hihti siri rajotiyahpa qui. Salomon hicha chopá siribo japahonish bi cahen huesti joa betan senenyamanish. ²⁸ Joa ta nihi naman hicha jaiqui. Siripi hanihi bi tah non huajaxon jato mapojahi, copima quen. Copi que ma bi ta Papan jato hihti siri rajotibo hinanihqui. ¿Hashoan sca jan mato coirantihi man shinanyamahin? Shinancoinnahue. ²⁹ Jaa copi, Jahua pipan, jahua xehapan jayamanahue. Jahua copi bi masa shinanyamanahue. ³⁰ Man jascapa pishinai ta Papan jisiqui, hah ca hen mato jai sen. Piti benahi, chopá rihbi benahi ta jatihibi nahuabo nihnichiqui. ³¹ Matón tah man Papa queenai quescajaquin hahtih, pitiya chopabo jaan mato hinannon.

Non naihoh queha bexojatibo
(Mt 6.19-21)

³² Masa shinanyamanahue, baquebon. Mato man hicha jihuetaima bi ta Papan mato jahuen jihue hinanihqui. ³³ Matón jahuaborabo maromaxon yomanahitaibo yanapanahue. Queyoyosma coriqui quescapa bihquin hahcajaquin Papa janin queyoyosma jahuaborabo bexojanahue. Jano ta yometsohtimahiqui. Champon rihbi ta jano pihantimahiqui. ³⁴ Jahua ra hihti queenxon cah man jano res shinana.

Noquen Hihbo non manatihu

³⁵ Matón Hihbo manati shinan bihnahue. Chopa sahuexon johue quetejahax manatihcamahi quescanahue. ³⁶ Huanomahi catani jaton patoro yame jonoxihqui honanax ta jan nocoxon quenahi nincaxon manataibaan hixon jahuen xobo xehpoti quehpenbohaxontihiqui. ³⁷ Hoxahaxma manataiban jaton patoronen jato merahah ta hihti jenimacantihiqui. Jatón hihbaanbi ta jato hahxonquin pitijaxonquin jato pimatihiqui, jaanbi jato metexpaquexonquin. ³⁸ Yame pochinicon joyamahax xaba paqueti hochoma sca joxon jato jascari manataiton merahah ta hihti jenimati jaabo jatihiqui, jahuerohahi tah non hoxayamahahqui hihqui. ³⁹ Man honannon hihxon tah hen huetsa sca mato yohihi: Jahua hora yometso jotihiquin honanxon cahen coiranxon xobo hihbaan yometso hihquimayamahan. ⁴⁰ Jascapa hoxan hihtima shinanya janahue. Hea nocotihu man shinanyamahahi tianbi tah hen hea noquebaque mato qui nocotihu —jato jaquin.

Siri betan tiroma
(Mt 24.45-51)

⁴¹ —¿Jaa jaa patax queha joi yohuani min hihqui bi min noquebi yohihin, Hihbon? ¿Caibo rihbi min yohihin? —hahscaquin Pedronen.

⁴² Jascahah Jesusen yohiquin:

—Shinanyahpa ta jahuen hihbaan yohihi quescabijaquin hahxonai joni qui. Jascapah ta jahuen hihbaan yohitihiqui, jahuen jonibo jisxonti. Jato jisxonquin jaton pitibo jato hinanxonnon hihxon ta jato jisxonahue hahbahintihiqui. ⁴³ Jahuen hihbo joxon sca jascajahiton merahah ta hahan jenimati jaresscatihiqui. ⁴⁴ Jascapa ta jahuen hihbaan yohitihiqui, jatihibi jahuen joniboya jahuen jahuabora jan jisxonscanon. ⁴⁵ Shinanyahpa hihamahax ta heen hihbo ta basihi cahiqui hihxon jahuen hihbaan jonibo rishqui rishquixon jahuen texonnicah haiobobo rihbi rishquixon, pixon, xehahax pahenscaiton

sca jahuen hihbaan jisbenatihiqui. ⁴⁶ Joriyama ta jatihiqui hih jan jai tianbi ta hihbo sanarenentihiqui, hihbo nocorihitimahi jan shinanah bi. Joxon sca cahen caxquepaque-xon nincayosmabo janin jaa potatihiqui. ⁴⁷ Jahuen hihbaan yohini quescabijati honanxon bi hahxonyamahi quen ta jahuen hihbaan hihti casticantihiqui. ⁴⁸ Honanyamaxon tiromajahibo ta hashoan hichama rishqui rishquiyaxihquiqui, hihti hahtihbi. Hicha mia hinannixon ta hicha rihbi mia hahquirihbi yocayaxihquiqui. Hicha mia hinantahnixon ta hicha rihbi mia bichinyaxihcanihqui.

Jesus copi join hihquinanai
(Mt 10.34-36)

⁴⁹ Chihi potahi tah hen main jonihiqui. Quetetax perehigna sca japahinon hih tah hen jai. ⁵⁰ Hihti tiromabo hen tenetihi tah hen honanai. Histon huinopahinon hihxon tah hen tene tenehi. ⁵¹ ¿Huesti shinanyahax siripi jihuetabo rahsi sca janon hea joni shinan man jain? Huetsajaquin shinanaibo qui huetsa shinanyabo rainyamanon tah hen jonihiqui. ⁵² Huesti xoboho pichca joni jihuetax bi ta texe qui rabe rainyamatihiqui. Jascayama hiya ta rabe qui texe rainyamatihiqui. ⁵³ Huetsa ta jahuen baque qui rainyamatihiqui. Huetsa rihbi ta jahuen papa qui rainyamatihiqui. Huetsa haibo ta jahuen baque qui rainyamatihiqui. Huetsa rihbi jahuen mama qui rainyamahi. Yaya rihbi jahuen hihni qui rainyamahi. Hihni rihbi jahuen yaya qui rainyamahi —hahquin noquen hihbaan.

Hahan honantibo
(Mt 16.1-4; Mr 8.11-13)

⁵⁴ Jahuen haxenicabo jascaxon, tsinquijaquetaibo sca yohirihbiquin:
—Jano bari hihquihbi quiri jixson nai cohin hanicanahi merahax tah man Hoi ta jahuiqui hihqui. Hihcoini. Jasca ta jatihiqui. ⁵⁵ Chiponquihax nihue jahuiya tah man Rahma ta barinoxihquiqui hihqui. Jascacoinrihbibi. ⁵⁶ Honanihcamahibon, ¿nihueya cohinbo jixson jahua jatihiquin honanxon jahua copi sca man Papan yohihah jahua jatihiquin man honanyamahin, jan mato yohihah bi?

Noquen Hihbo betan non bexotihi
(Mt 5.25-26)

⁵⁷ ¿Jahua jenquetsahaxon man matonbi shinanxon ponte res jihueti shinanyamahin?
⁵⁸ Mia demandana juez janin caquin bahinxon bi mia demandana betan bexohue. ¿juez janin mia ninitana juezin sca jahuen porisia yohixon mia sipo xoboho rehuinmamis!
⁵⁹ Chicho tsahonah tah min copijabahinquin queyoyamahax janohax picotimahi —jato jaquin.

13

Shinan pontehax jihuenicabo

¹ Jaatian Pilatonen hahni sca caibaan yohiquin. Galilea mai mehabaan roqui jaton yohinahbo rehtexonquin Papa mapojaxoncannish, Papa Dios hinancatsihquin. Jaton yohinahbo mapojahiton bi roqui Pilatonen jato rehtenish. Rehtexon qui jaton jimín qui jaton yohinahbo nashimaquin, jonin jimíya sca maponon. ² Jaa chanihibo sca Jesusen yocaquin:

—¿Jatihibi jonibo mentan hashoan hohchayahpabo quen Papan jato jascajani shinan man jain? ³ Jascayama ta jaiqui. Maton shinan ponteyamahax tah man mato rihbi jascapahbo rihbi jayaxihqui, queyocahinscaibo rahsi. ⁴ ¿Hoa dieciocho jonibo, jato qui jaton xobohhuanen paquequin bishtaxni cahran? Jatihibi ta mahuacannishqui. ¿Jatihibi Jerusalem janin jihuetabo mentan jaobo hashoan hohchayahpabo hi shinan man jain? ⁵ Jascayama rahan. Maton shinan ponteyamahax tah man mato rihbi queyocahinyaxihqui.

Bimijoma jihui

⁶ Jato jascaxon jaa patax queha joi sca jato nincamaribiquin:
—Huesti jonin cahen bimi jihui bananish. Bananish, bimiyahpa sca rah ta qui hihquish, cari carixon jisi bi jahuen bimi yamahi. ⁷ Bimi yama hiya sca jahuen huai teexonnica yohiquin: Jise. Quimisha bari sca tah hen bimi bihcatsihquish jori jorichai. Jahuabi ta yamahihqui, rahma caman. Rerascahue. ¿Jahua janon jaa nihitihiquin? hahquin. ⁸ Huesti bari pari jenetahue, hihbon, mai cahuenbohanxon hen jaa naman tara payobo tsamanbohantannon. ⁹ Jascajaha bimihya jascabiscanon. Jascajahah bi bimiyama hiya tah non rerascatihi hahquin jahuen huai teexonnicahton —hahquin.

Cahcoya haibo Jesusen rohajahi

¹⁰ Jato jascajahipish huetsa neten sca jaton tsinquiti xoboho Jesus mapexon jato haxemarihibiquin, jaton tantiti neten. ¹¹ Jano tiroma yoshinyahpa haibo rihbi mapeti. Yoshiman hihbojaha dieciocho bari sca hisini. Cahcopaquecanahi nihnica. Jenquetsahax bi pontetimahi. ¹² Jaa meraxon mequeman mehehax Jesus coshin yohuani:

—Rohascahue, chocan —hahquin. ¹³ Jan yohihah, pontecahin sca jai. Jascari rohacahinsaax Hahxon tah min hea jai, Papan, hihqui Papa Dios yohihi. ¹⁴ Jaton tantiti netenbi Jesusen jaa rohajahiya jaton tsinquiti hihbo rainyamacahini. Rainyamaxon jano tsinquitaibo sinajaquin:

—Seis nete ta hahan teeti netebo qui. Jaa netebaan rahomehti benahue. Tantiti neten tah man rahomehtimahi —hahquin. ¹⁵ Jato jascajahiton Jesusen sca pontejaquin yohiquin:

—Quesan, ¿xehpohipixon tantiti netenbi man maton vaca pecaxon, jaa hilyamahiya maton cabacho pishca pecaxon, hioxon man jene xehamayamahn? ¹⁶ ¿Satanasnen nea haibo jixxon nexahah dieciocho bari nexá sca nichu quen non tantiti neten jaa rohajatimahin? ¿Maton caibo qui bi nexá bi res janon man rohajamacatsihyamahn? ¹⁷ Jato jascajah jano tsahobehcainoibo hihtimahcainscai. Jaabo hihtimanon bi texe tsinquijaquetaibo jenimahi. Jahuen coshi shinaman jan jato hahxonah quen hihti jenimacani.

Moxo bero

(Mt 13.31-32; Mr 4.30-32)

¹⁸ Jaa copi ta jato yohinishqui:

—Papan jihuemati jenquetsahpa quin, Jenquetsahpa hin hihxon tah hen mato yohihi. ¹⁹ Huesti moxo bero pishca quescá tah qui. Jascapah non noquen huai chian banahah cahen hanicahuanscaax jihuiscai. Jihui tihopa sca jaiya cahen jahuen mebibo romishin janin hihsaaban nahajaquin.

Hahan paan soohihmati

(Mt 13.33)

²⁰ Hahquirihbi sca jato yohiquin:

—¿Papan jihuemati jenquetsahpa quin? ²¹ Jaa ta hahan paan soohihmati quescapa qui. Jascapa bihxon cahen tasa bocho misi janin haibobaan niahan. Jano niahah ta tasa bocho jatihobi soohihcahuaniqui —hahquin.

Hanitahma xehqui

(Mt 7.13-14, 21-23)

²² Jaatian sca cahi. Jerusalem janin cahi caquin janobo jai jemabo janin banehuanax caribihiton sca:

²³ —Hihbon, ¿Papan jihuemahibo hichatahmabo quin? —hahquin huetsan.

²⁴ —Papan hani tahma xehqui huesti janin hihcoti shinannahue. Hicha ta Hihcopan hihxon bi hihcoti shinanyamahiqui. ²⁵ Xobo hihbaan jahuen xehqui xehpobohanscai bi tah man jeman nihxon sca xehpoti ton ton hahxon Noque quehpenxonhue Hihbon man jatihi. Man jascaraiton ta Mato tah hen honanyamahi, jahuerahnohahbo ra tah man qui hah ta mato jatihiqui. ²⁶ Jaatian tah man Mihbetan tah non pipahoniqui, mihbetan rihbi tah non xehapahonihqui, noquen jemabo janinxon tah min haxemapahonihqui hah man jatihi. ²⁷ Jaatian ta mato yohiyaxihqui: ¿Jahuerahnohahbo mato quin? Hen tah hen mato honanyamahi. Nenohax botannahue, tiromabon. ²⁸ Jascajahah tah man huaohiyaxihqui. Abraham, Isaaque, Jacobo, Papan joi yohixonnicaabo jatihibi rihbi, jaabo jatihibi Papan jihuetahbahax jaa janin jihuetai jixxon tah man hihti masa shinanbahinscatihi. Jato qui tah man hihcotimahi. Jatoma qui ta mato potayaxihqui. ²⁹ Caibo caya ta hocho quehax nocohihnayaxihcanihqui. Bari cainai quirihax, bari hihquihi quirihax, reboquihax, chiponquihax, janobohax nocohihnaxon ta Papan jihuetahboxon jaa janinxon fiestajayaxihcanihqui, benahue Papan jato jaah. ³⁰ Jaatian ta rahma chini chinitaibo bebonicabo sca jatihiqui. Caibo rihbi rahma bebonicabo ta chinitaibo sca jayaxihqui —jato jaquin.

Jerusalen copi Jesus benatai

(Mt 23.37-39)

³¹ Jato jascajahiya bi fariseobo sca nocoxon:

—Nenohax catanhue. Herodesnin ta mia rehtecatsihqui —hahcanquin.

³² —Hoa quexenica yohitannahue. Tiroma yoshinbo camaxon tah hen hisinaibo rahma rohajaxon, bahquish rihbi rohajaxon hoqueha bahquish sca hen janquenyaxihqui. ³³ Jaabi tah hen rahma jari caparihi. Bahquish rihbi tah hen caparinoxihqui, hoqueha bahquish rihbi tah hen capariyaxihqui. Maton quiquin jema janinbi tah man tiromabon Papan joi yohinica rehtematihi.

³⁴ Jerusalem janinhahbon. Man hea nincacoinpahinon, Jerusalem janinhahbon. Papan joi yohinicabo rehtemisboxon tah man mato qui Papan raannihbo rihbi macaman tsacaquin rehtepahoniqui. Jahuentihi coti sca hen mato tsinquímaha bi tah man queenyamahi. Hatapanen jahuen baque romishin tsinquixon jahuen pehi naman jato paxajaquin hahcajaquin hen mato tsinquímaha bi tah man queenyamahi. ³⁵ Jistahi man. Jahuen baquemabo sca man janon ta Papan mato jenehiqui. Man tah man hea jisyamascatihi, hen joribinon caman. Jaatian pari tah man yohuanyaxihqui, Papan baque ta hihti shinanya nete hihbo jahuiqui hihqui —jato jaquin.

14

Tahsóhiqui Jesusen rohajahi

¹ Jaa pecaho sca quenamaha huesti fariseo hapon xoboho pihi cahi, jaton tantiti neten. Jaa piguihinxon jahua hahxon non cahetihin hihxon jis jiscanquin. ² Jascapa tocanxon pihanen jisi bi huesti tahsóhiqui joni rihbi jaa bebon tsahotai jai. ³ Jaton joi xeni haxemanicahboya jano jai fariseobo sca Jesusen yocaquin:

—¿Tantiti neten non rohajatihin? ¿Non rohajatimahin? Hea yohinahue —jato jaquin.

⁴ Yocacah bi jahua hihiyamacani. Jahua hihiyamahiboya sca tahsóhiqui mehaxon rohajaxon, caresscachue hahquin Jesusen. ⁵ Tsahohahtanaibo sca yohiquin:

—¿Maton baque mai poquin chicho paquetaiya, jaa hihiyamahiya maton ganado mai poquin chicho paquetaiya tantiti neten que bi man histon bihtimahin? ⁶ Yocacah bi jahua yohiti honanyamacanquin.

Huanomahi canon quenamahibo

⁷ Quenamahabo ta pihi tsahocatsihquin hapobaan tsahotibo bihcatsihquibo rahsi jano janishqui. Jascapahbo rahsihi jisxon, jaa patax queha joi sca jato yohiquin:

⁸ —Heen xobo janin pihi cahue hahca cahax jano jahuen hanibo tsahotihi janin tsahopaquyamanahue. Mia mentan hashoan hapo rihbi quenamaxon mihqui sca caxon, Hori cahue, jaa neno tsahonon, hah mia jamis. ⁹ Jan mia jascahah tah min hihtimahpax chini chini sca tsahoti catihi. ¹⁰ Jaa copi quenamaha cahax jano chinibo jaiton tsahopaquhue. Jaatian rah ta piti hihbo joxon sca mia Jari hapobo quiri tsahohihnarohahue mia jatihiqui. Jan jascajahiya ta mihbe quenamahabo jatihibichin mia shinanya hihqui mia jistihiqui. ¹¹ Hea rah tah hen caibo mentan hashoan shinanyahpa qui hihquibo jatihibi ta hihtimahyaxihquiqui. Hea rah tah hen caibo mentan hashoan jahuama qui hihquibo ta shinan siri Papan hinanyaxihquiqui —jato jaquin.

¹² Jaatian sca jaton piti hihbo sca yohiquin:

—Pihi benahue hahnoxon pitijaxon miin hamicobo quenamayamahue. Miin huetsabo rihbi quenaxonma, miin jenabo rihbi quenaxonma, mihbe coriquiyahpabo rihbi quenamayamahue. Mia pimanoxon copiquin sca mia quenamaribicanmis. ¹³ Hichaxon pitijacatsihquin, jahuaborajomabo, tobi pishcabo, chantobo, benchebo, jascapahbo quenamanoxahnue. ¹⁴ Jaabaan mia pimaquin copiti hahtipahyamahi quen tah min hahan jenimati jarresscatihi. Jahuen baquebo Papan huenihihnixon ta mia hahan jenimati hinanyaxihquiqui —hahquin.

Hichaxon pihi benahue hahca joyamahibo

¹⁵ Jato tocan pihi tsahotax huetsa joni sca yohuani:

—Papan jihue janinxon pihibo ta hihti jenimatihiqui —hihqui.

¹⁶ Jascahah:

—Piti fiestajayanoxon cahen huesti jonin hicha jonibo quenamahan. ¹⁷ Jahuen piti hihres sca jaiya sca jahuen joni raanquin, jan quenamahipibo yohinon hihxon. Raanah, Benahue hih ta jaiqui, Ma ta hihresscaiqui hahquin jato yohibonaquin. ¹⁸ Yohihah bi huesti cacatsihyamahi. Jaa cacatsihyamahiya jatihibi sca cacatsihyamascacani. Jan yohimenohah cacatsihyamaxon joi bichinscaquin: Huai tah hen marohipiqui. Pihi catahin tah hen heen huai jisi cahi. Pihi cati tah hen hahtipahyamascai hahquin hea yohixontanhue hahquin. ¹⁹ Huetsan sca: Hean tah hen diez toro marohipiqui, rabexon nininicabo. Pihi catahin tah hen rahma jato tanahi cahi. Pihi cati hen hahtipahyamascai piti hihbo yohixonhue hahquin. ²⁰ Huetsan rihbi sca: Hen tah hen haibo bichipiqui. Jaa copi tah hen cati hahtipahyamascai hahquin. ²¹ Jato yohitani nocoxon sca, jaabo yohuanai jahuen patoro yohiquin. Yohiha jahuen patoro rainyamascacai: Rahmabi caribitanhue. Bahin nichibo janin sca caxon jano jaibo, jema quexabi nichibo rihbi yohitanhue. Jahuaborajomabo, tobi pishcabo, benchebo, chantobo jaabo sca yohixon hihuetanhue hahquin. ²² Jascajatani joxon sca: Min yohihah quescajaquin non hihuehah bi ta piti hicha pari jaiqui, hihbon, hahquin jahuen jonin. ²³ Jemama qui sca caxon, min bahinxon behchihibo sca bihxon tapasoho jihuetaibo rihbi hihuetanhue heen xobo bochosanon.

²⁴ Non quenamamenohibaan ta jahuabi noquen piti tanatimabiresiqui hihca hen jai sen hahquin.

Shinanquin sirijahax hinamehcointi

²⁵ Jascajaquin jano tsahotaibo Jesusen yohihiya hihti caibo sca hahqui nocohihnati. Nocotaibo sca jaan yohiquin:

²⁶ —Maton papabo jistahihmahaxma hehqui jahuiibo ta heen haxenicabo jatimahiqui. Maton papa, maton mama, maton haibo, maton baquebo, maton huetsabo, maton chocabo jistahihmahaxma, maton yoshin rihbi jistahihmahaxma tah man heen haxenicabo jatimabiresai. ²⁷ Hea rethehibaana bi tah hen heen Hihbo jenetimahi hihnahue. Jascaxon nincacoinnahue. Jascajayamaxon tah man heen haxetibo jatimahi. Man shinannon hihxon tah hen yohihi. ²⁸ ¿Xobojacatsihxon, jahuentihi copitihiquin, heen coriqui senentihiquin hihxon man shinanquin sirijaxon pari xobojayamahin? ²⁹ Shinanquin sirijayamaxon xobo jihuibo nichinxon bi janquenjati min hahtipahyamahiya ta jisibaana sca mia hosantihiqui. ³⁰ Hoa jonin ta xobojacatsihxon bi janquenjati hahtipahyamahiqui hih ta jaticaniqui. ³¹ ¿Quiquin hapobo rihbi hahbe quiquin hapo betan rehtenani canoxon tsahotaxon veinte mil sontaroyahpa hahqui jahui bi diez mil pishcayaxon jaa tenetihin hihxon sirijaquin shinanyamaparihiquin? ³² Tenetimahi shinanxon ta hoa huetsa hocho pari jahui bi comision hahqui raantihiqui jenquetsahax non bexotihin hihxon. ³³ Jascajaquin rihbi shinanquin sirijaxon maton jihue jatihibi jenebahinyamahax tah man heen haxetibo jatimabirestihi.

Tashi jahuijoma

(Mt 5.13; Mr 9.50)

³⁴ Tashi ta siri qui. ¿Hahan non pitijacatsihqui bi noquen tashi jahuiyamascaiya, jahuatoxon sca non noquen piti jahuijatihin. Non tah non hahtipahyamascatihi. ³⁵ Jascapa tashi tah non hahquiribi mai sca hihnon hihxon noquen banabo janin minchintimahi. Non payomacatsihquin piti huecax potahi janin rihbi tah non jascapa tashi tsamantimahi. Jascapa tashi tah non potaresai. Hahan nincati pabinquiyahpaxon nincanahue.

15

Manónica carnerobo

(Mt 18.10-14)

¹ Jaatian sca cobranmisbo betan hohchayahpabo rahsi sca becani. Jesus yohuanai nincacui becani. ² Jascapa hahqui nocotaia fariseobo betan jaton xenibaana joi haxemanicahbo hahqui yohuanscai. Hohchayahpabo sirijaquin bihxon ta jascapa betan pihiqui, hihceni.

³ Jaa copi ta jaa patax queha joi jato yohinishqui:

⁴ —¿Cien carnero jaax bi huesti manotaiya, jaa manotai huesti benahi canoxon man texe noventinueve janobi jenebahini caquin, man benahi sca cayamahin? ⁵ ¿Meraxonoxon caman man benahi cayamahin? ¿Meraxon man jenimahanan papibehnantimahin? ⁶ ¿Xoboho nocoxon sca maton jenaboya mahbe jihuetaibo quenaxon, Jahuerohajaquin tah hen heen carnero baque manotai bi merahahqui, Jenimanonhue hah man jatimahin? ⁷ Jascarihibihi ta naihoh quehax jenimacanicui. Huesti hohchaya jonin mainxon jahuen shinan pontehiya ta jenimacanicui. Noventinueve jaton shinan ponteti pishinyamahi shinanaibohon jenimayamahax bi huestichin jahuen shinan pontehiya jenimacani.

Coriqui manotai

⁸ ¿Jascarihibihi ta huesti haibaana diez libra jaxon bi huesti manomaxon, johue quetejaxon xobo matsocuin sirijaxon meraxonoxon caman benabonatimahiquin? ⁹ Meraxon sca jahuen jenaboya jahuen hahbe jihuetaibo quenaxon Jahuerohajaquin tah hen hen manomaha coriqui hen merahahqui, jan jatimahiquin? ¹⁰ Jascarihibihi ta mainxon huesti hohchaya jonin jahuen shinan pontehiya Papan yonotibo jenimacanicui —jato jaquin.

Bexnanya haibo copi coriqui potaresai beronan

¹¹ Huetsa rihbi sca jato yohiquin:

—Huesti joni cahen rabe bebo baque janish. ¹² Haniscaxon cahen jahuen chini baquen jahuen papa yohiquin: Papan, texe hena hihnon min mahaquin potabahinyaxihquibo hea rahmabi hinanscahue. Jascajaha jahuen baquebo hinantijaxon jaa sca jahuena hinanscaquin. ¹³ Jahuenahbo jatihibi bichipish jaabiyahpa caresscai, hocho sca huetsa main cahi cahi. Cahin nocoxon sca bexnanbo marocuin. Haibobo copi rihbi jahuen coriqui potaquin queyobahinquin, jahuabi yamascanon. ¹⁴ Jaa maibo janin piti pishin sca jaiboya, jaa rihbi pihan hihscái. ¹⁵ Pihan hihxon janoha joni patorojascaquin. Jahuen patoronen

sca jaan jahuen cochibo pimahi canon jahuen pasto chian sca raanquin, cochi coirantanhue hahxon. ¹⁶ Tsoanbi piti hinanyamahah, pihan hihquish cochin piti bimi romishin piti shinanbahinquin. Jascapah que bi yanicahinnoxon caman piti shinanquin. ¹⁷ Jaatian sca shinanquin sirijahax, Heen papan jonibo hichahi bi ta jaton piti pishinyamahiqui. Neno ca hen pitin mahuacatsih sca jai. ¹⁸ Rahma ran heen papa janin hea caresscatihi. Nocoxon tah hen yohitih: Papan, noquen Papa Dios qui hohchatax tah hen mihqui rihbi hohchatai. ¹⁹ Tiroma copi tah min hea Baquen hahtimascai. Miin joni quesca sca hea jahue. ²⁰ Jascatanpan hihcahini sca caresscai, jahuen papa janin cahi cahi.

Nocoti jahui bi hocho pari hihquiya manan huinoquihrani jahuiton jahuen papan meraquin. Jointi xecahihnixon hahan hihti shinanax bishquihihcanahi caxon jahuen baque hicotaxon betsohahquin. ²¹ Hicotanax sca: Papan, noquen Papa Dios qui hohchatax tah hen mihqui rihbi hohchanihqui. Hea tiroma quen tah min hea Baquen jatimascai hahscaquin jahuen baquen. ²² Jascahah bi yosibaan jahuen jonibo yohiquin: Sahuemanoxon tari siriya berinahue. Mehesehtiya joxon mehesennahue. Sapato rihbi bexonnahue jan sahuenon. ²³ Non xoamarasihi toro baque bihtannahue rehtenoxon. Hicha pitijaxon pihi non coin coinon. ²⁴ Nea heen baque ta mahuanish bi jihuerihbiscaiqui. Manonish hen shinanah bi tah hen heen baque merahahqui, jato jaquin. Jenimascai, jahuen papa.

²⁵ Jahuen baque bebo quihah teeti. Huai chian teetanax joresscaquin bi xobo hohchomaxon sca rehuen behua behuáhibo nincaquin. ²⁶ Jahuen papan joni huesti quenaxon sca yocaquin: ¿Jahua copi jascacaniquin? hahquin. ²⁷ Jochica ta nocotaxqui. Jaa copi ta toro xoa pishca papan rehtehaxqui, jaa siripi nocotai quen hahquin. ²⁸ Honanscaax jahuen bocha rainyamahax xoboho hihcotsihyamascai. Picoxon jahuen papan Johue, Johue hahca bi joi bichinquin: ²⁹ Jahuentihi bari sca hen mia teexonai bi tah min heen habbe rabetibo betan hen jenimanon jahuentianbi hea chibo baque bocabi hinanyamanihqui. Basi teexonquin bi tah hen jahuentianbi mia nincayama yamanihqui. Hea teemis que bi tah min hea jahuabi rehtexonyamaniqui. ³⁰ Hoa miin baque jahuen hahresti haibobo janin caxon miin coriqui queyontanax jahuiya cah min noquen toro xoa rehtexonah, hahquin. ³¹ Jaatian sca: Mia tah min jascabihi hehbetan jihuetai, baquen. Hea jai jatihibi rihbi ta mina qui. ³² Jan jahui quen non coin coinax jenimaha ta siri qui. Miin jochica ta mahuanish bi jihuerihbiscaiqui. Manonish bi ta rahma hahquirihbi merahah sca qui.

16

Patoronen joni tiroma

¹ Jascjaxon jahuen haxenicabo sca Jesusen yohirihbiquin:

—Huesti coriquiyahpa joni cahen janish, jahuaborayahpa joni. Huesti neten sca ta chanicannishqui: Miin jahuabora coirannicahton ta miin coriqui mia queyonihqui. ² Jascaraiboya jahuen coirannica quenamaxon jahuen hihbaan cahescaquin. ¿Hihcoini yohuancaniquin? Hen mia hinantahni coriqui toponpaquehue non jisnon. Heen coiranxonnica tah min jatimascai hahquin. ³ Jascahah shinamehti: ¿Jahuejascapan? Heen patoronen ta hea heen tee hea bichiniqui. Yosmaxon tah hen horo horoti hahtipahyamahi. Yocamis sca hihtih bi tah hen yocati hihtimahpai. ⁴ Hen honanai quescajaquin hahpan, heen tee jan hea bichinai bi caibaan sca sirijaquin jaton xobohe hea jihuemahabo hihcahini sca caxon jahuen patoro ribinai jonibo sca quenamaquin. ⁵ Jahuen patoro ribinaibo quenamapaquexon sca: ¿Jahuentihi min heen patoro ribinain? hahquin, jan quenamamenohi. ⁶ Cinco mil botella olivo xeni tah hen ribinai hahquin. Tsahohue, miin hahan huishati bihxon tres mil botella min copijascai huishahue hahquin. ⁷ Huetsa rihbi sca yocaquin: ¿Mian cahran? ¿Jahuentihi min ribinain? hahquin. Hean tah hen mil tasa trigo ribinai hahquin. Miin huishati bihxon ochenta res min ribinai huishahue hahscaquin. ⁸ Jan jascajahi chanihibo nincacax sca jahuen patoro yohuani: Jaa ta yometsohti honan qui hihqui, coirannica yohihi jascari. Jascapahbo rihbi ta mai mehabo qui. Jaton caibo jatohon queennon hihxon ta nea mai mehakaan hahquiqui, xaba baquebo mentan hashoan honan ta jacaniqui.

⁹ Maton rihbi rah tah man yometsohxon, jaa coriquinin sca jonibo hesetih, maton coriqui queyo sca jaiya jaabaan sca jaton queyoyosma jihue janin mato jihuemanon — hahquin fariseobo yohiquin.

¹⁰ Hicha tahma hinanah, jayaxon sirijaquin hahxon tah man hicha hinanah jayaxon sca sirijaquin hahtih. Hicha tahma hinanah bi jayaxon tiromajaquin hahxon tah man hicha hinanah sca jayaxon rihbi tiromajatih. ¹¹ ¿Nea mai meha jahuaborayaxon man sirijaquin hahyamahiya tsoan sca mato naihoh queha jahuaborabo hinantahtihiquin? ¹² ¿Caibaana man jaton jahuaborabo coiranxonquin sirijayamahiya tsoan sca mato matonah hinantihiquin?

¹³ Patoroyahpaxon tah man jaa sirijaquin teexonhanan huetsa patoro rihbi sirijaquin teexontimahi. Huetsa queenxon tah man huetsa sca jistahihmatih. Huetsa hahxonquin sirijaxon tah man huetsa sca nincayamascatihi. Maton Papa Dios hahxonquin tah man jahuaborabo rihbi tsingui tsinquiti hahtipahyamascatihi —jato jaquin.

¹⁴ Jan yohihi jatihibi nincaxon bi yohuashihboxon hosancanquin fariseobaan.

¹⁵ Hosanaibo sca jaan yohiquin:

—Man siribo hihqui jonibaan shinanahbo hihquish tah man siripihcamahi yohuanai. Siripi yohuanihcama man jai bi ta maton shinanbo Papan honanihqui. Hihti siri tah qui hih jonibo jai que bi ta jascapahbo shinanyabo Papan jistahihmahiqui.

Papan jihuemati

¹⁶ Juan jonon caman ta Moisesnin huishani joibo janishqui, Papan joi yohixonnichabaaan yohini joibo rihbi. Juan joni pecaho tah non Papan jihuetahboto joi siri sca non yohihi. Jaa copi ta histon sca jahuen jihuetahbo sca jacahincaniqui. Nincati queenaibo rahsi. ¹⁷ Papan joi ta queyotimahiqui. Naiya mai queyocahinyaxihqui bi ta ni huesti teque pishcabi jahuen joi manotimahiqui.

Haibo potatima Jesusen yohihi.

(Mt 19.1-12; Mr 10.1-2)

¹⁸ Miin haibo potaxon huetsa sca bichish tah min hohchayahpa sca jai, noquen Papa qui tiromahi. Huetsa jonin potahah haibo bichish tah min jascarihbih, noquen Papa qui hohchayahpa sca jai.

Lázaro betan hani patoro

¹⁹ Huesti joni cahen coriqui hicha bi res janish. Yanconihboya joxonihbo jahuen quiquin chopabo sahuexon cahen jatihibi neten hihti nohuenihbo pipipahonish. Jenimahanan jihuetai can. ²⁰ Jahuen xoboho jaa jascari jihuenon cahen jemanhihti hoque huesti yocamis janish. Patoronen xobo xehqui janin cahi bahin potahahbo racati, jahuen yora nobepan rahbojocotax hisini racati. ²¹ Racatax sca: Haitara, jahuen misa janinhax paquetai teque romishin hea hinanpahinnon, hahan hen pihi yanicachinnon, hihqui pihan hihquish. ²² Jascari jaax mahuascai. Papan yonotibo sca joxon jano Abraham siripi jihuetai janin jaa hioscaquin, jano sca siripi jihuenon. Coriquiyahpa rihbi sca mahuati. Mahuatai mihincanquin jonibaan. ²³ Jaa jascapa bexojati janinxon sca hihti hisin hisinxon hoque jisxon hocho Abraham meraquin. Lázaro rihbi hahbetan pihi tsahoti. ²⁴ Abraham quenaxon sca: Hehon shinanhue, Papan. Lázaro raanrohahue, jahuen metoti rebo pishca jenen mehchajaxon jan heen jana matsijaxonnon. Nea chihin ta hea jeneyamahiqui. Hihti tiroma hisin tah hen jai, hahquin. ²⁵ Shinanhue, baquen. Jihueparihax tah min siriboyahpa janiqui. Lázaro cahen tiromabo rahsi. Rahma cahen pihihue hahca nenoxon pihi jihuetai. Mia cah min hisin jaroma teneti jai. ²⁶ Hono naponbi rihbi ta hihtihosi xanquen jaiqui, jenquetsahax bi nenohax jari tsoabi botopaquetimahi. Jarihax rihbi tsoabi neno pohquequihrani jotimahi, hahquin Abrahamen. ²⁷ Jaatin hihti yocaribiscaquin: ¡Hahrai, Papan! Jascahiya heen papan xobo janin jaa raanrohahue. ²⁸ Pichca ta heen huetsabo jaiqui. Raanrohahue, caxon jan jato yohi yohinon, nea hihti tiroma janin joyamahabo, hahquin coriquiyahpa hihpahoniton. ²⁹ Moisesnin huishani joibo ta jaabo jaiqui, Papan joi yohinicabaan huishani joi rihbi. Jaa joibo jaabaan nincacoinnon, hahquin Abrahamen. ³⁰ Jascahah: Jaa joi ta nincayamacaniqui, Papan. Mahuatipish bi jato qui huesti cahiya pari ta nincacointicaniqui, hahquin. ³¹ Moises nincayamaxon, Papan joi yohinicabo rihbi nincayosmaboxon ta huesti mahuatipish bi hahquihrihbi jihuexon jato yohihah bi nincatimarihbianiqui, hah sca Abrahamen jaa janon —jato jaquin.

17

Hohchati shinanbo non bihmis

(Mt 18.6-7, 21-22; Mr 9.42)

¹ Jascajaxon jato yohirihbiquin:

—Hahan hohchati shinanya ta jotihiqui. Man jaa jotimajati hahtipahyamahi bi ta jaa jomahi joni hihti sai saihiyaxihquiqui, casticannah. ² Hohchati shinan hinanyamanon macan renti tenexxon jenenencanya potahah cahen hashoan siriquehahni. ³ Coiramenahue. Miin huetsa hohchataiya pontejaquin yohihue. Shinanquin sirijahiya sca sirijaquin yohuanquihnhue. ⁴ Mia tiromajaxon bi Hen tah hen tiromajahahqui, huetsan. Pontejaquin sca tah hen shinanai mia jaah tah min sirijaquin yohuanquihntihi, jan mihqui tiromahah tah min shinanyamascatihi. Huesti neten mia siete coti jascajaha bi tah min hahxontih —jato jaquin.

Nincacointi shinan

⁵ Jascahah:

—Hahan nincacointi shinan noque hashoan hichajaxonhue, Hihbon —hahcanquin.

⁶—Moxo berotihopa shinan pishcayahpaxon man nea huishtinanti jihui yohixon Mex-cachinax hian janin cayacahintanhue man jaah cah man yohihah quesca sca jaquehahni.

Noquen Hihbo non hahxoncointi

⁷ Patoroboxon man yonohah, maton joni huai chian teebahinahax jascayamaxon maton hinabo pimaxonax xobon sca jahuiton sca man Johue, mapexon piresscahue, ζ hah man jatihin? ⁸ Hea pitijaxoni sca johue, hahqui mehca mehaxon hea bexonhue, hen pixon xehanon. Jascjaxon pari mian sca Pinoxahnhue, xehanoxahnhue, ζ hah man patoroboxon jatimahin? ⁹ Man yonoha jan hahcaiya, Hahxon tah min hea jai, ζ hah man jatihin? ¹⁰ Maton jonin mato hahxonai quescajaribiquin maton Hihbo hahxonnhue. Maton hihbaan mato yohiha jatihibi hahcax Noque tah non tromabo teexonnicahbo qui. Jan noque yohihah res tah non hahcai, hihnhue —jato jaquin.

Diez sipiyahpabo Jesusen rohajahi

¹¹ Jaatian sca Jerusalem janin sca cahi cahi. Galilea mai senenbi cahi, samaritanobaan mai quetanpaquebahini cahi. ¹² Jaton jema huesti qui nocoxon sca sipiyahpabo jahuiho behchiquin. Diez joni, sipiyahpabo rahsi. Jesus merahax, hocho nihxon coshin quenacanquin:

¹³ —¡Maestron, Jesusen, noquehon shinanrohahue! —hahcanquin.

¹⁴ Jato jixon:

—Man rohahi sacerdotenin jisnon jismatannahue —jato jaquin. Jascahah boresscapani. Bahin caquin jisi bi jatón sipi rohacahinscai. ¹⁵ Rohahipibo bi huesti res joribihí.

—Papan ta hea hihti hahxonihqui —hihonahi jahui. Nincacahbo hihquish coshin yohuani. ¹⁶ Jesus qui nocoxon sca hahqui betihihpaquexon:

—Hihti hahxon tah min hea jai, Hihbon —hahquin. Jaa joni cahen samaritano.

¹⁷ —¿Rohascaibo diez hihiyamahipishquin? ¿Texe cahran? ¹⁸ ¿Caibo jononma nea nahua huesti Hahxon tah min hea jai, Papan hihonahi jahuiquin? —hahscaquin Jesusen. ¹⁹ Jascjaxon jaa yohiquin:

—Huenitax caresscatanhue. Hihcoinjaquin shina nax copi tah min siri sca jai —hahquin.

Hihbo joti hochomahiya jayaxihquibo

(Mt 24.23-28, 36-41)

²⁰ Jaa pecaho sca ta fariseobaan yocannishqui:

—¿Papan jihuemati jahuentian jotihiquin? —hahcanquin. Yocacahbo sca:

—Papan jihuemati ta jistimahiqui. Maton beron tah man jaa jistimahi. ²¹ Neabi tah qui, Hoa tah qui hih tah man jatimaribihí. Papan ta mato tocanxon mato jihuematihiqui.

²² Fariseobo jascjaxon jahuen haxetibo sca yohiquin:

—Huetsa tian tah man Noquen Hihbo noque betan hihpahinon, huesti nete pishca res jan hahquirihbi noque betan nihpahinon, hih tah man jayaxihqui. Hea jiscatsihxon bi tah man hea jisyamayahqui. ²³ Hoa tah qui hihiyamahax ta Neno tah qui hihiyahicanihqui.

Jascahahbo bi jano yohihibo janin boyamayaxahnhue. Jato chibanyamayaxahnhue. ²⁴ Naihoh ramihoh quehax ramihoh queha cana bacatanicamahi ta hea naihoh quehax jahuiya jatihiqui. ²⁵ Jascayahnoxon pari tah hen hicha teneti jai. Hea queenyamahax ta mai mehabo hea yohihí, Tiroma tah qui hihtihiqui. ²⁶ Neateman Noen jihueni tian japahoni quescarihbihi ta jayaxihcanihqui hea naihoh quehax hahquirihbi joresscanon.

²⁷ Jaatian ta pixon xehacanpahonishqui. Bebobaan haibo bihquin. Haibobaan rihbi bebo bihquin, jahuen xobo nontin Noen nananon caman. Jaatian ta jenehhuahnen joxon jato queyonishqui. ²⁸ Lot jihueni tian janibo quescarihbihi ta jayaxihcanihqui. Picanquin, xehacanquin, marocanquin, maromacanquin, huaijacanquin, xoboacanquin. ²⁹ Sodon jema janinhax Lot picotai betanbi ta naihoh quehax johuehihnacahinai chihí jato qui paquetah queyocahincannishqui, sodomobo. ³⁰ Jascarihbihi ta jayaxihquiqui, naihoh quehax hea noquebaque sanarenenaiya.

³¹ Jaatian maton xobo cahchian tsahoxon bi maton xobo chicho jai jahuaborabo bichi cati shinanyamanahue. Huai chian teetax jascarihbihi, xobon cayamascai. ³² Loton haibo hihni shinannahue. ³³ Noque rehtecanmis hihxon hea hihbomayamahibo ta queyocahinyaxihquiqui. Hea jenebahinyamahibo ta rehtehah bi jihuecinyaxihquiqui.

³⁴ Jaa yamebi huesti bachihó rabe joni hoxahi bi tah hen huetsa bihxon huetsa rihbi hean jenebahinyaxihqui. ³⁵ Rabexon rene renehiboya tah hen huetsa bihxon huetsa rihbi hen potabahinyaxihqui. ³⁶ Huai chian teetaibo jascajaribiquin. Huetsa bihxon bi huetsa jenebahinquin.

³⁷Jato jascajaha:

—¿Jahuerahonon nan, Hihbon? —hahscacanquin.

—Jano nami racatai bi ta hishmin tsinquitihiqui —jato jaquin.

18

Yononmanen tininti yoca yocacai

¹ Jaatian sca Papa yocati jenebahinyamahahbo hihxon jaa patax queha joi sca jato haxemaquin. Jaayocaqui paxquinyamahahbo hihxon jato haxemaquin.

² —Huesti tininti cahen jahuen jeman jihuetan, Papahon shinanyosma, jonihon shinanyosma. ³ Jano rihbi cahen huesti yononma haibo janish. Jahuen tininti yohihi sca yononma cari carichi. Hea tiromajahi joni hea casticanxonhue hahqui cari carichi. ⁴⁻⁵ Basi jascacahchihi bi tininti queenyamahi. Basihax res sca hahmebi shinamehti: Dios qui raquexonma tah hen jonibo qui rihbi raqueyamaxon bi nea haibaan hea jaajatsanjaha jan demandanai hean casticanxontihi, hea jatsanjayamascanon, hihqui.

⁶ Jaa joi jato nincamaxon Jesusen jato yohiscaquin:

—Jaa tiroma tininti yohuanai shinannahue. ⁷ ¿Man yocabahinaxon yocashinahah noquen Papan tiromajahibo pontequin mato hashoan histon hahxontimahiquin? ¿Man yocacai tenexon jaan manarestihiquin? ⁸ Histon bi res ta mato hahxontihiqui. Jan histon mato hahxonai bi ¿naihoh quehax joquin man nincacoinai hen mato jisbenayaxihquin?

Fariseo betan cobrannica Papa yocaqui nichí

⁹ Jato jascajaxon huetsa jaa patax queha joi sca jato yohiquin. Hea caya tah hen hohchajoma qui hihxon bi caibo sca jistahihmahiboya nescajaquin jato nincamaquin:

¹⁰ —Rabe bebo cahen janoxon Papa yocati xoboho mapexon Papa yocanish. Huetsa cahen fariseo joni, huetsa cahen coriqui cobranxonnica. ¹¹ Nichish cahen fariseo nescari hahri horahi: Hahxon tah min hea jai, Papan. Hea tah hen caibo jonibo quescapahma qui. Jaabo ta yometsohbo qui, tiromabo, tsinibo. Hoa coriqui cobrannica quescayamarihibi ta hea qui. ¹² Semanan tihibi tah hen rabe coti samacai. Hen teexon cananai tihibi tah hen texe mia hinanai. ¹³ Jaa jascari yohuannon bi hocho nichish nai bejisihniti hihtimahpax hahri xohtlihiqui nihxon cobrannicatón yohiquin: Papan Dios, hea tah hen hohchayahpa qui. Tenexon hea sohuhue, Papan, hahquin. ¹⁴ Man honannon hihxon tah hen mato yohihi. Papan jisi ta hoa fariseo jahuen hohchaya jascabi janishqui, hoa cobranxonnica ta hohchajoma sca jahuen xobon caresscanishqui. Hea caya ta siri qui, hihquibo jatihibi ta Papan rabinmayaxihiqui. Hea ta jahuama qui hihquibo ta caibo mentan hashoan siri qui, Papan jisi —jato jaquin.

Baquebo Jesusen yocaxonai

(Mt 19.13-15; Mr 10.13-16)

¹⁵ Baquexobo rihbi ta hihuecannishqui, jan jato mehenon. Jaya jahuibo jisxon, jahuen haxenicabaan jato yohiquin, jascapahya beyamanahue, hahquin. ¹⁶ Pantehibo jisxon jato quenaxon:

—Baquebo hehqui jonon jenenahue. Jato panteyamanahue. Jascapa ta Papan jihuetahbo qui. ¹⁷ Hen mato yohinon nincanahue: Baquebaan Papan joi nincacoinai quescajayamaquin nincaresaibaan ta Papan jihuetahtboti hahtipahyamahiqui —jato jaquin.

Coriquiyahpa betan Jesus yohuani

(Mt 19.16-30; Mr 10.17-31)

¹⁸ Huesti hapon sca yocaquin:

—Siri Maestron, ¿jenquetsahax hen hea queyoyamanox manatihin?

¹⁹ —¿Jahua copi min hea siri yohihin? Tsoabi siri ta yama qui, Papa huesti res. ²⁰ Papan yohini joibo tah min honanai. Tsiniyamahue. Joni huetsa rehteyamahue. Yometsohyamahue. Quesayamahue. Miin papan yohihah nincahue, miin maman rihbi yohihah nincacoinai —hahquin Jesusen.

²¹ —Baque pishcaxon nincanixon tah hen rahma caman jaa min yohihi quescabijaquin hahcai —hahquin.

²² —Huestijati sca tah min pishinai. Miin jahuaborabo jatihibi maromabahinxon jahuajomabo jaa coriqui hinanreshue. Jaatian tah min naihoh sca siri jahuabora jatihibi. Jascajatanax hehbe johue —hahquin Jesusen.

²³ Nincaxon masa shinanscaquin, jahuen jahuabora hichahiya.

²⁴ —Coriquiyahpabo Papan jihuetahtbo jaah ta hihti tee qui. ²⁵ Xohmox quini janin hahua huinomaha ta tee qui. Tee que bi ta coriquiyahpahun Papan jihue janin hihquiti hashoan tee qui —jato jaquin Jesusen.

²⁶ Jan jascahiya: —¿Coriquiyahpabo Papan jihuetahtbotimahiya tsoabo sca non Papan jihuetahto jatihin? —hahscacanquin.

²⁷ —Jonibaan jisí jenquetsahaxon hahtimahi bi ta Papan hahtipahiqui —jato jaquin.

²⁸ —Jise. Noquen tah non jatihibi jenebahinxon mia chibanai, Hihbon. ¿Non queyoyamanox jihuetimahin? —hahscaquin Pedronen.

²⁹⁻³⁰ —Papan jihuemati joi bihcoinnoxon tah man maton xobo potabahinai. Maton xobo, maton haibo, maton huetsabo, maton papabo, maton baquebo rihbi, jaabo jatihibi jenebahinxon tah man nea mainxon bi hashoan hihti caibo rihbi man bihtihí. Naihoh sca tah man queyoyamanox jihuerihbitihí. Jatihibi potabahinax bi tah man hashoan sca jatihí —jato jaquin.

Jan mahuanoxihqui Jesusen yohirihbihi

(Mt 20.17-19; Mr 10.32-34)

³¹ Jahuen doce joni sca quenaxon:

—Nincanahue. Jerusalem janin tah non cahi cahi. Jano sca ta Papan joi yohinicabaan huishani joibo jai quesca sca jatihibi jaresscatihiqui, noquebaque hihqui bi hea yohihí joibo. ³² Hea ta nahuabo bihmayaxihcanihqui. Hosan hosanxon ta hea hicháyaxihcanihqui.

³³ Hea betoshbanhahxon ta rishquitinin rishqui rishquixon hea rehtescayaxihcanihqui. Hea rehtehipibo bi quimisha neten hihquish tah hen hahquirihbi hueniyaxihqui —jato jaquin. ³⁴ Yohihah bi nincayamacanquin. Jaabaan nincacah cahen honantima joi. Jahua hihcatsihquiquin honanyamacanquin.

Jericó benche Jesusen rohajahi

(Mt 20.29-34; Mr 10.46-52)

³⁵ Jaatian sca Jericó jema janin sca nocoti bocani. Jema hihcoti bahin bocani. Jaa bahi quexabi benche joni tshahoti. Coriqui yocaqui tshahoti. ³⁶ Huinojaquetai nincacax yocahti: —¿Tsoabo man huinotain? —hihqui.

³⁷ —Nazaret janinhah Jesus ta huinotihqui —hahcanquin.

³⁸ —Jesusen, Davidi baquen, hehon shinhahue —hahquin, coshin. ³⁹ Hahbe huino-taibaan sca: —Netehue. Netehue —hahcabo bi hashoan sca sai saihihqui:

—Davidi baquen, hehon shinanrohahue —hahquin. ⁴⁰ Nihrenenxon sca:

—Jaa neno hihuenahue —hahquin Jesusen. Hihuehah, jaa senenbi nichiton sca benche yocaquin:

⁴¹ —¿Hen mia jahuejaxonti min queenain? —hahquin.

—Heen bero hea rohajaxonhue, Hihbon —hahquin.

⁴² —Jisresscahue. Hen mia rohajati min shinancoinai quen tah hen mia rohasasca jai —hahquin. ⁴³ Jaatian jahuen bero siricahin sca jai. Bero siricahinxon Jesus chibanbonahi caquin, Papa Diosen ta hea hihti hahxonihqui hihcanahi. Jaa jisish jatihibi sca jascarihbihí; Papa Dios ta hihti siri qui hihcanacani.

19

Jesus betan Zaqueo

¹ Jericó jema nabebacahini cahi sca bocani. ² Jano Zaqueo janeya joni jai, cobrannicabaan hapo. Coriquiyahpa joni. ³ Jenquetsahpa hin hihxon Jesus jiscatsihqui bi jonibo tsamajaquetaiya jenquetsahaxon jistimahi. Queyanihmaxon jisti hahtipahyamaquin. ⁴ Bishquihihcanahi cahi. Jari Jesus huinoxihqui quiri cahi, jihuin hinacahini. Jesus jiscatsihqui hinacahinxon manaquin. ⁵ Hinatax manatai bi jaa jihui ponte sca nocoxon bejisihnixon bototi Jesusen yohiquin:

—Botopaquehue, Zaqueon, histon. Rahma tah hen miin xoboho tantihi cacatsihqui.

⁶ Botocahinax res sca hahbetan caxon jenimahanan jahuen xobon mapemaquin. ⁷ Jan jano mapetai jisish, jatihibi renen rerenescani.

—Hohchayahpa jonin xoboho mapetax ta janobi tantihiqui —hihcani. ⁸ Reren rerenai-baan bi nihinaxon:

—Hihbon, texe heen coriqui hena hihnon tah hen jatíhi rihbi jahuajomabo hinannoxihqui. Paraxon hen bichinnihbo Rahbi tah hen chosco coti jatíhi rihbi tsamanxon jato hinnanrihbitihí, hihbon —hahquin Zaqueonen.

⁹ —Nea netenbi ta nea xoboho jihuetai joni Papan jihuemahiqui, queyoyamanox man-ascanon. Nea rihbi Abrahamen baque, can. ¹⁰ Manonihbo benahi tah hen naihoh quehax joniqui, jato jihuemanoxon. Jaa copi tah hen queyoyamanox manati yohihahqui —jato jaquin, Jesusen.

Patoronen coriqui hinanai

¹¹ Jato jascajahax Jerusalem hochoma sca nichiya sca:

—Jaa rah ta quiquin hapo sca Papan hihmanoxihqui. Jaa rah tah non rahmabi jisnoxihqui —hihcani. Jascajaquin shinanaibo quen jaa patax queha joi sca jato yohiscaquin.

¹²—Huesti hani patoro cahen hocho canish, janoxon quiquin hapo sca hihmahahbo. Quiquin haposcaax joribiyaxonon cahi. ¹³ Cariyamaxon diez jahuen jonibo quenaxon joni tihibi coriqui hinantahquin, joni tihibi diez mil soles. Hinanxon jato yohiquin: Hen joribinon caman yaxaxon maroxon maromanahue hichajaxonon, jato jaquin. ¹⁴ Jan caresscaipi cahchiqui sca texe jahuen jihuetahbaan jaa jistahihmaxon comision raanquin. Jano jaton patoro cahi janinbi cahax nocoxon Jaa patoro noquen quiquin hapo hihti tah non queenyamahi yohihi cahabo hihxon comision raancanquin. ¹⁵ Jaabi, quiquin haposcaax joribixon sca jan coriqui hinantahnihqui quenamaquin. Joni tihibichin jahuentihi cananiquin hihxon jato quenamaquin. ¹⁶ Huesti joxon: Hihbon, min hea hinantahbahinni tah hen diez coti rihbi jatli rihbi hahcai, hahquin. ¹⁷ Min tah min sirijahi. Mia tah min siri joni qui. Hicha tahma hinanah bi tah min sirijaquin hahcai. Jaa copi tah min diez hani jemabo sca min hihbotihi hahquin jahuen hapon. ¹⁸ Huetsa sca jahui. Min hea hinanbahinni coriqui tah hen pichca coti rihbi jatihiribi hahcai, Hihbon, hahquin. ¹⁹ Mia rihbi tah hen pichca hani jemabo sca hinanai, min hihbonon, hahscaquin. ²⁰ Huetsa rihbi sca jahui. Joxon: Nea ta min hea hinantahbahinni coriqui qui, Hihbon. Chopan rahcoxon tah hen sirijaquin mia bexojaxonnihqui. ²¹ Mihqui raquexon tah hen bexojaniqui, Hihbon. Mia tah min sina qui. Mian jananihma tah min bichinai. Min banayamanih tah min tsinquirihbihi, hahquin. ²² Min yohuanai quescabija tah hen mia jatihi, tiroman. ¿Hea sina hihqui min honanihquin? ¿Hen jananihmabo hean bichinain? ¿Heanbanayamanihbo tsinquinica min hea honanain? ²³ ¿Jahua copi sca min heen coriqui jaya teenica hinanyamanihquin jan jaya teenon? Joxon cah hen heen coriquinin cananai hashoan hicha bihribiquehahnai. ²⁴ Jano nichibo sca yohiquin: Jahuen coriqui bichinxon, diez tsama jai joni hinannahue. ²⁵ Jaatian: Ma ta diez jarescaiqui, Hihbon, hahcanquin. ²⁶ Jaa jaibo rahsi tah hen hashoan sca hinantihi. Jahuajomabo rihbi tah hen jan jai pishca hean bichintih, hih ca hen jai sen. ²⁷ Hoa hea jaton quiquin hapoti queenyamahibo sca neno hihuenahue. Heen rahuibo tah qui. Heen jisnon bi jato rehtepaquenahue. —Jascajaquin ta haxehahbo Jesusen jato jaa patax queha joi yohinishqui.

Jerusalen janin Jesus nocotai

(Mt 21.1-11; Mr 11.1-11; Jn 12.12-19)

²⁸ Jaa joi jato nincamahax Jerusalen janin sca cahi caribihi. ²⁹ Betfagéya Betania jemabo hochoma sca Olivo janeyahpa mahchi ponte nococani. Janoxon sca rabe joni raanquin.

³⁰ —Hoque racatai jema janin botannahue. Nocoxon tah man cabacho baque nexá meratihi, tsoabi jaa cahtsahonima. Pecaxon hahbenahue. ³¹ ¿Jahuejanoxon man pecahin? yocacah sca, Noquen hihbo ta pishinihqui hihnahue —jato jaquin.

³² Raanah boresscapani. Cahi nocoxon jan yohiha quescabi meracanquin. ³³ Cabacho baque pecahiton sca cabacho hihbaan jato yocaquin:

—¿Jahuejanoxon man pecahin? —jato jaquin.

³⁴ —Noquen Hihbo ta nea pishinihqui —hahsacanquin. ³⁵ Jascajaxon becanquin. Jaya noco sca jaiya sca, jaton chopahahan pohenxon tsahotijacanquin. ³⁶ Jaa cahtsahotax cahiya sca caibaan rihbi jaton taribo pecaxon bahin mijanquin, hahan nihnon hihxon. ³⁷ Olivoya mahchi naman sca nocotaiya jahuen haxenicabo jatihibi jenimacanahi yohuancanahi, coshin bi res:

—Papan shinanyaxon ta hihti hahxonihqui —hihcani. Papan coshiyaxon Jesusen jato haxonrahsihi jisipish jascapani.

³⁸ —Quiquin hapo ta jahuiqui, Papa Diosen janen ta jahuiqui. Shinanya siri tah qui. Papan ta noquehon shinanxon hahxonihqui. Noquen naihoh queha Papa ta hihti siri bi res qui —hihcani. ³⁹ Caibo fariseobo rihbi jato tocan nihxon Jesus yohiquin:

—Jascayamanon min haxenicabo netemahue, maestron —hahcanquin.

⁴⁰ —Jaabo netetaiya ta toa minchihi macanbo coshin yohuanquehanihqui —jato jaquin.

⁴¹ Mahchi cahpaquehxon hori Jerusalen jema racatai jisish Jesus jaya huahohiqui.

⁴² —Rahmabi Papa betan siripi jihueti man honanpahunon, Jerusalen janinhahbon! Jaa honantihi bi tah man benchebo qui. ⁴³ Tiromabo netebo ta mato qui nocoti jahuiqui. Mato qui tsequeti joxon ta mai tsamanson mato chiquehahtanbohanxon mato tejatanbohanxon jatihibi janinxon mato tiromajayaxihcanihqui. ⁴⁴ Maton xobobo potojaquetanxon ta maton baquebo rehteyaxihcanihqui. Hahan xobojquin man tsamanni macan ta ni huestibi huetsa macan cahchian tsahoyamascatihiqui. Mato jascajayaxahnnon bi tah man Papan mato rahma sirijacatsihqui man honanyamahi —jato jaquin.

Papan xobo janin tiromahibo jan camahi

(Mt 21.12-17; Mr 11.15-19; Jn 2.13-22)

⁴⁵ Jema janin hihcohax sca Papan xoboho mapeti. Mapexon janoxon maromahibo cainmabahinquin.

⁴⁶ —Heen xobo ta jahoxon hea yocati xobo qui hih ta Papan joi janin jaiqui. Nenoxon Papa yocatihi bi tah man jano yometsohbo tsinquitijahi —hahxon jato jabamaquin. ⁴⁷ Jatihibi neten sca ta jaa xobohoxon jonibo haxemanishqui. Jan haxemahia cahen judiobaan hapobo betan jaton haxemanicahbaan jaa rehteti shinannish. Judio patorobo betan rihbi jascajaquin shinanxon bi jenquetsahaxon rehteti merayamacanquin. ⁴⁸ Jan haxemahi nincacatsihqui jonibo hashoan hicha tsinquijaquetaiya cahen jenquetsahxon rehtenoxon bihtimahi.

20

Tsoan yohihah min jascajahin hihquibo

(Mt 21.23-27; Mr 11.27-33)

¹ Huetsa neten sca Papan xobohoxon jonibo haxemahanan jan joi siri yohihiya sca judiobaan hapobo mapeti jahui. Jaton hapobo, jaton haxemanicahbo, jaton yohuan hihbobo, jaabo rahsi jano mapeti jahui. ² Mapexon yocacanquin:

—¿Tsoan janen min jascajahin? ¿Tsoan jascajahue hahca min jascajahin? Noque yohihue —hahcanquin.

³ —Hean rihbi tah hen mato huesti yocatihi, maton pari hea yohinon. ⁴ ¿Tsoan yohiha Juaman nashimapahonnishquin? ¿Jonibaan yohihah nan, Papan yohihah nan? —jato jaquin. ⁵ Jascajaquin yocacah jaabo rahsibi yocacahanannancani:

—¿Jahua non yohitihin? Papan yohihah rahan hah non jaiya ta jahua copi sca man jaa nincayamanishquin hah noque jatihiqui. ⁶ Jonibaan res yohihah rahan hih non jaiya ta nea tsamajaquetaibaan noque macaman tsacaxon rehtetihiquin. Papan joi yohinica ta Juan janishqui hah ta jacanishqui jatihixonbi, hih ca hen jaihse —hihcani, jaabo rahsibi yohuani. ⁷ Jascahahnanxon sca:

—Tsoan yohiha jaan nashimanishquin, non tah non honanyamahi —hihcani.

⁸ —Man hea yohiyamahi quen tah hen tsoan yohihah hean nescajahin hean rihbi hen mato yohiyamahi —jato jaquin.

Huai texonnicahbo

(Mt 21.33-44; Mr 12.1-11)

⁹ Jaatian sca jaa patax queha joi sca jonibo yohirihbiquin:

—Huesti jonin cahen bimi huai bananish. Huaijaxon ta texonnicahbo jahuen huai hinantahnishqui, canoxon. Hinantahbahini cahi, hocho cahi caresscai. ¹⁰ Basixon sca texe jahuen bimi bihxonnon hihxon hochoxon jahuen joni raanquin. Raanah nocotaiton sca hinantahniabaan rishquixon mequen sca camarihbianquin. ¹¹ Huetsa rihbi jahuen joni sca raanrihbiquin. Jaa rihbi rishqui rishquixon roaxon mequen bi res camarihbianquin. ¹² Huetsa rihbi sca raanquin, jahuen quimisha sca. Jaa rihbi tsehue tsehuejaxon potacanquin.

¹³ ¿Jahuejascapan? Hahan hen queenai heen baque sca raanpan. Jaa rah ta nincayaxihcanihqui, hahxon raanquin. ¹⁴ Jaa sca nocoti jahui jisish, yohinancani jahuen hinantahnibo. Jahuen papa yama sca jaiya ta nea sca huai hihbo hihyaxihqui. Rehtenonhue, jahuen huai noquena sca hinon hihcani. ¹⁵ Jascaxon huaima qui hioxon sca rehtecanquin. ¿Huai hihbobi joxon sca jahueja jaan jato jatihiquin? ¹⁶ Joxon ta jahuen hinantahnibo rehtepaqueyaxihqui. Jato queyobahinxon sca ta huetsabo sca jahuen huai hinantihiqui —jato jaquin.

—Jascajayama jacanpahinon —hihscacani, nincacax.

¹⁷ Jato bejspaquequin sca:

—¿Nea huishani jahua hihcatsihqui? Jaa nahuita jihui ta tiroma qui hihxon xobojahibaan potahibaan bi ta jaabaan potahi jihui qui hean xobojacoaini hih ta jaiqui huishani joi. ¹⁸ Jaa nahuita jihui qui paquetaibo ta tobicahintihiqui, jatihibi. Caibo qui paquequin ta jaa jihuin jato champajabahintihiqui —jato jaquin.

Hapon cobranah non copijati

(Mt 21.45-46; 22.15-22; Mr 12.12-17)

¹⁹ Jato qui jan jaa joi yohihi honanxon ta jenquetsahaxon non jaa bihtihin hihxon jaton haxemanicahbo betan jaton hapobaan tanaxon bi bihti hahtipahyamaccannishqui, jonibo qui raquexon. ²⁰ Noquen Hihbo nincacoinihcamahax manahihti cahabo sca caibo copijacanquin. Jaama joi yohuanmatannahue hahxon copijacanquin. Jaama yohihiton bihxon tah non noquen hapo hinanscatihi, noquen gobernador rihbi hinanquin hahcanquin. ²¹ Nincacoinihcamaxon sca Jesus yocacanquin:

—Mian tah min sirijaquin yohihi, maestron. Pontejaquin tah min haxemahi. Tsohquibi raquexonma tah min jaabijaquin jatihibi jonibo yohihi. Papa qui cahi bahi tah min honanmacoinai. ²² Noque yohihue: ¿Quiquin hapo Cesaronen noque cobranah non copijatihin? ¿Non copijatimahin? —hahcanquin. ²³ Paraxon yocacaibohi honanxon:

²⁴ —Coriqui huesti hea jismanahue. ¿Tsoan mapo jano jaiquin? ¿Tsoan huisha jano jaiquin? —jato jaquin.

—Cesaronena rahan —hahcanquin.

²⁵ —Jahuena hihquiya jaa hinannahue. Papana hihquiya tah man noquen Papa hinanrihbitihi —jato jaquin. ²⁶ Tsinquitaibaan jisiya ta jenquetsahaxon yohuanquihnxon bihtima jacannishqui. Jato joi bichinah neteresscani, rahtetax.

Jonibo hahquirihbi teehihtihiquin hihquibo

(Mt 22.23-33; Mr 12.18-27)

²⁷ Saduceobo sca jahui, tsoabi ta mahuatax hahquirihbi huenitimahiqui hihnicabo. Jaabaan sca tanaquin yocaquin.

²⁸ —Maestron, Moisesnin ta huishanishqui, noquen bocha baquejahaxma hihxonaiya non jahuen yononma bihxon hahqui noquen huetsa yamanica non baquejaxonti. ²⁹ Siete joni ta janishqui, jaa mama quihah rahi. Bebo quihatn ta haibo bichish bi baquejahaxma mahuanishqui. ³⁰ Jahuen chini jaa bichish bi jascarihibi. ³¹ Huetsa rihbi sca jahuen chini, jascarihibi. Jatihibi sca jascarihibi, baquejahaxma queyocani. ³² Hahchon sca ta jaton haibo rihbi mahuanishqui. ³³ Papan noque hahquirihbi huenihiya sca, ¿tsoan haibo jaa jatihiquin? Jatihibichin jaa hahuinjani —hahcanquin.

³⁴ —Rahma jihuetaibo ta haibo bihmahahniqui. ³⁵ Papan caisxon hahquirihbi jihuemahibo ta huanoyamascayaxihcanihqui. Huanomayamaribiquin. ³⁶ Jaabo ta mahuayosmaboyaxihquiqui. Papan yonotibo hihqui quesarihibi ta jayaxihcanihqui. Papan jato jihuema ta jahuen baquebo rahi sca jayaxihcanihqui. ³⁷ Mahuanicabo hahquirihbi hueniyosmabohi man shinanah bi ta hueninicabohi Moisesnin yohinishqui, nescajaquin: Hea tah hen Abrahamen Papa Dios qui, Isaaquena rihbi, Jacobona rihbi. ³⁸ Papa Dios ta mahuanihbaan Diosma qui. Jaa ta jihuetaibaan Papa Dios qui, Jaan jisi jatihibi japaribi quen —jato jaquin.

³⁹ —Hihcoini rahan —hih sca jaton haxemanica huesti jai. ⁴⁰ Hashoan yocati qui raquescaax jascari.

Cristo yocacahtai: ¿tsoan baque hea quin?

(Mt 22.41-46; Mr 12.35-37)

⁴¹ Netetaiton sca:

—¿Jahua jisxon Cristo ta Davidin baque hihiyaxihquiqui jacanihquin? ⁴² Man jisyamahin, behua huishaquin ta jaa yohihi Davidinin yohinishqui:

Xaba hihbaan ta heen hihbo yohinishqui, Hea mecayaho hihbohi tsahohihnahuea

⁴³ Miin rahuibo miin hinabo sca hihnon hen jato namanjanon caman neno tsahotihue hahcahen Davidinin janish huishaquin. ⁴⁴ Heen hihbo jan hihquiya ¿jenquetsahax res sca jahuen hihbohax bi jahuen baquetihiquin?

Judiobaan haxemanicahbo quescapahbo non jamis

(Mt 23.1-36; Mr 12.38-40; Lc 11.37-54)

⁴⁵ Jato jascjaxon jatihixonbi jonibaan nincanon sca jahuen haxenicabo yohiquin:

⁴⁶ —Jaton haxemanicahbo hihqui quesca man jamis. Coiramenahue. Jaton chopa siribo sahuehax jano jonibo tsinquijaquetai nihti ta costancaniqui, jisibo hihquish jano nich. Caibaan jato Hapon hahnon hihxon ta costancaniqui. Tsinquiti xoboho ta hapobaan tsahotibo janin tsahocatsihcanihqui. Pihi johue hahca ta xobo hihbo patax bi res tsahoxon picatsihcanihqui. ⁴⁷ Yononma meraxon ta tahtijaxon jahuen jahuaborabo jatihibi bichincaniqui. Paranquin ta Papa basi yocacaniqui, jatihixonbi nincanon hihxon. Jascapa ta Papan hihti casticanyaxihquiqui —jato jaquin.

21

Yononmanen coriqui pishinxon bi hinanai

(Mr 12.41-44)

¹ Jaatian sca coriquiyahpabo jano nich jisquin. Papa qui hinancatsihquin coriqui naneti bohnanai janin coriqui nanehi nichibo jisquin, hicha coriqui nanehibo. ² Huesti yononma sca joxon jahuen coriqui yahahi bi jahuen rabe coriqui romishin nanequin. Jaan nanehi jisxon sca Jesusen jato yohiquin:

³ —Hoa jahuaborajoma yononmanen ta caibo mentan hashoan hicha nanehiqui. ⁴ Hoabaan ta hicha bi res jaxon texe hinanihqui. Hoa yononmanen ta jatihibi pishinxon bi jan jai jatihibi hinanihqui —jato jaquin.

Papan xobo potojaquetanyaxihquibo
(Mt 24.1-2; Mr 13.1-2)

⁵ Jaatian Papan xobo yohihi caibo yohuani.

—Macanbo hihti siribo tah qui. Jise. Sirijaquin ta hahcannishqui, xobo siri —hihcani.

⁶ —Nea man jisi xobo ta potojaquetanyaxihcanihqui. Ni huesti macanbi ta huetsa caht-sahotimascatihqui. Potaquin ta ni huestibi pishinmayamayaxihcanihqui —jato jaquin.

Noquen Hihbo jahui hahan honanti
(Mt 24.3-28; Mr 13.3-23)

⁷ —¿Jahuentian jascayaxihcanihquin, maestron? ¿Jahua jisxon non min yohihi quesca sca jacatsihqui non honantihin? —hahcanquin.

⁸ —Coiramenahue, mato parancanmis. Hea tah hen qui hihqui ta heen janen hicha joyaxihquiqui. Nete ta queyocatsihscaiqui hih ta jaribiyaxihcanihqui. Jascascaibaan bi jato nincayamaxahnnahue. ⁹ Rehtenanaibo joi nincacax bi rahteyamayaxahnnahue. Mai hihbocatsihxon rehtehibo joi nincacax rahteyamarihbiyaxahnnahue. Jascapahbo pari ta jatihiqui. Jascapa jai bi ta nete queyorihyamatihiqui —jato jaquin.

¹⁰ Jascajaxon jato yohirihbiquin:

—Huetsa jonibo ta jaton nahuabo betan rehtenanyaxihcanihqui. Quiquin hapobo ta hahbe quiquin hapobo betan rehtenantihiqui. ¹¹ Mai rihbi ta coshin bi res mihuanyaxihquiqui. Nahuan pahen ta hisinyaxihcanihqui, mahuati hisini. Hicha janin ta jascayaxihquiqui. Hahqui raquetibo ta jatihiqui. Naihoh rihbi ta hahan honantibo jayaxihquiqui.

¹² Jaabi ta jascapahbo jaryiamahi bi mato tiromajanoxon mato yahtanyaxihcanihqui. Tsinquixon mato tiromajanoxon ta jaton tsinquiti xoboho mato boyaxihcanihqui. Jaton sipo xoboho rihbi ta mato tsahonyaxihcanihqui. Man heen janen yohihi copi ta jaton gobernadorbo janinxon mato demandanyaxihcanihqui. Jaton quiquin hapobo janinxon jascajaribiquin. ¹³ Hioxon ta mato Hihcoini sca yohuanhue hahxon mato tana tanayaxihcanihqui. ¹⁴ Mato jascajahabo bi rahtxonma maton jointinin shinanquin sirijanahue. Jahua yohipan hihyamanahue. ¹⁵ Jaatianbi tah hen mato shinan hinantihi, hahan yohuanti hinanquin. Man hahan yohuanaiya ta mato joi bichinti hahtipahyamayaxihcanihqui. Mato joi bichincatsihquibo rahsichin ta jascama ta qui hahti hahtipahtimahiqui. ¹⁶ Hahan yohuanti shinan hen mato hinanah bi ta mato qui yohuanxon caibo maton papabaan, maton mamabaan, mato huetsabaan, maton jenabaan, maton hahbe rabetibaan maton tinintibo mato bihmayaxihcanihqui. Caibo rihbi ta mato rehteyaxihcanihqui. ¹⁷ Man hea nincacoinai quen ta mato jistahihmayaxihcanihqui. ¹⁸ Jaabi tah man manotimahi, ni huestibi ta maton boo queyocahintimahiqui. ¹⁹ Hea jenebahinyamahax tah man queyoyamanox manatihi.

²⁰ Mato jascayaxihquibo bi nahuan sontarobo nea Jerusalem mayahahtanbohanei jisxon, nea jema tiromajabahinti nea pishca sca jai honannahue. ²¹ Jaa jisish Judea main jihuetax mahchi janin jabacahintannahue. Jerusalem janin hihquish rihbi picocahintannahue. Jemama qui nichibo rihbi jema janin joyamascanon. ²² Huishani joibo jai quesca sca janon ta hihti tiromabo netebo jatihiqui. ²³ Jascapa hahqui nocotah ta tohoyabo hohmis hohmisyaxihquiqui. Xoma hahmahibo rihbi jascarihbihhi. Nea main jihuetaibo ta hihti tiromabo huinoyaxihquiqui, Papan jato casticanah. ²⁴ Sontarobaan ta hicha jonibo rehteyaxihquiqui. Jato bihxon rihbi ta jatihibi nahuabaan main jato borestihiqui. Nea Jerusalem rihbi ta nahuabaan hihbojayaxihquiqui, jaton nete senennon caman.

Noquebaque joyaxihqui
(Mt 24.29-35, 42-44; Mr 13.24-37)

²⁵ Hahan honanti rihbi ta jayaxihquiqui, bari huetsapahi. Hoxne rihbi huetsahpacahini, huishibo jascarihbihhi. Quebijistima nian coshin behchon behchonax tsahca tsahcajaquetaiya ta jatihibi janin jihuetaibaan rihbi hihti masa shinanyaxihcanihqui. ²⁶ Jahua sca noque huinomatihiquin hihquish ta raqueya jihuetax jaton jointi masacahinax jonibo mahuayaxihquiqui. Naihoh queha coshobo ta Papan shacon shaconyaxihquiqui. ²⁷ Jaatian ta naihoh quehax hea noquebaque botopaquetai jisayaxihcanihqui, nai cohiman hihti coshi xabaya hea jahuiya. ²⁸ Hen mato yohihi quesca jai jacatsihscaiya yobacahinnahue. Hen mato bichi joti nea pishca sca jai honanax, bejisihnbahinquin hahcajahi jihuenahue.

²⁹ Jato jascajaquin yohixon, jaa patax queha joi jato yohiquin:

—Banabo jihuibo jisnahue, jatihibi jihui rihbi jisnahue. ³⁰Bochocohi jisish tah man Bari tian sca ta jatihiqui hih man jai. ³¹Jascajaquin rihbi hen mato yohihah quescari jarescai jisxon, mato bichi hea joti nea pishca sca jai honannahue.

³²Hen mato yohihah quescari jatihibi jascascai pari ta nete queyoyaxihquiqui. ³³Naiya mai queyoyaxihqui bi ta heen joibo jahuentianbi queyotimahiqui.

³⁴Coiramenahue. Pahren pahenax man jointi xehpomis. Tiroma netebo huinotax, Hahrai jahueja sca non jatihin hihquish man jointi xehpomis. Huetsa janin man maton shinan camahiya hahan hea jahui nete mato qui nocorenenmis. ³⁵Jatihibi main jihuetaibo qui ta jaa nete histon nocorenenyaxihquiqui. ³⁶Hen mato yohihah quesca jarescacatsihquiboya mato cahnehahbo hihxon jatihibi tian hoxa tenexon jaayocanahue. Hea naihoq quehax jahuiya, hea bebon nihnicahnoxon hihxon, jaayocanahue —jato jaquin.

³⁷Jato jaa joibo yohinoxon ta bariyahpan Papan xobohoxon jonibo haxemahax yamebo sca Olivoya manan janin hoxahi capahonishqui. ³⁸Xaba paquescaiya ta Papan xoboho jonibo hahquihibi tsinquijaquepahonishqui, jan haxemahi nincaqui jahuex tsinquicani.

22

Rehtecatsihqui yohinani

(Mt 26.1-5, 14-16; Mr 14.1-2, 10-11; Jn 11.45-53)

¹Jaatian pascua fiesta hochoma sca jai, chahoma paan piti fiesta. ²Jesus yohihi, Jenquet-sahaxon non jaa mahuamatihin hih sca jacani, judio hapobo betan jaton haxemanicahbo. Jonibo qui raquetax jascacani.

³Jaatian Judas Iscariote Satanasnen hihbojaquin. Jaa Judas ta Jesusen haxenica hihpahonishqui, jahuen doce joni huesti. ⁴Caxon judio hapobo yohuanquihnxon jaton tintinibo rihbi jaa yohuanquihnquin. Jenquetsahaxon Jesus bihmatihin honanscaxon jato yohiscaquin. ⁵Jan jato yohiha jenimacani. Jenimahanan:

—Mia tah non copijatihii —hahcanquin.

⁶—Mato tah hen bihmacointihii —hihquish, Jahua hora jonibo yamahiquin, Jaatianbi bihmahah ta siri qui hihscai Judas, shinamehti.

Hihbo shinanhahnan piti

(Mt 26.17-29; Mr 14.12-25; Jn 13.21-30; 1 Co 11.23-26)

⁷⁻⁸Fiesta hani neten sca jaton paan pinon jaton carnero baque rehteti netenbi Juanya Pedro Jesusen yohiquin:

—Noquen fiesta piti hahxontannahue non pinon —hahquin.

⁹—Jahuerahnnoxon piti non hahtihin, Hihbon —hahcanquin.

¹⁰—Jema janin caxon tah man jene bihtanax poo hiabenahi jahui joni behchinoxihqui. Jaa tah man chibantihii. Jano jaa mapetai janin rihbi tah man jaa xoboho mapetihii. ¹¹Mapexon xobo hihbo yohinahue: Jahoxon heen haxenicabo betan hen pascua piti pinon jahoxon piti chique jahuen hin hah ta maestronen jaiqui hahquin yohitannahue. ¹²Man jascahah ta bochiquiha chique hani mato jismanoxihquiqui bexojaha siriscas bi. Janoxon pitija noque jaxontannahue —jato jaquin. ¹³Caxon sca jan jato yohihah quescabi meracanquin. Janoxon sca pascua pitijaxoncanquin.

¹⁴Ma hihresscaiya pihi tsahopaquēcani, Jesus jahuen haxenicabo betan.

¹⁵—Janin hea tiromajacannmis tah hen mato betan nea pascua piti hihti queenahqui.

¹⁶Papan jihuetaibo janon hen jaton hohcha queyobahinnon caman tah hen pascua piti piyamascatihii —jato jaquin. ¹⁷Hahqui xehati sca bihxon:

—Nea bihxon hinanpaquenahue. ¹⁸Nea hompa tah hen xehatimascas, mato jihuemahi jonoxon caman.

¹⁹Jato jascaxon, posen sca bihxon Papa yohixon tehcxon jato hinanrihbiquin.

—Nea ta heen yora qui, man jihuenon hihxon tah hen hehrí jato rehtemahi. Mahuaquin tah hen mato hahxonai. Jaa shinanhahnan piti ta nea qui. Hen mato hahxonai shinanhahnan pinahue —jato jaquin.

²⁰Pixon xehati sca bihxon jan piti yohihah quescaribiquin:

—Nea xehati hahnahue. Hahxontijanixon mato hahxonscaxon tah hen behna sca hahquihibi hahxontijahi. Hahxontijaxon hen jahuentianbi huetsajatimahi honanahbo tah hen heen jimí potahi. Jaa shinanhahnan xehanahue. ²¹Jaa hen mato jascajaquin yohihi que bi ta hea bihmahi jonin hehbetanbi piti bichiqui. ²²Papan yohini quescabihii ta hea tiromahabo jatihiqui. Hea tiromajayaxihquibo bi ta hea jato bihmanoxihqui joni Papan hihti casticanyaxihquiqui —jato jaquin. ²³Jato jascahah, yohinancani. Tsoan cahra jascajatihiquin hihquish yocacahanancani, jaabo rahsibi.

Tsoa hashoan hapo quin hihquinanaibo

²⁴ Caibo sca yohinani, Tsoa non hashoan hapo hihyaxihquiquin hihquish. Jascaraibaan bi Jesusen jato yohiquin:

²⁵ —Nahuabaan quiquin hapobaan ta jato hihti hihbojahi. Jato yono yonohah bi ta Jaa ta hapo siri qui hihcanihqui. ²⁶ Mato tah man jascapahbo jatimahi. Cacannicahax bi tah man jatihibichin yonoti quescas man jatihi, jato hahxonnicah. Mato bebonica ta maton chini quescas jatihiqui, mato hahxonnicah. ²⁷ Huetsan pinon ta huetsan rihbi metxoniqui. ¿Jahuemeha hashoan hapo quin? ¿Pinica hashoan hapoma quin? Maton hihbo hihxon bi tah hen mato tocan jihuxon mato hihti hahxonai. ²⁸ Caibaan hea tiromajahah bi tah man jenebahinyamarahsihi. ²⁹⁻³⁰ Hea quiquin hapo hihnon heen Papan hea yohini quescajarihiquin tah hen hean sca mato rihbi yohihi, hapobo sca man janon, hea quiquin hapo quen man hea janin hehbetanbi pixon xehayaxahnon. Hen mato hinanah tsahoxon tah man quiquin hapoboscaxon israelibaan doce jenabo man yonoyaxihqui.

Pedro paranahxihqui

(Mt 26.31-35; Mr 14.27-31; Jn 13.36-38)

³¹ —Simoman, nincahue, Simoman. Bimi bero rahsi bihcatsihquin tohaquin hahcajaquin mato tana tananoxon hihxon ta Satanasnen coshin yocacaxqui. ³² Jaabi tah hen mia yocaxonaqui, min nincacoinquin jeneyamanon. Hahquirihbi miin shinan pontexon sca miin huetsabo coshi hinanyaxahnue.

³³ —Sipo xoboho hea tsahonahbaan bi tah hen mia jahuentianbi jenebahintimahi, hihbon. Hea rehtehibaana bi tah hen mia jenebahintimahi —hahscaquin Simoman.

³⁴ —Yohicoin tah hen mia jai, Pedron. Nea yamebi ta hatapa queori jaima quimisha coti min Hea tah hen jahuen jonima qui hih min jatihi hea yohihi.

Jesus rehteti hochomahi

³⁵ Pedro jascaxon jatihibi sca yohiquin:

—Coriquijoma tah hen mato raannihqui, borasajoma rihbi, sapatojoma rihbi. Jascapa raanah bi ¿jahua man pishinnihquin?

—Jahuabima rahan, hihbon —hahcanquin.

³⁶ —Rahma tah hen mato yohihi. Borasayahpahax jaya cahue. Coriquiyahpahax jascarihibi. Hahan rehtenanti machitjomaxon miin coton maromaxon machito marohue.

³⁷ Hea yohihi, Hahbe yometsohbo betan ta hihquiqui hih ta hea yohihi jacanihqui, hehqui huishani joi jai quescajaquin ta hea janoxihcanihqui. Jaa copi tah hen yometsoh yohuanicamaquin mato yohihahqui. Neateman huishaxon yohini quescabi sca ta jarescatihiqui, hea yohihi joibo —jato jaquin.

³⁸ —Jise, Hihbon. Neno tah non machito rabe jai —hihcani.

—Jascabi sca janon jenenahue —hahquin.

Getsemani huai chianxon Jesusen yocacai

(Mt 26.36-46; Mr 14.32-42)

³⁹ Xobo janinhax cahax, jan hihcachihqui quescari Olivoya manan manichi cahi. Hahchon bi jahuen haxenicabo rihbi manahi cahi. ⁴⁰ Nocoxon:

—Tiroma yoshiman mato tanayamanon Papa yocanahue —hahquin. ⁴¹ Jato jascajahax hori pishca non macan pishca potahi tihixon jaa huesti cahi. Cahax, raboxonen nihxon, Papa yocascaquin:

⁴² —Papan, rahma janoxihquibo hea cahnemahue, queenxon. Jaabi, hea queenai quescarihima bi mia queenai quescas janoxihnon —hahquin.

⁴³ Jaatian Papan yonoti naiho quehax hahqui botopaquexon coshi hinanai jiscanquin. ⁴⁴ Jaatian bená benaxon Papa hihti yocascaquin. Yocahahan niscani, jimi toisihquicamahi niscani. Mai qui toisihquiya mai mehchascas. ⁴⁵ Yocati queyohax res sca huenicahuanax jahuen haxenicabo qui joxon benaya hoxahiton jato meraquin.

⁴⁶ —¿Jahua jenquetsahax man hoxa hoxahin? Huenixon Papa yocanahue; tiroma yoshiman mato tanamis.

Jesus bihxon nexahibo

(Mt 26.47-56; Mr 14.43-50; Jn 18.2-11)

⁴⁷ Jan jato yohihi betanbi jonibo nocoti. Jato betan jahuen haxenica Judas rihbi jato beboxoni jahui. Jesus qui joxon betsohahquin saludanquin.

⁴⁸ —¿Betsohahquin min hea jato bihmahin, Judasen? —hahscaquin Jesusen. ⁴⁹ Jaatian Jesus tejabohanaibohi jixxon sca:

—¿Non jato rerascatihin, hihbon? —hahcanquin jahuen haxenicabaan. ⁵⁰ Judio hapon yonoti sca huestichin reraquin. Reraquin bi jahuen pabinquin mecayahox paxtebahinquin.

⁵¹ —Jenenahue —hahxon jahuen pabinqui Jesusen mehaxon rohajaquin. ⁵² Jaya tejacahuanaibo cahen porisiabo, sacerdotobo, mesco hapobo. Jato jatihibi yocaquin:

—¿Yometsoh yahtanquin hahcajahi man machitoya jahuin? ¿Maton huinoboya man jahuin? ⁵³ Nete tihibi Papan xobohoxon honanmahanan hen mato betan hihراسيhi bi tah man hea bihyamahipiqui. Yame bihnicahbo tah man qui, yame baqueboxon.

Pedro paranahti

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jato jascahah bi bihxon judio hapon xobon Jesus bocanquin. Hocho tahni cahen Pedronen jato chibanbonaquin. ⁵⁵ Jesusyabi caibo mapenon, caibaan jemanhihtian chihhi requenjaquin. Pehchihhi tsahotaiboya sca Pedro rihbi jato tocan pehchihhi tsahoti. ⁵⁶ Pehchihhi tsahotai jisxon, Pedro bejisxon huesti haibaan sca yohiquin:

—Nea rihbi ta hahbetan nihrasihiqui —hahquin.

⁵⁷ —Quesahi. Jaa tah hen honanyamahi joni qui —hihscai Pedro. ⁵⁸ Jahuen hihbo jan hihbomayamahah basima sca huetsan rihbi bejisahnayohiquin:

—Mia rihbi tah min jahuen joni qui —hahquin.

—Jaama tah hen qui —hihribiscai. ⁵⁹ Basima huesti hora tihixonpahax huetsa rihbi yohuani:

—Hihcoini ta jato betan nea nihcachihiqui, Galilea mai meha joni can —hihqui. ⁶⁰ Jan jascarai bi:

—Min yohihi tah hen honanyamabiresai —hihribihi Pedro. Jan yohuanai betan bi hatapa queoscai. ⁶¹ Xobohoxon sca rabejaquexon Jesusen Pedro bejisquin. Jaatianbi ta Jesusen yohihah joibo Pedronen shinanscanishqui, janin hatapa queonon tah min quimisha coti hehqui paranahxihqui jan yohihah shinanscaquin. ⁶² Shinanax, picotax huaohihiscai. Hihti huaohihiqui, Pedro.

Jesus hosanaibo

(Mt 26.67-68; Mr 14.65)

⁶³ Xobohoxon sca Jesus xecoxon hosanhahnan rishquicanquin. ⁶⁴ Bebepoxon beshrishquixon yocacanquin:

—Jisxonma yohihue. ¿Tsoan mia beshrishquihiquin? —hahcanquin. ⁶⁵ Hicha jascapa join hosan hosancanquin.

Tsinquитай hapobo janin Jesus nihmahibo

(Mt 26.59-66; Mr 14.55-64; Jn 18.19-24)

⁶⁶ Xaba paque sca jaiya sca, jaton hani hapobo tsinquity becani. Sacerdote hapobo betan jaton huisha honanbo tsinquicani. ⁶⁷ Bexon, jato tocan sca Jesus nihmacanquin. Nihmaxon:

—¿Mia min noquen Cristo quin? Noque yohihue —hahcanquin.

—Hen mato yohihah bi tah man nincatimahi. ⁶⁸ Hen mato yocacah bi tah man yohitimaribihhi. ⁶⁹ Rahma tah hen hea noquebaque Papa mecayaho tsahonoxihqui, janoxon sca jahuen coshiyaxon yononoxon.

⁷⁰ Jato jascaha, joi bichincanquin:

—¿Mia min Papa Diosen baque quin nan?

—Jaa tah hen qui. Man yohihi quescabi rahan —hahquin.

⁷¹ —¿Jahua hashoan nincati non pishinain? Jan jascari yohuanai tah non noquenbi nincacai —hahsacancanquin.

23

Pilato janin Jesus hiohibo

(Mt 27.1-2, 11-14; Mr 15.1-5; Jn 18.28-38)

¹ Canon benahue hahxon sca Pilato janin sca Jesus hiocanquin jatihixonbi. ² Janoxon sca quesa cahecanquin.

—Nea tah non noquen caibo hihbojacatsihquiton merahahquin. Quiquin hapo Cesaro copijayamahabo ta jato haxemahiqui. Quiquin hapo Cristo jan hihqui ta yohirihbihiqui —hahcanquin.

³ —¿Mia min judiobaan quiquin hapo quin? —hahscaquin Pilatonen.

—Min yohihi quesa rahan —hahquin Jesusen.

⁴ —Hean jisi ta jahua copi nea joni demandanti yamahihiqui —judio hapoboya jano tsamajaquetaibo Pilatonen jaquin. ⁵ Coshi coshixon sca:

—Neatohon ta jonibo sinamaxon coromahiqui. Judea mai janin jatihibincon nihxon ta jato jascati haxemahiqui. Reboqui Galilea janin pehocohnish ta neno caman sca jahuiqui, jascati honanmabenahi —hahcanquin.

Herodes janin sca Jesus hiohibo

⁶—¿Galilea mai meha joni hin? —Pilatonen jato yocaquin. ⁷Herodesnin mai meha joni Jesus hihqui honanxon, Herodes janin sca jaya bohabo jato raansaquin. Herodes rihbi Jerusalem janin jaatian jai quen hahqui sca jato raanquin. ⁸Jaatian Jesus jisish, Herodes coin scai. Jaya joihibo nincanish basi sca jaa jiscatsihquish jenimascái. Jahuen coshiyaxon hahcai jiscatsihquish jenimahi. ⁹Jahuen coshi jiscatsihxon sca yoca yocaquin. Yocacah bi jahua hihiyamahi. ¹⁰Jan jahua hihiyamahi bi ta jano rihbi nihxon judio hapobo betan jaton haxemanicahbaan quesajaquin coshin bi res cahe cahecannishqui. ¹¹Jahuen sontarobo betan Herodesnin Jesus tiromajaquin yohixon hosan hosansaquin. Quiquin hapon tari sahuemaxon sca Pilato janin raanrihbiquin. ¹²Pilato betan Herodes rainyamapahonish bi jaatianbi raescái rabebi.

Jesus rehteti yoihibo

(Mt 27.15-26; Mr 15.6-15; Jn 18.39-19.16)

¹³ Pilatonen sca judio hapoboya jaton meyayahpabo quenamaxon, jaton jonibo rihbi quenamaxon jato yohiquin:

¹⁴—Noquen jonibo noque bichincatsihqui joni tah qui hahxon tah man nea joni hihuehahqui. Maton nincanonbi tah hen sirijaquin jaa yocacahqui. Honanquin sirijaxon tah hen jahua copi caheti merayamahi. ¹⁵Herodesnin ta merayamarihibihaxqui. Hen hahqui raanah bi ta noque qui raanrihibihaxqui. Jahua copi rehteti ta yamahihqui, jan tiromani yamahi. ¹⁶Jaa copi tah hen rishqui rishquimaxon picoxihqui —jato jaquin Pilatonen.

¹⁷ Jaton fiesta tian cah qui huesti joni jato picoxonpahonnish, hahpahonibo quesajaquin. ¹⁸Pilatonen jato yohihah bi coshin bi res sai saihihcani jatihibi.

—Jaama rahan. Barrabas caya noque picoxonhue —hahcanquin. ¹⁹Barrabasen ta jaton jema janinhahbo sinamaxon rehtenanmanishqui. Jaa copi ta sipo xoboho jaa tsahoncannishqui, jan joni rehteni copi rihbi. ²⁰Sai saihihquiboya coshin sca Pilatonen jato yohirihbiquin:

—Jesus tah hen mato picoxonti. ²¹Pilato coshin yohuanai bi sai saihihquin mahuincanquin.

—Jihui qui hueonhue. Jihui qui hueonhue, mahuanon —hihcani. ²²Jato yohirihbiquin, quimisha coti sca:

—¿Jahua tiroma hen janishquin nan? Hean jisi ta jahua copi rehteti yamahihqui. Jaa copi tah hen rishquimaxon jenebahinti —hahquin Pilatonen. ²³Hashoan sca coshichahinxon coshin bi res yohicanquin.

—Jihui qui hueonxon rehtehue —coshin yohiquin Pilato mahuincanquin, sai saihihxon. ²⁴Jaabaan yohihi quescajati ta jaigui hihxon sca ²⁵hoa joni rehtenica sca jato picoxonquin, jaabo queenai quescajaquin. Rehtenanmanica joni picoxonxon bi Jesus jato hinanquin, jaabo queenai quescajahabo.

Jihuin hueonaibo

(Mt 27.32-44; Mr 15.21-32; Jn 19.17-27)

²⁶ Jesus boxon sca jemama quirihax jahui joni behchixon bihxon jaa jahuen coros hiamacanquin. Simon janeya joni ta jaa janishqui, Cirene mai meha. Jesus chibanbonanon hiamacanquin.

²⁷ Hicha jonibo rihbi hahchon bocani. Haibobo rihbi hahchon bocani, huini huinicanahi. Jaya huaohihcanacani. ²⁸Jato qui rabejaquexon sca Jesusen jato yohiquin:

—Heya huaohihyamanahue, Jerusalem haibobon. Maton yoraya huaohihnahue, maton baqueya rihbi huaohihnahue. ²⁹Tiromabo netebo ta mato qui nocoti jahuiqui. Jaatian tah man masa shinanyaxihqui: Hea rihbi baquejoma japahinon, baquexo jahuentianbi bihiyamaha cahen hashoan siripan. Jahuentianbi baquexo xoma hahmayamani cahen siripan hih tah man jayaxihqui. ³⁰Noque qui paquenahue mananbon. Noque mahpobahinnahue, mahchibon, hah tah man jatihí. ³¹Xoo pari jihui jai bi nescajahibo jaiya ¿jihui xanascaiya jenquetsahpabo jatihiquin? —jato jaquin.

³²Huetsa joni rabe rihbi ta bocannishqui, tiroma rabe. Jesus hueonxon jaabo rabe rihbi jihuin hueonnoxon bocanquin. ³³Mapo xao janeya mahchi manixon sca janoxonbi jihuin hueoncanquin. Jesus naponbi janon, jaa patax tiroma joni huesti hueonxon nichinxon, ramiho sca huetsa joni tiroma.

³⁴—Jaton hohcha jato sohuaxonhue, Papan. Hea honanyamaxon ta hea nescajacanihqui —hihqui Jesus.

Jihuin Jesus hueonxon sca tsoan jahuen chopá bihtihiquin hihxon macan bero pishca borasa qui nanexon chicohah huetsa macan pari cainaiya huetsan jahuen chopá bihnon, huetsa macan pari cainaiya huetsan sca jahuen chopá bihnon hihxon, jascajaquin jahuen chopá bihcanquin. ³⁵Jano tsinquijaquecahuani nihxon, jonibaan jis jisquin. Hosan hosancanquin, jaton hapobaan.

—Caibo ta rohajapahonishqui. Papan Cristohax hahri sca rohajahanon, Papan caisah jonihax hahri rohajahanon —hihcani jaton hapobo. ³⁶ Sontarobaan rihbi sca jano nihxon hosan hosanquin. Mae cachani bexon, hinanquin.

³⁷ —Judioabaan quiquin hapohax mihri rohajahahue —hahcanquin.

³⁸ Jahuen mapo bochi qui quirica rihbi hueoncanquin. Nea ta judioabaan quiquin hapo qui hihqui jaa quirica.

³⁹ Jaa patax hueonahbo huesti sca yohuani, yometsoh huesti:

—¿Mia min Cristo quin? Mihri rohajahatax botoxon noque rihbi hahxonhue —hihqui hosani. ⁴⁰ Ramiho quehaton sca joi bichinxon jahuen hahbe tiroma joni qui rainyamascai:

—¿Mia min Dios qui raqueyamahin? Mia rihbi tah min mahuanoxihqui. ⁴¹ Noque rabe non tiromajani copi tah non rahma mahuatai. Non caibo hahni quescaja ta noque jacanihqui. Noque quescajamahi ta nea jahua tiromayamanishqui —hahxon, Jesus sca yohiquin:

⁴² —Quiquin haposcaxon, hehon shinanyaxahnhue, Jesusen —hahquin.

⁴³ —Nea netenbi tah min hehbetanbi heen jihue janin jacoinnoxihqui —hahscaquin Jesusen.

Jesus mahuascai

(Mt 27.45-56; Mr 15.33-41; Jn 19.28-30)

⁴⁴ Barin manan tsacahiya sca, jatihibi janin bahquishihcahina, bari mahpohah yamecahina, bari racapaquescanon caman bahquishihcahina. ⁴⁵ Papa yocati xoboho rihbi chopachique naponbi huaxacahina, quexe rabe sca janon. ⁴⁶ Coshin bi res sca Jesus yohuani:

—Hea bihue, Papan. Mihqui tah hen hinamehtai —hihquish mahuascai.

⁴⁷ Jatihibi jisish jano nichisontaro capitan sca yohuani:

—Papa Diosen ta jisiqui. Nea joni ta siri joni hihquishqui —hihqui. ⁴⁸ Jisi jahuibo rihbi hen mia yohihibi jisish rahte rahteti. Masa shinanax xohpatsihtax sca boribicani. ⁴⁹ Hahbetan nihpahonibaan rihbi hocho nihxon jatihibi jisquin. Galilea mai janinhax jaa manahi jahuipi haibobaan rihbi jatihibi jisquin, hochoxon.

Jesus mihinaibo

(Mt 27.57-61; Mr 15.42-47; Jn 19.38-42)

⁵⁰⁻⁵¹ Jaatian ta Jerusalem janin José janeya joni japahonishqui, Arimatea jema janinha joni. Arimatea ta judioabaan jema rihbi qui. Jaa José ta jaton cacannica rihbi janishqui, hihcax bi siri joni, pontejaquin shinanai joni. Noque jihuemanica Papan raanpahinon hihnicah. Jaan jisi cahen jahuen hahbe hapobaan tiromajaquin shinanrahsihi. Jesus rehtecatsihquibo quescajamahi ta jaa janishqui, jaabaan hahcachihi quescajayamaquin. ⁵² Jaa José sca Pilato janin caxon Jesusen yora yocaquin. ⁵³ Jesusen yora bihpaxon sca, sabananen rahcoquin sirijaxon, mai xanqueman poquin quiniho sca mihinquin, jano tsoabi tsahonnihma. ⁵⁴ Tantiti neten piyanoxon ta jaton pitijati neten jaa tsahonnishqui, tantiti nete nea pishca sca jaiya. ⁵⁵ Galilea mai mehax Jesus betan jahuipi haibobo ta José chibanbonahi canishqui, jan tsahoni cahiya. Tsahon honanxon, jan jascajaquin racanai jisish, boressacani. ⁵⁶ Hahan yora hininjati mescohi bocani. Mirra janeya hahan hininjati rihbi bichi bocani. Tantiti neten sca tanticani, Moisesnin yohini quesca.

24

Hihquish bi Jesus teehihribiscai

(Mt 28.1-10; Mr 16.1-8; Jn 20.1-10)

¹ Tantiti nete huinoscaipish xaba honanax sca tsahon janin boribicani. Jaton hininjatibo rahojahipixon papibahini bocani. ² Nocoxon, hahan xehpohipibo macan taranbohana sca meracanquin. ³ Tsahon janin hihcoxon bi noquen Hihbo Jesusen yora merayamacanquin. ⁴ Jahuen hea bohancanaxquin hihquiboya sca rabe joni jano sanareneni. Jaton chopahen bahri bahrichi. ⁵ Hihti raquetax, jato qui betihihpaquecani haibobo. Betihihpaque-taiton:

—Mohitahpa joni tah man benahi. ¿Jahuajanoxon man neno tsahonnihbo janin man benahi jahui nan? ⁶ Nenoma ta qui. Ma ta hueniscaaxqui. Galilea mainxon jan mato yohiho shinannahue. ⁷ Hohchayahpabo qui tah hen hea noquebaque hinamehti jai, jihuun hueonxon rehtescaabo. Jaa pecaho tah hen jahuen quimisha neten sca hahquirihbi teehihtih hah ta mato jahoxqui —hahcanquin, sanareneni jahuibaan.

⁸ Yohihah, Hihcoini, jasca ta jahoxqui hihcani. ⁹ Jacahini sca tsahon janinhax boribicani. Jahuen once haxenicabo yohitannon benahue, jato jatihibi yohinon benahue. Texe rihbi jano jaibo yohinon benahue hihcahina bocani. ¹⁰ Jaa ta Maria Magdalena qui, Juana, Jacobon mama María rihbi. Caibo haibobo rihbi jato betan bocani. Nocoxon jahuen haxenicabo yohicanquin. ¹¹ Yohihah bi yohuanresaibo shinanxon jato nincayamacanquin.

¹² Pedro sca picotax bishquihicanahax tsahon janin nocotax cahcopaquexon jisi bi jano jahuen sabana jano huesti tsamati. Jahua jenquetsaxquin hihquish, rahtetax, xobon sca caribihi.

Emaus jema janin cahibo
(Mr 16.12-13)

¹³ Jaa neten bi sca jato quiha rabe joni cahi, huetsa jema janin cahi bocani. Emaus janeya jema janin cahi bocani, Jerusalem janinhax taken cahá cahen rabe hora. ¹⁴ Yohuan yohuan-canahi bocani. Jisipiboya rahma nincabehnanaibo rahsi shinanax yohuan yohuan-canahi cahi. ¹⁵ Yohinancanahi bohiboya sca, jato chibanbonahi caxon jato huinonquin bi jato manahi sca Jesus nichí. ¹⁶ Jaa hihqui bi bebepohah quescaxon jaa honanyamacanquin.

¹⁷ —¿Jahua yohuan man jain, man yohinani nihcanahin? —jato jaah, nihrenecani jaton bemanan huetsapahcahini. ¹⁸ Cleopas janeya sca yohuani:

—¿Jerusalem janin jihuetahton bi min mia huestichin jano jaipibo joi min honanyamahin? —hahquin.

¹⁹ —¿Jahua jaipishqui nan? —hahquin.

—Jesus nazareno jaipibo rahan. Jaa ta Papan joi yohinica hihpahonishqui. Jatihibichin jison bi ta Papan coshiyaxon hahpahonishqui. Papan shinanyaxon ta noque haxemahonishqui. ²⁰ Noquen hapobo betan noquen cacannicabaan rehtenon ta hinanipicanaxqui, jihuín hueonxon rehtehahbo. ²¹ Noque israelibo jihuemanicah tah qui hih non jarasihi que bi ta rehtehipicanaxqui. Neyanish ta quimisha netescaiqui, rehtepibo. ²² Rahma rihbi ta noquen chocabaan noque rahtehaxqui. Hihari tsahon janin caxon roqui jahuen yora xahbanjancanax. ²³ Merayamahax qui joquin sca Papan yonotibo jato qui cainai qui jiscanquin. Jihue ta jaiqui qui jaa yonotibo jai, yohuani. ²⁴ Jaatian ta noque janinhax caibo rihbi sca jahuen tsahon jatin bocanaxqui. Haibobo yohuanah quescabi roqui meracanax, jahuen yora yamascai —hihcani.

²⁵ —Honanyamahibon. ¿Yotihó chahoma maton jointi quin? Papan joi yohinicanabaan yohini joibo jatihibi man nincapanan. ²⁶ ¿Jascapa tiromabo huinoti Criston jai yohiyamacannishquin? ¿Jaa pecaho sca naihoh queha quiquin hihbo jaa jatihi yohiyamacannishquin? —jato jaquin.

²⁷ Jato jascjaxon, Moisesnin huishani joibo jato honanmaquin sirijaxon, texe Papan joi yohinicanabaan huishani joibo sca jato honanmapaquequin, Cristo yohihi joi rahsi.

²⁸ Jano jaabo cahi jema qui sca nococani. Hojno caparihi quesca jaa jai bi hihti yocacanquin:

²⁹ —Noque qui banetahue. Bepi sca ta jaiqui. Bari ta hihquicatsihscaiqui.

Jeenhihquish mapeti. ³⁰ Jaabaan Pihue hahcá piti bixhon Papa yocaxon tehcxon jato hinanquin. ³¹ Jaatian pari jaton bero quehpemehxon quescaxon jisxon jaa hihqui honansacacandin. Jaatian jaabaan jisi bi jaa yamacahin sca jai.

³² —Bahinxon noque yohixon huishani joibo noque honanmaxon ¿noquen jointibo xecahihnimayamahaxquin? —hihcani. ³³ Jaatianbi cahax, Jerusalem janin boribicani. Nocoxon jahuen once haxenicabo tsinquitaiton meracanquin. Texe rihbi jato betan tsinquiti.

³⁴ —Noquen Hihbo ta teehihrihbihiqui. Hueni coin ta jaaxqui. Pedronen ta jisishqui —hihqui tsinquitaibo.

³⁵ Jaatian jaabo rabechin bahinxon jisxon nincatanah yohixon, jan paan tehcxonaiya jaa hihqui honanaibo yohicanquin.

Jahuen haxenicabo qui Jesus sanareneni
(Mt 28.16-20; Mr 16.14-18; Jn 20.19-23)

³⁶ Jato yohiparihiya bi jato tocan jaa sanareneni jahui. ³⁷ Rahte rahtetax, yoshin tah qui hihquish, raquepahhuancani. ³⁸ ¿Jahua jenquetsain man rahtetain? ¿Jahuejahi man maton jointi janin raqueya yohuanain? ³⁹ Heen mequen jisnahue. Heen tahe jisnahue. Hea tah hen qui. Mehaxon jisnahue. Yoshinma tah hen qui: yoshin ta nami yamahihqui, xaobo yamarihbihi. Hea ta jascapahma qui.

⁴⁰ Jato jascjaxon, jahuen mequen jato jismaquin. Jahuen tahe jato jismaquin. ⁴¹ Hihti jenimaya rahte rahtexon jaa hihqui shinanyamaparihiboya sca jato yocacquin:

—¿Man piti yamahin? —jato jaquin. ⁴² Yapa xohi teque pishca hinancanquin. ⁴³ Bixhon jaton jison bi sca piquin.

⁴⁴ Pixon jato yohiquin:

—Mato betan jihueparixon tah hen mato yohiniqui, hea yohihi Moisesnin huishani jatihibi jai quesca ta jatihiqui. Huetsa Papan joi yohinicanabaan huishani joibo, Davidinin behua janin rihbi jaibo quesca sca ta jatihibi jatihiqui.

⁴⁵ Jascajaquin yohixon jaton jointi quehpenxonquin Papan huishani joibo honan-coinahbo jato yohiquin.

⁴⁶ —Tiromahabo bi Cristo mahuatihi, jan hihquipish bi quimisha neten hihquish hahquirihbi teehihti ta huishacannishqui. ⁴⁷ Maton shinan pontenahue jan maton hohcha sohuaxonnon hahquin Jerusalem janin yohimenohax janohax jatihibi jonibo janin sca jahuen janen jascajaquin yohiyaxihcani, jaa jatihibi ta huishaxon yohicannishqui. ⁴⁸ Yohinihbo jai quesca sca jai jisxon tah man honanquin sirijahi. ⁴⁹ Papan mato hinantijani tah hen mato qui raanyaxihqui. Nea jema janin banetahnahue, heen naihoh queha coshi mato qui noconon caman —jato jaquin.

Jesus naihoh hinahihnati

(Mr 16.19-20)

⁵⁰ Jato jascjaxon Betania jema janin caman jato hioquin. Janoxon sca jahuen mequen sanahihnixon siri shinanya janoxihquibo sca jato yohiquin. ⁵¹ Jato yohihahnan sca caresscai, naihoh hinahihnati. ⁵² Jaabo sca hihti jenimahanan Jerusalem janin boribicani. ⁵³ Papa yocati xoboho res mapexon Papa yocacanquin, Hahxon tah min noque jai, Papan, hahquin.

JUAN Juaman huishani joi siri

Papan joi hihbo jonihi

¹ Jahuabi jariyamanon ta Papan joi hihbo janishqui. Papa Dios betan jihueti. Papan joi hihbo ta Papan shinayahpa qui. Dios bi res ta jaa joi qui. ² Naiyahpa mai jariyamanon ta Papa Dios betan jaa joi hihbo janishqui. Jahuen jane cahen Jesus. ³ Jaan ta jatihibi janishqui. Jaan hahyamani quen ta jahuabi yamaquehanishqui. ⁴ Jaan ta jatihibi yoshinyahpajojaquin jihuemanishqui. Jaa noquen jihuemanich ta noquen xaba qui. ⁵ Bahquish chian xabatai bi cahen yamepan bahquishjayamaquin.

⁶ Noquen xaba hihbo ta jahuiqui hihqui jonon ta Juan janeya joni Papan raannishqui. ⁷ Jaa ta xaba hihbo qui hihxon yohicoini jonon. Joxon, jatihixonbi nincacoinahbo hihxon jato yohicoinquin. ⁸ Jaa Juan cahen xaba hihquishma bi xaba hihbo qui yohicoini jahui. ⁹ Jaa xaba hihbo ta jatihibi joni xabajanich qui. Xaba hihbo hihquish bi cahen noque janin jaa jahui.

¹⁰ Jan hahni nete janin jaabi jahue que bi cahen jano jihuetibaan huetsapahascaquin, jaabi que bi. ¹¹ Jatón caibo que bi Johue hahyamancanquin, jaanbi hahni nete janin nocotai bi. ¹² Caibaan res Johue hahquin. Jaa Johue hahcaibo cahen: Diosen baquebo sca janahue, mato rahsibi, hea nincacoinaibo rahsi, xabapan jato jaquin. ¹³ Jaa Johue hahcaibo Papa Diosen baquebo hihnon, jimiyahpa papa janonma bi queeyahpa papajomabo hihnon, bebaan baquejaha hihnonma bi: Papan baquebo janahue xabapan jato jaquin.

¹⁴ Yorayahpahax ta noque betan jaa Papan joi hihbo jihuenishqui. Jan hihti coshin hahcai tah non jisniqui. Jaa huesti jahuen papa xohtahi, nete hihbohi. Yohuani hihcainai. Shinayahpa siri. ¹⁵ Hahqui chanicoini cahen Juan coshin yohuani, nescari:

—Hoa ta hen mato yohipi noque qui, hea pari jomenoni que bi ta hehchon jahui noquen hea mahuinihqui, jaa pari jihue hihbonixon —hihqui. ¹⁶ Jahuen shinan hihti caibo hi tah non jatihixonbi bihniqui, jaan hinarresah. ¹⁷ Xabapan shinan non bihnon hihxon ta Papan Moises yononishqui, noquen nincati joi Moisesnin huishanon. Jaa pecaho ta Jesucriston sca jahuen shinan noque hinarresiqui, hihcainai joi non honannon, noquehon Papan shinanai non honannon. ¹⁸ Tsoanbi ta noquen Papa Dios jisnyamanishqui, jahuentianbi. Non jisnyamani bi ta hahan jan shinanai jahuen baquen noque yohiha, jenquetsahpa noquen Papa Dios quin non honanscai.

Jesucristo ta Papan baque qui (Mt 3.11-12; Mr 1.7-8; Lc 3.15-17)

¹⁹ Yocacahbo hihxon ta Jerusalem janinha judiobaan jaton sacerdoteya levitobo Juan qui raannishqui.

—¿Mia min tsoa quin? —Juan yocacahbo. Yocacahbo ta jato yohicoinnishqui.

²⁰ Paraxonma jato yohicoinquin:

—Hea ta hen Cristoma qui —hahquin. ²¹ Jasca jan jaiya, yocaribicanquin:

—¿Tsoa min quin? ¿Mia min Elías yamanica quin? —hahcanquin. Jascacahbo bi:

—Hea ta jaama qui —hahquin.

—¿Hoa Dios joi yohinica nan? —hahscacanquin.

—Hea ta jaama rihbi qui —hahquin. ²² Jaatian yocaribicanquin:

—¿Tsoa min quin? Noque Yocatannahue hahcaibo non yohihi sca canon, Jaa ta hen qui noque jahue, mianbi —hahcanquin.

²³ —Cahchihoxon quenahi ta hea qui, Hihbo hahan jonon bahi najisti chai jaxonnahue hahnicah. Papan joi yohinica hihxon Isaiasnen noque yohini quescabijaquin tah hean jai —jato jaquin. ²⁴ Yohihahbaan bi fariseobaan sca hahquirihbi raanah, yocaribicanquin:

²⁵ —¿Jahua copi min Cristo hihxonma bi min jato nashimahin, Elías rihbi hihxonma bi, hoa Dios joi yohinica rihbi hihxonma bi min nashimahi nan? —hahcanquin Juan yocacquin.

²⁶ —Hean ta hen jenen res nashimahi. Mato tocan ta man hononyamahi joni nichiqui. ²⁷ Hehchon jahui que bi tah hen jahuen sapato risbi pecaxonti senenyamahi, jaa hihti siri copi —Juaman jato jaquin. ²⁸ Jordan huean hoque quexaxon, janxon Juaman jato nashimahi janinxon bi ta jascajaquin yocacannishqui, Betania jema janinxon.

Jesus ta Papan carnero qui

²⁹ Huetsa bahquish sca jari Jesus jahui qui jisxon, Juaman jato yohiquin:

—Jisnahue. Hoa ta Papan carnero joni qui, main jihuetibaan hohcha copi mahuayax-ihqui joni. ³⁰ Hen mato yohihipi tah qui, Hehchon jahui jonin ta hea mahuinihqui, jaa

pari jihue hihbonixon hahquin. ³¹ Hean rihbi jaa honannixonma bi tah hen israelibaan jaa jixxon honannon hihxon hean jenen nashimahi joníqui —Juaman jato jaquin. ³² Jato jascajaxon yohirihbicoinquin:

—Naihoh quehax Dios Yoshin botopaquetax, nobex quescapa hahqui bototi manahi jahui tah hen hean jisoqui. ³³ Jaa tsoa quin tah hen hean rihbi honanyamanihqui. Hen honanyamahi bi ta Papan hea yononishqui, jenen nashimahi hea jonon. Botopaquetax heen yoshin siri jaa manahi jahui min jisyaxihqui ta heen yoshin siri bichibo nashimaquin hahcajanicah qui, heen yoshin siri jato hinanquin, hih ta Papa jahoxqui. ³⁴ Jan jascajahi jisoxon ta hen mato yohicoinei: Papa Diosen baque tah qui —Juaman jato jaquin.

Jesusen caismenonibo

³⁵ Huetsa bahquish sca, jahuen haxenica rabe betan nihríbixon, ³⁶ Jesus nichí jixxon: —Jisnahue. Jaa ta Papa Diosen carnero qui —jato jaquin. ³⁷ Jan jascarai nincacax rabebi jahuen haxenica cahi, Jesus chibani sca. ³⁸ Rabejaquexon, chibanai jato meraxon Jesusen jato yocaquin:

—¿Jahuejahi man behin? —jato jaquin. Yocacah:

—¿Jahuen min jihuetai, Rabin? —hahcanquin. Rabin ta maestron hihcatsihquiui.

³⁹ —Jisi benahue —hahscaquin. Jaatian boresscaxon, jan jano jihuetai jisish, bepiscaya jaa netenbi jahuen xoboho banecani. ⁴⁰ Huesti ta Andres janishqui, Simon Pedro huetsa. Huetsa joni betan nihxon, Juan yohuanai nincaxon, Jesus res sca chibanquin. ⁴¹ Jahuen huetsa Simon benaxon meraxon:

—Mesías tah non merascaí —hahquin. Mesías cahen Papan raanah joni hihcatsihqui, Cristo, jaton join. ⁴² Jascajaxon, Jesus janin Simon hioquin. Nocotaiya bejixxon Jesusen yohiquin:

—Mia tah min Simon qui, Juaman baque. Cefas janeya sca tah min jayaxihqui —hahquin. Cefas ta macan hihcatsihquiui.

Felipeya Natanael Jesusen quenahi

⁴³ Huetsa bahquish sca Galilea main cacatsihquin Felipe meraxon:

—Hehbe cahue —hahquin Jesusen. ⁴⁴ Betsaida jema janin ta Felipe jihuepahonishqui, Andres betan Pedro jano jihuepahoni janin. ⁴⁵ Natanael meraxon, Felipenin yohiquin:

—Papan joi huishaquin Moisesnin yohini joni tah non meratanai. Papan joi yohinibacaan rihbi hahqui huishaxon yohini. Josepan baque Jesus tah qui, Nazaret janinhah —hahquin.

⁴⁶ —¿Nazaret janinha jahua siri jatihiquin? —hihqui Natanael.

—Jisihue —hahscaquin Felipenin. ⁴⁷ Natanael hahqui nocoti jahui jisish Jesus yohuani:

—Jisnahue. Jaa ta israeli baque coin qui, paranyosma joni —hihqui.

⁴⁸ —¿Jenquetsahaxon min hea honanain? —hahquin Natanaelnin.

—Higo jihui naman tsahotai ta hen mia jisiqui, Felipenin mia quenarihyamanon —hahquin Jesusen.

⁴⁹ —Mia tah min Papa Diosen baque qui, Maestron. Mia tah min israelibaan quiquin hapo qui —hihscái Natanael. ⁵⁰ Jesusen sca Natanael yohiquin:

—¿Higo jihui naman tsahotai ta hen mia jisiqui hen mia jaiya min nincacoinain? Heen coshiyaxon hahcai tah qui. Hashoan rihbi heen coshiyaxon hen hahcai tah min jisyaxihqui. ⁵¹ Yohicoin ta hen mato jai: nai huiso quehpemehtaiya hea janinhax hinahihnatax hea noquebaque qui nocoti botopaquetai tah man Papan yonotibo man jisyaxihqui —jato jaquin.

2

Caná jema janinxon huanomahibo

¹ Jan jascahiipi quimisha neten sca Galilea main huanomahibo jai, Caná jema janin. Quenamaha jano rihbi Jesusen mama cahi. ² Jahuen haxenicaboyabi canon Jesus rihbi quenamacanquin, huanohihbo jisi canon. ³ Jaton xehati queyoscaiya:

—Hompa ta yamascaiqui, baquen —hihqui jahuen mama.

⁴ —¿Min jascaraiya bi jahueja hen jatihin, maman? Heen coshiya teeti nete ta nocorihyamahiqui —hahquin Jesusen. ⁵ Xehamanicahbo sca:

—Jaan mato yohihi quescabijanahue —jahuen maman jaquin.

⁶ Janobi rihbi cahen seis macan poo tsahoti jene paxa hahqui bexojatibo. Hanibo poo can, huesti cuñete hiyahamahax rabe cuñete betan senenai tihopabo, hahan judiobo mechoquiti, tachoquiti, jaton hihti quescari.

⁷ —Poo qui jene bohasaxonnahue —jato jaquin Jesusen. Jaatian bohasabahincanquin.

⁸ —Huehaxon, fiesta hihbo nomimatannahue —Jesusen jaah sca, huehaxon nomi-macanquin. ⁹ Jaa jene hompacahinscai bi fiesta hihbaan tanaquin. Tanaxon bi jahuer-ahnohah hin honanyamaquin. Jene bihtanaibaan honanai bi fiesta hihbaan honanya-maquin. Tanaxon jahuen huanoni quenaxon sca fiesta hihbaan yohiquin:

¹⁰ —Pahenscaiton jato tiroma xehati xehamanoxon tah non siri pari jato hahmanica qui. Mian tah min rahma pari hompa siri cainmahi —hahquin. ¹¹ Galilea mai janinhah Caná jema janinxon ta Jesusen jascajamenquin hahan honantijanishqui. Jahuen coshi jato jismahah cahen jahuen haxenicabaan nincacoinscaquin, Papan caisai joni hihqui honancoincaquin.

¹² Jaa pecaho jahuen mama, jahuen jochicabo rihbi, jahuen haxenicabo rihbi Capernaum janin hahbetan cahax nocotax jahuentihi ra netebo jano baneti, basima tahni.

Papan xobo tiromajahibo Jesusen jabamahi
(Mt 21.12-13; Mr 11.15-18; Lc 19.45-46)

¹³ Judiobaan pascua fiesta nea pishcascaiya Jerusalem janin Jesus cahi. ¹⁴ Nocoxon Papan xobohoxon jaton ganadoya carnero maromahiton jascapa maromanicahbo meraquin. Nobex maromanica joniboya coriqui mahnenannica jonibo rihbi jano tsahotai merari-hbiquin. ¹⁵ Jascajahiton meraxon risbipan hahan rishquitijaxon jeman jato potaquin. Jatihibi potaquin, jaton ganadaboya jaton carneroboya bi. Jaton coriqui napabohanson coriqui misa rihbi behonjanquin. ¹⁶ Nobex maromanicahbo sca yohiquin:

—Nescapahbo botannahue. Heen papan xobohoxon jascajayamanahue. Janoxon marotima tah qui —jato jaquin. ¹⁷ Jato potahi jisxon, Hea tah hen miin xobo hihti jenipahichai jaa jiscatsihqui, hihqui neateman huishani joi jahuen haxenicabaan shinan-scaquin. ¹⁸ Jahuen haxenicabaan sirijaquin shinanai bi judiobaan sca joi bichinquin:

—¿Jahua hahan honanti min noque jismahin, nescajanoxon? —hahcanquin.

¹⁹ —Nea xobo potojaquetannahue, quimisha nete huinoxon hen jaa xahnenenbi hahrih-inon —Jesusen jato jaquin.

²⁰ —¿Cuarenta y seis bari teexon janquenjanibo xobo min quimisha neten xobojaquin queyotihin? —hahcanquin. ²¹ Jahuen yora yohihi jan hihqui bi janoxon Papa Dios yocati xobo yohihi shinancanquin. ²² Hihquipish bi teehihrihbihiya pari ta jan jascajaquin jato yohiho jahuen haxenicabaan shinanscanishqui. Shinanax, Hihcoini Papan huishamani joi ta jaa yohihi jaiqui, noquen Hihbo Jesusen rihbi ta noque jascajaquin yohinishqui, hihceni.

Jatihibi jonibo Jesusen honanai

²³ Pascua fiesta tian Jerusalem janinxon hahan honantibo Jesusen hahcai jisxon:

—Papan caisai noque tah qui —hahcanquin hicha jonibaan. ²⁴ Jascaraibaan bi jato jatihibi honanax jato tocan Jesus nihresyamahi. ²⁵ Jatihibi jonibaan shinanai jaanbi jahuen jointinin honanscai copi, Jasca ta shinancaniqui hihnica pishinyamahi.

3

Jesus qui Nicodemo nocoti

¹ Huesti fariseo joni ta judiobaan cacannica hihpahonishqui, Nicodemo janeya joni. ² Jesus qui yame caxon yohiquin:

—Noque honanmahi mia jonon ta mia Papan raannishqui, Maestron. Non tah non honanai. Mian tah min hahan honantibojahi. Mihbetan Papa Dios hihiyamahiya cahen min jascajati hahtipahyamahan —hahquin. ³ Jaatian:

—Mia tah hen yohicoinei. Behnajaquin jonijahama jonin ta Papan jihue jistimabiresiqui —Jesusen jaa jaquin.

⁴ —¿Yosibohax non jenuetsahax hahquirihbi jonitihin? Noquen maman xahquin janin non hahquirihbi hihquitihin, jonirihbinoxon? —Nicodemonen Jesus jaquin.

⁵ —Mia tah hen yohicoinei: Dios Yoshiman jonijahama joni ta Papan jihue janin hihcotimabiresihqui. Jenen rihbi jonijahama joni ta jano hihcotimabiresihqui. ⁶ Namin jonijaha ta yorayahpa qui. Dios Yoshiman jonijaha ta yoshin rihbi qui. ⁷ Hahquirihbi joniti tah min jai hen mia jaah bi rahteyamahue. ⁸ Jano jan queenaiton ta nihue cahiqui. Jahuerahnohax cainax jahuen cahiquin tah min honanyamahi, xoo hihqui nincaxon bi. Dios Yoshiman jonijaha jatihibi ta jascarihbi qui —Jesusen jaquin.

⁹ —¿Jaa min yohihi jenuetsahatihiquin nan? —hihqui Nicodemo. ¹⁰ Jesusen sca yohiquin:

—¿Israelibaan honanmanicahxon bi min hean mia yohihah min honanyamahin? ¹¹ Yohicoini tah hen mia jai: Honanxon non mato yohihah bi tah man nincayamahi. Jisxon non yohihah bi tah man nincayamahi non hihcoinei bi. ¹² Nea mai meha joi yohihah

bi nincacoinyamaxon tah man jenquetsahaxon bi naihoh queha hen mato yohihi joi nincacointimahi.

¹³ Tsoabi naihoh catanni que ma bi tah hen janohax botopaquetai hea huesti jano canicah qui, hea noquebaque. ¹⁴ Nincacoinaibo queyoyamanox mananon ta cahchihoxon Moisesnin rono nichinhinnoxon jihuun hueonni quescajaquin hea noquebaque nichinhinnoxon hueonyaxihcanihqui. ¹⁵ Hea noquebaque qui hinamehxon nincacoinaibo jatihibi ta queyoyamanox manatihiqui.

Main jihuetaibohon Papa Dios hihti queenai

¹⁶ Nai nequebihabo hihti queenxon ta jahuen baque hea huesti Papan raannishqui, hinamehxon nincacoinaibo jatihibi queyoyamanox mananon, tsoabi mehtexehtaxma jihuenon. ¹⁷ Main jihuetaibo casticani jonon hihxonma bi hen jato jihuemahi jonon hihxon ta Papan hea raannishqui.

¹⁸ Nincacoinai jonibo ta jahua copi casticantimabo qui. Nincayosma jonibo ta casticanscathiqui, Papan baquen yohihah bi jahua nincayamahibo. ¹⁹ Mai janin xaba jahue que bi ta xaba jenipahiyamacaniqui. Yame caya ta jenipahicaniqui tiromabohax. Jaa copi ta jato casticanyaxihqui. ²⁰ Nenoxon tiromajahibo rahsi ta johue jiscatsihyamahax xaba quiri cayosmabo qui, tiromajahibo caibaan jismis hihquish xaba quiri cayamahi. ²¹ Hihcointaibo ta xaba quiri canicah qui. Papan jisi hah ta jaan jaiqui caibo hihnon hihquish —Jesusen Nicodemo jaquin.

Juan Jesus qui yohuani

²² Jaa pecaho ta jahuen haxenicabo betan Jesus canishqui Judea mai janin. Jano jato betan banexon nincacoinaibo hihquimatantuin nashimaquin. ²³ Enon jema janinxon Juaman rihbi nashimaquin Salim hochoma jano noayahpa huean jaiton. Juaman jato nashimanon caibo jano cahi. ²⁴ Sipo xoboho Juan tsahonrihyamahiboya jano jonibo bocani.

²⁵ Jascasahiya Juaman haxenicabo betan judiobo yohinani:

—¿Jenquetsahaxon non noquen hohcha potatihin? —hihqui yohinani rainyamahi. ²⁶ Juan qui caxon sca yohicanquin:

—Jordan hoque quexa mia manatipi jonin rihbi ta nashimahiqui, maestron. Min noque yohicoinipi joni tah qui. Jise. Hahqui sca ta jatihibi bocaniqui —hahcanquin. ²⁷ Jascahahbo jato yohiquin:

—Papan noque hinanyamahah tah non tsoanbi jenquetsahpabi bihti hahtipahtimahi. ²⁸ Hea ta hen Cristoma qui. Hean pari yohixonon jonon hihxon res ta Papan hea yononishqui. Hen jascahipi tah man matonbi honancoinai. ²⁹ Nesca tah qui, jisnahue. Jahuen haibo hihnon cahen bebo huanocatsihqui. Jan yohuanai ta jano rihbi nihxon jahuen hahberabetinin nincatihiqui. Jan yohuanai nincacax coincoini. Jascarihibi ta hen hea coin coin jai. ³⁰ Caiti ta jaa jaiqui. Jahua hihtima ta hea jai —jato jaquin.

Bochiquihax jahui joni

³¹ Bochiquihax jahui jonin ta jatihibi joni hihbojahiqui. Mainxon jonijahabo ta mainxon jisish jan jisiboya yohuanihqui. Naihoh quehax jahui joni ta jatihibi jonibaan hihbo qui.

³² Naihohxon jisnibo yohuancoin jan jai bi ta tsoanbi nincacoinyamahihqui. Jan nincanibho yohuancoin rihbi jan jai bi ta tsoanbi nincacoinyamarihbihihqui. ³³ Jan yohicoinah nincacoinaibo ta Papa Dios ta hihcoinnicah qui hihquiqui. ³⁴ Papan raannica joni hihxon ta Papan joibo yohihiqui. Hahqui ta jahuen yoshin siri Papa Dios yohuashiyamahiqui.

³⁵ Jaa jahuen baquehon queenxon ta Papan jatihibi jaa hinannishqui, jaan sca hihbojanon. ³⁶ Jaa Papan baque qui hinamehxon nincacoinai joni ta queyoyamanox manatihiqui. Jahuen baquen yohihah bi nincayamahi joni ta jihuetimahiqui. Jascapa ta Papan hihti jistahimahiqui, hahquin.

4

Samaritano haibo Jesusen yohuanquihnai

¹ Juaman honanmaxon nashimahi mentan hashoan hihti caibo Jesusen honanmaxon nashimahi cahen fariseobaan nincascaquin. ² Jaanbi Jesusen nashimayamahi bi ta jahuen haxenicabaan res nashimanishqui. ³ Jahuen nashimatibo caichai fariseobaan joi nincacai honanxon Judea mai Jesusen potabahinquin, Galilea main caribinoxon.

⁴ Galilea main canoxon cahen Samaria mai nabebacahinti jai. ⁵ Cahi, Samaria mai meha jema janin nocoti, Sicar janeya jeman. Jacobonen jahuen baque José hinanni mai hochomahi. ⁶ Jene bihnoxon ta janobi Jacobonen mai poquinnishqui. Poquinxon chiquerihbiquin. Jano sca ta Jesus noconishqui. Bahin nihnichipaxquinax, barin manan tsacahiya jaa mai poquin quexa Jesus tsahopaqueti. ⁷⁻⁸ Jahuen haxenicabo jema janin piti

benahi canon cahen jano manati. Manahahnan, samaritano haibo jene bichi jahuiton, yocaquin:

—Hen nominon jene pishca hea bihxonhue, haibon —hahquin Jesusen.

⁹ Jaatian:

—¿Jenquetsahaxon min mia judio hihxon bi hea samaritano haibo jene yocacain? —samaritano haibaan Jesus yocaquin. Judiobaan samaritanobo jistahimahi copi haibaan jascajaquin.

¹⁰ —Tsoan mia jene yocacai honanxon cah min mianbi jaa yocacan. Papan mia hinanai rihbi honanxon cah min yocacan. Jaatian ta mia jene mohini hinanquehanihqui —Jesusen jaquin.

¹¹ —Mai poquin ta nemin qui, bebon. Hahan tsecati rihbi tah min yamahi. ¿Jahuen min jascapa jene mohini bihtihin? ¹² Noquen xeni Jacobonen ta nea noa xehanishqui. Jahuen baqueboyaxonbi jahuen yohinabaan rihbi nea jene xehaquin. Nea noa noque jaa jan hinannih que bi cahran min jaa mentan hashoan coshi quin? —hahquin haibaan.

¹³ Jaatian Jesusen sca:

—Nea jene hahcaibo ta hahquirihbi nomicatsihnoxihquiqui. ¹⁴ Hean jene hinanah xehahax ta jahuentianbi jircatsihyamascatihiqui. Jaa chicho quehax ta hen hinanai jene mohini jahuentianbi taraxaxma jabascatihiqui —haibo jaquin.

¹⁵ —Jaa jene hea hinanhue, bebon, jircatsihyamascaax hen neno jene bichi jori joriyamascanon —haibaan Jesus jaquin. ¹⁶ Jesusen sca:

—Miin bene quenatanhue, joribinoxon —jaa haibo jaquin. ¹⁷ Jascahah:

—Heen bene ta yamahihqui —hahquin haibaan.

—Yohiquin sirija tah min jai, miin bene yamahi. ¹⁸ Pichca miin bene janish bi cah min rahma huetsa betan hihrihbihi, miin benema rihbi. Hihcoin tah min jai —hahquin Jesusen.

¹⁹ —Papan joi yohinica mia quin hen ta hen honanscai, bebon. ²⁰ Nea machinxon ta noquen xenibaan betihihpaquexon Papahon shinanpahonishqui, Jerusalem janinxon non Papahon shinanti jai man maton jai bi —hihqui haibo. ²¹ Jesusen sca:

—Hen mia yohihah nincacoinhue, haibon. Papahon shinanaibaan ta nea mahchinxonma bi Jerusalem janinxonma rihbi noquen Papahon man shinaryaxihqui. ²² Man honanyamahi naman tah man betihihpaquetai, Papahon shinancatsihqui. Non honanai naman betihihpaquexon tah non noquen shinanai. Jihuemanicah ta judio xohta qui. ²³ Hahan Papahon shinanti nete jahuex bi ta nocoscaiqui, Papa qui betihihpaquexon shinancoinaibaan jahuen yoshin siriyaxonbi Papahon shinanbiresnon, hahan shinancoinquin. Jascapa shinanaibohon ta noquen Papa queenihqui. ²⁴ Noquen Papa ta yoshin qui. Jahan shinanai noquebo ta jahuen yoshinyaxonbi shinancointi jaiqui —haibo Jesusen jaquin.

²⁵ —Papa Diosen caisai joni, Cristo hahcaibo, joyaxihqui ta hen honanai. Joxon ta jatihibi joi noque yohiyaxihquiqui —hihqui haibo.

²⁶ —Hea tah hen jaa qui, mia yohihi joni —hahquin Jesusen.

²⁷ Jasca jan jaiya bi jahuen haxenicabo nocoti. Haibo betan yohuanaiton merahax rahtecani. Rahtexon bi ¿Jahuejahi min hahbe yohuanahquin, jahua yohuan min jain, hahbetan? Jesus yocacatsihquin bi yocayamacanquin. ²⁸ Jaatian jahuen poo tsahonbahini jema janin haibo cahi cahi. Cahi nocoxon jonibo yohiquin:

²⁹ —Jatihibi hean janibo hea yohihi joni jistannahue. ¿Jaa Cristoma hin? —jato jaquin.

³⁰ Jaatian jema janinhax cainax Jesus jisi bocani. ³¹ Jasca sca jaiyoa:

—Pihue, maestron —jahuen haxenicabaan Jesus jaquin. ³² Pihue jaibaan bi:

—Man honanyamahi piti ta hea jai —Jesusen jaquin. ³³ Jasca jan jaiya jahuen haxenicabo jaabo rahsibi yohuani:

—¿Tsoan cahra piti bexonaxquin? —hihcani yohuani. ³⁴ Jascahibo bi:

—Hea yononi queenai quescajaxonti ta heen piti qui. Jahuen tee queyoxonti rihbi ta heen piti qui. ³⁵ ¿Chosco hoxne hihquish pari ta banabo tsinquiti siri sca jatihiqui hih man jayamahir? Man jascarai bi ta hen mato yohihi. Huai chian bana johuescai jisnahue. Tsinquiti siri sca ta jaiqui hah ta hen mato jai. ³⁶ Cananhahnan ta tsinquinicon jascabi jihuetai bimi tsinquihiqui. Bananica betan tsinquinica jenimascanon ta jaton tsinquitibo queyoyamanox manatihqui. ³⁷ Huetsan tsinquixonyaxahnon ta huetsan banahihqui hih ta jacyanhiqui. Hihcoini. ³⁸ Man bananixonma bi tsinquitannon tah hen mato yononihqui. Caibaan hahni tee tah man tsinquiti —jato Jesusen jaquin.

³⁹ Jaa jema janinha samaritanobaan ta hichaxon Jesus nincacoinnishqui. Jatihibi hean janibo ta hea yohihaxqui hahquin haibaan jato yohicoina copii nincacoincanquin. ⁴⁰ Jesus qui caxon yocaquin:

—Noque qui banehue. Cayama sca jahue —hahcanquin. Jascahahbo jato betan rabe neten baneti. ⁴¹ Jaanbi jato yohihiya nincacoincanquin hashoan tsamaxon sca. ⁴² Nincacoinxon haibo yohicanquin:

—Mian noque yohihah nincacoinpixon bi tah non jaa yohuanai noquenbi nincaxon non hashoan sca nincacoinscai. Jaa coin ta nai nequebihabo jihuemanicah qui, honancoin sca tah non jai —hahcanquin.

Hapon baque Jesusen rohajahi

⁴³ Rabe neten jato betan banetax janohax Galilea main sca cahi caresscai. ⁴⁴ Caquin sca ta jato yohinishqui:

—Jahuen main jihuetai bi ta jahuen caibaan Papan joi yohinica nincacatsihyamahihqui —hahquin. ⁴⁵ Jascahi bi jatihibi jan Jerusalem janinha fiesta janinxon hahcai jistanipixon Galilea main jihuetaibaan Johue hahquin jaton main nocotaiton.

⁴⁶ Janoxon jan jato jene hompajaxonni jema janin nocorihbihi, Caná janeya jema, Galilea main. Capernaum jema janin cahen huesti tinintin baque hisini jai. ⁴⁷ Judea mai mehax Galilea mai janin Jesus joresscabi chanihah jaa yocaqui tininti jahui.

—Heen baque hea rahonxonni cahue. Hihcatsih sca ta jaiqui —hahquin.

⁴⁸ —Hahan honanti jisyamaxon tah man nincacoinyamahi, hahqui rahtetibo rihbi jisyamaxon —tininti Jesusen jaquin. ⁴⁹ Jan jascarai bi:

—Jani heen baque mahuanon carihue, hihbon —hahquin tinintin.

⁵⁰ —Careshue. Miin baque ta jihuethiqui —tininti Jesusen jaquin. Min yohihi quescabi ta jacointihiqui hihquish tininti cahi caresscai. ⁵¹ Cahipish cabahinahi bi jahuen jonibaan behchibenaquin.

—Miin baque ta rohscaipishqui —hihcani. ⁵² Jascaraiton jato yocaquin:

—¿Jahuerahnon bari racataiya jahuen yona tantihpishquin?

—Bahquish bari hihpaquescaiya ta yona tantihpishqui —hihcani. ⁵³ Jano bari racatai bi Miin baque ta jihuethiqui Jesusen jaipi jahuen papan honanscaquin. Jaatian sca jahuen xobo janinhahbo betan jatihixonbi Jesus nincacoinscaquin.

⁵⁴ Jaa ta Judea mai mehax Galilea janin joribixon sca jahuen rabe sca jahuen hahan honanti Jesusen jato hahxonnishqui.

5

Yora honanyamajaquetai Jesusen rohajahi

¹ Jaa pecaho judiobaan fiesta jaiya Jerusalem janin Jesus caribihi. ² Jerusalem janin ta jema xehpoti jaiqui, carnero janeya xehpoti. Jema xehpoti hochoma cahen noa pishca racatah Betesda hahcaibo, judiobaan join. Jaa hian quexa ta pichca xobo tsahotihqui.

³ Jaa xoboho cahen hicha hisinaibo racati, benchebo, tobi pishcabo, yora honanyamajaquetai. Noa pishca bahinon jaabo manati. ⁴ Jaa noa janin roqui Papan yonoti paquepahonish. Paquexon qui jene bahimaquin. Bahihiya qui jenenencanya paquemenohi joni rohahi siripi. Jahuen hisin jatihibi rohacahini. ⁵ Jano cahen huesti joni racati, treinta y ocho bari jascabi hisini. ⁶ Racataiton jixxon hicha bari sca hisinai honanscaxon:

—¿Min rohacatsihyamahin? —hahquin Jesusen.

⁷ —Jene bahihiya hea jenenencanya potanica ta yama qui, hihbon. Hea cahiya bi huetsa pari hihquihui —hihqui hisinai.

⁸ —Huenihue. Huenixon miin cacajati bichish caresscathanhue —Jesusen jaquin.

⁹ Jaatianbi rohacahinxon jahuen cacajati bichish caresscai. Jaton tantiti neten ta Jesusen jascajanishqui. ¹⁰ Jaa copi ta jan rohajahi joni judiobaan yohinishqui:

—Rahma ta tantiti nete qui. Tantiti neten tah min miin cacajati botimahi —hahcanquin.

¹¹ Jascahahbo bi:

—Miin cacajati bichish caresscathanhue hah ta hea rohajahi jonin jaaxqui —jato jaquin.

¹² —¿Jahua joni jaa quin, mia Miin cacajati bichish jaya catanhue hahcai? —hahcanquin.

¹³ Yocacahbo bi Jesusen jane honanyamaquin, jano jonibo hicha nichiton Jesus rebesohitai copi. ¹⁴ Jaa pecaho Papan xobohoxon jaa merarihbxon:

—Jise. Mia tah min siriscái. Hohchayamascahue hashoan tiromamis —Jesusen jaquin.

¹⁵ Jaatian caresscaxon judiobo yohiquin:

—Hea rohajahi joni ta Jesus qui —hahquin. ¹⁶ Tantiti neten jan rohajahi copi judiobo Jesus qui rainyamahiton jaan jato joi bichinquin:

¹⁷ —Heen papa ta rahma caman teetihqui. Hea rihbi ta hen teetai —Jesusen jato jaquin.

¹⁸ Jascajaha hashoan sca Jesus rehtecatsihquibohi. Jan tantiti neten tantiyamahi copi rehtecatsihquibo. Papa Dios betan jasca rabe hihquish, Papa Dios ta heen papa qui jan jaiton.

Papan yohihah jahuen baquen haxemahi

¹⁹ Jesusen jato yohirihbiquin:

—Yohicoin ta hen mato jai: Papan baquexon bi tah hen hehmebi jahuejati hahtipahyamahi. Heen papan hahcai jixxon pari tah hen hahcai, jatihibi heen papan hahcai quescabijaquin hean rihbi hahquin. ²⁰ Hea jahuen baquehon shinanxon ta heen papan jatihibi jan hahcai rihbi hea jahuen baque jismahihqui. Jahuen coshiyaxon hen hahcai bi ta nea mentan hashoan coshin hen hahcai rihbi hen mato jismayaxihqui, man rahtenon. ²¹ Mahuanihbo huenixon heen papan jihuemahi quescajaribiquin tah hen jahuen baque hihxon hea hen queenaibo hean jihuemahi. ²² Tsoabi casticanxonma ta Papan hea yonohihqui hean sca jatihibi jointi honanxon casticanyaxahnon. ²³ Papa Dios Nete Hihbohi man honanai quescajaribiquin man jahuen baque Nete Hihbohi man jatihixonbi honannon ta jascajahiqui. Jahuen baque ta nete hihboma qui hihquibo ta Jaa raanni jahuen papa rihbi ta nete hihboma qui hihnicahbo qui.

²⁴ Yohicoin tah hen mato jai: heen joi nincaxon bi hea raanni heen papa rihbi nincacoinai joni ta queyoyamanox manatihqui. Jaa casticanxonma ta Papan mahnescaiqui, mahuataibo janinhax jihuetaibo qui mahnenon. ²⁵ Yohicoin ta hen mato jaribihi: mahuanihbaan ta Papan baquen yohihi nincascaiqui, nincacaibo jihuescanon. ²⁶ Jahuen papa teehihmanicahi quescarihbihi tah hen hea jahuen baque jaa xohtahi, Mia rihbi jato teehihmanicahue, Papan hea jani. ²⁷ Mia tah min noquebaque qui. Mian sca jato casticanhue hah ta heen papan janishqui. ²⁸ Hen mato yohihah bi rahteyamanahue. Hean quenahah ta tsahon janinhahbaan jatihixonbi nincayaxihquiqui. ²⁹ Sirijanibo ta cainax huenicahintihiqui, jascabi sca queyoyamanox manati jihuenoxon. Tiromajanibo rihbi ta cainax huenitihiqui, jascabijaquin casticanahbo janoxon.

Hahan Jesus honanti

³⁰ Hehmebi tah hen jahuejati hahtipahyamahi. Papa nincaxon res tah hen jato casticantihi. Jaa copi tah hen pontejaquin shinanxon casticanyaxihqui. Jaan hea yononixon shinanai quescajaquin tah hen jascajatihi. Heabi hen queenaiah ta hen jayamahi. ³¹ Hehqui heabi yohuanax cahen heen yohuan jahuabi hihyamahan. ³² Hea jahua quin honanahbo ta huetsa yohuancoinhqui. Hea yohihi jan hihcoini yohuanai tah hen honanai. ³³ Honancatsihquin man Juan qui raanah ta hihcoini jaa yohuancoinnishqui. ³⁴ Jonibo res yohuanai joi ta hean nincayamahi. Papan mato teehihmanon hihxon res ta hen mato yohihi. ³⁵ Johue quetajaha xabatai janin quescari tah man Juan qui caniqui, jahuen xaba chian sca basima jenimanoxon quescapi. ³⁶ Heen papan ta hea teebo yohinishqui hean queyoxonnon. Jaa ta hen hahcai, hea papan raanni man honancoinnon hihxon. Hean hahcaibo ta hea yohihi joi quessa qui, hahan hea honanti. Juaman yohini nincaxon hahan hea honantihi bi hean hahcai jixxon hashoan sirijaquin honanti. ³⁷ Hea raanni heen papan ta hehqui yohicoinhiqui. Jan yohuanai tah man jahuentianbi nincayamanihqui. Beron rihbi tah man jaa jisyananiqui jahuentianbi. ³⁸ Jaan raanni joni man nincacoinyamahiya ta maton jointi janin Papan joi yamahihqui. ³⁹ Papan huishani joi jisquin sirijanahue. Hea yohihi joi ta jaa qui, hahan hea honantihi bi tah man hahan mahuataxma jihuetai man shinanai. ⁴⁰ Hean mato teehihmanon hehqui jotihi bi tah man jocatsihyamahi.

⁴¹ Jonibaan res hea Yotiho coshi mia quin hahti tah hen queenyamahi. ⁴² Mato tah hen honanai. Noquen Papahon tah man queenyamahi. ⁴³ Heen papan hea raanah hen jahui bi tah man hea Johue hahyamahi. Jaabaanbi shinanax jahuibo tah man Johue hahtihi. ⁴⁴ ¿Jenquetsahaxon man mato qui siripi yohuanaibo benaxon man noquen Papan joi nincacointihin? Papa huesti noquen Dios hihqui bi tah man jaa siripi mato qui yohuanti man queenyamahi. ⁴⁵ Heanbi noquen Papa maton hohcha yohipaquayaxihqui shinanyamanahue. Mato cahenica ta Moisesnin huisha qui, hahan jihuetai man shinanai que bi. ⁴⁶ Moisesnin huishani joi nincacoinxon cah man hea rihbi nincaquehanai. Hehqui ta jaan huishanishqui. ⁴⁷ ¿Jenquetsahaxon man heen joi nincacointihin, Moisesnin huisha rihbi nincacoinxonma bi? —jato Jesusen jaquin.

6

Cinco mil Jesusen pimahi

(Mt 14.13-21; Mr 6.30-44; Lc 9.10-17)

¹ Jaa pecaho sca ta Galilea mai meha hian pohquejaqueti Jesus canishqui. Tiberias cahen jaa hiaman jane huetsa. ² Papan coshiyaxon hisinaibo Jesusen rohajahi jixxon hichaxon Jesus chibancanquin. ³ Mahchi manichish jano jahuen haxenicabo betan Jesus tsahopaqueti. ⁴ Judiobaan pascua fiesta nea pishca sca jai. ⁵ Jari jixxon hihti caibo hahqui jahui meraxon Felipe yocaquin:

—¿Jahuerahnon non piti marotihin jaabaan pinon?

⁶ Felipe tananoxon ta jascajanishqui, jaanbi piti caijanoxon bi yocaquin. ⁷ Jaatian:

—Doscientos libras non jai bi ta hahan paan marohah jato jatihixonbi piti senentimahiqui, hexti pishca cohren huesti hinanah bi —Jesus Felipenin jaquin. ⁸ Huetsa rihbi jahuen haxenica jahui, Andres, Simon Pedron huetsa.

⁹—Neno ta beronan jaiqui. ¿Pichca cebada paanya rabe tsatsa rihbi jan jai bi hen neatihinoquebo janon bi jaa jahuejatiquin? —Jesus jaquin Andresnin.

¹⁰—Jato tsahopaquemanahue —Jesusen jaquin. Hani pasto jano jaiya, jano tsahopaquemani. Bebobo rahsi toponah ta cinco mil joni janishqui. ¹¹ Jaatian jaa paan pishca bihxon Papa yocaxon tehcxon tsahotaibo Jesusen hinanpaquequin. Tsatsa sca jascajaribiquin jaabo queenai tih. ¹² Yaniscaiboya:

—Texejaha teque romishin tsinquitannahue, jahuabi yohyocohyamanon —jahuen haxenicabo Jesusen jaquin. ¹³ Jascajaha tsinguicanquin. Pichca cebada paan pihibaan texejahi tequebo tsinquixon, doce tasa bohasacanquin. ¹⁴ Jascajaquin Papan coshiyaxon jan hahcai jisish:

—Nea coin ta Papan joi yohinica main joyaxihqui yohicanpahonishqui —hihqui pihitshotaibo. ¹⁵ Jaton quiquin hapo sca hihnon jaa bichi jocatsihquibaan bi honanscaax mahchi janin jaa huesti Jesus caribihi.

Jesus jene benichi

(Mt 14.22-27; Mr 6.45-52)

¹⁶ Bepiscaiya jaton nonti janin jahuen haxenicabo nihpaqueti cahi. ¹⁷⁻¹⁸ Nontin nanetax Capernaum quiri pohquejahqueti cahi. Yamescaiya jato qui Jesus joriyamahi bi nihuen coshin behchonjaquin. ¹⁹ Basi huina huinaxon yame jisibaan bi hahchon hian benichi Jesus jahui, nonti hochoma sca. Hian benichai merahax rahtecani. ²⁰ Rahtetaibaan bi:

—Hea ta hen qui, raqueyamanahue —hihqui Jesus. ²¹ Jaatian nontin nanemacatsihquibo bi nococahinscანი, jano jan cahi hoque quexa.

Jesus benahibo

²² Xaba paquescaiya cahen hoque quexa banetipibaan benahah bi Jesus yamascai. Jahuen haxenicabo betan ta Jesus naneyamahipishqui. Jaabo rahsibi nontin cahi tah non jisipiqui. Jaa huesti nonti res ta jaipishqui, huesta yamahi. ¿Jahuenrahnon Jesus cahipishquin? hihxon benahahbi ta yamahi. ²³ Janoxon jan Papa yocaxon jato paan pimahipi hochoma sca Tiberias janinhax jahui nontibo nocoti. ²⁴ Jahuen haxenicaboyabi Jesus xahbanjahax, hahan behibo nontin sca nanetax, Capernaum janin jahui becani, Jesus benahi.

Jesus noquen hahan jihueti piti

²⁵ Pohquequihrani joxon Jesus meraxon yocacanquin:

—¿Jahuentian min neno jahuequin, maestron? —hahcanquin.

²⁶—Yohicoin ta hen mato jai: Papan coshiyaxon hen mato hahxonai jisipixon bi tah man jaa copima hea benahi. Paan pihit yanitipixon copi tah man hea benahi. ²⁷ Queyonica piti copi teeyamanahue. Jahuentianbi queyoyamanox manatai piti copi teenahue. Noquebaque hihxon hen hinanyaxihqui piti ta jascapah qui. Hea jascapa hinannica man honannon hihxon ta jahuen shinanyaxon hen hahnon Papan hea hinanishqui —Jesusen jato jaquin. ²⁸ Jan jascahiya:

—¿Jahueja non jatihin, Papan tee hahnoxon? —hahcanquin.

²⁹—Papan raanai joni nincacointi ta jaa tee qui —Jesusen jato jaquin.

³⁰—¿Jahua hahan hanonti min hahcain, jisxon non nincacoinnon hihxon? ¿Jahueja min jain, Papan shinanyaxon? ³¹ Cahchihoxon ta noquen xenibaan maná piti pipahonishqui. Jaa yohihi ta Naihoh queha piti ta jato hinannishqui, pihabo, hih Papan huisha janin jaiqui —Jesus jacanquin.

³²—Mato tah hen yohicoinai: naihoh queha piti ta Moisesnin mato hinanyamanishqui. Heen papan caya ta mato naihoh queha piti coin hinanishqui. ³³ Jaan hinanai piti ta naihoh quehax botopaquetihqui, jaa pihax jihuetahbo —Jesusen jato jaquin.

³⁴—Jascapa piti noque hinanquin jeneyamaxahnue, Hihbon —hahcanquin.

³⁵—Hea ta hen hahan jihueti piti qui. Hehqui jahuiho ta picatsihyamascatihiqui. Hea nincacoinaibo ta jiricatsihyamascatihiqui, jahuentianbi. ³⁶ Hea jisxon bi tah man nincacoinyamahi hah cah hen mato jai. ³⁷ Heen papan hea hinanai tihibi ta hehqui joti qui. Hehqui jahuiho tah hen potatimahi, ni huestibi. ³⁸ Hea queenai quescajahi tah hen joyamaniqui. Hea raanni queenajahi tah hen naihoh quehax botopaquetax joniqui. ³⁹ Ni huestibi manomaxonma tah hen jan hea hinanai jatihibi hean hueniyaxihqui nete queyoscanon. Hean jascajati ta hea raanni queenihqui. ⁴⁰ Jahuen baque jisxon jaa nincacoinaibo queyoyamanox manati ta heen papa queenihqui. Nete queyoscanon tah hen jato hueniyaxihqui —jato jaquin.

⁴¹ Jan jascahiya judiobo hahqui renreni. Naihoh quehax botopaqueni piti ta hea qui jan jaiya hahqui rainyamacani.

⁴² —¿Nea Jesus janeya joni Josepan baquema hin? ¿Jahuen papa, jahuen mama non honanyamahin? ¿Jenquetsahaquin sca Hea tah hen naihoh quehax paqueni hah noque jaquin? —hihcani.

⁴³ Jaatian:

—Mato rahsibi yohuani renren renrenyamanahue. ⁴⁴ Heen Papan Johue hahca ta hehqui jahuibo jahuiqui. Jan Johue hahyamaha cahen joti hahtipahyamahan. Hehqui jahuibo tah hen hueniyaxihqui, nete queyoscanon. ⁴⁵ Papan honanmahibo rahsi ta jatihiqui; jascajaquin ta Papan joi yohinicabaan huishanishqui. Heen papa yohuanai nincaxon honanaibo jatihibi ta hehqui jotihiqui.

⁴⁶ Tsoanbi noquen Papa jisyamani que bi ta Papa janinha huestichin jaa jisnicah qui. ⁴⁷ Hihcoinja ta hen mato jai: nincacoinaibo ta jahuentianbi queyoyamanox manatihqui. ⁴⁸ Hahan jihueti piti ta hea qui. ⁴⁹ Cahchihoxon maná piti pihax bi ta maton xenibo mahuanishqui. ⁵⁰ Naihoh queha piti pihax tah man mahuyamascatihi. Jascapa piti ta naihoh quehax botopaquetihqui. ⁵¹ Naihoh quehax botopaqueni piti mohitahpa ta hea qui. Jascapa piti pihax tah man queyoyamanox manascatihi. Hean hinanai piti ta heen yora qui. Mai mehabo jihueyaxahnon tah hen jato hinanai —jato jaquin.

⁵² —¿Jenquetsahaxon noque jahuen yora hinantihiquin, non pinon? —hihquish jaabo rahsibi judiobo join bahchinnanscai. ⁵³ Join rehtenanai boya Jesusen jato yohiquin:

—Yohicoín tah hen mato jai. Noquebaquen yora piyamaxon jahuen jimi rihbi xehayamahax tah man jihueyamahi. ⁵⁴ Heen yora pixon heen jimi rihbi xehahi noque ta queyoyamanox manatihqui. Jaabi rihbi tah hen hueniyaxihqui, nete queyoscanon.

⁵⁵ Heen yora ta piti coin qui. Heen jimi rihbi ta xehati coin qui. ⁵⁶ Heen yora pixon heen jimi rihbi xehahi tah man heen hahberabetibo qui, hea rihbi maton hahberabeti.

⁵⁷ Heen papa ta jihuetihqui. Hea ta raannishqui. Hea jaa copi jihuetai quescarihbi ta hea pihibo jihuetihqui, hea copi. ⁵⁸ Jascapah ta naihoh quehax botopaquetai piti qui. Noquen xenibaan piti pihax bi mahuanih quescayamahi. Nea piti pihax queyoyamanox manati, jascabi sca jihuenox manati, —jato jaquin. ⁵⁹ Capernaum janin haho tsinquiti xobohoxon ta Jesusen jato jascajaquin yohinishqui honanmaquin.

Queyoyamanox manati

⁶⁰ Jan yohuanai nincaxon:

—Honantima tah qui, jan yohuanai. ¿Tsoan nincatihiquin? —hihqui hicha jahuen haxenicabo. ⁶¹ Jahuen haxenicabo hahqui renren renrenai jahuen jointinin honanxon jato yocaquin:

—¿Hen yohuanai nincacax man rahtetain? ⁶² ¿Janohax hen joniton hen hahquirihbi hinahihnatai jisish cahran man hihti rahtetimahin? ⁶³ Dios Yoshiman ta mato jihue-matihiqui. Maton yora betan res tah man jahua bihtimahi. Hen mato yohihi joi ta yoshinyahpa qui, hahan jihueti. ⁶⁴ Hahan jihueti joi hen mato yohihah bi tah man caibaan nincacoinyamahi —jato jaquin. Jato jismenoxon ta tsoabi nincayosmabohin Jesusen honannishqui. Paraxon jaa bihmayaxihqui joni rihbi honanquin.

⁶⁵ —Jaa copi ta hen mato jascajahipiqui. Papan shinanyamahiya ta tsoabi hehqui jotimahiqui —hahquin. ⁶⁶ Jan jascaraiya ta hicha jahuen haxenicabaan jaa potabahin-nishqui. Haxehi hahbetan nihyamascacani.

⁶⁷ —¿Maton rihbi man hea potabahincatsihquin? —jahuen doce haxenicabo Jesusen yocaquin.

⁶⁸ —¿Tsohqui non catihin nan, Hihbon? Mian tah min noque hahan queyoyamati joi nincamahi. ⁶⁹ Mia Papan raanai jahuen caisti joni tah non mia honancoinai. Shinanquin sirijaquin tah non honanscai —hahquin Simoman.

⁷⁰ —¿Mato doce hen caisyamanihquin? Mato quiha huesti ta tiroma yoshin qui —Jesusen jato jaquin. ⁷¹ Jan yohihi ta Judas qui, Simon Iscariotenin baque. Jahuen doce quiha hixhon bi Jesus bihmatai shinanai joni.

7

Jahuen huetsabaan nincacoinyamahi

¹ Jascahipish Galilea mai janin res Jesus nichí. Judea main nihcatsihyamascái, judiobaan rehtecatsihquiya. ²⁻³ Judiobaan tapasohoxon fiestajati nete nea pishcascaiya, jahuen huetsabaan Jesus yohiquin:

—Nenohax Judea main carestanhue, janoxon min hahcaibo miin haxenicabaan rihbi jisnon. ⁴ Sirijaquin jisibo hihxon ta jonexon tsoanbi jahuejayamahiqui. Papan coshiyaxon hahan honanti hahcatsihquin janibixon hahhue, jatihixonbi jisquin sirijahabo

—hahcanquin. ⁵Nincacoinyamaxon copi ta jahuen huetsabaanbi jascajanishqui. ⁶Jesusen sca jato yohiquin:

—Caritima pari tah hen jai. Mato caya botannahue. Jahua copi hea manatima tah man jai. ⁷Mato jistahihmajati ta mai mehabaan hahtipahyamahiqui. Jaabaan tiromajahi hean hihcoinjaquin yohihiya ta hea jistahihmajacanihqui. ⁸Fiesta janin botannahue, mato. Caritima ta hea jai. Queenax ta hea catihi.

⁹Jato jascajaquin yohihax, Galilea main banetahbi.

Tapasax jihuetahbahibo janin Jesus cahi

¹⁰Jahuen huetsabo fiesta janin cahipi sca jaa rihbi cahi, caibaan jisnonma sca, janibima. ¹¹Jonetax cahi bi fiesta janinxon judiobaan jaa benaquin:

—¿Jahuen jaa quin? —hahcanquin. ¹²Hihti caibo jaya baxex baxexi.

—Siri joni tah qui —hihqui caibo.

—Sirima ta qui. Jonibo ta paranihqui —hihqui caibo rihbi. ¹³Judiobo qui raquetax tsoabi coshin jaya yohuanamahi, honahaxbi yohuancani.

¹⁴Fiesta naexbi sca Papan xoboho mapexon Papan joi Jesusen haxemaquin. ¹⁵Jan jascahiya rahtetax judiobo yohuani:

—¿Jenquetsahaxon neatohon huisha joi honanishquin tsoanbi quirica honanmanima bi? —hihcani. ¹⁶Jascahiton Jesusen yohiquin:

—Hen jato honanmahi ta heen joima qui. Hea yononihton joi tah qui. ¹⁷Papan shinanajati hahcatsihquibaan ta honantihiqui. ¿Papan shinanaiya honanma hen jain? ¿Heanbi shinanxon honanma hen jain? Jaabaan ta hen yohuanai honantihiqui. ¹⁸Coshi joni hihqui shinanahbo hihquish ta jaabaanbi shinanax yohuanai jaiqui. Hea raanai heen Papa coshi hihqui honanahbo hihquish tah hen hea yohuanai. Jascapa yohuannica ta hihcoini yohuannica qui. Jahuabi tiroma yohuanamahi. ¹⁹¿Maton nincati joi Moisesnin hinanyamanishquin? Ni huestichinbi tah man jaa joi nincayamahi, jaan hinanni que bi. ¿Hean mato jahua hahca man hea rehtecatsihquin? —Jesusen jato jaquin.

²⁰—Mia rah ta yoshiman hihbojahiqui. ¿Tsoan mia rehtecatsihquiquin? —hihcani. ²¹Jesusen jato yohirihiquin:

—Hen hahcai huesti jisish tah man jatihibi rahtetai. ²²Jaanbi shinanxonma bi noquen xenibaan pari yohihah ta Moisesnin mato honantiyahpati yohinishqui. Tantiti netenbi tah man baquexo honantijahi. ²³Moisesnin yohini quescajacatsihquin tantiti netenbi joni huetsa honantijaniboxon ¿jahua copi sca man tantiti neten hean huetsa joni rohajahiya man hehqui rainyamahin? ²⁴Beron jisxon res huetsa jonin shinan honanti shinanyamanahue. Shinanquin sirijaxon pari joni huetsa honannahue —jato jaquin.

Nai janinhax Jesus joni

²⁵Jasca jan jaiya caibo Jerusalem janinhahbo yohuanscai:

—¿Neama hin, rehtecatsihquibo joni? ²⁶Jistan. Janibi nichish yohuanai bi ta jahua hihyamacanihqui. ¿Cristo hihqui noquen cacannicabaan honancoinscaiquin? ²⁷Janobihax nea joni jahui tah non honanai. Cristo joni jahuiya roqui tsoanbi jahuerahnohax jaa jahuiquin hihxon honanyamayaxihcanihqui —hihcani.

²⁸Jaa copi cahen Papan xobohoxon jato haxemahi sca Jesus coshin yohuani:

—¿Hea man honanain nan? Janobihax hea joni man honanrihbihi nan? Hehme mehax ta hen joyamaniqui. Hihcoinnicahton ta hea raannishqui. Jaa tah man honanyamahi. ²⁹Hean tah hen jaa honanai. Jaan hea raanah ta hen jaa janinhax joniqui —hahquin Jesusen. ³⁰Jasca jan jaiya xecotancatsihxon bi jaa bixhon rehteti siriyamaparihiya tsoanbi meheyamaquin. ³¹Rehteti shinan caibaan jai bi hicha noquebaan Jesus nincacoinquin.

—Neatohon ta hahan honanti hahquiqui, hicha. ¿Cristo joxon, neatohon hahcai quescajaxon bi hashoan hicha rihbi hahan honanti hahtihiquin? —hahcanquin

Fariseobaan Jesus bihcatsihqui

³²Jascari baxexaibaan bi fariseobaan nincaquin. Nincaxon, sacerdote hapobo betan fariseobaan sca jaton porisiabo raanquin, Jesus bihtannahue hahxon. ³³Bihcatsihscabo copi cahen jato yohiquin:

—Basima tahni sca tah hen mato betan hihtih. Hea raanni janin sca hea cati ta hochoma sca qui. ³⁴Hea benaxon bi tah man hea meratimahi. Hea cahi janin tah man cati hahtipahyamatihi —jato jaquin Jesusen. ³⁵Jaabo rahsibi sca judiobo yohuani:

—¿Jahuenbi cacatsihquiquin, non jaa merayamascanon? ¿Nahuabo qui canibo janin cacatsihquiquin, nahuabo sca honanmahi? ³⁶¿Benaxon bi tah man hea meratimahi jan hihqui bi jahua hihcatsihquiquin? Hea cahi janin tah man cati hahtipahyamahi. ¿Jan jascari yohuani hen jahua hihcatsihquiquin? —hihcani.

Jene mohini bahihi

³⁷ Hahan fiesta queyotai neten, jaton hani netenbi, nichish Jesus coshin yohuani:
—Jircatsihquish hehqoi benahue, xehahi. ³⁸ Hea nincacoinai joni janinhax ta jene mohini huean bahihicamaxihquiqui, jahuen jointi janinhaxbi, Papan huisha joi jai quescari —hahquin. ³⁹ Jan jene yohihi ta Dios Yoshin qui, nincacoinaibaan bihaxihqui Dios Yoshin. Jesus huenihihiriyamaxon ta jahuen yoshin Papan hinanyamaparinishqui.

Join bahchinanaibo

⁴⁰ Jan jascari yohuanai nincacax tsinquijaquetaibo yohuanrihbihi:
—Nea coin ta Papan joi yohinica qui —hihcani.
⁴¹ —Noquen hapo hihnon Papan caisai joni tah qui —hihqui caibo rihbi.
—¿Galilea mai janinhax Papan caisai joni jotihiquin? ⁴² David xohtahax ta David jihuepahoni janinhax Papan caisai joni picotihiqui, Belen jema janinhaxbi. ¿Jascayamahin, Papan huisha joi janin? —hahcanquin caibaan rihbi. ⁴³ Jascapa mesco shinanyahpabohax join bahchinnanscacani. ⁴⁴ Caibaan Jesus xecotancatsihquin bi tsoanbi meheyamaquin.

Nincayamahi hapobo

⁴⁵ Jano sacerdote hapobo betan fariseobo manatai janin jaton porisiabo nocorihbihiton yocacanquin:

—¿Jenquetsahpa hin man hihueyamahahquin? —hahcanquin.
⁴⁶ —Tsoabi ta jan yohuanai quesca jayamanishqui, jahuentianbi —hihqui jaton porisiabo sca.
⁴⁷ —¿Mato rihbi jaan paran paranaxquin? ⁴⁸ Maton hapobaan ni huestichin jaa nincayamahi ¿man jisyamahin? Fariseobaan rihbi ta jaa nincayamahihqui. ⁴⁹ Nea tsamatai rahsi ta yohitimabo qui, Papan huisha joi honanyamahibo —jato jacanquin fariseobaan.
⁵⁰ Nicodemo janeya Jesus qui johuanni joni jato betan hihxon jato yocaquin:
⁵¹ —¿Huetsa joni yohuanquihnxonma bi, jan hahcai rihbi honanxonma bi non jaa casticantihin? ¿Papan huisha joi janin jascajati joi jaiquin? —jato jaquin Nicodemonen.
⁵² —¿Mia rihbi tsi ra min Galilea mai meha quin? Papan joi jisquin sirijaxon, Galilea mai janinhax Papan joi yohinica jotima honanhue —jacanquin.

Tsinihi haibo

⁵³ Janohax picotax, jatihibi jaton xoboho bocani.

8

¹ Olivoyahpa mahchin sca Jesus cahi. ² Hihari sca Papan xoboho cahi. Jano sca roqui hahqui jatihibi joni tsinquitaiton tsahoxon jato yohi yohinish. ³ Jan jato haxemahiya qui jaton haxemanicahbo betan sacerdote hapobaan qui huesti haibo hihuequin, joni huetsa betan hihqui qui meraxon. Jato tocan jaa nichinxon qui Jesus yocacanquin:

⁴ —Joni huetsa betan hihqui bi tah non nea haibo merahahqui, maestron. ⁵ Huishaxon ta Moisesnin yohinishqui, nescapa non macaman tsacaquin rehtenon. ¿Mian cahran? ¿Jahua min mian yohihin? —hah qui jacanquin. ⁶ Jaton hapobo yohinixon qui Jesus tanaquin jascajaquin, hahqui yohuanti qui janon. Jasca jaabo jaiya qui cahcopaquexon qui jahuen metotinin mai huishaquin. ⁷ Jascabi yocacahbo qui huenixon qui jato yohiquin:

—Hohchajomaxon mato janinha huestichin macaman tsacamenonon —hah qui jato jaquin. ⁸ Cahcopaquerihbixon qui mai huisharihbiquin. ⁹ Jan yohihi nincacax qui yosibobo rahsi pari cahi. Jaa pecaho qui huesti huestibo cahi, jaa xobo janinhax caini. Jesus patax haibo huesti qui banenon. ¹⁰ Huenixon qui haibo Jesusen yocaquin:

—¿Jahuen bocanaxquin? ¿Mia tsoanbi casticancatsihyamahiquin? —hah qui jaquin.

¹¹ —Tsoanbi hihbon —hihqui haibo.

—Hean rihbi ta hen mia casticanyamahi. Caresscatanhue. Jahuentianbi hohchayamascanhue —hah qui jaquin Jesusen.

Jesus noquen xaba hihbo

¹² Huetsa tian rihbi ta Jesusen jato yohinishqui:
—Jatihibi main ta hen hean jato xabajaxonai. Hea chibanaibo ta bahquish chian nihyamahiqui. Hahan jihueti xabapan sca ta mayaxihcanihqui. ¹³ Jan jascajahiya:

—Mianbi shinanax tah min yohuanresai. Chanicoi tah min jayamahi, noquen nincatima hih —fariseobaan sca hahquin. ¹⁴ Jesusen sca jato pontequin:

—Jahuerahnohax jahuex jahuen sca hea catihin hen honanax yohuanai hen mato yohihi ta maton nincati qui, yohicoi joi. Heabi yohihi hen yohuanai bi tah man nincacointi jai. Janohax jahuex hea jahuerahnon cahin man tah man honanyamahi. ¹⁵ Beron res jisxon tah man joni huetsana jahuen shinan honanti shinanai. Jascajaquin shinanxon tah man casticannoxon Papan rahuibo yohiti shinanai. Hean ta hen tsoabi jascajaquin yohiyamahi. ¹⁶ Yohixon tian tah hen hahcoi quin yohitih. Hea raanni heen papa betan tah hen jaton

shinan honanai, hea huestichin yohixonma bi hahbetanbi yohixon. ¹⁷ Maton nincati joi janin ta nescapa huisha jaiqui. Rabechin yohihah pari ta yohuan coin qui, nincati. ¹⁸ Rabe tah non qui hah ca hen mato jai sen. Hea yohihi heabi hihqui bi ta hea raanni heen papan rihbi hea yohihihqui —jato jaquin Jesusen. ¹⁹ Jaatian:

—¿Jahuen hin, miin papa? —hahcanquin.

—Hea honanyamaxon tah man heen papa rihbi honanyamahi. Hea honanxon cah man heen papa rihbi honanan —jato jaquin. ²⁰ Janoxon Papa Dios coriqui hinanti chiquehoxon ta Jesusen jato jascajaquin yohinishqui, Papan xobohoxon honanmaxon. Jahuen mahuati hora nocorihyamahiya tsoanbi meheyamaquin.

Jano jaa cah janin jaabo catimahi

²¹ Jahuen Papa honanyamahibo copi jato hahquirihbi yohiquin:

—Hea tah hen cah. Hea benahax bi tah man maton hohchayabi mahuatihi. Jano hea cahiton tah man catimahi —hahquin. ²² Nincaxon bi honanyamahax sca:

—¿Jano hea cahiton tah man catimahi hihquish bi hahri rehtecatshiquin? —hihcani judiobo.

²³ —Mato tah man naman mehabo qui. Hea tah hen bochiquiha qui. Mato tah man nea xabapan meha qui. Hea tah hen nea xabapan mehama qui. ²⁴ Jaa copi tah hen Maton hohchayabi tah man mahuatihi hah hen mato jaahqui. Hea hihqui shinanyamahax tah man maton hohchayabi mahuatihi —Jesusen jato jaquin. ²⁵ Jan jascajahiya:

—¿Mia min jahua quin? —hahcanquin.

—Jaa yohi tah hen mato jai. ²⁶ Mato qui yohiti ta hen hicha jai. Mato casticanti rihbi tah hen hicha jai. Man tiromahibo bi ta hea raanni hihcoini yohuannica qui. Jan yohuanai nincaxon ta hen jaa joi rihbi main jihuetaibo yohihi —jato jaquin Jesusen. ²⁷ Jahuen papa yohihi jan hihqui bi ta honanyamacannishqui. ²⁸ Honanyamahiton Jesusen yohiquin:

—Hea noquebaque jihuin hueonxon pari tah man hea hihqui honantihi. Hehmebi jahuejaxonma bi papan hea yohini joi rahsi yohi hen jai tah man honantihi. ²⁹ Hea raanni noque ta hehbe hihquiqui. Jaa queenai quescajaquin hen jai copi ta hea jeneyamahihqui.

³⁰ Jascajaquin jato yohihah hichaxon nincacoincanquin.

Papan baqueboya hina baquebo

³¹ Nincacoin ta jai hihquibo judiobo sca Jesusen yohiquin:

—Heen joi jascabijaquin nincacax tah man heen haxenicabo jacointihi. ³² Hihcoin hen jani quen tah man honantihi. Jaa honanax tah man hinabomascatihi —Jesusen jato jaquin.

³³ —Noque tah non Abrahamen baquebo qui. Tsoanbi ta noque hinajayamanishqui, jahuantianbi. ¿Jenquetsahpahn min noque Hinaboma sca tah man jatihi min noque jain? —Jesus jacanquin. ³⁴ Jascaraiton jato yohirihbiquin:

—Yohicoin tah hen mato jai. Jatihibi hohchataibo ta hina qui, hohchapan hihbojahah.

³⁵ Hina ta xoboho jascabihi jihue jihueyamahihqui. Xobo hihbaan baque res ta jano jihuenica qui, queyoyamox mana jihueta. ³⁶ Papan baquen mato hohcha sohuaxona tah man hihcoini hinabomascatihi. ³⁷ Abrahamen baquebo man jai tah hen honanai. Jahuen baqueboxon bi tah man hea rehtecatshiqui, maton jointi janin heen joi hihquicasquimahiya. ³⁸ Heen papan hea jismahi ta hen mato yohihi. Maton rihbi tah man maton papan yohihi quesabijaquin hahcai —jato jaquin Jesusen.

³⁹ —Noquen papa xeni ta Abraham qui —hahcanquin. Jesusen sca:

—Abrahamen baqueboxon tah man jahuen tee hahquehahnai. ⁴⁰ Hea tah man rehtecatshiscai, Papan hea yohihi hen mato yohicoinah bi. Abrahamen ta jascajayamanishqui. ⁴¹ Maton papan tee tah man hahcai —Jesusen jato jaquin.

—Noquen mama ta tsiniyamanihqui. Huesti res ta noquen papa qui, noquen papa Dios —hahcanquin. ⁴² Jesusen sca:

—Papa Dios maton papa hihquiya tah man hehon queenquehanai. Papa Dios janinhax jonish tah hen hea jahui. Hehmebi tah hen joyamaniqui. Jaan ta hea raannishqui.

⁴³ ¿Jenquetsahpahn man hen mato yohihah bi man honanyamahin? Heen joi nincayosmaboxon tah man honanyamahi. ⁴⁴ Tiroma yoshin ta maton papa qui. Jaa queenai hahti res tah man maton rihbi shinanai. Noquebo jamenohitian rehtemis hihnish ta rahma caman jascabi rehtemis qui, maton papa. Jaabiyahpa quesamisax, jascabihi quesahi. Quesa hihxon ta caibo sca quesamaribihiqui. Hihti qesa, maton papa. ⁴⁵ Hihcoini yohuan hen jai copi tah man nincacoinyamahi. ⁴⁶ ¿Tsoan man hea heen hohcha yohitihin? ¿Jenquetsahpahn man hea hihcoini yohuanai bi man hea nincacoinyamahin? ⁴⁷ Papan baquebo ta jahuen joi nincanicabo qui. Jahuen baquemaboxon tah man nincayamahi —Jesusen jato jaquin.

Abraham jariyamahiya Cristo jihue hihboni

⁴⁸ Jan jato jascajahiya:

—Mia tah min Samaria mai meha qui. Yoshiman ta mia hihbojahiqui. ¿Hihcoinja non mia jayamahin?

⁴⁹ Jascahahbo jato Jesusen yohirihbiquin:

—Yoshiman ta hea hihbojayamahiqui. Heen papa qui tah hen siripi yohuanai. Mato tah man hehqui tiromahi yohuanai. ⁵⁰ Hehqui siripi yohuanaibo benahi ta hen joyamahi. Jatihibi shinan honannica ta jaiqui. Jaan ta mato yohihihqui, hehqui siripi yohuanxon. ⁵¹ Hihcoinja ta hen mato jai. Heen joi nincacai jonibo ta mahuayamanox manatihqui —jato Jesusen jaquin.

⁵² —Mia yoshiman hihbojahi tah non honanscai. Abraham ta mahuanishqui. ¿Papan joi yohinicabo rihbi hihni que bi min jascarain, Heen joi nincacai noque ta mahuayamanox manatihqui, hihqui? ⁵³ ¿Mia min noquen papa yamanica Abraham mentan hashoan coshi quin? Papan joi yohinicabo rihbi ta mahuanishqui. ¿Jahua hihqui shinan mian jain? —Jesus jacaquin. ⁵⁴ Jato Jesusen yohiquin:

—Hehqui siripi yohuanaibo benaxon tah hen jahuabi bihtimahi. Heen papa ta hehqui siripi yohuanihqui, Jaa ta noquen Dios qui hih man jai que bi. ⁵⁵ Jaa man honanyamahi bi tah hen hean honanai. Mato quescapa quesamis hihquish pari ta hen Jaa ta hen honanyamahi hen jatihi. Jaa ta hen honanai. Jahuen joi rihbi ta hen nincacoinai. ⁵⁶ Hea neno joyaxihqui honanax ta maton papa yamanica Abraham jenimanishqui. Hea jahui jisish sca ta coin coinnishqui —jato Jesusen jaquin. ⁵⁷ Jan jascaraiya:

—¿Cincuenta bari jariyamaxon bi min noquen xohta yamanica Abraham jisniquin? —judiobaan Jesus jaquin.

⁵⁸ —Hihcoinja tah hen mato jai. Abraham cainrihyamahi bi tah hen hea janiqui —jato jaquin. ⁵⁹ Jan jascaraiya, tsacanoxon macan bichibaan bi jonetax Papan xobo janinhax Jesus cainscai.

9

Benche cainni joni Jesusen rohajahi

¹ Jano huinoxon benche joni jisquin, benche jahuen maman bihni. ² Jahuen haxenicabaan sca yocaquin:

—¿Tsoa tsi ra hohchanishquin, Maestron, benche hoa jahuen maman bihnon? ¿Jahuen papabo nan? ¿Jaabi nan? —hahcanquin.

³ —Jan hohchani copima ta qui. Jahuen papabo rihbi hohchani que ma bi tah qui. Papan coshiyaxon jaa rohajahi jisibo ta benche jahuen maman bihnishqui. ⁴ Hea raanni heen papan teebo jahi ta noque jai, bari queya parihya. Tsoabi teeti hahtiphayamasanon ta yametihiqui. ⁵ Mai mehabo tocan jihuexon tah hen jato xabajaxonai.

⁶ Jascajaxon mai qui toshbanhahxon huaho berojaxon benche betsamxon yohiquin:

⁷ —Siloé janeya noaho benashitanhue —hahquin. Siloé ta raanah hihcatsihquiqui. Jascalah, cahax, benashitani joquin jisbenascaquin. ⁸ Jan coriqui yocacatai jispahonibaan sca yocaquin:

—¿Neama hin, yoca yocaqui tsahopahoni joni?

Jahuen hahbe jihuenihbaan rihbi jascajaquin yocaquin.

⁹ —Jaabi ta qui —hihqui caibo.

—Jaamahax bi ra ta jaa quescapah qui —hihqui caibo rihbi.

—Hea tah hen qui —hihqui jaabi sca.

¹⁰ Honancatsihquin sca:

—¿Miabi hihquish jenquetsahax min bero siriscainquin? —hahcanquin.

¹¹ —Jesus janeya jonin huaho berojaxon heen bero qui betsamxon hea Siloé janin nashitanhue hahcah tah hen nashihi sca cahaqui jisresscanoxon —hihqui.

¹² —¿Jahuen hin, jaa joni? —hahcanquin.

—Hen ta hen honanyamahi —hahquin.

Benche yoca yocacainquin

¹³ Benche hihpahoni joni fariseobo janin sca bocanquin. ¹⁴ Tantiti neten cahen Jesusen huaho berojaxon jahuen bero rohajanish. ¹⁵ Fariseobaan sca yocarihbiquin:

—¿Jenquetsahaxon miin bero rohajaxquin? —hahcanquin.

—Jaan heen bero qui huaho tsamanah benashixon tah hen jisresscai —jato jaquin.

¹⁶ —Papa Diosen raanahma tah qui. Tantiti neten jan tantibahinayamahi copi tah non honanai —hihcani caibo fariseobo sca.

—¿Jenquetsahaxon hohchayahpa jonin jascapa hahan honanti jatihquin? —hihcani caibo rihbi. Caibo huetsa shinanya hihnon caibaan rihbi huetsa shinanquin. ¹⁷ Benche hahquirihbi yocacainquin:

—Mia ta bero rahonaxqui. ¿Mian jisi jenquetsahpa joni quin? —hahcanquin.

—Papan joi yohinica tah qui —hahquin. ¹⁸ Jan benche hihpahonixon bi rahma pari jisi judiobaan nincacatsihyamahi. Hihcoina shinanyamacanquin. Jahuen papa, jahuen mama yocarihyamaxon hihcoini jaa yohuanai shinanyamacanquin.

¹⁹ —¿Nea hin, maton baque, benche ta cainnishqui hih man jain? ¿Jenquetsahaxon sca rahma jisiquin? —hahcanquin. ²⁰ Jascahah:

—Jaa ta noquen baque qui, non tah non honanai. Jan benche cainni tah non honanrihibi. ²¹ Jenquetsahaxon jan rahma jisiquin, non tah non honanyamahi. Tsoan jahuen bero rohaxquin, non tah non honanyamarhibi. Jaabi yocanahue. Hani sca ta jaiqui, jaanbi ta mato yohitihqui.

²² Judiobo qui raquexon jahuen papan, jahuen maman jascajaquin. Judiobaan cahen jatihixonbi yohinish, Cristo tah qui hihquibo jatihibi tah non potati jai, noquen tsinquiti xoboho mapeyamascaábo, tsoanbi jato yohuanquihnyamascaábo tah non jato potatihi, hahcanquin huesti shinanyaxon. ²³ Judiobaan jascahipi copi raquetax:

—Jaa ta haniscái qui. Jaabi yocanahue —hihresi jahuen papa. ²⁴ Jascaraiya, rabe coti sca benche jahuen maman bihni joni hahquirihbi quenamacanquin.

—Papa Diosen caya ta hea rohajahaxqui hihhue. Hoa joni ta hohchamis qui, non tah non honanai —hahcanquin.

²⁵ —Jahuen hohcha yamahihquin, hen ta hen honanyamahi. Nea res ta hen honanai: benchepahonixon bi ta hen rahma jisi —jato jaquin.

²⁶ —¿Jahueja mia jaaxquin? ¿Jenquetsahaxon mia jismahaxquin? —hahcanquin.

²⁷ —Moa ta mato yohihahqui. Hen yohihah bi tah man nincacatsihyamahahqui. ¿Jahua copi man hahquirihbi nincacatsihquin? ¿Mato rihbi man jahuen haxenicabocatsihquin? —jato jaquin. ²⁸ Jaa sinajascacanquin:

—Mia tah min jahuen haxenica qui. Noque tah non Moisesnin haxenicabo qui. ²⁹ Papa Diosen ta Moises yohinishqui, non tah non honanai. Jahuerahnohax hoa joni jonishquin, non tah non honanyamahi —hihcáni. ³⁰ Jaabo jascaraiya:

—Man jascaraiya tah hen rahtetai. Jahuerahnohax jaa jonishquin man honanyamahi bi ta hea bero rohajahaxqui. ³¹ Hohchamisbo ta Papan nincayamahihqui. Jaa tah non honanai. Papahon shinancoinaibo, Papa queenai quescajahibo, jascapahbo ta Papan nincacatiqui. ³² Tsoanbi ta benche cainni joni bero rohajayamanishqui. Benche rohajahi ta tsoan jascajanima qui, nete jamenoni tian, rahma caman. ³³ Papa Dios betan hihyamaxon cahen Jesusen jahuejatibi hahtipahyamaquehaniqui —jato jaquin.

³⁴ —Mia tah min hohchaya bi res piconihqui. ¿Jascapahxon bi min noque honanmacatsihquin? Catanhue —hahxon picocanquin.

Jaton shinan xehpohibo

³⁵ Catanhue hahcaibo joi nincaxon benche hihpahoni meraxon Jesusen yocaquin:

—¿Noquebaquen yohihah min nincacoinyamahin?

³⁶ —¿Tsoa jaa quin, hapon, hen nincacoinnon? —hahquin.

³⁷ —Hea min jisi tah hen qui, mihbetan yohuanai.

³⁸ —Hean tah hen nincacoinai, hihbon —hihxon raboxonen nichish betihihpaqueti.

³⁹ —Honanahbo tah hen naihoh quehax joniqui, jisyamahibaan jisíbo, jisíbo rihbi benche sca bananon —hahquin Jesusen. ⁴⁰ Jan jascajahi caibo fariseobaan hochomaxon nincaxon yocacanquin:

—¿Noque rihbi non benche quin? —hahcanquin.

⁴¹ —Benchehax tah man hohcha yamaquehanai. Non tah non jisi man jai copi ta maton hohcha banetihqui —jato jaquin.

10

Carnero chique

¹ —Hen mato yohinon nincanahue. Carnero chiqueho hihquicatsihquish xehpoti janinma bi huetsanco hinatax hihconica ta yometsoh qui, bichinmis joni. ² Xehqui janin hihconica ta carnero coirannicah qui. ³ Jan hihconon ta xehpoti coirannicahton quehpenxoniqui. Jahuen carnerobaan rihbi ta jahuen joi nincacatiqui. Jaan rihbi ta jaton jane quenapaquexon jato cainmahiqui. ⁴ Jahuenah rahsi jatihibi cainmaxon ta jato beboxoniqui. Jaton hihbaan joi nincaxon ta carnerobaan chibanihqui. ⁵ Huetsa joni cahen chibanyamacanquin, jahuen joi honanyamaxon. Jato bichi huetsa jahuiya cahen jabaescani —Jesusen jato jaquin. ⁶ Honanahbo jato jascajaquin yohihah bi nincayamacanquin. Jan yohuanai honanyamacanquin.

Jesus noquen coirannicah siri

⁷ Jaa copi jato hahquirihbi yohiquin:

—Man honannon hihxon tah hen yohihi: hea tah hen carnero jano hihcoti quescapa qui. ⁸ Hea joriyamanon jonibo ta yometsohbo qui, bichinnicabo. Carnerobaan ta jato nincayamanishqui. ⁹ Hea tah hen jano hihcoti quescapah qui. Hea janin hihcohibo ta queyoyamanox mananicabo qui. Hihcohax ta picorihbihihqui, jaton piti rihbi pishinyamahi.

¹⁰ Yometsohti res ta yometso jahuiqui. Rehtehi rihbi jahui. Masajahi rihbi jahui. Jihuetahbo tah hen hea jahui, siripi jihuetahbo. ¹¹ Hea ta carnero coirannicah siri qui. Siri coirannicahton ta jahuen carnero jeneyamahihqui, rehtehibaan bi. ¹² Jahuenah que ma bi carnero coirannon hihxon copijaha jonin cahen hino jahui jisish carnero potabahini caresi, coirannicah hiyahmahax copi. Hiron sca cahen hahchixon jato jabisjaquin. ¹³ Coriqui copi coiranhue hahca bi cahen joni jabatih, carnerohon shinanyamaquin.

¹⁴ Hea tah hen carnero coirannica siri qui. Henabo tah hen hean honanai. Henabaaan rihbi ta hea honanihqui. ¹⁵ Heen papan hea honanai quescajaquin tah hen hean rihbi heen papa honanai. Carnero mahuyamanon hihxon tah hen paxajaquin hehri jaton sinatahbo hean rehtemahi. ¹⁶ Hea ta huetsa carnero jaribih, nea chiquehoh quehama. Jaabo rihbi beti tah hen jai. Heen joi ta nincayaxihcanihqui, huesti repinica res janon, coirannicah rihbi huesti res.

¹⁷ Hahquirihbi teehihnoxon tah hen heen jihuetahbo jihuenon hihxon jaton sinatahbo paxajaquin hehri rehtemahi. Jaa copi ta heen papan hehon shinanihqui. ¹⁸ Tsoanbi ta hea rehteresyamahiqui. Heanbi shinanxon tah hen hehri jato rehtemahi. Heanbi shinanax ta hen hahquirihbi teehihtih, jascahue heen papan hea jani —Jesusen jato jaquin.

¹⁹ Jan jascajaquin yohihah, caibo judiobo huetsa shinanya janon caibo rihbi huetsa shinanya hihqui. ²⁰ Mesco shinanya hihquibaan bi hichaxon caibaan yohiquin:

—¿Jahua copi man hashoon nincatihin? Yoshinyahpa tah qui. Tehquehah ta jaa jaiqui.

²¹ —Jan yohihi joi ta yoshinyahpa joninahma qui. ¿Yoshiman benche jismati hahtipahiquin? —hahcanquin caibaan rihbi.

Jesus queenyamahibo judiobo

²² Jene tian sca jaiya cahen Jerusalem janin judiobaan fiesta jai, Papan xobo jato behnajaxonnihbo copi fiestajacanquin. ²³ Jaa xoboho sca Jesus nich, Salomon janeya chiquehoh. ²⁴ Hahqui tsinqui jaquexon yocacanquin:

—¿Jahuentian caman min noque honancasquimamatihin? Cristo hihxon, Hea ta hen Cristo qui hahquin noque yohiquin sirijahue —hahcanquin.

²⁵ —Moa hen mato yohihah bi tah man hea quesahi shinanai. Heen papan hea Jascajahue hahca hen hahcaibo ta jaa jisxon hahan hea honanti qui. ²⁶ Jaabi tah man nincayamahi, heen repinica janinhahmaxon copi. ²⁷ Hean quenahah ta heen carnerobaan hea nincaquihqui. Hean rihbi tah hen jato honanai. Hea ta chibancaniqui. ²⁸ Hean tah hen jato teehihmahi, queyoyamanox mananon, jahuentianbi manoyamanon. Heen mequeman hen xecohibo ta tsoanbi hea bichintimahihqui. ²⁹ Heen papan ta hea jato hinanihqui. Jaan ta jatihibi mahuiniqui. Jaan xecohi ta tsoanbi mebichintimahihqui. ³⁰ Heen papa betan tah hen huesti yora qui —jato jaquin Jesusen.

³¹ Judiobaan sca ta macan bibrinibishqui, Jesus rehtecatsihquin hahan tsacanoxon. ³² Macan bichiton jato yohiquin:

—Hen hicha siri hahcaibo tah hen mato jismasca, Papan hea Siribojahue hahcah. ¿Jahuemeha hen hahcai copi man hea rehtecatsihquin? —jato jaquin.

³³ —Min siribo hahcaima bi min Papa Dios qui tiromahi yohuanai copi rahan. Mia jonihax bi Diosax quescapi yohuanai copi —hahcanquin. ³⁴ Jesusen sca:

—¿Davidinin huishani joi janin nea huisha yamaquin? ¿Mato tah man diosbo qui hah ta hen mato jai hahquin huishayamanishquin? ³⁵ Papan huishamani ta tsoanbi huetsajati hahtipahyamahiqui. Jato yohihi Mato tah man diosbo qui Papa jani que bi man hehqui rainyamascain? ³⁶ ¿Hea ta hen Papa Diosen baque qui hen jai copi man Dios qui tah min tiromahi yohuanai hah man hea jain? Baquen hahxon Papan hea naihoxon raanni que bi ¿man jascarain? ³⁷ Heen papan teebo hean hahyamahiya hea hihcainai shinanyamanahue. ³⁸ Hen hahcainaiya, hean mato yohiha copi que ma bi hean hahcai jisxon copi hihcainai shinannahue. Jascajaquin tah man honanxon nincacointih, hea janin heen papa hihqui, hea rihbi heen papa janin hihqui —hahquin. ³⁹ Jascahiton jaabaan hahquirihbi bichatsihqui bi cahi, mequen sca cahabo.

⁴⁰ Jaatian sca cahax Jordan huean hahquirihbi pohquejaquetax, janoxon Juaman nashimamenoni janin cahi. Cahi nocotax janobi sca baneti. ⁴¹ Jano sca hihqui honanax ta hihti caibo hahqui nocoti bocannishqui.

—Juaman ta hahan honanti hahyamanishqui. Hahyamahax bi ta hihcointi nea joni qui chaninishqui, jatihibi jan yohini quescabi ta nea Jesus jaiqui —hahcanquin. ⁴² Janoxon sca hichaxon nincacoincanquin.

11

Lázaro mahuatai

¹ Betania jema janin ta Lázaro janeya joni jihuepahonishqui, jano María jahuen hohshi Marta betan jihuetai jeman. ² Jaa Marianen ta hahan hinintinin noquen hihbo tachixon jahuen boon tasonishqui. Jahuen roha cahen Lázaro. Lázaro cahen hihti hisini. ³ Hisinaiya ta jahuen chocabaan huetsa joni raannishqui:

—Min hahan shinanai joni ta hisiniqui, hihbon —yohihi canon. ⁴ Yohiha Jesusen yohiquin:

—Mahuanoxonma bi ta hisiniqui. Papa Dios nete hihbohi jisibo ta hisiniqui. Hea Papan baque xaba hihbohi honanahbo ta hisiniqui —jato jaquin Jesusen. ⁵ Jaabo ta Jesus hihti queenpahonishqui, Marta, jahuen huetsa, Lázaro rihbi. ⁶ Jan hisinai honanax bi janobi rabe neten hihribihi. ⁷ Rabe neten hihxon sca jahuen haxenicabo yohiquin:

—Judea main hahquirihbi canon bonahue —hahquin. ⁸ Jascahah:

—¿Rahma pishca mia janohahbaan macaman tsacaquin rehtecatsihquipi que bi min hahquirihbi caribcatsihquin, Maestron? —jahuen haxenicabaan Jesus jaquin.

⁹ —¿Huesti neten doce hora yamahiquin? Bariyahpan nichish tah non joxcorohyamahi, bari xaba jisish. ¹⁰ Yame nichish tah non joxcorohtai, jano nihti jisyamahax —jato jaquin.

¹¹ Jato jascajaxon:

—Noquen huetsa Lázaro ta hoxahihqui. Mohini tah hen cahi —jato jaquin.

¹² —Hoxahax ta hahquirihbi rohatihiqui, hihbon —hahcanquin jahuen haxenicabaan.

¹³ Lázaro mahuatipi Jesusen yohihi bi hoxaresai shinancanquin. ¹⁴ Jaa copi ta jato sirijaquin sca yohinishqui:

—Lázaro ta mahuatipishqui. ¹⁵ Jahuerohahi tah hen hea jano hihyamahipiqui, man honancoinnon. Man nincacoinnon hihquish ta hen jano cayamahipiqui. Jaabi, jisnon bonahue —Jesusen jato jaquin.

¹⁶ —Noque rihbi canon bonahue, hahbetan mahuanoxon —hahquin Tomasen, rabe nane hahcaibo Tomasen.

Jesus noquen teehimmanica

¹⁷ Nocoxon sca chosco neten sca tsahonipibo yohihibo Jesusen nincaquin. ¹⁸ Betania ta Jerusalem hochoma qui, media hora taken cahah. ¹⁹ Jaa copi ta janohax hihti caibo judiobo Marian xoboho bocannishqui, jano Marta betan María jihuetai xoboho. Jaton roha mahuatipi quen manahi bocani. ²⁰ Jesus nocoti jahui yohiha jaa behchihhi Marta cahi, xoboho María banenon. ²¹ Behchixon yohiquin:

—Mia neno hihquiya ta heen roha mahuayamaquehaniqui, Hihbon. ²² Jan mahuatipi que bi ta min Papa yocacai rahsi mia hahxontihiqui. Hen tah hen honanai —hahquin.

²³ —Roha ta huenirihbitihiqui —hahquin Jesusen.

²⁴ —Nete queyotaiya Papan noque Hueninahue hahca ta huenirihbiyahixhiqui. Hen tah hen honanai —hihqui Marta. ²⁵ Jesusen sca:

—Hea ta jato hueninica qui, teehimmanicah. Hea nincacoinai joni ta mahuatax bi teehirihbitihiqui. ²⁶ Jihuexon hea nincacoinai joni ta queyonox jascabi mahuatah jatimahiqui. ¿Mian min hea hihcointi shinanyamahin? —hahquin Jesusen.

²⁷ —Hen tah hen mia hihcointi shinanai, Hihbon. Mia tah min Cristo qui, Papan baque. Mia tah min naiho quehax jonichah qui. Min hihcointi tah hen shinanai —hahquin Martan.

Lazaroya Jesus huaohihqui

²⁸ Jascajaquin yohihax jahuen shara quenahi cahi. Nocoxon hexti pishca join jahuen shara yohiquin:

—Honanmanicah ta nococaiqui. Mia ta quenamahiqui —hahquin. ²⁹ Nincacax, hison huenicahuanax, picotax cahi. ³⁰ Jema janin cahen Jesus nocorihyamahi, jano Martan jaa behchitana janin banetahbahi. ³¹ Maria hison huenicahuanax picotai jisxon, Tshon janin ta huinihi cahiqui hihxon jaa manahibaan chibanquin.

³² Jesus janin María nocoxon, merahax, Jesusen tahe naman betihihpaqueti.

—Mia neno hihquiya ta heen roha mahuayamaquehaniqui, hihbon —hahquin huao-hihanen. ³³ Jaa huaohihquiya hahbe jahui judiobo rihbi huinihiya, jahuen jointi hihti xecahihniquin. Masa shinanscaquin.

³⁴ —¿Jahuen man tsahonipiquin? —jato jaquin.

—Jisihue, hihbon —hahcanquin. ³⁵ Jesus huaohihscai. ³⁶ Huaohihqui jisish:

—Jise. Hahan ta hihti shinanihqui —hahquin judiobaan.

³⁷ —¿Benche jismahipixon cahra nea rihbi mahuayamanon rohajati hahtipahyamaque-hahnipishquin? —hahcanquin caibaan rihbi.

Lázaro teehihribihi

³⁸ Jesus sca hahquirihbi jointi hihti xecahihnihax tsahon janin nocoti cahi. Tsahonxon macan champanin behpohipibo janin nocoti.

³⁹ —Macan janabohannahue —jato jaquin Jesusen.

—Neatian ta pisiscaiqui, hihbon. Chosco nete sca tah qui jan hihquipi —hahquin Martan, yamanicatón chocan.

⁴⁰ —¿Hihcoinaí shinanxon tah min noquen Papa nete hihbohi jistihí hen mia jayama-haquin? —Jesusen jaquin. ⁴¹ Jaatian sca macan janabohancanquin. Bochiqúi sca jisxon:

—Papan, hen yocacah tah min nincacai. Hahxon tah min hea jai. ⁴² Hen yocacai tihibi tah min nincacai. Hen ta honanai. Jaabi, nea neno nichibaan nincanon hihxon tah hen mia yohihi, mian min hea raanni hihcoinaí shinanahbo —hahquin. ⁴³ Jascaxon coshin bi res quenaquin:

—Lazaron, picohue —hahquin. ⁴⁴ Jaatian sca hihquipi joni picoti. Jahuen mequen, jahuen tahe chopá quexen yabi yabihah, payoman rihbi bebehpohipibo.

—Pecannahue, jan nihtatahnon —Jesusen jato jaquin.

Jesus bihnoxon yohinanaibo

(Mt 26.1-5; Mr 14.1-2; Lc 22.1-2)

⁴⁵ Jan Lázaro teehihmahí jisxon María manahí jahuí judiobaan sca hihti caiboxon nincacoinquin. ⁴⁶ Caibo rihbi jaton hapobo yohihi bocani. Nocoxon, Jasca ta jaaxqui, hahcanquin. ⁴⁷ Yohihah sacerdote hapobo betan fariseobo tsinquiti, hapobo rahsi.

—¿Rahma can? ¿Non jahuejatihin? Hoa jonin ta hahan honantijahiqui, hicha. ⁴⁸ Jan jascajaresnon non jahua hahyamahiya ta jatihixonbi jaa sca chibanyaxihcanihqui. Romanobo sca xoxon ta noquen janoxon Papa Dios yocati xobo pohastihiqui, noquen jihuetahbo rihbi ta noque bichinyaxihcanihqui —hahcanquin. ⁴⁹ Huesti joni sca jato tocan nihinati, Caifas janeya joni. Sacerdotebaan hapo hihxon jato yohiquin:

—Maton tah man jahuabi honanyamahi. ⁵⁰ Huetsa jonibo jihuenon huesti joni mahuatah ta siri qui. Noquen jihuetahbo jatihibi queyoyamanon jascatihi bi tah man honanyamahi —jato jaquin. ⁵¹ Hahmebi shinanxonma ta jascajanishqui. Jaa bari tian sacerdote hapo hihxon ta honanxonma bi jayaxihqui joi yohinishqui. Jaton caibo jihuenon Jesus mahuatíhi yohihi. ⁵² Jaton caibo res jihuetahbo Jesus mahuayamahi. Hocho hocho jihuetai Papan baquebo tsinqinnoxon cahen Jesus mahuati, jato huesti yorajanoxon. ⁵³ Caifas jascari yohuanipiya sca Jesus rehtenoxon yohinan yohinancani, jatihibi neten.

⁵⁴ Jaa copi ta judiobaan jisnonma sca jonetax Jesus nihnishqui. Janohax caresscai, chiponqui. Jano tsoa yamahi hochoma, Efrain janeya jeman sca nocoti. Jano baneti jahuen haxenicabo betan. ⁵⁵ Judiobaan pascua fiesta hochomascayia ta hocho jihuetai bo Jerusalem janin bocannishqui. Jaton rishta sohuamahi bocani, janin pascua fiesta noconon hihquish. ⁵⁶ Nocoxon Jesus benacandin. Papan xoboho hihquihax yohinancani:

—¿Fiesta janin jaa jotimahiquin? ¿Jahua min shinanain? —yohihahncani. ⁵⁷ Jasca jaibaan bi jaton hapobaan jato yohiquin:

—Jano jan hihqui honanxon, noque yohinahue, non porisia bihmanon —jato jaquin.

12

Jesus tachocai haibo

(Mt 26.6-13; Mr 14.3-9)

¹ Pascua fiesta joti seis nete pishinaiya cahen Betania janin Jesus joribihí. Jano Lázaro jihuetai jema, mahuatipi que bi jan hahquirihbi teehihmahipi. ² Jesus nocoscaiya piti-jacanquin, hichaxon piti. Martan cahen jato piti metexxonquin. Misaxon Jesus betan pihibo tocan sca Lázaro tsahoti. ³ Marian sca nardo hahan hininti pomo bocho bihxon Jesus tachiquin. Hihti copi, hahan hininti. Tachixon, jahuen boon sca tasoquin, jatihobi xobo hinin potonon. ⁴ Jaatian sca jahuen haxenica Judas Iscariote, Jesus paraxon bihmayaxihquiton yocaquin:

⁵ —¿Jenquetsahpahin jahuen hininti tres mil soles copi maromayamahaxquin, jahuaborajomabo sca hinannoxon? —jato jaquin Judasen. ⁶ Jahuaborajomabohon shinanxon copima jaan jato jascajaquin. Yometso hihxon copi jascajaquin. Jaa rihbi jaton coriqui coirannicahax ta jaton coriqui rihbi yometsohpahonishqui. ⁷ Jesusen sca Judas yohiquin:

—Jenehue. Hea mahuataiya hahan hea hininjati ta hea hininjaxonihqui, jenehue. ⁸ Mato janin ta jahuaborajomabo jascabi jatihiqui. Hea tah man yamayaxihqui —jato jaquin.

Lázaro rehtecatsihquibo

⁹ Jan jano hihqui honanax tsama bi res judiobo jaa jisi bocani. Jesus huestima bi Lázaro rihbi jiscatsihqui bocani, hihquipi que bi hahquirihbi huenihipi joni jiscatsihqui.

¹⁰ Jaa copi ta Lázaro rihbi rehteti shinanscannishqui, jaton hapobaan. ¹¹ Lázaro copi hichaxon judiobaan jato potabahinxon Jesus sca nincacoinaiboya ta jaton hapobo sinanishqui. Jaa copi ta Lázaro rihbi rehtecatsihscannishqui.

Jerusalen janin Jesus hihcohi

(Mt 21.1-11; Mr 11.1-11; Lc 19.28-40)

¹² Huetsa neten sca ta fiestajahi bohobo tsinquihhnanishqui. Fiesta janin ta Jesus jahuiqui hahquin yohihahbo nincacanquin. ¹³ Honanax binon pehi bihbahinax Jesus behchihí bocani. Quenacanahi bocani:

—Hosanná. Nete hihbaan raanai joni ta jahuiqui, israelibaan quiquin hapo. Papan shinanyahpa tah qui —hihcanahi bocani.

¹⁴ Jascahibaan bi cabacho baque merahax jaa cahtsahotax Jesus jahui. Jan jascanon ta huishani joi jaiqui:

¹⁵ Raqueyamanahue, Sion jema baquebon. Maton quiquin hapo ta jahuiqui, cabacho baque cahtsahotax.

¹⁶ Jaa huisha joi nincamenoxon ta jahuen haxenicabaan honanyamanishqui. Jan naiho cahipi cahchiqui ta jan jascayaxhnon huishani joi jai shinancannishqui. Jaatian pari ta honancannishqui, Jesusen hahyaxihqui jaabaan huishani honansaquin. ¹⁷ Caibo jascari quenacananon cahen caibaan yohibonaquin. Lázaro mahuatipi bi ta picohue hahxon jan hahquirihbi teehihmahí non jisipiqui hahbonaquin. ¹⁸ Papan coshiyaxon Jesusen jascajaquin hahquipi nincacax tsinquijaquetaibo jaa behchihí bocani. ¹⁹ Bohiboya sca:

—Jisnahue. Non tah non jahuabi hahyamahi. Jatihixonbi ta jaa chibancaniqui —hahcanquin fariseobaan sca.

Jesus benahi nahuabo

²⁰ Caibo fiesta janin bohobo ta jaton nahua quescapahbo sca janishqui. ²¹ Felipe cahen Betsaida jema janinhah, Galilea mai meha. Felipe qui caxon, jaa nahuabaan yocaquin:

—Noquen tah non Jesus jiscatsihqui, hapon —hahcanquin. ²² Andres yohihi sca Felipe cahí. Yohihax, Felipe betan sca cahí, Jesus yohihi. Yohihah bi:

²³ —Hea noquebaque Papan shinanya hihqui ta rahma jisnoxihcanihqui. ²⁴ Nincanahue hen mato yohinon. Main paqueyamahax ta bimi bero jaa huesti banetihqui, queyoyamahi. Banahoh queyotax pari ta bimi hicha caichihqui. ²⁵ Mahuapaho hihxon Papan joi bihcatsiyamahibo ta mahuatihiqui. Non main res jihuetah ta jahuama qui hihquibo ta queyoyamanox manatihqui, jihuecointi. ²⁶ Heen hahxontibo ta hea chibanti jaiqui. Jano hea hihquiton tah heen jonibo rihbi hihthiqui. Hea hahxonai jonibo qui rihbi ta heen papa siripi yohuan yaxihquiqui.

Mahuanoxihqui Jesusen yohihi

²⁷ Rahma tah hen masa shinanai. ¿Jahua hen yohitihin? ¿Janoxihquibo tiromabo hea cahnemahue Papan, hih hen jatihin? Hihyamahi. Hea janoxihquibo copi tah hen nea nete qui noconihqui. ²⁸ Papan, mia nete hihbo shinanahbo jahue —hahquin Jesusen. Jaatian naiho quehax yohuanai nincacanquin.

—Jascjaxon tah hen hahribitihí —hihqui. ²⁹ Hochomaxon nincacax tsamajaquetaibo yohuani:

—Terenhíh ta jaiqui —hihcani.

—Papan yonoti ta hahbetan yohuanihqui —hihqui caibo rihbi. ³⁰ Jesusen sca jato yohiquin:

—Maton honannon hihquish ta yohuanihqui, hean honannon hihquishma. ³¹ Mai mehabaan hohcha casticanti hora ta nocoscaiqui. Rahma ta mainxon yononica yoshin naman potapaquenoxihquiqui. ³² Hea jihuín hueonhíhnihipibo tah hen jatihibi jonibo hehqui jomatihí —jato jaquin. ³³ Jihuín hueonahbaan jan mahuanoxihqui honanahbo hihxon jato jascajaquin yohiquin. Tsamajaquetaibaan sca yocaquin:

³⁴ —Cristo roqui queyoyamanox manayaxihquiqui. Huishanihbo joi roqui jascari jai. ¿Jahua copi sca min Noquebaque ta hueonhíhnihxihcanihqui hah min noque jain? ¿Noquebaque min hihqui tosa quin? —hahcanquin. ³⁵ Jesusen jato yohiquin:

—Basimaxon sca tah man xaba jisti jenexihqui. Xaba chian nihnahue, jani yamenon. Bahquish chian nichí jonin ta jahuen nihti honanyamahihqui. ³⁶ Xaba jaxon jaa xaba nincacoinnahue, xabapan baquebo janoxon —jato jaquin. Jato jascajahax, caresscai, jaabaan jisyamascanon.

Nincacoinyamahi judiobo

³⁷ Jaton jisnon bi hicha hahan honanti jan hahcai bi nincayamacanquin. ³⁸ Papan joi yohinica Isaiasnen yohini quescapahbo:

¿Non yohihah bi tsoan nincacuihquin, hihbon? ¿Nete hihbaan jahuen coshi jato jismahah bi tsoan nincacuihquin?

hihqui jaa huisha joi. ³⁹ Jascapahboxon copi ta nincacoinyamaccannishqui. Huetsa joi rihbi ta Isaiasnen huishanishqui:

⁴⁰ Jaton beron jismis hihquish ta benchecahincaniqui. Jaton jointinin nincacoinmis hihquish ta jaton jointi xehpocahiniqui, hean jato rohajamis hihxon ta jaton shinan huetsajacanicui

hihqui. ⁴¹ Papan xaba jisxon ta jascajaquin Isaiasnen huishanishqui. Jasca ta Papa jaiqui jato japahonixon jascajaquin sca huishaquin.

⁴² Jaabi Jesusen yohihah hichaxon nincacoincanquin. Caibo jaton jonibaan rihbi nincacoinquin. Nincacoinxon bi fariseobo qui raquexon tsoabi yohiyamacanquin.

—Tsoanbi noque yohuanquihnyamascanon noquen tsinquiti xoboho noque mapeyamascannmis —hihcani. ⁴³ Papan hea siri jisnon yohipan hihtihi bi hapobaan hea sirijaquin yohuanquihnon tsoabi yohiyamapan hihxon yohiyamacanquin.

Nincayamahiboya Papan jato casticanyaxihqui

⁴⁴ Jaabo netetai bi coshin bi res Jesus yohuanai:

—Hea nincacoinax hinamehtaibo ta hehqui hinamehyamahiqui. Hea raanni qui caya ta hinamehtiqui. ⁴⁵ Hea jisi jonin ta hea raanni rihbi jisiqui. ⁴⁶ Jato xabajahi tah hen nai naman joniqui, hehqui hinamehtaibo bahquish chian baneyamanon. ⁴⁷ Hea nincacoin bi nincaresaibo tah hen heanbi casticanyamahi. Mai mehabo casticannoxonma bi tah hen jato teehihmahoni. ⁴⁸ Hea Johue hahyamaxon, heen joi rihbi nincacatsihyamahibo ta honantiyahpabo qui. Hean yohihi joi ta hahan jascapahbo honanti qui, nete queyoscaiya. ⁴⁹ Hehmebi shinanax ta hen yohuanyamahi. Hea raanni heen papanbi ta hea yohihiqui. Jascari yohuanhue, jaa yohihue hea jaquin. ⁵⁰ Jahuentianbi queyoyamanox manati jato jihuemahue hih ta jaiqui. Jaa copi ta heen papan hea yohihi quescabijaquin hean mato yohihi —jato jaquin Jesusen.

13

Jahuen haxenicabo Jesusen tachocai

¹ Pascua fiesta nocorihyamahi bi mai jenebahini Papa qui cati sca jan jai Jesusen honanquin. Jahuen jonibohon shinanxon mahuanoxon caman jatohon shinanquin.

² Pascua piti piriyamahiboya cahen Judas, Simon Iscariotenin baque, tiroma yoshiman bihxon tiroma shinan jahuen jointi janin niascaquin, Jesus parannon bihmanoxahnon.

³ Pascua piti pihi tsinquiscacani, Jesus jahuen haxenicabo betan. Mian sca jato jatihibi hihbojahue Papan jai cahen Jesusen honanquin. Jahuen Papa janinhax jonish bi hahquirihbi hahqui cahen honanrihbiquin. ⁴ Misa janinhax huenixon sca jahuen tari potahax hani payoman chinexehti. ⁵ Bandeda qui jene chicoxon jahuen haxenicabo tachoquin. Tachoxon hahan jan chinexehtai payoman sca jato tasoquin. Jascajaquin jato tachopaquequin.

⁶ Simon Pedro qui nocoquihranscai.

—¿Hea rihbi min tachocatsihquin, Hihbon? —hahquin Simoman.

⁷ —Hen mia tachoca jahua hihcatsihquiquin, rahma honanxonma bi tah min huetsa tian pari honanyaxihqui —hahquin Jesusen.

⁸ —Hea tah min jahuentianbi tachotimahi, hihbon —hahscaquin Pedronen.

—Hen mia tachoyamahah tah min henama sca jatihi —hahquin Jesusen.

⁹ —Hea tachoxon mepanxon manashimarihbihue, Hihbon —hahscaquin Simon Pedronen.

¹⁰ —Nashitanax ta tsoabi nashiti pishinyamascaiqui, tachoquiti huesti pishini, jatihobi rishtama sca hihnoxon. Mato tah man rishtajomaboscai, hihcax bi jatihibima —jato jaquin Jesusen. ¹¹ Jesus parannoxihqui joni honanxon copi jato jascajaquin, jatihibima jaquin. ¹² Jato tachoquin queyoxon jahuen chopa sahuerihbihax jahuen tsahotinin tsahopaquexon jato yocaquin:

—¿Jahua man haxenon hihxon hen mato tachocain? ¿Man honanyamahin? ¹³ Hihbon, Honanmanican, hah tah man hea quenaquin jai. Hahcoquin. Jaa tah hen qui. ¹⁴ Maton hihbo, mato honanmanicah rihbi hihxon bi hean mato tachocaiya tah man maton rihbi joni huetsa tachotih. ¹⁵ Hen hahcai jisxon man jascajaribinon tah hen mato jismahahqui. ¹⁶ Mato tah hen yohicoinal. Yonoti ta jahuen hapo mentan hashoan tee hihboma qui. Raana joni rihbi ta jaa raanai joni mentan hashoan yohuan hihboma qui. ¹⁷ Nea hen

mato yohihi joibo honanxon, hen mato yohihi quescabijahax tah man hahan jenimati jaresscayaxihqui.

¹⁸ Mato jatihibi qui tah hen yohiyamahi. Heen caisaibo tah hen honanai. Papan huishamani joi jai quescabi ta janoxihqui. Heen paan pihhi jonin ta jotsistonen hea jamaquihqui hihqui jaa huisha joi. ¹⁹ Janoxihquibo jaryyamahi bi tah hen mato rahmabi yohihi, jaressca jaiboya man hea hen qui man honannon. ²⁰ Hen mato yohinon nincanahue: hean raanah cahax nocotaiton mato johue hahcaibaan ta hea rihbi johue hahquiqui. Johue hea jaibaan ta hea raanni rihbi johue hahquiqui.

Judasen bihmanoxihqui Jesusen yohihi
(Mt 26.20-25; Mr 14.17-21; Lc 22.21-23)

²¹ Jato jascajaquin yohixon masa shinanxon jato yohicoinquin:

—Man honannon hihxon tah hen mato yohihi: mato tocan tsahotai huestichin ta hea paranxon bihmanoxihquiqui —jato jaquin. ²² Jahuen haxenicabo bejisahtanani.

—¿Tsoa yohihiquin? —shinancanquin. ²³ Hahan Jesus queenai jahuen haxenica cahen Jesus senenbi tsahoti. ²⁴ Simon Pedron sca jaa cohan cohan hihxon:

—¿Tsoa yohihiquin? Yocahue —hahquin. ²⁵ Jesus senenbixon yocascaquin:

—¿Tsoa hin, Hihbon?

²⁶ —Nea paan tequen netinxon hen hinanai joni tah qui —hahquin Jesusen. Jascaxon paaman netinxon Judas hinanquin. Simon Iscariotenin baque can, Judas. ²⁷ Paan teque bichiton jahuen jointi Satanasnen hihbojaquin.

—Hoa min hahcatsihqui hahtanhue, Judasen, histon —hahquin Jesusen. ²⁸ Jahua yohiquin jascahiquin misa janin tsahotaibaan honanyamaquin.

²⁹ —Noquen coriqui coiranai copi rah ta hahan fiestajati piti non pishinai marotanhue hahquiqui —shinanquin caibaan.

—Jahuaborajomabo coriqui hinantanhue hah ra ta jaiqui —shinanquin caibaan rihbi.

³⁰ Hahtanhue hahca jahuen paan bichish Judas caresscai, yamescai bi.

Behna joi

³¹ Caresscaia Jesusen jato yohiquin:

—Hea noquebaque nete hihbo hihqui ta rahma jisnoxihcanihqui. Jisquin ta noquen Papa rihbi nete hihbo hihqui jiscantihiqui. ³² Hea jisxon Papa Dios nete hihbo hi honanaiboya ta nete hihbo hihxon jato jismatihiqui, jahuen baque rihbi nete hihbo hi honanahbo. Rahmabi ta jascajatihiqui. ³³ Basima bi res tah hen mato betan hihtihhi, heen baquebaan. Man tah man hea benayaxihqui. Hen judiobo yohihipi quescajaquin ta hen mato rahma yohihi. Hea jano cahiton tah man cati hahtipahtimahi. ³⁴ Joi behna ta hen mato yohihi. Nincanahue. Joni huetsahon shinannahue, hean hen matohon shinanai quescajaquin. Joni huetsahon shinannahue. ³⁵ Man joni huetsahon shinanaia ta heen haxenicabo mato qui jatihixonbi honancantihiqui —jato jaquin.

Jesus qui Pedro paramexihqui
(Mt 26.31-35; Mr 14.27-31; Lc 22.31-34)

³⁶ —¿Jahuerahnon min canoxihquin, Hihbon? —hahquin Simon Pedronen.

—Hen jano cahiton tah min rahma chibantimahi. Huetsa tian tah min hehchon catihi —Jesusen jaquin. ³⁷ Pedronen yocaquin:

—¿Jahua copi hen mia rahmabi chibanti hahtipahyamahin? Hea rehtecatsihquibo que bi tah hen mia jenetimahi —hahquin.

³⁸ —¿Mia rehtecatsihquibo que bi min hea jenetimahin? Nincanahue, hen mia yohinon: hatapa queorih jaima bi tah min quimisha coti heen joni hihtima min yohinoxihqui.

14

Jesus Papa qui cahi bahi siri

¹ Masa shinanyamanahue. Papan joi nincacoinnahue. Hea rihbi nincacoinnahue. ² Heen papan jihue janin ta xobo hicha qui. Yamahiya cahen Mato ta hen jihueticaxoni cahi hen jayamahan. ³ Caxon mato jihueticaxonax tah hen joribiyaxihqui, mato bichi sca. Hea jano hihquiton man mato rihbi hihnon tah hen mato bichi joyaxihqui. ⁴ Hahan hean cahi bahi tah man honanai —jato jaquin.

⁵ —¿Jahuen min cahin? Non tah non honanyamahi, Hihbon. ¿Jenquetsahaxon non mia jano cahi bahi honantihin? —hahquin Tomasen.

⁶ —Hea ta Papa qui cahi bahi qui. Yohuani hihcoina joi tah hen qui. Hahan jihueta ta hea qui. Hea jano hihquiton cayamahax ta tsoabi Papa qui nocotimahiqui. ⁷ Hea honanxon tah man heen papa rihbi honanquehanai. Rahma tah man honanscai. Jaa tah man jisiqui —jato jaquin Jesusen.

⁸—Noquen Papa noque jismahue, Hihbon. Jaa res tah non queenai —hahquin Felipenin.
⁹—¿Yotihixonpahi hen mato betan hihqui bi min hea honanyamahin, Felipin? Hea jisi jonin ta heen papa jisiqui. ¿Jahua copi min hea Noquen Papa noque jismahue hah min jain? ¹⁰Jano heen papa hihquiton tah hen hea rihbi hihqui. Hea janin ta heen papa rihbi hihquiqui. ¿Min hihcoin shinanyamahin? Hen mato yohihi tah hen heanbi shinannon mato yohiyamahi. Hehbe hihxon ta heen papan jahuen tee hahquiqui. ¹¹Heen papa betan tah hen qui, hehbetan rihbi heen papa hihqui. Hea hihcoinai shinannahue. Yohihah copi res shinanyamaxon, heen tee jisxon copi hihcoinai shinannahue. ¹²Mato ta hen yohicoinai: hen hahcai teebo ta hea nincacoinai jonin rihbi hahtihiqui. Hen hahcai hahxon bi ta hashoan hanibo rihbi hahtihiqui, hea heen papa qui cahiya sca. ¹³Jatihibi man heen janen yocacai tah hen hahxontihhi. Heen papa nete hihbo hi honanahbo tah hen hahxontihhi, jahuen baque hihxon. ¹⁴Man heen janen yocacai jatihibi tah hen mato hahxontihhi.

Dios Yoshin jan noque hinantihhi

¹⁵Hehon shinannon tah man hen mato yohihi man hahtihhi. ¹⁶Hean rihbi tah hen heen papa yocatihi, huetsa yanapannica jan mato hinannon. Jaa ta jascabi sca mato betan jatihiqui. ¹⁷Jaa ta yohuancoinai hihbo qui, Dios Yoshin. Jaa jisymaxon ta mai mehabaan jaa bihtimahiqui, jaa honanyamaxon copi rihbi. Maton tah man jaa honanai. Mato betan ta hihresscaiqui. Mato chicho rihbi sca ta yaxixihquiqui. ¹⁸Jaabiyahpa cayama ta jai. Joribiyaxon tah hen cahi. ¹⁹Mai mehabaan hea jisymaxon caman ta basima sca qui. Jaabaan hea jisymaxon bi tah man maton hea jistihhi. Hea jihuetai copi tah man mato rihbi jihuetai. ²⁰Jaatian tah man honantihhi, hea heen papa betan hihqui, mato rihbi hehbetan hihqui, hea rihbi mato betan hihqui. ²¹Hen yohihi honannon nincacoinaibaan ta hehon shinannicabo qui. Hehon shinanaibohon ta heen papan rihbi jatohon shinanihqui. Hean rihbi hen jatohon shinanai. Jaabaan hea honannon hihxon tah hen heen yora hean jato jismatihhi —jato jaquin Jesusen.

²²Judasen sca yocaquin (Iscarioteninma, huetsa Judasen):

—¿Jenquetsahaxon min noque miabi jismatihhin, mai mehabaan mia jisnonma? — hahquin.

²³Jesusen yohiquin:

—Hehon shinanaibaan ta heen joi bihtihiqui. Jatohon ta heen papan shinantihiqui. Jato qui cahax tah non hahbetanbi jihuetai. ²⁴Hehon shinanyamahi jonin ta heen joi bihyamahiqui. Hen mato yohihi joi ta henama qui. Hea raanni heen papanah ta qui. ²⁵Mato betan nihparixon tah hen mato yohihi. ²⁶Dios Yoshin sca ta mato yanapannicah qui. Jaa ta heen janen heen papan raanyaxihquiqui, jatihibi joi mato honanmanon. Hen mato yohipahoni joi jatihibi ta mato shinanmayaxihquiqui.

²⁷Hahan jihuetai siri mato hinanbahini tah hen cahi. Heen hahan sirijaquin shinanti tah hen mato hinanai. Mai mehabaan hinanai quescajayamaquin tah hen mato hinanai. Masa shinanyamanahue. Raquyamanahue. ²⁸Caresscaax ta hen jorihbiyaxihqui hen mato jaah tah man nincacahqui. Heen papan ta hea mahuinihqui. Hehon shinanax cah man jenimahan, heen papa qui hea cahiya. ²⁹Janoxihquibo tah hen mato yohiscaáqui, jarescaiboya man hihcoinai shinannon.

³⁰Mato betan tah hen basi yohuanyamascatihi. Mai mehabo yoshin hihbo ta jahuiqui. Hea ta jahuejati hahtipahyamahiqui. ³¹Jaabi tah hen heen papahon hea queenai mai mehabaan honannon hihxon heen papan hea yohihi quescan hean jai. Hueninahue. Caresscanon bonahue.

15

Bimiyahpa mebibu

¹Hea ta bana jihui yora coin quescapah qui. Heen Papa cahen huai hihbo. ²Jatihibi heen bimijoma mebibu ta jaan mextehiqui. Bimiyahpa mebi jatihibi ta boxtepaquehiqui, hashoan bimi hichanon. ³Mato tah man boxtehaahscaqui. Hen mato yohiha join ta Papan mato boxtehihqui. ⁴Jahuen jihui yora jahuen mebin jenebahintimahi quescan hehbetan jascabihi janahue. Hea rihbi tah hen mato betan jascabihi jai. Mebi ta hahmebi bimiti hahtipahyamahiqui; jahuen yora qui rechihah pari bimihi. Mato jascarihibihi; hehbetan hihiyahahax cahen jahuabijomabo mebibu.

⁵Hea tah hen jihui yora quescapah qui, mato cahen heen mebibu. Jahuen yora janin jahuen mebi rechitax hicha bimiyahpa hihqui quescajaquin tah man hehbetan hicha hahtihhi. Hehbetan hihiyahamaxon cah man jahuabi hahtimahi. ⁶Hehqui rechitaima mebibu ta huai hihbaan mextexon potatihiqui mebi choshihi quescanon. Shinannahue: mebi choshiho ta tsinquixon mapojacanihqui.

⁷ Rechitax quescax man hehbetan jihuexon, heen joi rihbi maton jointi janin hihquiya tah man man queenai jatihibi yocatihi, hen mato hahxonnon. ⁸ Hicha bimiyahpabo quescaxon man hicha noquen Papa hahxonaiya ta mato jisxon, heen Papa nete hihbohi jonibaan honanyaxihcanihqui. Jascapahbo tah man heen haxenicabo jatihi. ⁹ Heen papan hehon shinanxon hahxonai quescajaribiquin tah hen hean rihbi matohon shinanxon hahxonai. Hen mato hahxonnon jascabijaquin nincacoinnahue. ¹⁰ Heen papan hea yohihi quescabijaquin tah hen jai, jaa queenai quescabijaquin hea hahxonnon. Jascajaquin rihbi man hen mato yohihi quescabijaquin jaiya tah hen hea queenai quescabijaquin hen mato hahxontih.

¹¹ Hea jenimahi hihqui quescari man mato rihbi jenimanon hihxon tah hen mato yohihi, man hinti jenimanon. ¹² Nea tah hen mato yohihi: matohon hean shinanai quescajaribiquin maton rihbi joni huetsahon shinannahue. ¹³ Noquen hahbe rabetibohon hihti shinanxon tah non mahuanoxon caman jato hahxonquin yanapanthi. Jascapa hahxonnicah ta tsoanbi hahxonquin mahuintimahiqui. ¹⁴ Hen mato yohihi quescajaquin hahcaibo tah man heen hahbe rabetibo qui. ¹⁵ Mato tah hen “heen jonibon” hahyamascai. Jahuen hihbaan hahcai ta jahuen jonin honanyamahihqui. Jatihibi heen papan hea yohipahoni mato honanmaxon copi tah hen mato “heen hahbe rabetibon” hahcai. ¹⁶ Hea man caisnima bi tah hen hean mato caisnihqui. Caisxon tah hen mato janescai, man hicha hahqui canon. Man hahcai queyoyamanox mananon tah hen mato raanai. Jascapahboxon man yocacai jatihibi noquen papan mato hahxonnon tah hen mato raanai. ¹⁷ Joni huetsahon man shinannon hihxon tah hen jascajaquin mato yohihi.

Jesusyabi noque jistahimajayaxihquibo

¹⁸ Mai mehabaan mato jistahimahiya honannahue: hea pari ta jistahimacanishqui, mato chini sca. ¹⁹ Mai mehabo man hihquiya cahen mai mehabo matohon queenquehan, jaton caibo copi. Jascapahboma tah man qui. Mai mehabo hihyamascanon tah hen mato caisnihqui. Jaa copi ta mai mehabaan mato jistahimahihiqui. ²⁰ Hen mato yohiha joi shinanbehnoyamanahue. Yonoti ta jahuen hihbo mentan hashoan yohuan hihbo hihyamahiqui. Hea tiromajacatsihquin hea chibannixon ta mato rihbi sca chibanyaxihcanihqui. Heen joi nincanixon ta maton joi rihbi nincayaxihcanihqui. ²¹ Hea raanni heen Papa honanyamaxon ta mato tiromajayaxihcanihqui heen jonibo man hihqui copi.

²² Hen jato yohiyamahah cahen hohchayahpaboyamahan. Hean yohihah copi ta Honanyamahax tah hen hohchanihqui jati hahtipahyamascaniqui, hohchanihxon. ²³ Hea jistahimahi jonin ta heen papa rihbi jistahimahihiqui. ²⁴ Tsoan jascajani que ma bi tah hen Papan coshiyaxon jato hahxonpahonihiqui. Jato tocan hen hihyamahiya cahen hohchayahpabohiyamahan. Hen jato hahxonai jisxon bi ta heen papayabi hea jistahimacaniqui. ²⁵ Papan huishamani joi janin ta nea jaiqui: Jahua copima bi ta hea jistahimarescaniqui. Jaa joi jai quescabi ta jacanihqui.

²⁶ Mato yanapannicah sca tah hen heen Papa janinxon mato qui raanyaxihqui. Jaa ta yohuancoina hihbo qui, Dios Yoshin. Papa janinhax jahuex ta hehqui yohuancoinyaxihqui. ²⁷ Hen haxemamenoni tian hea nincanish tah man rahma caman haxehi hehbetan nihnicahbo qui. Jaa copi tah man mato rihbi heya joihi yohuancointi jai.

16

¹ Hea jeneti shinan tsoanbi mato hinanyamanon hihxon tah hen nea rahsi hen mato yohihahqui. ² Jaton tsinquiti xoboma qui ta mato potayaxihcanihqui, tsoanbi mato yohuanquihnyamascanon hihxon. Mato rehtehibo ta Mia rehtequin Papa Dios hahxonpan hihnicahbo rahsi jatihiqui. ³ Heen papa honanyamaxon ta hea rihbi honanyamaxon jascayaxihcanihqui. ⁴ Nea hen mato yohihi quescax jarescaiya Noque ta yohinishqui hihyaxahnahue. Man honannon hihxon tah hen mato yohihi.

Dios yoshiman tee

Mato manati hahtipahparixon tah hen mato honanmamenoxon jaa joi mato yohiyamanihqui. ⁵ Hea raanni heen Papa janin sca tah hen canoxihqui. Hen canoxihqui bi tah man Jahuen min canoxihquin hea jayamahi. ⁶ Jascajaquin hen mato yohihah copi tah man jointinin benatihi. ⁷ Man benatai bi tah hen mato yohicoina. Hea cahah ta siri qui. Hea cayamahiya cahen mato yanapannica joyamahi. Caxon ta hen raantihi, mato qui jonon. ⁸ Joxon ta jatihibi jonibo honancoinmatihiqui, jahua tiroma quin, jahua siri coin quin, jahua Papan casticantihiquin, jato honanmaquin. ⁹ Hea nincayamahibo copi ta jaton hohcha copi Papan jato casticanyaxihqui jato honanmatihiqui. ¹⁰ Heen papa qui hea cahiya man hea jisymascai copi ta jahua siri coin quin hihxon jato honanmatihiqui, jihueti honanahbo. ¹¹ Mai meha hihbojanica yoshin casticanti jarescai copi ta tiromabo copi Papan casticanyaxihqui jato honanmatihiqui.

¹² Mato yohiti hicha pari jai bi tah man rahmabi nincati hahtipahyamahi. ¹³ Joxon ta yohuancoinai hihbaan mato jatihibi hihcoina joi honanmayaxihquiqui. Hahmebi shinanxonma bi ta Papan yohiha jan nincacai joibo mato honanmayaxihquiqui. Joyaxihquibo rihbi ta mato yohiyaxihquiqui. ¹⁴ Hea nete hihbohi honanahbo ta yohiyaxihquiqui. Hean yohihi joibo bihxon ta jaan mato honanmayaxihquiqui. ¹⁵ Heen papanahbo jatihibi ta henabo qui. Jaa copi tah hen mato yohihahqui, hean yohihi joibo bihxon ta jaan mato honanmayaxihquiqui hahquin.

Benatax bi jenimacahinti shinan

¹⁶ Man hea jisquin jenenon ta nea pishca sca jaiqui. Basima tahni hea jisymascaipixon tah man hea hahquirihbi jis yaxihqui —Jesusen jato jaquin. ¹⁷ Caibo sca jahuen haxenicabo yohinani:

—¿Jan yohuanai jahua hihquiquin? Man hea jisquin jenenon ta nea pishca sca jaiqui. Basima tahni hea jisymascaipixon tah man hea hahquirihbi jis yaxihqui. Hea heen papa qui cahiya jan hihqui bi ¿jahua yohihi jascarihquin? ¹⁸ ¿Basima sca jan hihqui bi jahua hihcatsihquiquin? Jan yohihi tah non honanyamahi —hihcani.

¹⁹ Yocatsihquibo hih honanxon Jesusen jato yohiquin:

—Man hea jisquin jenenon ta nea pishca sca jaiqui. Basima tahni hea jisymascaipixon tah man hea hahquirihbi jis yaxihqui hen mato yohihah copi ¿jaa jahua hihcatsihquiquin hah man yocacahanan jayamahin? ²⁰ Hen mato yohinon nincanahue: man tah man huinitih, huaohihqui, mai mehabo jenimanon. Bena benatax bi tah man hihti jenimaribitih. ²¹ Jahuen baquexo bihti nete nocotaiya ta hisinxon jahuen baque caincatsihquin haibaan masa shinanihqui. Jahuen baquexo bihresscaxon sca ta jan masa shinanah shinanbehnoscaiqui. Joni behna noquen neten jahui copi jenimahi. ²² Mato jascarihbihi. Rahma masa shinanax bi tah man jointinin jenimayaxihqui, hen mato hahquirihbi jisiya. Man jenimahi yohuan ta tsoanbi mato bichintimahihqui.

²³ Jaa neten tah man hea jahuabi yocayamayaxihqui. Man honannon hihxon ta hen yohihi: man queenaibo man heen janen noquen naihoh queha Papa yocacah ta mato hinanyaxihquiqui. ²⁴ Rahma caman tah man jahuabi heen janen yocayamahi. Yocanahue. Jenimanxon tah man bihtih.

Mai mehabo Jesusen cahnetimahi

²⁵ Papan jihuemati ta jascapah qui hahxon tah hen mato haxemapahoniqui. Huetsa tian tah hen jaa patax queha joi mato yohiyamascatih, heen Papan joi mato yohiquin sirijascaquin. ²⁶ Jaatian tah man heen janen yocayaxihqui. Mato qui tah hen noquen Papa yocaxonyaxihqui hah ta hen jayamahi. ²⁷ Man hehon shinanxon heen papa janinhax hea joni man shinancoina copi ta matohon shinanihqui. ²⁸ Heen papa janinhax tah hen joniqui. Naihoh quehax jonish tah hen hahquirihbi heen papa qui cah, mai mehax sca —jato jaquin. ²⁹ Jahuen haxenicabaan sca yohiquin:

—Rahma caya tah min yohiquin sirijahi, jaa patax queha joima. ³⁰ Mian tah min jatihibi honanai. Noquen tah non honanscai. Jahuabi yocacahitima sca tah non jai. Non tah non honanscai. Jaa copi tah non hihcoina shinana, Mia tah min Papa Dios janinhax joniqui —hahcanquin. ³¹ Jesusen jato yocaquin:

—¿Man rahma nincacoinscain? ³² Hea huesti hihnon tah man jabacahini cahax jabinoxihqui. Jaabi tah hen hea huesti hen banetimahi, heen papa ta hehbetan hihtihiqui. ³³ Heen shinan bihxon man shinanquin sirijanoxahnon hihxon ta hen mato yohihahqui. Mai mehax tah man hohmis hohmisyaxihqui. Jascarax bi jenimanahue. Mai mehabo ta hen namanjasca jai.

17

Jahuen haxenicabo Jesusen yocaxonai

¹ Jato jascajaquin yohixon nai bejisahnan sca yohiquin:

—Hen tah hen janquenascai, Papan. Hea miin baque nete hihbohi jato honanmascah, mia nete hihbohi honanahbo, hean rihbi jato honanmanon. ² Hen mia hinana jatihibi teehihmanoxon jatihibi yorayahpabo hihbojahue hah tah min hea janiqui. Jahuentianbi queyoyamanox manati jihuetahbo tah hen jato teehihmascatih. ³ Mia huesti tah min Papa Dios coin qui. Queyoyamanox manataibo ta mia honanax jihuetaibo qui. Mia honanxon, hea mian raanni Jesucristo rihbi honanax ta jihuecoinnicabo qui.

⁴ Hen hahxonnon min hea hinanni tee queyoxon tah hen mainxon hen mia nete hihbohi jato jismapahonihqui. ⁵ Mai tsahonriyahmahax bi tah hen mihbetan nete hihbo hihquish xabanihqui. Mia jano jaiton sca hea rihbi nete hihbohi jisibo heen xaba jato jismahue, Papan.

⁶Min hea hinanni mai meha jonibo tah hen noquen Papa jenquetsahpa quin hahxon jato honanmaniqui. Minabo tah min hea hinannihqui. Miin joi ta bihresscacanishqui. ⁷Min hea hinanni joibo jatihibi ta mina qui. Jaa ta honanscacanishqui. ⁸Min hea hinanni joi hean jato hinanah ta honancaniqui. Jaa bihcoinxon ta mia janinhax hea joni honancoincaniqui. Mian min hea raanni ta hihcoinjaquin shinancoincaniqui.

⁹Jaabo ta hen yocaxonai. Mai mehabo yocaxonmi bi tah hen min hea hinannihbo hen yocaxonai. Jaabo ta mina qui. ¹⁰Henabo jatihibi ta mina qui. Minabo jatihibi rihbi ta hena qui. Jaabo heen shinanyahpabo quen ta hea nete hihbohi honancantihiqui, mai mehabaan.

¹¹Rahma tah hen mai mehabo tocan hihyamascai. Jaabo res ta mai mehabo tocan hihquiqui. Mihqui tah hen cahi. Hahan min hea janeni miin janen jato coiranhue, jaabo huesti hihnon, noque rabe non huesti hihqui quescarihibi. ¹²Jato betan hihxon tah hen min hea hinanni miin janen jato coiranpahoniqui. Hean jato coiranah ta tsoabi manoyamahihqui. Nincayosma tiroma huesti res ta manotihqui, huishani joi jai quescabi janon.

¹³Mihqui sca tah hen cahi. Mainxon tah hen nea joibo mia yohihi, hea jenimahi hihqui quescarahbo. ¹⁴Miin joi tah hen jato yohiscaniqui. Hea mai mehama hihqui quescarihibi ta jaabo mai mehaboma quen mai mehabaan jato jistahmahihqui. ¹⁵Mai janinha jato tsecahue hah ta hen jayamahi. Tiroma yoshiman jato jahuejayananon jato jisxanhue hahquin tah hen jato yocaxonai. ¹⁶Hea mai mehama hihqui quescarihibi ta jaabo mai mehamabo qui. ¹⁷Nincacointi shinan jato hinanxon hihcoina joi jato mequexonhue. Miin joi ta jaa joi qui, hihcoina joi. ¹⁸Mian min hea mai mehabo tocan raanni quescarihibiquin tah hen jato raanscai mai mehabo tocan canon. ¹⁹Hihcoina joi honanxon mihqui hinamehxon teneti shinan bichibo tah hen jaton hohcha copi hen hinamehtai.

²⁰Jaabo res ma tah hen yocaxonai. Jaabaan sca yohihah hea nincacoinyaxihquibo rihbi ta hen yocaxonai. ²¹Jaabo jatihibi huesti yora hihnon, mia hehbetan hihqui quescari, hea rihbi mihbetan hihqui quescarihibi, noque betan jaabo huesti yora jihuenon. Non jascaraiya ta mian min hea raanni honancoinyaxihquiqui jonibaan. ²²Min hea hinanni coshi shinan tah hen jato hinanrihbinihqui, jaabo huesti hihnon, noque non huesti hihqui quescarihibi. ²³Jato betan tah hen jihuetai. Hehbetan rihbi tah min jihuetai, jaabo rihbi huesti yora siripi jihuenon. Jascaraiya ta min hehon hihti queenai quescarihibi, hea raanax min jatohon hihti queenai mai mehabaan honanyaxihquiqui.

²⁴Jano hea jaiton min hea hinanni jonibo rihbi jati tah hen queenai, Papan, nete jariyamanon hehon queenxon min hinanni coshi jisibo. ²⁵Mai mehabaan mia honanyamahi bi tah hen hean mia honanai, Papan. Hea min raanni rihbi ta heen jonibaan honanishqui. Mian tah min pontejaquin shinanai. ²⁶Hahxonnica Papa siri min hihqui jato honanmanixon bi tah hen jato honanmarihibitih, min hehon queenxon hahxonni quescarihibiquin jatohon shinanxon min jato hahxonnon. Hea rihbi jato betan hihnonxon tah hen jato honanmanoxihqui.

18

Jesus bichibo

(Mt 26.47-56; Mr 14.43-50; Lc 22.47-53)

¹Jascaxah jahuen haxenicabo betan cahax Cedron janeya texpa pohquetax jano huai jaiton cahi. ²Jesus bihmacatsihqui Judasen ta jaa huai honanrihbinihqui, jaa huai chian jahuen haxenicabo betan Jesus cahiya cahen jaa rihbi jano capahoni. ³Jano Jesus cahi honanxon sontarobo sca benaxon sacerdote hapobo janin porisiabo rihbi benaxon jaa huai chian jato hioquin. Caibo johueyahpabo, caibo ramparinyapabo, jaton jashiya bocani. ⁴Huai chian nocotaiton Jesusen jato behchiquin. Jahuejanoxihquibo jatihibi honanax, jato behchihhi cainxon yocaquin:

—¿Tsoa man benahin? —hahquin.

⁵—Nazaret janinha Jesus rahan —hihcani.

—Hea ta hen qui —hihqui Jesus. Jesus bihmanica hihquish Judas jato betan nichu.

⁶Hea ta hen qui Jesus jaiya jaabo chitihhrenenax paqueti miracahrenenani.

⁷—¿Tsoa man benahin? —jato jaribiquin.

—Jesus Nazaret janinhah rahan —hihcani.

⁸—Hea ta hen qui hih ca hen jai sen. Hea benaxon heen jonibo jenenahue, botanahbo —Jesusen jato jaquin. ⁹Min hea hinanni jonibo tah hen ni huestibi manomayamahi jan yohihah quescabi janon hihxon jascajaquin. ¹⁰Simon Pedronen sca machito jaxon,

tsecaxon, sacerdotenin joni reraquin bi mecayaho res paxtebahinquin. Malco ta jaa jonin jane qui.

¹¹ —Miin machito bexojahue. ¿Heen papan hea jascajahue hahca hen hahtimahin? — Jesusen Pedro jaquin.

Jaton hapobo janin Jesus bohobo

(Mt 26.57-58; Mr 14.53-54; Lc 22.54)

¹² Jaatian sontaro hapon yohihah porisiabo betan jahuen sontarobaan Jesus bihtanxon menexcanquin. ¹³ Menexxon Anasen xobo janin pari bocanquin. Anas cahen Caifasnen coca. Caifas cahen jaa bari tian sacerdote hapo hihpahoni. ¹⁴ Caifas ta Huetsa jonibo jihuonen huesti joni mahuatah ta siri qui hihnicah qui.

Jesus qui Pedro paranahti

(Mt 26.69-70; Mr 14.66-68; Lc 22.55-57)

¹⁵ Anasen xobon bohiboja pari ta huetsa jahuen hahbe haxenica betan Simon Pedronen jato chibanbonanishqui, Jesus bohiboja. Jahuen hahbe haxenica ta sacerdote hapon honannishqui. Jaa copi ta sacerdote hapon xoboho mapetaiboya jemanhihti janin jahuen hahbe haxenica hihconishqui. ¹⁶ Jaa hihcohi bi jemanhihti xehqui senenbi Pedro banereneni. Jahuen hahbe haxenica sca sacerdote hapon honanai joni hihquish picoxon xehpoti coirannica haibo yohixon Pedro hihcomaquin, jemanhihti janin. ¹⁷ Jemanhihti janin nichiton sca xehpoti coirannica haibaan Pedro yocaquin:

—¿Mia rihbi min jahuen haxenicama quin? —hahquin.

—Jaama ta hen qui —hihqui Pedro. ¹⁸ Matsihiya sca cahen hapon jonibo betan porisiabaan chihi requenjaquin. Pehihquiya jano pehchicani. Pedro rihbi jato betan pehchihi nichí.

Hapobaan Jesus yoca yocacai

(Mt 26.59-66; Mr 14.55-64; Lc 22.66-71)

¹⁹ Xoboho cahen jaton hapo yocacahti:

—¿Tsoabo miin haxenicabo quin? ¿Jahua yohiquin min jonibo haxemahin? —haxxon yocapaquequin. ²⁰ Yocacah Jesusen yohiquin:

—Janibixon tah hen jatihibi joni yohirahsihi. Maton tsinquiti xobohoxon haxemaxon, Papan xobohoxon haxemaxon, jano judiobo tsinquitaiton tah hen jato honanmarasihi. Jonexon tah hen jahuabi yohiyamarahsihi. ²¹ ¿Jahua copi sca min hea yocacain? ¿Hea nincarahsihibaana jahua yohihpishquin? Jaabo caya yocahue. Jascajati ta jaiqui. Hen yohirahsihi nincaxon ta honancaniqui —hahquin. ²² Jascahiton:

—¿Jascajaquin min sacerdote hapo joi bichinain? —haxxon jaa senenbi nichí porisiane Jesus copatsahquin.

²³ —Ponte hen yohiyamahiya Jascama ta qui hahhue. ¿Hen ponte yohihiya jahua copi sca min hea rishquihin? —hahquin Jesusen. ²⁴ Jaatian hahquirihbi menexti jato yohixon Caifas janin sca Anasen jato raanquin, Caifas hashoan hapo copi.

Pedro Jesus qui paramehribihi

(Mt 26.71-75; Mr 14.69-72; Lc 22.58-62)

²⁵ Xoboho pari jaabo jai bi jemanhihtin Pedro nichí pehchihi.

—¿Mia rihbi min jahuen haxenicama quin? —hahcanquin.

—Jaama tah hen qui —hahquin, Jesus qui paramehquin. ²⁶ Sacerdote hapon joni sca Pedronen paxteha jonin jenabo hihxon yocaquin:

—¿Huai chian min hahbetan nichí hen mia jisyamahaquin? —hahquin. ²⁷ Jascajaquin yocacah hahquirihbi jahuen joni hihtima yohiquin. Jaatianbi sca hatapa queoscai.

Pilato qui Jesus nocoti

(Mt 27.1-2, 11-14; Mr 15.1-5; Lc 23.1-5)

²⁸ Caifasnen xobo janinhax picoxon gobernador xoboho sca Jesus bocanquin. Xaba paquecatsihscái. Nahuan xoboho mapetax rishtaxon non pascua fiesta piti hahtipahyamamis hihquish jahuen xoboho mapeyamacani. ²⁹ Jaa copi jato qui Pilato picoti.

—¿Jahua man hahqui yohuanain? —jato jaquin.

³⁰ —Tiroma joni hihyamahiya cah non mia hinanyamahan —hahcanquin.

³¹ —Boxon, maton xenibaana huishanihbo joi jisxon jaa joi jai quescajaquin hahnahue matonbi —Pilatonen jato jaquin.

—Noquen cah non rehteti hahtipahyamahi. Noquen rehtetima joi ta jaiqui —hahcanquin. ³² Jascajaquin ta hea rehteyaxihcanihqui hahxon Jesusen jato jaipi quescabi-jaquin janon, jascajaanquin. ³³ Jahuen xoboho hihcorihbixon Jesus quenaxon Pilatonen yocaquin:

—¿Mia min judiobaan quiquin hapo quin? —hahquin.

³⁴—¿Mianbi shinanxon min hea yocacain? ¿Caibo hehqui yohuanah min hea yocacain? —hahquin Jesusen.

³⁵—¿Hea judio quin? Jatón sacerdote hapobo betan ta miin caibaan mia hihuexon hea casticanmacatsihquiqui. ¿Jahuejah min jaipiquin? —Pilatónen jaquin.

³⁶—Hean hihboti ta nea mai mehama qui. Nea mai meha heen hihboti jaiya cahen heen jonibo coshicahinquehanihqui, judiobaan hea bihyamahahbo. Nea mai mehama ta heen hihboti qui —Jesusen jaquin.

³⁷—¿Mia min quiquin hapo qui nan? —Pilatónen yocaquin.

—Quiquin hapo hea hihqui hah tah min miabi jai. Jaamama jaabijaquin yohinoxon tah hen cainnihqui. Jaa copi tah hen nai naman joniqui. Jatihibi hihcoinaí yohuannicatón ta heen joi nincacahiqui —hahquin Jesusen.

³⁸—¿Hihcoinaí jahua quin? —hihscai Pilato.

Jesus rehteti yohihibo

(Mt 27.15-31; Mr 15.6-20; Lc 23.13-25)

Jaschahax Pilato caini judiobo qui.

—Jahua hohchabi ta hen jisyamaha. ³⁹ Pascua fiesta tian yocanicabo tah man qui, hen sipo xoboho tsahonni huesti mato picoxonnon. ¿Judiobaan quiquin hapo hen mato picoxonti man queenyamahin? —jato jaquin.

⁴⁰—Jaama bi Barrabas —hahcanquin, coshin bi res. Barrabas ta yometsoh hihpahon-ishqui.

19

¹ Jaatian sca Jesus rishquihahbo jahuen sontarobo Pilatónen yohiquin. ² Sontarobaan sca rishquixon moxa maitijaxon Jesus maimaquin. Yancon tari rihbi sahuemacquin, hapon tari. ³ Sahuemaxon hahqui jori jorixon:

—Jihuehue, judiobaan quiquin hapon —hahcanquin. Jascjaxon tihibi tantashahcanquin.

⁴ Jaatian judiobo qui Jesus hahquirihbi picoxon Pilatónen jato yohiquin:

—Jisnahue. Man jisnon tah hen mato jismahi. Hean jisi ta jahuen hohcha yamahihqui. Man honannon hihxon tah hen mato yohihi.

⁵ Jascahiya Jesus picoscai, moxa maitiya, yancon tariya.

—Nea tah qui —jato jaquin Pilatónen.

⁶ Sacerdote hapobo betan porisiabaan sca Jesus meraxon coshin yohiquin:

—Jihuín hueonhue. Jihuín hueonhue —hahcanquin.

—Jihuín hueonnahue matónbi. Jahuen hohcha ta yamahihqui, hean jisi bi —jato jaquin Pilatónen.

⁷—Huishani joi tah non noque jai. Hea ta Diosen baque qui jan jai copi tah non jaa rehteti jai, noquen nincati joi nincaxon —hahcanquin.

⁸ Jascaraibo nincacax Pilato hashoan raquescai. ⁹ Jahuen xoboho hihcorihbixon Jesus yocarihbiquin:

—¿Jahuerahnóhah mia quin? —hahquin. Yocacah bi jahua hihyamahi. ¹⁰ Jahua hihyamahiya Pilatónen yocaquin:

—¿Min hea yohicatsihyamahin? Mia tah hen picoti hahtipahi. Mia jihuín hueonxon rehteti tah hen hahtipahribihi ¿min honanyamahin? —hahquin.

¹¹—Naihohxon mia coshi hinanyamahah tah min hea jahuejati hahtipahyamaquehanai. Jaa copi ta hea bixhon mia hinanai joni hashoan hohchaya qui —Jesusen Pilato jaquin. ¹² Jascahah Pilatónen picocatsihqui bi judiobo coshin yohuani:

—Min jaa picóhi tian tah min quiquin hapo Cesarónen hamicomá sca min jatihi. Jatihibi quiquin hapocatsihquibo ta Cesarónen rahuibo qui —hahcanquin.

¹³ Jascaraibo nincaxon Jesus cainmahax, casticanti yohinoxon janoxon yohiti tsahotinin tsahopaqueti. Gabata janeya jemanhihti janin, judiobaan join cahen Gabata macan champani tapojahibo hihcatsihquiqui. ¹⁴ Pascua fiesta piyanoxon jatón pitijati neten barin manan tsacahiya cahen jano tsahoxon judiobo sca Pilatónen yohiquin:

—Nea ta matón quiquin hapo qui —hahquin. ¹⁵ Jascahiya sai saihihscacani:

—Rehtehue. Rehtehue. Jihuín hueonhue —hihcáni.

—¿Matón quiquin hapo hen jihuín hueontihin? —Pilatónen jato jaquin.

—Cesaro huesti ta noquen quiquin hapo qui, huetsama —hihcáni sacerdote hapobo.

¹⁶ Jaatian jihuín hueonahbo sca jato Bihnahue hahquin. Bihnahue hahca Jesus bihcánquin.

Jihuín hueonaibo

(Mt 27.32-44; Mr 15.21-32; Lc 23.26-43)

¹⁷ Bihxon boxon jahuen coros hiamabahincanquin. Cahax mapo xao janeya manan qui nococani. Judiobaan join cahen Gólgota. ¹⁸ Janoxon sca tasaxon nichinxon jihuín hueoncanquin. Huetsa joni rabe rihbi jascarihibicanquin, ramiho huetsa nichinxon ramihoh rihbi huetsa nichincanquin. Naponbi cahen Jesus. ¹⁹ Quirica huishamaxon ta Jesusen coros qui Pilatonen jaa quirica hueonmanishqui: Nazaret janinha Jesus, judiobaan quiquin hapo hihqui jaa quirica. ²⁰ Hihti caiboxon ta judiobaan jaa quirica jisnishqui, jema hochoma hueonaibo quen. Judiobaan join huishaxon bi Latin join rihbi hahxon, Griego join rihbi huishahah, jaa quirica. ²¹ Jaa quirica jisxon judiobaan hapobaan sca Pilato yohicanquin:

—Judiobaan quiquin hapo hahquin huishayamahue. Judiobaan quiquin hapo ta hen qui jan hahcai, hahquin huishahue —hahcanquin.

²² —Hen huishahah ta huisha sca qui —hahquin Pilatonen.

²³ Jihuín hueonxon sca ta jahuen chopabo sontarobaan bihnishqui. Chosco sontaro hihquish jahuen chopa metisihpaquecani. Jahuen tari sca cahen metisihpanan rechijoma hihnish, jahuen tepan janinhax jahuen quecato caman saya.

²⁴ —Jahuen tari huaxayamanahue. Tsoana banetihiquin hihxon macan bero pishca bora-rasa qui nanexon chicoti ta jaiqui —hihcani. Jascaxon huishani joi jani quescabijacanquin. Heen chopabo ta bihpaquecanihqui. Heen sahueti bihnoxon ta macan bero potacaniqui. hihqui jaa joi. Jaa joi jai quescabijacin cahen sontarobaan hahquin.

²⁵ Jasca jaibaan bi Jesusen coros patax jahuen mama, jahuen mama huetsa, María Cleofas haibo, María Magdalena, jaabo nichí. ²⁶ Jahuen mama jisxon hahan jan queenai jahuen haxenica rihbi hochoma nichí jisxon jahuen mama Jesusen yohiquin:

—Hoa ta miin baque qui, maman —hahquin. ²⁷ Jahuen haxenica sca yohiquin:

—Nea ta miin mama qui —hahquin. Jaa copi ta jahuen xoboho sca jaa haxenication Jesusen mama jihuemanishqui.

Jesus mahuatai

(Mt 27.45-56; Mr 15.33-41; Lc 23.44-49)

²⁸ Jaatian sca jatihibi janquenja sca jan jai honanxon huishani joi jai quescanon hihquish:

—Xehan tah hen hihqui —hihqui Jesus. ²⁹ Jano cahen tason bocho xehati cachani tsahoti. Jesus jascaraiya sca taco quescapa hahan maosahxon mehchajaquin, jashi taxoyaxon jahuen jana janin sanancanquin. ³⁰ Cachani tanahax sca:

—Janquenja sca ta jai —hihqui. Jascarax jahuen mapo betihquish mahuati.

Sontaronen Jesus pishnacohi

³¹ Pilato janin caxon sca pitijati nete sca jai copi, Janin yamenon mahuamati ta jaiqui hahxon judiobaan yocaquin. Jaton huihtax tobanon yohihue, mahua sca jaiton jaton yora botonxon botanahbo hahcanquin yocaquin. Tantiti neten jaton yora coros janin hueoyamanon hihxon jascajacanquin. Jaa tantiti nete jaton hani fiesta nete hihqui copi. ³² Tobatannahue hahca sontarobaan caxon jaa senenbi hueonah rabebi jahuen huihtax tobaxon huetsana jascarihibicanquin. ³³ Jesus qui nocoxon sca mahuasca meraxon jahuen huihtax tobayamascaquin.

³⁴ Tobayamaxon bi huesti sontaronen jashin Jesus pishnacoquin. Pishnacoha jimíya jene caini. ³⁵ Jaa jisnixon tah hen mato yohicoinaí, maton rihbi man nincacoinnon. Hen tah hen hihcoinaí. Honancoinax tah hen hihcoinaí maton rihbi man nincacoinnon hihquish. ³⁶ Huishani joi jai quescabi janon ta tobayamacanishqui. Jahuen xao ta ni huestibi tobatimahiqui hihqui jaa joi.

³⁷ Jaa pishnacoixinon ta jaabi jis yaxihcanihqui hihqui huetsa rihbi huishani joi.

Jesus mihinaibo

(Mt 27.57-61; Mr 15.42-47; Lc 23.50-56)

³⁸ Jaa pecaho Arimatea janinhax José janeya joni joxon Pilato yocaquin Jesusen yora botanoxon. Jaa José cahen nincacoinnica. Nincacoinnicaxon bi judiobo qui raquexon tsoabi yohiyamaquin. Rahma sca jahuen yora yocaquin. Yocacah Pilato jeen hihqui. Jeen hihquiya caxon jahuen yora botonxon boquin. ³⁹ Jesusen haxemamenohiya hahqui yame canicah rihbi jahui, Nicodemo. Mirra, áloe jahan hinintibo mesco bequin hicha. Hahan mihinti rahobo jan behi cahen cuarenta kilo hihuepai. ⁴⁰ Jesusen yora bihxon judiobaan hahpahoni quescajaquin hahan hininjatiya bi joxo chopa quexen yabi yabicanquin. ⁴¹ Jano hueonahbo janin cahen jihui huai jai. Jaa huai janin rihbi mai poquin behna jai, jaho tsahonti quini, jano tsoabi tsahonrihyamahi. ⁴² Jaa tsahon hochomahi copi janobi Jesus tsahonbahincanquin pitijati neten copi hishtocani.

20

*Jesus huenirihbihi**(Mt 28.1-10; Mr 16.1-8; Lc 24.1-12)*

¹ Jahan semana pehocohtai neten sca hihari xaba paqueri jaima tsahon janin María Magdalena jahui. Nocoxon hahan tsahon behpohipibo macan taranbohanah sca jisquin.

² Bishquihihcanahi caxon Pedroya huetsa haxenica yohiquin. Jaa huetsa cahen jahan Jesus queenai joni.

—Tсахon janinhah ta noquen hihbo tsecacanaxqui. Jahuerahnon racanaxquin tah non honanyamahi —hahquin.

³ Yohiha jaa huetsa haxenica betan picotax tsahon janin bishquihihcanahi Pedro cahi.

⁴ Rabebi bishquihihcanahax bi jaa huetsa pari tsahon janin nocoti, hashono coshin cahax. ⁵ Cahcopaquexon najisquin. Hahan yabihipibo joxo chopa jano tsamana jisish bi hihcoyamahi. ⁶ Hahchon sca Simon Pedro nocoti. Jahuex pontecahini tsahon quiniho hihcohi. Hihcoxon jisí bi jahuen chopa quexe tsamanah racati. ⁷ Hahan bebepohipibo payon cahen huetsanco, joxo chopa quexebo betan racayamahi. Jaa cahen hahmebi boxca boxcahah racatan. ⁸ Huetsa sca tsahon janin hihcohi, jaa pari nocotax bi chini hihcohi. Jisxon, Bohancoin ta jacanaxqui hihqui shinancanquin. ⁹ Jaa hihquish bi hahquirihbi teehitihí hihqui huishani joi honanyamaxon jascajaquin shinanquin. ¹⁰ Jaatian sca jaton xoboho rabebi caribihi.

*María Magdalena qui Jesus sanareneni**(Mr 16.9-11)*

¹¹ Tsahon patax banetax María nichí, huaohihqui. Huaohihanan cahcopaquexon tsahon najisquin. ¹² Jisi bi Papan yonoti rabe. Jano Jesusen yora racanipi janin joxo chopayahpa yonoti rabe tsahotai. Tsahon mapo quiri huesti tsahoti, tahe quiri huetsa.

¹³ —¿Jahua copi min huaohihquin, haibon? —yocaquin.

—Heen hihbo hea bohanahbo copi, rahan. Jahuen racancanaxquin hen ta hen honanyamahi —hihqui María. ¹⁴ Jascahah rabejaquexon jisí bi janobi Jesus nichí. Jaa que bi Marian honanyamaquin.

¹⁵ —¿Jahua copi min huaohihquin, haibon? ¿Tsoa min benahin? —Jesusen yocaquin.

Jaa huai hihbo hihqui shinanxon:

—Huetsanco hea bohanxon jahuen min racantanai hea yohihue, jonin, hen botannon —hahquin haibaan, jisxonma.

¹⁶ —Marian —hahsaquin Jesusen. Jascahah rabejaquetax judiobaan join yohuani:

—Raboni —hihqui. Maestron hihcatsihqui, jaton join.

¹⁷ —Hea xecoyamahue. Heen papa qui tah hen hinahihnarihyamahi. Heen huetsabo yohitanhue, hea heen papa qui, maton papa qui, heen Dios qui, maton Dios qui hea hinahihnatai yohitanhue.

¹⁸ Yohitanhue hahca caxon jahuen haxenicabo María Magdalenanen yohiquin:

—Noquen hihbo tah hen jistanai —jato jaxon jan nincacah jato yohiquin.

*Haxenicabo qui Jesus sanareneni**(Mt 28.16-20; Mr 16.14-18; Lc 24.36-49)*

¹⁹ Jaa pecaho sca jaa neten, hahan jaton semana pehocohtai neten, jano jaabo jai xoboho mapexon judiobo qui raquexon jahuen haxenicabaan xehqui xehpoquin sirijaquin. Bepiscaiya sca jahuex jato tocan Jesus nihreneni jahui.

—¿Man siripi jayamahin? —jato jaquin. ²⁰ Jato jascajaxon jahuen mequen jato jismaquin. Jahuen pishi jato jismaquin. Noquen Hihbo jisish jahuen haxenicabo jenimahi.

²¹ Jato yohirihbiquin:

—¿Man siripi jayamahin? Heen papan hea raanni quescajaribiquin tah hen mato raani.

²²⁻²³ Jato jascajaquin yohixon jato xoonhahxon:

—Dios Yoshin bihnahue —jato jaxon — Man huetsa joni hohcha sohuamahiya tah hen jaa sohuaxontihí. Man huetsa joni hohcha sohuamayamahiya ta jahuen hohcha jascabi jaiqui —jato jaquin.

Teehirihbihi Tomasen jisquin

²⁴ Rabe nane janeya Tomas ta jahuen doce haxenica janinha huesti janishqui. Jesus jahui bi cahen jato betan Tomas hihyamahi. ²⁵ Jaa copi cahen jahuen hahbe haxenicabaan yohinish:

—Noquen hihbo tah non jisiqui —hahcanquin. Yohihahbaan bi:

—Jahuen mequen janin clabon metasipi quini jisymaxon, jaa clabon quini janin heen metoti rihbi niayamaxon, pishnacohipibo janin heen mequen rihbi niayamaxon tah hen hihcoinai shinantimabirestihí —jato jaquin.

²⁶ Jan jascahipi ocho neten sca jaa xobocho jahuen haxenicabo hahquirihbi tsinquiti. Jato betan Tomas hihqui. Xehqui xehpotai bi jato tocan Jesus nihreneni jahui.

—¿Man siripi jayamahin? —jato jaquin. ²⁷ Jato jascjaxon Tomas sca yohiquin:

—Miin metoti niahi johue. Heen mequen jisihue. Heen pishi janin miin mequen niahi johue. Paranaibo shinanyamahue. Hihcainai shinanhue —hahquin.

²⁸ —Heen hihbo, heen Dios —hihscai Tomas.

²⁹ —¿Hea jisxon copi min hihcainai shinanain? Jisxonma bi hihcainai shinanaibo ta hahan jenimati jaiqui —Jesusen jaquin.

Non jihuenon Juaman huishahi

³⁰ Jahuen haxenicabaan jisnon bi hicha hahan honantibo Jesusen hahní bi tah hen nea quirica huishaxon texe rabe, huetsa jahuen haxenica rabe rihbi, jaabo jano hihcaini.

³¹ Jaabi Jesus noquen Papa Diosen baque Cristo hi man honancoinnon hihxon tah hen nea huishahahqui, nincacoinax Jesus qui hinamehtax man jihueyaxihnon.

21

Sietebo qui Jesus sanareneni

¹ Jascari jato qui cainipish cahen Tiberias hian quexa sca jahuen haxenicabo qui Jesus sanareneni joribinish. Jan sanareneni jahui ta nescanishqui.

² Simon Pedro, Rabe nane janeya Tomas, Galilea mai meha Cana jema janinha Natanael, Zebedeonon baque rabe, huetsa jahuen haxenica rabe rihbi, jaabo jano hihcaini.

³ —Hea tah hen tsatsa benahi cahi —Simon Pedronen jato jaquin.

—Cahue non mihbetan canon —hahcanquin. Cahax nontin nanecani. Tarrafa potashinaxon bi jahuabi bihyamacanquin. ⁴ Xaba paquescaiya quexabi jahuex Jesus nihreneni. Jesus que bi jahuen haxenicabaan honanyamaquin.

⁵ —¿Man tsatsa bihyamahin, heen baquebaan? —Jesusen jato jaquin.

—Bihyama tah non jai —hahcanquin.

⁶ —Mecayaho sca tarrafa potanahue. Jano tah man meratihi —jato jaquin. Jascahah potaxon bi naneti hahtipahyamacanquin tsatsa hichahiya. ⁷ Hahan Jesus queenai jahuen haxenicaton sca Pedro yohiquin:

—Noquen Hihbo tah qui —hahquin. Chopanma teexon bi Noquen Hihbo tah qui hihqui nincaxon jahuen chopa Pedronen sahuequin. Sahuehax jenenencanya cayahi.

⁸ Texe jahuen haxenicabo nontin taxnati cahi. Tarrafa tsatsa bochohi ninibonahi cahax taxnacani, quexa hochoma hihquish cien metro tihixonpahi. ⁹ Mapexon tsiste requeman tsatsa xohihi meracanquin. Paan rihbi jano racatai meracanquin.

¹⁰ —Man rahma rahcohi tsatsa pishcaya benahue —Jesusen jato jaquin. ¹¹ Nanexon jaton tarrafa ninibenaxon Simon Pedronen mapemaquin. Hanibo tsatsabo tarrafa bochohax bi huaxayamahi, ciento cincuenta y tres tsatsa.

¹² —Pihí benahue —Jesusen jato jaquin. Tsoa min quin tsoanbi jahuen haxenicaton yocayamaquin, raquexon. Noquen Hihbo hihqui honanscanquin. ¹³ Joxon paan bihxon Jesusen jato hinanquin. Tsatsa rihbi jato hinanquin.

¹⁴ Jaa cahen jahuen quimisha coti sca jan hihquipish bi hahquirihbi teehihquipish jahuen haxenicabo qui jaa sanareneni jahui.

Pedro beten Jesus yohuanai

¹⁵ Piquin jaabijahiboya Simon Pedro sca Jesusen yohiquin:

—Simon, Juaman baquen, ¿neabo hehon queenai bi hashoan bi res min hehon queenain? —hahquin.

—Jeen. Mihon ta hen queenai, Hihbon. Min tah min honanai —hihqui Simon.

¹⁶ —Heen carnerobo pimahue —hahxon yocaribhiquin jahuen rabe coti sca:

—Simon, Juaman baquen, ¿min hehon queenain? —hahquin.

—Jeen. Mihon tah hen queenai, Hihbon. Min tah min honanai —hihqui.

—Heen carnerobo pimaxonhue —hahscaquin Jesusen. ¹⁷ Jahuen quimisha coti sca yocaribhiquin:

—Simon, Juaman baquen, ¿min hehon queenain? —hahquin. Min hehon queenain hahquin jan quimisha coti yocacai copi Pedronen masa shinanscaquin.

—Mian tah min jatihibi honanai, Hihbon. Mihon tah hen queenai. Min tah min honanai —hahquin Pedronen.

—Heen carnerobo pimaxonhue. ¹⁸ Mia tah hen yohicoinal: beronan hihquish tah min miin chopa sahuehax min jano queenaiton nihpahoniqui. Yosiboscaax tah min miin mequen cataxon sanatí, huetsan mia sahuemaxon jano min cacatsihyamahiton mia bonon —hahscaquin Jesusen. ¹⁹ Jan yohihi ta jascahahbo mahuaxon noquen Papa Dios Nete Hihbohi Pedronen jato honanmayaxihquiqui honanahbo. Jaa pecaho:

—Hea chibanhue —Jesusen Pedro jaquin.

Jahan jan jenimahi haxenica

²⁰Rabejaquexon hahan Jesus queenai jahuen haxenicanen jato chibanbenahi Pedronen jisquin. Jaa cahen pihiboya Jesus senenbixon yocaquipi, Tsoan mia parannoxihquiquin, Hihbon, hihnicah. ²¹Jaa jixson cahen Pedronen Jesus yocaquin:

—¿Hoa cahran, Hihbon?

²²—Hea jonon caman jaa manati hen queenaiya, ¿mihqui jahua hihti quin? Mian hea chibanhue —Jesusen jaquin. ²³Jaa copi ta jaa pecaho hicha noquen huetsabo jaya joihi yohuanpahonishqui:

—Jaa haxenica ta mahuayamayaxihqui —hihcani. Jasca que ma bi Jaa ta mahuayamayaxihqui Jesus hihyamani. Hea jonon caman jaa manati hen queenaiya, mihqui jahua hihti quin hihresi. ²⁴Jaa haxenicaxon tah hen honancoinxon nea joibo huishahahqui. Honancoinax yohuana joi tah qui. Non tah non honanai.

²⁵Hashoan hicha rihbi ta Jesusen hahnishqui. Jatihibi huishapaquehah rah cahen mai senenyamascaan, quirica bochohi.

HAHNIBO Criston raantibaan hahnibo

Jahuen yoshin noque hinantijani

¹ Mihqui huishamenoxon tah hen Jesusen hahni jatihibi mia yohinihqui, señor Teófilon, jan honanmani rihbi mia yohiquin. ² Hinahihnanoxon caman jan hahpahoni jatihibi tah hen mia yohinihqui. Hinahihnarhiyamaxon ta jan caisni jahuen raantibo jaan yohinishqui jascahahbo. Dios Yoshiman shinanmaha jato yohiquin. ³ Jihui qui hueonahbo mahuatipish bi cahen jaabaan jisibo hihquish jato qui sanareneni jahui, jan hahquirihbi jihuetai honanahbo. Cuarenta neten cahen jato betan hihcanahi. Jato nihquihinxon jenquetsahaquin Papan noque jihuemayahixquin jato honanmaquin.

⁴ Jato betan pixon cahen jato yohiquin:

—Jerusalen jema potabahinaxma janobinahue, Papan yohini nocoyaxahnon caman janobi mananahue. Jaa ta Papan hinanyaxihquiqui hah ta hen mato janiqui. ⁵ Juaman mato jenen nashimani bi ta Papan mato jahuen Yoshin hinanyaxihquiqui nashimaquin hahcajaquin hicha hinanresquin. Jan jascajati nete ta nea pishca sca jaonahiqui —jato jaquin.

Naiho Jesus hinahihnatai

⁶ Jaatian hahqui tsinquirihbixon Jesus yocacanquin:

—¿Noquen caibobi sca hahquirihbi noquen hapo janon min rahmabi noquen nahuabo camatihin, Hihbon? —hahcanquin. ⁷ Yocacahbo jato yohiquin:

—Jaabi hihbo hihxon ta jayaxihquibo Papan yohinishqui. ¿Jahuentian jaticaniquin? ¿Jahua neten jayaxihcanihquin? Man tah man honantimahi. ⁸ Jaa man honantimahi bi ta Dios Yoshiman mato coshi hinanyaxihquiqui mato qui botopaquexon. Coshi bichish tah man hehqui chanicoinyaxihqui Jerusalen jema janin, Judea mai jatihibinco rihbi, Samaria mai janin rihbi, jano nai chibechijaquehtancahuanaiton rihbi —jato jaquin.

⁹ Jascahiton cahen Papan jaa bihinihniquin jaton jisnonbi. Nai cohiman pantehah cahen jisnyamascacanquin. ¹⁰ Jan cahiya nai bejisihnihi nih nichaibaan bi joxo chopaya rabe jato patax nihreneni jahui. ¹¹ Nihrenenxon yocacanquin:

—¿Jahua jenquetsahin man naihoh jisichain, Galilea mai mehabaan? Maton jisnon bi jan naihoh hinahihnatai quescacquirhani ta joribiyaxihquiqui, Jesus, jaabi, huetsama —hahcanquin.

Judas xahbanen Matías caisaibo

¹² Jasca jaabo jaiya cahen Olivo janeya mahchin mehax Jerusalen janin boribicani. Jaa mahchi ta Jerusalen hochoma qui noquen xobo janinhax noquen huai tihixon. ¹³ Nocotax rabe tapoyahpa xoboho bocani bochiquiha chique janin, jano jaabo jihuetai janin. Pedro, Juan, Jacobo, Andres, Felipe, Mateo, Bartolomé, Mateo, Alfeon baque Jacobo, Simon Celador, Jacobon baque Judas. ¹⁴ Jaabo rahsichin Papa jaayocacanquin jaa shinan huestiya hihxon. Jato betan haibobaan rihbi yocaquin. Jesusen jochicabaan rihbi, jahuen mama Marian rihbi yocacanquin.

¹⁵ Jano cahen noque huetsabo tsinquicani, ciento veinte rah. Jato tocan mehax huenihihnaxon Pedronen yohiquin:

¹⁶ —Papan huishamani joi jai quescari ta jahoxqui, noque huetsabaan. Judasen jascayaxihqui ta Davidinin huishanishqui, Dios Yoshiman shinanmahah. Jesus bihmanoxon ta Judasen Jesus qui jonibo hihuehoxqui. ¹⁷ Jaa Judas ta noque betan hihpahonishqui, jaa rihbi nea tee hihbomahah. ¹⁸ Jan hohchaquin cananan coriquinin ta mai marohoxqui. Marohax paqueti behoracareneni pohtoshihcainax jahuen pocobo napaquehreneni. ¹⁹ Jan jascajahi jatihixonbi honanxon ta Jerusalen janin jihuetaibaan jaa mai janenishqui Acéldama, jaton join. Jimiyahpa mai hihcatsihqui. ²⁰ Salmos quirica janin ta nea joi huishá jaiqui:

Jahuen xobo xahbansanon tsoabi jano jihueyamasanon hihqui jaa quirica janin.

Jahuen tee rihbi huetsan hihbojanon

hihqui huetsa quirica janin rihbi.

²¹⁻²² Jascabi sca janon huetsa sca caisnahue. Noque betan huetsa sca yohinica caisti ta jaiqui. Juaman noquen Hihbo nashimani tian noque betan nihni joni huesti. Noquen Hihbaan noque nihquihinpahoni tian noque betan nihxon rahma caman noque manapahoni joni huesti caisnahue, noquen jisnonbi noquen Hihbo hinahihnaron caman noque

manapahoni joni. Jaan ta noque betan noquen Hihbo Jesus rehtehahbo bi hahquirihibi jihuetai yohicointihiqui —jato jaquin Pedronen.

²³ Jaatian cahen rabe joni naponbi nihmacanquin. Huetsa cahen Matías. Huetsa cahen José, Barsabas hahcaibo. Justo jahuen jane huetsa. ²⁴⁻²⁵ Jaatian cahen Papa yocacanquin:

—Hihbon, mian tah min jatihibi jonibaana shinan honanai. Criston raantibaana tee ta Judasen potabahinhoxqui jano jan cacatsihquiton canoxon. Rabe joni tah non naponbi nihmahí. ¿Jahuemeha min caisain Judasen tee jan hihbojanon? Noque jismahue non honannon —hahcanquin. ²⁶ Jascajaquin yocaxon jahuemeha hin honannoxon macan bero borasa qui nanexon chixoxon jiscanquin. Jisxon Matías honansacanquin. Criston once raantibo betan sca hihnon jaton hahbe raanti janecanquin.

2

Dios yoshin jahui

¹ Pentecostes fiesta nete nocotaiya cahen jaabo jatihibi huesti xoboho tsinquiti. ² Jano tsahotaibaana bi nihuehhuan corotihcamahi naihoh quehax jahuex jaa xoboho coshin corotai nincacanquin jatihibichin. ³ Jascasaiya cahen chihi perehiquicamahi romishin jato qui paquereneni. Chihi perehiquicamahi joni tihibi maracahreneni. ⁴ Dios Yoshiman sca jato jatihibi hihbojaquin. Jaan hihbojaxon shinanmaha huetsa join sca yohuancani.

⁵ Jerusalem janin ta jatihibi mai janinhax jahuex Paphon shinanai judiobo jihuecanishqui. ⁶ Yohuanaibo nincacax cahen jato qui hicha tsinquijaqueti. Yohuanaiboya jatihixonbi jahuenahbi jahuen joi nincanquin. Huetsan jahuen joi nincanquin. Huetsan rihbi jahuena nincanquin. Jascajaquin jaton joibi nincanquin jatihixonbi. Jascasaiya jahua copi jascarihquin honanyamacanquin. ⁷ Rahte rahtexon yocacanquin:

—¿Yohuanaibo Galilea janinhahbo rahsima hin? ⁸ Jascaraiboya ¿jenquetsahaxon non noquen mai meha joibi non nincacain jatihibichin? ⁹ Neno tah non jai partobo, medobo, elamitabo, Mesopotamia janinhahbo, Judea janinhahbo, Capadocia janinhahbo, Ponto janinhahbo, Asia janinhahbo, ¹⁰ Frigia janinhahbo, Panfilia janinhahbo, Egipto janinhahbo, Cirene hochoma Africa mai janinhahbo, Roma janinhax pasijahi jahui, ¹¹ noquen caibo, nahua hihpahonish bi noquen caiboscaibo rihbi, cretensebo, árabebo. Papan coshin hahcaí joi yohuanai tah non nincacai, noquen joinbi —hahcanquin. ¹² Rahtetax jahua copi jascarihquin honanyamahax yocacahnanancani jatihibi:

—¿Jahuatohon yohuanihquin non jascajaquin nincanon? —hihcani. ¹³ Jascahibo bi yohuanxon sca caibaana hosanquin:

—Pahenax ta jascari yohuancaniqui —hahcanquin.

Pedro yohuanni

¹⁴ Jascaraibaana bi hahbe raantibo betan nihrenenxon Pedronen jato coshin yohiquin:

—Judea mai mehobon, Jerusalem janin jihuetibaana. Man honannon hihxon tah hen mato yohihi. Hea nincanahue. ¹⁵ Noque pahenai shinan man jai bi tah non pahenyamahí. Bari ta queyarihyamahiqui. Nescaran ta tsoabi pahenyamahihqui. ¹⁶ Pahenaxma bi tah non Papan joi yohinica Joelinin yohini quescan noque jai. Joelinin ta nescajaquin huishaxon yohinishqui:

¹⁷ Papan ta yohihiqui: Nete queyoti hochomascaiya tah hen jatihibi jonibo heen Yoshin hinanrestihi. Hinanah sca ta maton baque bebobo, maton baque haibobo rihbi hean shinanmaha yohuanyaxihquiqui. Maton beronanbaana ta namaquen hahcajaquin hahan honantibo jis yaxihquiqui. Maton yosibobaana rihbi ta namayaxihquiqui hean jismaha jisquin.

¹⁸ Jaa neten tah hen heen teexonnicahbo bebobo, heen teexonnicahbo haibobo rihbi heen Yoshin hinanrestihi. Hinanah ta hean jismahax yohuanyaxihquiqui.

¹⁹ Naihohxon tah hen hahan rahtetibo cainmatihí. Main rihbi hahan honantibo sca cainmaribiquin. Jimi, chihi rihbi, chihi cohin rihbi jato jismaquin.

²⁰ Bari ta bahquishihcahinscatihiqui. Hoxne ta joshincahintoshiqui, jimi quescacahini. Jascapahbo ta jatihiqui Hihbo joriyamanon. Jahuen joti nete nocotaiya ta jato casticani jotihiqui jahuen coshi jato jismanoxon.

²¹ Hea hihbojahue Hihbon, hihquibo jatihibi ta Hihbaana teehihmatihiqui. Jascajaquin ta Joelinin huishanishqui.

²² Hen mato yohihi nincanahue, heen caibaana. Jesus ta Nazaret janinha joni hihnishqui. Papan raanaí joni jaa hihqui man honannon hihxon ta jahuen coshi Papan hinannishqui tsoan jascajani que ma bi jaa coshiyaxon jan hahnon. Jisish hahan rahtetibojamaquin. Hahan honantibojamaquin. Maton jisnonbi ta jascajanishqui man tah man honanai. ²³ Man rehteyaxihqui honanxon Papan yohini quescabijaxon ta Judasen mato jaa Jesus hinanhoxqui. Hinanah tah man rehtehohqui nincayosmabo jaa jihui qui hueonmaquin.

²⁴ Rehtehipiibaan bi ta Papan huenirihbihoxqui teehihmaxon. Jaa ta jascabi mahuatai jatimahiqui. ²⁵ Hahqui yohuanxon ta Davidinin rihbi huishanishqui: Netetihibi noquen Hihbaan hea manahi ta hen honanai. Hea pataxxon ta hea yanapaniqui, hen masa shinanyamanon.

²⁶ Jaa copi tah hen coin coinax siripi yohuanai, mahuatax bi hen hahquirihbi jihuetihi honanax.

²⁷ Hea jascabihi mahuatai hihiyamanon tah min hea potabahintimahi. Minabi miin joni tah min pisimatimahi.

²⁸ Hea jahuentianbi queyoyamanox manati tah min hea honanmahi. Hea manaxon tah min hea hihti jenimamatih.

Jascajaquin ta Davidinin huishanishqui.

²⁹ Honanquin sirijaxon tah hen mato yohihi, heen caibaan. Neateman jihueni noquen xeni Davidi ta mahuatai tsahoncanishqui. Jahuen tsahon ta rahma caman jaiqui. Jatihixonbi tah non jaa honanai. ³⁰⁻³¹ Miin jihuetahbo jan yononon hihxon tah hen miin xohta quiquin hapomayaxihqui hah ta Papan janishqui, jahuentianbi jahuen joi huetsajayosmaxon. Jan jascani honanxon Papan jismaha yohinica rihbi hihxon ta Cristo hihqui bi Papan huenirihbitih jaan honannishqui. Jaa yohihi ta jan jascabihi mahuatai hihiyamanon potabahintimahi, jahuen yora rihbi pisimatimahi hihihishqui David. ³² Jaa Jesus hihqui bi Papan huenirihbihi jisoxon ta non mato yohicoinali jatihixonbi. ³³ Quiquin Hihboscahue Papan jaah ta jaa mecayaho sca Jesus tsahotihqui. Papan noque Dios Yoshin hinantijanixon ta nea man jisxon nincacai jaan hinanresiqui. ³⁴ David ta naihoen nihinahyamanishqui. Jaanbi ta yohinishqui:

Noquen Hihbaan ta heen Hihbo yohinishqui, Hea mecayaho tsahotihue.

³⁵ Miin rahuibo hen mia namanjaxonnon caman tsahotihue, hahquin.

³⁶ Jaa copi honanquin sirijanahue, heen caibaan jatihixonbi. Jaa man jihui qui hueonmaho Jesus ta Papan yohiscaiqui jaa huesti Hihbo hinon, jan caisai joni —jato jaquin Pedronen.

³⁷ Jan jascahi nincaxon masa shinanxon Pedro, jahuen hahbe raantibo rihbi yocacquin:

—¿Jahueja sca non jatihin, noque huetsabaan? —hahcanquin.

³⁸ —Maton shinan pontenahue. Cristo sca maton Hihbo hihnon hihxon non mato nashimanon yohinahue maton hohcha jan sohuanon. Jascajahiton ta mato Dios Yoshin hinanrestihiqui. ³⁹ Mato ta hinantijanishqui, jahuen yoshin mato hinanti, maton baquebo rihbi, jatihibi hocho quehabo rihbi, noquen Papan quenahibo rahsibi —jato jaquin Pedronen.

⁴⁰ Basi yohuanxon cahen jato yohiquin sirijaquin:

—Nea tiromabo qui nocoyaxihqui casticanti mato xahbanjamanahue —jato jaquin.

⁴¹ Jaatian sca jan yohihah nincacoinali nashimacanquin. Jaa netenbi ta tres mil jonibaan Cristo bihishqui. ⁴² Criston raantibaan honanmaha cahen nincacquin jeneyamacanquin. Jato manacanquin. Noquen hohcha copi Cristo mahuaho shinanhahan picanquin. Papa yocacquin jeneyamacanquin.

Nincamamenonibo

⁴³ Hicha hahan rahtetibo jahuen raantibaan hahcai jisish rahtecani. Hahan honantibo rihbi hahcaibo jisish raquecani jatihibi. ⁴⁴ Hahmerihbi cahen jihuecani nincacoinali rahsi. Jaabo jai jaton jahuaborabo jatihixonbi hihbojacaquin. ⁴⁵ Jaton jahuaborabo, jaton mai rihbi maromaxon cahen coriqui hinanpaquecanquin jaabo pishinai tih jato hinanquin. ⁴⁶ Jatihibi neten huesti shinanyahax Papan xoboho nocohihnacani. Jenimaxon shinanquin sirijaxon jaton xobohoxon sca picanquin. ⁴⁷ Papa qui siripi yohuani jihuecani. Janohahbaan rihbi jato sirijaquin yohuanquihnquin. Jato betan nocohihnataibo caicananon jan teehihmahibo noquen Hihbaan rihbi jato nocohihnamaquin jatihibi neten.

3

Chanto rohajahibo

¹ Bari racapaquescaiya cahen jaabo hihqui quesuari jascaran Papa yohihi tsinquitaiboya Pedro betan Juan Papan xoboho mapeti cah. ² Jano rihbi cahen huesti joni chanto jahuen maman bihni jascabi sca caibaan hioxon xehqui patax racanquin jaa neten tihibi. Siri Xehqui hahcaibo patax racaxon Papan xoboho mapetaibo coriqui yocacquin chanton. ³ Pedro betan Juan jaa xoboho mapecatsihscali jisxon jahuen mequen mehanahxon coriqui pishca jato yocacquin. ⁴ Yocaca jaa jisquin sirijaxon sca:

—Noque jise —hahcanquin. ⁵ Jascahahbo coriqui pishca bihti shinanxon jato jisquin.

⁶—Heen coriqui yamaha bi tah hen hen huetsa jai pishca mia hinanai. Jesucristo Nazarenon janen ta hen mia yohihi. Nihrescahue —hahquin Pedronen. ⁷Jascaxon mecayaho mehuetanxon huenihihniquin. Huenihihniha jahuen tahebo jahuen tapoxcobo jahuen ponobo coshicahtanax cayatani nihrenenscai. ⁸Nihaquehtanscai. Nihaquehtanax jato betan sca Papan xoboho mapescai. Nichish cayacanahax:

—Papan ta hea hahxonihqui —hihqui. ⁹Nichish jascari Papa qui siripi jaa yohuanai jixxon cahen jano hihquiubo rahsichin jaa honanquin. ¹⁰Siri Xehqui hahcaibo patax jaabi tsahoxon Papan xoboho mapetaibo coriqui yocarahsihi honancanquin. Jan siriscái honanax hihti rahtecani. Rahte rahtecani.

Pedro yohuanai

¹¹Pedroya Juan jaa jonin xecohiya jano hihquiubo rahsibi rahtetax Salomonen xobo hahcaiboho jato qui tsinquijaqueti, xobo rechiho. ¹²Tsinquijaquetaibo jixxon Pedronen sca jato yohiquin:

—Heen caibon. ¿Jahua copi man nea jisish rahtetain? ¿Jahua copi man noquen coshinbi noquen shinamanbi non nea joni nihmahi quescá man noque jisín? ¹³Noquen xenibo hihpahoni ta Abraham qui, Isaque rihbi, Jacobo rihbi. Jaton Papa Dios ta noquenah qui. Jaa noquen Papan ta jahuen joni Jesus shinanya hih mato jismahihqui, Pilato jaa Jesus hinanax man queenyamahoh que bi. Pilatonen jaa picocatsiqui bi tah man queenyamahohqui, noque jihuemanicahma tah qui hihquish. ¹⁴Jaa ponte joni que bi tah man queenyamahohqui, jaa Papan baque que bi. Queenyamaxon tah man rehtemis joni mato picoxonti man yocahohqui. ¹⁵Noque jihuemanicah tah man matonbi rehtemahohqui. Rehtehipibaan bi ta Papan teehihmarihbihoxqui. Jan teehihmahi jisoxon tah non mato yohiscái. ¹⁶Cristo honancoinxon tah non jahuen janen nea joni rohajahaqui, nea man jisi man honanai jonibi. Jan noque hinanai shinaman tah non nea coshijahaqui, maton jisnonbi.

¹⁷Honanyamaxon tah man rehtemahohqui, noque huetsabaan. Maton tinintibaan rihbi honanyamaxon rehtequin. Hen tah hen honanai. ¹⁸Cristo ta hohmis hohmisyaxihquiqui hihxon Papan joi yohinicabaan jatihixonbi janí quescá ta Papan jahoxqui jascáhaho. ¹⁹Jaa copi maton shinan pontenahue, maton hohcha Papan sohuanon. ²⁰Sohuaxon hahan maton shinan behnajati netebo Papan mato hinannon. Pontejaquin shinanax sca jihue-nahue. Jan mato hinanai jahuen Cristo ta Jesus qui. Jaa jan raannon pontejaquin shinan-nahue. ²¹Jahuen joi yohinon hihxon ta jahuen joi yohinicabo Papan caisnishqui. Jaabaan yohini jatihibi quescá janon caman ta noquen Jesus naihoh banetahbiqui. ²²Moisesnin ta yohinishqui: Maton huetsabi ta joi yohinica Papa Diosen mato qui raanyaxihquiqui jaa maton huetsabi hea quescapa joni. Jan yohihi jatihibi tah man nincatihi. ²³Jaa joni nincayamahi jatihibi tah man Papan baqueboma qui picomaxon queyobahintihí, hahquin huishaquin.

²⁴Samuel jaa pecaho joxon yohinicabo rihbi jatihibi ta jascarihibi yohuannishqui, nea netebo yohihi. ²⁵Mato tah man hoa yohinicabaan baquebo qui. Main jihuetabo jatihibi jato shinan siri hinannon tah hen miin baquebo sirijaquin shinanmatihi, hah ta Papa Diosen Abraham janishqui. Jaanbi mato hahxonxon ta maton xenibo rihbi jascajati yohinishqui. Jaa copi ta jaa joi matonah rihbi qui, Papan jisnonbi man jascanon. ²⁶Jahuen baque raanxon ta mato qui pari Papan jaa raannishqui. Maton hohcha potamaxon mato jatihibi sirijaquin shinanmahi jonon hihxon mato qui jaa raanquin —jato jaquin.

4

Quenamahabo Pedro betan Juan cahí

¹Sacerdotebo betan Papan xobo coiranai sontarobaan hapo sca becani. Saduceobo rihbi jato betan jahui. Joxon sca tsinquitaibo yohihiton meracanquin. ²Jan Jesus hueniho quescajaquin mahuanihbo Papan hueniyaxihqui hihxon cahen jano jai jonibo Pedro betan Juan nincamaquin. Jato honanmahi merahax sinaxon jato bihcanquin. ³Bihxon bepiscai copi bahquish pari jato casticanyaxahpan hihxon sipo xoboho jato tsahoncanquin. ⁴Jaabi ta Criston joi siri nincacaibaan hichaxon nincacoinnishqui, cinco mil jonibaan.

⁵Hoxashinahax mohiyahtax jaton hapobo jatihibi jaton hanibo betan tsinqiscái. Huis-hani honanbo rihbi jato betan Jerusalem jema janin tsinquiti becani. ⁶Jaton quiquin sacerdote Anas, Caifas, Juan, Alejandro, jaabo, quiquin sacerdotebaan jenabo jatihibi rihbi jato betan tsinquiti. ⁷Pedro, Juan naponbi nichinxon yocacanquin:

—¿Jahua coshin man hahquipiquin? ¿Jahua janen man jascajahipiquin? —jato jaquin.

⁸Dios Yoshiman hihbojaha sca Pedronen jato yohiquin:

—Jema hihbobon, noquen hapobon. ⁹ ¿Jenquetsahaquin man nea chanto rohahahipi quin? ¿Jahuatohon man jaa rohahahipi quin? hah man noque jaiya tah hen mato yohihi, man honannon hihxon. ¹⁰ Jatihibi noquen caibaan honannon hihxon tah hen mato yohihi. Maton tah man Jesus Nazareno jihui qui hueonmaxon rehtehohqui. Jaa man rehtehipi bi ta Papan hahquirihbi teehihmahoxqui. Jahuen janen tah non nea rohahahipi qui, rahma siri sca mato bebonni nihnon.

¹¹ Jaa Jesus ta hahqui xobojati jihui quescapah qui, tiroma tah qui hihxon man xobojahibaan potanah que bi. ¹² Jaa huestichin ta noque teehihmati hahtipahiqui. Huetsa noque teehihmanica ta yamahihqui ni jahuenbi. Jaa huestichin jonibo teehihmanon ta Papan jaa yohihihqui —jato jaquin.

¹³ Raquetaxma Pedro betan Juan yohuanai jixxon, escuela janin hihpahonima bi jemama qui hanini rabe jato honanax rahtecani. Jesus betan nihpahonibo sca jato honancanquin. ¹⁴ Rohahahipi joni jato patax nich i jixxon joi bichincatsihxon bi jahua yohiti hahtipahyamacancanquin. ¹⁵ Tsinquitai boma qui jato picomahax res sca yohinannascani:

¹⁶ —¿Jahueja non jato jatihin? Hahan honanti hani ta hahquipicanaxqui. Jatihixonbi ta Jerusalem janinhahbaan honanahqui. Hahyama ta jaipicanaxqui, hih tah non jatimahi. ¹⁷ Jaabi, jaa joi huetsabo janin caicanayamanon jato yohinon benahue. Jaa janen yohuanayamascanahue, non mato rishquimis jistahi man tan, hahquin jato yohinahue —hihcani. ¹⁸ Quenamaxon sca jato hihti yohicanquin:

—Jesusen janen yohuanayamascanahue tsoh. Jahuen janen tsoabi yohiyamanahue —jato jacanquin. ¹⁹ Jascahahbo Pedro betan Juaman jato yohiquin:

—¿Papan jisi jahuemeha ponte quin? ¿Mato noquen nincati nan? ¿Noquen Papabi non nincati nan? Shinannahue. ²⁰ Noque tah non non jisnibo chaniti jai, non nincanahbo rihbi yohiti jai. ²¹ Jascaraiton jato tahtijaribicanquin. Jema janin jato nincacatsihquibo hicha jai quen jenquetsahaxon casticanti honanyamaxon tahtijaribixon jato Boresscatannahue hahrescanquin. Jaa rohahahipi honanxon texe jatihixonbi, Hahxon tah min jaa jai Papan, jaiboya, casticanti hahtipahyamacancanquin. ²² Hahan honantijaquin jaabaan rohahahipi joni ta cuarenta bari janishqui, hashoan rihbi. Jaa copi cahen jatihixonbi jaa honancanquin.

Papan coshi yocacaibo

²³ Boresscatannahue hahcabo sca jaton hahberabetibo qui caxon jaton sacerdote hapobo betan jaton hanibaan jato tahtijahi yohicanquin. ²⁴ Yohiha jatihixonbi Papa yocacancanquin:

—Hihbon, naiyahpa mai, hian, janobo jai jatihibi rihbi tah min hahniqui. ²⁵ Miin Yoshin siri mian hinanah ta noquen xenibo David miin jonixon miin joi yohinishqui:

¿Jahua copi noquen nahuabo sina sinatihquin? ¿Jahua copi noquen caibaan honanma jai joibo yohiti shinanahquin?

²⁶ Mai meha quiquin hapobaan ta jaton sontarobo nichiniqui rehtemanoxon. Jaton hapobo tsinquicani, noquen Papa rehtecatsihqui, jan caisai joni rihbi rehtecatsihqui

hah ta Davidinin janishqui huishaquin.

²⁷ Jascacoini. Herodes, Poncio Pilato, nahuabo, noquen caibo, jaabo jatihibi ta nea jema janin tsinquihoxqui. Minabi miin joni qui sinatax ta tsinquicanhoxqui. Min caisai miin Jesus qui ta sinacanhoxqui. ²⁸ Mian shinanxon miin mequeman hahmaha jayaxihquibo min yohini quescabija ta jaabaan jahoxqui. ²⁹ Rahma jaabaan hahan noque tahtijahi joibo jise, Hihbon. Raquexonma non miin joi yohinon noque coshi hinanahue, noque miin jonibo. ³⁰ Miin mequeman mehaxon jonibo rohahahue. Miin baque Jesusen janen non hahan honantibo hahnon hahan rahtetibo rihbi non hahnon jahue —hahcanquin. ³¹ Papa yocacancanquin janquenja sca jaiboya jaabo jano tsinquitai xobo xayasca. Dios Yoshiman jato jatihibi hihbojaha sca raquexonma Papan joi yohicanquin.

Jaabo jai jatihibi hinancanquin, jatihibichina sca janon

³² Jaatian cahen nincacoinaibo jaa shinan huestiya hihcani. Jatihixonbi jaa huesti shinancanquin. Jan jaibo yohihi, jaa ta hena res qui, hih tsoabi jayamaha. Jatihibi jaya hihqui. ³³ Papan coshiyaxon hahxon cahen noquen Hihbo Jesus hahquirihbi teehihscai yohicanquin jahuen raantibaan. Jato jatihibi ta hicha shinan Papan hinannishqui. ³⁴ Jato tocan tsoabi jahuabi pishinyamaha. Xobo jaxon maromacancanquin. Mai jaxon jaa rihbi maromacancanquin. ³⁵ Maromaxon coriqui bihxon caxon Criston raantibo hinancanquin. Jaabaan sca pishinaibo hinanpaquenon. ³⁶ José janeya huesti ta Criston raantibaan Bernabé janenishqui. Bernabé cahen sirijaquin shinanai baquebo hihcatsihqui. Jaa cahen Chipre janinhax joní, levito joni. ³⁷ Mai hihbo hihxon cahen jahuen mai maromaxon coriqui bichish jaya caxon Criston raantibo hinanscaquin.

5

Ananías betan Safira

¹ Ananías janeya jonin sca jahuen haibo Safira betan jaton mai maromaquin. ² Coriqui bihxon, Jascajahue jahuen haibaan rihbi jaah, texe mequعانquin. Texe mequexon texe boxon Criston raantibo taracanquin. ³ Pedronen sca yocaquin:

—Ananin. ¿Jenquetsahaxon Satanasnen miin jointi hihbojahaxquin, min maromahi texe yohuashihxon Dios Yoshin paranti min shinannon? ⁴ ¿Maroyamaha minabi hihamahipishquin? ¿Maromaxon sca jaa coriqui hihboxon quesayamaxon min queenai quescajati min hahtipahyamahin? ¿Jahua copi sca min jascajaquin paranain? Jonima bi tah min noquen Papabi parancatsihqui.

⁵ Jan yohihah nincacax Ananías racareneni mahuascai. Jaa chanihi joi nincacaibo rahsi sca hihti raquecani. ⁶ Beronanbaan sca huenixon Ananías rahcoxon boxon tsahoncانquin.

⁷ Quimisha horabo huinohax jahuen haibo sca hihcohi. Jaan cahen jahuen bene jascarax mahuatah honanyamaquin. ⁸ Jaa sca Pedronen yocaquin:

—Hea yohihue. ¿Man noque hinanah tihi copitai min mai maromahaquin? —hahquin.

—Jatihu copitai rahan —hahquin. ⁹ Pedronen sca:

—¿Jenquetsahpahin man rabexonbi Dios Yoshin tanati shinanahquin? Nincahue. Miin bene tsahontanaibo ta mapescaiqui. Mia rihbi sca ta hioxihcanihqui —hahquin.

¹⁰ Jaatian cahen Pedro taracahrenenax haibo mahuati. Hihcoxon cahen haibo mahuascai meraxon beronanbaan boresscaquin. Boxon jahuen bene janin tsahonscانquin.

¹¹ Jaatian ta nincacoinaibo jatihibi hihti raquenishqui. Jaa joi nincacaibo rahsi raqueti.

Papan rahtetibojahi

¹² Jaa jema janinxon ta Criston raantibaan hicha hahan honantibo hahnishqui, hahan rahtetibo rihbi hahquin. Salomonen rechí xoboho sca jatihibi tsinqaicani.

¹³ Tsinquitaiboya caibo tsoabi jato betan tsinquiyamahi raquetax. Raquexon bi jema janinhahbaan jato hihti siri jisquin. ¹⁴ Nincacoinaibo cahen caicanascai. Beboho, haibobo rihbi tсамасcai. ¹⁵ Hihti caiboscaiya cahen jema bahinbi jaton pishinbo, jaton cacajatibo racanxonxon jaton hisinyahpabo jano racancanquin, Pedro jahuiya jahuen bari yoshiman bocabi jato huinonon hihxon. ¹⁶ Jerusalem hochoma jemabo janinhax sca hicha jonibo jahui. Jaton hisinyahpabo hihuecanquin. Tiroma yoshinyahpabo rihbi hihuecanquin. Jato jatihibi ta Criston raantibaan rohanishqui.

Pedroya Juan bichibo

¹⁷ Jasca sca jaiboya jaton quiquin sacerdote jahuen hahbe saduceobo betan notsi notsiscái. ¹⁸ Notsi notsixon porisiabo bihmaxon Criston raantibo sipo xoboho tsahoncانquin.

¹⁹ Tsahonahbaan bi yame noquen Hihbaan naiho queha yonoti joxon sipo xobo xehpoti quehpenxonxon jato picoquin. Picoxon:

²⁰ —Botannahue. Papan xoboho mapexon jonibo nea hahan jihueti joi jatihibi yohitannahue —jato jaquin. ²¹ Jan yohihi quescabijascancانquin. Xaba paquetaiya bi Papan xoboho mapexon jonibo haxemascancانquin.

Jaatian cahen quiquin sacerdote, jaabo, jahuen hihti janin nocoxon hahbe hapobo tsinquimaquin israelibaan hanibo rahsi. Jato tsinquimaxon porisia sca sipo xobo janin raancانquin jato hihuenon hihxon. ²² Sipo xobo janin nocoxon sca porisiabaan jato xahbanjaquin. Joribixon sca jan xahbanjatanai yohicanquin:

²³ —Xehpoti jascabi xehpohah tah non meratanai, hihti xehpohah. Sipo xobo coiranica hahbi tah non jahuen xehqui xehnichai jistanai. Non quehpenxon jisí bi ta tsoabi yamahaxqui —hahcanquin.

²⁴ Chanihibo nincacax Papan xobo coiranai sontaro hapo betan quiquin sacerdotebo rahtecani, ¿Jahua sca janoxihquiquin? hihcani. ²⁵ Jato yohihi sca huetsa jahui.

—Man sipo xoboho tsahonipibaan ta Papan xobohoxon jonibo haxemahiqui —hahquin.

²⁶ Jahuen sontarobo betan caxon jaa xobo coiranai hapon sca jato hihuequin. Jan hapo qui hihuehi copi jonibaan jato macaman tsacapaho hihxon coshixonma jato hihuequin honaxonbi. ²⁷ Hihuexon hapobo tsinquitai naponbi sca jato nichinquin. Quiquin sacerdotenin sca jato yohiquin:

²⁸ —Jaa janin yohiyamascanahue hah tah non mato jaipiqui, sirijaquin yohiquin.

Yohihah bi tah man Jerusalem jatihobi maton honanmati joi jato nincamahi. Jaa joni rehtehoh quen tah man jaa hohcha noque hihbomacatsihqui —jato jaquin.

²⁹ Hahbe raantibo betan Pedronen sca yohiquin:

—Joni mentan tah non hashoan noquen Papa nincati non jai. ³⁰ Noquen xenibaan Papa Diosen ta Jesus teehihmarihbihoxqui, jihuin hueonxon man rehtehipi que bi. ³¹ Jaa ta noquen Papa Diosen huenihihnihoxqui, jaa mecayaho tsahonon quiquin hapo sca jonibo

teehihmanicah. Noque israeli baquebo ponte shinan hinanxon noquen hohcha sohuanon ta noquen Papa jaa huenihihnihoxqui. ³² Noquenbi jisoxon tah non yohiscái. Noque ta jahuen Yoshin siri rihbi Papan hinaniqui jahuen joi nincacoinaibo rahsibi. Noque ta yanapanihqui —hihqui Pedro.

³³ Jascahahbo nincaxon cahen hihti sinaxon jato rehtecatsihscacani. ³⁴ Jano rihbi huesti fariseo tsahoti, Moisesnin huishani joi honan, Gamaliel janeya. Jatihibi jonibaán siri jisi joni. Hapobo tocan nihrenenxon Criston raantibo jatoma qui picomatahtahxon jaan jato yohiquin:

³⁵ —Heen caibaán. ¿Jahueja man jaabo jacatsihquin? Sirijaquin shinannahue. ³⁶ Neateman ta Teudas jonishqui. Hapohihti shinanax yohuanaiton sca ta hicha tahni jonibaán jaa chibannishqui hahbetan nihcatsihquiibaán. Cuatrocientosbo. Jaabi hihbocat-sihqui bi ta rehtexon jaa chibanaibo rihbi jabamacannishqui, jahuabi sca yamanon. ³⁷ Jaa pecaho ta Galilea janinhax Judas jonishqui jonibo toponpaquehibo tian. Caibo hiohiton bi ta jaa rihbi rehtexon hahbe cahibo rihbi jabamacannishqui. ³⁸ Jaa copi tah hen mato rahma yohiscái. Jaabo jenenahue, jenebahinquin. Jaabaán bi shinanxon hahcaiya cahen jahuabi jatimahi. ³⁹ Papa Diosen shinanmaha hahcaiboya cah man jenquetsahaxon bi jato pantetimahi. Dios betanbi man rehtenanai man meramis —jato jaquin.

⁴⁰ Nincacax jeenhicani. Criston raantibo quenamaxon sca rishqui rishquimaxon Jesusen janen yohuanymascaabo hihxon tahtijaxon jato camascantion. ⁴¹ Picohahbo hapobo janinhax jenimacanahi bocani. Criston jonibo copi ta mato tiromajacaniqui. Tenescaibo tah man qui Papan jaiya jenimacani. ⁴² Jatihibi neten Papan xoboho yohuanax jaton xoboho rihbi yohuancani. Jesus ta Papan caisai joni qui hihcani. Honanahbo nete tihibi nincamahi tantiyamacani.

6

Siete hahxonnicabo

¹ Nincacoinaibo caícanahiya sca ta hebreobo qui helenistabo reren rerenanishqui. Nete tihibi piti hinanpaquehibaan jaton yononmabo hinanyamahiya reren rerenacani. ² Nincacoinaibo tsinquimaxon sca Criston raantibaán jato yohiquin:

—Non Papan joi yohiquin jenebahinxon piti metexxona ta tiroma qui. ³ Jaa copi man honanai siri jonibo caisnahue. Siete caisnahue, Dios Yoshiman hihbojahi rahsi. Shinan siriya rahsi caisquin, piti hinanpaqueti tee non jato hinannon. ⁴ Noque cah non yocaxonxon Papan joi yohinicabo sca jatihí —jato jacanquin.

⁵ —Jascahah ta siri qui —hihxon sca jatihixonbi caiscanquin. Huetsa cahen Esteban, shinanya siri, Dios Yoshiman hihbojahi joni. Huetsa cahen Felipe. Texe cahen Prócoro, Nicanor, Timon, Parmenas, Nicolas, jaton nahua hihpahonish bi judioni Antioquía janinhah. Jaa rahsi caiscanquin. ⁶ Criston raantibo bebon jato nichinxon mehexon jato yocaxoncanquin.

⁷ Hashoan sca cahen Papan joi caícanascái. Jerusalem janin nincacoinaibo rihbi hashoan caícanahi. Sacerdotebaán rihbi cahen hichaxon nincacoincanquin.

Esteban bichibo

⁸ Hicha Papan shinanyaxon sca Estebanen hihti hahan rahtetibojaquin. Jonibo roha-jaquin. Hahan honantijaquin Papan coshiyahpaxon. ⁹ Jaatian sca judiobaán Esteban joi bichincanquin. Hinaboma sca hahcaibo, cirenobo, alejandrino, Cilicia janinhahbo, Asia janinhahbo. Jaabo rahsichin Esteban joi bichincanquin. ¹⁰ Dios Yoshiman yanapana hashoan honanax Esteban yohuanaiya sca hahbetan yohinanti hahtipahyamacanquin. ¹¹ Yohinanti hahtipahyamascaxon jonexon coriqui hinanxon caibo sca yohuanmacanquin, quesahahbo hihxon.

—Moises qui tiromahi yohuanai tah non jaa nincacuiquiqui. Noquen Papa qui tiromahi yohuanai rihbi tah non jaa nincacuiquiqui —hihcani quesahi. ¹² Esteban qui sinatax coro corotahbo cahen jonibo rihbi judiobaán coro coromaquin. Jaton hanibo rihbi, huishani honanbo rihbi sinamacanquin. Jaabaán sca Esteban panterenenxon bihxon jaton hapo tsinquitai janin bocanquin. ¹³ Quesamisbo sca yohuanmacanquin hahqui yohuanahbo.

—Jaa joni ta nea Papan xobo qui tiromahi yohuanihqui. Noquen Moisesnin huishani joi qui rihbi tiromahi yohuani. Tiromahi yohuani ta tantiyamahihqui. ¹⁴ Joxon ta nea xobo Jesus Nazarenon potojaquetanxon noquen hihti quesacayamascai non jihuenon Moisesnin joi rihbi huetsajayaxihquiqui hah ta jaipishqui noquen nincanonbi —hihcani.

¹⁵ Jano tsinquitai hapobaán sca Esteban bejisquin sirijaxon jahuen bemanan naihoh queha Papan yonoti bemanan quesca sca jiscanquin jatihixonbi.

7

Estebanen jato yohihi

1—¿Jascama hin? —hahquin quiquin sacerdotenin sca.

2 Esteban sca yohuani:

—Hea huetsabaan, heen papabaan, hea nincanhue. Xaba Hihbo noquen Papa ta noquen xohta Abraham qui cainnishqui, Haran jema janin jihueta cariyamahax, Mesopotamia mai janin jihuetaiya. ³ Miin mai, miin jenabo rihbi potabahini catanhue, hen mia jismatihi main sca cahi catanhue hah ca noquen xohta janish noquen Papan. ⁴ Papan Cahue hahca cahen Caldeo mai potabahinax Haran janin sca jihueta. Jahuen papa mahuatipi pecaho ta neno sca Papan jaa hihuenishqui. Nea main man neno rahma jihuetai mai janinbi ta hihuenishqui. ⁵ Jaabi ta nea mai jaa hihbomayamanishqui. Ni huesti tamanehcahinti hihbomayamaquin. Hihbomayamaxon bi hinantijaquin, jahuena hihyaxahnon jahuen baque yamaha que bi jahuen baquebaana, jahuen chini baquebaana rihbi hihyaxahnon jato hinantijaquin. ⁶ Jahuen chini baquebo sca jaton nahuabaan main cahiton jaton nahuabaan jato hihbojaxon cuatrocientos bari jato tiromajaxihqui ta yohirihbinishqui. ⁷ Jaabi ta jato hinajahi jonibo hean casticanyaxihqui. Jaatian ta picóscaxon nenoxon sca hehon shinanyaxihcanihqui hih ta Papa janishqui. ⁸ Miin baquebo caijaxon jato jano jihuetai hinanah ta heen jonibo hihyaxihcanihqui hea nincacoinaibo hah ta Papan janishqui, Abraham yohiquin. Jaabo honantiyahpabo jajaxahnon hinxon sca ta Honantiyahpa jahue Papan jaa janishqui. Jaa pecaho ta Abrahamen baquejanishqui. Jahuen baquexo Isaaque cainipi huesti semanana huinonxon ta jahuen ocho neten sca Abrahamen jaa jahuen baquexo honantijanishqui. Isaaquen baque sca ta Jacobo janeya janishqui. Jacobonen baquebo rihbi sca ta noquen doce xohtabo janishqui, noquen xenibo. ⁹ José qui notsi notsixon ta noquen xenibaana jaa maromaxon hinancannishqui, Egipto mai janin bohábo. ¹⁰ Jaabi ta noquen Papa Dios hahbetanbi nihxon jan yomanahyamascanon yomanahai tihibi jaa yanapannishqui. Egipto mai janin quiquin hapon José siri joni hihqui shinannon ta José honan joni hihqui jismanishqui. Quiquin hapon sca ta Egipto mai jatihobi jaa José hihbomanishqui. Jahuen xobo hihbomaxon, jahuen xoboho jihuetaibo rihbi jatihibi hihbomaquin.

¹¹ Jaatian ta Egipto mai janin Canaan mai janin rihbi jahuenbi piti yamascaiya pihan hihcannishqui. Hihti hohmis hohmiscani. Piti merayamabirescanquin noquen xenibaana. ¹² Egipto mai janin tsinquinihbo bimi bero tsama jai joi nincaxon ta Jacobonen noquen xenibo raannishqui marohi cahábo. ¹³ Jato raanhohxon raanrihbiquin. Jaatian pari ta Hea tah hen qui, Josepan jahuen huetsabo janishqui. Jaatian pari ta Tsoabo Josepan jenabo quin jaa mai meha quiquin hapon honanscanishqui. ¹⁴ Jahuen huetsabo raanxon cahen jahuen papa Jacobo, jahuen jenabo jatihibi Josepan quenamaquin jano bohábo setenta y cinco jonibo. ¹⁵ Jahuen baquen quenamaha sca Egipto main Jacobo cahi. Canish cahen janohaxbi mahuati. Noquen xenibo rihbi yosibohax janohaxbi mahuati. ¹⁶ Mahuataiton cahen Siquem janin jato boxon jano Abrahamen jahuen coriquinin maroni jano tsahonti main sca jato tsahoncanquin Siquem janinbi. Hamoren baquebo jan maronni tsahon janinbi.

¹⁷ Papan Abraham yohini quesca sca jaonahiya ta Egipto janin noquen caibo caipahonishqui. Hichasca, jaabo. ¹⁸ Huetsa quiquin hapo sca ta jaresscannishqui, José honannihma joni sca. ¹⁹ Jaan cahen noquen caibo paranxon jato tiromajaquin. Jaton baquexobo mahuanon hihxon jato nihi naman potabahinmaquin. ²⁰ Jaatian ta Moises baquexo jahuen maman bihnishqui. Noquen Papa Diosen jisi, baquexo siri pishca. Quimisha hoxne xobohoxon jaa coirancanquin jahuen papan jahuen maman. ²¹ Tahua naman sca jonebahinscanquin. Jano racanahbo sca jaton quiquin hapon baque haibaana jaa meraquin. Meraxon cahen jahuen baquebi hahcajascaquin hanijaquin. ²² Haniscaiton cahen Egiptobaan quirica jatihibi jaa honanmacanquin. Haniscaxon hicha honanquin. Jan hahcai hohoxon joi nincacanquin.

²³ Cuarenta bari jaresscaxon ta jahuen huetsabo pasijahi cati shinannishqui jahuen caibo pasijacatsihquin. ²⁴ Jahuen caibo tiromajahiton egipto joni meraxon cahen jahuen caibo yanapanquin. Jaa tiromajahi joni copiquin rehtequin. ²⁵ Noque piconon Papan yanapanai joni tah qui hih ta hea yohihi janoxihcanihqui hihqui shinamehti. Hihcax bi jascayamaha. ²⁶ Hoxashinahax mohiyahxon sca noquen caibo rabe sinacananaiton meraxon cahen jato sina tantimacatsihquin yohiquin: ¿Jahua jenquetsahin man maton huetsabo betanbi tiromahananain? jato jaquin. ²⁷ Jascahah bi jahuen caibo tiromajahi jonin sca Moises hueranbohaxon: ¿Tsoan yohihah min noquen hapo jacatsihquin? ¿Noque pontenica hihnon tsoan mia yohihiquin? ²⁸ ¿Hoa egipto joni min hahquipi quescajaquin

min hea rihbi sca rehtecatsihquin? hahquin. ²⁹ Jascarai nincacax ta Moises jabascanishqui. Madian mai janin sca jahuen nahua tocan jihuexon rabe baquejaquin.

³⁰ Cuarenta bari huinorihbi sca jaiya ta Sinaí nihi namanxon sca jihui naman tiha pishca mapohihcamahi janin Papan yonoti jisnishqui. ³¹ Jascapa merahax rahteti. Jisquin sirijacatsihquish ta hochoma pishca caxon noquen Hihbo yohuanai nincanishqui. ³² Hea tah hen miin papabaan Papa Dios qui. Abraham, Isaaque, Jacobo jaton Papa Dios ta hea qui hihqui nincaquin. Nincacax tastahihqui. Jisti raquescai. ³³ Noquen Hihbo sca yohuanrihbihi: Hea janin tah min nichí. Miin tahe xaca potascahue. ³⁴ Egipto janin heen jonibo hohmis hohmisai tah hen jisi. Jaabo sai saihihcanahi tah hen nincacai. Jaa copi tah hen jato picohi sca botopaquetai. Johue hihchahisen hen mia Egipto mai janin raannon hahquin.

³⁵ Egipto janin jihuetahbaiton, Tsoan yohihah min noquen hapo jacatsihquin, pontenica mia hihnon tsoan mia yohihiquin hah jaabaan Moises janí que bi ta jaamama jaabi Papan raannishqui jaton hapo sca hihnon. Jato piconica sca hihnon raanquin. Naman tiha jihui mapohi janin jahuen yonoti raannon ta Papan jascjaxon Moises sca raannishqui. ³⁶ Egipto mai janinxon sca cahen hahan rahtetibojaxon hahan honantibojaxon rihbi Moisesnin jato picoquin. Hian Joshini janinxon rihbi jascajaquin. Nihi namanxon sca cuarenta bari rihbi jascajaribiquin hahan rahtetibojquin. Hahan honantibojaribiquin. ³⁷ Jaa Moisesnin ta noque israeli baquebo yohinishqui:

Mato tocan ta hea quescapa jahuen joi yohinica Papan cainmatihiqui maton huetsabo janinhahi, hahquin. ³⁸ Jaa Moises ta noquen caibo xenibo tsinguitai tocan nihnishqui. Papan naihoh queha yonoti betan ta nihnishqui. Sinaí mahchi janin rihbi ta Papan yonoti betan yohuannishqui. Noquen xenibo betan yohuanni Papan yonoti betan rihbi ta jaa nihnishqui. Hahan jihueti joi ta Papan jaa hinannishqui, mato sca jaan rihbi nincamanon hihxon.

³⁹ Jaabi ta noquen xenibaan nincacatsihyamanishqui. Jaa potabahinxon cahen jaton jointinin Egipto shinanrihbicanquin. ⁴⁰ Aaron sca yohicanquin: ¿Hoa Moises, Egipto mai janinhah noque picoho Moises, jahuen cahipishquin? Non tah non honanyamahi. Noque bebon jaabo sca canon santobo noque hahxonhue jaabo sca noquen diosbo hihnon hahcanquin. ⁴¹ Jascjaxon toro quescapa santomajacanquin. Jascjaxon jaton hinábo jaa santo rehtexoncanquin. Jaton mequemanbi jascapahahax hahan jenimacani. ⁴² Jaa copi ta noquen Papan jato potabahinnishqui. Jahuen joi yohinicabaan huishaxon yohini quescajaquin jato potabahinquin, huishi, bari, jaabo jaton dios sca hihnon.

¿Man cuarenta bari nihi namanxon hinábo rehtexonxon hea mapojaxonpahonihquin; israeli baquebaan?

⁴³ Hea queenyamaxon tah man Moloquen chopa xobo bihniqui. Huishi rihbi tah man chibanpahonihqui, Renfan janeya maton dios jai quen. Santojarahbi tah man janiqui jaa sca yocanoxon. Jaa copi tah hen Babilonia hoque tocan mato potatihí hah ta Papan jato janishqui jahuen joi yohinicabo huishamaxon.

⁴⁴ Noquen Papan jato yohini jahan honanti chopa xobo ta noquen xenibo tocan janishqui jaabo nihi naman nihnipahoni tian. Hen mia jismaha quescapahahue hahxon ta Papan Moises yohinishqui jascajaquin jan jaa xobojanon. Jaa copi ta Papan Moises jismani quescapajanishqui. ⁴⁵ Josué betan noquen papabaan jaton mai hihbojanon sca ta neno jihuepahoni nahuabo Papan camaxonnishqui jaton mai bichinahbo. Jan camaxona ta Papan chopa xoboyabi becannishqui nea mai hihbojahi sca. David quiquin hapo hihnon caman ta jaa xobo janishqui. ⁴⁶ Jaa David cahen Papan jisquin siri joni. Jascapahxon ta Papa Dios xobojaxoncatsihxon Davidinin noquen Papa yocanishqui, jahuen xohta Jacobo yamancaton Papa Dios. ⁴⁷ Queenxon bi ta Davidinin jaa xobojayamanishqui. Salomonen ta jaa hahnishqui. ⁴⁸ Jascapa xobo jai bi ta mequeman xobojahibo janin Xaba Hihbo jihueyamahihqui. Papan joi yohinica yohuanni quescari tah qui:

⁴⁹ Nai ta heen tsahoti qui. Mai ta heen taracahti qui. Jatihibi janin ta hea jai. ¿Jenquetsahpa xobojá sca min hea jaxontihin? ¿Hea jano hihti jahua jaiquin?

⁵⁰ ¿Hoa jatihibi hean hahyamaniquin? hih ta noquen Hihbo jaiqui hih ta Papan joi janin jaiqui.

⁵¹ Nincayosmabon, Papan baquebo hihqui shinanax bi tah man jahuen nahuabo res qui. Maton jointinin shinaxon maton pabinqinin nincaxon bi tah man Papa nincayamabiresai. Dios Yoshin tah man jaapantehi, mato jahuen shinan hinanpanan. Maton xenibo janí quescarihi sca tah man jai. ⁵² Papan joi yohinicabo jatihibi ta maton papabaan tiromajacannishqui. Papan ponte joni joyaxihqui yohihibo rihbi ta rehtecannishqui. Maton sca tah man jaa jahuen ponte joni paraxon rehtehohqui. ⁵³ Hahan jihueti joi Papan yonotinin mato hinanni que bi tah man bihníxon bi nincayamabiresai —jato jaquin Estebanen.

Esteban rehtehibo

⁵⁴ Jascajaquin yohihah cahen sina sinacani. Sinaxon xeta yeres yeresahcanquin. ⁵⁵ Jaatian sca Dios Yoshiman hihbojaha jaan nai bejisihniquin. Bejisihnixon cahen Papan xaba jisquin. Papa mecayaho Jesus nichu rihbi jisquin.

⁵⁶ —Jisnahue. Nai quehpemehtai tah hen jisi. Papa mecayaho noquebaque nichu tah hen jisi —jato jaquin. ⁵⁷ Jascahah bi coshin sai saihihscacani. Mequemam pabepabahini caxon jaa xecotancanquin. ⁵⁸ Jemama qui sca boxon macaman tsacacanquin. Jato betan nichu bebo cahen jano jai, Saulo janeya, beronan tahni. Jaan coiranxonnon hihxon jaton chopa pecaxon jaa taracaxon Esteban tsacacanquin rehtenoxon. ⁵⁹ Macaman tsaca tsacahibaan bi:

—Heen yoshin bihhue, heen Hihbo Jesusen —hahquin Estebanen. ⁶⁰ Jascajahax raboxonen nichish coshin sca yohuani:

—Hea nescajahax hohchataibaan bi jato casticanyamahue, Hihbon —hihqui. Jascahah cahen mahuascai.

8*Saulonen tiromajahi*

¹ Saulo rihbi cahen jaa mahuati queeni. Jaatianbi ta Jerusalem janinxon noquen huetsabo tiromajamenocannishqui hihti tiromajaquin. Tiromajahahbo jatihibi jabisi. Judea maibo janin, Samaria maibo janin rihbi jabiscani. Criston raantibo res jabayamahi.

² Papahon shinanaibaan ta hihti huinixon Esteban tsahonnishqui. ³ Hoa Saulonen ta noquen huetsabo potojaquetannishqui. Jaton xoboboho hihquicahinxon cahen jato bihquin. Bebobo, haibobo rihbi coshin bi res boxon sipo xobobo jato tsahonquin.

Samaria janin Felipe cahi

⁴ Jabisipibaan sca Papan joi yohibonaquin jaabo jano cahiton. ⁵ Samaria jema janin caxon ta Felipe nin jato Cristo joi yohibonishqui. ⁶ Jan yohihi nincaxon cahen jan hahan honantibojahi jixson huesti shinanyaxon nincacoincanquin tahqui tsamajaquetaibaan.

⁷ Jaan yohihah ta hicha tiroma yoshinyahpabo janinhax tiroma yoshinbo coshin sai saihihquish piconishqui. Yora honanyamajaquetaibo betan chantobo hihti caibo rihbi rohacahini. ⁸ Jaa copi ta jaa jema janinhahbo hihti jenimanishqui.

⁹ Felipe nocorihyamahiya cahen jaa jema janin huesti joni janish, Simon janeya. Jahuen yobepan hahxon cahen Samaria mai mehabo rahtehax, Hea tah hen coshi joni qui hihcachih. ¹⁰ Jaa yobe yohuanaiya ta jatihixonbi nincacanpahonishqui. Jaton jonibaan, jaton patorobaan, jatihibichin nincacanquin. Nea joni ta Diosen coshi qui, jahuen hihti coshi hahcaibo, hahcanquin.

¹¹ Jahuen yobepan basi jan jato rahte rahtepahoni copi jaan yohihah nincacanquin. ¹² Jaabi Papan jato jihuemayaxihqui joi siri Felipe nin yohihah nincacoincanquin. Jesucristo joi siri yohihah nincacoinaiton Felipe nin jato nashimaquin, haibobo, bebobo rihbi. ¹³ Simoman rihbi sca nincacanquin. Felipe nin nashimaha Felipe manati sca hahbetanbi nichu. Hahan honantibo Felipe nin hahcai, jan Papan coshiyaxon tsoan jascajani que ma bi hihti coshin hahcai jisish Simon rahte rahtescai.

¹⁴ Samaria mai mehakaan Papan joi bihcoina nionanscaxon cahen Jerusalem janinxon Criston raantibaan Pedro betan Juan jato qui raanquin. ¹⁵ Raanahbo cahax nocoxon sca Dios Yoshin bichibo hihxon jato yocaxonquin. ¹⁶ Jesusen jane huestichin Felipe nin jato nashimahi quen ta Dios Yoshin jato qui botopaquerihyamanishqui. Jaa copi cahen jato yocaxoncanquin. ¹⁷ Yocaxonxon mehehah Dios Yoshin bihresscacanquin.

¹⁸ Criston raantibaan mehehah Dios Yoshin bichibo jixson Simon jato coriqui hinancat-sihscai.

¹⁹ —Hea rihbi jascajati hahtipahmanahue, hean mehehahbaan sca Dios Yoshin bihnnon —jato jaquin.

²⁰ Pedronen sca:

—¿Papan hinanresai jahuen yoshin min coriquinin maroti shinanain? Miin coriquiyabi mia queyoyaxihnon. ²¹ Min tah min jahuabi bihtimahi. Jahuabi tah min bihyamayaxihqui. Papan jisi ta miin jointi tiromah qui. ²² Min tiromajaquin shinana pontescahue. Hihbo yocahue, min tiromajati shinana jan sohanon. ²³ Jointi mocapaiya mia notsi notsihi jihuetai tah hen jisi, hohchapan hina tah hen mia jisi —hahquin Pedronen.

²⁴ —Maton caya hea yocaxonnahue man hea yohihi quesca jayamanon —hahquin Simoman.

²⁵ Jaatian sca jaabaan jisobo yohixon noquen Hihbaan joi siri rihbi yohihax Jerusalem janin cahi caribihi. Samaritanobaan jemabo janin joi siri yohibonahi bocani.

Etiopia joni betan Felipe behchinani

²⁶ Noquen Hihbaan yonotinin sca ta Felipe yohinishqui:

—Caresscahue. Jerusalem janinhax Gaza janin cahi bahin picoti catanhue chiponqui —hahquin. Jaa bahin cahen tsoabi jihueyamahan. ²⁷ Caresscaax jano sca cahi. Picoti cahi jisi bi Jerusalem janin Papahon shinantanipish Etiopía joni jaa bahin jahui. Jaa cahen hapo. Etiopíabaan quiquin haibo hapon coriqui coirannicah. Jahuen hapon jane cahen Candace. ²⁸ Isaíasnen huishani joi jisanan jahuen tarametinin tsahotax cabachonen ninihah taramehquirani jahui. ²⁹ Dios Yoshiman sca Felipe yohiquin:

—Behchitanhue. Jahuen tarameti janin nanetanhue —hahquin. ³⁰ Bishquihicanahi caxon sca Isaías janeya Papan joi yohinication huishani joi jisish jaa yohuanhonahi nincaquin. Nincaxon yocascaquin:

—¿Min jisi joi min honanain? —hahquin.

³¹ —¿Jenquetsahaxon hen honantihin, huetsan hea yanapanyamahaia? Hea patax tsahoti nanehue —hahquin. ³² Jan jisbenahi huishani joi ta nea qui:

Carnero rehtenoxon hiohah bi neteresai quescarihbihi ta jahua hihyamahiqui. Jahuen rani rahmaxcorohah bi carnero baque sai saihiyamabiresai quescarihbihi ta yohuanymahihqui.

³³ Jaa rabinmaxon ta pontejayamaquin casticancaniqui.

Rehteres ta Tsoa jahuen xohtabo quin hih tsoabi jayamascanon hihqui jaa quirica.

³⁴ Jaatian:

—¿Yohinica jascarai tsoa yohihiquin? ¿Jaabi nan? ¿Huetsa joni nan? Hea yohirohahue —Felipe yocaquin. ³⁵ Jaatian sca jaa quiricaya yohuanxon Jesusen joi siri Felipenin yohiquin. ³⁶ Bahin taramehcanahi cahax jano hian jaiton sca nococani.

—Jise. Jano ta jene jaiqui. ¿Jenquetsahpahi min hea nashimatimahin, Jesusen joni sca hea hihnon? —Felipe yocaquin.

³⁷ —Miin jointiboyaxonbi nincacoinaiton tah hen mia nashimatihí —hahscaquin Felipenin.

—Jesucristo ta Papa Diosen baque qui. Hen tah hen shinancoinai —hahquin.

³⁸ Jahuen tarameti janobi racarenennon cahen cabacho rebinica yohiscaquin. Jatón tarameti racarenenaiya cahen bototax rabebi jene nenichi, Felipe betan jaa Etiopía hapo. Janoxon sca cahen Felipenin jaa hihquimatantquin nashimaquin. ³⁹ Jaabo mapescaya bi Dios Yoshiman Felipe bihinihniquin. Felipe jisymascaax bi jaa huesti sca jenimahanan sca caresscaribihí. ⁴⁰ Azoto jema janin sca sanarenenxon ta jano jai jemabo janin sca joi siri Felipenin yohibonanishqui, Cesarea jema janin noconoxon caman.

9

Saulo Hihbo qui hinamehti (Ha 22.6-16; 26.12-18)

¹ Jasca Felipe jai bi cahen noquen Hihbo qui hinamehtaibo tahtijaxon, Hen tah hen mato rehtetihi, Saulonen jato jaquin. Jato tahtijahax quiquin sacerdoté janin cahi. ² Caxon, yocaquin: Jayaxon joni bihti quirica hea hinanhue hahquin. Jascjaxon cahen Damasco jema janin tsinquitai judiobo qui hinanti quirica huishamaquin. Criston joi bichibo meraxon jato nexaxon jaa quiricayaxon Jerusalem janin bebobo, haibobo rihbi hionoxon jascapa quirica huishamaquin. ³ Huishamahax jaya cahi. Damasco qui nocoti hochoma nichibo sca naihoh quehax xabacahinai xabapan jato xabajaquin. ⁴ Main paquerenenxon sca yohuanai joi nincaquin.

—Saulon, Saulon. ¿Jahua copi min hea tiromajacatsihquin chibanain?

⁵ —¿Tsoa min quin, Hihbon? —hahscaquin.

—Hea ta Jesus qui, hea tiromajacatsihquin min hea chibanai. ⁶ Huenihue. Jema janin catanhue. Jahueja min jatihin, jano ta mia yohinoxihcanihqui —hahquin. ⁷ Yohuanai nincaxon bi jahuabi jisyamahax hahbe nichibo rahtetax nihreneni. ⁸ Main racatax huenicahuanxon jahuen bero rahcoyamaquin bi Saulonen jahuabi jisti hahtipahyamascaquin. Jisyamahiton sca hahbe nichibaan mehuexon Damasco jema janin sca hioquin. ⁹ Quimisha neten sca jano hihqui. Jahuabi jisymascaquin. Jahua piyamaquin. Xehayamarihbiquin.

¹⁰ Jaa Damasco jema janin cahen Criston joni jai, Ananías janeya. Jaan cahen namaquen noquen Hihbaan quenahi nincaquin:

—Ananin.

—Neno tah hen qui, Hihbon —hihscai.

¹¹ —Huenihue. Derecha janeya bahin caxon Judasen xoboho Tarso janinha joni betanhue, Saulo janeya. Hea ta yocaquihqui. ¹² Namaquen jismahah ta miin janeya joni

jisishqui. Jahuen xoboho hihquixon jahuen bero sirinon hihxon jaa mehehi ta namaquen jisishqui —hihscái noquen Hihbo.

¹³—Jerusalen janinxon noquen huetsabo jan hicha tiromajahi tah hen hichaxon yohihi nincarahsihi, Hihbon. ¹⁴Neno sca roqui sacerdote hapobaan quiricaya jahui, mia yoca-caibo rahsi bichí —hihqui Ananías.

¹⁵—Jaabi cahue. Hen caisax jaya teeti tah qui. Huetsa jonibo, quiquin hapobo, israeli baquebo rihbi jan heen jane jato nincamanon hihxon tah hen jaa caisai. ¹⁶Hea copi jan hihti teneyaxihquibo tah hen jaa jismayaxihqui —hihqui noquen Hihbo.

¹⁷Jascahah caresscai Ananías. Jaa xoboho hihcoxon mehaxon yohiquin:

—Heen huetsa Saulon, min hahan jahui bahin mihqui cainipixon ta noquen Hihbo Jesusen hea raanihqui, miin bero siriscanon. Dios Yoshiman rihbi mia hihbojanon —hahquin.

¹⁸Jaatianbi jahuen bero janinhax poto quescapa romishin pototani. Jahuen bero siricahincaax hueniti. Hueniscaiton cahen Ananíasnen nashimaquin. ¹⁹Pihax Saulo tantiscái. Damasco janinha Criston jonibo betan sca basima tahni jihuetai, jahuentihi nete rah.

Damascobo Saulonen nincamahi

²⁰Jaatian sca judiobo tsinquiti xoboboho mapecanaxon jaan jato yohibonaquin, Jesus ta Papa Diosen baque qui, hahbonaquin Saulonen. ²¹Jaa nincacaibo rahsi rahte rahteti.

—¿Jesusya yohuanaibo rahsi neatohon Jerusalen janinxon tiromajayamarahsihiquin? ¿Jato tiromajanoxon neno joyamahipishquin? ¿Jato nexaxon sacerdote hapobo qui hiohi joyamahipishquin? —hihcáni. ²²Jaabo jascarai bi Saulo coshihi. Nete tihibi hashoan coshicanaxon Damasco janinha judiobo netemaquin. Jesus ta Papan caisai joni qui hihxon Papan huishamani joi yohiquin jato honanmaquin.

Saulo cahnecahini cahi

²³Basiscaxon cahen jaa rehteti judiobaan shinanscaquin. ²⁴Rehtenoxon bariyahpan yame rihbi jahuen xobo xehqui quexecanquin. Mia ta rehtecatsihcanihqui Saulon, hahscaquin caibaan. ²⁵Criston jonibaan sca yame jema macan chique huinomaxon tasa qui Saulo nanexon botonpaquecanquin catannon.

Jerusalen janin Saulo nocoti

²⁶Botonahbo cahi Jerusalen janin nocoti. Criston jonibo janin hihquicatsihqui bi raquecani jatihibi. Criston joni hihqui shinanyamacanquin. ²⁷Mapemacatsihyamahiboya cahen Bernabé janeya jonin sca Criston raantibo janin Saulo hioquin. Hiohah bahinxonbi noquen Hihbo jixson jan nincacuípi jato yohiquin. Damasco janinxon jan raquexonma Jesusen joi siri yohirahsihi jato yohiquin. ²⁸Jato betan sca jihuxon Jerusalen janin jato pasijapaquexon raquexonma noquen Hihbaan joi siri yohiquin. ²⁹Judiohax bi griego joi yohuanaibo judiobo sca huetsayohuani. Joi bichincatsihquibaan bi:

—Jascama ta qui —jato jaquin. Jaabaan rihbi jaa rehtecatsihscái. ³⁰Rehtecatsihquibo honanxon noquen huetsabaan Cesarea janin sca Saulo hioquin. Janohax sca Tarso jema janin canon raancanquin.

³¹Jaatian jatihibi janin siripih sca jihuecáni; Judea main, Galilea main, Samaria main rihbi noquen huetsabo siripi jihuescái. Coshijaquecáni. Noquen Hihbo qui hohchati qui raqueti jihuetai. Dios Yoshiman rihbi jato sirijaquin shinanmaquin.

Eneas rohajahibo

³²Jato tocan ta jatihibi janin Pedro nih nipahonishqui. Lida janin jihuetai Papan baquebo qui nocorihbihi. ³³Jano cahen Eneas janeya joni meraquin. Ocho bari yora honanyamaquetax jahuen racatinin racatai meraquin.

³⁴—Enin, Jesucriston ta mia rohajahiqui. Huenixon miin cacajati bihue —hahquin Pedronen. Yohihah cahen hueniscái. ³⁵Jaa jixson ta Lida jema janin jihuetaibo Cristo qui hinamehnishqui jatihibi. Saron jema janin jihuetai jatihibi rihbi Cristo qui hinamehti nincacoinax.

Dorcax teehihribihi

³⁶Jaatian ta Jope jema janin rihbi Criston joni janishqui, haibo. Tabita jahuen jane. Tabita ta chaxo hihcatsihquiqui. Jaa haibaan ta caibo siribojaxonpahonishqui hicha. Jato yanapanquin jatohon shinanxon. ³⁷Jascapahax bi hisinax mahueti. Mahuascai bi nashimaxon bochiquiha tapon racancanquin xoboho. ³⁸Jope ta Lida hochoma qui. Lida janin Pedro jai honanxon cahen Noque janin hixon jorihue yohihi canon, Criston jonibaan rabe joni raanquin. ³⁹Yohihahbo cahen jato betan Pedro cahi caresscai. Nocotaiton jano haibo racanahbo chique janin Pedro hioacanquin bochiquiha tapo janin. Jano yononmabo rahsi tsahoti mayacahuani. Huinihi tsahocani. Cotonbo, sahuetaibo jan jihueparixon jato

quehxonrasihi jismahi tsahocani. ⁴⁰ Jato jatihibi picomaxon raboxonen nihxon Papa yocaxonquin Pedronen. Yocaxonon mahuatah haibo jisxon sca:

—Tabitan, huenihue —hahquin. Jascahah jahuen bero peehahtanxon Pedro jisish tsahohihnascai. ⁴¹ Tsahoscai bi mehuetanxon Pedronen huenihniquin. Papan baquebo quenaxon yononmabo rihbi quenaxon teehihqui jato jismaquin. ⁴² Jan jascajaha Jope janin jihuetaiibo jatihibi yohiscacanquin. Nincaxon hichaxon nincacoinax noquen Hihbo qui hinamehti. ⁴³ Basi tahni sca Jope janin Pedro jihueti, Simoman xoboho. Simon ta yohina bichi poconica hihpahanishqui sapatojatijaquin.

10

Cornelio betan Pedro

¹ Cesarea jema janin ta sontaro hapo japahonishqui Cornelio janeya. Cien sontaroboyahpa hapo. Italiano hahcaibo cahen jahuen sontarobo. ² Jaa sontaro hapo cahen Papahon shinanai joni. Jahuen xoboho jihuetaiibo jatihibi hahbetan Papa qui hohchati qui raqueti. Jema janin jahujomabo coriqui hinanresquin. Papa Dios jaayocaquin. ³ Bari racapaquescaiya cahen Papan yonoti hahqui nocoti jahui jisquin namaquen jisijaquin.

—Cornelion —hahquin Papan yonotinin. ⁴ Jaa jisish hihti raquetax:

—¿Jahua min queenain, Hihbon? —hihscai.

—Min yocaxonai ta Papan nincacuihqui. Min joni huetsa yanapannoxon coriqui hinanresai ta shinanihqui. ⁵ Jope janin canon jonibo raanscahue, jano jai Simon neno hihuehahbo. Jahuen jane huetsa ta Pedro qui. ⁶ Huetsa Simoman xoboho ta jihuetihqui, yohina bichi poconicatón xoboho, quebijistima hian quexabi —hahquin Papan yonotinin.

⁷ Papan yonoti yamacahinscaiya rabe jahuen hahxontibo quenaxon Papahon shinanai sontaro rihbi quenaquin jahuen xobohoxon teexonai jahuen sontaro. ⁸ Jan rahma jisibi jato yohixon Jope janin jato raanscaquin.

⁹ Raanah becani. Nichish bahin hihshinahax mohiyahtax nihnichi jema hochoma sca jaabo jahuiya jaa xobo champani pemacanyaxon Papa yocaqui Pedro mapeti barin manan tsacahiya. ¹⁰ Pihan hihquish picatsihscai bi cahen xobohoxon pitijaquin janquenjariyamacanquin. Jaatian namaquen jisijaquin jisquin. ¹¹ Nai quehpemehtai jisquin. Hani sávana quescapa hoquen panexbehcoinxon main caman botonai jisquin. ¹² Jaa chicho cahen jatihibi yohinahbo main ninotaibo rihbi, hihsabo rihbi jai.

¹³ —Huenihue, Pedron. Rehtexon pihue —hihqui nincascaquin.

¹⁴ —Hen tah hen pitimahi, Hihbon. Jahuentianbi tah hen rishtayabo piyamaniqui, pitimabo —hahquin. ¹⁵ Yohuanai nincarihbiquin:

—Siri sca ta qui Papa jaiya tah min tiroma ta qui hih min jatimahi —hihqui.

¹⁶ Quimisha coti jascահանան. Jaatian jisi bi naihoxon sávana bihinhnihbihquin.

¹⁷ Jan namaquen jisibi jahua jenquetsi jascarihquin hihxon shinanscaquin. Shinan shinanaiya bi Cornelionen raanipiho xehqui janin nocoscai. Simoman xobo yocacahceni.

¹⁸ —¿Simon Pedro hahcaibo neno jihueyamahiquin? —hihceni yocaachi.

¹⁹ Jan jisibo Pedronen shinanparihi bi Dios Yoshiman yohiquin:

²⁰ —Hoa ta mia benahi jahuiho qui. Huenihue tahca. Bototax basihaxma jato betan caresscatanhue. Hean horixon raanah ta becanihqui —hahquin.

²¹ Botoxon sca:

—Hea tah hen man benahi joni qui. ¿Jahua queenax man jahuin? —jato jaquin.

²² —Noquen hapo ta Cornelio qui, cien sontaroboyahpa. Sirijaquin shinanai joni tah qui. Noquen Papahon shinanai. Jatihibi judiobo ta jahan jenimahiqui. Jaa ta Papan yonotinin yohihpishqui, Jonibo raanhue, hahquin. Mian yohihi joi jan nincanon hihquish tah non mia bichi jahui jahuen xoboho min catannon —hahcanquin.

²³ —Mapenahue —hahxon sca jano jato hoxamashinaquin. Hoxashinahax mohiyahtax sca jato betan caresscai. Caibo Jope janinha noquen huetsabo rihbi ta jaa manahi bocanishqui.

²⁴ Nihbahinahpish huetsa neten sca Cesarea janin nococani. Pedro nocoti manahannan jahuen jenabo jatihibi quenamaxon, jahuen hahbe rabeti siribo rihbi Cornelionen jato quenamaquin. ²⁵ Pedro mapescaiya cahen behchih cahax jahuen tahe naman betihihpaqueti. ²⁶ Jaa hueniquin Pedronen yohiquin:

—Huenihue. Hea rihbi tah hen mia quescapa joni qui —hahquin.

²⁷ Jaa yohuanquinhanan xoboho hihcoxon hicha jonibo nocohihnascai meraquin.

²⁸ Jato meraxon:

—Nahuabo pasijatima joi ta noque judiobo jai. Nahuabaan xoboho mapetima joi cahen noque jai. Jaa cah man honanai. Jaabi ta Papan hea jismahipishqui, mehetima rishtayahi hen tsoabi jayamanon. Jato yohuanquihnax noque rishtaya jai ta tsoabi

yamahihqui. Hen honannon hihxon ta Papan hea jismahipishqui. ²⁹ Jaa copi tah hen yoresscái, Caresscatanhue Papan hea jaáh. Hea yohiscanahue tahcah. ¿Jahua copi man hea quenamahipiquin? —jato jaquin.

³⁰ Cornelio sca yohuani: —Chosco nete sca nescaran bari racapaque sca jaiya tah hen heen xobohoxon Papa yocaxon pehneni chopaya joni hea bebon sanarenenai hean jisipiqui. ³¹ Hea ta yohihpishqui: Cornelion, min yocaxonai ta Papan nincaquihqui. Min joni huetsa yanapannoxon coriqui hinanresai ta shinanihqui. ³² Jope janin jonibo raanscahue, Simon Pedro hahcaibo quenamaquin. Yohina bichi poconica Simoman xoboho ta jihuetihqui, quebijistima hian quexabi, hah ta hea jaipishqui. ³³ Jaatianbi tah hen mia quenamanoxon raanipiqui. Jahuerohahi tah min nocoscai. Neno tah non noquen Papan noque jisiya noque tsinquitai, noquen Hihbaan mia yohihi joi nincacatsihqui —hahquin.

Cornelion xoboho Pedro yohuanai

³⁴ Pedronen sca jato yohiquin:

—Rahma tah hen honancoiscái. Papan ta caibo mentan huetsabo hashoan siri jisyamahiqui. ³⁵ Papahon shinanxon ponte hahcai nahuabo ta Papan siri jisiqui. Hen tah hen honancoiscái. ³⁶ Noque israeli baquebo qui ta jahuen joi raannishqui. Jatihibi jonibaan Hihbo hihxon ta Papan rahuiboma sca noque janon Jesucristonen noque hihbojahiqui. ³⁷ ¿Judea mai jatihobi janin jahua jahoxquin? Man tah man honanai. Galilea mai mehax ta joi behna jamenonishqui, Juaman yohixon nashimahipi pecaho. ³⁸ Nazaret janinha Jesus ta Papan caisai joni qui, non honannon hihxon sca ta jahuen Yoshin siri Papan jaa hinannishqui, jahuen coshi rihbi hinanquin. Papan yanapana sca ta jonibo sirijabonahi nihninishqui, tiroma yoshiman hihbojaha jonibo rihbi jato jatihibi sirijabonaquin. Man tah man honanscai. ³⁹ Neno noquen judiobaan mainxon jan hahpahoni, Jerusalem jema janinxonbi rihbi jan hahpahoni jatihibi tah non jisnixon yohinica qui. Jihuin hueonxon rehtehibo rihbi jisoxon tah non yohihi. ⁴⁰ Jan hihquipi jahuen quimisha neten sca Papan huenirihbixon jisibo hihxon noque qui cainmahi jisoxon tah non yohirihbihi. ⁴¹ Jan hihquipish bi hahquirihbi teehiquipi non hahbetan pixon xehacahchihi ta Papan noque caisoxqui, Cristo jihuerihbiscai joi yohihibo sca noque janon. Jatihibichin jisnon hihxonma bi noque jan caisaibaan jisnon hihxon ta noque janin jaa cainmahoxqui. ⁴² Jahuen joi siri non jonibo yohinon ta noque yohihoxqui. Jihuetaibo betan mahuanihbo jan siri hin tiroma quin hihxon jisnon hihxon ta Papan jaa yohinishqui. Jaa joi rihbi non yohinon ta noque yohihoxqui. ⁴³ Cristo nincacoinai jonibo jatihibi ta jaan jaton hohcha sohuaxoniqui. Jatihibi Papan joi yohinicabo ta jascari yohuannishqui —jato jaquin.

Dios Yoshin bichibo judiomabo

⁴⁴ Jascari Pedro yohuanparihi bi nincacaibo jatihibi Dios Yoshiman hihbojaquin. ⁴⁵ Judioxon bi nincacoinaibo Pedro betan jahuex rahtescái. Jaton nahuabo que bi Dios Yoshiman jato hihbojai jisish rahtecani. ⁴⁶ Huetsapahi yohuanai jato nincacanquin. Papa Dios qui jaabo hihti siripi yohuanai nincacax rahte rahtecani. Jato sca Pedronen yohiquin: ⁴⁷ —Non haho quescajaribiquin ta neabaan Dios Yoshin bichiqui. Non jato nashimanon. Tsoanbi ta Jato nashimayamanahue noque jatimahiqui —Pedronen jato jaquin.

⁴⁸ Jascaxon Jesucriston janen jato nashimanon Pedronen yohiquin. Nashimaha sca: —Huetsa neten cayanoxon noque qui banetahue —Pedro jacanquin.

11

Jerusalem janinhahbo Pedronen yohihi

¹ Jaa pecaho cahen Judea mainxon Criston raantibo betan janoha noquen huetsabaan nincanquin. Jaton nahuabaan rihbi Papan joi bichipi nincanquin. ² Jerusalem janin nocotaiton sca Pedro pontecatsihquin, Jato honantijati ta jaiqui hihnicabaan Pedro yocaquin:

³ —¿Jahua jenquetsahin min noquen nahuabo janin hihcohipiquin? ¿Jahua jenquetsahin min jato betanbi pihipiquin? —hahcanquin.

⁴ Jan jisipibo sca Pedronen jato yohiquin sirijaquin:

⁵ —Jope jema janinxon noquen Papa yocaxon tah hen namaquen jisijaquin hihtihosi sávana quescapa jisipiqui, hoquen panexbehcoinxon naihohxon botonai. Hea bebonbi ta botonipishqui. ⁶ Jisquin sirijaxon tah hen yohinahbo, nami pinicahbo, ninotaibo, hihsabo rihbi jisipiqui. ⁷ Yohuanai sca hean nincanquin, Huenihue, Pedron, rehtexon pihue, hea jaquin. ⁸ Hen tah hen jascajatimahi, Hihbon, jahuentianbi tah hen pitimabo rishtayabo piyamaniqui, hahquin hean. ⁹ Jaabi hahquirihbi naihoh quehax yohuani, Siri sca ta qui Papa jaiya tah min tiroma ta qui min jatimahi, hihqui. ¹⁰ Quimisha coti non jascadahnanai bi naihohxon jatihibi hahquirihbi ninihihniquin. ¹¹ Jaatianbi ta noque jano hihqui xobon

quimisha joni nocotipishqui Cesarea jemanxon raanipi. ¹² Nahua tah qui hihquishma hen jato betan catannon ta Dios Yoshiman hea yohihipishqui. Nea seis noquen huetsabo rihbi ta hea manahi bohopicanaxqui. Jahuen xoboho tah non hihcohipiqui. ¹³ Jaan ta noque yohihipishqui. Jan jisi bi jahuen xoboho nichu Papan yonoti jahui. Nihrenenxon cahen Jope janin joni raanhue Simon Pedro hahcaibo hihuenon, hahquin. ¹⁴ Hahan mia Papan teehimahi joi ta mia yohixihqui miin xoboho jihuetaiboyabi, hah ta Papan yonotinin jaa jaipishqui. ¹⁵ Hean jato yohimenohiya bi ta Dios Yoshiman jato hihbojahipishqui non yohimenohi tian jan noque hihbojahue quescajaribiquin. ¹⁶ Jaatian tah hen noquen Hihbaan noque yohini joi shinanscaipiqui, Juaman jenen nashimahi bi tah hen jenen nashimaquin hahcajaquin mato Dios Yoshin hinanyaxihqui, hah jan noque janí tah hen shinanscaipiqui. ¹⁷ Noquen Hihbo Jesucristo nincacoinaiton Papan noque hinanho Yoshin jato rihbi jan hinanaiya ¿jahua hihxon hen Jascajayamahue Papan hen jatihin? —jato jaquin.

¹⁸ Nincacax netecani. Papa qui sca siripi yohuancani:

—Nahuabo rihbi ta shinan pontemaxon jato teehimahi hihqui, hicahisen —hihcani.

Antioquia janinhahbo noquen huetsabo

¹⁹ Hoa Esteban rehtexon jato tiromajaha jabisaibo ta Fenicia main caman bocannishqui. Chipre mai janin, Antioquia janin rihbi ta nococannishqui. Caquin bi judiobo rahsi Papan joi yohibonacandin. ²⁰ Caibo Chipre mai janinhahbo hihxon, caibo rihbi Cirene janinhahbo hihxon, Antioquia janin nocoxon sca jaton nahuabo rihbi noquen Hihbo Jesusen joi siri yohiquin. ²¹ Noquen Hihbaan ta jato yanapannishqui. Jaabaan yohihah ta hihti caiboxon nincacoinxon noquen Hihbo bihnishqui.

²² Jascajahibo nincaxon ta Jerusalen janinxon noquen huetsabaan Bernabé raannishqui Antioquia janin canon. ²³ Nocoxon Papan jahuen shinan jato hinanai jisish jenimahi. Noquen Hihbo jeneyamahahbo hihxon cahen jaan jato yohiquin sirijaquin noquen Hihbaan yohihi quescabijaquin hahcabo hihxon. ²⁴ Janohahbo hicha joni sca noquen Hihbaan hihbojaquin. Bernabé ta siri joni janishqui Dios Yoshiman hihbojaha joni. Papan jato hahxontihí cahen jaan shinancoinquin.

²⁵ Saulo benahi sca Tarso janin Bernabé cahi sca cahi. Saulo meraxon Antioquia janin hihuequin. ²⁶ Huesti bari Papan caisaibo betan tsinquixon cahen rabechin hicha jonibo haxemaquin. Jano pari ta Criston jonibo cristianobo janemenocannishqui.

²⁷ Jaatian Jerusalen janinhax Papan jismaha yohihibo nocoti Antioquia janin. ²⁸ Agabo janeya sca jato tocan nihxon jatihibi main piti pishinscaax pihan hihyaxihquibo jato Dios Yoshinyaxon yohiquin. Jan jascani cahen jascacoinscai, Claudio quiquin hapo hihqui tian. ²⁹ Jaa copi cahen Judea main jihuetai noquen huetsabo qui coriqui raanti Criston jonibaan shinannish. ³⁰ Jatihixonbi hahtipahnoxon caman raanti shinancoinquin. Shinaxon jaabaan shinanai quescabijaquin. Jaton pastorobo qui hinantannon hihxon Bernabé betan Saulo jaya catannon hihxon raancanquin.

12

Jacobo rehtehipixon Pedro sca bichibo

¹ Jaabo cahiya ta jaton quiquin hapo Herodesnin caibo Papan joi nincacoinaibo bihnishqui, jato tiromajanxon bihquin. ² Juaman huetsa ta Jacobo janishqui. Jaa ta Herodesnin rehtenishqui. ³ Jaa rehtehiya judiobo jenimahi jisxon Pedro rihbi bihquin chahoma paan fiestajahiboya. ⁴ Bihxon sipo xoboho tsahonquin. Chahoma paan fiesta pecaho rehteyaxahpan costanahbo hihxon jahuen santonrobo Pedro coiranmaquin. Chosco coiranti janahue, huesti coiranti cahen chosco sonto, jato jaquin. ⁵ Sipo xoboho Pedro tsahotaiya cahen noquen huetsabaan noquen Papa hihti yocaxonquin.

Hihbaan Pedro picohi

⁶ Jisibo hihxon bahquish Pedro rehtenoxahpan hih Herodes jai bi sipo xoboho Pedro hoxahi. Jaa yamebi rabe cadenanen jato qui menexah rabe sonto napon Pedro hoxahi. Xehqui janin rihbi sonto coirani xehqui janichi. ⁷ Jaatian noquen Hihbaan raanah jahuen naiho queha yonoti sanareneni jahui. Sipo xobo chicho xaba siri jarescai. Rahpasxon Pedro mohinquin.

—Huenihue histon —hahquin. Huenitaiya hahan menexipi cadena mepequehti.

⁸ —Miin chopa sahuexon tahe xaca rihbi sahuehue —hahquin Papan yonotinin. Jascajahua sahuequin.

—Miin tarin rahcoxon hea chibanhue —hahquin.

⁹ Jascahah hahbe cahi picoscai. Papan yonotinin hahcoinaí honanyamaquin. Namaquen jisija tah hen jai hihqui. ¹⁰ Huetsa coiranai sonto huinoxon huetsa rihbi

huinohax yami xehpoti qui nococani, jano jema qui cati. Hahmebi xehpoti quehpemehti. Picotax bahin sca bocani. Cahiya bi Papan yonoti yamacahinscai. ¹¹Shinanscaax:

—Herodesnin hea rehteyamanon hihxon ta jahuen yonoti Papan raanaxqui heen caibaan hea jacatsihqui jatihibi rihbi hea jayamanon hihxon. Rahma tah hen honanquin sirijascai —hihqui Pedro.

¹²Honancoinscaax Marian xobon cahi. Jaa María ta Juaman mama qui. Juaman jane huetsa cahen Marcos. Jaa xoboho tsinguxon ta Papa yocacannishqui hichaxon Pedro yocaxonquin. ¹³Jemanhihti xehpoti Pedronen tontonhahcai nincacax Rode janeya xontaco jisi jahui. ¹⁴Pedro joi nincaxon honanax hihti jenimahax quehpenxonti shinanaxma bishquihicanahi caribihi xobon. Hihcohax:

—Pedro ta jemanhihti janin nichiqui —hihqui.

¹⁵—Min tah min tehquehiqui —hahcanquin.

—Hihyama tah hen jai. Jaa coin tah qui —hihresi.

—Jahuen yoshin rah ta qui —hihscacani. ¹⁶Pedronen xehpoti tontonhahquin jeneyamaquin. Quehpenscaxon jisish rahte rahtecani. ¹⁷Netetahbo jahuen mequen sanaxon sipo xobo janinhah noquen Hihbaan jaa picohax jato yohiquin.

—Jacobo, noquen huetsabo rihbi yohiscatannahue —jato jabahini huetsa xoboho caresscai.

¹⁸Xaba paquescaiya sca rahtetax sontarobo coro coroti, hihti corocani. ¿Jahuen Pedro cahaxquin? hihcani. ¹⁹Jato Benatannahue hahca bi benacasquimahiboya coirannica sontaro yocapaquexon, Nea coirannicahbo rehtenahue hahscaquin Herodesnin. Jascajahax Judea mai janinhax Cesarea jema janin jihueta sca Herodes cahi.

Herodes mahuatai

²⁰Jaatian sca Tiro mai janinhahbo qui Herodes sinati. Sidon janinhahbo qui sinarihbihi. Jaa copi huesti shinanyahax hahqui nococani. Nocoxon jahuen xobo coirannica Blasto yohuanquihnxon jeenhahmacanquin jan jato yanapannon. Quiquin hapo sca hihti yocacancanquin jan jato qui sinayamscanon hihxon. Jahuen mai janinhax jaton piti jahui copi raejacatsihcani. ²¹Jaa neten yohuanyaxahnpan hih jan jaipi jaa nete nocotaiya jahuen quiquin hapo tari sahuehax, jahuen quiquin hapo tsahotinin tsahoxon basi yohuanquin Herodesnin jato yohi yohiquin. ²²Herodes yohuanai nincacax:

—Diosax tah min yohuanai. Joni yohuanaima ta mia qui —hihcani coshin. ²³Jaatianbi, Jascama ta qui, Papa Dios huesti ta Dios qui, hih jan jayamahi copi noquen Hihbaan yonotinin Herodes rishquiquin. Rishquihah xenahax mahuatai.

²⁴Herodes mahuataiya sca Papan joi caicanascai. Hashoan hocho sca nococanahi.

²⁵Jaatian antioquiabaan coriqui hinana Jerusalem janin noquen huetsabo qui jaa coriqui hinantanax Bernabé betan Saulo joribiscái. Juan rihbi becanquin, Marcos cahen jahuen jane huetsa.

13

Bernabé, Saulo canon raanaibo

¹Antioquiá janin ta Papan caisaibo tocan haxemanicahbo betan Papan jismaha yohinibabo japahonishqui, huetsa cahen Bernabé, huetsa cahen Simon, joni huisoni hahcaibo, huetsa cahen Ciréne janinhah Lucio, huetsa cahen Manaen jaton gobernador Herodesnin yanapanicah, huetsa cahen Saulo. Jaabo rahsi. ²Piti tenehahnan Papahon shinanaiton Dios Yoshiman jato yohiquin:

—Hen jato yohihi tee jatannon Bernabé betan Saulo raannahue —jato jaquin. ³Jascajaha piti tenehahnan Papa yocaxon jato metsoncanquin, mato tah non yanapantihí hahxon jascajanquin. Jascajaxon jato camacanquin.

Chipre janin Papan joi nincamahibo

⁴Jascajaquin Dios Yoshiman camahah Seleucia jema janin cahax Chipre mai pishca caman quebijistima hian nontin pohquejaqueti. ⁵Salamina jema janin mapexon judiobaan tsinguiti xobohoxon Papan joi yohicanquin. Juaman rihbi ta jato yanapanishqui. ⁶Jaa mai pishca nabebacahini cahax Pafos jema janin nococani. Jano ta yobe joni meracannishqui, Barjesus janeya. Judio. Papan jismaha yohinichicamahi. ⁷Jaa ta janoha tininti teexonai joni hihpahonishqui. Tininti ta Sergio Paulo janeya janishqui, honan joni. Papan joi nincacatsihxon jaa tinintinin Bernabéya Saulo quenamaquin. ⁸Jaa yobepan jane huetsa cahen Elimas, yobe hihcatsihqui. Jaan jato Jascama ta qui, hahquin, tinintinin nincacoinmis hihxon. ⁹Jaatian Pablo hahcaibo Saulo Dios Yoshiman hihbojaha jaa yobe bejisquin sirijaxon yohiquin:

¹⁰—Mia tah min tiroma yoshiman baque qui. Jatihibi pontejaquin shinanaibaan rahui ta mia qui. Paran paranmis. Hihti tiromajaquin shinanaí ta mia qui. ¿Papan ponte bahibo

min mayamahi tanticatsihyamahin? ¹¹ Jisresscahue. Noquen Hihbaan ta mia mehehiqui, benchescaxon min bari basi tahni jisyamascanon —hahquin.

Jan jascahiya bi jahuen bero coropax bahquishcahinscai. Tsoan hea mehuetanxon hiotihiquin, hihquish joni benahi huea hueacanahi cahi. ¹² Jaa jascahi jisxon noquen Hihbaan joi nincacax rahtexon jaton tinintinin nincacoinquin, jahuen jointiboyaxonbi nincacoinquin.

Antioquia janin nocotaibo

¹³ Jaatian Pablo, jaabo, Pafos mai potabahini nontin caresscaax Panfilia mai janin nocoti Perge jeman. Jano jato potabahini ta Jerusalem janin sca Juan caribinishqui. ¹⁴ Perge janinhax cahax Pisidia mai meha Antioquia qui nococani. Jaton tantiti neten sca janoha judiobaan tsinquiti xoboho hihcohax tsahocani. ¹⁵ Moisesnin huishani joi nincamaxon Papan joi huishaxon yohinicabaan joi nincamaxon tsinquiti xobo coirannicahbaan jano tsahotai bi jato quenaquin:

—Noque huetsabaan, jonibo yohiti joi jaxon nihhinaxon noque yohirohahue —hahcanquin.

¹⁶ Jascahahbo nihhinaxon mequen sanaxon Pablon jato yohiquin:

—Heen caibon, noquen Papa Diosohon shinanaibon, hea nincanahue. ¹⁷ Noque israelibaan Papa Diosen ta noquen xenibo caisnixon Egipto main jaabo jihuetaiya jato cañjanishqui. Jahuen coshi jismaxon ta janohax piconon jato hionishqui. ¹⁸ Cuarenta bari sca ta jato tenenishqui nihi naman nih nichaiboya. ¹⁹ Canaan mai janin sca siete quiquin hapobo jaton jihuetahoyabi camaxon ta jaa mai israelibaana sca hihnon hihxon jato hinannishqui. ²⁰ Cuatrocientos cincuenta bari jano jihuescanon jato jaa mai hinanquin. Jahuen joi yohinica Samuel janon caman ta jato pontenicabo hinannishqui. ²¹ Quiquin hapo sca noque hinanhue, hah sca ta jacannishqui. Yocacahbo cahen Cisin baque Saulo jato hinanquin. Jaa ta Benjamin baquebo janishqui, Saulo. Cuarenta bari ta jaan jato coirannishqui. ²² Jaa potascaxon ta Davidinin sca jato coirannon hihxon jaa sca quiquin hapomanishqui. Jaa yohihi ta Papan nescajanishqui: Isaín baque David tah hen heen shinanya jisi. Hea queenai quescabija ta jaan jatihiqui hea hahxonquin. ²³ Jaa Davidinin chini baquebo janinhah ta noque israelibo teehihmanica Papan cainmascanishqui, Jesus, jan yohini quescabijaquin. ²⁴ Jaa jonon ta jaton shinan pontexon nashimati Juaman jato yohinishqui, jatihibi noquen caibo yohiquin. ²⁵ Jato yohiquin queyoti hochoma sca: ¿Hea jahua quin shinan man jain? Hea ta jaama qui. Hehchon ta huetsa jahuiqui. Jaa hihti siri copi tah hen jahuen sapato risbi pecaxonti hahtipahyamahi hahquin jaan.

²⁶ Heen huetsabaan, Abrahamen baquebaan, Papahon shinanaibaan. Noquen nincanon hihxon ta Papan noque jaa joi raannishqui, hahan teehihti joi non nincanon. ²⁷ Jaa teehihmanica jisxon bi ta jaa honanyamacannishqui. Jatihibi tantiti neten Papan yohinicabaan joi nincamaha bi nincayamarihbixon ta Jerusalem janin jihuetabaan jaton hapobo betan jaa rehtemacanishqui, jayaxihquibo Papan yohini quescabijaquin. ²⁸ Jahua copi rehteti yamahi bi Pilato yocacandin jaa rehtemanon. ²⁹ Jaa yohihi huishani joi jai quescabijaxon jihuín hueonahbo mahuascai botonxon ta tsahoncannishqui. ³⁰ Hihquipi bi ta Papan teehihmaribinishqui. ³¹ Hahquirihbi teehihquish ta hahbetan Galilea janinhax Jerusalem janin cahipibo qui cainnishqui, jaabaan sca jan teehihribihi jisnicahboxon caibo sca yohinon.

³² Joi siri tah non mato yohihi, hea huetsabaan. Noquen xenibo jan hahxontijani quescabija ta Papan jaiqui. ³³ Jesus hihquipi bi hahquirihbi teehihmaquin ta jan hahxontijani quescabijaquin Papan noquen xenibo hahxonihqui, noque teehihmanica janon. Jahuen rabe behua huishaquin Davidinin yohini quescabi ta qui: Mia tah min heen baque qui. Nea neten tah hen heen baque mia hihqui jato honanmascai. ³⁴ Jaa hihquish bi jahuentianbi yora pisyamascanon hahquirihbi teehihmah ta nescajaquin rihbi yohinishqui: Hen jahuentianbi huetsajatima joi siri hen David yohini quescabijaquin tah hen mia hahxonscai, hih ta jaiqui huetsa quirica janin rihbi. ³⁵ Jaa yohihi ta huetsa behua janin rihbi nescarihqui: Min caisai miin baque tah min pisimatimahi hihqui. ³⁶ Jihueparixon ta Papa queenai quescajaquin Davidinin hahnishqui. Mahuatai tsahonahbo ta jahuen yora payoscanishqui. ³⁷ Papan hahquirihbi teehihmah joni ta jascayamahihqui: jaa ta payoyamanishqui. ³⁸ Jaan ta maton hohcha sohuaxonti hahtipahiqui. Man honannon hihxon tah non mato yohihi, hea huetsabaan. Moisesnin noque yohini quescabijaxon bi man potati hahtipahyamahi hohcha jatihibi ta jaan sohuahihqui nincacoinaibo rahsi. ³⁹ Jaa nincacoinaibo jatihibi ta Papan siri jisiqui. ⁴⁰ Papan joi yohinicabaan ta nescajaquin huishaxon yohinishqui:

⁴¹ Jisnahue, hea hosanaibaan. Rahtenahue queyoscanoxon. Man jihuetai netenbi hen hahan rahteti hahcaiya bi tah man hihcainai shinantimabiresai. Papan ta jascajaaxqui hih huetsa jai bi

hih ta jahuen huisha jaiqui. Jistahi man. Jan yohihi quescabija jan mato jamis —jato jaquin.

⁴² Jascahax cainscaiton huetsa tantiti neten rihbi noque yohirihbiyaxahnhue hihxon jato hihti yocacanquin. ⁴³ Tsinquixon yohuanaibo nincaquin queyoxon sca, jaton nahua hihpahonish bi Papahon shinanax judioscaibo betan judiobaan hichaxon Pablo, Bernabé chibanbonaquin. Chibanahbo Papan shinanai quescari jihuetahbo hihxon jato sirijaquin yohiquin. ⁴⁴ Huetsa tantiti neten sca Papan joi nincaqui jaa jema janinhahbo jatihibi tsinquicani. Huestibo res pishini. ⁴⁵ Pablo yohuanai nincacaibo hihti caibohi jisish notsi notsixon:

—Jascama ta qui tiroman —hahcanquin judiobaan. ⁴⁶ Pantecatsihquibaan bi raquexonma Bernabé betan Pablone jato yohiquin:

—Mato pari tah non Papan joi nincamati jai. Queyoyamanox manataibomaxon man jaa joi potascaiya tah non nahuabo sca yohihi. ⁴⁷ Non jascajanon ta noquen Hihbaan noque yohinishqui:

Nahuabo min xabajaxonnon tah hen mia yohihi jano nai chibechijaquetancahuanaiton caman hahan teehihmati joi min jato nincamanon

hah ta noquen Hihbo janishqui —jato jaquin.

⁴⁸ Jan jascarai nincacax judiomabo jenimacani. Papan joi hihti siri jiscanquin. Queyoyamanox jihueyaxihquibo rahsi noquen Hihbo qui hinamehti, Papan caisnibo rahsi.

⁴⁹ Janohax sca cahen janoha maibo janin Papan joi caicanahi. ⁵⁰ Papahon shinanax bi haibo patorobo sca ta jaa judiobaan Pablo qui sinamanishqui, jaa jema janin jihuetaiho haibo patorobo. Janoha patoro rihbi sinamacanquin Pablo Bernabé rihbi picohahbo hihxon. Sinamahabo cahen jato jaa mai janinhah picocanquin. ⁵¹ Jaabaan picohah yohitimabohi honanahbo hihxon jaton sapato poto jato quiri tahabahini Iconio jema janin sca boresscaci. ⁵² Jaabi Jesusen jonibo hihti jenimahi. Dios Yoshiman hihbojaha jenimahi jihueceni.

14

Iconio janin nococani

¹ Iconio janin sca judiobaan tsinquti xoboho mapexon jato yohiquin nincacoinahbo. Yohihah hichaxon nincacoincanquin judiobaan, judiomabaan rihbi. ² Nincacoinaiboya cahen nincayosma judiobaan judiomabo sinamaquin. Noquen huetsabo jistahihmanon hihxon jato tiroma shinan hinancanquin. ³ Jaabi ta janobi basi tahni jihuescacannishqui raquexonma noquen Hihbaan joi jato yohihahnan. Jatohon shinanxon Papan hahxonai joi nincacoinahbo hihxon ta noquen Hihbaan rihbi yanapanquin hahan honantiboya hahan rahtetibo jato jaxonishqui. ⁴ Jema janinhahbo sca caibo huetsa shinanya hihnon caibo rihbi huetsa shinanya hihqui. Judiobo res caibaan nincaquin. Caibaan rihbi Criston raantibo res nincaquin. ⁵ Jasca sca jaiya cahen jato tiromajaxon macaman tsacanone benahue hihcani judiomabo, judiobo, jaton hapobo rihbi. ⁶ Macaman tsacatsihquibo honanax jabascacani. Licaonia main, Listra, Derbe, jaa jemabo janin bocani. ⁷ Jano sca Papan joi siri yohicanquin.

Listra janin Pablo tsacahibo

⁸ Listra janin ta chanto joni meracannishqui, jahuen ponobo yosmahi cainnish jascabiscaci. Jahuentianbi nihti hahtipahyamani. ⁹ Jaan cahen Pablo yohuanai nincaquin. Jaa Pablone bejisquin sirijaquin. Jisanan Papan mehehah rohatihi jan shinanai honanxon coshin sca yohiquin:

¹⁰ —Huenihue. Nihrenenhue —hahquin. Jascahah cayahihnatax nichitana tanascai.

¹¹ Pablone jascajaha jisish tsinquijaquetaibo coshin yohuanscai:

—Yorayahpa quescapahax ta dios rabe noque qui botopaquetaxqui —hihcani jaton join, Licaonicabaan join.

¹² Bernabé ta Júpiter janecannishqui. Pablo cahen Mercurio janecanquin, yohuan hihbo hapo quen. ¹³ Júpiter hiná rehtexonnicah sca hicha jonibo betan cahi. Pehi toronjaxon ganado tejomaxon jema xehqui janin jano Júpiter hahcaibo jaton diosen xobo jaiton jaton ganado rehtecatsihscaci, Pablo hinancatsihquin, mapojaxonnoxon. ¹⁴ Jascajahibo nincaxon Criston raantibo Bernabé betan Pablone jaton chopah uaxabahinxon tsamatai jonibo tocan cayatanxon jato coshin yohiquin:

¹⁵ —¿Jahueja man jacatsihquin, jonibon? Noque tah non mato quescapa jonibo qui. Nescapa tiroma shinan potabahinxon jihuenica Dios man bihnon hihxon tah non jahuen

joi siri mato yohihi. Nai, mai, hian, jano jai jatihibi ta jaan hahnishqui. ¹⁶ Neateman jihuepahonihbo ta jaabo jihueti queenai quesuari jaan jihueamanishqui. ¹⁷ Jaabi ta hahan honanti jato pishinmayamanishqui jato yanapanquin naihothon hoi paquemaquin, bimibo hinanquin, piti mato hinanquin, hahan jenimati mato hinanquin —jato jaquin.

¹⁸ Jascajaquin yohi yohihah pari ta jaabaan jaton ganado jato rehtexonquin bi rohajanishqui.

¹⁹ Jaatian Antioquia janinhax judiobo jahui. Iconio janinhax rihbi nocoxon judiobaan janohahbo sinamaquin, Pablo rehtehahbo hihxon. Sinaxon Pablo macaman tsacacancuin. Jemama qui ninibonaxon mahua sca ta jaiqui hihxon janobi potabehnancanquin.

²⁰ Criston jonibo jaa mayajaquetaiya hueniscaax jema janin caribihi. Jano hihshinahax Bernabé betan caresscai. Derbe jema janin cahi caresscai.

²¹ Nocoxon Papan joi siri jato yohicanquin. Yohihahbo hichaxon nincacoinquin. Janohax sca Listra janin caribihi. Janohax sca Iconio janin. Janohax sca Antioquia janin.

²² Criston jonibo coshi hinanbonahi cahi, shinancoinquin jeneyamaxahcabo hihxon jato hihti yohiquin.

—Papan jihuemati janin noconoxon tah non hicha teneti jai —hahquin. ²³ Piti tenehahnan mequeman mehaxon Papa yocaxon nincacoinaibo jano jaiton tihibi siri jonibo caisxon Mia pastorohue, Mia rihbi pastorohue hahcanquin. Jascjaxon jaabaan nincacoinipi quen noquen Hihhaan jato coirannon hihxon Papa yocaribhancanquin.

Antioquia janin nocorihbicani

²⁴ Pisidia mai sca nabebacahinax Panfilia mai janin nococani. ²⁵ Perge janin sca caxon joi siri yohiscaax Atalia janin cahpaquehcani. ²⁶ Janohax sca Antioquia janin cahi nontin boribicani. Hoa chai yohitanahbo hihxon janoxon Papa jato yocaxonnibo janin nocorihbiscacani, janohax jaabo catanni janin. ²⁷ Nocoxon noquen huetsabo tsinquimaxon jato betan Papan hahrasih jatihibi yohicanquin. Judiomabo jan jascajaquin nincamamenohi jato yohiquin. ²⁸ Basi sca jano Criston jonibo betan jihuecani.

15

Jerusalen janin tsinquitaibo

¹ Jaatian Jerusalen janinhahbo sca joxon noquen huetsabo yohiquin:

—Moisesnin yohini quescajiaquin honantijayamahah tah man hahquirihbi teehih-timahi —hahcanquin. ² Jaamajahibo copi ta Bernabé betan Pablonden jato pontequin sca yohinishqui. Yohihah bi hahbetan sca yohinanresi. Join bahchinani. Criston raantibo yocacahiti ta jaiqui, hihxon sca Jerusalen janin bohábo sca raancanquin Pablo, Bernabé, caibo rihbi. Jerusalen janin caxon Criston raantibo yocacahiti cahen raancanquin. Noquen huetsabo shinanyahpabo yocacahiti canon raancanquin.

³ Noquen huetsabaan sirijaquin camahah cahen bocani. Judiomabaan shinan pontexon Papan joi bichi jato yohihahnan Fenicia mai nabebacahinax Samaria mai rihbi nabebacani bocani. Yohiha janoha noquen huetsabo hihti jenimacani.

⁴ Jerusalen janin nocotaiton sca Criston raantibaan jato Benahue hahquin. Janoha pastorobaan jatihixonbi jato Benahue hahcanquin. Benahue hahcabo jato betan Papan hahrasih jato yohirihbancanquin. ⁵ Fariseoboxon bi nincacoinaibo sca nihrenenxon yohiquin:

—Jato honantijaxon Moisesnin yohini quesca jaahbo tah non jato yohiti jai —hahcanquin.

⁶ Jaa joi sca shinanquin sirijanoxon cahen Criston raantibo betan pastorobo rihbi jano huesti tsinquiti. ⁷ Basi yohinannan sca jaiboya nihrenenxon Pedronen jato yohiquin:

—Heen huetsabaan, neateman ta Papan hea mato tocan mehax canon hea yohinishqui jahuen joi siri hean yohihah noquen nahuabaan nincacoinnon. Man tah man honanscai.

⁸ Jonin jointi honanxon ta Papan jaabo siri hihqui noque jismanishqui, noque jahuen Yoshin siri jan hinanai quescajaribiquin jaabo rihbi hinanquin. ⁹ Noque ta jascapa rabe jisnishqui. Jaabaan nincacoinai copi jaabo rihbi jaton jointi sohuaxonquin. ¹⁰ Non papiti hahtipahyamani bi noquen xenibaan rihbi papiti hahtipahyamani hihue papimaquin hahcajaquin tah man Criston jonibo judionahue hahcai. ¿Jahua copi man jascajaquin noquen Papa Dios tanahin? ¹¹ Noquen Hihhaan noquehon shinanxon noque teehihmatihí quescajaribiquin ta jaabo rihbi teehihmatihiqui. Jaa tah non shinancoinai —jato jaquin.

¹² Jaatian pari netexon Bernabé betan Pablo yohuanai nincacancuin. Nincacaiton judiobaan nahuabo janin caxon hahan honantibo hahan rahtetibo jato betan Papan hahquipi jato yohipaquequin Pablonden, Bernaben rihbi.

¹³ Yohiquin queyoscaiya Jacobo sca yohuani:

—Hea nincanahue, hea huetsabaan. ¹⁴ Jahuenahbi jaabo hihnon hihxon jahuen joi siri noquen nahuabo Papan nincamamenoni ta Simoman noque yohiscaaxqui. ¹⁵ Papan yohinicabaan rihbi ta huishaxon jascajaquin yohinishqui. Nincanahue:

¹⁶ Jaa pecaho joribixon tah hen Davidinin xobo poxoni huenirihbixon hahcajaquin jahuen jihuetaho hinanrihibitih. Payonihbo hahribixon hahcajaquin tah hen jahuen jihuetaho hinanrihibiyaxihqui.

¹⁷ Texe jonibaan jaton Hihbo benahahbo hihxon tah hen jascajayaxihqui. Maton nahuahax bi hehqui hinamehtaibo jatihibichin hea benahahbo hihxon tah hen jascajayaxihqui.

¹⁸ Nea joi neateman yohinihxon ta noquen Hihbaan jascajahiqui.

¹⁹ Hean shinanah tah non jaton shinan pontexon noquen Papan joi nincacoinaibo noquen nahuabo non jatsanjatimahi. ²⁰ Jato qui raannoxon quirica huishati ta jaiqui, santoya rishstayamahabo joni huetsa betan tsiniyamahabo, hahsataibo piyamahabo, jimi rihbi piyamahabo. ²¹ Jatihibi jema janinxon ta neateman Moisesnin joi nincamanixon rahma caman nincamacanihqui. Nincamaxon ta jaa jahua hihcatsihquiquin hihxon yocaribhicaniqui, tantiti nete tihibi jaton tsinquiti xobobohoxon. Jaa copi tah non jato qui joi raantih —jato jaquin.

²² Jeenhixon sca jonibo raanah ta siri qui hihxon Criston raantibo, janohahbo pastorobo, jatihibi noquen huetsabo, jatihixonbi sca Bernabé betan Pablo manahi cahabo mananicabo caiscanquin. Antioquia janin jato raannoxon. Judas Barsabas hahcaibo, Silas rihbi, caiscanquin. Jaabo hihti shinanya noquen huetsabo copi jato caiscanquin. ²³ Jato betan raanti quirica sca huishamacanquin:

Maton huetsabo, Criston raantibo, pastorobo, noque rahsibixon tah non mato qui joi raanai, man jascabi jayamahin, hahquin. Antioquia, Siria, Cilicia maibaan jihuetai noquen caibohaxma bi noquen huetsabo qui tah non raanai. ²⁴ Noquen raanahma bi noque quihax caxon yohixon mato masa shinanmahibo joi tah non nincacai. ²⁵ Nincaxon tah non jatihixonbi sca shinanquin sirijaxon noque quiha jonibo caisai, Bernabé betan Pablo manahi mato janin canon. Bernabé betan Pablo ta hahan non shinanai noquen huetsabo qui. ²⁶ Caibaan jato rehtecatsihquibaan bi ta noquen Hihbo Jesucriston joi siri yohihi caressahoxqui. ²⁷ Jaa copi tah non Judas betan Silas raanai, jaabaan sca non mato yohihi joi mato yohiquin sirijanon. ²⁸ Judiobaan mato jisi copi man jascajati jai joi res tah non mato yohihi, jahuabi hashoan mato hihuejayamanoxon. Non jascahah ta siri qui hihxon tah non yohihi, Dios Yoshiman rihbi noque jascajaquin shinanmaha. ²⁹ Jaa copi tah non mato yohihi, santo rehtexona nami piyamanahue, jimi rihbi piyamanahue, terehahxon rehtehibo rihbi piyamaquin. Joni huetsa betan tsiniyamanahue. Non mato yohihi quescarax tah man siritih. Jaa res tah non yohihi, hahcanquin huishaquin.

³⁰ Raanahbo Antioquia janin bocani. Jano noquen huetsabo tsiniquon jaa quirica jato hinancanquin. ³¹ Jaa quirica bixon shinanquin jixxon shinanquin sirijascanquin. ³² Papan jismaha yohinicaboxon Judas betan Silasen jato hicha yohixon noquen huetsabo coshi hinanquin. ³³ Jano jihuetahbax cacatsihscaboya jato raanipibo qui caribinon sirijaquin jato camacanquin. ³⁴ Hihcax bi Silas cayamahi. Baneti jan shinanaiya Judas huesti cahi. ³⁵ Antioquia janin Pablo betan Bernabé baneti. Banexon jato honanmaquin. Hicha noquen huetsabo betan jaa joi siri yohicanquin.

Papan joi yohihi Pablo caribih

³⁶ Jahuentih ra nete jano hihxon:

—Jano non noquen Hihbaan joi non jato yohinon caribinon cahue jato jisi. Jenquet-sahpi jacanihquin jison cahue jatihibi jema janin —Bernabé Pablonen jaquin.

³⁷ Juan Marcos hahcaibo Bernabenin hiocatsihqui bi Pablo queenyamahi. ³⁸ Panfilia janin jato potabahini jato betan Papan joi yohihi cayamani copi cahen jaa hioti Pablonen shinanyamaquin. ³⁹ Huesti shinanyamascaax cahchinanbehcoini. Chipre janin Marcos betan canoxon cahen Bernabé nontin naneti. ⁴⁰ Pablo cahen Silas betan cahi, noquen huetsabaan noquen Papa yocaxonah. ⁴¹ Siria nabebacahinax Cilicia mai rihbi nabebacahini cahi noquen huetsabo shinan hinanbonaquin.

16

Timoteo sca jato manahi cahi

¹ Derbe janin nocotax janohax cahax Listra janin nocorihbihi. Jano Timoteo janeya Criston joni jai. Jahuen mama judiohax bi nincacoinnica. Jahuen papa cahen judiobaan nahua. ² Jaa Timoteo qui ta Listra janinha noquen huetsabo siripi yohuannishqui. Iconio janinhahbo jascarihibi yohuani. ³ Jaa hiocatsihxon bixxon janobo judiobo jai copi Pablonen jaa honantijaquin. Nahua papayahpa jaa honanaiboya jaa honantijaquin. ⁴ Jemabo

sca nabebacanahi caquin jato yohibonaquin. Jerusalem janinxon Criston raantibo betan jaton pastorobaan yohihi joibo jato yohibonaquin. Jaa joi nincaxon jascari jihuetaibo hihxon jato yohiquin. ⁵ Jaa copi ta noquen huetsabaan hashoan sca nincacoinnishqui. Nete tihibi caicanahi.

Macedonio joni Pablonen namacai

⁶ Frigia mai sca nabebacahinax Galacia mai rihbi nabebacahini bocani. Asia mai janin cacatsihquibo bi Dios Yoshiman jato jano yohimayamaquin. ⁷ Misia main nocotax, Bitinia main sca cacatsihquibo bi Papan Yoshiman jato panterihbiquin. ⁸ Misia mai huinojaquetax Troas jema janin sca cahpaquehcani. ⁹ Huesti yame cahen namaquen Macedonia janinha joni Pablonen jisquin. Jaa bebon nihrenenxon jaa macedonio jonin hihti yocaquin:

—Macedonia janin noque yanapani johue —hahquin. ¹⁰ Namayama sca jan jaiya jenquetsahax non Macedonia janin caman pohquetihin hihxon hahan pohqueti benaquin noquen. Non jano jahuen joi siri yohihi canon Papan noque quenahi tah non honanquin sirijaniqui.

Filipos janin nococani

¹¹ Nontin nanexon Troas potabahinquin noquen. Samotracia quiri ponte res cahi. Nihshinahax huetsa neten sca Neápolis jema janin taxnati. ¹² Mapetax Filipos jema janin cahi. Filipos ta romanobaan tsahonni jema qui, jano jai jemabo mentan hashoan hani. Jano tah non jahuentihi ra nete hihniqui. ¹³ Tantiti neten sca tah non jema jemanhihtinin caniqui, huan quexabi. Janoxon ta judiobaan noquen Papa Dios yocaquihqui hihquish tsahopaquetax non jano behchinanai haibobo betan noque yohuani. ¹⁴ Huesti haibo ta Lidia janeya jano janishqui. Papahon shinanai haibo. Yancon chopa maromanicah. Tiatora jema janinhax haibo. Jaan cahen nincaquin sirijaquin. Pablonen yohihi joi nincati shinan noquen Hihbaan hinanah nincaquin. ¹⁵ Jatihibi jahuen xoboho jihuetaibo betan nashimaha sca noque hihti yohiquin:

—Noquen Hihbaan joi hen nincacoinai shinanax heen xoboho botannahue. Jano sca banenahue —hahxon jano sca noque hioquin.

¹⁶ Janoxon jaabaan Papa yohihi janin sca non cahi bi huesti hiná haibaan noque behchiquin. Tiroma yoshinyahpa haibo hihxon ta jayaxon jonibo yohipahonishqui. Honancatsihquin yocacah jaan yohiquin. Jascaxaxon ta jahuen hihbobo hicha coriqui cananxonpahonishqui. ¹⁷ Jaa haibaan cahen Pablo chibanbenaquin. Noque rihbi chibanbenaquin. Noque chibanhahnan coshin yohuani:

—Nea jonibo ta Xaba Hihbo Diosen jonibo qui. Hahan teehihti joi ta mato yohicaniqui —hihqui.

¹⁸ Hicha neten jascarihibi. Jatsanscaax mayacahuanxon Pablonen jaa yoshin yohiquin: —Jesucriston janen tah hen mia yohihi, jaa haibo janinhax picohue —hahquin. Jan yohihax cainscai.

¹⁹ Hahan coriqui cananti yamascai jisxon jahuen hihbobaan Pablo bihquin. Silas rihbi bihcanquin. Bihxon tintinin jemanhihti janin hioxon jaton hapobo quenacanquin. ²⁰ Jaton hapobo jahuiya:

—Neabo ta judiobo qui. Noquen jema ta tiromajacaniqui. ²¹ Noque jascatima joi ta noque yohihiqui, jascapa noquen nincatimahi bi. Noque jascatimahi joi tah qui. Noque tah non romanobo qui —hihcani.

²² Jano tsamajaquetaibo rihbi jascari jato qui yohuani. Jascaraiboya jaton chopa potamaxon, jihin jato cahrishqui cahrishquinon jaton hapobaan yohiquin. ²³ Tsehue tsehuejaxon sipo xoboho jato tsahonxon sipo xobo coirannica yohicanquin sirijaquin jan coirannon. ²⁴ Jascajaquin yohihahbo chicho queha chiqueho jato niaxon hahan tabitaxtinin jato tabitaxpaquequin.

²⁵ Yame pochinicon sca Pablo betan Silasen noquen Papa yocaquin. Papa qui siripi behuahi. Hahbe sipojahipibaan cahen jato nincaquin. ²⁶ Jaatian mai coshin mihuanreneni. Xobo jihuibo taxca taxcahihqui. Jatihibi xehpoti quehpemehscai. Hahan jato menexipi cadenabo mepequehcaini. ²⁷ Sipo xobo coirannicah sca mohixon jaa xobo xehpoti jatihibi quehpemehtai jisish machitonon nacocatsihscái. Hahmebi rehtecatsihqui sipojahipibo jabscai shinanax. ²⁸ Nacocatsihqui bi Pablonen coshin quenaquin:

—Jascari tiromayamahue. Neno tah non qui jatihibi —hahquin.

²⁹ Jascajahah:

—Johué quietejanahue —hihquish sipo xobo hihcocahinax tastahihcanahi cahi Pablo betan Silas janin taracahreneni. ³⁰ Hueniscaxon jemanhihti janin jato picoxon yocaquin:

—¿Queyoyamanox mananoxon hean hen jahuejati jain, jonibon?

³¹—Noquen Hihbo nincacoinax tah min queyoyamanox manatihi. Miin xoboho jihue-taibo jascaribihi —hahcanquin.

³² Jascjaxon jahuen xoboho jihuetaibo rihbi Papan joi yohiquin sirijacanquin.

³³ Jaatianbi yamebi jato hioxon jaton tshue chocaxon:

—Nincacoin tah hen jai. Hea nashimanahue. Heen xoboho jihuetaibo rihbi nashimanahue —jato jaquin. ³⁴ Jahuen xoboho jato mapemaxon sca jato pimaquin. Papa nincacoinax jaa, jahuen haibo, jahuen baquebo, jatihibi hihti jenimahi.

³⁵ Xaba paquescaiya sca jaa jema hapobaan porisia raanquin, yohihi cahabo.

—Hoa jonibo picotanhue botanahbo —hahcanquin. ³⁶ Sipo xobo coirannicahton sca jascajaquin Pablo yohiquin:

—Hapobaan ta joi raaniqui hen mato piconon. Picoscanahue tahca. Siripi catannahue.

³⁷ Jascahah bi Pablonen jato yohiquin:

—Noque romano jonibo que bi ta jatihixonbi jisnon hihxon noque rishqui rishquimahipicanaxqui non jahuejahipi honanxonma bi. Jisibo hihxon ta noque sipojahipicanaxqui. ¿Jonexon tsoan honannonma sca noque picocatsihcanihquin? Jascajatima ta jaticaniqui. Jaabobi joxon noque piconon —hahquin.

³⁸ Hapobo yohihi sca bocani porisiabo. Romano jonibo ta qui hihqui nincacax raquesca-cani. ³⁹ Jaabo sca joxon jato raejacatsihquin jato sirijaquin yohuanquinquin:

—Honanyamaxon tah non mato jascajahipiqui —hahxon jato picoxon sca Noquen jema potabahinrohanahue —hahcanquin. ⁴⁰ Jascari sipo xobo janinhax picotax Lidia jisi bocani. Noquen huetsabo jisxon sca jato yohiquin. Nincacoinquin jeneyamaxahnahue jato jaax caresscai.

17

Tesalonicabo corotaibo

¹ Anfipolis jema nabebacahinax Apolonia jema sca nabebacahinax Tesalónica jema janin nococani. Jano cahen judiobaan tsinquiti xobo jai. ² Jahuen hihti quescarax jano Pablo mapeti. Quimisha tantiti neten jato betan yohinani, tsoa noquen teehihmanich quin hihqui yohinani. ³ Papan huishamani joiboyaxon cahen Pablonen jato honanmaquin. Papan caisai jahuen baque hohmis hohmisax hihquipish bi teehihribiti jaa janí jato jismaquin sirijaquin, Jaa Papan caisai jahuen baque ta Jesus qui, jaa hen mato yohihi, hahquin.

⁴ Nincacoinmaha Pabloya Silas manahi sca caibo cahi. Judiохaxma bi judiocatsih-quibaan rihbi hichaxon nincacoinquin. Patoro haibobaan rihbi nincacoinquin hicha tahnixon. ⁵ Jaa copi ta notsi notsixon shinanjoma tiromabo tsingixon jema janinhah judiobaan jato coro coromanishqui. Jasoman xoboho sca jaa corotaibo mapeti, Criston raantibo benahi. Corotaibo bebonbi jato nichincatsihquin jato benacanquin. ⁶ Criston raantibo benacasquimaxon Jason sca bihxon caibo noquen huetsabo rihbi bihxon jema hapobo janin jato nintancanquin.

—Jatihibi janin tiromajaquin jonibo coromabenani ta neno sca neabo nocotipishqui. Jasoman rihbi ta jahuen xoboho jato hoxamahiqui. ⁷ Jatihixonbi ta noquen quiquin hapo Cesaro nincacatsihyamascacanihqui, huetsa quiquin hapo Jesus jaresscai shinanxon copi —hihcani.

⁸ Jascjaxon jonibo coromacanquin. Nincaxon jema hapobaan masa shinanscaquin.

⁹ Jaabi Jason cobranxon caibo rihbi cobranxon:

—Boresscatannahue —jato jacanquin.

Berea janin nococani

¹⁰ Jaa yamebi ta Pablo, Silas rihbi noquen huetsabaan hionishqui Berea jema janin cahábo. Berea janin nocotax sca judiobaan tsinquiti xoboho mapecani. ¹¹ Jaabo ta Tesalónica mentan hashoan shinanya janishqui. Hihti honancatsihxon Papan joi nincacanquin. Jasca coin hin hihxon jatihibi neten Papan huishamani joi jisquin honancatsihquin. ¹² Hichaxon ta nincacoinishqui. Jaton nahua patoro haibobo rihbi hicha. Bebobo rihbi huestima. ¹³ Papan joi Berea janinxon rihbi Pablonen yohihi honanscaax Tesalónica janinha judiobo jano rihbi bocani. Nocoxon jonibo sinamaxon jato coro coromacanquin. ¹⁴ Jaa copi histon sca noquen huetsabaan Pablo camacanquin. Quebijistima hian quiri hiocanquin. Jema janin sca Silas betan Timoteo baneti. ¹⁵ Pablo hiohiba ta Atenas jema caman jaa nocomanishqui. Janohax jaabo caribinon ta Pablonen jato joiya raannishqui, Silas betan Timoteo hahqui histon jonon.

Atenas janin Pablo nocotai

¹⁶ Atenas janin jato manahannan jatihibi janin santobo jai jisxon Pablonen masa shinanquin. ¹⁷ Judiobaan tsinquiti xoboho jato betan yohinanax Papahon shinanaí judiomabo

betan rihbi yohinani. Jatihibi neten rihbi jaton janoxon maroti jemanhihti janin jano jaibo betan yohinani Papan joi nincamacatsihqui. ¹⁸ Jaton honan joi honanaibo rihbi ta jano nihnínishqui, caibo epicúreobo, caibo estoicobo. Jaabaan ta Pablo yohuanquihnnishqui. Yohuanquihnax:

—¿Jahua yohuan nea paranmis jaiquin? —hihqui caibo.

—Nahuan dios joi yohinica ra tah qui —hihqui caibo rihbi. Jesus hihquish bi hahquirihbi teehihqui joi jan yohihiya jascacani. ¹⁹ Jaatian sca jaa bihxon Areópago janeya mahchi janin hiohax yocacahcani:

—¿Nea min honanmahi joi behna min noque yohirohatimahin? ²⁰ Min noque yohihi nincacax tah non rahtetai. Jahua min yohirohatimahin hih tah non jai honancatsihqui.

²¹ Jatihibi Atenas janinhahbo betan huetsancohax johox jano jihuetaibo ta jahuabi teeyamapahonishqui. Joi behna yohixon nincacax jihueresi.

²² Areópago mahchi naponbi nihrenenax sca Pablo yohuani:

—Atenas janinhahbon, hicha diosbo man shinanai tah hen jisi. ²³ Jema janin huinoxon tah hen maton diosbo huishaxon man tsahonxonni macanbo jisbonaxon hen nea huishayahpa huesti merahipiqui. Non honanyamahi diosenah hihqui jaa quirica. Jaa honanyamaxon bi hahan man shinanai Dios tah hen mato yohiscai.

²⁴ Nea naiyahpa mai, jano jaibo jatihibi rihbi hahní Dios ta nai hihbo qui, mai hihbo. Jaa ta jonin mequeman xobojahi janin jihueyamahihqui. ²⁵ Jaa ta jonibaan hahxonti pishinyamabiresiqui. Noquen mequeman tah non jaa jahuabi hahxontimahi. Jaan caya ta jatihibi jihuemaxon noquen piti, jatihibi noque hinanishqui. ²⁶ Huesti jonijamenonixon ta jahan sca jatihibi jonibo cainmanishqui jatihibi main jato jihuemaxonoxon. Janobi jihueyaxahnahue. Jaatian pari jihueyaxahnahue hih ta jaa janishqui. ²⁷ Noquen Papa Dios benahahbo ta jascanishqui. Mehebonaquin meraxon hahcajaquin merahahbo ta jascanishqui, noque hochoma jan hihqui bi. ²⁸ Jaan ta noque yora jihuemahiqui. Hahan jatihibijati coshi hinanxon ta hahan jihueti shinan rihbi noque hinanishqui. Caibo maton quirica huishanicabaan rihbi ta jascajaquin huishanishqui: Noque tah non jahuen chini baquebo qui, hihqui. ²⁹ Papan chini baquebo hihxon tah non noquen Papa Dios oro quescapa hihqui shinantimahi. Yami peheni quescapahma, macan quescapahma, jonibaan mequeman sirijaquin hahcai quescapahma, jonin shinanai quescapahma ta jaa qui. ³⁰ Honanmabo jai bi ta Papan jato tenepahonishqui. Jato tenenixon bi ta rahma jatihibi jonibo sca jatihibi janin jaan yohiscai qui shinan pontehahbo hihxon. ³¹ Jahuen hahan casticanti nete janoxahnon ta yohiscanishqui. Jahuen hahan casticannicah ta jaribiscaiqui, Mia tah min jonibo pontejaquin casticannicah qui hah cahen jaa janish. Jahuen casticannicah tosa quin non honannon ta hihquipi que bi jaa hahquirihbi teehimmanishqui —jato jaquin Pablonen.

³² Hihquipi bi hahquirihbi teehimmani yohihi nincacax bitsa bitsacani.

—Huetsa tian min noque yohirihbinon tah non nincayaxihqui —hihqui caibo rihbi.

³³ Jascahiya jato janinhax Pablo picoscai. ³⁴ Caibaan rihbi nincacoinax Pablo manahi bocani. Huesti cahen Dionisio Areopagito, huetsa cahen haibo, Dámaris janeya. Caibobo rihbi jato betan cahí.

18

Corinto janin Pablo nocotai

¹ Jaa pecaho ta Atenas janinhax picotax Corinto jema janin Pablo canishqui. ² Jano ta huesti judio meranishqui, Aquila janeya. Jaa ta Ponto mai janinha joni hihpahonishqui, jahuen haibo betan Italia janinhax jahuex nocotipi. Claudio quiquin hapo hihxon Roma jema janinhax jatihibi judiobo picoti jaan yohihiya janohax Aquila jahuipi. Jato jisi sca Pablo cahí. ³ Jaa Aquila cahen chopax xobojanicah. Pablo rihbi ta jascajanica janishqui. Hahbe chopax xobojanicah honanax jaton xoboho jihuetax hahbetanbi Pablo teescai. ⁴ Tantiti netebo nocoscaiya judiobaan tsinquiti xoboho caxon jato betan yohinanxon judiobo, jaton nahuabo rihbi Papan joi nincamaquin.

⁵ Macedonia janinhax Silas betan Timoteo nocoscaiya Papan joi yohihi sca jihueti. Jesus ta Papan caisai joni qui hihxon judiobo honanmaquin. ⁶ Honanmaha bi nincacatsihyamacani. Pablo qui tiromahi yohuancani. Jascaraiton jahuen chopax peren perenhaxon jato yohiquin:

—Nincacatsihyamahax tah man hohchaya mahuatihí. Min tah min noque honanmayamaniqui hah tah man hea jatimascai. Nahuabo sca tah hen yohitihí —jato jaquin.

⁷ Jato jascabajahini cahax jaa tsinquiti xobo patax jihuetai jonin xoboho mapescai. Jaa joni ta Justo janeya janishqui judiocatsihqui joni. ⁸ Jaton tsinquiti xobo coirannicahnon ta noquen Hihbo nincacoinnashqui, Jahuen jane cahen Crispo. Jahuen xoboho jihuetibaan

rihbi nincacoinquin jatihixonbi. Hihti caibo rihbi corinto jonibaan Papan joi nincaxon nincacoincanquin. Nincacoinaiton jato nashimacnquin. ⁹ Yame namaquen sca noquen Hihbo yohuanai Pablonen nincacquin:

—Raquexonma yohireshue. Neteyamahue. ¹⁰ Mia tah hen manahi cahi, tsoanbi mia tiromajaquin jahuejayananon. Nea jema janin tah hen hicha joni jai —hihqui.

¹¹ Huesti bari seis hoxne rihbi ta jano jihuenuishqui jato tocan jihuexon Papan joi honanmaquin.

¹² Acaya main Galion sca gobernador hihquiya judiobo rahsi tsinqiscnai. Tsinqixon jatihixonbi Pablo bihti shinancanquin. Bihxon jaton hapo janin huocanquin.

¹³ —Noquen xenibaan yohini quescajayaquin bi ta huetsajaquin Diosohon shinanahbo hihxon neatohon jonibo yohihihqui —hahcanquin.

¹⁴ Pablo sca yohuancatsihscnai bi judiobo Galionen yohiquin:

—Huetsa joni jan tiromajahiya tah hen jaa copi mato nincaquehanai, judiobon. Jan tiromahiya tah hen nincaquehanai. ¹⁵ Man yohuanresai joi tah hen nincacatsihyamahi. Janebo, maton xenibaan joibo, jascapa joibo copi man yohinanai tah hen nincacatsihyamahi. Botannahue. Bexonahue, matobi. Jascapa joi copi tah hen tsoabi pontecatshyamahi.

¹⁶ Jascaxon jahuen ponteti xobo janinxon jato cainmaquin. ¹⁷ Cainmaha jaton tsinquiti xobo coirannica bihcanquin, Sóstenes janeya. Bihxon hapon ponteti xobo xehqui ponte nihxon rishqui rishquancanquin. Jascajahibaan bi Galion jahua hihyamahi, jisresquin.

Antioquia janin nocotax caribih

¹⁸ Basi tahni jano jihuetahbax, Hen ta hen caresscai noquen huetsabon, hah jato jaax Pablo caresscai. Hen yohihipi quescabija tah hen jai hihxon honanahbo hihxon Cencrea jema janinxon sca jahuen boo maxcorohamabahinquin. Siria main caman nontin pohquejaquenoxon janohax nanecani. Priscila betan Aquila rihbi cahi hahbetan. ¹⁹ Efeso jeman pari taxnatax jato potabahini cahi, judiobaan tsinquiti xoboho mapeti. Janoxon judiobo yohuanquihnquin. ²⁰ Basi pari banetahhue hahcabo bi Pablo queenyamahi.

²¹ —Hen tah hen caresscai. Noquen Papa queenaiya tah hen joribitih —jato jaquin.

Nanerihbixon Efeso jema potabahinquin. ²² Cesarea jema janin sca mapetax Jerusalem janinha noquen huetsabo pasijatani joresscaax Antioquia jema janin cahpaquehcahini cahi. ²³ Jano ta jihuenishqui basima tahni. Janohax sca cahax Galacia mai nabebacahini cahax Frigia mai rihbi nabebacahini cahi. Noquen huetsabo shinan coshjabonahi cahi.

Efeso jema janin Apolos yohuanai

²⁴ Huesti Apolos janeya judio ta Efeso janin noconishqui Alejandria janinha joni. Joi yohinica. Papan huishani joi honanquin sirijahi. ²⁵ Criston joi honanmahabo hihti yohicatsihxon jaan jato yohiquin. Jesus joi jato yohiquin sirijaquin jaamama. Hihcax bi jatihibi honanyamaquin. Juaman nashimati joi honanxon Criston janen nashimati joi honanyamaquin. ²⁶ Raquetaxma ta jaton tsinquiti xoboho yohuannishqui. Jan yohuanai nincaxon jaton xoboho boxon Priscila betan Aquilanen hashoon sirijaquin Papan joi honanmaquin. ²⁷ Acaya main jaa cacatsihquiton, Catanhue, hahxon noquen huetsabaan quirica huishaquin, jaya cahiton Criston jonibaan sirijaquin bihnon hihxon. Cahi nocoxon nincacoinaibo hicha shinan hinanquin. ²⁸ Papan huishani joi jismaxon ta Cristo ta Papan caisai joni qui hihxon judiobo yohinishqui. Jatihixonbi nincacahbo hihquish ta janibi nichish yohuannishqui. Sirijaquin jato yohihiya ta nincacoinaibaan shinan bihnishqui.

19

Efeso jema qui Pablo nocotai

¹ Corinto janin Apolos jaiya manan cahpoquetax Efeso janin sca Pablo cahpaqueti. Jano Papan jonibo huestibo meraquin.

—¿Nincacoinxon man Dios Yoshin bihyamahin? —jato jaquin.

—Dios Yoshin joi tah non honanyamaparihi —hihcani.

—¿Tsoan janen mato nashimacannishquin? —jato jaquin.

—Juaman nashimaphoni quescajaquin rahan —hihcani.

⁴ —Jaa hahchon jahui joni nincacoinahbo hihxon yohixon ta Juaman nashimaphonishqui shinan pontehiton. Jaa hahchon joni joni ta Jesus qui —jato jaquin.

⁵ Jaa honanscaxon cahen noquen Hihbo Jesusen janen sca jato nashimanon yohicanquin. ⁶ Pablonen jato mehehiya Dios Yoshin jato qui nocohihnati jahui. Jaa bichish huetsapahi yohuancani. Papan honanmaha yohuanscapani. ⁷ Doce joni rah ta jaabo janishqui.

⁸ Judiobaan tsinquiti xoboho mapetax sca tsoanbi chihtehahma Pablo yohuani. Quimisha hoxne jato betan yohinani, Papan jihuemayahihqui joi yohinani. Yohuanquihnnani. ⁹ Jaatian ta nincayosma jointi chahomayahpabo noquen Hihbaan joi qui tiromahi yohuanscanishqui, janibi sca hichaxon nincacahbo. Jaa copi ta janohax Pablo picoscaxon Criston jonibo hioxon jatihibi neten Tiranno escuela xobohoxon jato yohinishqui. ¹⁰ Janoxon ta rabe bari haxemanishqui. Jaan jato haxemahiya jatihibi Asia janin jihuetaibaan noquen Hihbaan siri joi nincacquin. Judiobo betan judiomabaan nincacacquin. ¹¹ Pablo ta noquen Papan hahan hihti rahtetibo hahmanishqui. ¹² Payon bihxon, jaa hihyamahiya chopa pishca bihxon jayaxon Pablo mehaxon ta jaton hisinaibo sca hahan rahoncannishqui. Rahona jaton hisinbo picoti, jaton tiroma yoshinbo rihbi picoti.

¹³ Nihresai judio yobebo sca nocoti jahui. Nocoxon tiroma yoshinyahpabo meraxon noquen Hihbo Jesusen janen jaton yoshinbo yohicanquin picotahbo hihxon:

—Hoa Pablonen yohihi Jesusen janen tah non mia yohihi —hahcanquin. ¹⁴ Jaton papa ta Esceva janeya janishqui, judiobaan quiquin sacerdote. Jahuen baquebaan siete hihxon jascacacquin. ¹⁵ Jascacacquin yohihiton tiroma yoshiman jato joi bichinquin:

—Jesus tah hen honanai. Pablo rihbi tah hen honanai. ¿Mato man tsoabo quin? —hahquin.

¹⁶ Jato jascacaxon jaa yoshinyahpa jonin jato qui cayatan cayatanxon jato bahchinquin. Jato jatihibi taponbi potaquin. Jaan huexahah chopanma tsehue tsehueya sca jaa xobo janinhax jabascacani. ¹⁷ Efeso jema janin jihuetai judiobaan ta jaa joi nincanishqui jatihixonbi. Judiomabaan rihbi jatihixonbi nincacquin. Nincacax ta hihti raquesacannishqui. Noquen Hihbo Jesus hihti coshi honancanquin.

¹⁸ Nincacoinaibo hicha joxon tiromajacquin hahpahoniboxon jaton hohcha yohipaquecanquin, jascapa jenebahinnoxon. ¹⁹ Hicha yobe hihpahonibaan rihbi jaton yobepan quirica bexon jatihixonbi jisnon hihxon janibixon jaton quirica mapojacacquin. Jaabaan mapojahi quirica toponah ta cien mil soro copinishqui. ²⁰ Jaatian ta noquen Hihbaan joi hashoan sca caicananishqui. Huetsa joi potaxon jaa sca bihcanquin.

²¹ Jaa pecabo cahen Jerusalem jema janin cati sca Pablonen shinannish. Macedonia mai nabebacahini cahax Acaya mai rihbi nabebacahini cahax Jerusalem jema janin nocoti shinanquin. Janohax tah hen Roma jema janin catihi hihqui. ²² Jaatian Macedonia janin bebotannon hihxon jahuen yanapannica rabe raanquin Timoteo betan Erasto. Jato raanax Asia main jihuetahbihhi.

Efesobo coro corotai

²³ Jato raanipi pecabo ta noquen Hihbaan joi copi rainyamahax hihti caibo corochinquirani nocohihnacannishqui. ²⁴ Demetrio janeya joni ta jano janishqui, yami charajahi teenica. Jaton santo Diana xobojaxonnica. Jascacacquin ta jahuen hahbe santo xobojanicahbo hicha jato cananmanishqui. ²⁵ Jato quenamaxon jascapahbo hahnicahbo rihbi quenamaxon ta jato yohinishqui:

—Nescapahbojacquin tah non coriqui cananai. Man tah man honanquin sirijahi. ²⁶ Hihti caibo yohixon ta Pablonen jato honanmahiqui jaa sca chibanahbo. Efeso janin res ma bi ta jatihibi janin jato jascacacquin yohihiqui. Casi jatihibi Asia mai mehabo ta jato nincamascaciqui. Jaa tah man jisxon nincarihbihi. Jonin mequeman hahcaibo ta diosmabo qui hih ta jaiqui. ²⁷ Jan jascacacquin noquen tee tiromajamis hihxon tah hen mato yohirihbihi. Jascacacquin yohihah ta noquen dios xobo caibaan jahuama shinanscathiqui, noquen hihti siri haibo dios Diana xobo. Jaa rihbi ta jahuama shinantihcanihqui. Asia mai janin jihuetaibaan jatihixonbi hahan shinanai que bi ta jahuama sca jatihiqui —jato jacquin. Jatihibi mai janin jihuetaibaan hahan shinanai que bi jahuama sca.

²⁸ Jan yohuanai nincacax hihti rainyamahax sai saihhcani.

—Noque Efeso janin jihuetaibaan Diana ta hihti shinanya qui —hihcani.

²⁹ Jaa jema bahibo janin jatihibi coro corescani. Jahua nincatimascacai. Pablon companihro rabe sca bihxon ninibonahi bocani. Janoxon yohuanaibo nincati mai xanqueman sca bishquihicanahi bocani. Pablon companihro cahen Gayo, huetsa cahen Aristarco, Macedonia janinha rabe. ³⁰ Pablo rihbi jano hihquicatsihqui bi ta caibaan Criston jonibaan huinómayamanishqui. ³¹ Caibo patorobo rihbi Pablon amicobo hihxon joi raanquin, jan jaton jaho tsinquiti mai xanqueman cayamanon hihxon, rehtecanmis hihxon. ³² Corotai Pablo qui chanicatsihquish caibo huetsa yohuanya janon caibo rihbi huetsa yohuanya sai saihhcani. Coro corocquin nincatimajacacquin. Jahuejahi non tsinquitan hihxon hichaxon honanyamarihicanquin. ³³ Mia sca yohuani cahue hihxon judiobaan pehueranbonaha janohax yohuanti janin Alejandro mapeti. Jonibo nincamacatsihquin jahuen mequen sanaquin. ³⁴ Jahuen mequen sanahihnihiya hihti sai saihhiscacani. Judio tah qui

hihquish sai saihihresscacani, jaa yohuanai nincacatsihyamahax. Rabe horabo jano coro corocani.

—Noque Efeso janin jihuetaibaan haibo dios Diana ta hihti shinanya qui —hihcani coshin.

³⁵ Corotaibo tantimascaax jaton tininti yohuani:

—Efeso janinhahbaan, noque Efeso janin jihuetaibaan tah non noquen hihti shinanya Diana xobo coiranxonai. Naihoh quehax paqueni jahuen santo rihbi tah non coiranxonai. Non jascajahi ta jatihixonbi honancaniqui. ³⁶ Jascama ta qui, hih ta tsoabi jatimahiqui. Jaa copi tah man tantitih. Sirijaquin shinaryamaxon jahuabi jahuejayamanahue. ³⁷ Jaabaan maton diosen xobo jahua tiromajahi que ma bi tah man nea rabe joni neno hihuehahqui. Maton dios qui rihbi tiromahi yohuanai que ma bi. ³⁸ Demandanaibo nincati netebo ta jaiqui. Noquen gobernadorbo rihbi ta neno jarescaiqui. Nea jonibo qui chanicatsihxon jahuen habhe teenica betan Demetrionen jato demandantannon. ³⁹ Huetsa joi rihbi nincamacatsihxon janoxon jascajati jai janinxon hahtannahue. ⁴⁰ Man rahma coro corotai joi nincacax, noque rah ta potacatsihcanihqui romano hapobo jamis. Jaa copi tah hen mato yohihi. Jahua copi man coro corocanahi tsinquitain hahcah tah non jahua yohiti yamahi —jato jaquin jaton tinintin.

⁴¹ Jato jascajaha jaton xoboho boresscacani.

20

Macedonia nabebahax Grecia main cahi

¹ Coroyama sca jaiboya Criston jonibo quenamaxon nincacoinquin jeneyamaxahnon hihxon jato yohihax, Hen tah hen caresscai, hihquish Macedonia mai janin cahi Pablo caresscai. ² Macedonia maibo nabebacahini caquin jano jai noquen huetsabo hicha yohiquin. Jato yohibonahi cahi Grecia main nocoti. ³ Jano sca quimisha hoxne hihqui. Siria main caman pohquenoxon nontin nanepanan ta jano sca jaa cacatsihqui honanscaxon judiobaan jaa bihti shinannishqui. Bihcatsihquibo nincarihbihax Macedonia main caribihax janohax sca cati Pablonen shinanscaquin. ⁴ Hahbetan ta caibo rihbi canishqui. Huetsa cahen Sópater, Pirron baque, Berea janinhah. Huetsa cahen tesalónicabo rabe, Aristarco betan Segundo. Huetsa cahen Gayo, Derbe jema janinhah. Huetsa cahen Timoteo. Huetsa cahen Asia mai meha rabe, Tíquico betan Trófimo. ⁵ Jaabo rahsi bebotanax Troas jema janin noque manati bocani. ⁶ Chahoma paan fiesta huinotipish Filipos jema janinhax noque cahi. Pichca nete nihxon Troas janin jato merahax jano sca siete neten rihbi noque baneti.

Troas qui Pablo nocotai

⁷ Hahan semana pehocohtai neten sca pihi noque tsinquitai. Bahquish sca cayanoxon jato betan Pablo yohuan yohuani. Yame pochinicon caman jaa yohuani. ⁸ Jano noque tsinquitai chiqueho cahen hicha ramparin xabati. ⁹ Jano ta xehqui pishca janin huesti beronan tsahonishqui Eutico janeya. Pablo basi yohuan yohuanaiya ta hoxa teneyamascaax paqueshqui. Jaton quimisha tapoyahpa xobohoh quehax paqueti bochiquihax. Mahuascai bihtancanquin. ¹⁰ Hahqui botopaquescaxon Pablonen jaa racatai hicobahinquin.

—Masa shinaryamanahue. Jihue ta jaiqui —noque jaquin.

¹¹ Jaatian sca maperihbixon posen tehcxon pihax, xaba paquenon caman yohuanrihbihax, caresscai. ¹² Jaa beronan mohitahpa mapemahiya ta sirijaquin sca shinancannishqui.

Troas jenebahini Mileto jema qui nocotai

¹³ Ason jema caman Pablo main cacatsihquiya tah non nontin bebohi caniqui. Cahax Ason jema janin Pablo bichi taxnati. ¹⁴ Jano noque merahi jorescaiya tah non nanemahax Mitilene jema caman noconihqui. ¹⁵ Jano hoxashinahax mohiyahax tah non caribiniqui. Cah Quío mai pishca qui nocoti. Janohax caxon hian naponbi racatai mai pishca huinobahinquin, Samos janeya mai pishca. Janohax jahuen quimisha neten sca Mileto jema janin nocotax taxnati. ¹⁶ Janin Pentecostes fiesta noconon hihquish ta Jerusalem janin Pablo hixon nococatsihnishqui hahtipahax. Jaa copi ta Asia mai janin basiyamanoxon Efeso jema huinoresti shinannishqui.

Efeso pastorobo Pablonen yohihi

¹⁷ Mileto janixon sca Efeso janinha pastorobo jaan quenamaquin. ¹⁸ Nocotaiton jato yohiquin:

—¿Asia main noconish jenquetsi hen mato tocan jihuenihquin? Man tah man honanquin sirijahi. ¹⁹ Jahuabi hapo quescaxonma tah hen noquen Hihbo teexonniqui. Heen caibaan hea tiromajacatsihquin tana tanahah tah hen masa shinani jihuenihqui. ²⁰ Mato sirijanoxon tah hen jahuabi mato yohiquin pishinmayamaniqui. Tsinquitaiton yohixon

tah hen heen xobohoxon rihbi yohixon mato honanmaniqui. ²¹ Papan joi nincaxon shinan pontexon noquen Hihbo Jesucristo sca nincacoinnon hihxon tah hen heen caibo yohixon heen nahuabo rihbi yohicoinnihqui. ²² Dios Yoshiman hiohah sca tah hen Jerusalem janin cahi. ¿Janoxon hea jahuejaticaniquin? Hen tah hen honanyamahi. ²³ Jatihibi jema janin ta Dios Yoshiman hea yohihiqui. Cadenanen nexaxon ta mia hihti tiromajayaxihcanihqui, hah ta hea jaiqui. ²⁴ Jaabi hea rehtecanmis hih ta hea jayamahi. Noquen Hihbo Jesusen hea yohini quescabijaquin Papan jatohon shinanai joi siri yohiti res tah hen queenai. Papan hea yohihi cahue hahca tah hen cahi, jano hea raanaiton.

²⁵ Mato tocan caquin tah hen Papan mato jihuemahi joi mato yohinihqui. Hea tah man jisyamascatihi. Hen tah hen honanai. ²⁶ Jaa copi tah hen mato rahma yohihi. Maton hohchayabi mahuatax tah man Joi siri Pablonen yohiyamahah bi tah non mahuatai, hih man tsoabi jatimahi. ²⁷ Papan noque yohihi jatihibi tah hen mato sirijaquin yohinihqui. ²⁸ Coiramenahue. Criston jonibo rihbi coirannahue. Jaabo man coirannon hihxon ta Dios Yoshiman mato pastorobomanishqui. Carnero pimaquin hahcajaquin man Papan caisaibo shinan hinannon hihxon ta mato jaa tee hinannishqui. Jahuen jimi potaquin ta Criston jahuen caisaibo bihnishqui jahuen carnerobo. ²⁹ Hea caresscaho pecaho ta mato tocan tiroma jonibo nocoyaxihqui carnerobo rehteresai hinobaan hahcajaquin. ³⁰ Hea chibannahue Criston jonibon hihnicah rihbi ta mato quihabo caibo jayaxihqui. ³¹ Jaa copi coirannahue. Quimisha bari tah hen matohon hihti shinanxon yame, baryahpan rihbi hen mato yohipaquhehi tantiyamanihqui. Jaa shinannahue.

³² Jato coiranhue Hihbon, hahbahini tah hen cahi. Jahuen joi bihquin jeneyamanahue, hahan tah man jihuetihi, matohon shinanxon hinanai jahuen joi. Jaan ta mato shinan hinanxon jatihibi jahuen baquebo tocan mato jahuen jihue hihbobo sca jaan mato hihmati hahtipahiqui. ³³ Maton oro, maton coriqui, maton chopah tah hen jahuentianbi mato bichincatsihyamanihqui. ³⁴ Heen mequeman teexon tah hen hen pishinaibo bihniqui. Heen hahberabetibaana rihbi tah hen bihxonnihqui. Man tah man honanai. ³⁵ Hea hihqui quescarihibi man janon hihquish tah hen jihuenihqui. Jascajaquin teexon noquen Hihbo Jesusen joi shinanxon yomanahquetaibo yanapanü tah hen mato haxemaniqui. Hinanti ta bihti mentan hashoan siri qui, hah cahen noquen Hihbaan janish —jato jaquin.

³⁶ Jatihibixonbi sca raboxonen nihxon Papa yocacanquin. ³⁷ Huaohihscacani jatihibi. Pablo mehuetanax hicotanax huaohihcane. ³⁸ Jan jato yohihah nincacax jaa jisyamascatihi nincacax bena benatax nontin caman jaa manahi bocani.

21

Jerusalem janin Pablo cahi

¹ Jaatian tah non nanetax jato potabahini caniqui. Cos mai janin caman tah non ponte caniqui. Jano hoxashinahax mohiyahtax cahax Rodas mai janin sca nocoti. Janohax Pátara jema janin taxnati cahi. ² Fenicia mai janin pohquejaqueti cahi, nonti jano merahax hahan sca nanetax quebijistima hiaman caribih. ³ Caquin tah non noque memiho Chipre mai jisniqui. Jaa potabahinax Siria mai janin cahax Tiro jeman taxnatax mapeti. Jahuen jahuaborabo nonti hihbaan jano mapemahi cahiya tah non jano mapenihqui. ⁴ Tiro janin tah non Criston baquebo meranishqui. Jato betan tah non siete neten banetahnishqui. Dios Yoshiman shinanmaha Pablo yohicanquin, Jerusalem janin cayamahue hahxon. ⁵ Jahuenti ra neten jano hihquish tah non caribiniqui. Jema jemanhihti janin ta jaabo jaton haibobo jaton baquebo noque manahi canishqui. Jemanhihtinin sca tah non raboxonen nihxon Papa yocanihqui. ⁶ Papa yocacax nontin noque naneti, jaabo xobon boribihahbo.

⁷ Tiro potabahinax Tolemaida jeman taxnatax noque mapeti, main sca canoxon. Jano noquen huetsabo jisi caxon huesti neten rihbi jato pasijaquin. ⁸ Hoxashinahax mohiyahtax caribihax Cesarea jeman nocotax Felipe xoboho mapeti. Felipe ta Papan joi siri nincamanicah hihpahonishqui hoa siete caisnibo quihah. Jahuen xoboho tah non banejaquenihi. ⁹ Jaa ta chosco haibo baqueyahpa janishqui bebo honanyamahibo rahsi. Papan shinanmaha ta jaabo yohuanpahonishqui. ¹⁰ Jahuenti ra neten non jano jaiya Judea mai janinhax Agabo janeya joni nocoti, Papan shinanmaha yohuannica. ¹¹ Nocoxon Pablon sinton bichinax jahan sca tanexehtax menexehtax yohuanscai:

—Dios Yoshiman ta yohihiqui: Nescajaquin ta Jerusalem janinha judiobaan nea sinton hihbo nexayaxihcanihqui. Nexaxon ta nahuabo sca jaa hinanyaxihcanihqui —hihqui.

¹² Jan yohuanai nincaxon tah non Jerusalem janin jaa cayamascanon hihxon Pablo noquen yohinihqui. Janohahbaan jascajaribiquin. ¹³ Jascajahabaan bi Pablonen yohiquin:

—¿Jahuejanoxon man huaohihxon hea masa shinanmacatsihquin? Hea noquen Hihbo Jesusen joni copi hea nexayaxihquibo bi tah hen cati shinanai. Jerusalem janin hea rehteyaxihquibaan bi tah hen cati shinanai —hahquin.

¹⁴ Banemati hahtipahyamahax noque netescái.

—Noquen Hihbo queenai quescari janon —hihquish.

¹⁵ Jaa pecaho sca non pishinaibo bichish Jerusalem janin noque cahi. ¹⁶ Cesarea janinha noquen huetsabo caibo noque betan caxon Mnasoman xoboho noque hioceanquin. Mnason ta Chipre janinha joni qui, Criston joni xeni. Jaa ta noque jahuen xoboho hoxamanishqui.

Jacobo jisi Pablo cahi

¹⁷ Jerusalem janin noco sca non jaiya jenimahanan noquen huetsabaan noque bihquin. ¹⁸ Hoxashinahax mohiyahtax sca noque betan Pablo cahi, Jacobo jisi. Jaa ta jatihibi jaton pastorobo pishinquin. ¹⁹ Man jascabi jayamahn hahxon jaton nahuabo tocan Papan hahan honanti jaa hahmatanho jato yohipaquin. ²⁰ Jan chanihi nincaxon:

—Papan ta hahquiqui —hahxon yohicanquin:

—Noquen caibo nincacoinaibo ta jahuentihi ra mil jaresscaiqui. Jatihixonbi ta Moisesnin joi chibancaniqui. Min tah min honanscai. ²¹ Mian roqui min hochó jabisnihbo noquen caibo mian honanmahi Moisesnin joi jenebahinnon. Jaton baquebo honantijayamati roqui mian jato yohihi. Moisesnin yohini quescayamascarihbihhi jihuenon roqui mian jato yohihi. Jascaraibo ta nincacaniqui. ²² ¿Jahueja sca min jatihin? Min nocotai ta honannoxihcanihqui. ²³ Jaa copi non mia yohihi quescabijahue. Neno ta chosco beronan jaiqui, Hen yohihi quescabijaquin tah hen jatihi hihquipibo yohuani. ²⁴ Jato hiohax jato betan nashitanxon jaton mapo maxcorohabahinnon copijaxonhue. Min jascajahi jixxon ta jaabaan nincacai jahuama hihqui honannoxihcanihqui. Man Moisesnin joi chibanparihin ta honannoxihcanihqui. ²⁵ Santo rehtexona nami nincacoinai judiomabaan piyamanon hihxon jimi rihbi piyamanon hihxon terehahxon rehtehibo rihbi piyamanon hihxon joni huetsa betan tsiniyamanon hihxon tah non jato moa huishaxon yohinihqui. Jaa ta honanscacaniqui —hihqui Jacobo.

Papan xobohoxon Pablo bichibo

²⁶ Jascaha jaa beronanbo hiohax huetsa neten sca jato betan nashihax Papan xoboho Pablo mapeti. Mapexon:

—Jatihi neten hihquish tah non mequejaqueti queyoscatihi. ¿Jahua neten non jatihibichina noquen hinanti non betihin hinannoxon? —hihqui Pablo, hapo yocacahti.

²⁷ Jahuen siete nete nocoti pishca pishinaiya Asia janinhax judiobo nococani. Papan xoboho Pablo meraxon jonibo coro coromaxon Pablo bihcanquin. ²⁸ Coshin sca quenacanquin:

—Noque yanapannahue, noque caibon. Nea ta jatihibi janin nihxon noque qui tiromahi yohuanai joni qui. Nea ta Moisesnin joi qui yohuanihqui. Nea xobo qui tiromahi yohuanrihbihhi. Jascajahax ta Pishin pari ta jaiqui hihquish, Papan xoboho nahuabo rihbi mapemaxon nea mequexonti xobo rishtajahiqui —hahcanquin.

²⁹ Efeso janiha joni betan Pablo jaton jema janin nichí jisipixon Papan xoboho Pablonen jaa mapemahi shinancanquin. Trófito cahen jaa joni.

³⁰ Jascajahiboya jema jatihobi cobinai quescapi jonibo rainyamahax bishqui bishquihicannahax Papan xoboho nocohinnati. Pablo bihxon jemanhihti janin ninixon xehpotibo xehpobahincanquin. ³¹ Jaa rehtehibaan bi ta sontaro hapo qui cahax caibo chaninishqui, Jerusalem janin ta jatihibi coro corocaniqui, hihqui. ³² Sontarobo quenamaxon jaton capitanbo rihbi histon quenamaxon jato betan jema janin hishtocahinquirani sontaro tininti jahui. Jaton hapo betan sontarobo jahui honanxon Pablo rishquiquin jenebahin-scanquin. ³³ Nocoxon Pablo bihxon cahen rabe cadenanen nexahahbo hihxon sontaro hapon jato yohiquin. Jascajaxon sca:

—¿Tsoa min quin? ¿Jahuejahi meraxon mia jascajacanihquin? —hahquin. ³⁴ Corotaibo cahen mesco yohuanypabo. Coro corotaiboya jahuabi honanquin sirijati hahtipahyamaxon sontarobo sca yohiquin: Xoboho hiotannahue —jato jaquin jaton hapon. ³⁵ Rehtenahue hihqui coro corocanahibo sina sinataiya tapiti qui Pablo nocotaibon sontarobaan jaa hiascacanquin.

³⁶ —Rehtenahue —coshin hihcanacani coro corotaibo.

Pablonen jato yohicoinali

³⁷ Sontarobaan xobo xehqui qui nocoscaxon sontaro hapo Pablonen yohiquin:

—¿Hen mia pishca yohinon min hea nincarohatimahin? —hahquin.

—¿Griego join min yohuanain? ³⁸ ¿Mia min hoa Egipto mai meha jonimah quin? ¿Hapobo potanon hihxon jato sinamaxon cuatro mil rethemisbo nihi naman sca hiohipi, mia min jaamah quin? —hahquin yocaquin sontaro hapon. ³⁹ Jascajaha Pablonden yohiquin:

—Hea ta Tarso janinha judio qui. Cilicia main hani jema janinhah. Nea jonibo hea yohimarohahue —hahquin.

⁴⁰ Jan jeenhiquiya tapitinin mapexon jato qui jahuen mequen Pablonden sanaquin. Netecahinscანი. Jatón joinbi sca Pablo yohuani, judiobaan join sca.

22

¹ —Hea huetsabaan, heen papabaan, hea tsoa quin hen mato rahma yohinon nincanhue —jato jaquin.

² Jatón joinbi jan yohuanai nincacax hashoan sca netecani. Pablo yohuanparihi:

³ —Hea ta judio qui, Cilicia mai Tarso janinhax cainni joni. Nea jema janinxon ta matón haxemanicahbaan hea haxemapahonishqui. Gamaliel ta heen haxemanica hihxon hea haxemaquin sirijanishqui. Noquen xenibaan yohini quescabijaquin hen hahnon ta hea haxemanishqui. Man hihqui quescarihibi tah hen noquen Papan joi hihti jenipahichai. ⁴ Hean rahma nincacoinai joi nincacoinaibo tah hen rehtenoxon caman jato chibanpahonihqui. Cadenanen nexaxon tah hen haiboya bebo jato sipojapahoniqui. ⁵ Hen jascapajahoni ta sacerdotebaán hapon, jatihibi noquen hani hapobaan rihbi mato yohitihiqui. Jaabaan ta hea jayaxon jato bihti quirica hinannishqui, Damasco janinha noquen huetsabo hen hinantannon hihxon. Jaya caxon jano jaibo cadenanen nexaxon casticannoxon sca neno Jerusalem janin jato hihuehi tah hen caniqui.

Noquen Hihbo qui tah hinamehniqui hihqui Pablo

(Ha 9.1-19; 26.12-18)

⁶ Barin manan tsacahiya ta Damasco hochoma bahin cahiton naihoxon sca hani xabapan hea xabajanishqui. ⁷ Main paquexon sca hea yohihi joi hean nincacquin: Saulon, Saulon, ¿jahua copi min hea tiromajaquin chibanain? hea jaquin. ⁸ ¿Tsoa min quin, Hihbon? hahquin hean. Hea ta Jesus Nazareno qui, min hea tiromajaquin chibanai, hea jaquin. ⁹ Hehbetan cahibaan ta jaa xaba jixxon bi hehbetan yohuanai joi nincayamanishqui. ¹⁰ Hean hen jahuejati jain Hihbon, hean jaah ta Huenihue. Damasco janin catanhue. Jano ta mian hea hahxonti jai mia yohinoxihcanihqui hah ta hea noquen Hihbaan janishqui. ¹¹ Hoa xabapan bechaxah tah hen jisti hahtipahyamascaax hehbe cahibaan mehuetanxon hiohah sca Damasco jema janin noconihqui.

¹² Jano ta Ananías janeya joni janishqui, Moisesnin joi nincanica. Jano jihuetai judiobaan ta jatihixonbi jahan shinannishqui. ¹³ Hea janin nocoxon ta hea pataxxon sca, Heen huetsa Saulon, jise, hea janishqui. Jaatianbi tah hen jisresscaxon jaa meranishqui. ¹⁴ Noquen papabaan Papa Diosen ta mia caisihqui, mian jaa hahxonti jan shinanai min honannon hihxon. Jahuen nincanica baque min jisnon, jan yohuanai min nincarihbinon ta mia caisihqui. ¹⁵ Min jisibo, min nincacaibo rihbi tah min jatihibi jonibo yohiyaxihqui. ¹⁶ ¿Jahuejahi sca min basitihin? Mia nashimanon huenihue. Noquen Hihbo yocaxon miin hohcha sohuamascahue, hea jaquin.

Noquen nahuabo yohinon ta noquen Hihbaan hea raannishqui hih Pablo jai

¹⁷ Jerusalem janin nocorihbixon tah hen Papan xobohoxon Papa yocaxon namaquen hahcajaquin noquen Hihbo jisniqui. ¹⁸ Histon Jerusalem janinhax carihue. Hean hen jato hahxonai min jato yohihah ta nincayamaxihcanihqui, hea jaquin. ¹⁹ Hihbon, noquen tsinquiti xoboboho hihcaxon mia nincacoinaibo meraxon hean sipojaxon jato rishqui rishquipahoni ta honancaniqui. ²⁰ Miin joi yohinica Esteban rehtehiboya rihbi tah hen jano rihbi nihxon jascajanahue hihxon jaa rehtehibaan chopá hean coiranxonnihqui, hahquin hean. ²¹ Catanhue, hocho tah hen mia raantihi nahuabo janin, hea noquen Hihbaan jaquin —hihqui Pablo.

Hapon Pablo bichi

²² Jano caman res nincacacquin. Jatón nahuabo yohihi Pablo catihi nincacax coshin sca sai saihicani:

—Jascapa joni main yamascanon rehtenahue. Jascapah ta jihuetimahiqui —hihcani. ²³ Jatón chopá pecaxon mai potó rihbi bochiqui potahihnicanquin. ²⁴ Jascajahibo jixxon Xoboho botannahue hapon jahuen sontarobo hahquin. Jahua copi jonibo hahqui jatiho sinatiquin hihxon sca rishqui rishquixon hisinjanon jato yohirihbiquin. ²⁵ Yohihah rishquinoxon nexacacquin. Jano jai capitán sca Pablonden yocaquin:

—¿Jahuen hohcha honanxonma romano joni rishquiti joi man jain? ²⁶ Jan yocacai nincacax hapo janin caxon capitánen yohiquin:

—¿Jahueja min jacatsihquin? Jaa ta romano joni qui —hahquin. ²⁷ Hahqui caxon sca hapon yocaquin:

—¿Mia min romano quin?

—Hea rahan —hahquin.

²⁸—Hea tah hen hicha copijahax romanoscانىqui —hahquin hapon.

—Hea tah hen romano cainnihqui —hahquin Pablonen.

²⁹ Histon sca jaa hisinjacatsihquiibo picoti bocani. Romano que bi jan cadenanen jaa nexahi copi hapo rihbi raquescai.

Judiobo hapobo bebon Pablo nichí

³⁰ Jascajahipi huesti nete sca jahua hahqui yohuan jacoíniquin hihxon Pablo pecaxon sacerdotebaan hapobo, judiobaan hanibo jatihibi betan tsinquinon yohiquin. Jato qui hioxon sca jato bebonbi Pablo nichinquin.

23

¹ Tsinquitai hapobo jisanan Pablonen jato yohiquin:

—Hea huetsabaan, shinanquin sirijahax, tiromahaxma jihuepahunish tah hen rahma caman jascarai, Papan hea jisi honanax.

² Pablonen jascajahiya jaa pataxaibaan Pablo copasnon sacerdotebaan hapon jato yohiquin.

³ —Papa Diosen ta miabi rishquiayahihqui, maoxen sicaha chiquepan. ¿Jascajatima Moisesnin yohinih que bi min hea jato copasmahin? ¿Jascajaquin min hea Moisesnin yohini quescajaquin min hea pontecatsihquin? —hahquin Pablonen.

⁴ Jaa pataxaibaan sca:

—¿Papa Diosen sacerdote hapo min jascajaquin tiromajaquin yohihin? —hahcanquin.

⁵ —Sacerdotebaan hapo tah hen honanyamahahqui, hea huetsabaan. Maton hapo tah man tiromajaquin yohitimahi hah ta huishani joi jaiqui —hahquin Pablonen.

⁶ Jaatian caibo fariseobo caibo rihbi saduceobo honanscaxon hapobaan nincacahbo coshin sca yohuani:

—Hea ta fariseo qui, hea huetsabaan. Fariseobaan baque ta hea qui. Mahuanihbo ta Papan hahquirihbi teehihmayaxihqui hen jai copi ta hea casticancanihqui.

⁷ Jan jascaraiya fariseobo betan saduceobo join bahchinanscai. Jaa copi caibaan Pablo casticancatsihqui bi caibo queenyamascai. ⁸ Mahuanihbo ta Papan teehihmaribitimahiqui. Papan naihoh queha yonotibo ta yamahihqui, yoshin rihbi ta yamahihqui, hih saduceobo jai bi ta Hah ta jatihiqui, jai rahan, jai rahan, fariseobo jaiqui. ⁹ Join bahchinani corotaiboya fariseo huishani honanbo nihrenenxon hani join coshin jato yohiquin:

—Noquen jisi ta nea joni hohcha yamahihqui. Yoshiman jaa yohuanquihnaiya jaa hihamahiya Papan yonotinin jaa yohuanquihnaiya mato jahua hihtihin? —hahcanquin.

¹⁰ Hashon sca rainyamacani. Nininanquin Pablo huaxabahincanmis hihxon, Jato bichinnahue hapon jahuen sontarobo jaquin. Mehuetani caxon bichinxon coshin ninibehnantanxon jaton xoboho sontarobaan Pablo boresscaquin.

¹¹ Jascajahipi huesti neten sca yame Pablo janin noquen Hihbo sanarenenxon:

—Raquyamahue. Neno Jerusalem jema janinxon min hehqui jato yohicoinai quescajaribiquin tah min Roma jema janinxon jatihi —hahquin.

Pablo rehteti shinanaibo

¹² Xaba paquescaiya Pablo rehteti shinancanquin judiobaan.

—Non jaa rehtenoxon caman tah non pitimahi, xehatimarihbihi. Non jaa rehteyamahiya noque sca Papan rehtenon —hahcanquin. ¹³ Cuarenta joni hihxon jascajacancanquin. ¹⁴ Jascajahax jano sacerdote hapobo betan jaton hanibo jaiton bocani. Nocoxon:

—Non yohihi quescajajaquin non hahyamahiya Papan noque rehtenon hihxon tah non yohihahqui, Pablo rehtenoxon caman tah non jahuabi piti nohuejatimahi. ¹⁵ Tsinquitai hapobo yocaxon sontaro hapo rihbi yocanahue jan neno mato janin jaa bexonnon. Pablo yohuanai man sirijaquin sca nincacatsihqui janahue. Janin noconon tah non rehtetihi, non tah non manascai —hahcanquin.

¹⁶ Rehteti shinanaibo honanax Pablon pihasha pishca cahi sontarobaan xoboho caxon Pablo yohiquin. ¹⁷ Jaan sca capitan quenaquin. Jahuiton:

—Nea beronan miin hapo janin hioxonhue jan nincabehnanai jan yohitannon —hahquin.

¹⁸ Jahuen hapo janin sca capitanen hioquin.

—Non bichipi Pablonen ta hea quenaxon nea beronan mihqui hihuexonnon hea yocacaxqui. Mia roqui nincamacatsihqui.

¹⁹ Jascajaha mehuetanxon hahmebi hiohax sca yocacahti:

—¿Jahua min hea yohicatsihquin?

²⁰ —Heen caibaan ta hashoan sirijaquin honancatsihquin hahcajaquin mia nescajaquin yocati shinanihqui. Non Pablo yocanon hapobo tsinquitai janin bahquish Pablo hiox-onyaxahnhue hih ta jacanihqui. ²¹ Jaabo hihcainai shinanyamahue. Cuarenta hihxon hashoan hicharihboxon ta jaa rehtenoxon caman pitimahi, xehatimahi yohicaniqui, rehteyamahiboya jaabo sca Papan rehtenon hihxon. Rahma ta quexescacanihqui rehtecat-sihquin. Min jeenhahnon res ta manacaniqui —hahquin beronanen.

²² —Hea min jascajahi tsoabi yohiyamatahin min. Caresscatanhue —hahquin hapon.

Gobernador Félix janin sca Pablo raanaibo

²³ Rabe capitan sca quenaxon jato yohiquin:

—Doscientos sontaro tsinquinahue. Cabachonen nichibo rihbi setenta sontaro. Jashiyahpabo rihbi doscientos sontaro. Yame sca jaiya Cesarea jema janin caman Pablo botannon jato raannahue. ²⁴ Hahan Pablo rihbi cati cabacho bexonnahue, gobernador Félix janin caman sirijaquin hionoxon. ²⁵ Jato jascjaxon quirica sca nescajaquin huishaquin:

²⁶ Hea Claudio Lisias hihxon tah hen mia noquen gobernador Félix mihqui joi raanai. ¿Min jascabi jayamahin? ²⁷ Hen mihqui raanai joni judiobaan rehtepanan tah hen sontaroya nocoxon romano joni honanxon jato bichinipiqui. ²⁸ Jahua tiroma jaiquin hihxon hen jaton hapobo jano tsinquitaion hiohipiqui. ²⁹ Jaton xenibaan joi jan nincayamarai copi res jaabaan sinajahi bi ta jahua copi rehteti yama qui. Jahua copi sipojati yamarihbihi tah hen honanscaipiqui. ³⁰ Jaa rehtenoxon caman piyamaxihquibo jai chanihah tah hen histon res mihqui raanti shinanscaipiqui. Hahqui yohuanaibo rihbi tah hen yohihipiqui, hahqui yohuanti joi jaxon mia hihbaan yohuantannon, hahquin huishaquin.

³¹ Hapon yohiha quescabijaquin cahen Pablo bihxon nihshinaxon Antúpatris jema janin caman sontarobaan hioquin. ³² Bariyahpan sca cabachonen nichibo hahbetan catannon texe sontarobo jaton xobon caribihí. ³³ Hiotanxon Cesarea jema janin nocoxon cabachonen nichibaan janoha gobernador qui jaa quirica hinanquin. Hinanxon Pablo rihbi hahqui hihuecanquin. ³⁴ Jaa quirica jixxon jahuerahnoha mai meha mia quin hihxon Pablo yocascaquin. Cilicia mai meha rahan jan hihnon:

³⁵ —Min yohihi tah hen nincatihí mihqui yohuanaibo nocotaiya —hahxon Herodesnin quiquin hapo xobohoxon coiranahbo hihxon jahuen sontarobo yohiquin.

24

Felixnin quenamaha Pablo yohuanai

¹ Jan jano nocotipi piccha neten sca sacerdotebaana hapo Ananías nocoti jahui. Hahbetan rihbi caibo jaton hanibo. Yohuanxon yanapannicah rihbi Tértulo janeya. Jaa rahsi jahui. Pablo qui jaabo yohuanti jai joi jaton gobernador nincamacanquin. ² Pablo quenamaha noco sca jaiya hahqui yohuani Tértulo pari yohuani:

³ —Mia copi ta noquen caibo siripi jihuutihqui, Félix hapon. Mia tah min hihti siri qui. Mian yohihah ta pontejaquin sca shinanxon nea noquen caibo coirancaniqui. Jatihibi janinxon tah non jatihibijaquin, Min tah min noque hahxonai, hahcai, mia yohiquin.

⁴ Jaabi tah hen mia hashoan jatsanjacatsihyamaxon hen mia pishca yohicatsihqui. Siri joni hihxon min hahcai quescajaquin hea nincarohahue, hen mia yohinon. ⁵ Nea joni ta hisin pahe quescapah qui. Non tah non honanscai. Jatihibi main jihuetai noquen caibo ta jaan rainyamahihqui, noquen quiquin hapobo non potanon hihxon. Jaa ta nazareno joi chibanaibaana hapo qui. ⁶ Noquen Papa Diosen xobo rishtajahiton tah non jaa bichipiqui. ⁷ Noquen xenibaan yohini quescajaquin non jaa japanan ta sontaro hapo Lisias joxon coshin noque bichinipishqui. Mia hihbaan sca non demandani jonon ta noque yohihipishqui. ⁸ Queenax miabi jaa yocacahue. Jascaxon tah min non mia yohihi joibo jaa yohuanmaribitihí —hihqui.

⁹ —Jascacoin tah qui —hihcani hahbetan jahui judiobo.

¹⁰ Jaa sca yohuannon gobernadornen mequen sanahiya Pablo yohuani:

—Hicha bari sca min noquen caibo pontehi honanxon tah hen sirijaquin shinanhahan mia yohihi, jahueja hen jain min honannon hihxon. ¹¹ Doce nete res sca tah qui, hen Jerusalem janin Papahon shinani cahipi. Yocacahxon tah min hea hihcainai hea honantihí. ¹² Jahuenbi ta hea jonibo betan yohinanaion merayamahipicanaxqui ni Papa Diosen xoboho, ni jaton tsinquiti xoboboho, ni jema bahinbi. Jonibo sinamaxon coromahiton ta hea jahuenbi merayamahipicanaxqui. ¹³ Hehqui rahma yohuanai joi rihbi ta jenquetsahaxon bi jan hihcainai mia honanmatimahiqui. ¹⁴ Min honannon hihxon tah hen mia yohihi. Heen papabaan Papa Dios tah hen shinancainai. Moisesnin huishani joi

jatihibi, Papan joi yohinicabaan huishani joi jatihibi rihbi tah hen nincacoinai. Criston bahin caxon tah hen nincacoinai, jaa bahi cahen nazareno joi neabaan yohihi. ¹⁵ Siriboya tiromabo Papan huenirihbiyaxihqui jaabaan shinanai quescajaquin tah hen shinanai. ¹⁶ Jaa copi tah hen hea tiromayamahi Papan jison hihxon, jonibaan rihbi jascajaquin jison hihxon, pontejaquin shinanax hea jihuetai.

¹⁷ Hicha bari cayamanish tah hen jahuajomabo heen caibo yanapannoxon coriquiya cahipiqui, Papa Dios rihbi pishca hinani tah hen cahipiqui. ¹⁸ Jaatian ta nashihax Papa Diosen xoboho nichiton hea merahipicanaxqui, noque janin tsamajaquetaibo yama, noque jahuabi coroyamahi. ¹⁹ Asia mai mehax jahui judiobaan ta neno jahuex hehqui yohuanti jaiqui, hehqui yohuanti jaax. ²⁰ ¿Jaabo joyamaahiya, jaton hapobo tsinquitai tocan hea nichiton jahua hen tiromajahi jaton hapobaan merahipishquin? Neabobi yohimahue. ²¹ Nea res tah hen jato tocanxon coshin yohihipiqui: Mahuanihbo Papan huenirihbiyaxihqui hen shinanai copi ta hea casticancatsihcaniqui. Jascajaresquin —hahquin Pablonen.

²² Jan yohihi bahi ta Felixnin honanquin sirijanishqui. Honanxon bi ta jaa netenbi jato nincacatsihyamanishqui.

—Sontaro hapo Lisias jahuiya pari tah hen mato jisyaxihqui —jato jaquin.

²³ Jascajaxon capitan sca yohiquin Pablo coirannon. Jan xoboho nihnon, jahuen amicobo rihbi pitibo hinani hihcocatsihquiya jato hihcomanon capitan yohiquin.

²⁴ Felixnin haibo cahen judio, Drusila janeya. Jato jascajahipish jahuentihi nete ra jahuen haibo betan joxon Pablo quenamaquin. Quenamaxon non Cristo nincacoinai joi Pablo yohimaquin. ²⁵ Non ponte jihuetai jai, non coirameti jai, Papan casticanyaxihqui joibo rihbi Pablonen yohihiya Félix rahte rahteti. Nincaxon:

—Caresscahue. Hen tee hichayamaahiya tah hen mia hahquirihbi quenamatihhi —hahquin.

²⁶ Jaa pecaho coriqui Pablonen hinannon hihxon quenamaricahtixon yohuanquih-nquin. ²⁷ Rabe bari huinoscaiya Porcio Festo sca Félix xahbanen haposcai. Judiobo jenimanon hihxon jaan rihbi haho sipojati xoboho Pablo banemaquin.

25

Feston Pablo quenamahi

¹ Jaa mai janin Festo nocoscai. Nocotipish quimisha neten hihquish Cesarea janinhax Jerusalem janin cahi. ² Janoxon sca sacerdoti hapobo betan judiobaan hanibaan Pablo qui yohuanti joi jaa yohiquin. ³ Bahin jahuiton quexexon rehteti shinanxon Jerusalem janin Pablo hihuexonnon Festo yocacanquin.

⁴—Jaa ta Cesarea janinbi xehpó qui. Hea rihbi tah hen jano caresscatihi basihaxma. ⁵ Jaa copi hahqui yohuanti jaax maton hanibo hehbetanbi canon janohax yohuannoxon —jato jaquin Feston.

⁶ Ocho neten hihamahiya chonca neten jato janin hihquish Cesarea janin caresscai. Nocotipish mohiyahxon janoxon jonibo ponteti xoboho tsahoxon Pablo quenamaquin. ⁷ Quenamaha nocotaiya Jerusalem janinhax nocotipi judiobo jaa nihaquehtancahuani. Hicha hahqui yohuancani. Jaa ta hihti tiroma qui, hihcani. Jascaxon bi hihcainaibo jismati hahtipahyamacanquin. ⁸ Jaatian:

—Noquen xenibaan joi qui tah hen hochayamahi. Papa Diosen xobo qui rihbi tah hen hochayamahi. Cesaro qui rihbi tah hen tiromayamabiresai —Pablonen jaa jaquin.

⁹ Judiobo jenimanon hihxon sca Feston Pablo yocaquin:

—¿Jaabo mihqui yohuanai jatihibi hen nincaquin sirijanon min Jerusalem janin cacatsihyamahin? Janoxon hen nincanon —hahquin.

¹⁰ —Quiquin hapon pontexonnica bebon tah hen nichu. Nenoxonbi hea pontehue. Judiobo qui tah hen jahuabi tiromayamahi. Min tah min honanai. ¹¹ Hen tiromahi copi hea rehteti jaiya tah hen Hen tah hen mahuacatsihyamahi, hen hihtimahi. Huetsa joni hen tiromajani copi hea rehteti jaiya tah hen jascarihbitimahi. Hehqui yohuanaiibo quesahiya ta tsoanbi jato hea hinantimahi. Cesaronen sca hea jison hahqui hea raanhue —Pablonen jaquin.

¹² Feston sca jahuen yanapannicahbo betan yohuantahxon:

—Cesaro qui hea raanhue hah tah min jai. Hahqui sca tah min catihhi —hahquin Feston.

Quiquin hapo Agripanen Pablo quenamahi

¹³ Jan jascajahipi pecaho Berenice betan quiquin hapo Agripa jano nocoti jahui Festo jisi Cesarea jema janin. ¹⁴ Jano jahuentihi ra neten hih jan jarescaiya Pablo cahehipibo Feston yohiscaquin:

—Felixnin xehpobahinni joni ta neno jaiqui. ¹⁵ Jerusalem janin hea cahiya ta sacerdote hapobo betan judiobaan hanibaan hahqui yohuanxon Pablo rehteti yocaquipicanaxqui. ¹⁶ Hahqui yohuanailbaan nincanon bi jan jato joi bichinon hihxon yohimayamaxon tah non noque romanobaan hahqui yohuanaiboya jascajaquin rehtesyamahi, hah ta hen jato jaiqui. ¹⁷ Jaa copi ta hehbetan behipicanaxqui. Non nocotipi mohiyahtax tah hen janoxon jonibo ponteti janin tsahocaxon jaa joni quenamahipiqui. ¹⁸ Hahqui yohuanaibo nincaxon bi tah hen hean shinanipi quescapa tiroma hean merayamahipiqui. ¹⁹ Jatón dios hahxonti joibo copi res ta yohinanipicanaxqui. Huesti Jesus yamanicatón joi copi rihbi. Jihue ta jaiqui, hih ta Pablo jaiqui, jaa yohihi. ²⁰ Jenquetsahaxon jato sirijaquin nincatihin, honanyamaxon tah hen Pablo yocaquipiqui: ¿Jerusalem janinxon hen mia jisnon min jano cacatsiyamahin? ²¹ Hen jascajaha bi ta queenyamahipishqui. Cesaronen sca jaa jisnon hihxon hen xehpotahxon raanyaxahnon hea yocacah tah hen xehpomahipiqui Cesaro qui raanti hahtipahnoxon caman —hahquin Feston.

²² —Jaa joni tah hen nincacatsihqui heanbi —Festo jaquin Agripanen.

—Bahquish tah min jaa nincanoxihqui —hahquin.

²³ Hoxashinahax mohiyahtax sca Agripa betan Berenice jatón quiquin hapo chopa sahuehax jatón joniboya joribihi. Jatón sontaro hapobo betan jaa jema janinha hapobo betan rihbi janoxon nincati xoboho mapecani. Janoxon sca Feston Pablo quenamaquin. ²⁴ Quenamaha nocotaiya sca Festo yohuani:

—Agripa quiquin hapon, noque betan tsinquitabaan, nea tah qui. Jerusalem janinxon hea yocaxon ta nenoxon rihbi jatihibi judiobaan hea coshin yocaquipishqui nea hen mahumascanon. ²⁵ Jaabi tah hen jahua copi casticaxon rehteti merayamahipiqui. Cesaro janin hen raannon hihxon hea yocacah tah hen raanti sca shinanipiqui. ²⁶ Huishaxon joi raantihí bi tah hen hahqui hihcointi yohuanaibo shinanyamahipiqui. Jaa copi tah hen man nincanon hihxon quenamaribihahqui. Mian nincaxon hashoan honaxon min hea yohiha jaa sca huishanoxon tah hen mia jaa nincamahi, Agripa quiquin hapon. ²⁷ Hahan caheti joi huishaxonma bi sipojaxon joni raanah ta tiroma qui hean jisi —jato jaquin.

26

Hapo Agripa janin Pablo yohuani

¹—Queenxon jato joi bichinhue —Pablo jaquin Agripanen. Jaatian nincacahbo mequen sanahihnixon:

²—Jahuerohajaquin tah hen mia nincamati hahtipahi, Agripa quiquin hapon. Heen caibo hehqui yohuanai joi bichinquin tah hen mia nincamahi. ³ Jenquetsih noque judiobo jihuetain, mian tah min honanquin sirijahi. Non yohinanai joi tah min hashoan honanai. Jaa copi hea tenexon hen mia yohihi nincarohahue.

Noquen Hihbo qui hinamehriyamaxon tah hen jato hihti tiromajapahonihqui hih Pablo jai

⁴ Beronanax tah hen Jerusalem janin haninihqui heen caibo tocan. Jatihixonbi ta heen caibaan jaa honanihqui. ⁵ Hihcointi yohuancatsihxon ta mia yohixihcanihqui. Fariseohax tah hen fariseobaan shinanai tscescari hen basi jihuenihqui. Moisesnin yohini quescari caibo judiobo jihuetai bi ta fariseobaan hihti nincacoinax jihuenicabo qui. ⁶ Noquen Papa Diosen noquen xenibo hahxontijanoxon jan jato hahxoncoinscai hen shinanai copi ta hea demandancaniqui. ⁷ Jan noque hahxonnon ta noquen caibaan bariyahpan yame rihbi hahan shinanihqui. Jaa ta hihti manacaniqui. Jan noque hahxonscái hen shinanai copi ta hea demandancaniqui, quiquin hapon. ⁸ ¿Mahuanihbo Papa Diosen huenicointima shinan man jain?

Noquen huetsabo Pablonen tiromajapahoni

⁹ Jesus Nazareno joi nincayamahahbo hihxon hen jato hihti tiromajati ta Papa queenihqui hihxon tah hen Jerusalem janinxon jascajapahoniqui. ¹⁰ Jano tah hen hicha jahuen baquebo sipo xoboho tsahonnihqui. Hen jascajati joi ta noquen hapobaan, noquen quiquin sacerdotebaán rihbi hea huishaxon hinancannishqui. Jaa jonibo rehtehiboya tah hen Jascajanahue hihpahoniqui. ¹¹ Jatihibi tsinquitati xoboboho hihquixon tah hen hicha bihxon Cristo qui jato tiromahi yohuanmanoxon hihxon jato rishqui rishquipahonihqui. Jato qui hihti rainyamahi tehquehixon tah hen hocho queha nahuabaan jemabo janin caman hen jato chibanpahonihqui.

Noquen Hihbo qui jan hinamehni Pablonen yohirihbihi

(Ha 9.1-19; 22.6-16)

¹² Jato jascajanoxon tah hen noquen hapobaan quirica hinanah Damasco jema janin cahi caniqui. ¹³ Barin manan tsacahiya tah hen bahin caquin naihoq quehax xabatai

jisniqui, quiquin hapon. Bari mentan hashoan coshin xabatai. Hea, hehbetan cahibo rihbi xabajaquin. ¹⁴Noque jascajaquin xabajaha jatihibi racareneni. Noquen join yohuanai sca hea quenahi hean nincaquin: Saulon, Saulon, ¿jahua copi min hea tiromajaquin chibanain? Hahan toro chichachiti tahua cahchihohri jamaquihcamahi tah min hisinai. ¹⁵Jaatian: Tsoa min quin Hihbon, hahquin hean. Hea ta hen Jesus qui, min hea tiromajaquin chibanai. ¹⁶Huenitax nihresscahue. Mia caisnoxon tah hen mihqui cainai. Min hea teexonnon tah hen mia caisai. Min hea jisresscai tah min jonibo yohiyaxihqui, hen mia jismayaxihqui min yohicoinnon hihxon tah hen mia caisai. ¹⁷Miin caibaan mia rehtecatsihqui bi tah hen mia rehtematimahi. Jato qui tah hen mia raanyaxihqui. Miin caibomabaan rihbi mia rehtecatsihqui bi tah hen mia rehtemayamayaxihqui. ¹⁸Min jato xabajaxonnon hihxon tah hen mia raantih bahquish chian jaabo nichish bi xabapan sca nihnon hihxon. Satanasnen jato hihbojani bi Papa sca jato hihbojamanon hihxon tah hen mia raantih. Papan jaton hohcha sohuaxonah hea nincacoinaibo tocan jaabo jihueyaxihnon hihxon ta hen mia raantih hea jaquin.

Noquen Hihbaan yohini Pablonen nincacoinai

¹⁹Papan hea jismaxon yohini quescabijaquin tah hen yohiquin pishinmayamaniqui, Agripa quiquin hapon. ²⁰Damasco janinxon pari yohixon Jerusalem janinhahbo sca yohixon Judea mai mehabo jatihibi yohixon judiomabo rihbi sca tah hen jato yohinihqui. Shinan pontexon Papa Dios sca nincaxon behnajaquin shinanxon quescabijaquin sca hahcabo hihxon tah hean jato yohinihqui. ²¹Jaa copi res ta Papan xoboho hea bihxon heen caibaanbi hea rehtecatsihquipicanaxqui. ²²Papan yanapana tah hen rahma caman jaa joi yohiquin jeneyamahi, hanibo yohixon jahuaborajomabo rihbi yohiquin. Papan yohinicaibo betan Moisesnin ta jayaxihquibo yohinishqui. Jaa joi res tah hen jato honanmahi huetsa joima. ²³Papan caisai joni tiromajayaxihquibo ta yohicannishqui Moises, jaabaan. Hihquish bi jaa pari huenixon noquen caibo jan xabajaxonyaxihqui noquen nahuabo rihbi jan xabajaxonyaxihqui ta yohicannishqui. Jaa joibi tah hen yohihi, huetsama —jato jaquin Pablonen.

Noquen Hihbo qui Agripa hinamehnon hihquish Pablo yohuanai

²⁴Jascajaquin joi bichinaiton Feston coshin yohiquin:
—Min tah min tehquehiqui, Pablon. Hashoan hicha quirica honanax tah min mapo masasci —hahquin.

²⁵—Tehquehiyama tah hen jai, Festo hapon. Hen yohihi ta hihcainai yohuanti qui, shinanquin sirijahax yohuanti. ²⁶Noquen quiquin hapo hihxon tah min hen yohuanai min honanquin sirijahi. Jaa copi tah hen shinanquin sirijahanan yohuanai. Hen yohuanai tah min honansai. Hen tah hen honanai. Hen mia rahma yohihi tah hen jonéxon hahyamaniqui. ²⁷¿Papan yohinicabaan huishaxon yohini joi min nincacain, Agripa quiquin hapon? Ninca tah min jai. Hen tah hen honanai —hahquin Pablonen.

²⁸—Hicha tahma res ta pishinihqui, min hea Cristo qui hinamehmati —Pablo jaquin Agripanen.

²⁹—Hicha tahma pishinyamahax hicha pishinai bi tah hen Mian nincacoinpahinon hen jai. Mia huestima bi hea rahma nincacaibo jatihibi hea hihqui quescari japahinon. Nea cadenabo res man yamanon —hahquin Pablonen.

³⁰Pablo jascaraiya quiquin hapo, gobernador, Berenice, jato betan tsahotaibo jatihibi nihrenensai, canoxon. ³¹Picoscaibo yohinani:

—Nea jonin ta jahua copi casticaxon rehteti hahyamahiqui, jahuabi. Jahua copi sipojatima ta jaiqui —hihcani.

³²—Cesaro qui raanti yocayamahipiya tah non jaa picoquehahnai —Festo jaquin Agripanen.

27

Roma qui Pablo raanahbo cah

¹Italia mai janin sca non nontin canon ta hapobaan yohinishqui. Yohihiya ta Pablo, jahuen hahbe sipojanibo rihbi Julio janeya capitaneen jato coirannishqui, jato coiran cahue hapon jaah. Jaa capitaneen Augusto janeya tsama quih. ²Adramitio mai meha nontin tah non nanenihqui Asia mai meha jemabo janin nihuen xotonah taxnati cahiya. Huesti Macedonia mai meha joni tah non hionihqui, Aristarco, Tesalónica janinha joni. ³Janohax cahax nihshinahax nihbahinahax Sidon jema janin taxnati. Hahan shinanxon ta Julionen Pablo mapemanishqui jano jan honanai jan jistannon, jato jisxon jan pishinaibo rihbi jan maronon. ⁴Janohax cahax tah non nihuen noque behchihya Chipre mai quexa caniqui, jano jaa main nihue pantehiton. ⁵Cilicia, Panfilia, jaa maibo ponte sca quebijistima hian pohquejaquetax Licia mai quiri Mira jema janin taxnati.

⁶ Jano ta Alejandría janinha nonti noquen sontaro capitanen meranishqui. Italia mai janin jaa nonti macatsihquiya hahqui sca noque nanebohanquin. ⁷ Janohax cahax tah non jahuentihi ra neten honahax bi caniqui. Huina huinabonahax Gnido ponte nocoscai. Nihuen noque behchirihbihiya cahen janohax Creta main cahi Salmon hochoma. ⁸ Jano honahaxbi quexa cahax Puerto Bueno hahcaibo janin nocoti. Jaa hochoma ta Lasea jema jaiqui.

⁹ Non basihi jisxon bari tian huinoscai bi nontin cahax reochofax non jene meran camis hihxon Pablone jato yohiquin:

¹⁰ —Jisnahue, amicobaan. Nontin cahax non querabequemis. Behchoman ta noque tsahcatihiqui, mai bohi jahuabora manoscanon, nea nonti rihbi manoscanon, noque rihbi hihquiscanon —jato jaquin.

¹¹ Pablone yohihah bi ta capitanen nincayamanishqui. Jaabi canon cahue nonti hihbo jaiya, nonti chibinica rihbi jascaraiya ta capitanen jato nincanishqui. ¹² Behchoman nonti tiromajatihi hihxon cahen janoxon jene tian huinomati nonti hihbaan shinanquin. Janohax cati shinancanquin, hashoan hichaxon. Fenice jema janin nocoxon pari jene tian huinomati shinancanquin. Fenice ta noa hani qui, ramiho quexa bari hihquihhi chipon hori, ramiho quexa bari hihquihhi rebo hori naxba qui.

Quebijistima hiaman caxon nihuenhuan behchihibo

¹³ Jaatian hian reboquihax nihue siri pishca jahuiya, cati siri sca ta jaiqui hihqui-boya, mai potabahinax Creta mai quexa cahi. ¹⁴ Non quexa cahi bi jari bari cainai chiponhohrihax nihue coshin nocoreneni. ¹⁵ Mai quirihax joxon jaa nihuen noquen nonti hueranbohanquin. Jaa behchihahnan huinacasquimaxon, noque xotonresnon noquen jenequin. ¹⁶ Clauda janeya mai pishcaton nihue pantehiton sca caxon tee teexon noquen nonti pishca noquen hani nontin nanequin noquen. ¹⁷ Hahan nihuen xotonti chiarihixon nonti caxquemis hihxon noquen nonti rahnexcanquin. Jaatian sca Sirte janin mai chahchimis hihxon, hahan nihuen xotonti sebixon sca, nihuen noque xotonnon jenerihbiquin. ¹⁸ Jascajahipish nihshinahax cahi bi behchoman noque coshin tsahca tsahcahiya nonti hihueyamanon hihxon texe jaton jahuabora jenenencanya potascacanquin. ¹⁹ Jahuen quimisha neten sca jaabaanbi jaton nonti jahuabora sca potacanquin. ²⁰ Jahuentihi ra neten bari jisyamascaxon, huishi jisyamascaxon, nihuen rihbi jascabi coshin tsahcahiya jihuetima shinanscaquin noquen.

²¹ Basi piyamahipiboya jato qui caxon Pablone jato yohiquin. Hen yohihipi man nincacax tah man hashoan siri jaquehahnai, amicobaan. Creta non potabehnanyamahipish tah non nescari tiromayamaquehahnai. Non tah non jahuabi manomayamaquehahnai. ²² Jaabi raque potanahue. Nonti huesti ta tiromatihiqui. Tsoabi tah non mahuatimahi. ²³ Hea ta Papa Diosen joni qui. Hean tah hen jaa teexonan. Nea yamebi tah hen jahuen naihoh quexa yonoti jisiqui. ²⁴ Raqueyamahue, Pablone. Cesaro janin tah min nihyaxihqui. Mihbetan cahibo jatihibi ta Papan mia hinanishqui, hah ta hea jaaxqui. ²⁵ Jaa copi raqueyamanahue, amicobaan. Papan hea yohihi quescabi ta jatihiqui. Hen tah hen honanai. ²⁶ Mai pishca janin rah tah non nocoti cahi —jato jaquin.

²⁷ Rabe semana huinotax yame sca Adria quebijistima hian janin nihuen noque jascabi nontan nontanaiya yame pochinicon sca mai hochoma sca jai shinancanquin nonti mehax teenicabaan. ²⁸ Jahuentiho nemin hin hihxon toponah ta veinte brasa janishqui. Caribixon toponrihbicanquin. Quince brasa sca jai. ²⁹ Jene bemaanya macan chahchimis hihxon nonti chishqui quiri chosco hahan mai mespoti nexaxon potacanquin. Xaba paquepahinon hihxon manaquin. ³⁰ Nonti potabahinti shinanxon nonti rexo qui huetsa hahan mai mespoti nexahihcamaxon nontin teenicabaan jaton nonti pishca jenenencanya paquequin.

³¹ —Hoa jonibo nea hani nontin baneyamahiya tah man jihuetimahi —sontaroboya capitan Pablone jaquin.

³² Jascajaha ta sontarobaan risbibo xatenishqui, nonti pishca jabascanon.

³³ Xaba paquescai bi piti pinon hihxon Pablone jatihibi yohiquin:

—Rabe seman ta tenehahnan tah non pihaxma nonotai. Jahuabi tah non piyamarasihi. ³⁴ Piti piresscanahue hah tah hen mato jai, hahan coshiahax man jihuenon. Tsoabi tah man mahuatimahi, jahuabi tiromayamahi.

³⁵ Jato jascajaxon jatihixonbi nincanonbi Papa yocaxon piti tehaxon piresscaquin. ³⁶ Piti shinanscaxon jatihibichin sca picanquin. ³⁷ Noque jaa nontin cahibo rahsi cahen doscientos setenta y seis. ³⁸ Pihhi yaniscaxon nonti hihueyamanon hihxon trigo sca jenenencanya potacanquin.

Jaton nonti hihquihhi

³⁹Xaba paque sca jaiya mai meraxon bi jahua mai hin honanyamacanquin. Mashiyahpa hani noa jisxon hahtipahxon jano nonti taxnacatsihcani. ⁴⁰Jenenencanya banenon hahan mai mespotibo pecacanquin. Hahan chibiti nexahipibo pecaxon jahan nihuen xotonti chiahihnicanquin. Nihuen xotonah sca mashihohri cahi. ⁴¹Caquin bi bemacanya mashi chachihax nonti peracahiti. Jahuen rexo mashi peracahrenenax tsequetimahi bi jahuen chishqui behchoman caxquequin. ⁴²Nonahax jabacanmish hihxon sontarobaan jaton sipojanibo rehtecatsihscail. ⁴³Rehtecatsihscabaan bi Pablo jihuemacatsihxon capitaneen jeenhayamaquin. Nonati honanaibo pari jenenencanya cayahax nona nonahi mai qui canon sca jaan yohiquin. ⁴⁴Caibo sca jihui caxque xecoyamaxon nonti quexe xecohax canon yohiquin. Jascahax mai qui nococani jatihibi.

28

Malta mai pishca qui Pablo nocotai

¹Main sca nihxon tah non jaa mai jane Malta honannihqui. ²Janohahbaan ta noque sirijaquin bihnishqui. Hoiyahpa matsi jahuiya sca chihi requejaxon non jatihibi pehchihi canon noque quenacanquin. ³Pabloneen ta caro bihxon chihi janin tsamanhihni bi xanahax caro mehax rono picoxon mequen qui jaa pinishqui. ⁴Jahuen mequen qui rono hueotai jisish janohahbo yohuani:

—Jaa rah ta joni rehtemis qui. Hiaman rehtequin bi cahnehah bi ta ponte yoshiman jihuematimahiqui —hihcani.

⁵Mequen qui ronon piha hueotai bi cahen meshbishcohquin chihi qui potaquin. Jahuabi hisinyamahi.

⁶—Rahmabi ta soohihquish mahuati sca paquexihquiqui —hihcani. Basi manaxon jahuabi yamahi jisxon shinan huetsajascacanquin.

—Jaa rah ta dios qui —hihscacani.

⁷Jaa hochoma ta jaa mai patoronen maibo janishqui Publio janeya patoro. Noque bihquin sirijaxon quimisha neten jahuen xobocho noque jihuemaquin. ⁸Publion papa bachihoh hisinax racati yonati, chixoti. Hahqui caxon Papa yocaxon Pabloneen mehequin. Jascajaha rohascai. ⁹Jaa jisish jaa mai janinha hisinaibo sca becani. Jaabo rihbi rohaquin. ¹⁰Jaabaan rihbi sca noque hicha hinanresquin. Noque janohax caresscatisiquiya non pishanaibo jatihibi noque hinanquin.

Roma jema qui Pablo nocotai

¹¹Quimisha hoxne huinohax tah non Alejandria janinhax johoh nontin noque nanenihqui. Jaa nonti cahen jene tian huinonon caman jano taxnani. Jahuen jane cahen Rabe nane. Jahuen rexo janin jaa jane jai, hahan jaa nonti honanti. ¹²Cahax Siracusa jema janin taxnatax jano sca quimisha neten hihqui. ¹³Janohax cah quexa cahax Regio jeman nocoti. Nocotipish mohiyahxon jisi bi reboquihax nihue siri jarescai. Jaan xotonah tah non jahuen rabe neten sca Puteoli jema janin nocotax mapenihqui. ¹⁴Jano tah non noque huetsabo meranishqui. Banenahue hahcabo tah non jato betan siete neten rihbi hihniqui. Janohax Roma jeman sca cah cahi, main sca. ¹⁵Non cah joi honanax ta Roma meha noque huetsabaan noque behchihi becannishqui, Foro de Apio hahcaibo jema janin noque behchinoxon. Tres Tabernas hahcaibo jema janin sca caibaan rihbi noque behchiquin. Jato meraxon, Hahxon tah min hea jai Papan, hahxon sirijaquin sca Pabloneen shinanquin. ¹⁶Roma janin non nocotaiya ta hahmebi Pablo jihuemacannishqui jahuen coirannica sontaro betan.

Roma janinxon Pabloneen yohihi

¹⁷Jan nocotipi quimisha neten sca judiobaan hanibo Pabloneen quenamaquin. Tsinquitaiton sca jato yohiquin:

—Noquen caibo qui tah hen jahuabi tiromajayamaniqui, hea huetsabaan. Noquen papabaan joi qui tah hen jahuabi tiromajayamaribihibi. ¹⁸Jerusalen janin hea bihxon ta nahua hea hinancannishqui. Jaabaan sca ta hea yoca yocaxon jahua copi hea rehteti merayamaxon hen catannon hea jeneti shinannishqui. ¹⁹Jaabaan hea jenecatsihqui bi ta noquen caibo queenyamanishqui. Jaa copi tah hen Cesaronen sca hea jisnon hea hahqui raanmaniqui. Heen caibo qui tah hen jahuabi demandanti yamahi. ²⁰Jaa copi tah hen mato jiscatsihquiqui, mato yohuanquihncatsihquin. Noquen caibo jan yohini quescabijaquin Papan noque hahxonai hen shinanaibo copi res tah hen nea cadenayahpa qui —jato jaquin.

²¹—Judea mai mehax mihqui yohuanai ta noque qui joi nocoyamahihqui. Mihqui yohuanai noquen huetsabo rihbi ta tsoabi nocoyamahihqui. ²²Jaa Jesusya joihibo qui ta jatihibi janin tiromahi yohuancaniqui. Jaa tah non honanai. Jaa copi tah non miabi yohuanmacatsihqui —hahcanquin.

²³ Jaa netenbi tah non joribiyaxihqui hihquish bocani. Cahipish hicha sca jahuen xoboho mapeti becani. Papan noque jihuemayaxihqui joi ta Pablonen jato yohinishqui. Yamequiribi yohixon, yohibahinaxon yame caman Moisesnin joi jismaxon Papan joi yohinicabaan huishani joi rihbi jismaxon Jesus joi jato honanmaquin. ²⁴ Jan yohihi caibaan nincacoinquin. Caibo nincacatsihyamahi. ²⁵ Jan shinanaí quescajayamaquin shinanax boressacani. Cahiton Pablonen jato yohiquin:

—Hihcoinjaquin ta Papan joi yohinica betan Dios Yoshiman noquen papabo yohihi nescajanishqui:

²⁶ Nea jonibo yohitanhue: Maton pabinquinin tah man nincaxon bi honanyamayaxihqui. Jisquin tah man jisxon bi meratimahi.

²⁷ Nea jonibaan jointi ta xehpo qui. Jatón pabinquinin nincapanan ta nincayosmabo qui. Jatón bero ta beracocanihqui, jisxon honanmis hihxon, pabinquinin nincamis hihxon, jointinin honanmis hihxon. Shinan pontehiton hean jato rohajamis hihxon ta jascajacaniqui

hih ta jaiqui huishani joi.

²⁸ Jaa copi honannahue. Noquen caibomabo qui ta nea hahan Papan noque teehihmahi joi Papan raanscaiqui. Jaabaan ta nincatihiqui.

²⁹ Jato jascajahiya judiobo sca bocani. Joi bichinnannani bocani.

³⁰ Copijaha hinantahni xoboho ta Pablo jihuenishqui rabe bari. Jano jihuexon ta jaa jisi jahuibo jaan jisnishqui. ³¹ Jato jisanan Papan jihuemahi joi yohixon tsoanbi chihtehahma jato honanmaquin. Jahuatohonbi pantehahma noquen Hihbo Jesucristo joi honanmaquin.

ROMANOBO Romanobo qui Pablonen raanni joi

Roma janin jihuetaibo qui Pablonen joi raanai

¹ Hea Pablo Jesucriston joni hihxon tah hen mato qui raannoxon nea joi huishahi, hea huetsabaan. Heen tee hea hinanquin ta Jesucristonen hea yohinishqui, Papan joi siri hean yohibonascanon. Jaa copi tah hen huishahi.

² Jahuen joi yohinicabo huishamaquin ta neateman bi res Papan yohinishqui, noquen Hihbo Cristo jan raanyaxihqui yohiquin. ³ Jan raanscai ta jahuen baque qui, Cristo. Tsoa jahuen xohtabo quin hihxon ta toponpaquexon quiquin hapo yamanica David jahuen xohta coin hihpahonishqui, non honanah. ⁴ Noquen naihoq queha Papan ta jahuen coshiyaxon noque jismanishqui, jahuenahbi jahuen baque Cristo hihqui non honannon. Jan hihquipi bi hahquirihibi teehihmaxon huenixon ta Papan noque jismanishqui. Jaa jahuen baque Jesucristo ta noquen Hihbo qui. ⁵ Jaan ta heen tee hea hinannishqui, jahuen raanti sca hea janon. Jatihibi jonibo yohinon ta hea raanishqui. Jaabo queyoyamanox mananon tah hen jato nincacointi yohihi, Criston jihuetaibo jaábo. ⁶ Mato rihbi tah man jascapahbo qui, hea huetsabaan. Jesucriston caisahbo tah man qui. Man Roma jema janin jihuetai noque huetsabohon ta Papan hihti shinanishqui.

⁷ Mato tah man caisahbo scah qui, jahuenahbi man janon. Noquen Hihbo Jesucristo betanbi ta Papan mato mehehiqui. ¿Jahuen yoshin siripan mato mehehah man sirijaquin shinanyamahin, hea huetsabaan?

Roma janin Pablo cacatsihqui

⁸ Hahxon tah min noque jai, Papan, hah tah hen Jesusen janen jai, mato jatihibi yocaxonquin. Tiromahahbo bi man tenehi ta jatihibi janinxon honancaniqui. ⁹ Mato yocaxonnixon tah hen Hahxon tah min hea jai, Papan, hahscai. Hicha bi res hen mato yocaxonai ta Papan honanishqui. Heen jointiboyaxonbi jahuen baquen joi yohinixon tah hen shinanbehnoxonma mato yocaxonai. ¹⁰ Papa yocaxon tihibi tah hen mato yocaxonai, hea huetsabaan. Mian jisi, texe maibo janin catanish Roma janin sca hea cahá siripaiya, jano sca hea camahue, Papan, hah tah hen jai yocaquin. ¹¹ Mato jisi tah hen hihti cacatsihqui, hea huetsabaan. Hahan coshiti shinan tah hen mato yohicatsihqui. ¹² Non tah non hinanhannantihi. Hea jai shinan mato hinanah tah man matona jai shinan rihbi man hea hinantihi, jatihixonbi non Criston shinanyaxon sirijaquin shinannon.

¹³ Hicha coti tah hen mato janin cacatsihquish bi tee hichahiya hen rahma caman cati hahtipahyamahi. Caibo jonibo hen yohihi quescajaribiquin tah hen mato rihbi Papan joi siri yohicatsihqui, man Papan shinanyahpahax shinan caicanascanon. Man honannon hihxon tah hen mato yohihi, hea huetsabaan. ¹⁴ Jatihibi jonibo hean yohiti ta noquen Hihbo queenishqui, hea huetsabaan. Jema janin jihuetaibo, cahchiho jihuetaibo, hicha quirica honanaibo, quirica honanyosmabo, jatihibi tah hen yohiti jai. ¹⁵ Jaa copi tah hen caxon mato rihbi jaa joi siri yohicatsihqui.

Papan joi ta coshi qui hihqui

¹⁶ Jaa joi yohiti qui tah hen rabinyamabiresai, hea huetsabaan. Papan coshi joi tah qui. Jayaxon ta nincacoinaibo rahsi jaan jihuemahiqui. Nincacoinaiton ta jato bichiqui, queyoyamanox manatahbo. Jato qui nocoxon tah hen judiobo pari yohihi. Jaa pecaho sca judiomaribo rihbi yohiquin. ¹⁷ Jaa joiyaxon ta Papan noque honanmahiqui, nincacoinaiton jaan noque bichi non honannon. Non nincacoinaiton ta noque bichiqui. Jahua ta hashoon pishinyamahihqui, nincacointi res. Huishani joi jai quesca tah qui. Nincacoinaiton Papan bichibo ta queyoyamanox manatihiqui hihqui.

Jaton hohchabo jan hihbomahibo

¹⁸ Tsoabo jan casticanyaxihquiquin hihxon ta noquen naihoq queha Papan noque honanmaribihiqui, jahuen rahuibo rahsi jan casticantihi non honannon, nincayosmabo rahsi. Jahuen joi pantecatsiquin tiromajahibo rahsi. Jascapahbo jatihibi ta casticanyaxihquiqui. ¹⁹ Noquen naihoq queha Papa jenquetsahpa quin ta honantihbires qui. Jaabaan rihbi ta honanishqui, Papan jato jismahah. ²⁰ ¿Noquen Papa jenquetsahpa shinanya quin? ¿Jahuen coshi jenquetsahpa queyoyosma quin? ¿Jaa huesti jatihibi hihboyamahiquin? Honantih bi res ta jaa jaiqui, jan jonijanibo jisxon honanquin. Jaa copi ta Honanyamaxon tah non tiromajanihqui, Papan, tsoanbi jati hahtipahyamahiqui. ²¹ Tsoa noquen naihoq

queha Papa quin honanax bi ta Mia tah min noquen naihoh queha Papa qui hahyamacannishqui. Papan jato hahxonah bi ta Hahxon tah min noque jai, Papan, hahyamarihbi-cannishqui. Jascaxhaxma ta honanmabo sca banecannishqui, shinanjomabo. Pontejaquin shinanyosmabo sca. ²² Hea tah hen honan qui hihquish bi ta hihti honanmabo sca banecannishqui. ²³ Jascapahax ta noquen Papahon queenyamacannishqui, queyoyosma noquen Papa hihqui que bi jahan queenyamacanni. Papan shinan siri queenyamaxon ta jaton mequemanbi santobo jacannishqui, joni quescapahbo santobo, caibo rihbi hihsabo quescapahbo, caibo ninotaibo quescapahbo. Mahuanica rahsi quescapahbo santojacquin. Jaton mequemanbi jascapahbo jacquin, hahqui sca yocanoxon.

²⁴ Jaa copi ta Papan rihbi jato jenebahinnishqui, jaabo queenai quescari sca hashoan sca tiroma sca jaahbo. Jan jenehah ta jaton yoraquibi hohchanoxon sca tiromacannishqui.

²⁵ Noquen Papa coin queenyamaxon ta dios que ma bi dios romishin sca bihcannishqui. Papan hahnibo qui sca tisquihahpaquexon ta jascapahbo qui sca yocacannishqui. Noquen Papan jatihibi jonijani que bi jahan queenyamacani. Noquen Papa ta hihti siri qui. Hahqui jascabihi siripi yohuantihbi ta ta huetsa shinan bihcannishqui.

²⁶ Jaabo jascanica copi ta Papan jato jenebahinnishqui, tiroma bi res tiromabo rahsi sca jaabo. Jaton haibobaan ta jaton bebobo jenebahinxon hahbe haibobo sca benejacannishqui. ²⁷ Jascajaribiquin ta jaton bebobaan haibo hihquihinti shinanyamascannishqui. Haibobo jenexon ta hahbe bebobo sca hahcannishqui, hahbe bebobo hihti hahcatsihqui hahcannani. Hahbe bebo betan ta hihti jaroma sca jacannishqui. Jaa copi ta jaton shinan hihti tiroma sca janishqui. Shinan sirijomabo sca ta banecannishqui.

²⁸ Noquen Papa shinancatsihyamahibo quen ta Papan jato jenebahinnishqui, jaton shinan masacanon. Jaa copi ta jascacannishqui. ²⁹ Jahuabi siri ta jayamacannishqui, tiromati res shinancanquin. Caibo tiromajati shinancanquin. Caibaan jahuabora jato bichincatsihceni. Yohuashihtax sinacahanani. Rehteti res shinanquin. Rehtenanti res shinanquin. Paran paranquin. Jistahihmahanannani. Caibo qui yohuan yohuani. ³⁰ Caibo qui quesahi. Noquen Papa jistahihmacanquin. Jaton caibo hichaquin. Sirobihcamaxon bi caibo rahninquin. Hahmebi siripihcamahi yohuani, coshihcamahi. Jaton huetsabo tiromajati shinancanquin. Jaton papabaan yohihah bi nincayosmabohi. ³¹ Shinanjomabohi. Yanapanyosmabohi. Mia hahxonxahnpn hihquinanax bi yanapananyamarihbihi. Caibo yomanahmascanquin. ³² Jascapahbo ta jascabi sca mahuatahbo jayaxihquiqui Papan yohihah honanax bi ta hihrescannishqui. Rahma caman rihbi ta jascacaniqui. Hahresquinma bi caibo rihbi hesequin, tiromajati queenahbo hihxon.

2

Sirijaquin shinanxon Papan casticanai

¹ Caibaan tiromajahi honanax copi tah min Honanyamahax tah hen jascaniqui, Papan, min jatimahi. Caibo yohihi, Jaa ta tiroma qui hihquish bi tah min jascari miin yora qui bi min yohuanai. Jaabo tiromahi hihqui quescarihbihi tah min mia qui. ² Jascapa tiromahibo ta Papan hihti casticanyaxihquiqui. Tsoabi ta cahnetimahiqui. Jahuen quirica jixson tah non jaa honanai. ³ Jascapahbo ta tiroma qui hihquish bi mia rihbi jascapahax, ¿Papan mia casticanyamanon hihquish min cahneti shinanain? ⁴ Papan ta mia hicha hahxonihqui. Tiromahi quen mia histon casticantihi bi ta basi sca mia tenehiqui. Papan mia jascaxaxonah bi Jahuama tah qui ¿hih min jain? Pontejaquin sca min shinannon hihxon ta jaan tenehiqui. ¿Honanxon bi min jaamahi nan? ⁵ Min pontenon hihxon mia tenexonai bi tah min nincayosmah. Shinan coinjoma tah min qui. Jaa copi ta hashoan sca mia casticanyaxihquiqui. Siribo hihqui jixson sirijaquin jahuen jonibo bihxon sca ta tiromabo sca casticanyaxihquiqui. Jaatianbi ta hiltijaquin mia casticanyaxihquiqui. ⁶ Noquen shinanbo honancoinxon ta tiromabo jaan tiromajayaxihquiqui. Siribo rihbi ta sirijaquin bihaxihquiqui. ⁷ Queyoyamanox manati queenxon sirijahibo ta Papan yohiyaxihquiqui: Mato tah man siribo qui. Maton tah man sirijapahoniqui. Queyoyamanox manataibo sca janoxihnahue hah ta noque jayaxihquiqui. ⁸ Papa nincayosmaboxon ta jan yohihi nincacatsihyamaxon bi tiromati caibaan hesehah pari nincaquihiqui. Jascapa ta Papan sinajayaxihquiqui. Mato tah hen hihti tiromajanoxihqui, heen rahuibaan, hah ta jato jayaxihquiqui. ⁹ Jascaxon ta jato hihti casticanyaxihquiqui. Jaan casticanah ta tiromapahonibo rahsi hihti hohmis hohmisyaxihquiqui. Judiobo pari casticanxon ta judiobomabo sca jascajaribiyaxihquiqui. ¹⁰ Sirijapahonibo caya ta jascajayamayaxihquiqui. Mato tah man siribo qui. Man tah man sirijapahoniqui. Queyoyamanox manataibo sca hehbetan jihuenahue hah ta jato jayaxihquiqui. Judiobo pari jascaxon ta judiomabo sca jascajaribitihiqui, siribo rahsibi.

¹¹ Non jenquetsahpabohin ta Papan honanquin sirijahiqui, hea huetsabaan. Jaa copi ta tsoabi cahnetimahihqui, tiromabo casticanxon siribo bihquin. ¹² Tiromabo ta jenquetsahax bi cahnetimahiqui. Papan huishamani honanaxma hohchanihbo ta jascabi sca casticana jatihiqui. Papan huishamani honanax bi hohchanihbo rihbi ta Papan jascajaquin casticanyaxihquiqui, jan Moises huishamani jai quescajaquin. ¹³ Moisesnin huishani joi nincresaibo ta sirima qui, Papan jisí. Jan jisí ta Moisesnin huishani jai quescabi-jacquin hahcaibo siribo qui. ¹⁴ ¿Moisesnin huishani joijomaxon copi judiomabaan ponte jihuetai honanyamahihquin? Honan ta jacanihqui. Papan huishamani joijomaxon bi ta hahmebi shinanxon, jan huishamani jai quescari jihuetai yohicaniqui, Papan huishamani jai quescabiacquin yohiquin. ¹⁵ Ponte jihuetai honannon ta jaton jointi janin jaa honan Papan nianishqui. Jaa copi ta jascari jihuetai yohinancanihqui. Jaa copi rihbi ta jaton jointinin shinani, Tiroma ra tah hen jai, hihamahax Sirija rah tah hen jai hihcanihqui. Caibo betan yohinani ta cahenannancaniqui. Caibo rihbi sca, Jan ta hea jascamahaxqui hihqui, hohchamati yohihi. ¹⁶ Papan shinanyaxon hean yohihi quescas ta jayaxihquiqui, hea huetsabaan. Jonetax japahonibo ta Papan yohiyaxihquiqui, Man tah man jascari janiqui hahquin. Jan jaa copi jato casticantihi honantih bi res sca janon ta jonibo jascajayaxihquiqui, casticanti nete nocotaiya.

Moisesnin huishani joiyahpabo

¹⁷ ¿Hea tah hen judio qui hih man jain? ¿Moisesnin yohini joiyahpa tah non qui hih man jain? ¿Noque tah non Papa Diosen jonibo qui, hih man jain, judiobon? ¹⁸ ¿Non jenquetsahpi jihuetai Papa queenihquin? ¿Noque judiobaan tah non honanai hih man jain? ¹⁹ ¿Jenquetsahpabo siribo quin Papan joi honanxon tah non honanai hih man yohuaní jain? ¹⁹ Hean caya tah hen benchebo bahi honanmaquin hahcajaquin Papan joi honanyamahibo haxematihi, hih tah min jai. Xabajaquin hahcajaquin tah hen Papan joijomabo honanmacointihi, hih tah min jai. ²⁰ Shinanjomabo tah non honanmatihi hih tah man jaribihí. Baquebo hanijaquin hahcajaquin tah hen jato haxematihi hih tah man jaribihí. Moisesnin huishani joi tah non jai. Jaa copi tah non shinancoinyahpabo qui. Non yohihi ta quesa joima qui hihnica rihbi tah man qui. ²¹ Jascanicaxon tah man huetsa jonibo haxemahi. ¿Siripi jihuetai jato haxemahax bi mianbi min yohihi quescaraxma min jihuetai? Yometsohyamanahue hihnicahax bi ¿min yometsotain? ²² Tsiniyamanahue jaax bi ¿min miabi tsinihin? Santobo jistahihmahihax bi tah min Papahon shinanihcamahax jahuen xoboho cahax Papahon shinanaxma tsahoresai. ²³ Hea caya tah hen Papan joiya qui jaax bi tah min Papan joi jai quescama jihuetai. Min tah min jaamahi, judiobon. ²⁴ Mian tah min tiromajaquin caibo shinanmahi, noquen Papa sirima hihqui shinanmaquin. Papan jato caheni jai quescapahbo tah man qui. Man tiromahi jihuetai jisish ta nahuabo tiromahi hehqui yohuancaniqui hah ta Papan jato janishqui cahequin. Mato rihbi sca tah man jascapahbo qui, judiobon.

²⁵ ¿Jahan judiobo honantiyahpa min quin? Min jaya hihqui bi ta Papan mia casticanyaxihquiqui. Jaa honantiyahpahax Moisesnin yohini jai quescari min jihuerihbihiya pari ta Papan mia yanapantihiqui. Jaa honantiyahpahax min jascari jihueyamahiya ta Papan jisí mia jayajoma quescapah qui, jahuenahma. ²⁶ Jahan judio honantijomahax bi Moisesnin huishani jai quescari jihuetaibo ta Papan jisí jahuen joni coin qui, jahuen shinanyahpabo. ²⁷ Jahan judiobo honanti yamahax bi Moisesnin yohini jai quescapa tahni ta caibo jihuetaihqui. ¿Mia cahran, judion? Jaa honantiyahpahax bi tah min jascayamahi jihuetai. Jaa copi ta Papan casticanti neten maton nahuabaan mato yohiyaxihquiqui, Mato caya tah man noque mentan hashoan nincayosma qui hahquin. ²⁸ Bemacanya res judio quescapahbo hihquibo ta judioboma qui. Hahan judiobo honantiyahpahax bi hihresaibo ta judiomabo rihbi qui. ²⁹ Judion ta jahuen jointiboyaxon bi Papahon shinanihqui. Caibaan jisnon hihxon res hahcaiboma bi ta hahcoinaibo Papan judiobo qui. Hea siri hihqui caibaan shinanahbo japan hihquibo ta Papan judioma qui. Papan hea siri jisnon jaa queenai quescari jihuecoimpan hihquibo ta jahuen judio qui, jahuen caisahbo.

3

¹ ¿Papan noque jascajaquin jisiya tsi ra noque judio baquebo jahuamabo non quin? hih sca rah tah min jai. Jascari yocacahyamahax rah tah min ¿yanca bi res non honantiyahpabo quin? hih min jai. Min jascari bi tah hen Yancama rahan hih hen jatihi. ² Jascapahbo non janon ta jahuen joi huishamaxon Papan noque hinannishqui, non jaya hihnon. ³ ¿Noque hinanah bi caibo nincayosmabohi copi Papan noque hahxonti hahtipahyamascaiquin? ⁴ Hahtipahi rahan. Hen mia yohinon nincahue: Papa ta hihcoiniqui. Noque jonibo res tah non jaamanicahbo qui. Papan huishamani quescabi tah qui:

Mian tah min pontejaquin casticanai, Papan, hah ta caibaan jatihiqui. Caibaan rihbi ta Jenquetsahaquin min casticanain, Papan jacatsihxon bi Ponte bi res tah min qui Papan hah jayaxihcaniqui, yohicoinquin.

Jascá ta jaa huishani joi janin jai qui.

⁵ Non hohchataiya ta noque quescapahma Papa hashoan ponte hihqui jis yaxihcanni-hqui jonibaan. Jaa copi ta noque casticanah pontema qui ¿hah non jatihin? Hihyamahi rahan. Noquenahbi noquen tiroma shinaman pari tah non jascatihi. ⁶ Jaan pontemabo casticana siriyamahiya ta jenquetsahxon bi jatihibi tiromabo casticanti hahtipahyamaquehahniqui. ⁷ Jan yohini quescajaquin hahtihbi non quesajahiya ta Papan hahcainai jiscantihiqui. Noquen Papa siri hihqui jiscanquin. ¿Jascacoinaiya jahua copi sca noque casticantihiquin hah non jatihin? Hahyamabiresquin rahan. ⁸ Caibo ta hehqui quesahihqui. Papa huesti siri banenon tiromanonhue hih roqui hea jai. Quesa ta jacanihqui. Jascapa shinanyahpabo quen ta Papan jato casticancoinyaxihquiqui.

Non hohchayahpabo rahsi jai

⁹ ¿Papan joiyahpabohax copi noque judiobo hashoan siribo quin? Hihyamabiresi. Jascapa rabe tah non qui, hohchayahpabo rahsi, judiobo, judiomabo rihbi. Ma tah non jaa yohiscahaqui. ¹⁰ Papan huishamani joi jai quescabi tah qui:

Ponte joni ta yamahihqui, ni huestibi.

¹¹ Ponte shinanya jonibo yamahiresi. Papahon shinancoinaibo yamahi.

¹² Papan bahin nihyamahibo rahsi tah qui, tiromahibo rahsi. Siribojanicabo ta yamahire-sihqui, ni huestibi yamahi.

¹³ Jatón yohuan ta rishtaya qui. Mahuatipi tsecaxon quehpenxon xetehah pisi hihqui quescá ta jaton jana jai qui. Jaton jana rebo ta hahan paranti res qui. Ronon shinanyahpa ta jacanihqui, joni tiromajati res.

¹⁴ Roa roati, hichá hichati res ta shinancaniqui.

¹⁵ Joni huetsa rehte rehtehi cacatsihqui ta hishto hishtocaniqui.

¹⁶ Jano jaabo huinotah quen ta masataibo sca jaiqui, hihti hohmis hohmisaibo.

¹⁷ Caibo betan siripi jihueti ta honanyamacaniqui.

¹⁸ Jatón Papa Dios ta ni pishcabi shinanyamacaniqui.

Jaabo yohihi ta Papa jascarihqui, jahuen joi janin.

¹⁹ ¿Tsoabo yohihi jascanishquin nan? Jatihibi jonibo rahan. Jahuen jonibo ta jahuen joi Papan hinannishqui, jaa joi jai jatihibichin sca nincacahbo. Jaa copi ta neteti jacanihqui jatihibi. Nincayosma tah hen qui hihquish, neteti. ²⁰ Papan yohihi quescari jihuetaibo ta yama qui, Papan jisí. Jahuen joi jaxon tah non jaa honanai. Hohchamisbo rahsi non hihqui honanquin. Honanax copi tah non neteyaxihqui.

Noquen Hihbo qui hinamehtax queyoyamanox manati

²¹ Hohchayahpa rahsi non hihqui bi ta Papan jahuen bahi noque jismahihqui, siribo sca non nihnon. Huishaxon ta Moisesnin noque yohinishqui, non Cristo qui hinamehtax jihuetai jai. Jascapa ta Papan jisí siri qui. Hahqui hinamehtax non siribo sca jai ta neateman Papan huishamanishqui, Moises, texe jahuen joi yohinicabo rihbi jaa joi huishamaquin. ²² Cristo nincacoinax hahqui hinamehtaibo rahsi res ta siribo qui, Papan jisí. ²³ Jatihibi jonibo hohchamisbo copi ta jascapa rahsi noque jisiqui, hahbe jihueti hahtipahyamahibo. ²⁴ Noque jascapa rahsi que bi ta Papan noque hihti hahxonishqui, Cristo raanxonquin. Mahuaquin ta Criston noque bihnishqui, hohchapan hinábo non jayamascanon. Criston noque hahxonah ta Papan noque siribo sca jisiqui. ²⁵ Neateman ta hicha bi res noquen xenibo tiromapahonishqui. Tiromahibo que bi ta Papan jato tenexon jato queyobahinyamanishqui. Jaa ponte hihxon jato teneni non jatihixonbi honannon hihxon ta janibi sca Jesucristo raannishqui. Noque copi jan mahuani quen tah non hahqui hinamehtax noquen hohcha copi non mahuatimascai. ²⁶ Noquen Papa ponte bi res hihqui non honanscanon hihxon ta jascajaquin Cristo raanxonishqui. Jaa copi honannahue: Papa ta ponte bi res qui. Jaan jisí ta Jesus qui hinamehtaibo pontebo qui, jahua copi chihhi janin catimascai.

²⁷ Papan noque jascaxaxonah tah non Hea caya tah hen siri qui hihtimabiresai. ¿Jahua copi non jascatimahin? ¿Non jahuabi hahyamabiresai copi nan? Jaa copi ma. Non hahqui hinamehtaiya Papan noque sirijaquin bichi copi tah non jascari yohuantimahi. ²⁸ Non sirijaquin hahni copima ta Papan noque bichiqui. Non hinamehtai copi res ta noque bichiqui. ²⁹ ¿Papa Dios tsoabaan Papa quin? ¿Judibaana res nan? Jatónah res ma rahan. Caibaana rihbi rahan. ³⁰ Noquen Papa Dios ta jaa huesti Papa Dios qui. Nincacoinax hinamehtai judiobo ta sirijaquin bichiqui. Caibo rihbi jascajaribiquin: nincacoinaiya jato sirijaquin bihquin. ³¹ Cristo nincacoinxon tah non Moisesnin huishani joi sca tiroma hihqui shinantimabiresai. Hashoan sca tah non siri hihqui shinanai.

4

Abraham jani quescajati non jai

¹ Shinanscanahue. Abraham ta noquen xohta qui, noque cah non jahuen chini baquebo qui. ¿Jahua copi Papan jaa siri jisnishquin? ² ¿Min sirijaquin hahcai copi tah hen mia siri jisi hah Papan jaa janishquin? Hahyamaquin rahan. Jascajaha ta Abraham jaya joiti jaquehahnishqui. Hea caya tah hen siri qui hih ta jaquehahnishqui. Hihcaxbi jascayamahi. Papa Dios bebon nichish tah non jenquetsahax jascatimahi. ³ Papan huishamani joi ta nescari qui: Papa Diosen yohihah ta hihcoinjaquin Abrahamen shinannishqui. Jaa copi ta Abraham siri hihqui Papan jisnishqui, hihqui jaa huishamani joi. ⁴ Teexonnahton cananai quescoma tah qui. Teexonna copijaquin tah non copijacoinai, noque teexonai copi. Mia tah hen hinanresai hah tah non copijaquin jatimahi. ⁵ Papan noque hahxonai ta jascayamahiqui. Hen sirijaquin hahcai copi hea siri jise Papan, hihnica ta tiroma qui, Papan jisi. Papan siri jisi joni ta nescanica qui: Min hihcoinai tah hen shinanai, Papan. Min yohihi quescabihhi ta jacointihiqui. Min tah min hea sirijaquin bihtihi, hihqui. Papa hihcoinai non shinanaiya ta siri hihqui noque jisiqui. ⁶ Non hahcai copima bi ta hahxonresquin Papan siri hihqui noque jisiqui. Jaa copi tah non hihti jenimati jai. Davidinin rihbi ta jascajaquin yohinishqui, jahuen behua huishaquin.

⁷ Papan noquen hohcha sohuaxona tah non hihti jenimati jai. Noquen hohcha yamascaiya tah non jenimati jai.

⁸ Hen hohchani Papan hea caheyamahah tah hen hihti coincointi jai hih ta Davidinin huishaquin janishqui.

⁹ ¿Papan hahxonah, tsoabo sca hahan jenimati jaiquin? ¿Judiobo res nan? ¿Caibo rihbi nan? Jatihibi rahan. Hen yohihah quesca tah qui: Hihcoinai Abrahamen shinanni quen ta jaa siri Papan jisnishqui. ¹⁰ ¿Papan jaa siri jisiya jenquetsahpa Abraham janishquin? ¿Judiobo honantiyahpa sca janishquin? Jayajoma pari janishquin? Jayajoma pari rahan. ¹¹ Hahan honantijoma pari xon ta Mia jascaraiya ta jacointi qui Papan Abrahamen janishqui. Jaa pecaho sca ta jaa siri hihqui jisxon, Honantiyahpa sca jahue, Papan janishqui. Papan siri joni jaa hihqui honanahbo hihxon jascajaquin, Jaa copi ta jatihibi nincacoinaibo Abrahamen xohtabo qui, jahuen honantijomahax bi Papa qui hihcoinabo. Jan jaa jisni quescajaribiquin ta noque siribohi jisiqui, Papa hihcoinai non shinanai quen. ¹² Hahan honantiyahpaxon nincacoinaibo rihbi ta jahuen xohtabo qui. Jahuen honantijoma pari xon Abrahamen Papa Dios nincacoini quescajihbi jaabo jai, jahuen xohtabohi. Jaa cahen jaton quiquin xohta.

Hahqui hinamehtaibo Papan hahxontijahi

¹³ Papan ta Abraham nescajaquin yohinishqui: Minabo hihnon tah hen mia jatihibi jonibo hinanresthi, miin xohtabaana rihbi hihnon, hahquin. Jan hahni copima bi jan hihcoinjaquin shinanni copi ta siri hihqui jisxon Papan jascajaquin hinantijanishqui.

¹⁴ Abraham ponte res jihuenu copi hinantijanixon ta hinanresquin hinanah jayamascaquehahniqui. Jaatian ta Papa hihcoinai non shinanai rihbi jahuama sca jaquehahniqui.

¹⁵ Papan noque jahuabi yohiyamahah tah non jahuabi rihbi nincati yamaquehanai. Jaan noque yohihah tah non nincati jai. Nincati jaxon bi tah non jaamajaresai. Jaa copi ta noque casticanti jaiqui.

¹⁶ Jaa copi ta jan hihcoinai non shinanaiya noque hahxonresiqui. Queenxon res hahxonti hahtipahnoxon ta nincacoinaibo hahxontijanishqui. Hahxoncatsihxon copi res hahxonti yohinihxon ta jan yohini quescabijaquin jaan hahxontihiqui, Abraham xohtabo hinanquin. Jahuen honantiyahpabo res ma bi jaa xohtahi nincacoinaibo rahsibi jahuen xohtabo sca janon ta Abraham hinantijanishqui. Jaa copi ta Abraham noquen xohta qui, jatihibichina. ¹⁷ Papan huishamani jai quesca tah qui: Mesco jonibo tah hen mia hicha xohtamayaxihqui hihqui jaa joi. Papan jascajaha ta Abrahamen yohinishqui: Min yohihi quesca bi ta jacointihiqui, Papan, hahquin. Non mahuatai bi Papan noque jihuematihi ta Abrahamen honannishqui. Jayaxihquibo jariyamahi bi ta jaresscai quescahbo jato Papan yohihiqui. Jaa rihbi ta Abrahamen honannishqui.

¹⁸ Jatihi ta miin xohtabo jayaxihquiqui Papan jaáh, hihcoinjaquin shinanquin. Yamayaxihqui shinantihhi bi hicha xohtaboyahpa sca jayanaxon nincacoinquin. ¹⁹ Cien baribo nocotaiya, yosiboscaax mahuati hochoma quescahaxon, jahuen haibo Sara jisi bi baque bihyosma janish rahma hihti yoxaboscai, jenquetsahaxon baque bihtimascai. Non nescapah jai bi ta noquen baque jayaxihquiqui, hihqui. ²⁰ Papan yohini quesca rah ta jatimascaiqui shinanyamaquin. Hea rah ta baque hinanyamayaxihquiqui hihyamahi. Jascaxonma bi hashoan sca nincacoinquin. Min tah min hea hahxonyaxihqui, Papan. ²¹ Hen tah hen honanai. Min yohini quescajati tah min hahtipahi. Min hea baque

hinantihi tah hen honanai, hahquin. ²² Jan jascajaquin shinanni copi ta jaa siri Papan jisnishqui.

²³ Jaa siri jisnixon ta jaa joibi Papan huishamanishqui. Abraham jascabihi copi Moises huishamaquin. ²⁴ Abraham jascabihi copi res ma bi ta jascarihi non janon hihxon huishamanishqui, hea huetsabaan. Noquen hohcha non yamascanon ta noquen hihbo mahuanishqui, Jascahue Papan jaáh. ²⁵ Hihquipish bi ta hahquirihi teehihnishqui, Papan huenihah. Noque rihbi hahxonquin ta jascajanishqui. Jan huenicoinni non jointinin shinancoinaiya ta noque rihbi siri jisiqui.

5

Papan sirijaquin bichibo hahan jenimati jai

¹ Jaa copi ta non nincacoinaiya siribo sca noque Papan jisiqui hea huetsabaan. Noquen Hihbo Jesucriston noque hahxonah ta Papan noque sirijaquin bichiqui, siriresi non hahbetan jihuonon. ² Noquen Hihbaan noque hahxonni quen tah non noquen Papa betansca non nichí. Hahbetan nichibo sca tah non qui, jahuen jihuetaho hahan hihti shinanai. Non hahbetanbi jihueyaxihqui honanah tah non hihti jenimascái. ³ Jaa copi jenimaxon bi tah non tiromabo tenehax hashoan rihbi jenimahi. Tiromabo tenequin tah non coshi shinan bichi. Jascapa non bihtihi honanah tah non tiromajahabo bi hihti jenimahi. ⁴ Hahan teneti coshiyahpascaax tah non shinanyahpa sca non jatihi. Shinanyahpahax res sca tah non honanyahpa sca non jai, Papa janin non jihuetihi honanah sca. ⁵ Noque ta jahuen yoshin siri noquen jointi janin niaxoniqui. Jaan sca ta noquen jointinin non honannon noque hihti honanmahiqui, noquehon jahuentiho queen noquen Papa jaiquin hihxon non honannon. Jaa honanxon tah non noquen Papa betanbi non hihcoini jihueyaxihqui non honancoinrihbihi.

⁶ Shinanscanahue. Nincayosmabohax non mahuatihí bi ta noque jihuemanoxon Cristo mahuanishqui, yosmabo non jai bi. Jahuen joti neten jonish ta noquen hohcha copi mahuanishqui. ⁷ Noquen jisí, huetsa ponte jihuetai joni jai bi tah non jaa jihuonon hihxon nohri jato rehtemati hahtipahyamahi, mahuaacatsihyamaquin. Jahuen siri amico jihuenon hihxon pari rah ta caibaan hahri jato rehtemati shinantihiqui. ⁸ Papan ta noque jascaxonihqui. Hohchayahpabo non hihqui que bi ta noque copi mahuatí jonon Papan jaa raanxonishqui. Jaa copi tah non honanai: Jahuentiho queen jan noquehon jaiquin ta Papan noque jismanishqui, noquen Hihbo Cristo raanxonquin. ⁹ Noque copi Cristo mahuaní quen Papan noque siri jisíya cahen non Cristonahbo jaiya noque xahbanen noquen casticantí paqueyaxihquiqui. ¹⁰ Papan rahuibo non janí que bi ta jahuen baque noque copi mahuaní copi noque sirijaquin bichiqui, jahuen jihuetaho sca non janon. Cristo jihuerihbiscaí quen ta hashoan rihbi sca noque jahuen jihuetaho Papan sirijaquin jihuemayaxihquiqui. ¹¹ Jaa copi tah non sirijaquin shinanai. Sirijaquin shinani res ma bi hihti jenimaribihi. Noquen Hihbo Jesusen noque hahxonah tah non Papan baqueboscaax hihti jenimaribitíhi.

Adan betan Cristo

¹² Jaan noque hahxonah quen tah non honanai, hea huetsabaan. Jamenoni joni huesti ta hohchamenonishqui. Hohchatax ta mahuanica sca janishqui. Jaa xohtahí ta jatihibi sca hohchayahpa sca jacannishqui. Jaa copi tah non mahuanicabo sca non jai. ¹³ Papan Moises huishamariyamahi bi ta hohchayahpabo rahsi jaresscannishqui. Hohchataibohi bi ta Man tiromahibo copi tah hen mato casticanpaqueyaxihqui Moises huishamaquin jato yohirihyamanishqui. ¹⁴ Jaa bi ta Adan pecaho Moises janon caman mahuanicabo rahsi japahonishqui. Rahma caman rihbi tah non jascapahbo rahsi jai. Adaman hahni quescajayahmahax bi ta mesco hohchayahax mahuanicabo rahsi non jai. Adan bebonica janí quescaihbi ta Cristo sca noquen quiquin bebonica scah qui.

¹⁵ Hihcax bi jascapa rabe hihyamanish. Adaman ta noque mahuanishqui. Criston sca ta noque queyoyamanox jihuemahiqui. Hohchatax Adan mahuanica hihni quescaihbihi tah non noque jai, hohchatax mahuanicabo sca. Hohchanish bi jihuenicabo sca non janon ta hihti sirijaquin Criston noque hahxonishqui, noquehon hihti shinanxon. ¹⁶ Adaman noque mahuaní que bi ta Criston noque jihuemahiqui. Hohcha hohchayahpa rahsi non hihqui bi ta Cristo copi Papan noque sirijaquin bichiqui. ¹⁷ Noquehon ta Papan hihti shinanihqui. Non nincacoinaiton ta hihti hahxonquin siribo sca noque jisiqui. Jaa copi honanquin sirijanahue, hea huetsabaan: Adan hohchani quen non mahuaacoren mahuanicabo qui, cahnetima quescahbo non hihpahoni bi tah non jascayamascaí. Hihti huetsapah sca tah non jai, Criston noque hahxonah tah non queyosyosma jihue hihbotíhi.

¹⁸ Jasca tah qui. Bebonica joni hohchamenoni quen tah non jatihibi sca hohchamishbo qui, casticantíbo. Huetsan sca sirijaquin hahxonni copi sca tah non siribo sca qui, jihue

hihbobo. ¹⁹ Hohchamenoxon Adaman noque hohchayahpabo rahsi hihmani quescayamaquin ta nincanicaxon Criston noque Papan shinanyahpabo hihmahihqui, jahuen caisahbo sca.

²⁰ Noquen hohcha hihti jaroma hihqui honanahbo hihxon ta Papan Moises huishamanishqui. Hashoan jaroma non hihqui bi ta hashoan sirijaquin rihi Papan noque hahxonrihbihiqui. ²¹ Hohchapan hinábo rahsi tah non hihpahoniqui, jenquetsahax hohchajomatimahi. Mahuanicabo rahsi tah non janíqui. Rahma tah non jascayamascai. Papan ta noque hihti hahxonihqui, Cristo noque raanxonnixon. Honanscanahue: Noquen Hihbo Jesucristo copi res tah non queyoyamanox jihuescai.

6

Hohcha qui mahuataibo, Cristo qui jihuetaibo

¹ ¿Papan noque hihti hahxonah non hashoan hohchacanatihin? ¿Noque hohcha sohuanon hohcha hohcharesnonhue hih non jatihin? ² Jascayamahi rahan. Mahuatahbo ta tiroma yoshiman hohchamayamascai. Mahuatahbo sca tah non qui, jaan hohchamatimascai. ¿Jahua copi non hashoan hohcha benabonatihin? Hahyamaquin rahan. ³ Hahan honantijaquin ta mato jeneho hihquimatannishqui, hea huetsabaan, Jesucristo maton Hihbo hihqui honanahbo. Mihinquin hahcajaquin jene chicho mato hihquimatanah tah man mahuascaibo quescanihqui, Cristo betan mahuanihbo sca. Jaa tah man honanscai. ⁴ Jaa copi tah man hihquimatanah hahbe mihinahbo qui. Jaa hihquipi bi Papan jahuen coshiyaxon hahquirihbi teehihmahah quescata tah man behnabo sca jihuetai.

⁵ Hahbe mahuatahbohax tah non hahbe teehihribihibo sca qui. Behna jihue sca tah non bichi. ⁶ Cristoyabi mato rehtenih quescata tah man qui, hea huetsabaan, maton shinan xeni man jenescanon. Man tiromati queenpahoni quescayamascanahue. Hohchapan yonotimabo sca janahue. ⁷ Mahuanixon sca tah non jahuentianbi hahquirihbi hohchati shinantimascai. ⁸ Cristo betan non mahuaní quen tah non hahbetanbi jihuescai. Jaa tah non honanai. ⁹ Noquen Papan hahquirihbi teehihmahah ta Cristo hahquirihbi mahuatimascai. Mahuatima jihuescai. ¹⁰ Noquen hohcha copi mahuquin ta huestijaquin res noque sohuaxonnishqui, jahuentianbi mahuatimascai. Jihue hihbo sca jaax ta Papa queenai quescari jihuethiqui, hahbetanbi. ¹¹ Matobo sca jascarihbinahue. Tiromahax tah hen mahuanihqui hihnahue. Mahuanish bi tah hen Cristonah sca qui, Papan ta hea jihuemahiqui hihnahue.

¹² Jaa copi hohchati qui raquescanahue. Man tiromajati res ta Satanas hihti queenihqui. Jahuen shinan tiromabo man bihmis. ¹³ Mato tiromamanoxon ta mato bihcatsihiqui. Bihmayamanahue. Hahqui hinamehtaxma noquen Papa Dios qui caya hinamehnahue. Mahuatipish bi rahma hahquirihbi teehihnica baqueboscaax Papa qui hinamehnahue. Ponteres jihuenahue. ¹⁴ Maton shinaman res tah man Moisesnin yohini quescacatsihqui. Jan yohini quescati hahtipahyamahax bi tah man Papa qui hinamehtax sca man jihuethi, Satanasnen yono yonohahma sca.

Joni hina quescapahbo

¹⁵ ¿Jahua sca non shinantí jain? Moisesnin yohini quescatima sca ta jaiqui. Hohcharesnonhue, Papan noque sohuaxonresnon ¿hih non jatihin? Jahuentianbi tah non jascajaquin shinantimahi. ¹⁶ Nincanahue mato yohinon: Jahuen joni sca hihnoxon patoro qui hinamehtax tah man jahuen yonoti sca qui. Jaan yonohah tah man nincatíhi. Jascarihbihi: Hohchati qui hinamehtax tah man Satanasnen yonoti sca man jatihi, nincayosmascaax mahuanoxon. Papa qui hinamehtax tah man jahuen jihuetahbo man jatihi. Rahma rah tah man jaa honanscai. ¹⁷ Neateman tah man hohchapan hinabo hihpahoniqui, hea huetsabaan. Rahma tah man jascapahbomascai. Maton jointiboyaxonbi tah man Cristo bihniqui, caibaan mato yohihah. ¹⁸ Hohchati shinanbo man jai ta Papan mato sohuaxonnishqui. Papa qui hinamehtax tah man pontejaquin shinani sca man jihuetai. Jaa copi tah hen mato yocaxonquin Hahxon tah min jato jai, Papan, hahcai. ¹⁹ Jaabi, hahquirihbi tiromamí hihxon tah hen mato yohihi, man nincanon hihxon. Tiromati qui tah man hinamehpahoniqui, hea huetsabaan. Hohchapan hinabo sca tah man janiqui. Jahuen patoronen yonohah jahuen yonotinin nincati jai hahcajahi tah man hohchapan hinabo hihpahoniqui. Tiromabi res nincayosmahí jihuetai. Jascayamascanoxon Papa qui sca hinamehnahue, jaa queenai quescari sca siri bi res jihuenoxon.

²⁰ Hohchapan masajaha tah man ponte jihueyosmabo man japahoniqui. ²¹ Jascapahboxon tah man siri shinanbo bihyamaniqui. Man japahoni shinanax tah man hihtimahscai. Tiroma hahcaibohax tah man mahuanicabo man japahoniqui. ²² Rahma man hinabo hihyamascai honannahue. Papan mato hahxonah tah man jahuen jihuetahbo sca jai. Jaa copi tah man hashoan ponte sca jihuetai jai. Papa betan

queyoyamanox manatibo sca tah man qui. ²³ Jaton ribin jismaquin hahcajaquin ta hohchataibo Papan jismapaqueyaxihquiqui, jato masa masamscanoxon. Jato masajaxon bi ta noque hahxonrestihiqui. Noquen Hihbo Jesucristonen noque hahxonni quen tah non queyoyama sca janoxihqui non manatiji.

7

Hahan haxeti joi

¹ Caibaan tah man honanai, Papan huishamani joi. Mato sca tah hen yohihi, hea huetsabaan. Moises huishamani jai quescari jihuetaibo ta jihueparihax Moisesnin yohini quescari jihuetai jaiqui. ² Jahuen bene mahuanon caman ta jahuen haibo jascabihi hahbetan jihuetai jaiqui hih ta jaiqui jaa joi janin. ³ Jaa copi ta jahuen bene jihueparihi bi jaa haibaan huetsa bebo bichiya hahqui yohuancantihiqui, jaa haibo ta tsini qui hihcani yohuani. Moisesnin yohini jai quescayamahi jihuetai quen jascacani. Hihcax bi jahuen bene mahuanu pecaho huetsa sca jaa haibaan bichiya Tsini tah qui hihyamacani. ⁴ Mato tah man jascarihbih. Maton hohcha copi Cristo mahuanu quen tah man Moisesnin huisha janin jai casticanti qui man cahnescatihi. Mahuanu copi sca tah man huetsanah sca qui, Cristonah sca. Jaa mahuatipi bi ta Papan hahquirihbi teehihmanishqui. Jahuenah sca tah man qui. Papa queenai quesa sca man siri sca jihuenon. ⁵ Papan shinanjomaboxon tah non hicha tiromabo hahpahoniqui. Jascayamanahue hahca, hashoan bi res tiromacatsih-scai. Jaa copi tah non mahuanicabo hihpahoniqui. ⁶ Hohchanish bi tah non mahuanicabo hihyamasca jai. Cristo bichish tah non noquen hohcha copi mahuascanibo sca qui. Behna shinaryahpabo sca tah non qui. Papan jihuetahboxon tah non jaa queenai quescajaquin noquen jointinin non jaa hahxonai. Noquen shinan xeniya jihueyamascai.

Hohchapan noque pantehi

⁷ ¿Behnaboxon sca shinanah, Moisesnin joi jenquetsahpa hin? Moisesnin joi ta tiroma qui hih tah non jatimabiresai, ni jahuentianbi. Jaa quirica yamaxon tah hen heen hohcha hihti jaroma hihqui hen honanyamaquehanai. Caibaan jahuabora non bichincatsihqui ta tiroma qui. Jascahah tiroma hihqui tah hen Moisesnin quiricajomaxon hen honanyamaquehanai. ⁸ Tiroma shinaryahpahax tah hen tiromayamahax ta hohchacatsih sca janiqui. Jascapa hohcha hohchamis hea hihqui tah hen honanyamaquehanai, Moisesnin huishanijomaxon. ⁹ Huetsa tian tah hen jahuabi Papan joi honanyamaphoniqui. Tiromayamahue Papan hea jaah bi tah hen hihti tiromati res queenpahonihqui. ¹⁰ Jaa copi ta hea mahuatih hen honannihqui. Papan joi nincayosmahax ta mahuaocin sca hea janiqui. Papan joi hahan ponte jihueti hihqui bi tah hen nincayosmahax mahuanica sca janiqui. ¹¹ Hohchayamahue hahca bi tah hen hihti tiromati res sca queennihqui. Hen tah hen hihti tiromatimahi hihquish paramehscai. Pamehtax tah hen hohchatax mahuanica sca janiqui. ¹² Jaa copi honannahue, hea huetsabaan. Moisesnin huishani ta Papan joi qui. Papan noque honanmani joibo ta siri bi res qui. Ponte bi res hihcainabo rahsi can. ¹³ Papan huishamani joi ponte que bi tah hen jan huishamani copi mahuatiji jai hih hen yohuanu jatihin? Hihyamabiresi rahan. Hohchatax caya tah hen mahuatih. Hihti nincayosma hea hihqui hen honansanon ta jaa joi Papan huishamanishqui. ¹⁴ Papan huisha ta jahuen yoshin siriyahxon huishacannishqui. Jaa huesti nincatihi bi tah hen tiroma yoshiman shinanmaha jaamajaquin sca shinanai. ¹⁵ Jascajati ta jaiqui hihxon bi tah hen hahyamahi, sirijati honanon bi. Jascajatima ta jaiqui hihxon bi tah hen jaabi hahcai. Tiromascaax tah hen shinamehtai, Jahua copi hen jascajaquin hahcain hihqui. ¹⁶ Queencoinyamahax bi tah hen tiromahi, hih tah hen jai. Hen jascari yohuanah ta hahan honanti qui, Papan joi siri hihqui hen mato yohihi. ¹⁷ Jasca tah qui. Queencoinxonma bi tah hen tiromajaquin hahcai. Jenquetsahax bi tah hen pontetimahi. Hohchapan heen jointi tiromajaquemahah tah hen hihresahini hohchatai. ¹⁸ Heanbi shinanax tah hen siripi jihuetimahi, hohchapan heen shinan tiromajaquemahah. Sirijaquin shinanax bi tah hen yosmajaquetai. Hen shinanai quescabijaquin hahcatsihquin bi tah hen hahtipahyamahi. ¹⁹ Jascati ta jai qui hihnicahax bi hahcoinyosmahi can. Jascatima ta jaiqui hihquish bi jascabihi. ²⁰ Queencoinyamahax bi tah hen jointi chicho hohchapan tiromajaquemahah jascabihi tiromahi. ²¹ Jascanica tah hea qui. Sirijaquin shinanai bi ta tiromati res teema qui. ²² Moisesnin huishani joi jai quescabihi tah non jihueti jai hihquin tah hen pontejaquin shinanai. ²³ Jaa huisha joi siri hihqui honaxon bi ta jaamajamis joni hea qui hen honanrihbih. Sirijati shinanax bi tah hen sirijayosma hea qui. Hohchapan tiromajaquemahah tah hen jascapahi. ²⁴ Jaa copi tah hen hihti masa shinanai. Mahuacatsihbahinaxon shinanquin hahcaja tah hen jai. Hen hihpahoni quescayama sca jihuenoxon tah hen hea yanapannica sca queenai. ²⁵ Jaa hea yanapannica ta Cristo qui. Hahxon tah min hea jai, Papan. Jesucristo raanxonquin tah min hea yanapanai hah sca tah hen

jai. Jascá tah qui, hea huetsabaan. Papan joi ta siri qui hah tah hen jai, heen shinaman shinanxon. Jascajaquin shinanxon bi tah hen jaan yohini quescari jihueyamahi.

8

Dios Yoshiman noque jihuemahi

¹ Hashoan sca hen mato yohinon nincanahue, hea huetsabaan. Non Cristo qui hinamehtaibo yohihi ta Jascabi casticanabo sca banenahue hah Papan noque jatimahiqui. ² Min Cristo qui hinamehtaiya ta jahuen Yoshiman mia jihuemahiqui, hohchapan hiná hihyamascanon. Jaa copi ta mia mahuati Papan yohiyamascaiqui. ³ Noquen yora quescapahya jan jonon ta jahuen baquebi Papan raannishqui. Jonish ta noquen hohcha copi mahuanishqui. Jaa mahuaquatin ta noquen hohcha Papan noque queyoxonnishqui. Jan yohini quescabihi non jihueti hahtipahyamahi bi ta noquen hohcha sohuaxonnishqui, jascabi casticana non banequehanai. ⁴ Noquebi non queenai quescayamasca bi jan yohini quescari non jihuenon sca ta jascajanishqui. Dios Yoshiman jahuen shinan noque hinanah tah non jihuecoinscai. Papan shinanyahpabo sca. ⁵ Noquenbi non shinanai quesa jihuecatsihxon tah non Satanas queenai quescajaquin shinanai. Dios Yoshiman shinanyahpaxon tah non Papa queenai quescajaquin shinanai. ⁶ Hahmebi shinanax jihuecatsihquibo ta masa masanoxon mahuatihiqui. Dios Yoshiman shinan hinanah ta jascapahma qui. Jascapahmabo ta queyoyamanox mananica qui, siri shinanya sca jihuenica. ⁷ Hahmebi shinanax jihuetaiho ta Papan rahuibo qui, jahuen joi nincayamahax copi. Hohchapan pantehah ta nincati hahtipahyamacanihqui. ⁸ Jascapah ta Papan jenimayohuanquihnyamabiresiqui.

⁹ Mato tah man mahmebi shinanax jihuetaihboma qui. Maton jointi janin jahuen yoshin siri Criston niahah tah man jahuen shinanyahpabo sca qui. Criston yoshinjomabo ta Cristonahmabo qui. ¹⁰ Maton jointi janin Cristo jihuetai quen tah man jihuecointihi, Papan mato siribo jisi copi jihuecoini. Maton yora hohchapan mahuaamaha bi tah man jihue hihbobo sca jacoinyaxihqui. ¹¹ Noquen Hihbo Jesus huenihihnixon ta mato rihbi yora behnaya Papan huenihihniyaxihqui. Jahuen yoshin siri maton jointi janin jai quen ta jayaxon mato behnaxaxon sca huenihihniyaxihqui. ¹² Jaa copi tah non noquenbi shinanax quescayamahi non jihueti jai, hea huetsabaan. Behnabo jihueti sca tah non jai. ¹³ Matonbi man shinanai quescari jihuetax tah man jascabi sca mahuatahbo man jatihi. Dios Yoshin queenai quescajaquin tah man man japahoni shinanbo jenebahinti jai. Jaatian tah man noquen Papa betan jihuetihi, jahuen baqueboscaax.

¹⁴ Jahuen yoshin siripan shinanmahibo rahsi tah non jahuen baquebo qui. ¹⁵ Dios Yoshin tah man bihniqui, hea huetsabaan, hohchati qui hinamehyamascanoxon. Papan baquebo sca janoxon tah man jahuen yoshin siri bihniqui, hea huetsabaan, jahua copi raquetimascas. ¹⁶ Jaan shinamaha tah non noquen Papa Dios yohiquin Papan hah non jai. ¹⁷ Noque jahuen baquebo quen ta jahuen jihue hihbobo noque hihmayaxihqui. Cristo jaa hinanquin ta noque rihbi jaabi rihbi hinanyaxihqui. Cristo betan tiromabo tenehax tah non hahbetan rihbi Papan jihueti janin hihboyaxihqui.

¹⁸ Hean shinanah ta Cristo betan sca hihboscaxon non tenepahoni non jahuama sca jis yaxihqui. ¹⁹ Cristoya Papan noque hihbomayaxihqui jenquetsahpa hin hihxon ta manacaniqui, hea huetsabaan. Papan jonijani jahuaborabo jatihibichin ta hihti jiscatsihquin manacaniqui. ²⁰ Jahuen jahuaborabo queenai copima bi ta queenxon res Papan jato yohinishqui: Hen mato behnajanon caman manaresnahue, hahquin. Jaa copi ta rahma caman manácaniqui. ²¹ Payonicabo jayamascanon ta Papan jato behnajayaxihqui. Jaan jahuen baquebo jato hihbomahi tian ta jatihibi rihbi behnajayaxihqui. ²² Jan jonijani jatihibi ta payomisbonish rahma caman jascapah rahsi qui. Jascapahboxon ta tene tenecaniqui, Papan jato behnajanon caman. ²³ Jahuen jahuaborabo behncahincatsihqui hihqui quescarihbibi tah non jato betanbi noque rihbi jascarihbibi. Noquen yora behnabo Papan noque hinanti tah non queenai. Texe rihbi jan noque hinantijani non bihcointihi tah non honanrihbibi. ²⁴ Noquen hohcha noque sohuaxonxon ta Papan yohinishqui, Hen maton yora behnajayaxihnon mananahue hahquin. Jaa copi tah non manatai, noquen yora behnabo jisriyamaxon bi bihcatsihqui. Jisriyamahibo ta manánicabo qui. Jisresscaax cah non jisti manayamascaquehanai. Jisresscaax tah non jisyanoxon manatahpan hih non jayamahi. ²⁵ Jaa copi tah non jisyamaparixon bi non jis yaxihqui manáhahnan non tenehi.

²⁶ Non coshi pishinaiya ta Dios Yoshiman noque yanapaniqui, coshi shinan hinanquin. Jayaxon tah non teneti jai, noquenahbi noquen coshin teneti hahtipahyamaxon. Yocati honanyamaxon tah non Papa queenai quescajayamaquin texe yocacai. Jaa copi ta Dios Yoshiman noque yocaxoniqui. Joinma bi ta jahuen shinaman noque hihti yocaxoniqui. ²⁷ Papa queenai quescabijaquin ta Dios Yoshiman noque yocaxoniqui. Jaan shinanai ta

Papan honanihqui. Jatihibichin shinanai honannicaxon honanquin. Jaa copi ta Dios Yoshiman noque yocaxona jaan yocaxonai quescabijaquin noque hahxonihqui.

Tenecoinaibo

²⁸ Mescos tah non masa tenehi, hea huetsabaan. Jaabi tah non tenexonai. Noquen jisi jascapahbo tiroma que bi ta siri sca noque hihmanoxon Papan noque jascapahbo huinomahiqui. Jaa copi ta noque hahan jan queenai noquebo qui jascapahbo noque huinomahiqui, hea huetsabaan. Non tah non honanai: heen baquecoin janoxihnahue noque mahixon ta jascapa masa noque tenemahiqui. ²⁹ Jahuenahbo non jayaxihqui honannihxon ta yohinishqui: Heen baquecoin hihqui quesca sca tah man jayaxihqui hahquin noque yohiquin. Jaa jahuen baque noquen huetsahax bi noquen Hihbo rihbi hihnon ta jascajaquin yohinishqui. ³⁰ Jascajaxon ta Heen baquebo sca janoxihnahue hah sca noque janishqui. Jascajaxon sca Heen siri baquebo sca janahue hahscaquin. Jascajaxon sca Heen baque betanbi hahbe hapobo sca hihnahue hahquin.

³¹ Hen mato yohihah nincaxon, honannahue, hea huetsabaan. Papan to noque hihti hahxonihqui. Jaa copi ta noquen rahuibo qui non raquetimabiresai. ³² Noquen hohcha copi jahuen baque mahuati jahui bi ta Papan jaa panteyamanishqui. Pantexonma ta hashoan sca jomanishqui. Jahuen baque yohuashihxonma ta noque hinanxon jaya jatihibi rihbi noque hinanrihbiyaxihquiqui. ³³ Papan noque caisah ta tsoanbi sca noque caheti hahtipahyamahiqui. Siribo Papan noque jisiya cahen tsoanbi noque non japahoni cahetimascai. ³⁴ Cristo ta mahuatipish bi hahquirihbi teehihnishqui, Papa mecayaho sca hihti hihboscai tsahonoxon. Jaan ta noque yohuanxoniqui. Jaa copi ta Tiromabon hah tsoanbi noque jatimahiqui. ³⁵ Cristo noquehon shinanyamascanon hihxon noque jenemacatsihquin bi ta tsoanbi jahuejati hahtipahyamahiqui, hea huetsabaan. Jaa ta jascabihi noquehon shinanihqui. Non yomanahaiton ta noquehon shinanihqui. Non masa shinanai bi noquehon shinanquin. Caibaan noque tiromajahi bi noquehon shinanquin. Non pihan hihquiya bi rihbi, non chopanma hihquiya rihbi. Noque tiromajacanmis hih non jai bi. Noque rehtecanmis hih non jai bi. Criston noque jenenon hihxon hahquin bi ta tsoanbi noque Cristo jenemati hahtipahyamahiqui. ³⁶ Papan huishamani joi jai quescari jai boya bi ta noquehon jaashinanihqui.

Minabo non hihqui copi ta noque rehtebahinacaniqui, Papan. Yohinahbo rehteresquin hahcajaquin ta noque queyocaniqui

hihqui jaa huisha joi. ³⁷ Jascapahbo non tenehi bi ta noquen Hihbaan noque shinan-behnoyamahiqui. Noquehon hihti shinanxon ta hashoan sca non teneti hahtipahnon noque coshijahiqui. ³⁸ Noquehon shinanxon ta noquen Hihbo Jesucristo Papan raanxonishqui. Noquehon shinanquin ta jahuentianbi Papan noque jenebahintimahiqui, ni jenquetsahpabi. Non mahuatai bi noque jeneyamaquin. Non jihuetaiya jeneyamarihbiquin. Yoshiman sontarobaan bocabi ta jaa noque jenematimahiqui. Main jai tinintibaan jenemayamaribiquin. Rahma jaibaan rihbi jenemati hahtipahyamamaquin. Jayaxihquiibaan rihbi hahtipahyamarihbiquin. Quiquin tiroma yoshiman bocabi hahtipahyamamaquin. ³⁹ Ni naihoj jaibaanbi, ni nai naman jaibaan rihbi. Ni jahuatohonbi ta noquen Papa jenemati hahtipahyamahiqui.

9

Jahuen baquebo Papan caisni

¹ Cristo queenai quescajaquin tah hen mato yohicoinal, heen huetsabaan. Hen tah hen mato paranyamahi. Dios Yoshiman hea shinanmaha tah hen heen jointiboyaxonbi mato yohiscai. ² Hen tah hen hihti benatai. Heen caibo shinanxon tah hen heen jointi xecahihnihi. ³ Heen caibaan Cristo nincacoinpahinon. Heen caibobi heen caibo hean nincamaha nincacoincanpahinon. Jaabo bihnoxon Criston hea potahah que bi cahen jaabo jahuenahbo sca hihquiya hea jenimaquehanai. ⁴ Israelito ta Papan caisahbo janish qui. Heen baquebo janahue hah ta Papan jato janishqui. Jahuen xaba rihbi ta jato machi xabacananihqui. Hen mato hahxonnon hen mato yohihi quescabijaquin hahnahue jato jaquin. Jascajaxon ta jahuen joi siri rihbi huishamaxon hinannishqui, jihueti honanahbo. Huishaxon ta jato honanmanishqui, Papa yocati honanahbo. Jaa huishapan rihbi ta jato hahxonquin jihuemanica jan raanxontih jato yohirihbinishqui. ⁵ Jaton xohta xenibo ta Papan caisnihbo rahsi janishqui. Caisxon ta jato yohinishqui, jaton chinibaquebo jan hahxontih yohiquin. Cristo rihbi ta jaton caibo qui, Quiquin Hihbo. Jaa ta noquen Dios qui. Jaa yohihi tah non Mia tah min Xaba Hihbo qui, Hihbon, hihqui. Jascacoini rahan.

⁶ ¿Heen caibo nincayosmabohiya jahua yohuan sca hen jatihin? ¿Papan ta jato yohinihxon bi jan yohini quescajamaquinma jahuen jonibo hahxonyamascaiqui hih hen jatihin? Jahuentianbi tah hen jascatimahi. Papan caisahbo ta judio rahsima qui. ⁷ Abrahanen

chini baquebo jaabo hihqui que bi ta Mato jatihibi tah man Abrahanen xohtabo qui hah Papan jato jayamahihqui. Jascanoxonma bi ta Abraham Papan yohinishqui: Isaaquen chini baquebo sca hihnon hean mia hinanyaxihquibo miin xohtabo ta jayaxihquiqui. ⁸Abrahanen chini baque copi jaa jimij jahuen jenabo hihqui que bi ta jaa rahsiboma Papan baquebo qui. Jaan Abraham hinantijani jonibo caya ta Abrahanen xohtabo qui, Papan jisí. ⁹Papan yohini quesca tah qui: Mihqui joribiyaxonon tah hen mia yohihi, min hahqui baquejaha ta miin haibo Sara baquexoyahpa sca jayaxihquiqui hah ta Papan janishqui Abraham yohiquin.

¹⁰Yosiboscaax noquen xohta Isaaque yamanica janí quescarihibi ta jai qui. Jahuen haibo Rebeca baque bihyosma que bi ta Papan yohihah jahuen benen hahqui baquejati hahtipahscanishqui, rabe nane sca jahuen baque janon. ¹¹Jaa rabe nane cainrihyamahi bi ta Papan yohinishqui: Miin bihmeno baquen ta jahuen chini teexontihiqui, hahquin. Jaabo rabe cainrihyamaxon jahuabi siribojaquin hahriyamahi bi ta Papan yohinishqui, jan shinani quescabi sca janoxihnon. Jahuabi rihbi tiroma hahriyamahibaan bi Papa jascari yohuani. ¹²Jaabaan hahcai copima bi ta hahmebi queenxon Papan Jacobo caisnishqui. Jaa copi ta Rebeca yohinishqui. Miin bihmeno baquen ta jahuen huetsa teexontihiqui hahquin. ¹³Jahuen joi huishamaxon Papan yohini quesca ta janishqui: Jacobonenhon jenimaxon bi tah hen Esau queenyamabiresai hihqui noquen Papa.

¹⁴¿Jan jascani honanax jahuahih sca non jatihin? Papan ta tiromajahiqui hih tah non jatimabirestihi. ¹⁵Jaan Moises huishamani quesca ta jai qui. Heabi queenxon tah hen caisai. Jahuen chinihon queenax copi res tah hen jahan shinani hih ta jai qui, Moisesnin huishani joi. ¹⁶¿Jahua copi Papan noque jihuemahiquin? ¿Non jihuecatsihqui copi nan? ¿Non coshi coshichainai copi nan? Jaa copima bi ta noque caisnixon copi noque jihuemahiqui. ¹⁷Jan Faraon yohini quesca tah qui: Heen coshi jato jismanoxon tah hen mia quiquin hapomaniqui, Faraonen. Hea coshi hihqui jatihibi janin jihuetibaan honanahbo hihxon tah hen mia nea mai hihbomaniqui. Jasca ta Papan huishamani joi jaiqui. ¹⁸Jaa copi honannahue: Queenxon copi res ta noquehon shinanihqui. Queenxon copi rihbi ta huetsa rihbi jahuen jointi xehponihqui.

¹⁹Jaa copi rah tah man hea yocatihi: ¿Jahua copi sca Papan noquen hohcha noque hihbomahiquin? Jan queenai quescajaquin ta Papan hahquiqui, tsoanbi tah non jaa jascayamahue hahti hahtipahyamahi hih sca rah tah man jatihí. ²⁰Man hea jascahah bi tah hen yocatihi, ¿Jahua hihxon man noquen Papa Dios joi bichincatsihquin? hahquin. Hihbo hihxon ta jaa queenai quescabijaquin Papan hahquiqui. Quantijanicatón quantijaquin hahcai quesca tah qui. Yohuanti hahtipahxon Jahua copi min hea poo hahyamahaquin hah quantipan jatihiquin? Jascayamabiresi. ²¹Jaa queenai quescajaquin ta quantijahnicatón quantijahiqui. Queenxon ta jahuen mapo tonco bihxon quenti huestijaxon quene queneya poojascatihiqui.

²²Jaa queenai quescajanicaxon ta Papan jascajaribihiqui. Caibo jonibo ta tiromabo picotihqui, chacabahinti res. Tiromabo casticannica Papa hihqui non honannon jato casticantihi bi ta Papan jato tetenenehiqui. Jahuentiho coshi noquen Papa quin non honannon ta tiromacahinaibo tenehihqui. ²³Caibo rihbi ta hahan jan shinanaibo qui. Jahuen hihti siri shinan noque hinannoxon ta noque jonijanishqui. Jahuentiho siribo shinan jaan noque hinantihiquin non honannon ta jato tenerihbihiqui. ²⁴Jahuen caisahbo tah non qui, hea huetsabaan. Caibo judiobo, caibo rihbi judiobabo ta noque caisnishqui. ²⁵Oseas Papan huishamani jai quesca tah qui:

Jahuen joni hihamapahonibo ta Heen jonibon Papan mato jatihiqui. Jan queenyamapahonibo ta Heen siribon mato jatihiqui.

²⁶Huetsa janin jaibo yohihi sca Mato tah man heen joniboma qui jato janixon ta Mato tah man heen baquebo sca qui, jihuemanicahton baquebo, hah jato jatihiqui.

Jasca ta Oseasen quirica janin jaiqui. ²⁷Isaías ta jascapa joi rihbi Papan huishamanishqui: Israel baquebo hihchahax huean quexa mashi bero hicha jai quescarai bi tah hen texe pishca res jato jihuemayahihqui, texe sca queyoquin, hih ta noquen Hihbo jaiqui. ²⁸Jan yohini quescabijaquin ta noquen Hihbaan jaiqui, hahcoinquin. Histon bi res ta hahtihiqui jatihibi janin. Jasca ta Isaíasnen huishani joi jaiqui. ²⁹Isaíasnen ta nea joi rihbi huishanishqui:

Noquen naihoq queha Papan noque pishca texejayamaha tah non Sodon jema quesca queyónihbo non jaquehahnai. Gomorra jema janin queyonihbo quesca tah non jaquehahnai, queyobahinah.

Judiobo yohihi ta Isaías jascanishqui.

Nincacoinaibo betan judiobo

³⁰ Judiobo casticaxxon bi ta jahuen jonibo Papan bichiqui. Jaa copi honannahue, hea huetsabaan. Judiobaan nahuabaan ta Moisesnin joi honanyamapahonishqui. Papan siribo jati ta shinanyamacanpahonishqui. Jascapahbo que bi ta Cristo qui hinamehtaiton Papan jato sirijaquin bichiqui. ³¹ Judiobo ta hinamehyosmabo janishqui. Papan yohihi quescabijati ta jaiqui hihquish ta tee teepahonishqui. Non sirijaquin hahcai copi tah non Papan siribo qui hihquish ta coshicannishqui. Jascax bi ta Papan yohini quescayamacannishqui. Huetsapahaquin. Jaa copi ta Papan jato bihyamanishqui. ³² Papa hihcainai shinanax bi ta hahqui hinamehxonma jaton coshinbi Papa qui nocohihnati shinancannishqui. Bahin naracatai macamahhuan qui joxcorohtai hahcajaquin ta hahcannishqui, jaamajaquin. ³³ Jascapahbo ta Papan huishamanishqui: Jistahi man. Maton hani jeman tah hen macamahhuan janahi, bahi xehpoquin. Man hahqui joxcorohmis. Jaa merahax man bahinma sca camis. Jaa hen janahi qui hinamehtaibo tah hen hen yohihi quescabijaquin hahxoncointihi. Jascá ta Isaíasnen huishani joi jaiqui.

10

¹ Jan jato jihuemanon noquen Papa qui heen caibo hinamehpahinon hih tah hen jai, hea huetsabaan. Hinamehtahbo hihxon tah hen jato yocaxonai. ² Papan bahin nihti shinanax ta coshi coshicaniqui, heen caibo. Jascapahbohax bi ta honanaxma nihcaniqui caresi. ³ Papan siribo jenquetsahpabo jihuetai jaiquin ta honancatsiyamacaniqui. Jaa honanxonma bi ta jaabaanbi shinanai quescajaquin tanatanacanicui. Jascaxon ta Papa nincacatsiyamacaniqui. ⁴ Nincacoinax ta Cristo qui hinamehcanquehanieliqui. Papan huishamani joi ta Cristo yohihi joi qui. Papan jisí ta Cristo qui hinamehtaibo rahsi jahuen siribo qui. Non honannon ta jaan jaa joi huishamanishqui.

⁵ Moisesnin ta jaa rihbi huishanishqui: Jaan jato siribo jisnon hihxon Papan yohini quescajaquin hahcaibaan ta hahrestimahiqui. Hahcoincatsihquibohax tah man jan yohihi quescabihi jihuetai jai, jahuabi nincati pishinmahaxma, hah ta Moisesnin janishqui. ⁶ Cristo qui hinamehtai jahuen siribo ta huetsapahbo qui. Huetsa shinanyahpabohi yohihi ta huetsa quirica huishaquin Moisesnin yohirihbinishqui. Miin jointinin yohuani tah min Tsoa cahra naihoh catihiquin hih min jatimahi. Tsoan Cristo botomatihiquin hih ta jacatsihquiqui jaa joi. ⁷ Tsoa cahra mahuanihbo janin botopaquetax joti hahtipahiquin hah tah man jatimaribihi. Mahuanihbo janin caxon tsoan Cristo bexontihiquin hihiyamanahue hih ta jacatsihquiqui jascari. Cristo ta hocho qui, jaan yohihi tah non hahtipahyamahi hihiyamanahue. ⁸ Papan huishamani joi jai quescabi tah qui: Heen joi ta mia hochoma qui. Miin jana janinbi tah qui, miin shinan janinbi tah qui, hih ta jaa huisha jaiqui. Jan yohihi ta Cristo joi qui, non hahqui hinamehtaibo Papan noque sirijaquin sca bihtihí jai. ⁹ Noquen Hihbo Jesus ta Papan hahquirihbi huenicoinnishqui hihxon, jointinin hihcainai shinanon, miin janan rihbi Jesus ta heen Hihbo qui hihquish tah min jihue hihbo sca min jatihi, Papan jihuemahah. ¹⁰ Noquen jointinin hinamehxon, noquen janan rihbi non Papa yohihiya ta jaan noque siri jisiqui, noque jihuemanoxon.

¹¹ Papan huishamani jai quescá tah qui. Hihcainai shinanax hehqui hinamehtaibo jatihibi tah hen hean yohihi quescabijaquin hahxoncointihi hihqui. ¹² Mesco jonibo rahsi noque jonijanixon ta judiobo jascajaquin yohixon judiomabo rihbi jascajaquin rihbi Papan yohihiqui. Hea hihbojahue Papan hih non jaah ta jaabahinxon noque hihti hahxonihqui. ¹³ Jaa yohihi ta Papan nescajaquin huishamanishqui. Hea hihbojahue Papan hihquibo rahsi tah hen jihuemayahiqui, hihqui. ¹⁴ Hihcainai shinanyamaxon ta jenquetsahaxon bi Hea hihbojahue Papan jati hahtipahtimahiqui tsoanbi. Jahuen joi nincayamanihxon ta hihcainajaquin shinanti hahtipahyamarihbianiqui. ¹⁵ Tsoanbi raanyamahah ta tsoanbi rihbi Papan joi jato yohiyamahihqui. Tsoanbi yohiyamahah ta tsoanbi rihbi nincayamahiqui. Jahuen joi nincayamanixon ta hihcainai shinanyamaribicaniqui. Hihcainai shinanyamaxon ta jenquetsahaxon bi Hea hihbojahue Papan jatimaribicaniqui tsoanbi. Jaa copi ta non raanah hihti siri qui, huishani joi jai quescari. Siri joibo noque yohinoxon nocotaiya tah non hihti jenimatihí hih ta jaiqui jaa huishani joi. ¹⁶ Joi siri nincamaha bi ta jatihixonbima nincacanicui, caibaan res. Isaíasnen ta nescajaquin jaa yohinishqui: Miin joi hen yohihah bi ta nincayamacanicui Hihbon hahquin. ¹⁷ Hen yohihah quescá tah qui, hea huetsabaan. Jaa joi siri ta Criston joi qui. Jaa joi siri nincamaha pari ta hihcainajaquin shinancantihiqui.

¹⁸ ¿Tsoanbi jato nincamayamanishquin? Noque yocacah tah non nincamaquin rahan hah non jatihi. Huishani behua jai quescá tah qui: Jatihibi janin ta yohihi bocannishqui. Jonibo yama sca jaiton caman ta yohihi bocannishqui

hihqui jaa behua. ¹⁹ Yohihah bi tsi ra judiobaan honanyamapahonishquin hih sca rah tah non jatihi yocahti. Honanquin rahan hihxon ta Moisesnin nescajaquin sca huishanishqui, Papan huishamaha:

Maton nahuabohon shinanxon jato sirijaquin hahxonquin tah hen mato notsimayaxihqui.

Honanma nahuabohon shinanxon tah hen mato sinamayaxihqui

hah ta Moisesnin huishaquin janishqui. ²⁰ Isaíasnen ta hashoan sirijaquin sca yohinishqui, nescajaquin:

Maton nahuabaan ta benamayaxon bi hea meranishqui. Jaabaan quenahahma bi tah hen jato qui caniqui

hihqui. ²¹ Judiobo sca yohiquin ta nescajanishqui Heen mequen rabe sanaxon tah hen jato Benahue Benahue jabahinahi. Hen jato quenabahinaha bi ta nincayosmaboxon joi bichinrescaniqui. Papa jascari yohuanai ta Isaíasnen huishanishqui.

11

Nincacoinaibo Papan baquebo

¹ Jahuen jonibo Papan potabahinyamanishquin yocacah bi tah hen Hahyamaquin rahan hahcai. Hea rihbi tah hen judiobo qui, Abrahamen chini baquebo can, jahuen xohta Benjamin baquebo. ² Papan ta jahuen caisahbo potabahinyamahiqui. Papan huishamani joi jixxon tah non jaa honanai. Papa yohiquin ta Elíasnen nescajanishqui, israelibo cahequin:

³ Papan Dios. Miin joi yohinicabo ta rehtecanhoxqui. Tsoanbi mia shinanyamascanon hihxon ta janoxon mia yocatibo potojaquetancanhoxqui. Hea huesti banetaiya sca ta rehtequin bi cahnexon hea benacaniqui, hea rehtenoxon, hihqui. ⁴ Elíasnen jascahah bi ta Papan yohinishqui: Jascama tah qui. Siete mil bebo tah hen paxajahoqui. Jaabaan ta santo qui raboxonen tisquihahpaqueyamahiqui hahquin. ⁵ Rahma ta jascarihbihiqui, hea huetsabaan. Texe judiobo nincayosma que bi ta noquehon shinanxon texe pishca huestibo sca Papan noque caisihqui. ⁶ Jaan noque caisah ta non hahcai copima qui. Jaan noquehon shinanxon copi res. Non hahcai copi res noque caisti jaxon ta noquehon shinanxon res caisti yamascaquehahniqui.

⁷ Jaa copi nincanahue, hea huetsabaan, hen mato yohinon: judiobo ta Papan siribo hihcatsihquish bi hihyamacannishqui. Papan caisahbo res ta jahuen siribo qui. Texe ta nincatima shinan sca Papan hinannishqui. ⁸ Huishani joi jai quesca tah qui. Honanyosmati shinan ta Papan jato hinannishqui. Beroyahpaxon bi jisyamahabo ta jato mehenishqui, pabinquiyahpaxon bi nincayamahabo jato mehequin. Rahma caman ta jascapahbo qui hihqui jaa joi. ⁹ David yamanica ta jascarihbihii yohuannishqui, nincayosmabo yohiquin: Papan baquehihcamaxon pipi pipichaiton bi Papan jato yahtanpahinnon. Jatón pitin paranquin hahcajaquin jan jato yahtanxon tiromajapahinon. Siri siri tah non jai hihquibaan bi jan tiroma bi res jato qui paquepahinon. Rohahihriti shinanaiboya bi jato casticanpahinon. Jaan jato tiromajabahinnon.

¹⁰ Benchecahinxon quescajaquin jahuabi sca honanyamacanpahinon. Jascabi sca huehro huehrocana quesca sca jaahbo jato hihuejapahinon hihqui jaa huishani joi.

Judiomabo Papan jihuemahi

¹¹ Jaa copi tah hen yocahtai: ¿Cristo jenebahinax jascabi sca Papan rahuibo jayamayaxihcanihquin? Hihyamahi rahan. Jaabo bahinma cahiya ta jaton nahuabo sca Papan sirijaquin bichiqui. Jan mato sirijaquin bichi jisish ta jaabo rihbi Papan bahin sca nihrinnoxon Papahon queenrihbiyaxihcanihqui. ¹² Jaabaan noquen Hihbo potabahinaiya ta jatihibi janin sca Papan joi siri nocotihqui. Judiobo jahuen shinan siribo bichinxon ta mato sca jaa shinan Papan sirijaquin hinanishqui. Jaa copi ta judiobaan hahquihrihi jaton shinan pontehax Cristo qui hinamehtaiya hashoan sca Papan mato hihti hahxontihqui.

¹³ Hen mato yohinon nincanahue judiomabon. Jahuen joi siri hen mato yohinon ta Papan hea mato qui raannishqui. Jaa copi tah hen coshin bi res teetai. ¹⁴ Hihti queentsain, huestibo tahni hehbe judio Cristo qui hinamehnon hihquish tah hen coshin bi res teetai, Papan joi siri yohihi. Jaabo rihbi Cristo betan jihuetai tah hen hihti queenai.

¹⁵ Jahuen judiobo potabahinxon ta jahuen sinatahbo hihpahoni mato Papan sirijaquin bihnishqui. Hahquihrihi sca jahuen judiobo Papan sirijaquin bichiya tah non jatihibi hihti jenimayaxihqui, noquen huetsa mahuatax bi hahquihrihi teehihqui merahax quescari. ¹⁶ Noquen Papa qui jahuabora hinancatsihxon tah non sirimahin hihxon tehcaxon siri jixxon, jatihibi siriscanon non honanrihbihii. Jihui ta jascarihbihii qui. Jahuen tapon siri hihquiya ta jahuen mebibu rihbi siri qui. Judiobo ta jascarihbihii qui: texe Papan hahquihrihi sirijaquin bichiya ta jatihibi rihbi bihti siri qui.

¹⁷ Jahuen bana jihui coiranquin hahcajaquin ta Papan noque jisiqui. Xanahiton texe mebibio tsecaxon ta miabo sca nihi naman meha mebi que bi jano mia rechihiqui. Texe jahuen yora quihua mebi tocan mia joconnon jano mia rechiquin. Jano rechihah sca tah min jahuen coshin hanihi, texe mebibio hihqui quescari. ¹⁸ Papan mia jano rechihah bi Hea ta hashoan siri qui, Siri copi ta huetsa mebibio tsecaxon hea sca rechihiqui hihiyamahue. Jascacatsihquin honanscahue: Mebixon tah min jihui yora qui coshi hinantimahi. Jihui yoran caya ta jahuen mebi coshi hinanishqui.

¹⁹ Hea tah hen hashoan siri qui hihiyamahue hen mia jaah bi Hea rechinoxon ta huetsa mebi tsecanishqui hah rah tah min jatihi joi bichinquin. ²⁰ Hihcaini. Hihcaxbi mia hashoan siri copima. Nincacoinyamahi copi ta jato tsecanishqui. Min hinamehtai copi res ta mia bihnishqui. Jaa copi tah min Hea tah hen caibo mentan hashoan siri qui min jatimahi. Shinanquin tiromajahiton mato rihi potarihbimis. ²¹ Jahuen mebi coinbo yohuashihxonma potanixon ta hinamehyamahiton mato rihi sca jascajarihbithiqui. ²² Honannahue. Papan ta mato sirijaquin bichiqui. Heen caibo ta potaresnishqui. Nincacatsihyamahibo copi jato potaresquin. Jaabo potanixon bi ta matobo sca sirijaquin hahxontijahiqui. Man jascabihi hinamehtaiya ta jascabi jaquin mato sirijaquin hahxontihiqui. Man nincayosma hihquiton ta reraquin hahcajaquin mato potatihiqui. ²³ Heen caibo potanixon bi ta jaton chini baquebo hahquirihbi hinamehtaiton jato bihribithiqui. Rechiquin hahcajaquin ta jato hahquirihbi sirijaquin bihtihiqui. Heen xenibo potanixon bi ta Papan jaton baquebo hahquirihbi rechiti hahtipahiqui. ²⁴ Nihi naman meha mebi bihxon baná yora qui rechixon hahcajaquin ta Papan mia sirijaquin bichiqui. Hashoan sca ta baná mebibio rechiquin hahcajaquin jahuen judiobo jaan sirijaquin bihribithiqui.

Israeli baquebo Papan jihuemayahiqui

²⁵ Hen mato yohinon nincannahue, hen huetsabaan. Hashoan siribo copi Papan mato sirijaquin bichi man shinanmis hihxon tah hen tsoan honanihma joi mato rahma yohihi. Hashoan hicha ta heen caibo jointi xehpotihqui. Jaton nehuaabo janin sca jahuen jonibo jatihibi Papan caisquin queyonon caman ta jointi xehpóyahpa judiobo jayahihquiqui. ²⁶ Jascajaquin judiobo notsimaxon ta jahuen jonibo rahsi Papan caisyaxihquiqui jan huishamani jai quescabijaquin. Jaa huishamani ta nesca qui: Judiobo janinhax ta quiquin jihuemanica joyaxihquiqui. Joxon ta judiobo jaton hohchati shinanbo sohuayahihquiqui.

²⁷ Hinamehtaiton tah hen hean yohini quescabijaquin jaton hohcha sohuaxontihiqui hihqui jaa quirica.

²⁸ Matohon shinanxon jahuen joi siri mato qui nocomanoxon ta judiobo Papan rahuijanishqui. Jato rahuijanixon bi ta jaton xohtabo hahxontijanixon jato caisnixon rihi Papan jatohon shinanrihbihiqui. ²⁹ Hahxonti yohixon ta huetsajati sca Papan shinanyamahiqui. Jahuen joniboscanon noque caisnixon ta Papan shinanquin huetsajayamahiqui. Jaa copi ta judiobo Papan jascabijaquin potatimahiqui. ³⁰ Nincayosmapahonixon bi tah man rahma Papan joi siri bihcainai, jan mato sirijaquin bihnon. Judiobaan rahma nincayamahi bi tah man maton nincacoinai. ³¹ Jascajaquin rihi ta jaabaan rahma nincayamaxon bi man hahcai quescajaquin Papan joi siri bihcoinyaxihcaniqui. Man nincacoinquin hahcai quescajaquin rihi ta jaabaan nincacoinyaxihquiqui.

³² Nincayosmabo rahsi non hihqui non honannon ta Nincayosmabon hahquin noque janenishqui. Jascapahbo rahsi non hihpahoni bi ta noquehon shinanxon noque hicha caisihqui jahuen jonibo sca non janon. ³³ Noquen Papa ta hihti siri qui. Sirijaquin ta noquehon shinanishqui. Jahuejati sca non jain non jai bi ta jaan honanquin sirijahiqui. Hihti siri shinanyahpa ta jaa qui. Jahuen shinan ta hihti coshi qui, noquen honantimahi. Jahuen honan betan tah non senentimahi jahuentianbi. ³⁴ Papan shinanai ta tsoanbi honanyamanishqui. Jahuentianbi rihi ta tsoanbi noquen Papa haxemayamanishqui. ³⁵ Papan jato copi hinanrihbinon hihxon bi ta tsoanbi jaa pari jahuabi hinanyamanishqui. ³⁶ Papan ta jatihibi shinan siriyahpaxon noque jihuemahiqui. Jahuenahbi jahuen jihue-tahbo rahsi non janon ta noque hahxonihqui. Hahxon tah min noque jai Papan. Mia tah min hihti siri qui hih tah hen jascabihi jai.

12

Noquen Hihbaan jihuetahbo

¹ Jaa copi tah hen mato hihti yohihi, heen huetsabaan. Noquen Papa Dios qui yohuashih-jaquetanaxma hinamehnaue. Matohon jaan hihti shinanai copi hahan queenax copi rihi hinamehnaue. Jahuenahbo sca jihuenoxon, hohchajoma siri janoxon, hahan jan jenimahibo janoxon hinamehnaue. Jascaxon tah non Hahxon tah min noque jai Papan non jacointihiqui. ² Nincayosmabo jihuetai quescayamahi jihuenahue. Jaabo hihqui

quescaxonma behnabo hihnoxon maton shinan pontejaquin shinan behnabo bihnahue. Papa queenai quescajaquin shinannoxon, shinan behnabo bihnahue. Shinan behnabo bihxon tah man honantihi, jahua siri quin, jahua Papa queentihiquin, jahua ponte quin. Man tah man honantihi.

³ Papan hea raanah tah hen mato yohihi, hea huetsabaan. Shinan behnabo bihnahue, jatihixonbi. Papan ta mesco shinanbo hinanpaquehiqui. Hinanpaquehah bihxon jayaxon man jahua jaa hahxontihin honanquin sirijanahue. Man hashoan coshi hihqui shinanmis. Sirijaquin shinanxon, jahuejati shinanyahpa min quin honanquin sirijahue, paramehxonma. ⁴ Papan ta mesco shinanbo mato hinanpaquehiqui, man mesco teebo rihbi hahxonnon. Noquen yora hihqui quesca tah non qui. Non tah non hahan jisti jaax, hahan xecoti jaax, hahan nihti jaax, hahan nincati jai. Jascapahbo mesco mebibu jaax bi ta noquen yora huesti qui. ⁵ Noque Criston baquebo tah non hichahax bi jascarihbihi. Hichahax bi tah non huesti yoraya qui. Criston yora tah non qui. Noquen Hihbo nincacoinax huesti yorahax bi mesco jonibo, jahuenahbo rahsi, yanapanhananaibo rahsi.

⁶ Mesco jonibo man hihqui quescahbihi ta Papan mato hinanai mesco teebo jaiqui. Mesco teebo mato hinanpaquexon ta hahan hahxonti shinanbo rihbi mato hinanpaquehiqui, mesco shinanbo. Jaa copi jayaxon sca jaa hahxonnahue. Heen joi siri yohinacahue mia jaah, honanquin sirijaxon yohihue. ⁷ Miin huetsabo yanapannacahue mia jaah jato hahxoncoinquin yanapanhue. Caibo haxemanicahue jan mia jaah, jato haxemahue. ⁸ Hahan jenimati shinan hinannacahue mia jaah hahan jenimati shinan jato hinanhue. Pishinaibo yanapannacahue mia jaah, jaa pishinaibo hinanreshue, bichinrihbiti shinanxonma. Jonibo teemannacahue mia jaah chiquishxonma hihti teexon jato teequihnhue. Yomanahatibo yanapannacahue mia jaah jenimahanan jato yanapanhue.

Shinancoini non jihuetai jai

⁹ Caibohon shinanihcamaxonma jato yanapanquin hahxoncoinhue. Tiroma joibo rahninxon bi siri joibo jeneyamahue. ¹⁰ Joni huetsahon shinanquin jato sirijaquin yohuanquihnhue. Sirijaquin shinanax joni huetsa qui siriresi yohuanhue.

¹¹ Coshin noquen Hihbo teexonhue. Chiquishaxma tee teeti. Dios Yoshiman yanapana jenimahue. Jenimahanan noquen Hihbo teexonquin.

¹² Papan mia hahxonyaxihqui honanax coincoini jaa joti manahue. Masá tenehue. Papa yocaquin rihbi jeneyamahue.

¹³ Mihbe nincacoinaibo yomanahaiton jaa pishinai hinanhue. Mihqui noquen huetsabo nocotaiya jato pimaxon jato jano hoxati rihbi hinanhue.

¹⁴ Caibaan mato tiromajahah bi jato yocaxonnahue. Jato join bahchinnanxonma bi Papa jato yocaxonnahue, jan jato shinan siri hinannon hihxon.

¹⁵ Hahan jenimati jaax copi caibo jenimahiya jato jenimaquinhue. Caibo rihbi benataiya benáquin bi jato tenequinhue.

¹⁶ Caibo betan siripi yohinani jihuenahue. Caibo mentan mia hashoan siri hihqui shinan yahue. Jascaxonma bi jahuaborajomabo yohuanquinhquin sirijaquin. Jaabaan mia yohihah bi caibo mentan mia hashoan honan hihqui shinanxon min jato nincayamamis.

¹⁷ Caibaan mia tiromajahah bi jato copiyamahue. Jatihibi jonibo yohuanquihnoxon siri yohuanyahue. ¹⁸ Hahtipahax, jatihibi jonibo betan siripi jihuehue. Caibo sinatai bi hahtipahxon jato siri shinan hinanhue, siri sca jihuenoxon. ¹⁹ Tsoabi tah min jahua copibi copitimahi, noque huetsan. Papan ta mia copixontihiqui. Jaa copi tenehue. Jaa copi ta huishani joi jaiqui: Heanbi tah hen copitih. Jaabo tiromahibo jihuetai copi tah hen jato masajabahintih hih ta noquen Hihbo yohuani jaiqui. ²⁰ Jaa copi miin rahui copixonma bi picatsihquiton pimahue. Jiricatsihquiton xehamahue. Jascajaquin tah min jaa jahuen shinan pontexontih. ²¹ Caibaan mia tiromajahah, mian rihbi sca min tiromajamis. Jaton tiroma shinanbo potamanoxon sirijaquin jato hahxonnahue.

13

¹ Gobierno hapobo nincanahue jatihixonbi. Jascapa hapo jatihibi ta Papan mato hinanah qui. Papan hinanahma ta yamahiqui; jaan hinanah rahsi ta jaiqui. ² ¿Hapon yohihah bi min nincacatsiyamahin? Papan hinanah hapo tah min nincayamahi. Min nincanon hihxon tah hen mia yohihi. Nincayosmabo ta hapobaan casticanti qui. ³ Sirijahibo ta casticanyamacaniqui. Tiromajahibo caya ta casticanti qui. Jaa copi tah min siripi jihuecatsihxon jato nincatihi. Min sirijaquin hahcaiya ta mia yohiyaxihquiqui, Mia tah min siri joni qui hahquin. ⁴ Min siripi jihuenon ta hapobaan tiromabo casticaniqui. Noquen naiho queha Papan jascajahue hahca ta tiromabo casticanquin noquen Papa hahxonihqui. Jaa copi tah min tiromahax min raquetih. Policia ta hahan casticanti

qui. Yancaresma ta jaa jaiqui. Tiromabo qui noquen Papa sinataiya ta jascapahbo noquen hapobaan casticaniqui, Papa hahxonquin. ⁵ Tinintinin mia casticanmis hihxon tah min Papa queenai quescayamahi hea japaho hihxon rihbi mia tinintinin yohihah min nincatihi. ⁶ Jaa copi rihbi tah min gobiernobo copijati jai. Coriquinin ta gobiernobaan jaton tee hahquiqui, sontarobo copijaquin. Jascajaquin ta Papa hahxoncaniqui. Jaa copi tah min jato copijati jai. Copijanahue hahca copijaquin.

⁷ Huetsa joni ribinax tah min hahqui miin coriqui min yohuashihtimahi. Ribinyahpaxon tah min miin ribin queyobahintihi. Coriqui cobranah copijaquin. Teeti yohihah teexonquin. Hapobaan yohihah, nincaguin. Jaabaan yohihi quescabijaquin hahxonquin, joi bichinxonma. Hapobaan yohihah, can. ⁸ Man ribinai jatihibi tah man copijacointihi. Copijaquin queyobahinquin. Joni huetsa yanapanti shinan hashoan sca bihbonanahue. Joni huetsahon shinanquin tah non hahxoncoinquin Papan yohini quescabija sca non jai. ⁹ Tsiniyamahue. Joni huetsa rehteyamahue. Yometsohyamahue. Caibaan jahuabora bichinti shinanyamahue. Nincayosmayamaxon tah min joni huetsahon shinanxon, miabi min queemehtai quescaribiquin joni huetsahon shinantihi. ¹⁰ Joni huetsahon shinanxon tah min jahuentianbi jaa tiromajatimahi. Joni huetsahon shinani jihuetaho hihxon ta jascapa joibo jatihibi Papan noque yohinishqui.

¹¹ Noquen Hihbo tah man hahxonti jai, hea huetsabaan, coshin hahxonquin. Min hihti hoxahax mohixon jisi bi bari queyasca jaiya tah min coshin sca tee teetai, tee hichahi copi. Jascajaquin rihbi noquen Hihbo coshin teexonnahue. Noque bichi jaa joribiti hochoma tahniscai honanxon coshin sca teexonquin. Non nincamenoni tian jaa joribiti hochoma tahni hihnish bi ta rahma nea pishcasca jaiqui. ¹² Hihshinahax xaba paqueti nea pishcascai quescarihibi tah qui. Cristo joti hochomahi copi man tiromahi jihuepahoni quescayamanahue. Sirijaquin hahxonti shinanyabo sca janahue. ¹³ Papahon shinanaibaan hahcai quescajanahue. Pahlen pahentimascai. Pahleni coro corotimascai. Tsinitimascai. Haibo mehehax jaya yohuani jayamascai. Sinacantimascai. Caibaan noque mahuinah bi notsi notsitimascai. ¹⁴ Noquen Hihbo Jesucriston shinan bichish jihue-nahue. Nincayosmabo jai quescayamanahue, jaabo jascarai bi queenyamabiresnahue.

14

Caibo qui yohuanyamahue hihqui

¹ Caibaan ta Cristo qui hinamehxon bi man honanai jatihibi honanyamaparihiqui. Jan honanyamaparihi bi tah man jaa pontecatsihquin join hihquinantimahi. Jahuabo non pitimahin hihquish joinannoxonma nocotaiton bihquin sirijanahue. ² Jatihibi piti tah non pitihi hih huetsa jai bi ta non tah non nami pitimahi hihxon huetsan nami piyamahiqui. ³ Nami pinicahxon, nami piyosma yohiquin Honanman hahyamahue. Nami piyosmaxon tah min miin huetsan nami pihiya Pitima tah min pihi, hohchayahpan, hah min jati-maribih. Nami pinicaboya nami piyosmabo ta Papan jato rabebi sirijaquin bichiqui, Cristo qui hinamehtaiton jato rabebi sirijaquin bihquin. ⁴ ¿Mia jahuaxon huetsa joni teexonnica min sinajatihin? Jahuen patoro jan teexonai bi jan teetai mian costanyamaxon tah min jahuen patoro hihyamaxon jaa sinajatimahi. Jahuenahbi jahuen patoronen ta jaa yohitihiqui jan sirijaquin hahcai jisxon sirijaquin yohiquin. Jan tiromajaquin hahcai jisxon sinajascaquin. Jahuenahbi jahuen patoronen ta yohitihiqui. Jascajaquin rihbi tah min noquen Hihbaan joni huetsa mihbe honanyahpa hihyamahiya mian jaa sinajatimahi. Noquen Hihbaan ta shinan hinanti hahtipahxon jaa hinantihiqui, jan hahcai sca noquen Papan siri sca jisnon.

⁵ Jaa copi mianbi min hahcai jisxon shinanquin sirijahue, noquen Hihbaan mia Sirijaquin tah min hahcai hah mia janon. Huesti nete ta tantiti nete qui, Papa shinanti nete hih huetsa jai bi ta huetsa sca Jatihibi nete ta jascapah rahsi qui Papa shinanti nete rahsi hihribihiqui. Jascapa mesco honanyahpa hihqui bi hahbetan join hihquinanyamanahue. ⁶ Huesti nete ta tantiti nete qui hihquish ta jaa neten noquen Hihbohon shinani caibo tantihiqui. Noquen Hihbo hihti siri copi jascacani. Nami pinicabaan rihbi ta Mia copi tah hen pihi Papan hahxon, nami pihiqui. Noquen Hihbo hihti siri copi jascacanganquin. Nami piyosmabaan rihbi ta Mia copi tah hen pihi Papan hahxon, jaton huai mehabo pihiqui. Noquen Hihbo hihti siri copi rihbi jascacanganquin.

⁷ Papan noque jisima tah non jihueyamahi. Papan noque jisima tah non mahuayamaribih. ⁸ Jihuetaibohax tah non noquen Hihbo queenai quescari non jihuetai. Noquen Hihbaan noque johue hahca tah non jaa queenai tian non mahuarihibih. Jaa copi tah non jihueparihax non noquen Hihbaan jonibo qui. Mahuatax rihbi jascabihi noquen Hihbaan jonibo. ⁹ Noquen Hihbo ta noque jatihibi hihbohi qui, jihuetaibo, mahuataibo rihbi. Noque jatihibi hihbonoxon ta mahuatipish teehihribinishqui.

¹⁰ Papan ta noque jatihibi jispaqueyaxihquiqui, non hahpahnibo siri quin tiroma quin hihxon noque jispaquequin. Jaa copi ta min hahcai quescajayamaquin miin huetsan pihi bi mian jaa sinajatimahi. Jaan rihbi ta mia yohiquin honanman hahtimahi. ¹¹ Papan huishamani jai quescabihi ta jayaxihquiqui:

Tsoabi cahnexionma tah hen hea naman jato tisquihahpaquemayaxihqui. Hea quiquin Hihbo hihqui ta yohiyaxihcanihqui. Mia tah min Papa Dios coin qui hah ta hea jayaxihcanihqui

hihqui jaa huishani joi. ¹² Jaa copi honannahue. Mianbi min hahcai ta Papan mia yohiyaxihquiqui, Min tah min sirijaniqui hahyamaxon Min tah min tiromajaniqui hahquin.

Miin huetsa hohchamayamahue hihqui

¹³ Jaa copi joni huetsa betan join hihquinannanyamascanahue. Join hihquinannanxonma bi miin huetsa min hohchamamis hihxon shinanquin sirijahue. Hohcha qui min paquemamis. Noquen Hihbo min jenemamis. ¹⁴ Pitima pihax copi non hohchayahpa sca jai caibaan shinanah bi ta jascapa pitima yamahihqui, hea huetsabaan. Noquen Hihbaan hea shinanmaha tah hen honanquin sirijahi. Jascapa pitimabo yamahi bi ta jascapa jai shinanxon jaabi piban hihxon pihax, non hohchayahpa sca jai, pitimahi shinanxon bi pihax hohchayahpa sca jai. ¹⁵ Mian pitihbi bi pitimahi miin huetsan shinanaia ta jan pinon Jaabi pihue mian jaah tiroma qui. Hahan shinanyamaxon pari tah min jascajaquenhahnai. Miin huetsa copi rihbi ta Cristo mahuanishqui, noque huetsan. Jaa copi miin huetsahon shinanahue. Pitimahi jan shinanaia Jaabi pihue hahyamahue. Miin huetsa min masajamis. ¹⁶ Miin piti mian piha siri que bi jaa hohchamaxon miin piti qui min jaa tiromahi yohuanmamis. ¹⁷ Papan jihuetahboxon tah non jahuabo pitima quin, jahuabo xehatima quin hihxon shinantimahi. Papan jihuetahboxon tah non ponte jihueta shinantihi, noquen huetsabo betan siripi jihueta, coin coin jihueta, Jascati caya tah non shinantihi jahuen yoshin siriyahpaxon. ¹⁸ Jascajaquin caibohon shinani jihuexon tah min sirijaquin noquen Hihbo Cristo teexontihi. Min jascapa hihquiya ta noquen Papa mihon jenimahiqui. Jonibaan rihbi ta mia siri jisiqui.

¹⁹ Jaa copi joni huetsa betan siripi jihueta shinan bihcoinnahue. Joni huetsa coshi hinanahnannahue, hashoan sca noquen Hihbo betan nihnon hihquish. ²⁰ Jaan pitimahi bi mian pihue pihue hahca, pihax, masa shinani sca noquen Hihbo betan jan siripi nihyamcamis. Jatihibi piti ta siri qui, noquen Hihbaan jisi. Siri que bi pitimahi shinanxon miin huetsan picatsihyamahi bi mian Pihue hahca piresax, tiroma hi. ²¹ Jaan pitima shinanxon jaan pimis hihxon miin huetsa nami piqihinyamahue. Jascajaquin rihbi ta pahe xehati xehayamahah, siri qui, miin huetsa min hohchamamis hihxon xehayamahah. Jahuabi tah non noquen huetsa non hohchamatimahi, hahan shinanxon. ²² Jaa copi join hihquinanyamanahue. Miin Hihbaan mia jisi honanxon mihmehixon sca min honanai quescajaquin pihue. Shinanquin sirijahax tah min pitima tah qui hihxonma pihax min coin cointihbi. ²³ Pitima ta qui hihxon bi pihax tah min Hohcha tah hen jai hihscatihi. Jaatian tah min masa shinantihi. Pitima ta qui hihxon bi pihax hohchayahpa sca jai. Jatihibi ta jascari qui. Jascatimahi hihquish bi jascarax hohchayahpascai.

15

Miin huetsa coshion jahue hihqui

¹ Jascajaquin tah non non honanai betan senenyamahibo non teneti jai, hea huetsabaan. Noquebi non queenai quescajaquinma bi tah non jatohon shinanti jai. ² Jatihibijaquin tah non jascajati jai. Noquen huetsan hashoan sca nincacoimnon hihxon res tah non hahan shinanax noquebi non queenai quescatimahi. ³ Noquen Hihbo Cristo rihbi ta jaabi queenai quescayamahi bi noquen naihoq queha Papa queenai quescanishqui. Jaa copi ta hahqui rainyamacannishqui, jonibo. Jaa yohihi ta huishani joi jaiqui: Mia hichacaibaan ta hea sca hichaquiqui hihqui jaa joi. ⁴ Papan huishamani joibo jatihibi ta non haxenon hihxon huishamanishqui. Tiromabo tenehahnan, jahuen joi siri jisxon, jaa noquehon shinanai honanxon, jahuen shinan bichish, noque bichi jaa joti non jenimahanan mananon ta jaa joibo huishamanishqui. ⁵ Noquen naihoq queha Papan ta siri shinan hinanahqui, noque sirijaquin shinanmaquin. Hahan jenimati shinan hinanquin ta noque jenimamahiqui. Jahuen shinan siri hinanah man siripi joni huetsa betan jihuenon tah hen mato yocaxonai, hea huetsabaan, man jaa shinanyahpa rahsi jihuenon hihxon, Cristo queenai quescari man jihuenon. ⁶ Jaa shinan huestiyahpa rahsihax man jaa yohuan huestiya noquen Papa qui siribiresi yohuannon hihxon tah hen noquen Papa Dios mato yocaxonai. Noquen Hihbo Jesus Criston Papa qui bi man siribiresi yohuannon hihxon tah hen yocaxonai mato.

Judiomabo joi siri yohihi

⁷Jaa copi sirijaquin joni huetsa Johue hahnahue. Noquen Hihbo Criston mato sirijaquin Johue hahni quen maton rihbi joni huetsahon shinanxon sirijaquin Johue hahnahue. Jaatian ta Papa Dios ta hihti siri qui hihyaxihcanihqui, mato jisish. ⁸Papan raanah ta judiobo hahxoni Cristo jonishqui. Noquen xenibo hahxontijanixon Papan yohini quescabijaquin hahxoni jahui. ⁹Judiomabohon rihbi shinanxon ta Papan jato sirijaquin bichiqui. Mato judiomabo jahuen jihuetahbohax sca Hahxon tah min noque jai, Papan, jaahbo hihquish ta hahxoni Cristo jonishqui. Papan huishamani jai quescas ta jatihiqui. Judiobaan nahuabo ta siripi yohuanyaxihquiqui. Jato tocan tah hen mihqui siriresi yohuanyaxihqui. Jano tah hen mihqui behuayaxihqui hihqui jan huishani. ¹⁰Huetsa jan huishamani ta jascarihibihiqui: Papan jonibo betan jenimanahue judiomabon hihqui. ¹¹Huetsa rihbi sca: Hahxon tah min noque jai, Papan, hihnahue judiomabon. Mia tah min Quiquin Hihbo qui, Papan, hahnahue jatihibi jonibon hihqui jan huishani. ¹²Isaiasnen rihbi ta jascarihibiquin huishanishqui: Isaiasnen chini baque ta jayaxihquiqui. Jaa ta jatihibichin Quiquin Hapo hihyaxihquiqui. Jaa jato hahxonah ta sirijaquin shinanax manayaxihcanihqui, jato bichi jonon caman, hihqui Isaiasnen huishani joi janin.

¹³Papa Dios mato yocaxonquin tah hen Jaton jointi janin miin shinan hicha niaxonhue Papan hen jai. Hahan jenimati shinan hinanxonhue. Miin hahan sirijaquin shinanmati shinanbo jato hinanhue, hihti jenimahabo. Miin yoshin siripan jato hihbocahinhue, min jonon caman manati tenenon, hah tah hen jai, mato yocaxonquin.

¹⁴Man sirijaquin shinanxon joni huetsahon shinanai tah hen honanai, hea huetsabaan. Papan joi man hicha honanscai tah hen honanrihbihi. Joni huetsa yanapannoxon yohinanti man hahtipahi tah hen honanrihbihi. ¹⁵Man honanscai bi tah hen texe noquen Hihbaan joi rihbi mato shinanmanoxon hen hihtimahxonma nea joibo huishahi. Jesucriston joi mato yohinon ta Papan hea yohinishqui, judimabo jatihibi hen yohinon. Jaa copi tah hen nea huishahi. ¹⁶Papan joi mato yohihah, Dios Yoshiman rihbi mato shinan siri hinanah, noquen Hihbo qui hinamehtah matohon noquen Papa jenimanon hihxon tah hen mato jaa joi siri yohihi, heen huetsabaan.

¹⁷Jesucristonen hea yanapana tah hen Papan joi siri yohiquin sirijahi. Jascajahue Papan jaah tah hen jascajahi. ¹⁸Judiomabaan nincacoinnon hihxon heyaxon Criston hahcai tah hen mato yohitih. Heanbi shinanxon hahcai tah hen yohitimahi. ¹⁹Jahuen shinanyaxon yohixon jahuen coshiyaxon hahxon tah hen yohibonanihqui. Jahuen coshiyaxon tah hen hahan honantibojaniqui. Jahuen coshiyaxon rihbi tah hen hahan rahtetibojaniqui. Jascajaquin tah hen Dios Yoshiman coshiyaxon jahuen joi siri nincamabonaniquiqui. Jerusalem janinhax yohibonahi cahax, mayatani cahax tah hen Ilirico mai janin caman noconihqui, Criston joi siri yohijaquetancahuanax jahuex jano nocoti. ²⁰Jano tsoanbi Criston joi yohiyamahi janin yohitanpan hihquish tah hen jascaniqui, hea huetsabaan. Caibaan jato yohiscas janin tah hen yohicatsiyamahi, behna yohicatsihqui. ²¹Huishani joi jai quescas janon hihquish tah hen jascahi:

Tsoanbi jato yohiyamapahonish bi ta honanscayaxihcanihqui. Tsoan yohinoh que ma bi ta nincacoinyaxihcanihqui hihqui jaa huishani joi.

Roma jema janin cayaxahpan hihqui

²²Nenobi heen tee hashoan hichahiya tah hen mato qui cati hahtipahyamaniquiqui, hea huetsabaan. ²³Cati hahtipahyamapahonish bi neno yohiti pishinyamascaax tah hen mato sca jisi cacatsihscas. Mato jisi jahuentih ra baritian cacatsihpahonish tah hen España janin cahi caquin mato qui banejaquetahyaxihqui, huinocahinscanoxon. ²⁴Huinonoxon mato qui banejaquetahxon tah hen mato sirijaquin yohuanquinhyaxihqui. Jaa pecaho sca tah man hea yanapantih, hen caribiscan. ²⁵Jascayahnoxon tah hen rahma Jerusalem janin pari catatahbahi. Jano tah hen noquen huetsabo coriqui pishca hinani cahi. ²⁶Jerusalem janin ta texe noquen huetsabo yomanahiqui. Jaa copi ta Macedonia janinhahbo betan Acaya janinhahbaan jato yanapanti shinanxon coriqui tinguicanhoxqui, jato qui raanonoxon. ²⁷Hen yohihah ta jaabaan bi shinanxon raancaniqui. Jerusalem janinhahbaan pari jaton caibo jato qui raanah ta judiomabaan Papan shinan siri bihcannishqui. Jaa copi ta jaabaan sca copiquin sca jaton coriqui pishca raanti jaiquiqui. ²⁸Jaa pishca tah hen jato hinani cahi. Jato hinantanax tah hen España janin sca cahi caquin mato jisbahinyaxihqui. ²⁹Nocoxon, hen honanai joibo yohiquin tah hen hicha Criston shinan mato hinanyaxihqui, man hihti sirijaquin sca shinannon.

³⁰Noque jatihibi tah non Jesucristonahbo qui, hea huetsabaan. Dios Yoshiman ta noque shinanmahiqui, non joni huetsahon shinannon. Jascahananxon noquen Papa hea yocaxonnahue. ³¹Judea mai janin cahiton janohah nincayosmabaan hea tiromajayamanon hea yocaxonnahue. Coriqui hinanah sca noquen huetsabaan rihbi sirijaquin bihnon hihxon hea yocaxonribiquin. ³²Jaa pishca jato hinantanax Papa queenaiya sca hen mato qui sca canon hea yocaxonnahue. Jaatian tah non shinan hinanhananax non mato betan jenimatihi. ³³Mato rihbi tah hen yocaxonai, noquen naihoh queha Papan mato shinan hinannon mato yanapannon. Jascari rahan.

16

Jato shinanpaquexon yohihi

¹Noquen choca Febe ta mato qui nocoti cahiqui, hea huetsabaan. Cencrea jema janin jihuexon ta janoha noquen huetsabo yanapanachchihiqui. ²Criston joniboxon non Criston jonibo bihti jai quescabijaquin jaa noquen choca sirijaquin bihnahue. Jan jahua pishinihquin honanxon hinannahue, hahxonresquin. Jaan rihbi ta hicha noquen huetsabo yanapannon hea rihbi hahxonnishqui.

³Priscilaya Aquila yohixonnahue, man jascabi jayamahin hahquin. Rabechinbi ta hehbetanbi Jesucristo teexonpahonishqui. ⁴Tiromabaan jato rehtequin bi cahnenon ta hea hihti yanapanannishqui. Jaabo rabe copi tah hen jihueparihi. Jaa copi tah hen Maton tah man hea hahxonihqui hahcai. Jatihibi nenobo jai noquen huetsabaan ta jascajaquin rihbi yohihiqui judioxonna bi nincacoinaiboxon. ⁵Jaton xobo janin tsinguijaquetai noquen huetsabo rihbi yohixonnahue Man jascabi jayamahin hahquin. Heen huetsa Epeneto rihbi yohixonnahue. Jahan tah hen hihti shinanai. Jaan pari ta Acaya main jihuexon nincacoinishqui, chini sca jahuen caibaan. ⁶María rihbi yohixonnahue. Jaan ta mato hicha yanapannishqui. ⁷Andrónicoya Junias rihbi yohixonnahue. Jaabo rabe ta heen caibo qui. Heyabi tsahonahbo ta hehbetanbi sipo xobohe rabebe tsahopahonishqui. Criston raantibana ta jato honanquin sirijahiqui, hihti nincacoinaibo copi. Jaabo Cristo qui hinamehni pecaho ta hea sca hinamehniqui, jaton chiniscanon.

⁸Amplias jascajaribiquin yohixonnahue. Jahan hen shinanai tah qui, noquen Hihbaan shinanyaxon hen shinanai joni. ⁹Urbano rihbi salud yohixonnahue. Jaan rihbi ta hehbetanbi Cristo tee teexonpahonishqui. Estaquis rihbi saludanxonahue. Hahan tah hen hihti shinanai. ¹⁰Apeles rihbi salud yohixonnahue. Criston shinancoinyahpa tah qui. Aristóbulo jenábo rihbi salud hinanxonquin. ¹¹Heen caibo Herodion jascajaribiquin yohinahue. Noquen Hihbo qui hinamehtaibo Narciso baquebo rihbi yohixonnahue. ¹²Noquen choca rabe Trifenaya Trifosa salud hinanxonrihbinahue. Rabechin ta tee teexon noquen huetsabo hicha yanapannishqui. Heen choca Pérsida rihbi yohixonquin. Hahan tah hen shinanai. Jaan rihbi ta noquen Hihbo hihti tee teexonishqui. ¹³Rufo rihbi yohixonquin. Jaa ta teemis qui, noquen Hihbo teexonnica. Jahuen mama rihbi saludanxonquin. Jaa tah hen hean rihbi Maman hahcai. ¹⁴Asincrito rihbi yohixonnahue. Flegonte rihbi. Hermas rihbi. Patrobas rihbi. Hermes rihbi. Jato betan hihqui noquen huetsabo rihbi. ¹⁵Filólogo rihbi yohixonquin. Julia rihbi. Nereo rihbi. Jahuen choca rihbi. Olimpás rihbi. Jato betan hihqui noquen huetsabo rihbi, jatihibi.

¹⁶Noquen Hihbaan shinanyaxon jatihibi noquen huetsabo hicotannannahue. Nenobo tsinguijaquetanai noquen huetsabaan rihbi ta mato saludanihqui, Criston joniboxon.

¹⁷Nea tah hen matohon shinanxon hihti yohiscai, heen huetsabaan: Man join bahchinannon hihxon ta caibaan mato huetsa shinan hinanti tanayaxihqui. Cristo joi haxenihxon bi man huetsa joi sca bihnon hihxon ta mato caibaan huetsajaquin sca shinanmati tanayaxihcanihqui. Jascapahbo honanquin sirijanahue. Jascapahbohi honanxon jato yohuanquihyamascanahue. ¹⁸Jascapahbaan ta noquen Hihbo teexonyamahiqui. Jahua mato bichinpan hihxon ta mato hihbojacatsihcanihqui. Jaa copi ta siripihcamahi yohuanxon parancaniqui. Hihcainaibohi shinanxon caibaan jato chibannon hihxon ta paran parancaniqui. Jascapahbo qui coiramenahue. ¹⁹Noquen Hihbo man histon nincacoinai ta chanihahbo jatihibi janinxon honancaniqui, heen huetsabaan. Hen huishaxon mato yohihah man jascajaribiquin nincatihi tah hen honanrihbihi. Jaa copi tah hen jenimahi. Honanbohax man siripi jihuenon hihxon tah hen jenimahanan nea huishahi, tiromayosmabo man jihuenon. ²⁰Sirijaquin jihuemanicahxon ta Papan mato coshi hinannoxihqui, jamabahinquin hahcaja man janon, Satanas yosmajaquin. Noquen Hihbo Jesusen mato hicha shinan hinannon tah hen mato yocaxonai, heen huetsabaan.

²¹Nenoxon ta hehbe teenica Timoteonen Man jascabi jayamahin hahquiqui. Lucionen rihbi. Jasoman rihbi. Sosipatronen rihbi. Jaabo quimisha ta heen caibo qui, mato salud raanaibo.

²² Pablo nea huishaxonquin tah hen hean Tercio mato salud raanai, mahbe Criston shinanyahpaxon.

²³ Gayon rihbi ta salud raaniqui. Jaa ta xobo hihbo qui, jahuen xobohoxon tah non huishahi. Haho rihbi tah non neno behuahi tsiniquiaquetai.

²⁴ Erastonen rihbi ta jahuen salud mato qui raaniqui. Jaa ta nenohah agente municipal qui. Noquen huetsa Cuartonen rihbi ta salud raaniqui.

Hahxon tah min jai hihqui

²⁵⁻²⁶ Noquen Papa ta Quiquin Hihbo qui, heen huetsabaan. Jesucristo ta jihuemanicah qui hihbonahi non canon ta Papan jahuen joi siri noque hinannishqui. Neateman ta jaa joi siri Papan tsoabi honanmayamapahonishqui. Nea rahma tahni ta noque honanmanishqui, non honannon hihxon. Jahuenbihax piconihma bi jascabihi janixon ta Papan rahma tahni jahuen joi huishanicabo yohinishqui, huishahabo. Jaa huishanihbo jixxon, Papan rihbi noque honanmaha honanxon tah non honanquin sirijascai. Jatihibi jonibaan nincacoinax hinamehtax queyoyamanox sca jihuenon hihxon ta noque honanmahiqui, noquen Papan. Jaa joi siri tah hen jaayohihi. Jaa joi siri nincacoinxon man jahuentianbi potayamanon ta Papan mato coshijati hahtipahiqui, heen huetsabaan.

²⁷ Jaa huesti ta shinan Hihbo qui, honan Hihbo. Jesucristo raanxonquin ta noque hihti hahxonnishqui. Mia tah min Quiquin Hihbo qui, Papan. Hahxon tah min noque jai hahnahue jascabi sca. Jascacoin sca janon rahan.

1 CORINTO Corinto janinhahbo qui Pablonen raanni joi

Corinto qui Pablonen joi raanai

¹ ¿Papan shinanya man jascabi jayamahin, corinto jonibon? Hea tah hen Pablo qui. Jesucriston raanti joni mia jahue Papan hea janí. Noquen huetsa Sóstenes betan tah hen nea joi huishahi. ² Papan ta mato quenanishqui Jesucristo betan ta Papan mato Heen baquebaan hahquiqui. Jatihibi janinxon noquen Hihbo Jesucristo yocacaibo ta jahuen baqueba qui, jaa rihbi jaton Hihbo, noquenah rihbi. ³ ¿Jahuen shinanya man jihueyamahin? Noquen Papa Dios betan noquen Hihbo Jesucristonen shinanmaha ¿man jointi siripax jihueyamahin?

Criston noque hahxonai

⁴ Jesucristo qui man hinamehni copi ta Papan matohon shinanxon mato hihti hahxonihqui. Jaa copi tah non Hahxon tah min noque jai, Papan, hahcai. Noquen Papa yocaxon tihibi tah non jascajahi. ⁵ Mato ta hicha jahuen shinan hinanishqui, sirijaquin honanax man siripi yohuannon hihxon. Jaa copi tah hen Hahxon tah min jato jai, Papan, hahcai. ⁶ Cristo ta noquen Hihbo qui hih man janon hihxon ta jahuen shinan mato hinanishqui. ⁷ Dios Yoshiman ta mato jatihibijahti coshi hinanishqui, noquen Hihbo Jesucristo sanareneni jonon caman man mananon. ⁸ Jonoxon caman ta noquen Hihbo Jesucriston mato coshijatihiqui, nete queyotaiya mato qui jahua yohuan yamanon. ⁹ Noquen Papan ta mato jenetimahiqui. Mato ta caisnishqui, noquen Hihbo Jesucristoya man janon hihxon. Jaa jahuen baque ta noquen Hihbo qui.

Mesco shinanyahpa

¹⁰ Jahuen janen tah hen mato hihti yohihi, hea huetsabaan; huesti joiya hihnahue jatihibi. Join bahchinnanyamanahue. Huesti shinanya rihbi janahue, jaa huesti yohuanyahpabo. ¹¹ Man sinacanananai ta Cloen jonibaan hea yohhipishqui, hea huetsabaan. Jaa copi tah hen mato yohihi. ¹² Hean tah hen Pablo chibanai hih huetsa janon ta Hean tah hen Apolo chibanai hihquiqui huetsa. Hean tah hen Cefas chibanai hihqui huetsa rihbi. Hean tah hen Cristo chibanai hihqui huetsa rihbi sca. Jascapahbo tah man qui. ¹³ ¿Cristo huestima hin? ¿Hea Pablo maton hohcha copi jihuín hueoncannishquin? ¿Hea sca man chibannon mato nashimacannishquin? ¹⁴ Jahuerohajaquin tah hen heanbi mato tsoabi nashimayamaniqui. Crispo huesti, Gayo rihbi, jaa res. ¹⁵ Jaabi hen chibannon ta Pablon hea nashimanishqui hih man jamis. ¹⁶ Estefana jaabo rihbi tah hen nashimaniqui. Tsoa rihbi hen nashimaniquin hen honanai ta yamahihqui. ¹⁷ Hen nashimanon hihxonma bi joi siri hen yohinon hihxon ta Criston hea raannishqui. Hihti yohuanti honannihcamahaxma hen yohiresi canon hihxon hea raanquin, rehtehahbo noquen hohcha copi Cristo mahuani hean yohihah nincacoinax jihuetahbo.

Criston joi Papan coshi joi

¹⁸ Queyoyaxihquibaan jisi ta Cristo mahuani joi nincatima joi qui. Papan noque teehimahaibaan jisi ta jaa join jahuen shinan noque hinanishqui. ¹⁹ Papan ta huishamanishqui:

Honanaibaan honan tah hen queyobahintihí. Jaton joi honan hihqui jaabaan shinanai bi tah hen jascapa joi tiromahi jismatihí.

²⁰ ¿Honan jonibo cahran? ¿Moisesnin quirica honanbo cahran? ¿Mai meha joi bichinmisbo cahran, jahuerahnon hin? Jascapahaan ta quesajaquin honanmahiqui. Papan noque jismahah tah non honanai. ²¹ Noquen Papa ta honan qui. Honan hihxon ta Maton shinaman res hea honannahue noque jayamanishqui. Jaa copi ta jaton shinaman res mai mehakaan noquen Papa honanyamahiqui. Jaton shinaman honanyamahibaan bi ta Criston joi nincacoinaibo Papan teehimahiqui, Honanma joi tah qui honanquin hahcajahibo jai que bi.

²² Hahan honanti noque jismahue hah ta judiobaan jaiqui. Hashoan honan joi tah non queenai hah ta jaton nahuabaan jaiqui. ²³ Jascahibaan bi tah non jihuín hueonahbo Cristo mahuani joi non yohihi. Judiobaan shinanah, rahninti joi. Jaton nahuabaan shinanah, nincatima joi. ²⁴ Papan quenahibaan shinanah ta jaa joi noque nincamaxon jahuen coshiyaxon Papan noque hahxonihqui. Jan hihti honanai ta noque honanmahiqui. Judio hihxon, jaa hihyamahax jaton nahuabo hihxon tah non nincacoinxon non honanai. ²⁵ Papan joi ta hihti honan joi qui, jahuama hih mai mehakaan shinanai bi. Mai mehakaan shinan shinanax yohuanah cahen tiroma, honanma. Papan ta coshinma pishca hahxon

mai mehabo hihti mahuinihqui. ²⁶ ¿Man jenquetsahpabo jaiya Papan mato jahuen joi nincamanishquin, hea huetsabaan? Honannahue. Mai mehabaan jisi tah man honan joni hichayamahi. Patorobo rihbi tah man hichayamahi. Patoro baquebo rihbi tah man nincacoinaibo hichayamahi. ²⁷ Mai meha honanbo rabinmanoxon ta Papan noque caisnishqui, noquen non honanyamahi mai mehabaan shinanah bi. Mai meha coshibo rabinmanoxon ta coshijomabo rihbi noque caisnishqui, coshijomabohi mai mehabaan shinanah bi. ²⁸ Mai meha hanibo jahuamaboscanon hihxon ta noque jahuamabo caisnishqui. Noque jistahihmahibaan bi ta Papan noque caisnishqui, non jahuamabo que bi noque caisquin. ²⁹ Jaa copi ta Papa Dios bebonxon, non coshi hihxon hahtipahonibo non tsoanbi yohiti hahtipahyamayahiqui. ³⁰ Papan yohihah ta Criston mato hihbojanishqui. Hihbojaxon ta noque jatihibi shinan hinannishqui. Noquen hohcha rihbi ta queyoxonnishqui, jahuen baquebo sca non janon. Non jihueyaxihnon ta jaa hinamehnishqui, Jascahue Papan jaah. ³¹ Jaa copi ta huishani joi jai quescari qui: Yohicatsihxon mianbi shinanxon min hahcaima bi Papan mia hahxonai yohihue hihqui jaa huishani joi.

2

Noquen hohcha copi mahuani yohiti jai

¹ Mato janin nocoxon tah hen Papan joi mato yohicoinnihqui. ² Criston joi res yohiti ta jaiqui hihxon tah hen noque copi jan jihuini hueonahbo mahuani mato yohinihqui. Huetsa yohuan tah hen jayamaniqui. ³ Yora yosmahax raquetax tastahihqui cah hen mato tocan nihpahoni. ⁴ Jonibaan shinanax yohuani jai quescapa joi tah hen mato yohiyamanihqui. Hahan paranti yohiquinma bi tah hen Papan coshi jismaxon mato yohinihqui. Dios Yoshiman hahcai man jisnon hihxon tah hen mato yohinihqui. ⁵ Honanax yohuanaibo nincaxon man nincacoinnonma bi Papan coshin hahcai man jixxon nincacoinnon hihxon mato yohiquin.

Dios Yoshiman honanmaha non noquen Papa honanai

⁶ Yohixon tah non nincati hahtipahibo non honanmahi, hashoan honan sca jaábo. Non hinanai shinan ta mai mehabaanama qui. Jatón hapobaanamarihibi. Jaabo ta queyoti cahiqui. ⁷ Tsoan honannihma joi tah non yohihi. Papan jone joi tah qui. Jahuabi jariyamanon jaan yohini joi. Jaa joiya cahen tsoabi yamani. Jahuen shinanya non jihuenon hihxon ta Papan noque yohinishqui. ⁸ Jaa joi ta rahma jihuetai hapobaan honanyamahiqui. Honanxon cahen noquen xaba hihbo rehteyamahan. ⁹ Huishani joi jai quescas tah qui.

Beron tsoanbi jisyamanibo, pabinquinin nincayamanihbo, jointinin shinanyamanihbo, jascapahbo ta Papan noque hahxonnishqui. Noquen Papahon non queenaibo ta noque jascapahbo hinanyaxihqui

hih ta jahuen huishani joi jaiqui. ¹⁰ Jascapa joibo non honannon hihxon ta Dios Yoshiman noque honanmahiqui, Jascajahue, Papan jaah. Dios Yoshiman ta jatihibi honanihqui. Noquen shinaman non honantimahi bi ta jaan honanihqui, noquen Papan shinanyaxon.

¹¹ Noquen jointinin non shinanai ta huetsa jonin honantimahiqui. Noquen res tah non jaa honanai, noquen jointinin honanquin. Papan shinanai ta jascarihibihiqui, tsoanbi ta jaa honanyamahihqui, Dios Yoshiman res. ¹² Papan ta jahuen Yoshin siri noque hinanihqui. Mai meha yoshinma bi jahuenahbi. Jan noque yohihi non honannon hihxon cahen noque jahuen yoshin hinanquin. ¹³ Jan noque hinanai joibo tah non yohihi. Jaanbi shinanah jonibo yohuanai quescajaquinma bi Papan yoshinyaxon yohiquin. Jahuen Yoshinyahpabaan honannon hihxon tah non honanmahi, Papan joi honanahbo.

¹⁴ Jonin shinanyahpaxon res tah non Dios Yoshiman hinanai joibo honantimahi. Dios Yoshinjomaxon shinanah ta jaa joi tiroma qui. Nincatima joi. Dios Yoshinyaxon honantihi bi jayajomaxon nincacah cahen nincatima. ¹⁵ Dios Yoshiman noque hinanah tah non jahuen shinanyaxon jatihibi honanai, jan noque yohihi jatihibi. Jahuen shinanyahpabo non hihqui copi ta mai mehabaan noquen shinan honanyamahihqui. ¹⁶ Tsoanbi ta noquen Hihbo honanmati hahtipahyamahiqui. Noquen Hihbaan shinanai ta tsoanbi honanyamanishqui. Tsoan honannih que ma bi tah non Criston shinanya non jihuescai, jaan hinanah.

3

Papa hahxonaibo rahsi

¹ Papan shinanyahpabo haxemaquin quescajaquin hen mato yohipanan tah hen hahtipahyamaniqui, hea huetsabaan. Jonin shinanya quescapahbo tah man janiqui. Cristo qui hinamehtipi baquexo quescapahbo cah man jahuen shinan hichayamaparini. ² Piti

pimaquin hahcajaquinma bi tah hen chocho jene xehamaquin hahcajaquin mato honanmaniqui. Chahoma pitibo tah man piti hahtipahyamaniqui. Rahma caman rihbi tah man hahtipahyamahi. ³Jonin shinanyahpabo tah man qui. Join bahchinnanaibo tah man qui, sinacanaibo. Jascapahbo man jonin shinanyahpahax res jihueyamahin? ¿Cristo qui hinamehyamahi jonibo jai quesca man jayamahin? ⁴Hean tah hen Pablo chibanai hih huetsa janon, Hean tah hen Apolo chibanai hih man huetsa jai. ¿Jascapahax jonibaan shinanai quesca man jayamahin?

⁵¿Apolo jahua quin? ¿Hea Pablo jahua quin? Papan joni tah non qui, rabebi. Jato yohitannahue Papan jaah tah non rabechin mato yohinihqui, man nincacoionnon. Papan noque yohini quescaja tah non jai. ⁶Joi banaquin hahcajaquin tah hen mato yohinihqui. Joconsaibo jenen mehchajaquin hahcajaquin ta Apolonen sca mato yohinishqui. Banabo hanijaquin hahcajaquin ta Papan mato nincacoimanishqui. ⁷Jaa copi ta bananica jahuama qui. Mehchajanichah rihbi jahuama. Papa huestichin ta hahquiqui, hanijaquin. ⁸Bananica betan mehchajanichah ta jascapah rabe qui, hahxonnica rabe. Noquen tee jisxon ta Papan noque copijayaxihquiqui. Sirijaquin hen hahxonaiya, sirijaquin hea hahxonquin, sirijaquin huetsan hahxonaiya, jaa rihbi sirijaquin hahxonquin. ⁹Papan hahxonnica rabe tah non qui. Mato cah man jahuen huai quescapahbo, jan xobojahi quescapahbo.

¹⁰Papan hea yohini quescabijaquin tah hen xobojati honanxon xobo jihui nichinquin hahcaxon mato yohimenonihqui. Huetsan sca ta hahqui xobojacin hahcajaquin haxemahiqui. Hahqui xobojacin hahcajaquin jisnahue, sirijanoxon. ¹¹Jesucristo huesti ta hahqui xobojati quescapah qui. Xobojacin hahcajaquin ta huetsa xobo jihui tsoanbi nichinti hahtipahyamahihqui. ¹²Xobojacin hahcajaquin sca Cristo hahxonquin, ¿jahua-tohon man hahqui xobojahin, mapoyosma xobo hahcatsihxon jahuatohon man hahtihin, oron, yamin, copi macaman, jihuin, pehin, huasin? ¹³Noquen Hihbo noque bichi jahuiya sca ta non hahxonniho jenquetsahpa hin honanahbo Papan mapoyaxihquiqui. Chihin ta non hahqui xobojahi jaan tanayaxihquiqui, jenquetsahpa hin hihxon. ¹⁴Non hahqui xobojahi mapoyamahiya ta Papan noque copijayaxihquiqui. ¹⁵Noquen tee mapohiya tah non mequen sca hihtih, noquen tee yamacahini, Papa bebonbi mequen bi res noque nich.

¹⁶Mato tah man Papan xobo qui ¿man honanyamahin? Jahuen Yoshin ta maton jointi janin jihuetihqui ¿man honanyamahin? Papan xobo non tiromajahiya ta jaan rihbi noque tiromajatihiqui. ¹⁷Mato tah man jaa xobo qui. Jahuen xobo janin ta tiroma jatimahiqui.

¹⁸Paramehyamahue. ¿Mai meha shinan min hicha jai shinan min jain? Jayajoma hihresscahue, honancoinscanoxon. ¹⁹Nea mai mehabaan shinan ta honanma qui, Papan jisi. Huishani joi jai quescari: Shinanihcamahibo ta jaton shinamanbi jaan masajahiqui. ²⁰Huetsa huishani ta jaribihiqui: Honan jonibaan shinan ta jahuama qui. Papan ta jaton jointi honanihqui. ²¹Jaa copi mai mehabaan shinanai yohuan jayamanahue: jaa huesti tah hen chibanai hihyamanahue. Papan joi yohinica jatihibi tah man nincatih. ²²Hea Pablo, Apolo, Cefas, mai naman jaibo, jihueti, mahuati, rahma jaibo, jayaxihquibo, jatihibi ta matonah qui. ²³Mato rihbi tah man Cristonah qui. Cristo rihbi cahan Papanah.

4

Criston raantibaan hahxonai

¹¿Noque quescapahbo haxemanicahbo non jahua quin? Criston hahxontibo can. Tsoan nincanilha Papan joi yohixonnicahbo. Jascapahbo tah non qui, honannahue. ²Yohixonnicah ta yohiresquinma bi jahuen hihbaan yohihi quescabijaquin pontejaquin shinanti jaiqui. ³Jaa copi tah hen masa shinanyamahi. Siri hin, tiroma quin hihxon man hea jisi bi ta jahuama qui. Huetsa jonibaan hea jascajaquin jisi bi ta hea jahuama rihbi qui. ⁴Hen honanai heen tiroma ta yama qui. Jaa yamahi bi tah hen jaa copi ta Papan hea siri jisiqui hen jatimahi. Jaanbi ta siri hin, tiroma quin hihxon hea jisiqui. ⁵Jaa copi siri hin, tiroma quin hihxonma sca hea jisnahue, noquen Hihbo jonon caman. Joxon ta bahquish chian xabajaquin hahcaxon rahma jonehibo jaan jismayaxihquiqui. Jaton jointinin jonibaan shinanai shinanbo rihbi ta yohipaquexaxihquiqui. Jaatian pari ta jatihibi non siribojaniho quen jaan yohiyaxihquiqui: Sirija tah min janiqui, hahquin.

⁶Hehqui bi tah hen yohuanai, hea huetsabaan, Apolo qui rihbi, man haxenon. Papan huishani joi jai quescari man jihueti haxenon hihxon tah hen nea huishaxon mato yohihi. Huetsa haxemanicah nincacatsiyamaquin man tiromajoquin shinanax Jaa caya ta quiquin haxemanicah qui hih man jamis. ⁷Mato yohihi tah non tsoanbi non Mía caya tah min caibo mentan hashoan honan bi res qui non jayamahi. Papan mia hinanyamahah cah min jahuabi jayamahan. ¿Miabi coshixon shinan bichi quescaax sca min yohuanain, Papan mia hinnanresai bi?

⁸ Rahma rah tah man jahuabi pishinyamascai. Rahma rah tah man jatihibi jaresscai. Quiquin hapobo sca rah tah man jai, noque non jano hihyamahiya. Quiquin hapobo mato jacoinpahinon, mato betan hihxon non noquen rihbi yononon. ⁹ Hean shinanah ta noque jan raanaibo Papan chini picohihqui, noque jisxon costanahbo. Quiquin hapobo rehtenani catanxon jaton rehtetibo picoquin hahcajaquin. Jascapahbo noque. Jonibo hahqui manahitabo picohah quescsa ta noque qui. Papan yonotibaan jisnon, jonibaan rihbi jisnon. ¹⁰ Noquen Cristo joi non yohihi copi tah non honanmabo qui, maton jisi. Mato cahen honanbo, Criston shinaryahpabo copi. Noque cahen yosmabo, mato cahen coshiyahpabo, maton jisi. Noque jahuamabo, maton shinanah. Mato siribo, maton shinanah. ¹¹ Rahma caman tah non pihan hihqui. Xehan hihqui. Chopanma nichu. Rishqui rishquihahbaan bi tah non tenehi. Noque jahuerahnon hoxati yamahi. ¹² Noquen mequeman noque tee teeti. Noque qui tiromahi rainyamahibo bi noquen tenexon jato yocaxonquin. Noque tiromajahibaan bi noquen tenequin. ¹³ Noque qui tiromahi yohuanaiboya noquen sirijaquin jato yohuanquihquin. Rishtaya quescapahbo ta noque jiscaniqui. Jatihibi jonibo mentan hashoan tiromabo quescapahbo ta noque jiscaniqui.

¹⁴ Mato rabinmanoxonma bi tah hen matohon shinanxon mato pontenoxon mato jascajaquin yohihi, heen baquebaan. ¹⁵ Criston joi haxemanicahbo man hicha jai que bi tah man papa hicha yamahi. Criston jonibo sca man hihnon hihxon cahen hea huestichin mato joi siri yohinih. ¹⁶ Jaa copi tah hen mato hihti yohihi, hen hahcai quescajanahue.

¹⁷ Man jascajanon hihxon tah hen mato qui Timoteo raannihqui. Heen baque tah qui, hahan hen hihti queenai, noquen Hihbaan joi hean yohini copi cahen heen baque. Noquen Hihbaan yohihi quescajaquin ta jaan hahquiqui. Criston joi nincaxon hen hahcai joi mato yohinon hihxon tah hen raaniqui. Jatihibi janin noquen huetsabo hean yohihi quescaribiquin jaan rihbi mato yohirihbinon hihxon tah hen raannihqui. ¹⁸ Hea jari catimascari shinanah ta man caibo coshi coshihax yohuan yohuancai. ¹⁹ Noquen Hihbo queenaiya tah hen histon mato qui catihi. Nocoxon tah hen maton yohuan tanaxonma bi maton coshi hean honantihi. ²⁰ Jahuen jihuetaibo non nincamanon ta Yohuanresnahue Papan noque jayamahiqui. Noque ta jahuen coshi rihbi hinaniqui. ²¹ Shinannahue. ¿Hean mato jahuejati man queenain? ¿Caxon mato rishquiti? ¿Caxon matohon shinanxon honaxonbi yohiti? ¿Jahua man queenain?

5

Tsinihiton casticanti

¹ Caibo man joni huetsa betan tsinihi tah hen nincascau hea chanihahbo. Nincayosmabo jascaraima bi ta mato tocan jahuen mama betan huesti joni hihquiqui. ² Jatihibi honanquin hahcajahax bi tah man honanmabo jihuetai. Benatihu bi tah man benayamahi. Mato tocan jascapa hohchamis hihyamascanon potanahue. ³ Mato janin hihyamaxon bi tah hen mato betan hihxon quescaxon mato yohiscai. ⁴ Hoa jascanica copi: Noquen Hihbo Jesucristohon shinanah tsinquixon, jahuen coshiyahpaxon, hea rihbi jano hihqui hahcajaquin shinanxon, hahnahue. ⁵ Satanas res sca jaa joni hinannahue, jahuen yora rehtenon hihxon. Noquen Hihbo Jesus jahuiya jaa jonin yoshin teehiyaxahnon hihxon Satanas hinanscanahue rehtenon.

⁶ Man shinanquin hahcajahax yohuanai ta tiroma qui. Hahan paan soohihmati pishca niahah ta tonco jatihobi sca soohihtihiqui. Hohcha ta jascarihbihiqui. ¿Man honanyamahin? ⁷ Hahan soohihmati tiroma potaquin hahcajaquin janahue, soohihmahama tonco siri quescapa sca janoxon. Hohchati jihuetaibo mato tocan jayamanon jascajanahue. Noquen hohcha copi ta Cristo mahuanishqui, non hohchajomabo sca janon. ⁸ Hohchajomabo jihuenahue. Maton shinan tiromabo potanahue, behnabo sca bihnaxon. Hihcointi shinanbo bihnahue, parantima shinanbo.

⁹ Joni huetsa betan hohchataibo yohuanquihnyamanahue hah tah hen mato janiqui, quirica huishaxon. ¹⁰ Jascapahbo man yohuanquihnyamanon hen hihqui bi tah hen noquen Hihbo qui hinamehyamaparihibo yohiyamanihqui, joni huetsa betan jan hohchati hihresai bi, yohuashihtai bi, yometsohtai bi, santo qui betihhipaquetai bi. Jascapa nincayosmabo yohihi tah hen yohuanquihnyamanahue jayamanihqui. Jaabo yohuanquihnyamanoxon cah man nea mai potabahini cahan. ¹¹ Tiromahibo noquen huetsabo yohuanquihntima tah hen mato yohinihqui. Joni huetsa betan hihqui noquen huetsabo yohuanquihnyamanahue. Yohuashihtai, santoyahpabo, rainyamahahi jihuetaibo, pahen pahenaibo, yometsohtai, jascapa noquen huetsabo yohuanquihnyamanahue. Jascapahbo piquihnyamanahue. ¹² Nincacoinyamahibo casticanti tah hen mato yohiyamahi. Noquen huetsabo caya, jato pontequin casticannahue. ¹³ Nincacoinyamahibo ta Papanbi

casticanyaxihquiqui. Mato tocan hihquiton maton huetsa nincayosmabo camanahue hah ta Papan noque janishqui.

6

Noquen huetsabo non demandantimahi

¹Noquen huetsabo betan rainyamahi yohinanxon tah man nincayosmabo janin demandandi cahi. ²¿Jenquetsahaquin shinanxon man jascajahin? Noquen huetsabaan noque yohinon jato tsinquinonhue hahtihi bi tah man tininti janin demandani cahi, nincacoinai tintinti que ma bi. ³¿Papan jihuetaiboxon man jatihibi janin jaibo pontequin jihuemayaxihqui man honanyamahin? ⁴¿Jascapahbo man ponteyaxihqui bi man rahma nincacai teemabo man ponteti hahtipahyamahin? ⁵¿Papan yonotibo rihbi man pontejaquin yohiyaxihqui man honanyamahin? ⁶¿Jascapahbo pontequin yohiyaxihquiboxon non rahma nete meha teemabo non pontequin yohiti hahtipahyamahin? ⁷Noquen huetsabaan noque jistihi bi tah man jascapahbo joi romishin copi sinacananon nincayosmabo janin demandani cahi. ⁸Hen mato yohihah rabinnahue. ⁹Noquen huetsabo maanhiquinannanaiya, jato yohiti shinanya joni mato tocan yamahihquin? ¹⁰Jascatihi bi ta huetsan jahuen huetsabi demandaniqui, nincayosmabo janinxoncabi.

¹¹Demandahanannanax tah man tiromasca. ¹²¿Huetsan bichinnon jenquetsahpahi man demandanonna sca jascabi sca banenon jeneyamahin? ¹³¿Jenquetsahpahi man teneyamahin? ¹⁴Matobi tah man tiromahi. Man tah man yometsohtai, maton huetsanahbi.

¹⁵Hohchayahpabo Papan jihuemayamayaxihqui ¹⁶¿man honanyamahin? ¹⁷Paramehyamanahue. Joni huetsa betan hihquibo, santoyahpabo, queeyahpa betan hihquibo, benoyahpa haibo betan hihquibo, hahbe bebo hahmahibo, hahbe bebo hahcaibo, ¹⁸yometsohbo, yohuashihtaibo, pahenmisbo, tiromahi yohuanaibo, raquejaxon bichinaibo. Jascapahbo ta Papan jihuemayamayaxihquiqui. ¹⁹Jascapahbo tah man hihpahonihqui. Jascapahbo ta Papan mato sohuaxonnishqui. Mato ta yohinishqui, Mato tah man heen baquebo sca qui, hahquin. Noquen Hihbo Jesucristonen jahuen jimín maton hohcha copijani quen ta mato yohinishqui: Hohchajomabo sca tah man qui, hahquin. Dios Yoshiman rihbi jascajaquin. Jaa copi tah man huetsabo sca qui.

Non coirameti jai

¹Hea queenai quescajati tah hen hahtipahi. Hahtipahxon bi tah hen texe hahyamahi, jaa texe hahan noquen shinan tiromati copi. Hen queenai quescajaquin hahtipahax bi tah hen jahuatohon bi hea hihbojati hea queenyamahi. ²Piti ta piti qui. Noquen poco rihbi ta hahqui piti naneti qui. Rabebi ta Papan queyoyaxihquiqui. Noquen yora ta joni huetsa betan hahan tsinitima qui. Noquen Hihbaanah sca tah qui, jaan hihbojati. Noquen Hihbo cahen noquen yora hihbo. ³Noquen Hihbo huenihihninixon ta noquen yora rihbi jahuen shinaman Papan hueniyaxihquiqui.

⁴Maton yora ta Cristonah qui. ⁵¿Man honanyamahin? ⁶¿Criston yora bihxon hahresti haibo hen hinantihin? ⁷Jahuentianbi. ⁸Hahresti haibo betan hihqui joni ta hahbetan huesti yora sca qui. ⁹¿Man honanyamahin? ¹⁰Jaabo rabe ta huesti yora sca qui, hih ta huishani joi jaiqui. ¹¹Noquen Hihbo betan hihqui joni ta hahbetan huesti yoshin sca jaiqui.

¹²Tsiniti qui raquenahue. Huetsa hohcha jatihibi ta noquen yora qui hahcama qui. Tsini joni ta jahuen yora qui bi hohchatihqui. ¹³Mato ta jahuen yoshin Papan hinannishqui. Maton yora chicho ta jahuen yoshin mato manahihqui. Maton yora ta jahuen xobo qui ¹⁴¿man honanyamahin? ¹⁵Matonahma sca ta maton yora qui. ¹⁶Copijaxon ta mato bihnishqui. Jaa copi noquen Papa queenai quesca man jihuetai honanahbo hihquish jihuenahue, ponte res.

7

Noquen hihquihinti betan jihuetai

¹Quirica huishaquin man hea yocaho joi sca tah hen mato yohihi. Bebaan haibo bihyamaha ta siri qui. ²Jaabi queejomahax man hohchati queenmis copi queeyahpascanahue. ³Jatihibi haibo rihbi beneyahpascanahue. ⁴Haiboyahpahax miin haibo qui hinamehhue, huetsan. ⁵Mia rihbi miin bene qui hinamehhue, chocan. ⁶Beneyahpahax tah min mihri miin yora hihboyamahi. Miin benen ta miin yora hihbojahiqui. ⁷Mia rihbi tah min mihri miin yora hihboyamahi, huetsan. ⁸Miin haibo ta miin yora hihbohiqui. ⁹Miin bene haibo queenaiya, Hen ta queenyamahi, hihiyahue, chocan. ¹⁰Miin haibo bebo queenaiya, Hen ta queenyamahi hihiyahue, huetsan. ¹¹Papa hihti yocanoxon jatih nete hihiyahaparinnonhue hihqui rabexonbi shinanax pari jascanahue, basima. ¹²Jaa pecaho rabebi hihresscaribih. Maton hihquihinti betan hihiyahahiton Satanasnen mato hohchamamis hihquish, jascanahue.

⁶ Maton hihquihinti hoxaquiñnyamanahue hah ta hen mato jayamahi. Hen mato yohihi quescajati queenaibo res jascanon. ⁷ Hea hihqui quescamantat jatihibi japahinon. Jaabi ta Papan hinanihqui, hihquihintiyahpabo janon, jayajomabo jaribinon. Huetsan ta jahuenta bichiqui. Huetsan rihbi jahuenah.

⁸ Queejomaboya yononmabo sca tah hen yohihi: hea hihqui quescari hihquish tah man siripi jihuetihi. ⁹ Jaabi, teneti hahtipahyamaxon maton haibo benanahue heen huetsabaan, maton bene rihbi heen chocabaan. Hisinaxcamahi haibo hihti queenah ta tiroma qui. Jaa tiromahi bi ta matonahbi maton haibo bichi siri qui.

¹⁰ Queeyahpaboya beneyahpabo sca tah hen yohihi, heen joima bi Papan joi yohiquin. Beneyahpaxon miin bene potayamahue, chocan. ¹¹ Miin bene potahax huetsa bebo betan hihyamascahue. Bebo queenax miin bene xeni betan hihribihue. Mian rihbi miin haibo potayamahue, huetsan.

¹² Texe tah hen yohihi. Noquen Hihbaanma bi hean. Nincacoinyamahax bi mihbetan jihuetaiton miin haibo potayamahue, noque huetsan. ¹³ Miin bene rihbi nincacoinyamahax bi mihbetan jihuetaiton potayamahue, chocan. ¹⁴ Min nincacoinai copi ta Papan miin bene shinan hinantihiqui. Min nincacoinai copi rihbi ta miin nincacoinyamahi haibo Papan shinan hinantihiqui, noque huetsan. Jasca copi ta maton baquebo rihbi shinan siri hinantihiqui. Jascayamahah cahen maton baquebaan Papan shinan siri bihyamahah. ¹⁵ ¿Nincayosma beban jahuen haibo potabahinaiya cahran? Cacatsihquish jan catannon. Jascapahton potahah ta jahuen haibaan chibantima sca jaiqui, queenyamaxon. Jasca rihbi nincayosma haibaan noquen huetsa potahax cacatsihquish, jan catannon, jahuen bene chibantimascái. Non maanhiquinanaxma jihuennon ta noque Papan yohinishqui. ¹⁶ Mia copi rah ta miin benen nincacointihiqui, chocan. Mia copi rihbi rah ta miin haibaan nincacointihiqui, huetsan.

¹⁷ Noquen Hihbaan mia hinanai betan jihuehue. Hahbetan jihuexon nincacoinscaax hahbetanbi jihuehue. Jascaja tah hen jai, jatihibi janin Papan baquebo jihueti yohiquin. ¹⁸ ¿Hahan judio honantiyahpa hihxon min nincacoin sca janiquin? Jaa hahan judio honanti potaquin tanayamahue. ¿Jaa honantiyahpajomaxon min nincacoin sca janiquin? Jaa honantiyahpati queenyamahue. ¹⁹ Jaya hihqui ta jahuama qui. Jayajoma hihqui jahuamaribihí. Papan joi res tah non nincati jai. ²⁰ ¿Jahua jonixon min nincacoinnihquin? Jaa noquebo rihbi jascabi jahue. ²¹ ¿Patoronen joni hihxon min nincacoin sca janiquin? Jasca rihbi jahue. Jascapa jonihax bi miin cuenta copijati hahtipahax patorojoma sca jihuehue. ²² Hina hihxon bi noquen Hihbo nincacoinscaax tah min hina hihyama sca jai, noquen Hihbaan picohah. Jasca rihbi patorojomaxon bi nincacoinax tah min Criston joni sca qui. ²³ Copijaxon ta mato bihnishqui. Jonibaan mato hihbojayamanon jato qui hinamehyamanahue. ²⁴ Nincacoinax man jani quescari janahue, heen huetsabaan, Papan yanapanah.

²⁵ Benejomabo sca tah hen yohihi. Noquen Hihbaan yohini joi mato yohiti yamahi bi tah hen noquen Hihbaan yanapana shinanquin sirijaxon hean mato yohihi. ²⁶ Noque rahma tiromajacatsihquibo copi ta man rahma jai quescari jascabi jaah siri qui. ²⁷ ¿Mia queeyahpa hin? Miin haibo jenetí shinaryamahue. ¿Mia queejoma hin? Haibo benayamahue. ²⁸ Jaabi tah min haibo bichish hohchayamahi. Haibo rihbi jahuen bene betan hihquish hohchayamahi. Hohchataxma bi tah man hohmis hohmistihí. Jaa copi tah hen mato yohihi.

²⁹ Basimahax res sca ta tiroma netebo nocotihiqui hih ta hen jai, hea huetsabaan. Jaa copi haiboyahpahax bi haibojoma quescapahax jihuenahue. ³⁰ Benataibo benayamahax quescapi jihuenahue. Coin coinaibo coin coinyamahax quescapi jihuenahue. Marohibo maton jahuabora yamahihcamahi jihuenahue. ³¹ Teeyahpabo tee yamahi quescapi jihuenahue. Noquen hihti quescayama sca tah non jatihí.

³² Man masa shinaryamanon hihxon tah hen mato yohihi. Queejoma jonin ta noquen Hihbaan joi shinanihqui. Noquen Hihbaan yohihi quescabijati shinanquin. ³³ Queeyahpa jonin ta jahuen teebo rahma hahti shinanihqui, bihxona jahuen haibo jenimanon hihxon. ³⁴ Noquen Hihbo huesti janin ta jahuen shinan camayamahihqui. Xontaconen ta noquen Hihbaan yohihi quescabijati shinanihqui. Benejoma haibaan jascajaribiquin. Jaton yora jaton shinan rihbi mequejaquehcatsihqui. Beneyahpa haibaan ta jahuen teebo hahti shinanihqui, jahuen bene jenimanon hihxon.

³⁵ Maton hihquihintibo man jenenonma bi man honannon hihxon tah hen mato yohihi. Man sirijaquin shinannon hihxon tah hen yohihi, noquen Hihbo huesti man shinannon hihxon.

³⁶ Min hinanah bi jahuen benejahtinin bihyamatatabahi miin haibo baque yoxabocatsihscái jixxon hinancatsihquin hinanhue queenxon. Hinanah ta tiromama qui. ³⁷ Jahua copi hinanti yamahaia, shinanquin sirijaxon hinanyamati queenxon rihbi haibo rihbi

huanoti queenyamahiya miin baque xontaco hinanyamahue. Hinanyamahah ta hashoan siri qui. ³⁸ Miin haibo baque hinanah siri. Hinanyamahah hashoan siri rihbi.

³⁹ Jahuen bene mahuanon caman ta jahuen haibo hahbetan hihti jaiqui. Jahuen bene mahuataya huetsa bebo bihtiscái. Nincacoinai bebo res ta bihtihiqui. ⁴⁰ Jaabi ta yononma banetah hashoan siri qui, hen mato yohihah quesca. Dios Yoshiman hea shinanmaha tah hen yohihi, hih tah hen jai.

8

Santo rehtexona nami non pitihin

¹ ¿Santo rehtexona hina nami cahran? ¿Non pitihin? Non tah non honanai, hih tah non jai jatihibi. Non tah non honanai hihxon tah non shinan hichajaquin bi quesajahi. Huetsa jonihon shinaxon hahxonquin tah non noquen shinan hichajacoinai. ² Honan tah hen qui, hihxon tah min honanyamatabahi, honantihí bi. ³ Papahon min shinanaiton ta jaan mia honanscaiqui.

⁴ Jaa copi tah hen mato yohihi: ¿Santo rehtexonai nami non pitihin? Santo ta jahuabima qui. Papa huesti ta Dios qui. Non tah non honanai. ⁵ Dios hahcaibo ta jaiqui, naihoh, main rihbi. Jascapa diosbo hichahi. Hihbo hahcaibo rihbi ta jascari qui, hichahi. ⁶ Noquenah ta huesti res qui, Dios, noquen Papa. Jaan shinanah cahen jatihibi jai. Jatihibi tah non jahuenahbo qui. Noquen Hihbo rihbi cahen huesti res, Jesucristo. Jaan yohihah cahen jatihibi janish. Jaan jihuemaha cahen noque jihueti.

⁷ Jaa hen mato yohihi ta caibaan honanyamahihiqui. Jano santo jaiton haninihxon ta Santo rehtexonaibo nami tah qui, hihxon bi caibaan pihiqui. Pitimahi shinanax, Hohcha ta hen jai, hihresscái, pihax sca. ⁸ Pitimabo pihax tah man hohchayahpa qui hah ta Papan noque jayamahiqui. Pitimabo piyamahax tah man siribo qui hah ta Papan noque jayamaribihiqui. Jascapa nami piyamahax bi tah non jascabi jai. Pihax cahen jascarihibi. ⁹ Queenxon piquin. Queenyamaxon piyamaquin. Pixon bi coirannahue, noquen huetsa man tiromamamis. Man pihi jixson ta jaan rihbi sca pihax jaan shinana pitima que bi pihax hohcha tah hen jai hihquish noquen Hihbo betan siripi nihyamascatihiqui. Pixon cahen masa shinanscaquin. ¹⁰ Santobo ta jahuama qui hihxon mian santo xoboho pihi tsa-hotai bi mia jano meraxon ¿santo rehtexonaibo pitima hean rihbi pipan jan jatimahiquin? ¹¹ Jascahah ta mian pihi jixson jahuen pitima pihax noquen huetsa masatihiqui, jahuen hohcha copi Cristo mahuaní que bi. ¹² Jascajati que ma bi tah min jascajaquin miin huetsa jahuen pitima queenmatihi, rishquihah quescajaquin jan masa shinanscanon. Jaan pitima que bi piti shinan hinani tah min hahqui hohchatai. Cristo qui rihbi hohchatai. ¹³ Jaa copi tah hen Hea jixson ta heen huetsan noquen Hihbo jenebahintihiqui hihxon hean jahuaianbi nami piyamahi. Jascapahbo piti hahtipahxon bi cahen hean piyamaquin, heen huetsa hean hohchamamis hihxon.

9

Papan raantibaan yocati hahtipahibo

¹ Hahtipahxon bi tah hen piyamahi. Shinannahue: hea tah hen Criston raanti joni qui. Noquen Hihbo Jesus tah hen heanbi jisniqui. Hean yohihah tah man noquen Hihbo qui hinamehniqui, jahuen baquebo sca. ² Hea jahuen raanti man honanai bi ta caibaan honanyamahiqui. Mato tah man hahan honanti qui, noquen Hihbaan raanti hea hihqui honanahbo.

³ Jaama tah min qui hihnicahbo tah hen yohihi, nescajaquin: ⁴ Nincacaibaan mato pimanon, mato xehamanon, ¿heen joi jato yohitannahue noquen Hihbaan hea jayamanishquin? ⁵ Huetsa jahuen raantibo hihqui quescari, noquen Hihbaan jochicabo hihqui quescarihibi, Cefas rihbi hihqui quescarihibi ¿non noquen haibo betan nihti hahtipahyamahin? ⁶ ¿Hea, Bernabe, noque rabe res non tee teexon pari piti noquen Hihbaan noque yohinishquin? ¿Man jascajaquin shinanain? ⁷ ¿Copijaha ma bi tsoa sontarohi catihiquin? ¿Jahuen bimi piyanoxonma bi tsoan huaijahiquin? ¿Jaton xoma jene pishca bihyamahue hahca tsoan sca ganado coirantihiquin? ⁸ Heanbi shinanax yohuanai shinan rah tah man jai. ¿Noquen Moisesnin joi janin jascapa yohuan yamahihquin? ⁹ Moisesnin ta huishanishqui: Xehmemanoxon bana bero jamamaquin miin toro cotaneyamahue, hahquin. ¿Torohon shinaxon Papan jascajanishquin? ¹⁰ ¿Noquen non honannon hihxon res yohiyamanishquin? Non honannon hihxon ta huishamanishqui. Huai bananica ta yohinishqui, bimi piyanoxon jan huaijanon. Bimi tsinquinica rihbi ta yohinishqui texe piyanoxon jan tsinquinon. ¹¹ Banaquin hahcajaquin non mato Papan joi hinannihxon ¿bimi tsinquiquin hahcajaxon sca texe maton tee non bihtimahin? ¹² Jascajati ta jaiqui. Texe maton tee bihti caibo jaiya ¿noquen sca non hashoan sca bihtimahin?

Noquen bihti jai bi tah non maton tee bihyamahi. Bihti hahtipahxon bi tah non non bichiya caibaan nincacoinyamamis hihxon non jatihibi teneresai. ¹³ Papan xoboho teexonaibaan ta janoha piti pihiqui ¿man honanyamahin? Papan hinanquin hinabo rehtexonquin yanapanabaan rihbi ta jaa hina nami pihiqui ¿man honanyamahin? ¹⁴ Jascajaribiquin ta jahuen joi siri non mato yohihah man jai romishin man noque hinanti noquen Hihbaan yohinishqui, non hahan jihuenon. ¹⁵ Papan joi mato yohinixon bi tah hen mato cobranyamahi. Jahuabi cobranyamanoxon rihbi tah hen rahma huishahi. Mahuanoxon caman tah hen jahuabi copi yocayamahi, Papan joi mato yohiquin tah hen mato cobranyamanihqui mato jayanoxon.

¹⁶ Papan joi siri yohinish bi tah hen Papa bebon sca jahua copi yohuan yohuanti yamatihi, hen hahnibo yohicatsihquin. Papan yonohah tah hen joi siri yohihi. Jaa copi tah hen Papan joi siri yohiyamahax Hahraai hih hen jatihihi. ¹⁷ Heabi yohiti queenxon joi siri hen yohihiya ta Papan hea copijatihiqui. Yohiti queenyamaxon bi cahen jaabi yohihan, yonohah copi. Papan yonohah can. ¹⁸ ¿Yohihax res sca hen jahua jain? Yohixon tah hen nea honan jai. Cobrantih bi cobranxonma hean yohihi tah hen honanai.

¹⁹ Mato jatihibi cobranti hahtipahxon bi tah hen jatihibi joni hahxonresai. Hashoan hicha jonibo nincamanoxon hahxonresquin. ²⁰ Judiobo nincamanoxon tah hen jato tocan judiobo quessa sca jai. Moisesnin huishani joiyahpabo nincamanoxon jato tocan jaa joi hahnica quessa sca jai, hean nincati joi que ma bi. ²¹ Moisesnin huishani joi honanyamahibo nincamanoxon cahen jato tocan jaa joiyoma quessa sca jai, noquen nincati Papan joi hahnica hihquish, Criston joi hahnica hihbi hihquish. ²² Coshjomabo nincamanoxon tah hen jato tocan coshijoma quessa sca jai. Jatihibi jonibo nincamanon cahen jaabo hihqui quescarihibi hea rihbi jai. Caibo teehihmanoxon tah hen jascajahi. ²³ Criston joi siri nincamanoxon copi res tah hen caibo hihqui quessa hea jai, Cristo betan teenica sca janoxon.

²⁴ Tsoa pari non nocotihin hihquish ta bishquihihnicahbo hishtohihqui. Jatihibi hishtocanahax bi huesti res nocomenohi, nocomenonicon maiti bihnoxon. ¿Man honanyamahin? Nocomenonoxon hahcajaquin janahue. ²⁵ Jaton coshi tananannicahbo ta yobacahinxon jatihibi teneti haxehihqui. Payonica jahuabora bihnoxon ta teneti haxecaniqui. Noquen cah non payoyosma jahuabora bihnoxon non tenetih. ²⁶ Ponte res hishtocanahihcama tah hen jai. Nihue res rishquiquin hahcajayama tah hen jai. ²⁷ Teneti haxenoxon tah hen heabi rishquitai, hean shinanai quescajati hahtipahnoxon. Caibo hean Papan joi siri nincamanish bi potabohanah sca hen jamis hihquish tah hen jascaquin teneti haxehi.

10

Santo qui non coirameti jai

¹ Honannahue, hea huetsabaan. Noquen xenibo ta jatihibi hoa nai cohin naman nihpahonishqui. Hian joshini rihbi ta jatihibi pohquejaquenishqui. ² Moises chibanahbo hihxon ta Papan jato nashimaquin hahcajaquin nai cohin naman jascajaquin huinomanishqui. Jascajahabo jaa hiaman jato pohquenquin. ³ Papan hinana piti ta jatihixonbi picannishqui. ⁴ Jaan hinanah cahen jene nomicanquin. Papan bahimahah macaman mehax jabatai jene xehacanquin. Cristo ta jaa macan hihnishqui. ⁵ Jato xehamaxon bi ta Papan jato tiromabohi jisnishqui. Jaa copi ta jato mahuamabahinnishqui nihi naman.

⁶ Noquen non honannon hihxon ta jascaxon Papan huishamascanishqui, jaabo tiromajati jenipahihni quescayamahi non tiromajati jenipahihyamanon hihxon. ⁷ Jato yohihi ta nescajaquin huishanishqui: Pihhi ta jonibo tsahopaquetihqui, xehahi tsahocani. Pihax ta shirohi sca huenicahuancaniqui hahquin. Jaabo jascari santoyahpa japahoni quescayamanahue. ⁸ Joni huetsa betan tsinihi hihniho quescayamanahue. Joni huetsa betan hihquish ta huesti neten res veintitres mil mahuanishqui. ⁹ Hihcoin cahra jaiquin hihxon noquen Hihbo tanahax ta mahuaribicanishqui, ronon pihah. Noquen Hihbo tananibho quescayamanahue hih ca hen jai sen. ¹⁰ Reren rerenaiton ta queyonicon jato queyonishqui. Reren rerennihbo quescayamanahue.

¹¹ Non jascari hohchayamanon hihxon ta Papan jato jascajaquin casticannishqui. Nete queyoti hochoma noque chini jihuetaibaan honannon hihxon ta jaa joi huishamanishqui. ¹² Jaa copi coiramehue: ponte min nichu shinanax bi min hohcha qui paquemis. ¹³ Jatihibi jonibo jan tanahi quescajaribiquin ta tiroma yoshiman mato hohchamaquin tanahihqui. Jan mato jascajahi bi ta tsoan tenenihma Papan mato huinomatimahiqui. Jaan yohini quescabijaquin ta mato hahxonihqui, mato paxajaquin. Man tenecasquimati ta mato huinomayamahiqui. Tanahah bi man tantiribiti ta mato hinantihiqui, man teneti hahtipahnon hihxon.

¹⁴ Jaa honanax sca santo yocati ni shinanti bocabi queenyama sca janahue, hea huetsabaan. Hihti queenyamanahue. Matohon shinanxon tah hen yohihi. ¹⁵ Mato tah man shinancoinaibo qui. Hen yohihi ¿jenquetsahpa quin? shinannahue. ¹⁶ Criston noque haxemani quescajaquin tah non Mia copi tah non xehahi, Hihbon hahxon non xehahi. ¿Noque copi Cristo mahuanih shinanaibo rahsixon non jascajaquin xehayamahin? Non tehcxon hinanpaquehi paan ta jascapah rihbi qui. Noque copi jan yorayahpahax mahuati joní honancoinaibo rahsixon tah non jascapa pihi. ¹⁷ Huesti tonco tehcapaquexon tah non jatihixonbi pihi. Jascarihibihi ta noque hichahax bi huesti yora qui, huesti piti tonco jai quescarihibihi.

¹⁸ Moisesnin yohihah israelibaan hahcai sca shinannahue: Papa Dios hinanquin ta jaton hina pishca rehtexon picanihqui. Jaton hohcha copi jaton hina mahuatai hihxon cahen picanquin, jaton hina betan huesti yora hihnoxon. ¹⁹ Hen yohihi jahua hihcatsihquiquin honannahue. Santobo ta jahuama qui. Santo rehtexonaibo ta jahuama rihbi qui, nami res. ²⁰ Jascapahbo jahuamabo que bi ta tiroma yoshinbo rehtexonquin hihxon Cristo qui hinamehyamahibaan jaa nami pihiqui. Jascapa piti ta noquen Papanahma qui. Tiroma yoshinbaan jonibo quescapahbo man hihyamanon hihxon tah hen mato yohihi. ²¹ Papan xehati hexahon tah man tiroma yoshinbaana rihbi xehatimascái. Papan piti pixon tah man tiroma yoshinbaana rihbi pitima sca jai. ²² ¿Noquen Hihbo non sinamacatsihquin? ¿Noque non jaa mentan hashoan coshi quin? Shinannahue.

Joni huetsahon shinanax coirameti

²³ Queenxon piti hahtipahxon bi tah non caibo piti non piyamahi, jaa pihá siriyamahi quen. Non queenajati hahtipahxon bi cah non joni huetsa tiromajati queentimahi. ²⁴ Mia res siripi jihuenoxonma bi caibo sirinon hihxon jise.

²⁵ Nami maroxon yocacaxxonma pireshue, santo rehtexonaibo hin hihxonma. ²⁶ Noquen nete jatihibi ta noquen Hihbaanah qui. Jatihibi main jaibo rihbi jahuenah.

²⁷ Nincacoinyamahibaan mato Pihi benahue hahca picatsihquish botannahue, mato hinanai piti jatihibi yocacaxxonma piresquin. Santo rehtexonaiboma hin hihxonma. ²⁸ Nea ta santo rehtexona nami qui, noque huetsan, jaiboya piyamascaquin. Jaa noquen huetsa copi piyamaquin, jan masa shinanmis hihxon. ²⁹ Mianbi min jaa nami pixon masa shinanyamahi bi mian piquihina noquen huetsan masa shinanmis hihxon piyamaquin.

Jascapa nami jaan pitimahi copi tah non piquin jeneyamahi. Non piquihina jascapa pihax jaa hohchatai copi tah non jenetihi, piyamascaquin. ³⁰ Mia copi tah hen pihi Papan hihxon hean res pihiya ta jahua copibi huetsa hehqui yohuantimascatihiqui, Papan hea hinanai piti quen. ³¹ Jaa copi piquin, xehaquin, man hahcai jatihibi jaquin, noquen Papa hihti shinanyahpa hi honanahbo janahue, jatihibi. ³² Jahua copi bi mato caheti yamanon janahue, judiobaan jisí hahqui yohuantimabo. Jaton nahuabaan jisí jasca rihbi. Papan caisai noquen huetsabaan jisí jasca rihbi. ³³ Jatihibijaquin tah hen jatihibi jonibaan sirijaquin shinanahbo hihxon hen hahcai. Hea res siripi jihuenoxonma bi caibo siripi jihuenon hihxon tah hen hahcai, hicha jonibo Papan teehihmanon hihxon.

11

¹ Criston hahcai quescajaquin tah hen jascajahi. Jascajaribiquin hean hahcai quescajanahue.

Tsinquitaibo tocan jenquetsi haibobo jai

² Hen mato yohini joi tah man shinanbehnoyamahi. Jaa copi tah hen jenimahi. Hean mato honanmapahoni quescaja tah man jai rahma caman. ³ Man jascajahi bi tah hen nea yohiscaí, man honannon hihxon: jatihibi bebo yononica ta Cristo qui. Haibaan yononica ta jahuen bene qui. Criston yononica ta noquen Papa qui. ⁴ Rabinnoxon pari ta bebaan maiti maihahnan Papa yocatihiqui, jahuen mapo qui hihtimahscái, haibocatsihqui quescari. ⁵ Haibaan cahen jahuen mapo mahpoxonma bi Papa yocacax jahuen mapo qui rabiniti jai, bebaan hahcajaquin yocacax. Mahpoxonma Papan joi yohihax cahen haibo hahqui rabinti jarescaí, mamapoxonma yohihax. Maxcorohaquin mancojabahina quescaha tah qui. ⁶ Mahpocatsihyamaxon min boo maxcorohabahinmahue, haibon. ¿Haibo mancoyati hihtimahtimahiquin? ¿Haibo maxcoroyati hihtimatimahiquin? Mancoya quescayamanoxon mahpóhue, haibon. ⁷ Bebo ta mahpotimahiqui. Bebo ta jaa jisxon Papa Dios jahuen hihbo jai shinanti qui. Jaa jisxon tah non Papan shinan noquen honanai. Haibo ta jaa jisxon jahuen benen jaa hihbojahi non honanti qui. ⁸ Haibaan pishi xao ta Papan bebojaysamishqui. Bebaan pishi xao cahen haibojanish. ⁹ Haibaan bihnon cahen bebojaysamish. Bebaan bihnon caya haibojaquin. ¹⁰ Jaa copi ta haibo mahpoti jaiqui, hihboyahpahi honanahbo. Papan yonotibaan rihbi siri jisnon. ¹¹ Haibo mahpónica hihquish bi ta bebo hihqui quescari qui, hahbe shinanyahpa. Bebo jascarihibihi, haibo

hihqui quescari, hahbe shinanyahpa. ¹² Bebaan pishi xao ta haibojanishqui. Jascarihibihi cahen haibo quehax sca bebo cainscai. Jatihibi caini, Papan shinanaiya.

¹³ Yocacahananscanahue joni huetsa shinanmanoxon hihxon ¿Mahpoxonma haibaan noquen Papa yocacah siri quin? ¹⁴⁻¹⁵ Boo chaiya bebo rabintihí bi haibo boo chaiya siri, ¿maton shinamanbi man honanyamahin? Jahuen boo ta jahuen mahpoti qui, Papan hinanah. ¹⁶ Huetsa shinanyaxon honanhue: huetsa noquen hihti joi tah non yamahi. Huetsa jaton hihti ta noquen huetsabo rihbi yamahihqui.

Piquin bi tiromajahibo

¹⁷ Huetsa joi sca hen mato yohinon. Sirija tah man jai hah ta hen mato jayamahi. Shinan bihnoxonma tah man tsinquitai. Tiromacananoxon can. ¹⁸ Noquen Hihbohon shinanax man tsinquitax caibo huetsa shinanya hihnon caibo rihbi huetsa shinanya man jai tah hen nincacai. Jasca coin rah tah man jai. ¹⁹ Jahuemehabaan sirijaquin shinanihquin honanahbo rah tah man jascari joi bichinnanai. ²⁰ Jaa copi tah man piquin bi noquen Hihbaan noque yohini quescajaquinma man pihí, tsinquixon. ²¹ Picatsihxon tah man joni huetsa manaxonma matonahbi man piresai. Huetsa pihan hihnon ta huetsa pahenihqui. ²² ¿Jiricatsihxon picatsihxon hahoxon piti xobo man yamahin? ¿Papan caisaibo jistahihmaxon man pitijomabo rabinmahin? ¿Jahua hen mato yohitihin: Sirija tah man jai hah hen jatihin? Hahyamabiresquin.

Noquen Hihbaan noque yohini piti

(Mt 26.26-29; Mr 14.22-25; Lc 22.14-20)

²³ Noquen Hihbaan yohihah ta hean sca mato yohinihqui, jaabi rihbi. Judasen jaa paranxon porisia bihmanoxihqui yame ta noquen Hihbo Jesusen jahuen haxenicabo yohinishqui. ²⁴ Posen pari bihxon Papa yohixon tehaxon, Nea ta heen yora qui. Man jihuenon hihxon tah hen hehri jato rehtemahi. Hea shinanon pinahue, hah cahen jato janish. ²⁵ Jaabijahiboya sca tason bihxon jascarihibiquin. Behna sca tah hen mato hahxontijaquin yohihi. Jahuentianbi hen huetsajatimahi honanahbo tah hen heen jimi potahi. Heen jimi shinanti ta nea xehati qui, xehanahue. Man xehahi tian tihibi jascajanahue, hea shinanon, jato jaquin. ²⁶ Jahuen piti pixon jahuen xehati rihbi xehaxon tihibi tah man jismahi, mato copi maton Hihbo mahuani jisíbo. Jan jonon caman jascajaquin jismanahue.

Jenquetsahaquin non pitihin

²⁷ Jaa copi ta shinanyamaxon man noquen Hihbaan piti piresxon jahuen xehati rihbi man xeharesah tiroma qui, noque huetsan. Noquen Hihbaan yora jahuen jimi rihbi cah man jahuama quescajahi. ²⁸ Shinanquin sirijaxon jaa piti pihue, jaa xehati rihbi xehaquin. ²⁹ Pixon xehaxon bi Criston yora copi man pihí shinanyamaxon tah man Papan mato tiromajanon man jai. ³⁰ Jaa copi tah man hicha yora yosmahí, caibo rihbi hisini. Caibo rihbi cahen mahuascaibo. ³¹ Noquebi non pontejananaiya cahen noquen Hihbaan noque casticanyamahan. ³² Noque pontequin ta noquen Hihbaan noque casticaniqui, mai mehabyabi noque casticanyamayaxahnnoxon.

³³ Jaa copi pihí tsinquitax manahahnannahue, heen huetsabaan. ³⁴ Pihan hihxon maton xobohoxon pari pihí yaninahue. Tsinquixon sca piquin sirijaquin. Tiromahiton noquen Hihbaan mato casticannis hihxon tah hen mato yohihi, hea huetsabaan. Texe man hea yocahoh tah hen mato qui nocoxon sca yohitihí.

12

Dios Yoshiman noque hinanai shinan

¹ Dios Yoshiman noque hinanresai sca tah hen mato yohicatsihqui, heen huetsabaan, man honannon hihxon.

² Maton tah man noquen Papa honanyamapahonihqui. Jenquetsaha ra jaquin mato paranquin ta maton caibaan mato haxemacanihqui, yohuanyosma santobo man yocanon. ³ Jaa copi tah hen mato yohihi: Jesus Diosen queyopahinon hih ta tsoabi jatimahiqui, Dios Yoshiman shinanmahah. Man honannon hihxon tah hen mato yohihi. Dios Yoshiman shinanmayamahah ta Jesus ta noquen Hihbo qui hih tsoabi rihbi jatimahiqui.

⁴ Jaa huesti Dios Yoshin hihxon ta mesco shinan siribo noque hinanpaquehíhqui. ⁵ Mesco tee rihbi non jai bi tah non jatihibi jaa Hihbo huestiya qui. ⁶ Mesco teebo non hahnon ta jaa huestichin noquen Papan noque mesco coshi hinanpaquehíhqui, non jatihibijanon. ⁷ Non joni huetsa coshijanon ta jahuen shinan Dios Yoshiman noque hinanpaquehíhqui. ⁸ Shinanyahpahax yohuannon ta caibo rihbi jaa shinan hinanihqui. Honan joi yohinon ta caibo rihbi jaa honan hinanihqui, jaanbi. ⁹ Shinancoinxon Papa Dios yocanon cahen caibo sca shinancoinxon yocati shinanbo rihbi hinanquin. Caibo rihbi sca joni huetsa rohajati

hinanquin. ¹⁰ Caibo rihbi sca hinanquin, tsoan jascajani que ma bi Papan coshiyaxon hahti. Caibo rihbi sca hinanquin, Papan yohihi joi chaniti. Caibo rihbi sca honan hinanquin, jan merahi jenquetsahpa yoshin hin honanti. Caibo rihbi sca hinanquin, huetsa join yohuanti. Caibo rihbi sca hinanquin, nincacahbo yohuanxon mahnexonti honanti. ¹¹ Jascapahbo mesco hahxontibo ta jaanbi noque shinanmahiqui, Dios Yoshin huestichin. Jaanbi shinanxon ta noque hinanpaquehiqui.

Jahuenahbo rahsi non hihqui

¹² Noquen yora huestihax bi ta noquen mequenbo, noquen tahebo huestima qui. Jascarihibi cahen noquen tahebo noquen mequenbo hichahax bi noquenah rahsi hihqui quescaarihbihi noque jai, Cristonahbo rahsi. Noque cahen jahuen tahebo, jahuen mequenbo quesca, jahuenahbo. ¹³ Noque jatihibi hichahax bi huesti yora janon ta Dios Yoshin huestichin noque nashimahiqui, Noquen caibo, noquen nahuabo, patoroyahpabo, patorojomabo, noque nomimapaquequin hahcajaquin ta noque coshi hinaniqui, Dios Yoshiman.

¹⁴ Noquen yoran mehabo mesco hihqui bi cahen jascapahbo rahsima. ¹⁵ Hea ta mequenma qui. Jaa copi tah hen yoran mehama qui hih noquen tahe jai que bi cahen jascabi noquen yoran meha jaquehahna. ¹⁶ Hea ta beroma qui. Jaa copi tah hen yoran mehama qui hih noquen pabinqui jai que bi cahen jascabi noquen yoran meha jaquehahna. ¹⁷ ¿Bero rahsi noquen yora hihxon cahran jahuatohon nincatihquin? ¿Pabinqui rahsi noquen yora hihxon cahran jahuatohon xehatihquin? ¹⁸ Shinanquin sirijaxon ta noquen yora Papan niahihnishqui, noquen berobo noquen pabinquibo noque hinanquin. ¹⁹ ¿Poyan rahsihax cahran jahuen noquen yora jatihiquin? ²⁰ Jaa copi ta noquen tahebo, noquen mequenbo hichahax bi jatihibi jaa yora huesti qui.

²¹ Hea tah hen miama qui. Jaa copi tah hen jahuama qui hah cahen noquen beron noquen mequen jatimahi. Hea ta matoma qui. Jaa copi tah hen hea jahua hihtimahi hah cahen noquen mapon noquen tahe jatimaribihi. ²² Jascayamabiresi. Noquen coshimabo cah non hashoan pishina. ²³ Non siriyamahi shinanai noquen yora mehabo tah non siri hihnon chopo sahuehi. Noquen jistimabo rihbi cah non chopan mahpohi. ²⁴ Noquen jistibo ta mahpoti pishinyamahihqui. Papan ta noque niahihnishqui, noquen yoran meha coshiyamahibo siribo jaquin. ²⁵ Jaa copi ta huesti yoran mehabo jaabo rahsibi rehtenantimahiqui. Jatihixonbi jaton hahbe yoran mehabe shinanquin. ²⁶ Jaa yoran meha huesti yomanahaiya ta jatihibi hahbetan yomanahitiqui. Jaa yoran meha huetsa qui siripi yohuanaiya cahen jatihibi hahbetan jenimaribihi.

²⁷ Criston yora sca tah man qui, mescohax bi jaa yoran meha rahsi. ²⁸ Mesco tee ta Papan yohihiqui, caibo cahen jahuen raantibo janon. Jaatian sca cahen jahuen joi yohixonnicaabo janon. Caibo cahen honanmanicaabo janon. Caibo cahen tsoan jascajanima hahnicahbo. Caibo cahen rohajanicaabo. Caibo cahen yanapannicaabo. Caibo cahen teamanicaabo. Caibo cahen huetsa join yohuannicabo. ²⁹ ¿Jahuen raantibo rahsi non quin? ¿Jahuen joibo yohinica rahsi non quin? ¿Honanmanicaabo rahsi non quin? ¿Tsoan jascajanima hahnicahbo rahsibo non quin? ³⁰ ¿Rohajanicaabo rahsi hihnon Papan noque hinaniquin? ¿Huetsa join yohuannicabo rahsi noque quin? ¿Joi mahnexonnicaabo rahsi noque quin? ³¹ Hihyamahi. Jascayamahi bi Hihbo hahxonnoxon jahuen hashoan siri hinantibo queennahue. Hashoan sirijahti rihbi tah hen mato rahma yohiscanoxihqui.

13

Joni huetsahon shinanti

¹ Joni huetsahon shinanaxma bi jonibo jai quescaax yohuanax cah hen coresan. Joni huetsahon shinanamahax bi Papan yonotibo jai quescari yohuanax cah hen corotihcamahan. Jihui behman rishquihah peenhacacamaha. ² Jayaxihquibo yohiti honan jaxon, jatihibi jone joi rihbi honanxon, jatihibi honan rihbi jaxon, mahchibo potahahtanti hahtipahnoxon caman shinanxon bi joni huetsahon shinanamahax cah hen jahuamascan. ³ Hena jatihibi hinanresax, heen yora rihbi mapojahabo hen hinamehxon bi joni huetsahon shinanxon cah hen jahuabi bihyamahan.

⁴ Joni huetsahon shinanxon tah non jatsanti tenetih. Joni huetsahon shinanxon cah non jato hahxonan. Notsi notsiyamarihbitihi. Caibo mahuinax jaya joih nihyamahi. Joni huetsahon shinanxon cah non yohiresyamahan; nincarihbihan. ⁵ Joni huetsahon shinanxon cah non jato sirijaquin yohuanquihntihi. Noquenahbi res benayamarihbiquin. Histon rainyamayamahi. Copiti shinaryamarihbiquin. ⁶ Tiromahiboya jenimayamahi. Sirijahiboya jenimahi. ⁷ Joni huetsahon shinanax cah non hahqui jatsanyamahi. Jaan ta jahuentianbi shinanquin sirijatimahiqui hihyamahi. Sirija ta jatihiqui hihqui. Jascaxon tenequin, jatihibi noquen huetsabo tenequin.

⁸ Joni huetsahon shinanxon hahxonti shinanbo ta queyoyosmabo shinanbo qui. Caibo shinanbo cahen jascayamahi. Jayaxihquibo yohiti ta yamascayaxihquiqui. Huetsa join yohuanti yamascai. Haxeti honan yamascatihi. ⁹ Rahma tah non honanquin bi pishinmahi. Yohiquin bi tah non pishinmaribihi. ¹⁰ Noquen Hihbo janin tah non pishinyamascatihi. Honancoinax jahuabi haxeti pishinyamascasai. Jaa copi ta non rahma hahquin bi pishinmahi shinanbo yamacahinscayaxihquiqui.

¹¹ Baquehax tah hen baque quescari yohuannihqui. Baquen hahcai quescarihbijaquin tah hen shinanpahonihqui. Baquen hahcai quescajaquin rihbi yohiquin. Beboscaxon cahen baquebaan hahcai quescapahbo jenebahinscai. ¹² Rahma tah non bahquishjaquin jisquin hahcajaquin honanai. Noquen Hihbo janin sca tah non bejisquin honanquin sirijayaxihqui. Rahma texe res honanxon bi tah hen jaatian sirijaquin honanyaxihqui, jaan hea honanquin hahcai quescajaribiquin. ¹³ Jaa copi ta quimisha res banetihqui: Noquen Papa non nincacointi, Papan noque hahxonyaxihquibo honanti, joni huetsahon shinanti. Jaabo quimisha jai bi ta joni huetsahon shinanti hashoan siri qui.

14

Honantima join yohuanabo

¹ Joni huetsahon shinanxon hahxonti hihti queennahue. Papan joi jato nincamanoxon Dios Yoshiman hinanai shinanbo queenrihbinahue. ² Honantima join non noquen yoshiman yohuanaiya ta tsoanbi noque nincatimahiqui, Papa Dios huestichin. ³ Papan joi yohiquin tah non jascajayamahi. Jaa joi yohiquin tah non joni huetsa shinan hinanai, jan coshi bihnon, jan teeti rihbi shinannon, jan masa shinanyamarihbinon. ⁴ Huetsapahi yohuanax tah non noque res coshihi. Papan joi yohixon tah non jascajayamahi. Jahuen joi yohixon tah non Papan caisaibo coshijahi. Jascajaha ta siri qui.

⁵ Honantima join yohuanti man jatihxonbi hahtipahti queenxon bi tah hen mato yohihi, noquen huetsabo coshijanoxon Papan joi jato nincamanahue. Papan joi nincamahua ta hihti siri qui. Honantima join yohuanah cahen jahuama tahni. Yohuanxon mahnexonyamahiya cahen noquen huetsabaan jahuabi nincayamahan. Jahuabi shinan bihyamahan. ⁶ Man honannon hihxon tah hen mato yohihi, hea huetsabaan. Mato qui nocoxon huetsapahi yohuanxon ¿jahua shinan hen mato hinantihin? Dios Yoshiman hea yohihi mato yohixon pari tah hen shinan hinantih. Jaan hea honanmaha mato yohixon Papan joi mato yohixon, Papa queenaijati mato haxemaxon, jascjaxon pari tah hen mato shinan hinantih.

⁷ Jahuaborabo ta jasca rihbi qui, rehue, tamera, jaabo. Sirijaquin rehue hahyamahiboya ¿jenquetsahaxon non jaton jee honantihin? ⁸ Sontarobo quenaquin non haco jaamajaquin chinchinaiya ta jaton tahuaya jaton jashiya tsoabi becantimahiqui. ⁹ Mato jascarihbih. Nincacahbo honantima join man yohuanaiya ¿man yohuanai joi tsoan nincatihiquin? Jascajaquin tah man nihue res yohitih. Honantima join yohiquin cah man tsoan nincanonma man yohitih. ¹⁰ Nai naman ta hicha joi jaiqui. Jatihibi jonibo jaton joiyahpa. ¹¹ ¿Jaabo yohuanai jahua hihcatsihquiquin? Honanyamahax tah hen jahuen nahuascai. Jaa rihbi heen nahua. ¹² Jasca copi nincati joibo yohinahue, hea huetsabaan. Dios Yoshiman hinanai shinanbo tah man hihti queenai. Jascax noquen huetsabo shinan hinanti queenbiresnahue.

¹³ Jaa copi huetsapahi yohuanayhaxon Papa yocahue, mahnexon sca yohinoxon. ¹⁴ Honantima yohuanayhaxon tah hen yohuanxon noquen Papa heen yoshiman yohihi, jahua hihcatsihquiquin hen honanyamaxon bi. ¹⁵ Jascahiya, ¿hen jahuejatihin? Heen yoshiman Papa yohixon tah hen heen shinaman rihbi Papa yohitih. Heen yoshiman behuahax tah heen shinaman rihbi behuatihi. ¹⁶ Miin yoshiman yohuanai Hahxon tah min hea jai Papan hih min jaiya ¿jenquetsahax jano rihbi tsahotaibo Jascajaquin rahan hihtihiquin, min yohuanai honanyamahax? ¹⁷ Hahxon tah min hea jai hah min sirijaquin jaiya bi ta jano tsahoxon nincacaibaan jahuabi shinan bihtimahiqui. ¹⁸ Mato tah hen jatihibi mahuinai, huetsapahi yohuanquin. Jaa copi tah hen Hahxon tah min hea jai, Papan, hahcai. ¹⁹ Hicha nincatima joibo yohiti hahtipahxon bi tah hen noquen huetsabo betan tsinixon nincati joibo rahsi nincamahi. Huestibo res nincati joibo rahsi jato nincamaha ta siri qui. Nincatima joibo tsamanah bi cahen tiroma, jahuabi shinan hinanyamaquin.

²⁰ Baquen shinanya jayamanahue, hea huetsabaan. Baquexo tiromayamahi quescanahue, hani jonin shinanyaribinahue. ²¹ Isaiasnen huishani joi jai quescatah qui: Nahuan join tah hen nea jonibo yohiyaxihqui, nahuan janan jato yohiquin. Jascaxah bi ta hea nincacatsihmayaxihcanihqui hih ta noquen Hihbo janishqui hihqui Isaias. ²² Nincayosmabaan nincacahbo hihxon ta rahtequin sca honantima joi Papan

jato nincamahiqui. Jaa copi ta Isaías jascari yohuannishqui. Nincacoincaibo ta rahteti pishinyamahiqui. Nincacoincaibo quen. Papan joi ta hahan rahtetima qui, hahan shinan bihti. Jascapa ta nincacatsihquibo nincamati qui. ²³ Jaa copi honannahue. Papan caisaibo rahsi tsinquitax jatihibi huetsapahi yohuanaiboya bi haxerihyamahi jonibo sca jano mapexon ¿jahua shinantihiquin? Nincacoinyamahi jonibo jano rihbi mapexon ¿jahua yohitihiquin? ¿Man tah man tehquehiqui mato jatimahiquin? ²⁴ Papan haxemati yohuan man jatihibi jaiya ta jascayamatihiqui. Haxerihyamahi joni jano rihbi mapetaiton, jaa hihyamahax nincacoinyamahi joni jano rihbi mapetaiton tah man jatihixonbi jaa joni jointinin shinanmatihi, jahuen hohcha copi. Jatihixonbi tah man jaa honantihi. ²⁵ Jahuen jointinin jan shinanaibo man yohihah ta Mato tocan ta Papa Dios jaiqui hihxon betihihpaquexon Papa yocascatihiqui.

Huesti yohuannon caibaan nincaquin

²⁶ Jaa copi hen mato yohinon nincannahue, heen huetsabaan. Tsinquitax cah man huetsa jahuen behua jai. Huetsa joni rihbi cahen jahuen honanmati joi jai. Huetsa joni rihbi cahen Papan joi yohiti jai. Huetsa joni rihbi cahen huetsapa yohuan jai. Huetsa rihbi cahen jahuen mahnexon yohiti joi jai. Jaa copi tah hen mato yohihi: Joni huetsa coshi hinannoxon res janahue. ²⁷ Huetsapa join yohuancatsihquiboyaa rabe res yohuanmanahue. Yohuanmaquin quimisha huinomayamaquin. Huesti rahsi yohuannon texe netemanahue. Huetsa rihbi mahnexonmanahue, nincacahbo. ²⁸ Mahnixonnica yamaahiya tsinquitaito tocan huetsapa joibo yohuanamahabo jascapa netemanahue, jatihibi. Jaton jointinin res yohuannon Papa huesti res yohihahbo. ²⁹ Dios Yoshiman ta hea shinanmahiqui, hen mato yohipan hihnicahbo yohuancatsihquiboyaa rabe res yohuanmanahue. Quimisha huinomayamaquin. Jan yohuanai nincaxon, Dios Yoshiman shinanmaha yohuanihquin hihxon jaa honannahue. ³⁰⁻³¹ Dios Yoshiman shinanmaha tah man huesti huestibo jatihibi yohuantihiqui. Huesti yohuanmenohi bi huetsa rihbi jano tsahoxon Dios Yoshiman shinanmaha joi merahax yohuancatsihquiyaa jaa yohuanmenoha netescanon, hoa huetsa sca yohuannon. ³² Dios Yoshiman shinanmaha yohuancatsihqui jonin ta yohuanti teneti hahtipahiqui, jahuen yoshiman yohuancatsihxon bi. ³³ Noquen Papa ta nincatimahiqui yohuani coro corotaibo queenyamahiqui. Jointi siripax hihquibo ta queenihiqui.

Jatihibi janinbo noquen huetsabo tsinquitax jai quescannahue. ³⁴ Tsinquitaito tocan yohuanaiton haibobo netemanahue. Jato yohuanmayamanahue. Jaabaan ta nincati jaiqui, Papan huishamani joi jai quescajarihbiquin. ³⁵ Honancatsihxon xobohoxon sca jaton bene yocanon. Papan caisaibo tocan haibo yohuanah ta tiroma qui.

³⁶ Mato janinhax bi Papan joi pehocohnishqui shinan man jain? ¿Mato qui res Papan joi noconishquin? ³⁷ Nea hen mato huishaquin yohihi joi ta Papan mato yonohi joi qui. Dios Yoshiman shinanmaha yohinicabo man hihqui shinanxon honannahue. Dios Yoshiman shinanmaha joi man hihqui shinanxon hen huishaxon yohihi joi noquen Hihbaan mato yohihi honannahue. ³⁸ Jascama ta qui hihnicah ta honanma qui. Jascapa nincayamanahue.

³⁹ Jaa copi Papan joi yohiti queencoinnahue. Huetsapahi yohuanyaa jayamabiresnahue hahquin yohiyamaribinahue. ⁴⁰ Corotaxma yohuannahue, huetsa yohuannon caibaan nincaquin.

15

Cristo teehihribini

¹ Hen mato yohini joi siri sca tah hen shinanmaquin mato yohirihbihi, heen huetsabaan. Man bihnixon rahma caman jeneyamahiqui joi siri. ² Noquen Hihbaan hea yohini joibi tah hen mato nincamaniqui. Jaa copi ta jaa joi man jeneyamaahiya Papan hahan mato teehihmahiqui.

³ Jaan hea yohini joi tah hen mato qui nocoxon mato yohiniqui. Nescajaquin tah hen mato yohiniqui: Huishani joi jai quescari ta noquen hohcha copi Cristo mahuanishqui.

⁴ Tsahonipibaan bi ta jahuen quimisha neten Papan jaa huenerihbinishqui, huishani joi jai quescajaquin. ⁵ Hahquirihbi teehihquish ta Cefas janin sanareneni cainnishqui. Jaa pecaho ta jahuen doce jonibo janin cainnishqui. ⁶ Jaa pecaho sca quinientos noquen huetsabo, hashoan rihbi, jano huesti tsinquitaito janin caini. Jaabo ta rahma caman hicha jihuethiqui. Jihuetai bi ta caibo hihnicahchihiqui. ⁷ Jaa pecaho sca ta Santiago janin cainnishqui. Hahqui cainipish, jatihibi jahuen raantibo qui sca cainrihbihi.

⁸ Chini sca ta hehqui cainrihbinishqui. Baquexo jahuen hoxne huinomahax cainai quescajaquin tah hen hean chini jisniqui. ⁹ Papan nincacoincaibo queyocatsihquin tah hen jato tiromajapahonihiqui. Jaa copi tah hen Papan raantihax bi hen rabinti jai, hen

japahoni shinanax. Jascapa hen japahoni copi tah hen texe Papan raantibo mentan hea hashoan naman qui, hean shinanah. ¹⁰ Papan hehon shinanai copi res tah hen hea jahuen raanti qui. Jahuen raanti jan hea janehah ta yancama qui. Texe mahuinbahini tah hen hea hashoan coshin teetai. Hihcax bi heabi teeyamahi. Jahuen shinaman ta Papa teetihqui, heyabi. ¹¹ Jaa copi ta hea teetah, jaabo teetah, jasca rabe qui. Jaa joi huesti tah non jatihixonbi yohihi. Jaa joibi rihbi tah man nincacoinnihqui.

Mahuanihbo teehihribiyaxihquibo

¹² Cristo hihquiipi bi ta Papan jaa huenirihbinishqui. Jasca tah non jai, joi siri yohiquin. ¿Jenquetsahax sca man Mahuanihbo ta tsoabi huenitimascai qui hih man caibo jain? ¹³ Hueniyosmabo rahsi mahuanihbo jaiya cahen Cristo rihbi hahquirihbi hueniyamahan. ¹⁴ Cristo hahquirihbi hueniyamaniya cah non joi siri yanca res yohihan. Yanca res cah man nincacoinan. ¹⁵ Hahquirihbi teehihcoinyamahiya cah non quesascan, noquen Papa qui quesahi. Cristo ta Papan hueninishqui hihqui quesahan, huenicoinni que ma bi. Tsoabi Papan huenicotimahiya cahen Cristo rihbi hueniyamahan. ¹⁶ Mahuanihbo Papan hueniyamahiya cahen Cristo rihbi huenirihbiyamahan hih cah hen jai sen. ¹⁷ Cristo huenirihbiyamahiya cah man yanca res nincacoinan. Maton hohchaya rihbi cah man jascabihi banetan. ¹⁸ Cristo nincacoinax bi hoxanihbo rihbi cahen queyonihboscan. ¹⁹ Rahma res main jihuonoxon res Cristo non nincacoinax cah non jatihibi jonibo mentan hashoan homisbatibo non jaquehahnai.

²⁰ Papan ta Cristo huenicoinnishqui. Hashoan hicha sca biminon jihui bimimenohi quescapi ta hoxanihbo janinhax jaa huenimenonishqui. ²¹ Huesti joni hohchani copi jatihibi jonibo mahuanicabo sca jai quescarihbihi ta huetsa huesti copi noque hueninicabo jaribihi. ²² Adaman baquebohax non mahuanicabo rahsi jai quesa rihbi tah non Criston baquebohax huenirihbinicabo rahsi qui. ²³ Jatihibi tah non noquen cati tian huenihihnayaxihqui. Jaa pari hihquipish bi teehihribinixon ta Criston noque beboxonnishqui. Jaa joribiscaya ta jahuenahbo sca huenihihnayaxihqui. ²⁴ Jaatan pari ta jatihibi hapobo, jatihibi yono yonohibo, jatihibi hihbohobo, jascapahbo jatihibi queyobahinxon Papa Dios sca jahuen jihuetahbo Criston hinanyaxihqui, nete queyoscan. ²⁵ Jatihibi miin rahuibo namanjaxon queyohue Papan jaah ta Criston jato queyobahinyaxihqui, jato namanjaquin. ²⁶ Jan chini queyoyaxihqui jahuen rahui ta hahan jonibo mahuat qui. ²⁷ Jatihibi namanjaxon jato queyohue hah ta Papan janishqui, jaa yohiquin. Jatihibi hihbojahue jan hihqui bi ta jaa yohihi jahuen Papa jan hihbojati yohiyamahi. Jaa ta honantihbiresiqui. ²⁸ Jatihibi hihboja sca jan jaiya ta jaa jatihibi hihbomahi jahuen Papan sca jayabi jatihibi rihbi hihbojayaxihqui, jaa sca jatihibichina hihti bi res hihbo hihnon, jatihibi jahuenahbo rahsi.

²⁹ Noquen yamanica ta noquen Hihbo qui hinamehtax bi nashimahama mahuatipishqui, nincacoinnica hih honanahbo hihxon jaa xahbanen hea sca nashimahue hih ta jacaniqui. ¿Mahuanihbo tsoabi Papan hueniyamabiresaiya jahua copi sca jascacoinquin?

³⁰ ¿Jahua copi rihbi jatihibi neten noque rehteti jaibo non tenetihin? ³¹ Noquen Hihbo Jesucriston noque hahxonah copi tah hen matohon hihti jenimaxon mato yohihi, heen huetsabaan: nete tihibi ta hea rehtequin bi cahnecaniqui. ³² Jonibaan hahcai quescayanoxon res hen Efeso janin sina yohinahbo tenenixon ¿jahua hen bihtihin? Mahuataibo Papan huenicoinyamahiya tah non Pinonhue, xehanonhue, bahquish tah non mahuyaxihqui hih sca non jatihibi.

³³ Mato paranmayamanahue. Tiromabo manahax tah man tiromaborihbiscatihi hih ta huishani joi jaiqui. ³⁴ Maton shinan pontehax hohchayamascanahue. Caibaan tah man noquen Papa honanyamabiresai. Hen mato yohihah rabinnahue.

Jenquetsahpa yorayah hueniyaxihceni

³⁵ ¿Jenquetsahaxon mahuanihbo hueniyaxihqui? ¿Jenquetsahpa yorayabo hueniyaxihceni? hah ra tah man caibaan jai yocaquin. ³⁶ Honanman. Mian banaha bero ta queyonox joconihqui. ³⁷ Xequi hihiyamahax huetsa bero rah. Jayaxihqui yora rihbi tah min banayamahi, jahuen bero res. ³⁸ Jaanbi caisai yora ta Papan jaa bero hinaniqui, jatihibi bero jahuen yora hinanquin. ³⁹ Jatihibi nami ta jascapa rahsima qui. Jonibaana cahen huetsapah, yohinahbaana cahen huetsapah, hihsapana cahen huetsapah, tsatsanah cahen huetsapah. ⁴⁰ Naihoh queha yorabo ta jaiqui. Mai meha yorabo jaribihi. Naihoh queha yorabaan coshi ta huetsapah qui. Mai mehahaana huetsapah rihbi. ⁴¹ Bari huetsapa xaba janon, hoxne huetsapa xabaya, huishibo rihbi huetsa xabayahpa. Huetsa huishi jahuena janon, huetsa rihbi jahuena jai. ⁴² Mahuanihbo huenihah ta jascarihbi qui. Queyonica yora banaquin hahcajaquin tah non tsahonai, queyoyosma yora sca Papan hueniyaxahn. ⁴³ Yora tiroma non banahi bi ta xabayahpa Papan huenirihbiyaxihqui. Coshijoma non banahi bi ta coshiyahpa Papan huenirihbiyaxihqui. ⁴⁴ Mai

meha yora non banahi bi ta naihoh queha yora Papan huenirihbiyaxihquiqui. Nea nete meha yora jaiya cahen naihoh queha yora jaribihi.

⁴⁵ Jascapa yohihi ta huishani joi jaiqui: Jan jonijamenoni Adan ta mohitahpa joni Papan janishqui, hihqui. Chini Adan ta jascapahma qui, teehihmanica can. ⁴⁶ Non yoramenohi ta naihoh quehama qui, mai meha can. Mai meha yorayahpa jamenohax cah non naihoh queha yorayahpa sca jatihi. ⁴⁷ Papan jonijamenoni joni ta mai meha hihpahonishqui, mai jan jonijani. Noque jihuemanicah ta naihoh queha qui. ⁴⁸ Mai mehabo ta jan mai jonijani quescapahbo qui. Jascarihibi ta naihoh quehabo yorabo naihoh queha jai quescapahbo qui. ⁴⁹ Mai meha joni quescapahbohax tah non naihoh queha jai joni quescapahbo rihbi jatihi.

⁵⁰ Nea tah hen mato yohihi, hea huetsabaan: namiya jimiyahpabo ta janoxon Papan jihuemahi janin nocotimabiresihqui. Queyonica yorayahpaxon tah non queyoyosmabo bihtimahi. ⁵¹ Jisnahue. Tsoan honannihma joi tah hen mato yohihi. Non tah non jatihibi hoxayamayaxihqui, caibo res. Jaabi tah non jatihibi yora huetsacahinyaxihqui. ⁵² Histon res, naihoh queha rehue hahan queyoti sca hahcaiya ta non bextihihtanai quescapahbo qui. Histon res Papan noque yora huetsajarenyaxihquiqui. Jahuen rehue corotaiya bi ta mahuayosmaboscanon mahuanihbo Papan hueniyaxihquiqui. Jaabo huenixon noque rihbi sca huetsajarenenquin. ⁵³ Nea payonica yora ta payoyosma yorayahcanti jaiqui. Nea mahuanica yora mahuayosmacahinti jai. ⁵⁴ Noquen payonica yora payoyosma sca jaiya, mahuayosma rihbi sca jaa noquen mahuanica yora jaiya ta huishani joi jai quescabi jatihiqui. Noquen Hihbaan ta noquen mahua queyoxonihqui, noquen rahui queyoquin, non mahuayamascanon. ⁵⁵ Hea tah min jahuejatimasci, Mahuanican. ¿Jahuen hin, miin pahe? hihqui jaa huishani joi. ⁵⁶ Jahuen pahe ta hohcha qui. Non nincayosmabo copi ta hohchapan noque rehteihqui. ⁵⁷ Hohchapan noque rehtepanan ta noquen Hihbo Jesucristo raanon Papan noque mahuayosmabomajahiqui, jahuen jihuetahbo sca. Jaa copi Hahxon tah min noque jai, Papan hahnahue.

⁵⁸ Jaa honanxon shinancoinquin jeneyamaxahnnahue, hea huetsabaan. Jahuabi mato shinanbehnomayamanahue. Man noquen Hihbo teexonai ta yancama qui. Jaa honanxon jascabi jaa hahxonahue hicha.

16

Coriquinin noquen huetsabo yanapanti

¹ Noquen huetsabo yanapanti coriqui sca tah hen mato yohihi, hea huetsabaan. Galacia mai janin noquen huetsabo hen yohini quescajaribiquin tah hen mato rihbi yohihi, man coriqui tsinquinon. ² Hahan semana pehocotai neten man cananipi coriqui texe mequexon bexojanahue. Hicha tahma cananipixon texe bexojaquin, hashoan hicha tahni cananipixon hashoan hicha tahni rihbi bexojaquin. Jascajanahue jatihixonbi, hea jano nocotaiya moa bexojarahisixon hinanti hahtipahscanoxon. ³ Jano nocoxon tah hen man caisaibo raantihi, quirciaya jaa coriqui Jerusalem janin bohabo. ⁴ Hea rihbi cati siripaiya ta hea manahi boyaxihcanihqui.

Pablonen cati shinanai

⁵ Jari caquin tah hen Macedonia nabebacahinyaxihqui. Jaa nabebacahinax tah hen mato sca jisi catihi. ⁶ Jaatian rah tah hen mato betan basi tahni hihtih, jene tian huinonon caman rah, janohax hen caribicatsihquiton man hea cati yanapanyaxahnon, hea jano cacatsihquiton hen noconon. ⁷ Huinoquin res mato yohuanquihnbahinti tah hen queenyamahi, hea huetsabaan. Noquen Hihbo queenaiya tah hen mato betan basitih. ⁸ Efeso jema janin pari tah hen banetih, pentecostes fiesta caman. ⁹ Jano ta hicha jonibo nincamati siriscaiqui, heen rahuibo rihbi hicha jai bi hean yohihah nincayaxihquibo rihbi hichahi.

¹⁰ Timoteo mato qui nocotaiton sirijaquin bihnahue, jahua qui raquetaxma jan mato janin hihnon. Jaan rihbi ta Papa teexonihqui, hen hahcai quescajaquin. ¹¹ Jaa ta beronan res qui hihyamanahue, tsoabi. Jan siripi hehqui joribinon yanapanyaxahnnahue. Noquen huetsabo betan jaa joti tah hen manatai.

¹² Noquen huetsa Apolo tah hen hihti yohihipi qui, texe noquen huetsabo betan mato pasijahi cati. Yohihah bi ta rahma cati queenyamabiresipishqui. Hahtipahax tian ta catihiqui.

Huishaquin queyohi joibo

¹³ Coiramenahue. Papan joi jeneyamanahue. Yobacahinax coshin teenahue. Maton jointi rihbi coshijanahue. ¹⁴ Joni huetsahon shinanxon man hahcai jatihibi hahnahue.

¹⁵ Estéfanas, jaabo tah man honanscai, hea huetsabaan. Jaabo ta Acaya mai janin nincacoinmenonihbo qui. Noquen huetsabo yanapanti tee sca ta bihcannishqui. Jaa copi

tah hen mato hihti yocacai. ¹⁶ Jato nincanahue. Hahbe teenicabo, hahbe yanapannicahbo jatihibi rihbi nincanahue. ¹⁷ Estéfanas betan Fortunato, Acaico rihbi nocotipi quen tah hen jenimahi, mato xahbanjaxon bi jato nincacax jenimahi. ¹⁸ Mato shinan hinanxon ta hea rihbi hinancaniqui. Jascapahbo honannahue.

¹⁹ Asia janinha noquen huetsabaan ta mato Man jascabi jayamahin hahquiqui. Aquila betan Priscilanen rihbi ta mato qui hicha joi siri raaniqui, Man jascabi jayamahin noquen huetsabaan hahquin. Jaton xoboho tsinquitabaan jascajaribiquin. ²⁰ Jatihixonbi ta noquen huetsabaan jascajaquin joi raaniqui. Noquen huetsabo hicocanannahue, noquen huetsa copi.

²¹ Heen mequemanbi tah hen nea huishahi, hea Pablon.

²² Noquen Hihbohon queenyamahibo jaiya Papan jato queyobahinnon. Johue, Hihbon hih tah hen jai.

²³ Noquen Hihbo Jesusen mato shinan hinannon tah hen mato yocaxonai. ²⁴ Noquen Hihbo Jesucristonen noque hahxonah tah hen matohon shinanai.

2 CORINTO

Corinto janinhahbo qui Pablonen raanni joi, jahuen rabe sca

Noquen huetsabo qui Pablonen joi raanai

¹ ¿Man Papan shinanya jascabihi jihueyamahin, hea huetsabaan? Jesucriston raanti joni jahue, Papan hea jaah tah hen hea Pablo jahuen raanti hihxon nea joi raanai. Noquen huetsa Timoteo betan tah hen huishahi, man Corinto jema janin jihuetaibo qui raannoxon. ² Noquen Papa Dios betan noquen Hihbo Jesucriston shinanmaha ¿man jointi siripax jihueyamahin? ¿Jahuen shinanya man jihueyamahin?

Pablonen hisin tenenih

³ Noquen Papa Dios ta noquen Hihbo Jesucriston Papa Dios qui. Noquehon hihti shinanai noquen Papa tah qui. Jaan ta noque jointi hihti sirijahiqui. Jaa copi tah hen Hahxon tah min noque jai Papan hen jai. ⁴⁻⁵ Non tiromabo tenehi tian tihibi ta jaan noque jointi sirijahiqui. Criston teneni quescapahbo tiromabo tah non tenehi, hicha. Non hicha tenxonai quescajaribiquin cahen hicha bi res jaan noque jahuen teneti shinan siri noque hinanah. Yomanajaquehtaibo jatihibi noquen sca non jato jointi sirijanon ta noque jointi sirijahiqui, jaa shinamanbi non noquen rihbi jato jointi sirijanon. ⁶ Jaa copi tah non tenehi, man jointi siripax jihuecinnon. Non tenehi quescapahbo tiromabo man maton rihbi tenehiton mato jointi sirijabahinnon cahen Papan jahuen teneti shinan siri noque hinanquin. ⁷ ¿Hehbetanbi yomanajaquehtaibohax man hea hihqui quescari man jointi sirijaquetax jihueyamahin? Hen ta hen honanai. Man tenetih tah hen honanquin sirijahi.

⁸ Asia mai janinhax tah non hohmis hohmisnihqui, hea huetsabaan. Man honannon hihxon tah non mato yohihi. Hihti hohmis hohmisajahahbo tah non noquen coshi senenyamascaxon jihuetai shinanyamascaniqui. ⁹ Mahuati shinan sca tah non janiqui. Noquen coshiyaxonbi teneti non shinanyamanon ta Papan noque jascajamanishqui, yamanicabo huenihhinnicaxon Papan noque yanapantih non honannon. ¹⁰ Asia mai janinhahbaan ta noque rehtequin bi rohajanishqui, Papan noque jato xahbanjamahah. Noque xahbanjamanixon ta hahquirihbi xahbanjamayahihqui, noquen Papan. Noque hahquirihbi xahbanjamayahihqui honanxon tah non shinanquin sirijahi. ¹¹ Maton rihbi Papa yocaxonnahue, noque yanapanquin. Noque copi Papa qui hicha siripi yohuanahbo yocaxonnahue. Hahxon tah min jaa jai Papan, hichaxon yocacah tah min sirijaxonai Papan, jaábo noque yocaxonnahue.

Corinto janin Pablo cayamaha

¹² Mai mehabo tocan jihuehahnan tah non jaabaan honanquin hahcayamahi. Papan yanapana tah non hinamehti jihuetai, jan shinanai quescajaquin shinanax jihuetai. Mato tocan hashoan rihbi jascari jihuetai. Noquen jointinin tah non honanquin sirijahi. Jaa copi tah non jointi siripax yohuanscai. ¹³ Man jisnixon honanscai joibo res tah non huishaxon mato yohihi, huetsama. Noquen Hihbo qui canoxon caman tah man jaa joibo honanti jai. ¹⁴ Man noque honantahniscái quescajaribiquin honanbonanahue. Noquen Hihbo Jesus jahuiya non mato copi siripi yohuantih quescarihbihi tah man noque copi man siripi yohuantih.

¹⁵ Rabejaquin sca mato shinan hinannoxon tah hen sirijaquin shinanax mato janin caribicatsihoqui. ¹⁶ Macedonia janin caquin mato jisbahinax joribixon sca mato jisribiti tah hen shinanohohqui, maton yanapanah sca hen Judea main sca cayaxahnon. ¹⁷ Jascari cati tah hen hihresyamahohqui. Mai mehabaan shinanquin hahcai quescajayamaquin tah hen yohihi. Cayamahi rahan hihresyamahi. Cahí rahan hihresyamarihbihi. ¹⁸ Cahí rahan hahxon tah hen chini sca cayamahi rahan jatimahi. Papan ta honaniqui. Jaan ta yohicointahiqui. ¹⁹ Silvano, Timoteo, jaabo rabe betan tah hen Jesucristo joi mato yohiniqui, Papan baquen mato manascanon. Criston ta Jeen hahxon Hatimahi rahan yohiyamascatihiqui. Jeen hahresquin. ²⁰ Noque hahxontijaxon Papan noque yohini jatihibi non yocacah ta Criston jeen hahtihiqui. Jaa Cristo copi tah non Jascari rahan hahcai, noquen Papa shinan siriya hihqui honanahbo. ²¹ Jaa noquen Papan ta Cristo nincacoinquin jenyemati shinan noque hinaniqui. Mato ta hinaniqui. Noque rihbi hinanquin. Noque ta caisiqui. ²² Noque honantijaxon ta jahuen coshi rihbi noque hinaniqui. Noque bihinihnyahnoxon ta noquen jointi janin jahuen yoshin hihquimascaiqui.

²³ Honannahue, mato tah hen yohihi. Mato casticanyamanoxon tah hen Corinto janin cayamascahohqui. Hen ta hen hihcoinaí. Papan ta honaniqui. ²⁴ Mato yono

yonoxonma bi mato jenimaquihhnoxon tah hen mato yohihi. Man noquen Hihbo qui hinamehcoinni quen tah hen mato yonoti pishinyamahi.

2

¹ Mato jisi caribixon tah hen hahquirihbi mato benámamis hihquish hen cayamascahoqui, hea huetsabaan. ² ¿Hen mato benámahiya tsoan sca hea jenimatihiquin? ¿Hean mato benámahoh man hea jenimatihbi bi tsoan sca hea jenimatihiquin? ³ Mato qui nocotax matohon hea jenimatihbi bi benámamis hihxon tah hen huishaxon mato yohihohqui. Hahan hea jenimahi man mato rihbi jatihibi hahan jenimatihbi honanxon tah hen huishahohqui. ⁴ Benatax jointi tiromahax bero jene manontamecaxinxon tah hen huishaxon mato yohihohqui. Man benánon hihxonma bi matohon hen hihti shinanai man honannon hihxon tah hen huishahohqui.

Hohchaya hihpahoni joni yohuanquihinti

⁵ ¿Hoa jonin hea benámahoxquin? Hea res ma bi ta mato jatihibi benámatahnihoqui. Hashoan joi hichajacatsihyamahi ta hen jascarsi yohuanai. ⁶ Tsiinguixon casticanquin tah man senenjahoqui. ⁷ Jaa copi jahuen hohcha shinaryamascanahue. Jahuen hohcha shinaryamascaxon sirijaquin sca yohuanquihnnahue, hihti masa shinanxon jihuetime shinanbahin jan jamis hihxon. ⁸ Jaa jonihon man shinanai honanahbo hihxon tah hen mato yohihi. ⁹ ¿Hen yohihi tihibija man jain? Honancatsihquin tah hen mato qui huishahi, maton shinan honannon hihxon. ¹⁰ Huetsana man shinaryamascái jahuen hohcha tah hen hean rihbi shinaryamascái. Hean shinanbehnomaxonaibo tah hen Cristo bebonxon shinanbehnomaxonai, man shinan bihnon. ¹¹ Satanasnen noque tiromajayamanon hihxon tah hen shinanbehnomaxonai. Jaa noque jahuejacatsihquin tah non honanai.

Troas janinxon Pablonen masa shinanai

¹² Troas jema janin Criston joi siri yohihi nocoxon tah hen yohiti siribiresi jisoqui, hea huetsabaan, noquen Hihbaan jato nincati siri shinan hinanxonah. ¹³ Yohiti siri que bi tah hen hean huetsa Tito jano merayamaxon shinanquin sirijayamahoqui. Jaa copi tah hen Ca res sca tah hen jai, hihcaxinax Macedonia mai janin sca cahi cahoqui.

Criston hahxonah sirijaquin shinanaibo

¹⁴ Yanca res tah hen mato copi masa shinanhohqui, hea huetsabaan. Jahuen rahuibo queyohax jahuen sontarobo bebohi hahcajahi ta noquen Papan noque beboxoniqui. Jaa copi tah hen Hahxon tah min noque jai Papan hahcai. Jatihibi janin hininajaquin hahcajaquin ta Papan jato noque honanmamahihqui, Cristo honanahbo hihxon. ¹⁵ Papan teehihmahihbo tocan, mahuanicabo tocan rihbi tah non Criston hinin quescapahbo qui, Papan xetenon. ¹⁶ Mahuanicabo tocan tah non hahan mahuataibo hininjati qui. Papan teehihmahibo tocan hahan jihuetaibo hininjati. ¿Jaa nincati tsoan hahtipahiquin? ¹⁷ Coriqui bihnoxon Papan joi maromabonahi quescapahbo tah non hahyamahi. Yohitannahue Papan jaah cahen yoninicabo noque. Hihcoini yohuannicabo. Papan noque jisi honanxon tah non yohihi, Criston janen.

3

Papan hahxontijahi joi behnabo

¹ Hea ta hen jascapa qui hihcatsihxonma sca tah hen jascajahi. Hea honanscanish tah man hahan hea honanti quirica pishinyamahi. Maton huishati cahen hea rihbi pishinyamahan. ² Matobi tah man hahan hea honanti qui, hea huetsabaan. Non matohon hihti shinanai tah non noquen jointi qui bi huishaquin hahcajahi, jatihixonbi jisxon honanahbo. Noquen shinan honanahbo can. ³ Non jenuetsahpabo shinarya quin hihxon ta mato jisxon honanti bi res qui. Criston huishaxon heyabi raanah joibo quescapahbo tah man qui. Tintan huishahahma bi Dios Yoshiman huishahah quescapahbo. Macan champani qui huishahah quescapahboma. Huishaquin hahcajaquin ta noquen jointi janin jahuen shinan janahihqui. Jaa shinan jenuetsahpa quin hihxon jistibo tah man qui, hea huetsabaan.

⁴ Papan jahuen shinan noque jascajaquin hinanai tah hen honanai, hea huetsabaan. Noquen Hihbaan noquehon hihti shinanai copi tah hen honanai. ⁵ Noquenbi shinanxon tah non jahuejati hahtipahyamahi. Papan res ta noque coshi hinanihqui. ⁶ Jaan ta noque hahxontijaxon bi noquen rihbi hahnon hihxon noque joi behna yohihihqui. Jaa joi behna non yohinon hihxon cahen noque caisnish. Huishani joi jisxon non noquen coshiyaxon hahtima joi tah qui. Noquen coshiyaxon hahti joi ta hahan mahuati joi qui. Noquen Hihbaana ta jahuen yoshinyaxon hahti qui, hahan jihuetai joi.

⁷ Macan qui huishaxon ta hahan mahuati joi Papan hinannishqui. Xaba shinanyahpaxon Papan jaa joi hinanah ta Moisesnin bemanan xabanishqui. Israelibaan ta jaa bejisti teneyamanishqui, xabatai copi. Queyonica xaba que bi jaa jisti hahtipahyamacanquin, jaan bechaxah. ⁸ ¿Jascapa coshiyahpa joi hinannixon jahuen yoshinyaxon hahti joi sca Papan hinanah, non hashoan sca coshi jatimahin? ⁹ Hohchayahpabo tah man qui hihqui joi xabaya hinannixon cahen jahuen siribo sca hahan jihuetai joi noque hinanxon hashoan rihbi noque hihti xabaya hihmayaxihqui. ¹⁰ Rahma ta xabaya hinanni joi xabaya quescayamascaiqui, hashoan coshi xabapan sca xabajahah. ¹¹ Queyónica joi xabaya jahuiya cahen queyotima joi sca hashoan coshi xabaya joti jai.

¹² Jascapa coshi xabaya joi non jai honanxon tah non jahua qui bi raquexonma yohihi. ¹³ Moisesnin hahni quescayama tah non jai. Jaa ta jahuen bemanan beracohnishqui, jahuen xaba queyotai israelibaan jiszymanon hihquish. ¹⁴ Jahuabi jonexonma non yohihah bi ta jaton jointibo chahomacannishqui. Rahma caman rihbi ta beracohxon Moisesnin joi jiscanihqui. Moises hahan beracohni beracohxon hahcajaquin cahen jaa quirica jiscanquin. Cristo bihxon res non hahan beracohtai potaxon non jiscoinai ta honanyamacaniqui. ¹⁵ Jasca tah qui. Rahma caman ta jaton shinan mahpoxon hahcajaquin Moisesnin huishani joi jiscanihqui. ¹⁶ Noquen Hihbo qui hinamehtaiton pari ta jaan jaton bebepohti jato bichinihqui, honancoinahbo. ¹⁷ Noquen Hihbo qui hinamehtaibo ta jahuen yoshinyahpabo qui. Jahuen yoshinyahpabo cahen hinamabo sca. ¹⁸ Noque rihbi bebepohxonma sca ta bejisihiti jisquin hahcajaxon noquen Hihbaan xaba jisish, jan hihqui quescarihbi noque jatihibi jatihi, hashoan xaba shinan hanicanahi. Noquen Hihbaan Yoshin noquen jointi janin teetaiya ta jahuen xaba noque qui mahnecanahihqui.

4

¹ Heen shinan tiroma tenexon ta Papan hea yohinishqui, jahuen joi siri hen yohixonnon. Jaa copi tah hen jointi sirijahquescai. ² Hahqui rabintinoxon ta jonexon caibaan jaiqui. Noquen Hihbo qui hinamehxon jascapa jenebahinscanish tah hen paran parani nihtimahi. Papan joi rihbi yohiquin quesajayamaquin. Hihcoini yohuanxon tah hen jato nincamahi, jatihixonbi jaton jointinin hea honanahbo. Noquen Papa bebon nihxon hahcaja tah hen jai. ³ ¿Hen yohihi joi siri nincaxon bi beracohxon honancasquimacanihquin? Jascapahbo ta queyónicabo qui. Queyónicaboxon ta honancasquimacanihqui. ⁴ Nea mai meha diosen ta nincayosmabo jato shinan chihtehilihqui honanyamahahbo. Noquen Papa jenquetsahpa quin hihxon tah non Criston joi nincaxon non honanscai. Jahuen joi ta xaba quescas siri qui. Jahuen xaba jiszymanon hihxon ta tiroma yoshiman jato chihtehilihqui. ⁵ Hea maton hapo copi hea nincanahue hah tah hen jayamahi, joi siri yohiquin. Noquen Hihbo ta Jesucristo qui, hih ta hen jai. Noque cahen maton jonibo, Jesus teexonai noquebo. ⁶ Bahquish chian xaba jahue, hah noquen Papan janixon ta jaan rihbi noquen jointibo xabajahiqui, xabapan jismahah Cristo bejisquin hahcajaquin non noquen Papa Xaba Hihbo honannon.

Shinancoinax jihuetai

⁷ Jahuen hahxontibo res non hihqui que bi ta jahuen coshi shinan Papan noque hinaniqui. Mai meha yorayahpabo res hihquish bi Papan coshi shinanyahpa. Noquenahma bi Papanah, jaa coshi. Noquen honannon hihxon cahen noquen jointi janin jaa shinan siri janaquin. ⁸ Jatihibijaquin hea tiromajahibaan bi tah hen shinan yosmayamahi. Jatsanhah hea jaábaan bi hean tiromajaquin shinanyamahi. ⁹ Hea rehtecatsihquin chibanaibaan bi ta Papan hea jenebahinyamahihqui. Main hea potahahbaan bi hea mahuayamahi. ¹⁰ Rehtehahbo Jesus mahuani quescari tah hen jascabi jai, nete tihibi heen yora rehtecatsihquibaan bi. Heen yora janin hahan Jesus jihuetai jai jisibo cahen Papan hea tenemahah. ¹¹ Noque jihuetaibo ta Cristo noquen Hihbo copi Papan noque jascabijaquin mahuamaquin bi rohajahiqui, noquen mahuanica yora janin Jesus jai jisibo. ¹² Jasca tah qui, hea huetsabaan: non noque mahuatai bi tah man mato jihuetai.

¹³ Nincacoinxon tah hen jaa joi rihbi yohihi, hih ta huishani joi jaiqui. Nincacointi shinanyahpaxon ta jascanishqui. Noquen rihbi tah non jaa shinan bihxon nincacoinxon jascajaquin rihbi yohihi. ¹⁴ Noquen Hihbo Jesus huenihihninixon ta noque rihbi huenihihniyaxihquiqui, noquen Papan. Noque huenixon ta matoyabi noque hioyaxihquiqui, jaa jano jaiton. Jaa honanxon tah non mato yohihi. ¹⁵ Man shinan bihnon hihxon ta Papan jatihibijahiqui. Hashoan hichaxon sca shinan bichish tah non hashoan hicha rihbi noquen Papa qui siripi yohuanyaxihqui, Nete Hihbo jisibo.

¹⁶ Jaa copi tah non jointi yosmayamahi. Noquen yora pechohi bi ta jatihibi neten noquen shinan behnathiqui. ¹⁷ Non rahma hahan yomanahatai hisin romishin tenexon tah non jahuentianbi queyotima xaba bihyaxihqui, jahuentihopah ra tsoan shinannahma xaba bihqin, noquen. ¹⁸ Non jisi ta queyónicabo qui. Non jisyamahibo ta queyoyamahihqui,

jahuentianbi. Jaa copi tah non jisibo non shinanyamahi. Non jisyamahibo caya tah non shinanai noquen.

5

¹ Noquen yora ta nea mai meha tapas quesca qui. Non haho jihuetahbahi bi basima tahni sca payoti. Jascapahton non jihuetai bi cahen noquen yora mahuataiya naihoh sca noquen Papan noque hahxonah haho jihueti jai. Mequeman xobojahama. Jahuentianbi queyotima haho jihueti. Jaa tah non honanai. ² Neno tah non Hea tsi hinanhue hi sen hihresai, noquen naihoh queha xobo bihcatsihqui. ³ Bichish cah non chopanma quescapahbo jayamascaan. ⁴ Nea tapasoho jihuehahnan tah non mahneti hihti queenxon jointi xecahihnihi, noquen yora potacatsihyamahi bi hahquibi hashoan siri yora sca bihcatsihqui. Jascabi jihuenicaton sca queyónica mahpobahinnon jaa bihcatsihquin, sahuequin hahcajaquin. ⁵ Non jascapa bihyaxahnnon noque sirijahi ta noquen Papa qui. Noque jascapa hinanyahnoxon ta noque jahuen Yoshin hinan sca jaiqui.

⁶ Jaa copi tah non jascabi sirijaquin shinanai. Noquen yoraya jihuehahnan tah non noquen Hihbo janin jayamahi. ⁷ Jaa jisishma tah non jihuetai, jahuen joi nincacax res jihueti. ⁸ Jascaxon bi cah non shinanquin sirijascai. Noquen Hihbo jano jaiton jihuenoxon tah non noquen yora potabahinti queenscai, neno manati queenyamatahnihi. ⁹ Jaa copi tah non yorayahpahax jihuetax, jascayamahax jaa janin jihuetax, jan queenajati res queenyorahi. ¹⁰ Siri hin, tiroma quin hihxon janoxon jan noque jisi janin tah non jatihibi nihyaxihqui. Yorayahpaxon non hahcai quescabijaquin noque yohinon tah non jano nihti jai. Non sirijaquin hahnibo cahen noque sirijaquin yohiquin. Non tiromajaquin janibo cahen sinajaquin noque tiromajaquin.

Hihbo qui hinamehtax jahuen baque sca

¹¹ Jaa copi tah non noquen Hihbo qui raqueti honanxon non mato hihti yohihi. ¿Jenquetsahpa shinanya non quin? Papan ta honanihqui. Maton jointinin maton rihbi honanti tah hen queenai. ¹² Noque tah non jascapa shinanya qui, noque honannahue hihribixonma tah non mato yohihi. Man noquehon jenimahax jaya yohuanti janon hihxon tah non mato yohihi. Caibo ta bamacanya res jisish jenimanicah qui. Jenquetsahpa shinanya quin hihyamacani. Man jascapahbo joi bichinti hahtipahnon cahen mato yohihi. ¹³ ¿Hea tehquehiqui joni quin? Noquen Papa queenaiya tah hen jascapa jatihi. ¿Hea siri shinanya joni quin? Man Papan shinanya janon tah hen jascapa jatihi. ¹⁴ Cristohon hihti queenxon tah hen jascajahi. Jatihibichina ta noquen hohcha copi jaa huesti mahuanishqui. Jaa mahuayamahiya cahen noque jatihibi mahuatan. Jaa tah non honanquin sirijahi. ¹⁵ Non queenai quescayamascaax sca non jihuenon cahen jaa mahuanish. Noque copi mahuatipi bi hahquirihbi hueniha queenai quescari sca cah non jihueti jai, noque jihuetaibo. ¹⁶ Jaa copi tah hen ¿Jenquetsahpa hin? hihxon jisxon res joni huetsa honanti shinanyamascai. Jenquetsahpa hin hihxon Cristo jisxon res honanti shinannixon bi tah hen jascajatima sca jai. ¹⁷ Cristo qui hinamehtax tah min mia behna noque sca qui. Mia queenpahoni quescayamascai, jatihobi behna.

¹⁸ Papa queenai jatihibi sca tah min queenti jai. Cristo raanquin ta noquen rahuiti shinan Papan noque sohuaxonnishqui. Jahuen rahuibo que bi noque raejaquin. Noquen sca non huetsabo jaton rahuiti shinan pontexonnon ta noque yohihiqui. ¹⁹ Noquen hohcha copi noque casticanxonma ta Cristo betan noque hohcha sohuaxoniqui, jahuen rahui non hihpahoni que bi jahuen hahberabetibo sca non janon. Non jaa joi yohihi sca canon ta noque raaniqui. ²⁰ Jaa copi tah non Criston yohixonnicaibo qui. Non yohihi join Papa yohuanai quescapi. Maton hohcha potahax jahuen rahuibo que bi Papan hahberabetiboscannahue, hah tah non jai. ²¹ Noque hohchajomabo janon ta Papan jaa noquen hohcha hinannishqui, jan hohcha honanyamanih bi. Hahqui hinamehtax non noquen Papa ponte siri hihqui quescarihibi non ponte siribo janon hihxon ta noquen hohcha jaa hinannishqui.

6

¹ Papa betan teenicaxon sca tah hen mato hihti yohihi. Matohon shinanxon ta jaan mato hihti hahxonihqui. Nincaquin bi quesajayamanahue.

² Nincati siripai tian bi tah hen mato nincascai. Mato teehihmati netenbi tah hen mato yanapanai

hah cahen jaan janish. Rahma ta nincacah siri qui. Mato teehihmati nete ta nocoscaiqui.

³ Nincacoinyamacannish hihquish tah non hihti coirametai. Non siriresi jihuetai honanax jahua copibi noque qui tiroma yohuanti tsoabi yamanon tah non Papan joi yohinicaahax ponte res jihuetai. ⁴ Papan yonotiboxon tah non jatihibijaquin jato jismati jai,

jahuen teexonnicahbo non hihqui honanahbo. Hihti tenexon tah non jato jismahi. Hisinbo tenequin. Yomanahxon bi tenequin. Tiromabo tenequin. Tiroma netebo tenequin. ⁵Tsehuejahabo bi tenequin. Sipo xoboho tsahonahbo bi tenequin. Rehtenannanaiboya tenequin. Tee teexon tenequin. Hoxa tenequin. Piti tenequin. Papan teexonaibo non hihqui honanahbo jaa rahsi tenequin. ⁶Jascapa noque honanahbo siriboxon jatihbijaquin. Papan joi rihbi honanxon, caibo teneresquin. Jato yanapanquin. Dios Yoshinyaxon yohiquin. Jatoxon shinancoinquin. ⁷Hihcainai join res jato yohiquin Papan coshiyaxon hahxonquin. Ponte shinanyahpaxon yohiquin tah non noque cahehishbo pontexon noque join bahchincatsihquibo rihbi sirijaquin yohixon non pontehi. ⁸Caibaan noque nincacai bi caibaan rihbi noque hosanquin. Caibo noque qui siripi yohuani. Caibo tiromahi yohuani. Hihcainjaquin non yohihi bi ta Man tah man paranai caibaan jaiqui. ⁹Caibaan ta noque honanquin sirijaxon bi noque honanyamaquin hahcajahiqui. Mahuacatsihquish bi teehihscai quessa tah non jai. Casticanquin ta noque rehtequin bi rohajacanihqui. ¹⁰Benátihi bi tah non jenimahi. Jahuabijomaxon bi tah non hicha noquebo hicha shinan hinanai, hicha shinan jaábo. Jahuabijomahax bi jatihibiyahpa quescapi. Jasca tah non jai, Papan noque hahxonai honanahbo.

¹¹Noquen jointinin matohon shinanxon tah non mato yohihi, corinto jonibaan. ¹²Hean tah hen mato panteyamahi. Hehon man shinanpanan tah man maton jointininbi man pantetai. ¹³Copiquin sca hen hahcai quescajaquin maton jointiboyaxon hehon shinannahue. Heen baquebo yohiquin hahcaja tah hen jai.

Non Papan xobo quescapahbo jai

¹⁴Pontejaquin shinanaibo ta tiromajaquin shinanaibo betan mescotimahihqui. Jano xaba jaiton ta yame jatimahiqui. Jaa copi nincacoinyamahi hihquihinti bihyamanahue. ¹⁵Tiroma yoshin betan ta Cristo nihtimabiresiqui. Nincacoinaibo betan ta nincayamahibaan jasca rabe shinanyamahihqui. ¹⁶Tiroma yoshiman hahan parantibo jahuen santobo ta Papan xoboho jatimabiresiqui. Noque tah non jihuenica Papan xobo qui, jan yohini quescari:

Jato chicho tah hen jihuetihi jato tocan nichí. Hea tah hen jaton Papa Dios hihtihi, jaabo rihbi heen jihuetahbo.

¹⁷Jaa copi jato janinhax piconahue. Matobi res jihuenahue. Jahua bi tiromabo meheyamaquin. Jaatian tah hen mato bihtihi.

¹⁸Hea tah hen maton Papabi hihtihi, mato rihbi heen bebo baquebo, heen haibo baquebo. Jasca ta jatihbijati hahtipahnica noquen Hihbo jaiqui.

7

¹Jascajaquin ta noque hahxonti yohinishqui, hahan hen shinanaibaan. Jaa copi hahan yora tiromati, hahan shinan tiromati rihbi potabahinnahue. Noquen Papa Dios hihti shinanya hihqui honanax, jatihibi mequejaquenahue, jahuenahbo rahsi hihnoxon.

Jaton shinan ponteti jai

²Noque shinannahue. Tsoa qui bi tah non mato qui tiromayamaniqui. Tsoabi tiromayamaquin. Tsoabi paranyamaquin. ³Mato tah man tiromabo qui hahquinma tah hen mato yohihi. Mato tah hen jaashinanai hah ca hen mato jai sen. Mato betan jihueti, mato betan mahuati, jascabi mato betan hihqui. ⁴Noquen Papa man nincatihi tah hen honanai. Jaa copi tah hen sirijaquin shinanax jointi siripai, hicha cahen mato qui siripi yohuanti jai. Hicha tenehax bi tah hen hihti jenimahi.

⁵Tenehax bi cah non jenimahi. Noque tiromajaquin jeneyamahahbo tah non Macedonia janin rihbi nocoxon yora tantiti hahtipahyamahohqui. Jatihibi janin rehtenancatsihquibohi. Noque hihti raqueti jihueti. ⁶Jasca non jaiya bi cahen masa shinanaibo siri shinan hinannica hihxon Papan noque siri shinan hinannish. Tito rihbi jano nocomaxon Papan noque shinan siri hinanquin. ⁷Man jaa raanah joxon ta noque shinan siri hinanipishqui. Man jaa hinanipi shinan siri ca hea sca jaan rihbi hinanipish, hen jaa copi rihbi sirijaquin shinannon. Man bena benatai, man huinihi, man noquen yohihi quescabijaquin hihti hahcatsihqui jan yohihihi tah hen hashoan sca jenimahi.

⁸Huishaxon mato benámahoxon bi cah hen masa shinanyamahi. Jaatian masa shinanhohxon bi tah hen jascajayamascai, basima tahni res heen quiricanen mato benámaho honanxon. ⁹Rahma tah hen jenimascái. Man benataiya hea jenimayamahi bi tah hen man benaxon shinan pontehiya hea jenimahi. Papan benámaha tah man benáhohqui, hean mato jahuejayamanon. ¹⁰Papan benámaha cah non shinan pontehi, jaan noque teehihmanon. Jascaxon shinan pontexon cah non masa shinanyamascai. Mai mehakaan benámaha cahen hahan mahuati. ¹¹Papan benámaha benatax tah man jahuen joi nincati hihti quenscai. Man cah man hihti yohicatsihscái, man ponte sca jai hen honannon

hihxon. Hihti rainyama cah man joni huetsa qui jai. Hihti raque rihbi. Hihti jenipahichi, Papan joi nincaxon hihti jacatsihquin. Hihti castican cah man jai. Hen mato yohiho maton hohcha man yamabirescai cah man jismahi. ¹² Hoa hohchatai copima tah hen mato yohihohqui, quirica raanxon. Hahqui hohchatai copima rihbi. Noquen yohihah quescabijaquin man hihti hahcatsihqui Papan mato jismanon hihxon tah hen jaa quirica raanhohqui. ¹³ Jaa copi tah hen shinanquin sirijascai.

Mato jisxon ta Titon rihbi shinanquin sirijahiqui. Jaa jenimahiya tah non hashoan rihbi shinanquin sirijahax jenimahi. ¹⁴ Mato qui siripi yohuanxon hen Tito yohihiya tah man hea hihtimahmayamahohqui. Jatihibi hihcoijnajaquin non mato yohini quescajaribiquin tah non hihcoijnajaquin Tito yohihohqui, Ninca ta jatihcanihqui hahquin. Man nincacoinai ta honanscaiqui. ¹⁵ Honanxon ta hashoan sca mato shinanihqui. Man raquetax tastahxon, Johue man jatihixonbi jaa jaho ta shinanihqui. ¹⁶ Noquen yohihah quescabijaquin man hahcoina honanxon tah hen shinanquin sirijahi.

8

Yohuashihxonma non Papa hinanti

¹ Papan ta jahuen shinan noquen huetsabo hicha hinanhoxqui, hea huetsabaan. Macedonia mai janinhahbo jahuen shinan jato hinanquin, yanapanquin jaton coriqui hinanahbo. Man honannon hihxon tah hen jaa mato yohisca. ² Hihti tiromajahahbaan bi ta hihti jenimacanihqui. Jahuabijomaxon bi ta hicha hinancanhoxqui, jaabo jai pishca hinanresquin. ³ Heen jisnonbi ta shinan caman hahtanxon hinancanhoxqui, hashoan rihbi. Jaabobi queenxon res hinancanquin. ⁴ Noquen huetsabo hicha pishinaiboya ta Non jato yanapannon noque rihbi jato hinanmarohahue hahcanhoxqui, noque hihti yocaquin. ⁵ Jaabaan hinanrestih non shinanah bi ta noquen Hihbo qui hinamehtax noque qui rihbi sca hinamehcannishqui, noquen Papa queenai quescari. ⁶ Jaa copi tah non Tito yohihohqui, jan mato hinanmamenoni quescajaribiquin mato jaa tee siri jan janquenjamanon hihxon. ⁷ Jatihibijaquin tah man hichajahi: hicha shinanquin, hicha yohiquin, hicha honanquin, hicha coshin teequin, noquehon hicha shinanquin. Joni huetsahon shinanxon hinanquin sca jascajaribinahue, hichajaquin.

⁸ Mato yonoquinma bi caibo coshin teetaiboya tah hen mato yohihi, maton rihbi man joni huetsahon shinancoinai jismanahue hahquin. ⁹ Noquen Hihbo Jesucristonen matohon shinanai tah man honanscai. Jatihibi hihbohax bi ta jahuabijomanishqui, matohon shinanax. Jan jahuabi yamahaia man hicha bihnon hihquish ta jahuabijomanishqui.

¹⁰ Man nescajaha ta siri qui hihxon tah hen mato yohisca: huetsa bari tian man hinanti shinanxon texe tsinquinixon janquenjascanahue. ¹¹ Yanapanti man histon jenipahini quescajaribiquin man jaibo hinanquin queyoscanahue. ¹² Hinancatsihquin non hinanah ta siri qui, Papan jisi. Jahuara jaxon hinancatsihxon hinannahue, hah ta Papan noque jaiqui. Yamaxon bi hinannahue hah ta noque jayamahiqui.

¹³ Caibo hicha janon, pishinnoxon caman hinannahue, hih ta jayamaribihiqui. ¹⁴ Jasca rabe jayaxahnon hihxon man hicha jaibo texe hinannahue, pishinaibo, man pishinaibo sca jaabo rihbi hicha jaxon mato hinanyaxahnon. Jascapahbo rabe jaabo jascajanahue. ¹⁵ Huishani joi jai quescari: Hicha tsinquihahbaan bi jahuabi texeyamahi. Hicha tahma tsinquihahbaan bi jahuabi pishinyamarihibi.

Tito, jahuen hahberabetibo

¹⁶ Non matohon shinanai quescajaribiquin Titon rihbi matohon shinannon ta jahuen shinan Papan hinanihqui. ¹⁷ Non benahah ta jeen hihquish jaa bi queenax mato janin cahiqui, Papan joi jai quescabi hihti jacatsihqui. Jaa copi tah hen Hahxon tah min jato jai, Papan, hen jai.

¹⁸ Hahbetan canon tah non noquen huetsa rihbi raanai. Jaa noquen huetsa ta Papan baquebaan honancaniqui jatihixonbi, Papan joi siri jaan jato yohihah. ¹⁹ Jaa honanxon ta yohicannishqui, noque betan jan nihnon. Jaa copi cahen noquen huetsabo coriqui boxonquin noque betan nich, noquen Hihbo Shinan Hihbo jisibo, non yanapanhananai rihbi jisibo. ²⁰ Hicha coriqui tsinquinixon sca tah non coiranquin sirijascai, tsoabi noque qui tiromahi yohuanyamahahbo. ²¹ Papan noque siri jisnon hihxon tah non hahcai, jonibaan rihbi siri jisnon hihxon.

²² Jato betan tah non huetsa rihbi noquen huetsa raanai. Jaa tah non hicha coti tanaxon jan noquen Papa hihti hahxoncatsihqui non honanscai. Man nincacai honancoinxon sca ta hashoan rihbi hahxoncatsihquiqui. ²³ Tito rihbi ta heen hahberabetixon hehbetanbi mato hahxonihqui. Noquen huetsabo rabe ta Papan baquebaan raanahbo qui, jato jisxon Criston shinanaya hihquibo honanahbo. ²⁴ Jaa copi Papan baquebaan jisnon hihxon

noquen huetsabohon man shinanai jismanahue. Man hinancointihi tah non nea noquen huetsabo yohirahsihi. Jasca coin sca janon jato jismaxon maton coriqui hinannahue.

9

Noquen huetsabo yanapannoxon coriqui tsinquihibo

¹ Noquen huetsabo yanapannoxon coriqui hinannahue hahquin hen mato yohirihbiti tah man pishinyamahi. ² Man hinancatsihscail tah hen honanai. Macedonia janinhahbo tah hen moa yohihohqui: Acaya janinhahbaan ta hinanti jaresscailqui, huetsa barin tsinquinihbo, hahquin. Man hinancatsihqui nincacax ta jaabo rihbi queenscailqui, hinanti. ³ Man hinanti jaresscail hen jato yohiho quescayama man jaiya cahen hea rabinan. Jaa copi cahen noquen huetsabo raanscail. Hen yohiho quescabi jacoionnon hihxon cahen jato raanai. ⁴ Man tsinquiscail non shinanah bi caibo macedoniobo hehbetan cahi nocoxon man tsinquiyamahiton mato merahiya tah non hihtimahtihi. Non hihtimahmis hihxon tah non mato yohihi. Man hahcointihi non shinanah bi man hahyamahiya cahen mato rihbi man hihtimahpan. ⁵ Jaa copi tah hen noquen huetsabo yohihipiui, jaabo pari mato janin nocoxon man hinancatsihqui coriqui tsinquimahabo. Tsinguscaxon tah man hinanti res pishinyaxihqui. Copijannahue hahcama bi queenxon copi man hinanyaxahnon.

⁶ Banaquin hahcajaquin hinannahue. Hicha tahma huai chian banahoxon cah non hicha tahma rihbi bimi tsinquitihi. Hicha banahoxon hicha rihbi tsinquiscaquin. ⁷ Shinanquin sirijaxon hinannahue, man hinancatsihqui tihi hinannoxon. Hinancatsihyamaxon hinanyamaquin. Queenxon res. Hinanyamahax rabinpaho hihiyamahi. Jenimahanan hinanai jonihon ta noquen Papa hihti jenimahiqui. ⁸ Man pishinaibo jatihibi ta Papan mato hicha hinanti hahtipahiqui. Jaan hinanah tah man jahuabi pishinyamascaxon jatihibi siribojaxonquin hahtipahscatihi. ⁹ Huishani joi jai quescari: Jabisaquin ta Papan hinanresiqui, jahuabijomabo hinanresquin. Pontejaquin shinanxon hahcaibo ta Papan jahuentianbi shinanbehnotimahihqui hihqui jaa joi. ¹⁰ Papan ta bero hinaniqui, bananicaton bananon. Piti rihbi ta hinaniqui, pihabo hihxon. Mato rihbi ta hinantihiqui, man jaibo rihbi hichajaquin. Man pontejaquin shinanxon hahcai rihbi ta hichajaxihquiqui, bimi hichajaquin hahcajaquin. ¹¹ Jatihibijaquin ta mato hicha hinantihiqui, man hicha rihbi hinanrihbinon. Man hinanah tah non bixhon boxontihi, Hahxon tah min noque jai Papan hihquibo. ¹² Jaa coriqui hinanquin tah man noquen huetsabo hihti yanapanai, pishini jihuetax bi siri sca jaábo. Hinanquin tah man jato hicha yohuanmarihbihi, Hahxon tah min noque jai Papan hihquibo. ¹³ Jascajaquin hihti sirijaquin yanapanxon tah man Criston joi siri man nincacoinal man jato jismatihi, noquen Papa qui siripi yohuanahbo. Yohuashihxonma man jato hinanxon texe jonibo rihbi hinanah ta Hahxon tah min noque jai Papan hihiyaxihcanihqui. ¹⁴ Noquen Papa qui siripi yohuanxon ta matohon shinanxon mato yocaxonyaxihcanihqui. Hicha shinan siri tah min jato hinanhohqui Papan, hahxon tah min jai, hih ta jayaxihcanihqui. ¹⁵ ¿Papan noque hinanai jahuentiho siri quin? Hihti siri copi tah non mato yohiti hahtipahyamahi.

10

Papan raantixon Pablonen yohiti hahtipahi

¹ Heanbi Pablon tah hen mato hihti yocascai. Mato tocan hihtimahpax bi hocho sca hen coshica hinscail hih roqui man jai, hea yohihi. Cristo ta hihti siri qui. Noque ta honaxonbi yohihiqui. ² Jaa copi tah hen mato hihti yocacai, mato tocanxon sca hihtimahxonma bi mato raquejaxon yohiyamayaxonon. Mai mehabaan shinanai quescajaquin noquen rihbi jai man caibaan shinanah bi tah hen hihtimahxonma mato yohiti shinanai, hen yohiti honanai quescajaquin. Mato tocanxon sca jascajati jayamanxon tah hen mato rahma yohihi. ³ Yorayahpahax bi tah non yoran rehtenanyamahi. Noque tah non huetsarihbihi rehtenanai. ⁴ Hahan mai mehabo rehtenanai cah non yamahi. Noquen hahan rehtenanti ta huetsapah qui, Papan coshiyahpa. Jayaxon tah non Satanasnen coshi shinanbo potojaquetanai. Jahuen coshiyaxon noque pantecatsihquibo cah non joi bichinai, jahuabi yohuanti shinanyamascaábo. ⁵ Noquen Papa Dios honancanmis hihxon pantehibo cah non jaton coshi jato bichinai. Cristo huestichin mato shinan hihboxon jahuenah sca mato hinanah man nincacoionnon tah non Papan coshiyahpahax yohuanai. ⁶ Maton nincayosmabo man matonbi pontenon tah non manatabahi. Man pontequin texejahiya can non jato casticanti jaresscail.

⁷ Criston raantibo ta honantih bi res qui. Shinannahue. ¿Cristona min quin min honanquin sirija sca jain? Cristona mia hihqui quescaribih ta non noque jai, honanhue. ⁸ Jahuen joi yohinicaxon non mato coshi hinannon ta noquen Hihbaan noque caisnishqui.

Mato tiromajanonma. Hea janexon ta jahuen coshi hea hinanihqui, hicha coti mato yohihax bi tah hen hihtimahtimahi, honanxon mato yohicoanax. ⁹ Quirica huishaquin hen mato rahtecatsihqui shinanyamanahue. ¹⁰ Quirica huishaquin ta coshin yohixon noque rahtehihqui. Nocotax sca ta jahuama quesca sca qui, jan yohuanai rihbi jahuama, hih roqui man caibo jai, hea yohihi. ¹¹ Jascapahxon honanhue: hochoxon quirica huishaxon non yohihi quescajaribiquin tah non mato tocanxon rihbi yohiti jai.

¹² Shinanyahpa joni tah qui hihquibo ta caibo yohuanihqui. Hea tah hen hahbetan senenai. Hean tah hen jaa mahuinaí, hih ta jacanihqui, hahbe honanma yohuanmis betan merananax. Hea cahen jascayamahi. Tsohbetanbi senenti shinanyamaquin. Jascapa yohuanai mentan tah hen hashoan siri qui, hih tah hen jatimaribihi. ¹³ Noque tah non jaa qui hihxon tah non Papan noque yohiti hinanai non huinonyamahi. Mato qui non jahuen joiya canon noque yohini quescabijaquin tah non mato yohihi. ¹⁴ Non mato qui nocoyamani hahcajayama tah non jai. Papan hea yohini tah hen huinonyamahi: Noque pari tah non Criston joi siriya mato qui noconihqui. ¹⁵ Caibaan Papan joi nincamaha nincacoinaibo jaiya tah non noquen jato nincamaha hahcajayamahi. Hashoan hicha tah hen yohuanymahi. Man hashoan sca nincacoinaiya tah non mato janin noquen tee caicanahi quescari hashoan hichaxon man nincacointi non queenai. ¹⁶ Jaatian tah non mato hoque pacho sca huetsa maibo janin joi siri yohihi catihi. Caibaan yohihi janinxon hean rihbi yohihax bi tah hen Hean yohihah ta nincacoinaniqui hihamahi.

¹⁷ Jaabo tah hen nincamatanai hihcatsihquish bi Noquen Hihbaan ta noque hahxonihqui hihnahue. ¹⁸ Hea tah hen siri qui, mia tah hen hahxonai Papan, hah non jaiya cahen Papan noque siri jisyamahan. Noque yohihi, jaa ta siri qui, hih noquen Hihbo jaiya cahen Papan noque siri jisiqui.

11

Papan raantibocamahibo Pablonen yohihi

¹⁻² Bebaan honanahma xontaco jahuen Papan hinanquin hahcajaquin tah hen Cristo mato hinannihqui, jaa huestichin mato hihbojanon. Noquen Papa Dios queenai quescaqin mato nincamati tah hen jai. Jaa copi tah hen mato yohihi. Shinanyahpa joni hihqui man shinannon hihquish caibo yohuanah bi ta jaton yohuan honanma qui. Jascapa yohuanbo nincanicabaxon hea sca nincanahue, jascapah hen mato nincamanon. ³ Ronon jahuen honaman Eva paranni quescajaribiquin mato sca tiroma yoshiman paranon tiroma shinan hinanmis, hih tah hen jai. Jaan paranah, man mesco shinanyahpahax res sca Cristo huesti queenyamascamis. ⁴ Non mato yohinihma bi huetsa Jesus joi mato yohihi jahuibo cah man jato nincacai. Non mato yohinihma bi huetsa Dios Yoshin caibaan mato bihmahax cah man bihresai. Non mato yohini joi sirima bi huetsa joi yohihahbaan cah man nincarihbiscai. ⁵ Mato qui noconihbo quiquin raantibo hihqui man shinanah bi ta hea huinonyamacaniqui. Honanxon copi tah hen mato yohihi. ⁶ Yohuani sirixonma bi tah hen honanquin sirijahi. Jaa tah non jatihibijaquin mato jaajismanihqui.

⁷ Papan joi siri tah hen jahuabi cobranxonma mato yohinihqui. Hea jahuama quescaxon mato jahuabi yocayamaquin, mato siribo quescapa. ¿Hen jascani tiroma quin? ⁸ Mato yanapanxon tah hen noquen huetsabaan coriquinin mato janin noque jihuenuhqui. Jaabaan hinanah tah non jaa coriquinin jihuexon non mato yohinihqui. ⁹ Mato tocan jihuetax pishinxon cah hen tsoabi jatsanjayamanih. Macedonia janinhax nocotai noquen huetsabaan ta hea pishinaibo hea hinannishqui. Mato jahuentianbi jatsanjayamanixon tah hen jenquetsahaxonbi mato jatsanjayamaribiyaxihqui. ¹⁰ Hen mato jahuabi yocayamahi ta shinanbehnotimacaniqui, Acaya main jihuetaibaan. Jaa hen hihcointi yohuanai ta Criston honanihqui. ¹¹ ¿Matohon shinanyamaxon hen jascajaniquin? Matohon shinaxon hen jascajani ta Papan honanihqui.

¹²⁻¹³ Hea Papan raanti hihqui quescari ta mato qui noconihbo jacatsihquiqui. Jaabo ta quesahihqui. Paranon ta yohicaniqui. Raantihicamahibo can. Papan yohihahma bi ta hehbe raantibo jacatsihquish yohuancaniqui. Jahua yohuanti yamahahbo hihxon tah hen hen hahcai quescajaquin jascabijaquin hen hahtihí, maton coriqui mato bichinyamabiresquin. ¹⁴ Jaabo jascaraí bi tah hen rahteyamahi. Satanas ta jascarihbiqui, Papan xabayahpa yonotihicamahi. ¹⁵ Satanas hihqui quescari jahuen hahxontibo rihbi siri hahxontibocamahiboya tah non rahtetimahi. Jaabo tiroma hihqui quescajaribiquin ta Papan jato tiromajayaxihquiqui, casticanquin.

Papan yonotixon Pablonen tenenih

¹⁶ Mato tah hen yohirihbihi: hea honanma hihqui shinanyamanahue. Hea honanma hihqui shinaxon bi tenexon hea nincanahue, hea jahua quin hen mato joi pishca yohinon.

¹⁷ Nea hen mato yohicatsihqui tah hen noquen Hihbaan yonohahma sca mato yohihi. Honanna yohuanihcamahax tah hen yohuanscai, caibo mahuinax hahqui sca yohuannoxon. ¹⁸ Hicha ta yohuancaniqui, nea nete mehabo mahuinax. Mai mehabohax ta jascacanicui. Jascaraiboya hea rihbi jascapan. ¹⁹ Honanquin hahcaxoxon man jascapa nincacatsihqui copi tah hen hea rihbi jascasci, mato nincamanoxon. ²⁰ Jaabaan mato hihbojaha bi cah man jato tenehi. Mato jatihibi bichinah cah man teneresai. Paran paranah cah man tenehi. Shinanyahicamahax yohuanaibo cah man nincacai. Bepasah bi tenexon tah man nincacai. ²¹ Coshijomaxon rah tah non jaabaan hahcai quescajayamaniqui. Hihtimah sca rah tah hen jai.

¿Jahuajahax jaabo yohuanihquin? Jaabo jai yohuan tah hen hea rihbi jaa jai, Honanna joni jaicamahax yohuan sca tah hen jai. ²² ¿Jaabo hebreobo quin? Hea rihbi tah hen jaa qui. ¿Jaabo israelitobo quin? Hea rihbi tah hen jaa qui. ¿Abrahamen baquebo jaabo quin? Hea rihbi tah hen jaa qui. ²³ ¿Jaabo Criston yonotibo quin? Hea hashoani. Tehquehihticamahax quescas tah hen yohuanai. Jato ta hen mahuinai, hashoan coshin teequin. Hashoan hichajaquin ta hea sipojacannishqui. Topontimajaquin ta hea rishqui rishquicannishqui. Hichajaquin hea tsehue tsehuejahabo bi tah hen mahuatihu bi rohánihqui. ²⁴ Rishquitiyaxon ta judiobaan hea rishquicannishqui, huestijaquinma. Hichajaquin cuarenta qui nocoti huesti rishquiti pishinmaquin. Pichca coti hea jascacacacquin. ²⁵ Quimisha coti hea jihuini rihbi rishqui rishquicacacquin hichajaquin. Macaman rihbi ta hea tsacacacacquin rehtecatsihquin. Quebijistima hian janin nontin cahi bi ta behchoman tsahcakah noquen nonti hihquinishqui, quimisha coti rihbi. Quebijistima hiaman noquen nonti hihquiya cahen nonabahinahax nonashinaribinih. ²⁶ Hicha bi res tah hen nihniniqui. Hueaman nichish rihbi jene meran cahi bi rohahi. Tiromabaan ta hea heen jahuaborabo bichincatsihxon rehtequin bi rohajanishqui. Heen caibaan rihbi ta hea rehtequin bi rohajanishqui. Heen nahuabaan rihbi sca hea rehtequin bi rohajaquin. Jemabo janinxon caibaan rihbi hea bihquin bi rohajaquin. Nihi naman cahax mahuatih bi rohahi. Quebijistima hiaman cahax hihquihi bi rohahi. Nincacacquin bi quesajahibaan hea bihquin bi rohajaquin. ²⁷ Tee teeti hea, yomanahiti. Yame teeshinah. Pihan hihqui. Xehan hihqui. Piti tenequin. Matsi tenequin. Jahuatohonbi rahcoti yamaha.

²⁸ Hashoan hicha rihbi tiromabo tenexon tah hen nete tihibi noquen huetsabohon shinanai, Jenquetsa jacanishquin hihxon. ²⁹ Noquen huetsa huesti yosmahiya tah hen hahbe yosmaxon quescaxon jaa yanapancatsihqui. Noquen huetsa hohchamahiboya tah hen hahbetanbi hihti benatai. ³⁰ ¿Hea tah hen coshi qui hih non jatihin? Hihyamahi rahan. Heen coshi yamaha jisibo hihquish tah hen yohuanitihu. ³¹ Noquen Hihbo Jesucriston Papa ta Papa Dios qui. Hahqui tah non jascabi yohuani siritihu. Jahuentianbi yohuanquin queyoyamaquin. Hea quesayamaha ta jaan honanishqui. ³² Damasco janin ta quiquin hapon joni Aretasnen hea bihti shinanxon jaa jema jahuen santonarobo coiranmanishqui. ³³ Hea jihcatsihquibaan bi ta jaton jema chique xehqui pishcaten noquen huetsabaan hea cainmaxon tasa qui nanexon rontanpaquexon botonah hea cahnenihqui.

12

Jismaxon Papan yohinih

¹ ¿Hea caya ta honan qui hih cahra non jatihquin? Jascari yohuanxon jahuabi bihtimaxon bi tah hen noquen Hihbaan hea jismanihbo, jan hea yohinihbo rihbi mato yohiscaci. ² Criston hea jismaha tah hen hea naihoah cahi jisniqui. Catorce baritian sca tah qui, hen jisni, naihoah hea cahi. ³ ¿Yorayahpa hen caniquin? ¿Yorajoma hen caniquin? Hen tah hen honanyamaha. Papan ta honanishqui. ⁴ Janoxon sca tah hen tsoan yohitima joi nincanishqui, joni yohuantima joi. ⁵ Papan hea jascacacacquin jismani copi tah hen jaya joiti jai. Heanbi hahxon mahuinax hahcaxayama tah hen jai. Heabi coshijoma jisibo res yohuani. ⁶ Hea tah hen honan qui hihquish bi cahen honanma yohuanai quescayamaha yohuani. Hihcointi yohuani. Jascari yohuanti hahtipahax bi tah hen hihyamahi. Hea jisxon, nincaxon res jascapa hea hihqui shinanhahbo hihquish tah hen yohuanai. Hea jahua hashoan quin shinanyamahahbo ta hen jascarai.

⁷ Hicha jan hea jismaha jisish, Hea tah hen hihti siri qui, hen jamis hihxon ta Papan hea moxan chahchiquin hahcaxaquin hahan jatsanti hisin hea hinannishqui. Hea tah hen hashoan siri qui hen jayamanon hihxon ta hea jaa hisin hinannishqui, Satanasnen hisinjaha tenequin hahcaxaquin hen tenenon. ⁸⁻⁹ Jaa hea potamahue Hihbon, hen quimisha coti jaá bi ta hea yohinishqui: Heen shinanyaxon tah min tenetihi. Miin coshiyaxon bi tah min tenetimahi. Heen coshiyaxon min tenehiya ta heen shinanyaxon min tenehi sirijaquin honantihcanishqui, hahquin. Jaa copi tah hen hihti jenimahanan, Henabi tah hen coshi yamaha, hih hen jatihu, Criston shinan bihnoxon. ¹⁰ Cristo shinanxon tah

hen yosmahihti tenexon, tiromajaquin yohihahbo bi tenexon, yomanahiti tenexon, hea tiromajacatsihquibo bi tenexon, tiroma netebo tenexon, sirijaquin hean shinanai. Heen coshi yamahax bi tah hen coshihi, jaan coshijahah.

Jatohon Pablonen hihti shinanai

¹¹ Honanma yohuanai quesca tah hen huishahahqui, maton hea yohuanmahah. Mia caya tah min Papan raanti qui man hea jatihi bi tah man jayamahi. Hea jahuama man shinanai bi ta maton shinanah maton siri shama raantibaan hea mahuinyamahihqui, ni pishcabi. ¹² Maton jisnonbi tah hen hahan Papan raantibo honanti hahniqui. Tiromabo tenexon tah hen hahan honanti hahxon, hahan rahtetibo jaxon, tsoan jascajani que ma bi Papan coshiyaxon hean hahniqui. ¹³ Texe noquen huetsabo yohiquin quescabijaquin tah hen mato yohinihqui, jaabijaquin. Maton coriqui res tah hen bihyamaniqui, huetsa janinhah noquen huetsabaan hea hinannon bi. Matonah cah hen yocayamanih. Hen mato cobranyamahah bi rainyamayamanahue. ¹⁴ Shinanscanahue. Rabe coti canish tah hen hahquirihbi mato qui cacatsihscai. Mato tah hen jahuabi yocayamayaxihqui. Maton jahuaborabo tah hen queenyamahi. Matobi tah hen queenai. Jaton papaya jaton mama jahan jihueyaxahnon tsinixonti cahen baquebaan jayamahi. Jaton Papabaan cahen jaton baquena tsinixonti jai. ¹⁵ Criston shinan man bihnon hihxon tah hen jenimahanan hena jatihibi queyothi, heabi queyócahinnoxon caman. Man hehon hashoan hichama sca shinanai que bi tah hen matohon hashoan rihbi shinantihi.

¹⁶ Jahuabi yocayamaxon mato jatsanjayamaxon bi tah hen honan hihxon mato bihniqui. ¹⁷ Caibo mato qui raanxon rihbi tah hen jahuabi mato bichinyamanihqui. ¹⁸ Tito canon hihxon tah hen jaa yohihohqui. Hahbetan rihbi tah hen noquen huetsa raanhohqui. ¿Jahua Titon mato bichinhoxquin? ¿Jaa shinan huestiya non noque rabebi jayamahin? ¿Jascapa rabe non jayamahin?

¹⁹ ¿Jenquetsahpa shinanyahpabo non quin, man honannon hihxon non hahquirihbi huishahi shinan man jain? Jascama ta qui. Papan noque nincacai honanax tah non Criston janen yohuanai. Criston shinanya man janon hihxon res tah non yohuanai, noque huetsabon. Matohon shinanxon tah non yohihi. ²⁰ Mato qui nocoxon hea queenai quescapahboma hen mato meramis hih tah hen jai, maton rihbi man queenai quescapahma man hea meramis. Sinacananaiton mato meramis. Notsi notsihiton, sinajahiton, rehtenanaiton, tiromahi yohuanaiton, caibo qui baxexaiton, caibo mentan hashoan siri hihqui shinanaiton, cahchinan nininanaiton hen mato meramis. ²¹ Papan hea jascapahbo meramaxon hea hihtimahmamis hih tah hen jai. Caibo tah man rishtaya qui. Caibo tah man tsinihi, joni huetsa betan hihqui. Caibo haiboya joihi. Jascari hohchahohxon bi man rahma caman maton shinan ponteyamahiton merahax hea huaohihtihi jamis hih tah hen jai.

13

Quirica queyonoxon hihti yohihi

¹ Mato qui rabe coti canish tah hen hahquirihbi mato qui cacatsihscai. Noquen huetsa hohchataiya hahqui chanicatsihxon jan hohchatai rabexon jisish pari chaninahue. Rabe hihyamahax quimisha hihxon jisish chaninon. ² Neateman hohchanihbo tah hen hihti yohinihqui, jano jaibaan jatihixonbi nincacahbo. Jano hihxonma sca tah hen nocori-hyamaxon mato yohirihbihi, huetsa coti caribixon hen mato yohini quescajaribiquin. Mato qui nocorihibixon tah hen mato cahnetimascai. ³ Heen janayabi Cristo yohuanai man honancoincatsihqui copi tah hen jascajahi. Jaan ta tanamaxon hahcayamaquin mato pontehihqui. Coshin bi res ta mato chicho teetihqui. ⁴ Coshijoma quesca jihui qui hueonxon rehtenihbaan bi ta Papan coshiya sca jihuetihqui. Jaa bebon nichish noque coshijoma bi tah non jahuen coshi Papan hinanah hahbetan jihuetai, mato shinan hinannoxon.

⁵ Cristo man nincacoinan hihxon man jihuetai shinannahue. Matobi shinamehnahue. ¿Mato chicho Jesucristo jihuetai man honanyamahin? Nincayosmabo man hihamahiya ta jano jihuetihqui. ⁶ Non quesayamahi tah man honanyaxihqui. Hen tah hen honanai. ⁷ Man jahuabi tiromayamanon hihxon tah non noquen Papa mato yocaxonai. Honanxon non yohihi man honannon hihxonma bi ta man pontejaquin hahnon hihxon res non yocacai, noque honanma hihqui man shinanai bi. ⁸ Hihcainai joi cah non panteti hahtipahyamahi. Caijati res tah non yanapanti hahtipahi. ⁹ Noque coshijomabo hihqui bi mato coshi jonibo jaiya tah non jenimahi. Man hashoan coshinon hihxon ta mato yocaxonai. ¹⁰ Hahan hen jato tiromajanonma bi ta hahan hen jonibo coshimanon hihxon noquen Hihbaan hea shinan hinannishqui. Mato qui nocoxon hahan mato tiromajayamanoxon tah hen hochoxon pari nea quirica huishahi.

¹¹ Jahua yohiti tah hen yamascai, hea huetsabaan. Jenimanahue. Criston shinan bihnahue. Joni huetsa yohinahue. Jaa shinan huestiya jihuenahue. Texe noquen huetsabo betan siripi yohuannahue. Jaatian ta matohon shinannica noquen Papan mato yanapan-tihiqui, noquen jointi sirijanica noquen Papan. ¹² Noquen huetsabo hicotaxonnahue, noquen Papa shinanahannan. ¹³ Nenoxon ta noquen huetsabaan jatihixonbi mato qui joi siri raaniqui.

¹⁴ Jahuen shinan noquen Hihbaan mato hinannon hihxon tah non mato yocaxonai. Noquen Papan matohon shinannon hihxon yocaxonxon tah non Dios Yoshin mato betan jihuenon hihxon rihbi non mato yocaxonai.

GALATABO Galatabo qui Pablonen raanni joi

Galacia mehabo qui Pablonen joi raanai

¹ Hea Pablo tah hen Papan raanti joni qui. Jaabaanbi shinanxon ta hea jahuen raanti hihti tsoanbi yohiyamanishqui. Papan jato shinanmaha yohiyamaribiquin. Noquen Papa Dios betan noquen Hihbo Jesucristonen yohihah tah hen jahuen raanti qui. Hihquipi bi Papan teehihmaribihah ta jaanbi hea yohinishqui. ² Hea manahi noquen huetsabo betan tah hen mato yohihi, Galacia mai meha noquen huetsabon. ³ ¿Papan shinanya man siripi jihueyamahin? Noquen Hihbo Jesucristonen shinan hinanah man siripi jihueyamahin? ⁴ Nea tiroma nete queha noque bihinihniyanoxon ta noquen hohcha copi mahuanishqui, Jascahue noquen Papa Diosen jaah. ⁵ Hahxon tah min noque jai Papan hahqui jihuenahue.

Huetsa hahan hohcha potati joi yamahi, Cristona huesti

⁶ Papan ta matohon shinanxon Cristo raanxon Heen baquebo sca hihnahue janishqui. Jan jascajaquin hahxonah bi tah man histon jaa jenehax huetsa joi qui mahnejaquescai. Rahte tah hen jai, man jascaraiya. ⁷ Man hahqui mahnetai ta Criston joi ma qui. Caibaan ta mato tiromajahiqui. Criston joi siri ta mato huetsa shinanmacatsihcaniqui. ⁸ Non mato yohini joi huetsajacatsihquin huetsa joi sca non mato yohihi jaiya, noque hani chihi perehihnatai qui noque potanon. Papan yonotinin que bi huetsajaquin jan yohihiya, hani chihi perehihnatai qui jaa potanon. ⁹ Mato yohixon bi tah hen hahquirihbi yohihi: Non mato yohini joi huetsajacatsihquin huetsa joi sca mato yohihibo jaiya, hani chihi perehihnatai qui Papan jato potanon.

¹⁰ ¿Jascajaquin hen mato yohihi tsoa queenaiya hen yohihin? ¿Jonibo queenai hin? ¿Papa queenai nan? ¿Jonibaan costanai quescari hea yohuanai nan? Jonibaan costanai joi yohinicahax cahen Cristo hahxonnica jayamahan.

Criston Pablo jahuen raanti jani

¹¹ Hen mato yohinon, nincanahue, hea huetsabaan. Hen mato yohini joi siri ta jaabaanbi shinanax jonibo yohuanai ma qui. ¹² Noquen xenibo yohuanai ma ta qui, tsoanbi ta hea jaa joi haxemayamanishqui. Jesucristonbi ta hea yohinishqui, hea jahuen yohinica hihnon.

¹³ Judio joi nincanica hihparixon hen hahpahoni tah man chanihah nincanishqui. Jato hihti tiromajanoxon tah hen Papan baquebo chibanpahonihqui. Tiromaja tah hen jato japahoniqui, Papan joi nincacaibo queyocatsihquin. ¹⁴ Heen xenibaan joi hihti nincanicacatsihxon tah hen coshin teexon hehbe haxehibo hean mahuinbahinnihqui, jato yohinicascanoxon. ¹⁵ Jascapahax bi tah hen pontenihqui. Heen maman hea bihnon ta Papa Diosen hea janenishqui, jahuen raanti hen janon. Hani sca hen jaiya ta hehon shinanxon hea yohinishqui, jahuen baque hehqui raanxon. Jaatian sca tah hen pontenihqui. ¹⁶ Hehqui cainxon ta hea yohinishqui judiomabo hean jahuen joi siri yohihi canon. Hea yohihah tah hen manataxma caniqui, tsoabi yohuanquihnoxon manayamaquin. ¹⁷ Caibo jahuen raantibo rihbi neateman jan yohini tah hen Jerusalem janin jisi cayamaniqui. Arabia main tah hen caniqui. Jano canish tah hen Damasco jema janin joribiniqui.

¹⁸ Noquen Hihbaan hea yohini pecaho quimisha bari hihquish tah hen Jerusalem janin sca caniqui, Pedro jisi. Rabe semanan tah hen hahbetan janiqui. ¹⁹ Papan raanti huetsa tah hen jisyananiqui, Jacobo huesti, noquen Hihbaan jochica. ²⁰ Huishaxon hen mato yohihi ta hihcoinai siri qui. Hen tah hen quesayamahi. Papan ta honanishqui.

²¹ Jaa pecaho tah hen Siria mai janin caniqui, Cilicia mai janin rihbi. ²² Judea mai janin ha noquen huetsabaan ta hea jisyananishqui. ²³ Hea jisxonma ta joi res nincacannishqui, Noque tiromajapahonixon bi ta rahma Papan joi yohiscaiqui, jaa joi queyocatsihpahonixon. Hea pontéscai yohihah ta nincanishqui. ²⁴ Hea noquen Hihbaan teemascai honanax ta Hihti siri bi res tah min qui Papan, hihcannishqui.

2

Jahuen hahbe raantibo

¹ Catorce bari jano nichish tah hen Jerusalem janin caribiniqui. Bernabé rihbi ta hehbetan canishqui, Tito rihbi. ² Jano cahue noquen Hihbaan jaah tah hen caniqui. No-coxon tah hen hean yohihi joi siri jato nincamaniqui, judiomabo hean yohipahoni joi siri jenquetsahpa hin hihxon janohahbo yohiquin. ¿Yanca tee tee hen jain? Jaamajaquin hean coshichahinxon yohipahonihquin hihxon tah hen jaton xenibo sca hahme rihbi yohiniqui. ³ Hehbetan Tito cahi bi ta jaton nahua hihqui bi judicahinax noquen honantiyapahue

hahyamannishqui. ⁴ Moisesnin yohini quescajati ta jaiqui, Papan jihuetahbo janon tah non jato honantijati jai hih quesabo jai bi tah non jeen hahyamaniqui, ni pishcabi. Jaa quesabo ta noquen huetsabohicamahax hihcoxon noque quexenishqui, hahan honanti yamahiquin hihxon. Non tah non jato yohinihqui: Criston jihuetahbo janoxon tah non Moises nincati pishinyamahi, Cristo qui hinamehxon jaa huesti sca nincacoin, hahquin. ⁵ Criston joi coin huetsajayamahabho hihxon tah non jato honantijati jeen hahyamaniqui. Criston joi siriya res man banenon, huetsa joi mato yohiyamahabho.

⁶ Jerusalem janinhahbaan ta noque mahuinyamahiqui, hapo quescapahboxon bi. Papan jisi ta jatihibi jascapah rahsi qui. Hea nincaxon ta jahua hashoan yohiti pishinyamahiya Jasca tah qui hahxon, hean haxemahi joi qui jahuabi hashoan tsamanyamacannishqui. ⁷ Jahua hashoan yohiti yohiyamacanquin. Judiobo yohinica Pedro hihnon quescajaribiquin Judiomabo yohinica hea hihnon Papan noque caisni jixxon, Man haxemahi quescajaquin haxemanahue hahcanquin. ⁸ Judiobo nincamaquin sirijanoxon ta Pedroyaxon noquen Hihbaan jato nincamahiqui. Jascajaquin rihbi ta judiomabo nincamanoxon heyaxon judiomabo nincamahiqui.

⁹ Hea rihbi Criston raanti joni hihqui jixxon ta Jacobo, Pedro, Juan, jaabo rahsi hapo quescapahboxon, Jascanonbonahue, judiomabo yohitannahue, noquen non judiobo yohinon hahcannishqui. Noque jascjaxon ta noque jomaquin sca hehbetan Bernabé jaton hahbe teenicabo copi noque mehuetannishqui. ¹⁰ Jerusalem janinha yomanahtaibo non shinanbehnoyamanon ta noque yohicannishqui, jaa res. Noquen rihbi tah non yanapanti queenxon jascajati yohinihqui.

Pablonen Pedro ponteni

¹¹ Jaa pecaho ta Antioquia janin Pedro jonishqui. Jan janoxon jaamajahiya tah hen ponte res yohinihqui caibaan nincanonbi. ¹² Jacobo janinhax huetsa hahbe judiobo nocorihyamahiya ta judiomabo noquen huetsabo betanbi Pedronen pinishqui. Nocoscaiboya ta judiobo hahqui yohuanmis hihxon jato piquihnyama sca janishqui, huetsa shinan hahcacaquin. ¹³ Texe judiobo rihbi ta hahbetanbi huetsapahcainnishqui, jaton nahua betan pitimahicamahi. Bernabé rihbi jascari, shinan cahcoya sca. ¹⁴ Cahcotax ponteyamascaibo jixxon tah hen jatihibichin nincanon Pedro yohinihqui: Mia tah min judio hihquish bi judio quescayamahi jihuetai. Judio quescapahmaxon ¿jahua copi sca min judiomabo judionen jato yohihin?

Jascapah rahsi queyoyamanox manatai

¹⁵ Rabebi tah non judio qui. Noquen papabo cahen nincayosma nahuabo hihiyamanish. ¹⁶ Moisesnin yohini quescabijaquin hahxon bi cah non jascacoin noquen hohcha potatimahi, Papan noque siri jison. Jesus Cristo qui hinamehxon non nincacoinaiya pari ta Papan noque siri jisiqui. Jaa copi tah non non rabebi hinamehniqui, jaan noquen hohcha sohuhahiya Papan noque siri jison, Moisesnin joi nincacoinax jihuexon tah non hohcha potatimabiresai, tsoanbi. Judioxon bi tah non rabexonbi honanai.

¹⁷ Cristo huestichin ta noque hohcha sohuaati hahtipahiqui, Papan noque siri jison. Judiomabo hohchayahpa hihqui quescacoin rihbi tah non hohchayahpabo qui, noque rihbi. ¿Jaa copi non Criston ta noque hohchamahiqui non hihtihin? Hihiyamabiresi rahan. ¹⁸ ¿Non jenenai joi non bihtihin? Joi siri jenenihxon pari, nincati joi copi. ¹⁹ Moisesnin joi ta noquen nincati joima sca qui. Jaa joi nincacoin jaxon tah hen hea hohchayahpa hihqui hen honannishqui. Hahqui mahuatah quescaxon tah hen jaa nincayamascai. Noquen Papa Dios qui sca tah hen jihuetai. ²⁰ Cristo betanbi tah hen mahuanishqui. Hen queenai quescayama sca tah hen jai. Cristo queenai quescascai, hahbetanbi jihueti. Papan baque nincacoini tah hen jihuescai, jan hehon shinanax hea copi hinamehni honanax tah hen nincacoini jihuescai. ²¹ Noquen hohcha copi Cristo mahuanai ta hani shinan qui. Papan noque hahxonai jahuama quescapi tah hen jayamahi. Moisesnin yohini quescajaquin hahxon noquen hohcha potati non hahtipahiya cahen Cristo yanca res mahuatan.

3

Cristo huesti qui hinamehti

¹ Honanmabo tah man qui, Galacia mehabon. Jatihixonbi nincacahbo tah non sirijaquin mato yohinihqui. Jesucristo noquen hohcha copi jihuin hueonah mahuanai mato yohiquin. ¿Tsoan paranah man huetsa joi sca bichin? ² Nea res hea honanmanahue: ¿Jenquetsahaxon man Papan yoshin siri bihniquin? ¿Moisesnin yohini quescajaxon nan? ¿Noquen Hihbo qui hinamehxon man bihiyamaniquin? ³ ¿Yotiho honanyama man jain? ¿Papan yoshinya pehocohxon non mai mehabaan shinanai quescajaquin sca noquen shinan cañatihin? ⁴ ¿Papan mato yanca res hihti hahxonihquin? Yanca hahyamapahinon. ⁵ ¿Jahuen yoshin siri mato hinanxon hahan rahtetijaquin Papan mato hahxonai cahran? ¿Man jahuejahiya

mato hahxoniquin? ¿Man Moisesnin joi chibanaia nan? ¿Man nincacoinax noquen Hihbo qui hinamehtaiya nan? Hinamehti rahan.

⁶ Papan Abraham yohini quesca tah qui. Abrahamen nincacoinaiya ta Papan siri jisnishqui. ⁷ Nincacoinaibo ta Abrahamen baquebo qui. Jaa cah man honanai. ⁸ Nincacoinaiya jatihibi jonibo Papan siribo jis yaxihqui ta neateman jaan yohinishqui. Abraham yohiquin: Min nincacoinai quescapahiya tah hen jatihibi nahuabo hahxoncoinyaxihqui hihqui jan huishani joi. ⁹ Jaa copi honannahue: nincacoinaiya Abraham hahxonquin ta texe jonibo rihbi Papan hahxonihqui, nincacoinaiboya.

¹⁰ Papan jato siribo jisnon hihxon Moisesnin joi chibanaibo ta jaan hahxonaiboma qui; jaabo ta jaan casticanaibo qui. Huishani joi jai quesca tah qui. Nea quirica janin jai joi jatihibi tah man nincatihi, hahnoxon. Nincati pishinaibo jatihibi tah hen casticantihi hihqui jahuen huisha. ¹¹ Moisesnin yohini quescajahibo tsoabi Papan siri jisyamahi ta huetsa huisha joi janin jaiqui, hahan honanti bi res: Papan siri jisi joni ta nincacoinax hinamehtax jihuetai qui, hihqui. ¹² Moisesnin ta hinamehti yohiyamanishqui. Nea joi nincaquin tah man hahqui jihuetaihi hih ta janishqui.

¹³ Moisesnin yohini casticanti noque qui paquepanan ta noquen casticanti bixhon Criston noque paxajanishqui. Huishani joi jai quesca: Jihuin hueonah ta casticana rahsi qui, hihqui. ¹⁴ Jesucristonen noque hahxonni copi sca ta jan Abraham yohini quescajaquin judiomabo Papan siribo sca jisiqui. Jaa copi tah non nincacoinax hinamehxon jahuen yoshin siri bihresscai, jan hinantijani.

Cristoyahpabo res Papan hahxonai

¹⁵ Non hinantijaquin hahcai quesca tah qui, heen huetsabaan. Mahuaquin noque hinantijahax noquen huetsa mahuatipi pecaho tah non tsoanbi jan hinantijaquin yohihipi joi huetsajayamahi, jahuabi tah non jaa joi qui rechiyamarihibi. ¹⁶ Papan ta Abraham jahuen baqueyabi hinantijanishqui. Hinantijaquin jan yohihi ta Miin baqueyabi tah hen jaa rahsi mia hinanyaxihqui, hahnishqui. Miin baqueboyabi hih ta jayamanishqui, hicha yohiyamaquin. Huesti res, Miin baqueyabi, hihqui, Cristo yohihi. ¹⁷ Hinantijanixon ta cuatrocientos treinta bari pecaho Moises sca huishamaxon jaa huisha join jan hinantijani joi Papan huetsajati hahtipahyamanishqui. ¹⁸ Moisesnin joi cananquin hahcajaquin jonibaan jahuen jihuetai bichiya cahen jan hinantijani quescayama sca jaquehahna. Jascabi hinanresti cahen jan Abraham yohinish.

¹⁹ ¿Jascaraiya jahua copi sca Moises huishamanishquin? hih ra tah man jai. Jaa joi ta hahan honanti qui, jenquetsahpa tiromanica hbo non quin non honannon. Jahuen quiquin baque jonon caman res jaa joi nincacahbo ta Moises huishamanishqui, jan hinantijani jahuen baque noconon caman. Jahuen yonotiboyaxon ta Moises nincamanishqui, yohinica hxon Moisesnin sca jahuen caibo yohinon. Hicha yohihibo jaiya ta yohuanxonnica hihquitihiqui. ²⁰ Huestichin yohihiya cahen yohuanxonnica pishinyamascan. Hinantijaquin ta Papa huestichin yohinishqui, jaa copi tah non yohuanxonnica Moises pishinyamascai.

Jato haxemanoxon Moisesnin yohini

²¹ Papan hinantijati joiya Moisesnin joi bahi cahchinanicama jayamaquin hih sca rah tah man jai. Hiyamahi rahan hih sca tah hen jatihi. Moisesnin huishani joi hahan jihuetai joi hihquiya cah non jaa joi nincaquin noquen hohcha potati hahtipahan. ²² Jaa join tah non honanai, hohchayahpabo rahsi non hihqui. Jaa copi ta Jesucristo qui hinamehtaibo rahsi qui jan hinantijani Papan hinanyaxihquiqui, jaa nincacoinaiboya.

²³ Jesucristo qui hinamehti noque yohiyamaparixon ta Moises pari Papan huishamanishqui, jaa joi jai quescabijahi non jihuenon. Jasca tah non japahoniqui, noquen Hihbo qui hinamehti noque yohicanon. ²⁴ Jaa copi ta Moisesnin joi noque hanijaquin hahcajaquin quescanishqui, non Cristo sca bihnon. Hahqui hinamehtax hohchajomabo sca Papan noque siri jisnon hanijaquin hahcajaquin noque honanmaquin. ²⁵ Ma hinamehscaax tah non hanijanica h pishinyamascai.

²⁶ Jesucristo qui hinamehtax tah man Papan baquebo rahsi qui. ²⁷ Cristo qui nashimaha tah man Papan sahuemaha jahuenahbo rahsi sca qui. ²⁸ Judioboya nahuabo tah non hihamascai. Patoroyahpaboya patorojomabo hihamasca jai. Haiboboya bebobo hihamascai. Jatihibi scah tah man Criston yoraya qui, jaa huesti. ²⁹ Cristonah hihquish tah man Abrahamen baquebo sca qui. Abrahamen baquebo man jaiya cahen mato hinantijanixon Papan mato hinantihia.

4

¹ Non japahoni ta patoronen jahuen baque hanijati yohihi quesca qui. Baque pishca parihax ta jahuen papan joni quescapah qui, jahuabi hihboyamahi. Jahuen papan

jahuaborabo jatihibi hihboyahnoxihqui bi jahuabi hihboyamaparihi. ² Haxemanicahton haxemahata haxehiqui. Hanijanicahton yohihah, nincaquin, jahuen papan yohini nete noconon caman. ³ Jascapahbo tah non japahoniqui. Cristo qui hinamehyamaparixon tah non baque pishca hahcajaquin noquen nincati joibo nincapahonihqui, haxe hax noquen xenibo hihni quesdari jihueyahnoxon. ⁴ Non jascapahbo jihuetai bi ta jahuen raanti nete nocoscayia jahuen baque Papan raannishqui. Jaan raanah ta haibaan baquexo sca cainnishqui. Moisesnin yohini quesca ta jaxonnishqui. ⁵ Noque ta hahxonnishqui, Moisesnin joi nincacqui non jihueyamascanon, Papan baquebo sca.

⁶ Jahuen yoshin siri ta noquen jointi janin Papan jananishqui, jaan yohuanmaha non Papan hihnon, noquen joinbi. Jaa copi honannahue, Papan baquebo man hihqui. ⁷ Hinabo tah man hihyamascai, Papan baquebo sca. Jahuen baquebo jaan mato hihmahah cah man jahuen baqueboxon jan hinantijani man bihtih.

Shinan rabeyahpabo qui Pablonen masa shinanai

⁸ Noquen Papa Dios honanyamaparixon tah man huetsajaquin shinanpahonihqui, huetsabo dios hihqui man shinanah bi tah man jaamajapahonihqui. ⁹ Papa Dios tah man honanscaniqui. Hashoan ponte yohuani tah hen Papan ta mato honannishqui, hih hen jatihi. Jascapahboscaxon, jenquetsahpahi man japahoni quesca sca hahan hanitima shinanbo man bihribicatsihquin? ¿Jenquetsahpahi man yanca res yohuanai joi chibanrih-bicatsihquin? ¹⁰ Netebo, hoxnebo, baritianbo, jenetianbo, jascapahbohiya tsinquinicabo tah man qui Papan noque siri jisnon hihquish tsinquin. ¹¹ Jaa copi tah hen tiromajaquin shinanai. Yanca bi res cahran hen Papan joi mato nincamaniquin hih tah hen jai.

¹² Mato tah hen hihti yohihi, heen huetsabaan. Hea hihqui quesca nahue. Mato quescapah tah hen janiqui. Hea jano cahiya tah man nincaniqui. ¹³ Hisinax copi tah hen mato qui banenihqui. Hisinax banexon cah hen Papan joi siri man nincamani. ¹⁴ Hea hisinyahpa que bi tah man hea rahninxonma Johue hahniqui. Hea tenexon tah man Papan yonoti yohiquin hahcaxxon hea Johue hahniqui. Jesucristo yohiquin hahcaxxon hea sirijaquin bihquin. ¹⁵ Hen yohihah tah man hihti jenimaniqui. Hahtipahxon tah man maton bero tsecaxon hea hinanquehannihqui. ¿Jahua copi sca man shinan huetsajahin? ¹⁶ ¿Hen mato pontejaquin yohihah man maton rahui sca hea jisnin?

¹⁷ Mato tiromajanoxon ta Maton tah man sirijahi hihcaniqui. Bahi xehpoquin hahcajaquin ta mato mayamacatsihcaniqui, huetsa bahi man chibannon hihxon. ¹⁸ Sirijahiton yohihah ta siri qui, Mian tah min sirijahi hahquin. Jaa ta jatihibi tian yohihah siri qui, heen baquebaan, hea mato janin hihquiya, hen jano hihyamahiya, jascarihibihi. ¹⁹ Man Criston shinan bihnon tah hen hihti queenai, heen baquebaan, hisini quesca tah hen jai. ²⁰ Jenquetsahpa shinanza man quin hihxon tah hen masa shinanai, heen jananbi sca mato yohinixon hea jano rahmabi hihpahinon.

Agarya Sara

²¹ Moisesnin yohini joi chibancatsihxon hea yohinahue. ¿Nea jahuen huishani joi man honanyamahin? ²² Abrahanen ta rabe baque janishqui, huetsa cahen jahuen xobohoxon teexonnicah haibo quihah, huetsa cahen jahuen haibo quihah. ²³ Huesti cahen jaanbi jahuen hina haibo qui baquejanish. Huetsa cahen jahuen haibo quihah, jaa jayaxihqui Papan yohinih. ²⁴ Jaa haibo rabe janí quesca ta rahma jaibo qui. Rabejaquin Papan yohini quesca tah qui. Jan yohimenoni ta Siná mahchi janinxon noquen xenibo yohinishqui, hinapan baquebo sca jaábo. Agar ta jaa hiná qui, jahuen jane. ²⁵ Agar ta jaa Arabia mai janin Siná mahchixon yohini joi quesca qui, rahma jai Jerusalem quesca. Jahuen baquebo ta hinabo qui, jaton mama quescapahbo. ²⁶ Huetsa ta quiquin Jerusalem qui, hinama, jaa cahen noquen mama. ²⁷ Huishani joi jai quesca tah qui:

Baqueyosma ta baque bihyamanish bi hihti jenimascaiqui. Jahuentianbi camitaxma bi ta jenima behuahihqui. Baquejoma hihnish bi ta hicha baqueyahpascaiqui, beneyahpa haibo mahuinbahinquin hihqui jaa huisha joi.

²⁸ Mato tah man Papan hinanni baquebo qui, jan hinantijani. Isaac quesca tah man qui, hea huetsabaan. ²⁹ Jaa hina haibaan baquebaan neateman Dios Yoshiman baquebo tiromajapahoni quescajaribiquin ta rahma jacaniqui. ³⁰ ¿Jaabo yohiquin jahuaja hen Papan janishquin? Jaa baqueyabi hina haibo potahue, hinapan baquen ta hinantijani baque betanbi heen hinanti bihtimahiqui, hahquin. ³¹ Jaa copi honannahue, hea huetsabaan. Hinapan baquebo tah non hihyamahi. Quiquin haibaan baquebo tah non qui.

¹ Hinabo non hihamascanon ta Criston noque piconishqui. Papan noque siribo jisonn tah non Moisesnin yohini quescajatihi hihxon mato hihboyahpabo hihmarihbicanmis. Hiná tejoquin hahcajaquin mato bihcanmis. Jato nincayamanahue.

² Hea Pablonen tah hen mato hihti yohihi: Papan mato siri jisonn hihxon hahan judio honantiyahpajaquin maton yora man honantijahiya ta Criston mato jahuabi hahxon-timahihi. ³ Jascajaquin hahan honanti bichibo jatihibi tah hen sirijaquin mato yohihi: honantiyahpaxon tah min Moisesnin yohini jatihibi sca min hahtih, jahuabi pishinmayamaquin. ⁴ Papan mato siri jisonn hihxon Moisesnin joi chibanax tah man Cristojomabo sca qui, Papan mato hahxonni tah man yamascai. ⁵ Noquen tah non hinamehxon jan noque siri jisi non honanai. Jahuen yoshin siripan noque manahah tah non tenehi, jan noque hahxontijani hihti jiscatsihquin. ⁶ Jesucristo qui hinamehtaiboxon tah non nincacoinxon joni huetsahon shinanti jai, jato betan yanapanhanani. Judio honantiyahpa jaah ta jahuajoma qui. Jaa honantijoma jaah jahuajoma rihbi.

⁷ Siripi tah man nihpahoniqui. ¿Tsoan pantehah man joi coin nincayamascaín? ⁸ Jaa nincacointi shinanyama man jai ta noquen hihbaan mato hinanyamahihqui. Mato quenanixon ta jascapah hinanyamahihqui. ⁹ Hichatahma hahan paan soohihmati niahah tonco moanman soohihqui quescasca tah man jai. ¹⁰ Hen mato yohihi quescabijaquin tah man shinanxihqui. Honan tah hen jai. Criston ta mato yanapantihiqui. Mato jatsanjahibo ta Papan casticanyaxihqui. Tsoabo rah ta qui.

¹¹ Judio honantiyahpati ta jai qui hih roqui hea jai. Jascari yohuanpahonish bi tah hen jascayamascai. Jaa copi ta hea tiromajacaniqui. Honantijati yohixon tah hen Cristo qui hinamehti yohiyamaquehanai. Tsoabi ta hehqui sinayamaquehanihqui. ¹² Mato honantijacatsihquin jatsanjahibo jaabobi xatehihtax jobojomascapahinon hih tah hen jai.

¹³ Moisesnin joi nincaqui jihueti ta Papan mato yohiyamahihqui. Man queenai quescasca jihueti ta yohihihqui, heen huetsabaan. Man queenai quescarax jihuetax bi man hihpahoni quescayamanahue, mai mehabaan shinanai quescayamaahi. Joni huetsahon hihti shinanxon, joni huetsa yanapanquin hahxoncoinnahue. ¹⁴ Papan huishani hani joi ta nea qui: Miin hahbe jihuetai jonihon shinanhue, min miabi shinehta quescajaquin, hihqui. Jaa joi huesti nincaxon hahxoncoinnquin tah non Moisesnin yohini jatihibi hahresscai. ¹⁵ Yohinahnen hahcajaquin man joni huetsa jamis joni huetsa piquin xehahihnihax man queyocahinmis.

Rabe shinan:

Dios Yoshimana,

mai mehabaana

¹⁶ Papan yoshin siripan mato shinanmahi quescanahue. Jaatian tah man mai mehabo queenai quescayamascatihi. ¹⁷ Mai mehabo queenai quescati ta huetsa qui, neaho jahui. Dios Yoshin queenai quescati ta huetsarihbiqui, jaho cah. Noque nininanbehcoina shinanbo tah qui. Huetsa, jonibaana. Huetsa, Dios Yoshimana. Jaa copi tah man man shinanai quescajacatsihqui bi huetsan ninihah man hahyamascai. ¹⁸ Jaa copi ta Dios Yoshiman mato shinamaha man Moisesnin huishani nincati pishinyamascai.

¹⁹ Mai mehabaan shinanbo ta honantih bi res qui: tsiniti, rishtaya yohuanti, huetsa haibo betan hihresti, ²⁰ yoshinbo qui samati, yobeti, sinati, rehtenanti, yohuashihti, sinajati, notsiiti, huesti shinanya hihtima, joni huetsa qui rainyamati, ²¹ caibaan jahuaborabo bichinti, joni rehteti, pahenti, pahenax cahtimahti, texe jascapa shinanbo rihbi. Hen mato yohini quescajaquin tah hen mato yohirihbiscai, jascapahbo shinanya ta Papan jihue janin hihcotimabiresihqui.

²² Dios Yoshiman hinanai shinanbo ta nescapahbo qui: joni huetsahon shinanti, jenimahi jihueti, joni huetsa betan coincoini jihueti, teneti, sirijaquin yohuanquihnti, caibo hahxonti, nincacointi, ²³ sinaxonma honaxonbi yohiti, yobacahinti. Jascapah ta siri qui. Jascatima joi ca jahuenbi yamaahi. ²⁴ Criston joniboxon tah non rehtequin hahcajaquin noquen mai meha shinanbo potaniqui, mai mehabo queenai quescayamascai, mai mehabaan shinanai quescayamascai. ²⁵ Dios Yoshiman noque jihuemaha, jaa queenai quescari sca jihuenahue.

²⁶ Shinanahcamaxon paranaibo hihamascanahue, joni huetsa qui rainyamayamascai, huetsa jonin jahuabora jisish jahuena hean bihpahinon hihamascai.

6

Yanapanhanannahue jato jai

¹ Jaamajahax hohchataiton noquen huetsa meraxon, Dios Yoshiman shinanmahiboxon honaxonbi yohixon pontenahue, sirijaquin yohixon. Coiramaxon yohinahue, mato rihbi

man paquemis. ² Hiacaibo yanapanquin hahcajaquin noquen huetsabo teneti yanapan-nahue, tenehahbo. Jascajaquin tah man Criston yohihi quescajatihi.

³ Jahuabi hihyamahax bi hihti shinanyahpa hihqui shinanax tah non paramehscai. ⁴ Jenquetsahpa hin hihxon miin jihue jise. Jaatian tah min hicha tahni sca shinan jaax, hen tiromapahoni quescaiyama sca tah hen jai hih min jatihi. Caibo tah hen mahuinai hih tah min jatimahi. ⁵ Jatihibichin papiquin hahcajaquin tah non tenetihi noquenahbi.

⁶ Papan joi mato yohihi joni yanapannahue, piti siriboya jahuaborabo jatihibi hinan-quin.

⁷ Paramehyamanahue. Jan yohini quescajajaquin ta noquen Papan jaiqui: man nin-cayosmamis, Non bananixon tah non jai. ⁸ Non queenai quescajaquin mai meha shinanbo bananixon tah non tiromabo bihtihi. Dios Yoshin queenai quescajaquin jahuen shinan siri bananixon tah non queyoyamanox manati bihtihi. ⁹ Caibo sirijaquin hahxon-i jatsanyamanahue. Non yosmayamahiya ta jaa queenai tianbi copiquin sca noquen Papan noque sirijaquin hahxonrihbiyaxihquiqui. ¹⁰ Jaa copi hahtipahxon tihibi joni huetsa hahxonquin yanapannahue. Noquen huetsabo hashoan hahxonquin yanapanquin.

Queyonoxon jan hihti yohihi

¹¹ Heanbi tah hen nea huishahi. Hanibojaquin hen huishahi jisnahue. ¹² Jatón jonibo man janon ta mai mehakaan mato hahan judio honantiyahpati yohicaniqui. Papan noque siribo jisnon ta mahuaquin Criston hahxonnishqui hihtihi bi ta judiobo jato qui sinamis hihxon, honantiyahpati yohicaniqui. ¹³ Jaa honantiyahpaban ta Moisesnin yohini quescajayamacaniqui. Jaabo tah non honantijatanai hihnoxon res ta mato yora honantijacaniqui. ¹⁴ Mahuaquin ta noquen Hihbo Jesucriston hea hahxonnishqui. Jaa huesti copi ta Papan hea siri jisiqui. Huetsa joi ta yamabiresi qui. Criston hea hahxonah tah hen mai mehakaan shinan queenyamabiresai, mahuatatah quesca. Hea rihbi jascapa shinan qui mahuatatah quesca, hehqui jotimascai. ¹⁵ Papan jisi ta judio honantiyahpabo jahuen siriboma qui. Jaa honantijomabo rihbi jahuen siriboma. Behna shinanyahpa jonibo res ta jaan siribo jisiqui. ¹⁶ Behna shinanyahpahax jihuetaibohon Papan shinan-non, jan jato hohcha sohuanon, hih tah hen jai, jahuen quiquin israelibo yohihi.

¹⁷ Moisesnin huishani joi copi hea yocayamascanahue, hih tah hen jai. Heen yora janinbi tah hen hahan honanti hicha jai. Jesusen joi hen yohihi copi hea rishquinihbo nabaya tah hen qui.

¹⁸ Noquen hihbo Jesucriston shinan maton jointi janin janon tah hen yocaxonai, hea huetsabaan. Jascari rahan.

EFESIOBO

Efesiobo qui Pablonen raanni joi

Efeso janin jihuetaibo qui raanti

¹ Noquen Papa Dios queenaiya ta Jesucristonen hea yohinishqui, jahuen raanti hea Pablo janon. Jahuen raantixon sca tah hen mato yohihi, ¿Man jascabijaquin Cristo chibanyamahin, Criston baquebon? ² Hashoan sca noquen Papa betanxon noquen Hihbo Jesucristonen mato hahxonrohayahiquin hih tah hen jai, hea huetsabaan. Jaan mato sirijaquin shinanmayamahiquin hihxon tah hen nea joi pishca raanai.

Criston noque hahxoncoina

³ Noquen Hihbo Jesucristonen Papa ta hihti siri qui hihnahue, heen huetsabaan. Jahuen naihoq ueha shinanyahpabo sca non janon hihxon ta noque hihti hahxonnishqui. Noque hahxonquin ta jahuabi cahneyamahihqui, non Criston baquebo quen. ⁴ Naiyahpa mai hahriyamaxon bi ta noque caisnishqui, non Cristo biyahixhqui honanxon. Ponte siribo non janon hihxon ta noque caisnishqui, jaan jisi jahuabi tiroma non yamanon. ⁵ Non jaryiamahi bi ta noquehon hihti shinanxon yohinishqui jahuen baquebo sca non jayaxihnon. Hahmebi shinanax queenxon copi ta jascajanishqui. Jesucristo bichish jahuen baquebo sca non janoxihnon. ⁶ Non Cristoyahpa quen jan noque hihti hahxonai jishish ta Papa Diosen ta hihti coshi shinanyaxon jato hahxonresiqui jayaxihcanihqui. Jascari jaahbo hihxon ta Papan noque caisnishqui, hea huetsabaan. ⁷ Noque copi ta jahuen jimi potanishqui, noquen hohcha sohuanoxon. Non tiromani que bi ta Cristo non bihni quen Papan noque siri jisiqui. Criston noque jascaxanonai copi ta noquehon shinanxon non tiromani Papan shinanyamascaiqui. ⁸ Jatihibi honanyaxon ta jan honanai quescajaquin jascapahbojaquin noquen Papan noque hihti hahxoniqui. ⁹ Jascajati queenxon jan noque huesti yoraja sca jayaxihqui ta tsoabi nincamayamanishqui. Tsoabi nincamayamanixon bi ta noque sca jaan nincama sca jaiqui, jan shinannihbo non nincascanon hihxon. ¹⁰ Hen jato caisnixon haxemabonanixon sca jaton hohcha sohuaxona sca ta huesti yora sca jaticaniqui. Naihoq quehaboya nai naman mehabo huesti yora sca janon hih tah janishqui, Cristo huesti sca jatihibichina janon noquen hihbo.

¹¹ Non jari janonma bi ta Papan shinannishqui, jaanbi jan shinanai quescajijanicaxon noqueyaxon jahuen coshi shinan jismati shinanquin. ¹² Non jascahiya ta Papan yohinishqui, noqueyaxon jahuen coshi shinan jismati. ¹³ Maton rihbi sca tah man Cristo betan jihuenoxon nincacoinnihqui. Maton hohcha copi ta Cristo mahuanishqui hihcoina nincaxon tah man Cristo bihcoinnihqui. Man nincacoinaiton ta jahuen yoshin siri rihbi mato hinanxon mato honantijanishqui, Cristonahbo man hihqui man honanscanon. Jan jascajaquin noque qui Dios Yoshin hinantih ta neateman noque yohinishqui, joi huishamaquin. ¹⁴ Jahuen yoshin siri jan noque hinanscai quen tah non noquen Papa betanbi non jihueyaxihqui non honanrihbihi. Tsoanbi noque jahuen yoshin bichintimahi honannahue. Cristo noque bichi joyaxahnon caman tah non jaaya hihtih. Nea hen mato yohihi joibo honanax, noquen Hihbo ta hihti siri qui hihqui jihuenahue.

Shinan jato hinanxonhue Papan, Pablonen jai

¹⁵ Jan noque hahxonai copi tah hen mato yocaxonai, heen huetsabaan. Man noquen Hihbo Jesus nincacoinxon jahuen jonibo jatihibi man siribojaxonai yohihihi tah hen Hahxon tah min jato jai Papan hih hen jai. ¹⁶ Jascabihi jascaxon tah hen mato jaayocaxonai, hea huetsabaan. ¹⁷ Papan Dios, mia tah min noquen Hihbo Jesucristonen Papa Dios qui. Mia tah min Shinan Hihbo qui. Miin coshi shinan jato hinanxonhue, Papan. Shinancoina jaahbo jato hinanpaquehue. Hashoan sca mia honanbonahbo jaton jointi janin miin shinan siri niaxonhue. Mia honanbonahi jihuetaibo jato hinanxonhue Papan, hih tah hen jai, mato yocaxoni. ¹⁸ Papan mato caispaqueni quen jenquetsahpabo sca man jaa janin jayaxihquin man honannon hihxon tah hen mato yocaxonai, hea huetsabaan. ¿Nai hoque jahuen baquebo jano janon hihxon Papan mato bejojaxonai jahuentiho siri quin, heen huetsabaan? Man honannon hihxon tah hen mato yocaxonai. ¹⁹ ¿Noquen Papa jahuentiho coshi quin? Jahuen shinan jahan jan rahma mato hahxonai ¿jahuentiho coshi quin? Man honannon hihxon tah hen yocaxonai. ²⁰ Jahuen coshin ta Cristo teehihmaribinishqui. Jaa huenihhniribixon ta naihoq sca jaa mecayahoh, janoxon jatihibi hihbojati janin jan tsahonon, jano jaa tsahomaribinishqui. ²¹ Jaa huestichin sca ta jatihibi yohuan hihbo, jatihibi quiquin yoshin, jatihibi hapohhuan, jatihibi yonomis, jatihibi res jaan jato huinonihqui hashoan hihbojaquin. Jatihibi ta mahuiniqui, naihoq quehabo, nai nequebihahbo rihbi. Rahma jaibo, jayaxihquibo rihbi. Jaa mahuinnica ta yamahihqui.

²² Jatihibichin hihbo jahue hah ta Papan jaa janishqui. Noque jahuen baquebo rihbi sca janon ta yohinishqui, Cristo sca noquen hihbo hihnon. ²³ Noque tah non Criston yora sca qui. Jatihibi tian jatihibi janin hihnicahax bi ta yorayahpa rihbi qui, noque cah non jahuen yora.

2

Noquehon shinanxon Papan jihuemahi

¹ Man tah man jirijomabo japahoniqui, hea huetsabaan, maton hohchapan mato retehah mohitahpamabo Papan mato jisquin. ² Texe hihqui quescari tah man tiromahi janiqui. Quiquin yoshiman jihuetaibohax tah man jan queenai quescari man japahoniqui. Tiroma shinanbo hinanpaquenicaxon ta nincayosmabo qui hinanquin mato qui rihbi jascapa hinannishqui, man bihresnon. ³ Noque rihbi tah non jascapabo rahsi japahoniqui nincayosmabohax honanmabohax yohina quescapahbo japahonihqui. Queenax quescari tah non tiromapahoniqui. Shinanquin bi tiromajaquin shinanrihbiquin. Texe hihqui quescari tah non jascapahbohax non Papan sinatahbo janiqui, jan casticanyaxihquibo. ⁴ Non jascapahbo hihqui bi ta shinanyahpaxon noquehon hihti shinanxon hahxonquin Papan noque hahquirihbi te^hhihmanishqui. ⁵ Noqueyabi hahquirihbi Cristo teehihmanixon ta noque mohitahpabo sca janishqui, Cristo betanbi non jihuenon. Jahua copi mato hahxontimahi bi ta queenxon res mato queyoyamanox sca manataibojahiqui, heen huetsabaan, man jirijomabo japahoni que bi. ⁶ Noqueyabi Jesucristo teehihmanixon ta noque yohinishqui: Naihoh sca cahax hahbetanbi tsahopaquenahue. Jahuenahbo sca tah man qui hahquin noque yohiquin. ⁷ Jan noquehon hihti shinanai ta jatihibi jayaxihquibo rahsichin honanahbo hihxon noque jascaxonihqui. Non Jesucristonahbo copi ta jascajaquin jan noque hahxonihqui. Jatihixonbi honanahbo hihxon rihbi ta jascajaquin noque jihuemanishqui. ⁸ Jahua copi hahxontimahi bi ta queenxon res mato queyoyosmabo hahxonihqui. Man nincacoinaiton ta jascaxonihqui, hea huetsabaan, man siripi jani que ma bi. ⁹ Man sirijaquin hahcai copima ta mato queyoyosmajahiqui, heen huetsabaan. Jaa copi tah man Hen sirijaquin hahcai copi ta hea queyoyosmajahiqui hih man tsoabi jatimahi. ¹⁰ Papan jonijanibo tah non qui, hea huetsabaan. Joni huetsahon shinanxon yanapanmisbo non janon hihxon ta jascapa shinan noque neateman hinantjanishqui. Jayaxon non joni huetsa hahxon jihuenon sca ta Jesucristonahbo janahue hahquin noque jonijanishqui.

Criston hahxona jahuen jihuetahbo sca

¹¹ Shinannahue, hea huetsabaan. Noque judiobaan xohta yamanica Israel ta Papa Diosen yohinishqui, jahuen chini baquebo caixon jahuen joi sca chibannicabo sca non janon, jahuen honantiyahpahax noque rahsibi non jihuerihbinon. Jaton meqeman sca noquen papabaan noque honantijahah tah non jaa honantiyahpabaxon mato yohihi nahuabon non mato japahoniqui, maton yora janin jaa honanti yamanih quen. ¹² Cristojomabo tah man japahoniqui. Noquen caibomahax tah man noquen hihquihintima japahonihqui. Jahuen caisai joni jan noque qui raanxonti Papan yohinih bi tah man shinanyamapahonihqui. Ni jenquetsahax bi Papa qui catimabo tah man japahoniqui, Papa Dios honanyamahibo. ¹³ Hocho jihuetaibo quescapahbonish bi tah man jascayamascai. Mahuaxon Criston mato jihuemani quen tah man nea pishca sca jai, Papa janin sca. ¹⁴ Criston ta noque rabebi raejanishqui. Moisesnin noque yohini quescajayama man jani quen tah non mato jistahihmapahonihqui. Non jascapahbo jani que bi ta Moisesnin yohini quescajaquin Criston sirijaquin hahxonishqui, non hahtipahyamaha bi, hea huetsabaan. Yorayahpahax main jihuexon ta hahxonishqui, non hahyamascanon. Non rabe jonibo japahoni que bi ta noque huesti yoraja sca janishqui. Jema naponbi chique jai potojaquin hahcajaquin ta non jano huesti jihuenon Moisesnin noque yohini joi noque hahxonquin jaa joi queyoxonishqui noquen hahtima sca jaa joi janon. ¹⁵ Behnabohax huesti yora sca non janon hihxon ta hahxonishqui, rabebi yorabo noque huestijaquin, jahuenah sca. Jaa copi tah non sirijaquin sca shinanai. ¹⁶ Noquen shinan noque rabebi pontequin ta jahuen Papa janin noque rabebi hioyahnoxon noque copi mahuanishqui. Mahuaquin ta hahan nincayosmati shinan jaan noque sohuaxonnishqui, hea huetsabaan.

¹⁷ Jascaxaxon ta mato hocho hihquibo nincamahiqui man shinanquin sirijabahinnon. Hochoma hihquibo rihbi ta nincamarohahiqui, noquen rihbi non shinanquin sirijabahinnon. ¹⁸ Dios Yoshinyaxon ta noque hiohiqui, rabebi jonibo non Papa janin sca hihnon. ¹⁹ Jaa copi tah man noquen nahuaboma sca qui, hea huetsabaan. Noque rihbi maton nahuaboma. Papan jihuetahbo sca tah man qui. Mahbe nincacoinaiboxon tah non mato yohihi, noquen caibon hahquin. ²⁰ Shinan hihboxon ta xobojquin hahcajaquin Jesucristonen noque huesti yorajahiqui, hea huetsabaan. Noque ta bihresyamahiqui. Jahuen joi yohinicaboya jahuen raantibo raanxon ta joi nincamaxon noque tsinquihiqui.

Hahqui xobojati hahcajaquin hahqui pehi pohentibo, hahan xehuatiho hahcajaquin noque tsinquin. ²¹ Jaya sca sirijaquin xehuahihnihahinquin hahcajaquin ta huesti yorajahiqui. Non hichahi bi huesti yora janin noque jatihibi niaquin, jahuen jihuetaho sca. Jaa rihbi noquen Hihbo hih. ²² Mato rihbi ta jano niahihqui, hea huetsabaan. Jahuen yoshin siri jano jihuenon ta mato jano jihuetijahiqui.

3

Judiomabo yohinica Pablo jai

¹ Jaa copi tah hen mato yocaxonai, hea huetsabaan. Mato heen caibomabo hen Jesucriston joi nincamani quen ta sipo xoboho hea tsahoncannishqui. Tsahonnihbo ta rahma caman hea Pablo neno tsahotai. ² Matohon jan hihti shinana yohinica hen janon ta Papan hea yohinishqui. Jaa rah tah man honanscai, caibaan yohini. ³ Neateman jato janibijaquin yohiyamanihxon bi ta Dios Yoshiman hea honanmascai. Jaa tah hen pishca yohi sca jaahqui, nea huishaquin. ⁴ Papan raanah jahuejahi Cristo jonishquin hen honanyamahi shinan man jain? Nea hen huishahi jixson tah man hen honanbiresai man honanbonatihi. ⁵ Noque jahuen raantiboya jahuen joi chaninicabo ta rahma tahni honanmascanishqui. Jahuen Yoshin siriyaxon noque honanmaquin. Neateman ta jascajayamanishqui. Neateman ta jihuepahonihbo texe res honanmapahonishqui, hea huetsabaan. ⁶ Papan jihue-tahboxon ta jahuen jihueti janin jihueti judiobaan shinannishqui. Shinanxon bi ta jaton caibomabo rihbi jaton hahbe jihuetaho jatihi shinanyamacanpahonishqui. Jaton Papa Dios maton Papa rihbi jatihi shinanyamacanquin. Papan jato hahxontihi shinanxon bi jan mato hahxontimahi shinancanquin. Jesucriston joi nincacoinax man hahqui hinamehtai copi mato rihbi man Papan baquebo hihtihi ta shinanyamacanpahonishqui.

⁷ Jahuen joi nincamanica hen janon hihxon ta noquen Hihbaan hea yohinishqui. Jatohon shinanxon Papan jato hihti hahxonai yohinica mia jahue hahquin ta hea tee hinannishqui. Heanbi shinanxon hen jahuejati hahtipahyamahi bi ta jahuen coshi shinanyaxon jaan hea teemahqui. ⁸ Hean shinana texe nincacoinaibo hashoan siri que bi ta hehon shinanxon jaa tee hea hinannishqui. Jahuen shinan hihti caibohiya tah non shinanhahtannoxon caman toponxon bi jahuentihi shinanya hin hihxon non toponquin queyotimahi. Hea jahuama que bi ta heen caibomabo yohiti tee hea hinannishqui, jahua Papan shinanihquin honanahbo. ⁹ Nai, mai, neno jaibo rihbi jonijariyamaxon ta jan hahyaxihquibo jatihibi Papan shinannishqui, Cristoyaxon matoya noque huesti jonijati shinanquin. Jascajati shinanihxon ta jato yohipahonishqui. Yohiquin bi ta texejanishqui. Rahma pari ta jaa jone joi noque sirijaquin yohixon honanmascanishqui, hen sirijaquin yohiscanon hihxon. ¹⁰ Noque jahuen caisahbo ta naiho queha yoshin coiman jisisqui, jahuen sontaro hapobo betanxon. Jaabaan jixson honan sca jaahbo hihxon ta Papan hea joni huetsa yohimahiqui. Jatihibi jahuen joi nincamayamanihxon bi ta rahma Papan noque nincamahiqui. Noquen Papa jahuentihi honanya quin honanahbo tah hen yohiti jai. ¹¹ Neateman bi res jascajati shinanihxon quescabijaquin ta noquen Hihbo Jesucristoyaxon noque bixhon jahuen shinan jenquetsahpa quin non honannon hihxon jaan jismascai. ¹² Noquen Hihbaan noque hahxonni copi tah non raquexonma hihtimahxonma rihbi noquen Papa non yocacai. Non yocacah ta Papan nincatihqui. Jesucristo qui hinamehxon tah non Papan noque nincatih non honanai. ¹³ Hen mato yohihi honanxon tenenahue, hea huetsabaan. Hen mato nincamahi copi nahuabaan hea sipo xoboho tsahonyaxihquibo que bi ta hean mato nincamati noquen Hihbaan yohinishqui. Jaa honanxon masa shinanxonma tenenahue.

Noquehon Criston hihti shinana

¹⁴ Mato tah hen yocaxonai, hea huetsabaan. ¹⁵ Noquen Papa Dios ta jatihibichin papa qui, naiho quehabaana, nai naman mehabaana rihbi. Nescajaquin tah hen yocaxonai: ¹⁶ Miin coshi shinan jato hinanxonhue, Papan. Hani shinan hihboxon jato mehapaquehue. Miin yoshin siripan jaton jointi coshijamahue. ¹⁷ Jaton shinanbo hihbojanoxon hahan nincati shinanbo jato hinanpaquehue, Hihbon. Joni huetsahon shinanhannai jihuexon jahuentianbi mia jenebahintima shinan hinanxonhue jato. ¹⁸ Miin jointiboyaxonbi min jatohon shinana honanahbo, miin shinan siri jato hinanhue. Jahuentiho queen min jatohon jain honanahbo jato jascajaxonhue, Hihbon. Nincacoinaibo rahsibichin honanahbo jato mehaxonhue, Hihbon. ¹⁹ Min hicha hahpahoni non jatihibi honantimahi bi jatohon shinanxon min hahxonai jato honanmahue. Jaton jointi, jaton shinan, jato jatihobi hihbojabahinhue, Hihbon. Jatihobi sca mina jaahbo miin shinan siribo jato hinanxonhue hah tah hen jai mato yocaxonquin. ²⁰ Jahuen coshiyaxon ta jaan noque shinan hinanihqui, heen huetsabaan. Yocacatsihquin non shinana quescas res ma bi ta tosan shinannihma hashoan hihtijaquin jaan noque hahxonti hahtipahiqui. ²¹ Jaa copi Hahxon tah min noque

jai Papan hahnahue, Criston jonibon. Criston noque hahxonai copi jascabijaquin Hahxon tah min noque jai Papan hahnahue, jaayohiquin. Jascari rahan.

4

Dios Yoshiman noque huestijahi

¹ Noquen Hihbaan joi siri yohininica quen neno sipo xoboho tsahonnihbo tah hen nenoxon huishaquin mato yohihi, hea huetsabaan. Noquen Hihbaan jihuetahbohax sca jaa queenai quescari jihuenahue. ² Caibo mentan mato hashoan honan hihqui shinanyamanahue. Sinayosmabonahue. Shinancoinya janahue. Caibaan jatsanjaha bi sinayamahi. Sirijaquin shinanax joni huetsahon tenehahnannahue. Jascapa shinanyahpaboxon joni huetsahon shinancoinnahue. ³ Jahua copi sinacananaxma bi hahan jenimati shinan hinanhahnannahue. Dios Yoshiman hinanai shinanbo hinanhahnannahue tah man huesti shinanya rahsi man jihuetihi. ⁴ Mescó jonibo non japahonish bi tah non jaa yora huestiya sca jai, huesti yora sca. Papan hinanai jahuen yoshin ta huesti qui. Papan noque johue hahca tah non jatihibi catihi, noquen Hihbo huesti qui. ⁵ Cristo huesti nincaxon bihcocoinaibo res ta queyoyamanox manatiqui. Criston jane huestichin ta noque jexehon hihquimatanti jaiqui. ⁶ Noquen Papa Dios ta jaa huesti qui. Jaan ta noque jatihibi hihbojahiqui. Jatihibiyaxon ta jaan hahquiqui, jan queenai quescajaquin jatihibiya jaa hihqui. ⁷ Jan queenai quescabijaquin ta noque jatihibi mesco tee Criston hinanpaquehiqui. ⁸ Jaa copi ta Davidinin huishani joi janin nea jaiqui: Jahuen rahuibo bihtanax ta hinahihnatax bebohi caxon jahuen jonibo jahuen hinantibo hinanpaquehiqui, hihqui. ⁹ Hinahihnatai jan hihqui bi ta nai naman main caman bototax res sca hinatai yohihiqui. ¹⁰ Jaa bototai ta jaa hinatai joni qui, huetsama. Naihoh sca hinatax ta jatihibi hihbo jaan hihbojahiqui, jatihibi janin sca jaa jai. ¹¹ Jan hinanai teebo ta nescapa qui: caibo jahuen raantibo, caibo sca jahuen joi yohinicabo, caibo rihbi sca jahuen joi nincacoinmahi nihnicahbo, caibo rihbi sca pastorbo, caibo rihbi sca jahuen joi haxemanicahbo. ¹² Nincoinaibo jahuen teexonnihcabo rahsi janon ta jayaxon teexonti shinan noque hinaniqui. Jahuen teexonnicahbohax res sca non yohinani, shinan hinanhahnannahue, non coshion. Jahuen jonibo coshi shinanya hihnon ta jascapa noque hinaniqui. ¹³ Cristo chibancoinaibo rahsi non janon caman tah non shinan hinanhahnanti jai, jatihixonbi non Papan baque honancoinnon caman. Shinancoinaibo rahsi rihbi non janon, Criston coshi shinanyahpabo rahsi. ¹⁴ Baquen shinanya non jayamascanon. Pehi pishca nihuen potojaquetanxon boresai quescapahbo ta baquen shinanyahpabo qui. Joi coin yohihicamaxon bi quesa join paran paranah sca nihnich bahinma sca nichu, neri jahui, hori cahi, behnoti. ¹⁵ Jascapahboma bi hihcoini yohuanabo janahue. Joni huetsahon shinanxon yohiquin sirijahahn Cristo queenai quesa japan hihnahue, jatihibi tian jahuen shinanya sca nihnoxon. Jaa huesti noquen Hihbo quen jascanahue. ¹⁶ Mescó tee noque hinanxon ta mesco shinan rihbi noque hinanpaquehiqui, siripax res sca non joni huetsa yanapanhananon. Non jascari siripi jihuetaiya ta jaan noque coshi shinan hinaniqui. Jaatian tah non joni huetsahon shinanxon hahxonquin shinan hichajabonahi.

Shinan behnaya jihuetaiibo

¹⁷ Criston shinanyaxon tah hen mato yohicoi sca jai, hea huetsabaan. Papan joi-jomabo jihuetai quescayamanahue. Tiroma shinanya ta jaabo jihuetihqui. ¹⁸ Shinan siribo camabahinxon ta tiromabo res bihcanihqui. Tiromati queenax ta honanmabo sca banecaniqui, jahuen nahuabohax ta Papan jihueti janin jaaob nocotimahiqui. ¹⁹ Rabinyamascaax ta jonetax res sca tiromayamascaax janibi sca jacaniqui, hochiti quescasca. Tiromajaquin joni huetsa hahcatsihxon ta hahrescaniqui. Jaton shinan tiromabo huinomabahinrihbianquin. ²⁰ Jascapahbonoxonma tah man Jesucristo bihniqui, hea huetsabaan. ²¹ Jahuen joi coin yohihah tah man bihniqui. ²² Cristo bihriyama-hax man tiromapahoni quescayamascanoxon tah man Cristo bihniqui, hea huetsabaan. Tiromati jenipahichish tah man paramehtax hashoan sca tiromati shinanya japahoniqui. Jascapa shinan jenebahinquin behnabo sca bihnahue. ²³ Coton payo potabahinquin hahcajaquin shinan xenibo potabahinxon shinan behnabo sca bihnahue. ²⁴ Dios Yoshiman mato shinan behnabo hinannon hinamehnahue. Joni behnascaax Papan shinanai quesa sca janahue, pontebo sca, Papahon shinancoinaibo. ²⁵ Jaa copi joni huetsa betan yohuani quescayamascanahue. Hihcoinjaquin yohiquin. Jatihibi tah non huesti yora qui. Jaa copi paranyamascanahue. ²⁶ Caibaan sinamaha bi hohchayamanahue. Sinatax bi tah man histon siricahintih. Sinaya bepiyamanahue. ²⁷ Ni jenquetsahpa yoshimanbi mato hohchamayamanon janahue. Sinataiton mato hohchamamis. ²⁸ Yometso hihxon min Cristo bihniquin? Min tah min yometsohtima sca jai. Yometsohtaxma tah min teemis sca jatih. Noquen huetsabo yomanahaiton jahuara pishca jato bihxonnoxon tah min miin

mequeman siripi teetih. ²⁹ Yohuani tiromabohi jayamabiresnahue. Siripi yohuannahue. Masa shinanaibo meraxon hahan jenimati shinanbo hinannoxon sirijaquin yohinahue. ³⁰ Criston mato bichi jonon caman tah man honantiyahpabo qui, Dios Yoshiman mato honantijahah. Jaa benámayamanahue. Tiromahi yohuanquin man benámamis. ³¹ Jointi mocayahpa jayamanahue. Joni huetsa hichaquin shinan jayamanahue. Joni huetsa qui rainyamatima. Join bahchintima. Huetsa joni qui tiromahi yohuantima. Joni huetsa tiromajatima. Jascapa yohuantibo jenebahinscanahue. ³² Jascapahma bi joni huetsa yanapanti, joni huetsa hahxonti, jascapabo shinanbo caya bihnahue. Min tiromani Papan shinanyamascai quescajaquin rihbi, huetsan mia tiromajahah bi jaa shinanyamascahue.

5

Shinancoinaibo Papan baquebo jihueti

¹ Jahan jan queenai jahuen baqueboxon tah man Papan shinanai quescajaquin man shinantih. ² Matohon ta Criston hihti shinannishqui, hea huetsabaan. Noquehon jenimaxon Papan bihrohanon ta noque copi jaa hinamehnishqui, noquehon hihti shinanax. Jascari joni huetsahon shinani jihuenahue.

³ Miin haiboma betan hihtima shinanhue, huetsan. Miin benema betan hihtima shinanhue, chocan. Jahuentianbi jascari jihueti shinanyamanahue. Rishtaya joibo jatihibi rihbi tah man jatima sca jai. Minamahbo meheti shinanyamahue. Jascapabo shinanbo ta Papan caisaibo jatimahiqui. ⁴ Haiboya yohuanti, honanma yohuanti, hosan yohuanti, jascapa yanca yohuanbo jayamanahue, hea huetsabaan. Jascapahma bi hahxon tah min hea jai Papan janahue. ⁵ Jano noquen Papa jaiton ta noquen Hihbo Jesucristonen noque jihuemayaxihquiqui. Jano ta tiromabo nocotimahiqui. Jano nocotimahibo ta nescapabo qui: jatihibi joni huetsa betan hohchati hihquibo, rishta yohuanya jaibo rihbi, jahuenahmabi bihcatsihquibo rihbi. Jascapa ta noquen hihbohonma bi noquen hihbaan hahcai res queenih qui. Jascapahbo noque betan jihuetimahi honanquin sirijanahue. ⁶ Jascapahbo ta tiromama qui hihxon quesa joi yohuanquin mato parancanmis hihxon tah hen yohihi, hea huetsabaan. Nincayosmahax tiromahibo copi ta jascapa Papan hihti casticanyaxihquiqui. ⁷ Jaa copi jascapa tiromahibo jayamanahue.

⁸ Bahquish chian jihuetax quescari tah man honanmabo jihueti japahoniqui. Rahma tah man jascapahbo yamascai. Xaba chian jihuetaibo tah man qui, noquen Hihbaan mato honanmahah. ⁹ Xabayahpabo ta siribo qui, pontebo, hihcoinaibo can. Xabayahpabo sca jihuenahue. ¹⁰ Noquen Hihbaan jisi jahuejaha siri quin hihxon, maton shinaman jatihibi tanapaquenahue. ¹¹ Yamebaquebaan hahcai ta tiroma qui, jahuabi siri yamahi. Jato hihquihinyamanahue. Jato yanapanquinma bi hihtimahabo xabajaquin quescajaquin jato yohinahue. Tiromahi honanahbo hihxon yohinahue. ¹² Jonexon jaabaan hahcai ta tiroma qui, jaya joitimahi. ¹³ Non johuepan xabajaha ta janibi sca jatihiqui. Janibiscaya honantihbiresi. Yame chianxon non xaba jisi quescarihbihi honantih bi resi. ¹⁴ Jaa copi ta behua jaiqui.

Mohihue hoxahuan, Criston mia xabajanon jirijomabo janinhax huenihue hihqui jaa behua.

¹⁵ Man honanconnon hihxon tah hen mato yohirihbihi, hea huetsabaan: Jano man nichijisquin sirijanahue, Papan bahinbi nihnoxon. Honanmabo nichijis quescayamahax bi honanscaax nihnahue. ¹⁶ Hashoan tiromabocanaxon mato noquen Hihbo teexontimajacanmis hihxon chiquishxonma siribojanahue noquen Hihbo hahxonquin. ¹⁷ Jaabo tiromacanahi bi tah hen mato yohihi, hea huetsabaan. Non jahuejati noquen Hihbo queenihquin shinannahue. ¹⁸ Pahenyamanahue. Pahe xehahax pahenax tah non noquen shinanbo tiromahi. Pahenti qui hinamehtaxma Dios Yoshin qui caya hinamehnahue. ¹⁹ Hinamehti behuanahue, Papan join behuahi, noquen Hihbo qui behuahi, matonbi shinanax joni huetsa yohiquin sirijahi behuahi. Maton jointinin noquen Hihbo qui jenimaribihax behuaribinahue. ²⁰ Papan hahxonai tihibi yohihi Hahxon tah min noque jai, hahxon, hihqui janahue noquen Hihbo Jesucriston japan. Jascabihi jascanahue hea huetsabaan.

Haibo betan bebo siri res jihueti jai

²¹ Criston baquebohax nincacahhnani janahue.

²² Noquen Hihbo queenai quescajaquin maton benebo nincanahue, chocabaan. ²³ Noque jihuemanica Cristo noque hihbohi quescajaribiquin ta jahuen benen jahuen haibo hihbojatihiqui. ²⁴ Criston noque yohihah non nincatihijis quescajaribiquin ta jahuen benen yohihah jahuen haibaan jatihibi nincatihiqui.

²⁵ Maton haibohon queennahue, hea huetsabaan, jan caisaibohon queenax noque jihuemanoxon noquen Hihbo hinamehni quescarihbihi janahue. ²⁶⁻²⁷ Shinannahue. Tiromajoma ponte siribo non janon ta jaa hinamehnishqui. Rishtajomabo non hihnon, jahuabi tiromajomabo non janon. Hihti siribo sca noque bihyanaxon ta noque pontenishqui. Chocajquin hahcajquin ta jahuen join noquen rishta potanishqui. Potanaxon ta hahmebi hinamehnishqui, noquehon hihti shinanax. ²⁸ Jascarihbihi maton haibohon queennahue, maton yorahon man queenai quescapi. Jahuen haibohon queenai joni ta jahuenahbi jahuen yorahon queenihqui. ²⁹ Tsoabi tah non noquen yorabi non rahnamehyamahi, jahuentianbi. Picatsihxon tah non pihi. Hiquinax tah non rahcotai. Jascari tah non noquebi queemehtax coirametai. ³⁰ Jascajaribiquin ta Criston noque coiraniqui, noque jahuen yora quen. ³¹ Moisesnin huishani quescapah tah qui: Jaa copi ta bebaan jahuen papaya jahuen mama jenebahinxon jahuen haibo sca hihquihintihiqui, jaabo rabehax bi huesti yora sca janon hihqui Moisesnin huishani joi. ³² Jaabo rabehax bi huesti yora hihqui quescarihbihi ta noqueya Cristo huesti yora qui. Jaa ta honanyamacanpahonishqui, Papan jato yohiriyamahah. Rahma pari ta noque nincamanishqui. Honanquin sirijanahue. ³³ Mato jatihibi tah hen yohihi: miin haibohon queenhue, huetsan, mihri min queemehtai quescari. Joi bichinxonma miin benen mia yohihah nincahue, chocan.

6

¹ Baquebo sca tah hen yohihi. Maton papan, maton maman mato yohihah nincanahue, baquebon. Noquen Hihbo nincacoinnicaxon jaabo rihbi nincatahi man. Man jato nincacah ta siri qui. ² Papan yohini diez joi quihua ta huesti jaiqui, non nincacaiya jan noque hahxonti yohimenoni: Miin papa miin mama nincacoin sirijahue. ³ Nincacoinax tah min siripi jihuetihi, basi rihbi tah min main jihuetihi, hah ta noque Papan janishqui. Jaa shinannahue, baquebon.

⁴ Maton baquebo rainyamamayamanahue, baqueyapabon. Sinamaxonma bi noquen Hihbaan shinanyaxon sirijaquin yohixon, pontexaxon jato hanijaquin sirijanahue.

⁵ Patoro teexonnicahbon. Maton patoronen yohihah sirijaquin nincanahue. Paranaxonma bi hahcoinqin jato hahxonahue. Man Cristo nincacoinai quescajaribiquin jato hahxoncoinnahue.

⁶ Patoronen jisiya res hahxonquinma bi hahcoinqin. Jascajaquin man Cristo hahxonai honanxon maton jointiboyaxonbi jato teexonahue. Non jascajati ta noquen Papa queenihqui. ⁷ Noquen Hihbo tah man hahxonai, joniboresma. Jaa copi maton shinanboyaxon bi teexonahue. ⁸ Patoroyahpaxon, jascapa hihyamahax patorojomaxon man sirijaquin hahxoncoina tihibi ta noquen Hihbaan honanishqui. Man hahcoina quen ta noquen Hihbaan mato hinanah jahuabora siribo sca man bihyaxihqui. Jaa honanscaxon hahcoinnahue.

⁹ Patorobo sca hen yohinon: Maton jonibaan naihoh queha Hihbo ta matonah rihbi qui. Jaan jisi tah man maton joniboya man jascapa rabe qui, patorobon. Huetsabo patoro hihqui, huetsabo rihbi jaton jonibo hihqui jaan jisyamaquin. Jaa copi maton jonibo tahtijayamascanahue, patorobon. Tahtijaxonma bi hen jato rahma yohihah quescajaribiquin jato hahxoncoinnahue maton.

Hahqui paxatibo

¹⁰ Huetsa joi sca hen mato yohinon. Jaya hihnoxon sca noquen Hihbaan coshi bihnahue, jahuen hihti coshi shinan bihquin. ¹¹ Tiroma yoshin mato qui nocotaiya, tenenoxon hahqui paxatibo bihnahue, Papan mato hinanah hahqui paxatibo. ¹² Jonibo betan tah non rehtenanyamahi, hea huetsabaan. Quiquin yoshinbaan ta noque rehteti shinanishqui. Jaabo ta hahbe yoshin tintinyahpabo qui, nai namanxon yonohi yoshinbo, tiroma shinanyahpa yoshimahhuanbo. ¹³ Jaa copi Papan hinanaibo bihnahue hahqui paxatibo. Yoshinbo mato tiromajahi jahuiton sca hahqui paxatiyaxon tenexon bihnahue. Yoshiman tsacahah bi hihquiyamahi quescas ta jatihiqui. Man tah man yobatih. ¹⁴ Sontaronen ta rehtenannoxon jahuen hahqui paxatibo sahuehiqui. Jahuen yami chinexhti pari bihquin, hahqui chipaxti. Jaatian sca jahuen xohpaxti sca sahuequin. Jaatian sca ta jahuen hahqui tapaxtibo sca bihxon sahuehiqui. Jaatian sca ta jahuen hahqui rahpaxti sca bihxon, jahuen boxpaxti rihbi maixon, jahuen machito sca bichiqui. Jatihibiyaxon ta tenescaiqui. Jascajaquin rihbi tenenahue, Papan hinanai shinanbo bihxon. ¹⁵ Quesatima shinanbo bihxon ponte res jihueti shinanbo rihbi sca bihxon, Criston noque sirijaquin jihuequihnti joi yohiti shinan rihbi bihquin. ¹⁶ Jaatian sca Cristo nincacointi shinan sca bihquin. Jahan caya tah man tiroma yoshin cahnematihi, jahuen chihiyahpa tahuan jan mato tehpushaha bi jahuen taha nocajahanquin. ¹⁷ Mato xahbanen tiroma yoshin paquenon Papan mato bihbohantih shinan sca bihnahue. Papan joi maton jointi janin

bexojati shinan rihbi sca bihnahue, jayaxon Dios Yoshiman mato haxemanon. ¹⁸ Jascapa shinanbo bihxon, jatihibi tian noquen Papa yocanahue hicha. Dios Yoshin qui hinamehxon yocaxonnahue. Tiroma yoshin quexequin hahcajaquin coiranhanan yocaxonti jenebahinyamanahue. Yocaxonnahue, Papan baquebo jatihibi yocaxonquin. ¹⁹ Hea rihbi yocaxonnahue. Raquexonma Cristo joi siri nincamanoxon hen yohuanti honannon hea yocaxonnahue, heen jananbi noquen Hihbo yohuannon. ²⁰ Jaa joi siri hen yohini quen ta hea neno sipo xobohoh tsahoncannishqui. Jaabi raquexonma hashoan sca yohiquin sirijanon hea yocaxonnahue, Papa queenai quescarih sca hen yohuannon.

Hahan quirica queyoti

²¹ Hea jenquetsahpi jain jan mato nincamanon hihxon tah hen Tíquico mato qui raanai, hea huetsabaan. Jaan ta mato jatihibi yohitihiqui. Hahan hen queenai noquen huetsa tah qui, hea huetsabaan. ²² Sirijaquin ta noquen Hihbaan joi yohihiqui. Jaa copi tah hen jaa raanai, noque neno jai joibo jan yohihah honanxon man sirijaquin shinannon hihxon. ²³ Janohah noquen huetsabo tah hen yocaxonai, noquen Papa betanxon noquen Hihbo Jesucristonen mato mehenon. Maton jointi siricahinnon hihxon, joni huetsahon shinanhannan hashoan sca nincacoinnon hihxon rihbi tah hen yocaxonai. ²⁴ Noquen Hihbo Jesucristohon shinancoinaibo jatihibi noquen Hihbaan hahxonnon tah hen yocaxonai.

FILIPOS Filipos janinhahbo qui Pablonen raanni joi

Filipos janinhahbo qui Pablonen raanai

¹ Jesucriston joni hihxon tah non nenoxon Timoteo betan Pablonen mato qui joi pishca raanai, noque huetsabaan. Man Jesucristo qui hinamehtax Filipos jema janin jihuetaibo jatihibi qui tah non raanai, maton pastorobo qui, jaton yanapannicabo qui rihbi man jascabi jayamahin hahquin. ² Papan shinanyahpahax man jahuen xabapan jihueyamahin hah tah hen mato jai. Noquen Hihbo Jesucriston shinanyahpa rihbi man jatihi honanax tah hen jascahi.

Pablonen jato yocaxonai

³ Noquen Papa Dios yocaxonquin tah hen mato shinanxon tihibi Hahxon tah min jato jai Papan hahcai. ⁴ Mato yocaxonquin tah hen jenimahanan mato yocaxonai. ⁵ Papan joi hen yohihi canon tah man hea yanapanai. Hea honanmenonixon yanapanxon tah man hea rahma caman rihbi yanapanai. Jaa copi tah hen Hahxon tah min jai Papan hahcai, mato shinanxon. ⁶ Maton jointi janin jahuen shinan siri Papan nianihxon ta mato shinan hinanbonayaxihquiqui, hihti siribo sca noquen Hihbaan mato merahi jonon. Jaa tah hen honanquin sirijahi. ⁷ Hehon tah man shinanai. Sipo xoboho hen tsahotai bi tah man hea yanapanai. Papan joi hen yohihi cahiya tah man hea jascajaribihhi. Papan joi siri hean honanmahi copi caibaan hea demandanaiya tah man hea yanapanrihbihhi. Hehbe teenicabo tah man qui. Jaa copi tah hen honanquin sirijahi: Maton jointi janin ta jahuen shinan siri Papan hicha janaxontihiqui. ⁸ Hean rihbi ta heen jointiboyaxonbi matohon shinanai, hea huetsabaan. Papan ta honanihqui. Matohon shinanxon copi tah hen mato yocaxonai. ⁹ Joni huetsahon man hashoan sca hihti shinanhahnannon tah hen mato yocaxonai. Man shinanhahnannon jatihibi honanbonahax hihti shinanyahpa man janon hihxon tah hen mato yocaxonai. ¹⁰ Jaatian tah man jahue mehabo man hahnon noquen Hihbo hashoan queenihquin man honantihhi. Hihti bi res shinan siriboyahpa sca tah man jatihi, jahuabi tiromabo yamascai. Noquen Hihbo Jesucristo joribixon sca ta jascapahbo man hihqui merabenayaxihquiqui. ¹¹ Siri shinanbo Jesucristonen mato hinanah, man jaya hihxon sca pontejaquin shinanax jihue man jaiya ta caibaan sca honantihiqui. Hihcoin ta Papan shinanya jihuecaniqui hih ta jayaxihcanihqui, noquen Hihbo qui siripi yohuani. Man jascanon hihxon tah hen mato yocaxonai.

Cristo hahxoni tah hen jihuetai hihqui

¹² Man honannon hihxon tah hen mato yohiscai, hea huetsabaan: Hea sipo xoboho tsahonxon bi ta Papan joi panteti hahtipahyamacaniqui. Hashoan sca ta caicanahiqui. ¹³ Criston joi siri hean nincamahi copi hea neno tsahonni quen ta hean yohihah quiquin hapon sontarobaan nincacaniqui, jatihixonbi. Texe jonibaan rihbi ta nincascacaniqui. ¹⁴ Sipo xoboho noque tsahonahbo jenquetsi non jatihin hihxon ta hea jisish hihti caibo noquen huetsabo shinan coshicanahiqui. Hashoan sca ta noquen Hihbo qui jaton shinan camacaniqui. Hashoan rihbi sca ta raquemehax bi raquetaxma sca coshin sca Papan joi siri yohihi jatihibi janin bocanihqui.

¹⁵ Caibaan rihbi ta hashoan sca hea tiromajahahbo hihxon Criston joi nincamahiqui, hehqui sinaxon. Huetsabaan ta shinancoinxon Criston joi nincamahiqui, jahan shinanxon. ¹⁶ Jahuen joi siri hen nenoxon bi sirijaquin yohinon Papan hea jomani honanxon ta jaa joi siri nincamascacaniqui. ¹⁷ Hoa jonibaan ta Cristo joi pantecatsihquiqui. Pantecatsihxon ta nincamacaniqui. Honanyamaxonma bi hea hashoan hohmishohmismaxon hihxon tiromajacatsihquin nincamacanquin. ¹⁸ ¿Jascapahbo noque qui jahuiya cahra jahua hi non jatihin? ¿Non benatihin? Hihyamahi rahan. Jatihibi janin ta Criston joi nincamacaniqui. Caibaan noque tiromajati shinanxon nincamanon, caibaan rihbi pontejaquin shinanxon yohiquin. Nincamanicahbo jaiya tah hen jenimahhi. Rahma jenimahax bi tah hen hashoan sca jatihi. ¹⁹ Rahma sipo xoboho hen tsahotai bi ta man hea yocaxona Papan hea manatihiqui. Jahuen yoshin siripan rihbi hea coshijaha tah hen tenetihhi. Hahan jenimati sca tah hen jai. ²⁰ Criston hea coirantihhi honanquin sirijaxon tah hen jaabo queenai quescajaquin hea jaahbaan bi hen sirijaquin shinanai. Raquexonma tah hen yohipahonihqui. Jascajaribiquin tah hen rahma rihbi coshiihnatai, Cristo heen hihbo hihqui honanahbo. Hea rehtehahbo bi tah hen tenetihhi. Rehteyamahah cahen jihueparixon jascajaribiquin tenetihhi, Cristo heen hihbo hihqui honanahbo. ²¹ Hea rehteyamahiboya cah hen Cristo teexoni jihuetaihhi. Rehtehah cahen hashoan siri rihbi jatihi. ²² Hea jihueparixon tah hen noquen Hihbo teexoni jatihi. Jenquetsi hen jatihin,

jihueti, mahuati, hen tah hen honanyamahi. ²³ Jahue meha hashoan siri quin hihxon tah hen caiscasquimahi. Mahuatax noquen Hihbo Cristo janin pontecahincatsih sca tah hen jai. Jaa ta hashoan siri qui. ²⁴ Jaa siri que bi cahen hea mohitahpa pari baneti man hashoan pishinai. ²⁵ Jaa copi tah hen honanscai. Banetahxon tah hen mato jatihibi yanapantihi man hashoan sca sirijaquin nincanon, man hashoan jenimahanan sca Criston shinan bihbonanon. ²⁶ Papan hea picomaha hen mato qui hahquirihbi nocotaiya tah man noquen Jesucristo qui siripi yohuantih, Noquen Hihbaan ta noque hihti hahxonihqui hih tah man jayaxihqui.

²⁷ Criston joi siri nincaqui jihuenahue, hea huetsabaan. Hen jano caxon jisxon, cayamahax rihbi banexon joi nincaxon, man jenquetsahpa shinanyabo sca man jain hen honanon. Man huesti shinanyaxon tenehi, huesti shinanyahax man teetai hen honanyaxahnon. ²⁸ Mato raquejahabaan bi raqueyamanahue. Jahua qui bi raqueyamahi. Mato masa tenemahibo ta hahan honanti qui. Mato jascaxon tiroma janin jaabo cayaxihquibohi honancanquin. Man tenehi rihbi ta hahan honanti qui, man queyoyamanox manatihi man honanon. Papan ta jascajaquin yohihiqui. ²⁹ Matohon shinanxon ta mato yohihiqui: Cristo qui hinamehtax man hahbetan jihuescatihi yohiquin. Cristo qui hinamehnixon bi masa tenexonribitihi. ³⁰ Maton jema janinxon hean tenehi jisnixon tah man rahma rihbi hean tenehi joi nincaxon maton rihbi sca masa tenexonai.

2

Jahuen quiquin jati jenebehmani Cristo jahui

¹ Criston jonibohax tah non yohinanti jai, shinan hinanhahnani. Joni huetsahon tah non hihti shinanti jai. Jahuen yoshin noquen jointi janin jai quen tah non nincacahananti jai. Yomanahtaibohon shinanti tah non jai. Jaa copi hen mato yohihi nincanahue. ² Hen hihti jenimascanon huesti shinanya jihuenahue. Criston matohon shinanni quescajanahue, joni huestahon shinanhahnani. Huesti shinanyahpabo res janahue, huetsajaquin shinaryamaquin. ³ Jahuabi sinatxma teenahue. Hihcoincamayamanahue. Noquen huetsa yohuanquihhnoxon mia mentan hashoan shinanya siri jaa hihqui shinanhue. ⁴ Mina res shinanyamahue. Mina res shinanxonma bi caibaana rihbi hahxonhue. ⁵ Noquen Hihbo Jesucristonen hahni quescajanahue. ⁶ Papa quescapahax bi ta jeenhihquish jonishqui, jahuen coshi jenebehmani. ⁷ Jahuen coshi xaba jenebehmani jonish cahen jonin yorayahpa sca janish. Yorayahpahax bi jonibo hahxonnica res quescascai. Joniscaax, caibo mentan hashoan jahuama quescascai. ⁸ Jaabo jihuemanoxon mahuahue Papan jaah mahuati. Jihui qui hueonahbo bi nincanicanon mahuanoxon caman tenequin. ⁹ Jaa copi ta Papan jaa yohinishqui: Mia tah min jatihibichin hihbo sca qui. Miin jane ta jatihibi jane mentan hashoan hani qui. ¹⁰ Jatihibi jonibaan sca raboxonen nihxon jahuen janen yocayaxihnon ta jascajanishqui, naihoh quehabaan, nai naman jihuetaibaan rihbi, mai chicho quehabaan rihbi. Jaabo yohihi ta jascanishqui. ¹¹ Mia tah min noquen Hihbo Jesucristo qui hih ta jayaxihcanihqui, jatihibi. Jaatian ta Papa Dios hihti coshi shinanya hihqui honanyaxihcanihqui.

Xabayahpabo non jai

¹² Jaa copi hea nincanahue, hea huetsabaan. Hea jano hihqui tian res ma bi hea jano hihyamahiya hashoan sca nincaquein sirijaxon, Criston shinanyahpabaxon mato janin jahuen shinan hichajanahue. Heen Hihbo queenai quescayama japaho hihquish jihuenahue. ¹³ Maton jointi janin teetai ta Papan coshi qui. Teeti shinan mato hinanxon ta hahan teeti coshi rihbi Papan mato hinanishqui, jan costanai quescascai man teexonnon. ¹⁴ Man hahcai jatihibi tah man join hihquinanxonma man hahtihi, tsohquibi yohuanxonma hahquin. ¹⁵ Ponte shinanyahpabo sca jihuenahue, jahuabi tiroma shinanaxma. Papan siri baquebo tah man nincayosmabo tocan man jihuetihi, tiromabo tocan hihquish bi ponte res jihueti. Mai mehabeto tocan tah man huishi xabatai quescascai man jatihibi, Papan xabayahpabo sca jai. ¹⁶ Johuepan xabajaquin hahcajaquin Papan joi honanmanahue. Jaatian ta Cristo jahuiya hen jenimayaxihqui, yanca res hen teeyamani hihquish copi. Mato copi tah hen Cristo bebon mequen nihyamayaxihqui. ¹⁷ Hean joi yohihah man noquen Hihbo nincacoinscai copi hea nenoxon rehtenoxihquibaan bi tah hen jenimaresai. Mato betanbi tah hen jenimahi. ¹⁸ Jascarihbihhi jenimanahue, hea hihqui quescari jenimanahue.

Timoteo betan Epafrodito

¹⁹ Histon tahnai tah hen mato qui Timoteo raanti shinanai, jenquetsi man jihuetaian honannoxon. Noquen Hihbo queenaiya tah hen basima tahnai raantihi, joiya joribiscayiya sca hen jointi siricahinnon. ²⁰ Timoteo quescapah tah hen neno huetsa yamahi, matohon shinancoinxon mato sirijaquin coirannicah. ²¹ Texen ta jatona res coiraniqui, Cristona jisxonyamaquin. ²² Timoteo tah man honanscai. Jahuen papa betanbi teeti quescascai

hehbetan Papan joi yohihi tee teenishqui, maton jisnonbi. Jenquetsahpa shinanya hin hihxon tah man honanscai. ²³ Jaa copi tah hen jaa raanti shinanai. Jenquetsaja cahra hea janoxihcanihquin, rehtequin, rehteyamaquin, honanxon sca tah hen jaa raanscati. ²⁴ Jaabi ta heabi mato janin histon tahni catihi, Criston hea picohah. Jan hea jascjaxontihhi tah hen shinanai.

²⁵ Epafrodito pari raanti ta jaiqui hihxon tah hen jaa pari raanti. Jaa ta heen huetsa qui, hea yanapannicah. Hehbe sontaro can. Man raanah ta joxon hea hihti yanapanacachihiqui, sirijaquin hahxonquin. ²⁶ Jaa hihti hisinai joi man nincaho honanxon ta masa tenehax mato jisi hihti cacatsihscaiqui. Jaa copi tah hen raanti shinanai. ²⁷ Mahua hisin ta jahoxqui. Mahuatihi bi ta rohatipishqui, Papan rohajahah. Jahan shinanxon, hehon rihbi shinanxon ta Papan jaa rohajahipishqui, tiroma honanya hihquish hashoan bena sca hen jayamanon. ²⁸ Jaa copi tah hen rahmabi jaa raanti shinanai, jaa jisish man jenimascanon. Jano caxon mato yohihah tah man jenimatihi, nenohax ta hea rihbi jointi siricahintihhi. ²⁹ Jaa copi jenimaxon bihnahue mato qui nocotaiton. Hahxon tah min noque jai, Papan, jaax jenimanahue. Papan joi yohinica jatihibi Johue hahxon, jaabo pishinaibo jato hinannahue, yanapanquin. ³⁰ Cristo teexonquin ta mahuatihi bi rohatipishqui. Hea yanapanquin tah man jaa neno raanhohqui. Joxon ta Hahrai mahuapaho hihxonma bi tenexon Cristo hahxonnoxon hea yanapanacachihiqui.

3

Ponte jihuécointi

¹ Huetsa joibo sca hen mato yohinon, hea huetsabaan. Noquen Hihbo qui jenimanahue. Mato yohixon bi hahquirihbi yohihi tah hen jatsanyamahi. Hen mato yohihah ta hihti siri qui. ² Mato judio honantiyahpa hihmacatsihquibo qui coiramenahue. Tiromabo qui coiramenahue, honantiyahpajacatsiquin noquen nami tiromajahibo qui coiramenahue. ³ Noque cah non Papan honantiyahpabo sca. Jahuen yoshin siriyaxon cah non jaa hahxonai. Jahuerohahi ta Cristo noquen jihuemanicah qui hih tah non jai. Jahuerohahi ta Cristo noquen hochi copi mahuanishqui, Papan noque hihti siri jisnon, hih tah non jai. Jonibaan res shinanxon hahcai ta jahuabi siriyamahihqui, Papan jisi, non tah non honanai. ⁴ Jonibaan res shinanxon hahcai Papan jisi siripaia ta hen yohuanti jaquehahnai. Caibo mentan hashoan yohuanti jaquehahnai. ⁵ Ocho nete hen jaiya cah hen hea honantjacannish. Hea cahen israeli baquebo, Benjamin cahen heen xohta xeni. Hea tah hihti judio hihpahoniqui. Moisesnin joi chibannicahax cahen fariseo sca hen janí. ⁶ Hihti nincati shinanxon tah hen Cristo joi nincacaibo hean tiromajapahoniqui. Moisesnin joi chibanquin cahen jahuabi pishinmayamani. ⁷ Hen japahonibo shinanhixton sca tah hen siri hihqui shinanyamascaniqui. Jaamajaquin res hen hahpahoni honanscaquin. Cristo nincatihi bi tah hen jaamajaresniqui. ⁸ Jaamajaquin rahan. Yanca bi res hen tee teeni tah hen honanscaniqui. Heen hihbo Jesucristo betan nichí caya hihti siri. Jaa bihnoxon tah hen hen japahoni jatihibi jenenihqui. Hen japahonibo ta pohi tsamanah quescá tiroma qui. Criston shinan caya tah hen hashoan honancatsihqui. ⁹ Jan hea jihuemati tah hen queenai. Papan hea siri jisnon Moisesnin yohini quescajati tah hen shinanyamascái. Cristo qui hinamehxon nincacoin sca tah hen jai, Cristo copi Papan hea siri hihqui jisnon. ¹⁰ Criston shinan tah hen honanbonacatsihqui. Hahan jan huenirihbini coshi rihbi tah hen honancatsihqui. Hahbetanbi rihbi nihni nihnixon tah hen tiromabo tenecatsihqui, mahuatax jan janí quescá jayanoxon. ¹¹ Cristo huenini hihqui quescarihibi sca jayanoxon tah hen jascajahi, hahtipahyamaquin bi hahtipahxon.

Coshin hahxoncointi

¹² Pishinyama ta jai hih tah hen jayamahi. Pishin ta jai, haxeti. Hashoan sca Criston hea haxemabonati tah hen queenai. Jaa copi tah hen coshin hahcai, Criston pari hea bihni quen. ¹³ Honan sca tah hen jai, honanbonayamascapan hih tah hen jayamahi, hea huetsabaan. Nescaja tah hen jai: Hen hahxonihbo shinanxonma tah hen noquen Hihbo hen coshin hahxonnoxihquibo hen shinanai. ¹⁴ Jan yohini quescá tah hen jacatsihqui, jan hea bochiuixon bihinixon caman. ¹⁵ Baquen shinanya hihyamaxon tah man hen mato yohihah quescajatihi. Hen mato yohihi quescayama man shinanaia ta Papan mato jaa rihbi honanmayaxihquiqui. ¹⁶ Non mato hinanni shinanbo jebahinyamanahue.

¹⁷ Hen hahcai quescajanahue, hea huetsabaan. Hen mato tocan jihuëpahoni quescapi jihuetaibo honannahue, jascari jihuënoxon. ¹⁸ Mato tocan jascacannis hihxon hen hicha coti mato yohini quescá sca ta jaiqui. Criston baquebo tocan ta jahuen rahuibo jaresscaiqui, hicha. Heen jointi janin huaohihanan tah hen mato yohihi. ¹⁹ Jascapahbo ta Papan queyoyaxihquiqui. Jatón pocobo ta jatón dios qui pahenaibo. Jatón shinan ta hahqui hihtimati qui, hihti siri hihqui jaabaan shinanah bi. Jatón shinan ta mai

meha res qui. ²⁰ Noquen jihue ta nenohah quescapahma qui, noquenah ta naiho queha qui. Janohax noque jihuemanica noquen Hihbo Jesucristo jonon caman tah non manatihi. ²¹ Noquen mahuanica yorabo ta jaan huetsajaxonyaxihquiqui, jahuenahbi quescas hihnon, hihti siri. Hahan jatihibi hihbojati coshiyahpaxon ta jaa coshiyaxon noquen yora behnajaxonyaxihquiqui.

4

Noquen Hihbo qui jenimati

¹ Jaa copi tenenahue, huetsabaan. Noquen Hihbo betanbi tenenahue. Mato tah man jahan hen hihti queenai heen huetsabo qui, heen jointiboyaxonbi hen matohon shinanai. Matohon tah hen hihti jenimahi. Mato copi tah hen shinanquin sirijahi. ² Mato betan jai haibo rabe sca tah hen hihti yohihi: Evodiaya Síntique. Noquen Hihbohon shinan-behcoinax huesti shinanya sca janahue. ³ Jascari rahan. Mia rihbi tah hen jascajaquin yocacai, huetsan, mia cah min hehbetanbi teecoinni. Jato rabebi yanapanhue, jaa huesti shinanya jaahbo. Rabebi ta hehbetanbi tee teenishqui. Clemente, texe noque betan teenihbo rihbi betan ta tee teecannishqui. Jaabo rahsichina ta Papan quirica janin jaton jane jaressaiqui, Papa betanbi jihueyaxihquibo huisha sca.

⁴ Jascabihi noquen Hihbo qui jenimahi jihuenahue. Jascari jenimahi jihuenahue hih tah hen jai. ⁵ Jatihibi jonibaan mato siri hihqui honanahbo tenehannahue. Noquen Hihbo ta nea pishca qui, hochoma. ⁶ Jahua copibi masa shinanyamanahue. Man hahan tiroma-jaquin shinanai jai jatihibi Papa yohinahue. Noquen Papa yocaxon, jan mato hahxonai rihbi Hahxon tah min noque jai Papan, hahxon man hahan masa shinanaibo yocanahue. ⁷ Jaatian ta mato coiranhanan jahuen jenimati shinan Papan mato hinantihiqui. Jonibaan honanti hahtipahyamahi shinan siribo ta mato hinantihiqui, man jointi siricahinnon, noquen Hihbo Jesucristo betan hihxon man sirijaquin sca shinannon.

Non bihcointi shinanbo

⁸ Nescapa joibo tah man nincaxon bihtihi, hea huetsabaan: hihcoinai joibo, shinanyahpaxon honanti siri joibo, ponte siri joibo, rishtajoma siri joibo, costanti siri joibo, nincati siri joibo, jatihibichin shinanah hihti siribo joibo, hahqui siripi yohuanti joibo. Jascapa siribo rahsi bihnahue. ⁹ Hen mato honanmani quescabijanahue, hen mato haxemani quescabijaquin. Hean hahcai nincanixxon, hean hahcai jisnixxon, jascajaribinahue. Jaatian ta sirijaquin shinanmanicaton mato manatihiqui, noquen Papan.

Coriquin yanapanaibo

¹⁰ Rahma man hehon shinanxon hahquirihbi hehqui coriqui raan sca jaiya tah hen noquen Hihbaan shinanyahax hihti jenimahi. Hehon shinancachihixon bi tah man raanti hahtipahyamahohqui. ¹¹ Pishincachihixon bi tah hen jaa copima mato yohihi. Jatihibi tian jenimati haxe tah hen janiqui. ¹² Pishinxon bi cahen sirijaquin shinanti honanai. Hicha jaxon bi cahen sirijaquin shinanti honanrihbihi. Jatihibi janin, jatihibijaquin tah hen yanixon sirijaquin shinanti haxenihqui, pihan hihxon bi sirijaquin shinanrihbiquin. Hicha jaxon bi jascajaribiquin, pishinxon bi jascajaribiquin. ¹³ Coshi hinannicaton coshijaha tah hen sirijaquin shinanti hahtipahi. ¹⁴ Jaabi tah man hea yanapanquin hahxonbiresai. ¹⁵ Mato nincamamenohax Macedonia mai janinhax hen caribihya tah man hea yanapanribiniqui. Caibaan ta hea yanapanyamanishqui, mato huestichin tah man raanxonniqui, man honanai quescas, Filipobaan. ¹⁶ Tesalonica janin hen hihquiton cah man hehqui raanah. Jaa pecaho cah man hahribihoxon raanrihbinih, hean honanai. ¹⁷ Maton coriqui jenipahixonma bi tah hen man hea hinanah copi Papan mato hashoan hicha sca hinanrihbinon hihxon hen bihniqui. ¹⁸ Man Epafrodito betan raanipi bichish tah hen hicha sca jai. Hen tah hen pishinyama sca jai. Man raanah ta Papan jisi hihti siri qui. Man hahqui raanah quescas tah qui, jaa copi ta matohon jenimahiqui. ¹⁹ Jan ta man pishinaibo jatihibi mato hinanyaxihquiqui. Nete hihbo hihxon ta tsama bi res mato hinanti jaxon Jesucriston mato hinanrestihiqui. ²⁰ Noquen Papa Dios ta queyoyosma xabayaha qui, jascabihi hahqui siripi yohuannahue hah tah hen jai. Jascari rahan.

Hahan quirica queyoti joi

²¹ Min jascabi jayamahn hahxon, jatihibi noquen huetsabo hea yohixonnahue, noquen Hihbo Jesucriston janen. Neno jai noquen huetsabaan rihbi ta mato jascajaribicaniqui. ²² Texe noquen huetsabo jatihibichin rihbi ta mato jascajahiqui. Quiquin hapon xoboho teetai noquen huetsabaan rihbi ta jaabaanbi shinanxon mato jascajaquin raanihqui. ²³ Noquen Hihbo Jesucriston xabapan jihuenahue.

COLOSAS

Colosas janin jihuetaibo qui Pablonen raanni joi

Noquen huetsabo qui Pablonen raanai

¹ Noquen Papa Dios queenaiya ta Jesucristonen hea yohinishqui jahuen raanti hea Pablo janon. Noquen huetsa Timoteo betan tah hen nea quirica huishahi. ² Man Cristo jeneyamahibo qui raannoxon tah non huishahi, heen huetsabaan. Man Colosas jema janin jihuetaibo qui tah non nea joi raanai. ¿Papan shinanya man jayamahin? ¿Papa Diosen sirijaha man jointi siripax jihuemyamahin?

Noquen huetsabo Pablonen yocaxonai

³ Noquen Hihbaan Papa tah non jascabijaquin yohihi, Hahxon tah min jato jai Papan Dios, hahquin. Non mato yocaxonai tihibi tah non jascajahi. ⁴ Man noquen Hihbo Jesucristo nincacoinxon jatihibi noquen huetsabohon man shinanai yohihah tah non jascajaquin noquen Papa yohihi. ⁵ Noquen naihoh queha Papan mato jihuemyaxihqui honanxon tah man noquen huetsabohon shinanxon jato hahxonai. Papan joi coin nincanihxon tah man jan mato jihuemyaxihqui joibo man honanscai. ⁶ Jaa joi coin ta Criston joi siri qui, mato qui noconih. Jatihibi janin nocoxon jano jihuetaibo shinan hinanax ta jaa joi caicanahihqui. Mato tocan ta jascarihbihihqui. Papan matohon shinanai tah man yohihah nincamenonihxon honanrihbihi. Jaan mato hahxoncoinai tah man nincanihxon honanrihbihi. ⁷ Jaa joi siri ta Epafrasnen mato nincamanishqui. Jaa ta hahan non queenai noque betan teenica qui. Criston teexonnich, hehbe teexonnich. Sirijaquin ta Criston joi mato yohixonnishqui jano caxon. ⁸ Neno nocoxon sca ta Dios Yoshiman shinanmaha man noquehon shinanai jaan noque yohihpishqui.

⁹ Jaa copi tah non nincamenohipixon mato yocaxonquin jeneyamahi noquen rihbi. ¿Man jenquetsahpabo jihueti Papa queenihquin? Man honancoinnon hihxon tah non mato yocaxonai. Dios Yoshiman mato jatihibi shinan hinanquin mato honanmanon hihxon rihbi tah non yocaxonai. ¹⁰ Papa queenai quesca sca man jihuenon. Man hahcai jatihibi jaquin hahan jan jenimahibo man janon hihxon tah non mato yocaxonai. Jascapahboxon tah man Papan shinanai quescajaquin jatihibi sirijatihi. Jaatian tah man hashoan siri-jaquin sca noquen Papa honanbonayaxihqui. ¹¹ Jatihibi shinan hinanquin Papan mato coshijanon hihxon tah non yocarihbihi, jahuen hihti siri shinan bichish man coshinon hihxon. Jaa shinanyaxon tah man jatihibi tenetih, yosmayamahi, sinayamarihbihi. Jenimaresi. ¹² Noquen Papan ta mato yohihihqui, Heen baquebo jano jihuenon hihxon hen hahxonai xabapan sca tah man jihuetih, hahquin. Jaa copi tah man Hahxon tah min noque jai Papan, hah man jatihi. ¹³ Tiroma yoshiman noque hihbojani bi ta Papan noque bichinxon noque mahnebohahihqui jahuen baquen jihuetaibo sca non janon hahan jan queenai jahuen baquen sca noque jihuemanon. ¹⁴ Jaa jahuen baquen ta noquen hohcha sohanihxon non hohchanihbo shinanyamascaiqui.

Cristo mahuani quen noque jahuen jihuetaibo

¹⁵ Noquen Papa jisyamaxon bi tah non jaa jahuen baque honanxon noquen Papa jenquetsahpa quin hihxon honanscai. Jaa Papan baque ta jatihibi hahnichahax jatihibi hihbo rihbi qui. ¹⁶ Jaan ta jatihibi janishqui, naihoh quehobo, main jaibo rihbi. Non jisibo, non jisyamahibo rihbi jaan jaquin. Meyayahpa yoshinbo, hapo yoshinbo, yonohi yoshinbo, sontaroyahpa yoshinbo rihbi, jatihibija ta jaan jato janishqui jahuena jaábo. ¹⁷ Jahuabi jariyamahi bi ta jaa janishqui. Jaan rihbi ta jatihibi jaxon jatihibi manamahiqui. Jaan manamayamaha cahen jatihibi queyoquehanai. ¹⁸ Noquen Hihbo ta jaa qui, noque jihuemanicah. Hihquish bi huenimenonish jihúe hihboscai jatihibi hihbohi. Noque jan caisai tah non huesti yora qui, jahuenah. ¹⁹ Queenxon copi ta jaa huesti Papan hihbo-manishqui, jaa huesti jatihibichin quiquin hihbo janon. ²⁰ Jaa mahuamaquin ta jatihibi noquen rahuiti shinan potamanishqui noque jahuen jihuetaiboscannon. Naihoh quehobo, nai naman mehobo, noque jatihibi hahbetan siripi yohuannon ta jihuín hueonmaxon jahuen Papanbi noquen hohcha copi Cristo jimi potamanishqui mahuamaquin.

²¹ Mato rihbi tah man Papan nahuabo hihpahoniqui. Jahuen rahuibohax tah man tiromajaquin shinanax tiromahi japahoniqui. ²² Jahuen sinatahbo que bi ta mato sirijaquin bichiqui jahuen baquebo sca man janon. Noquen yora quescapahax noque copi mahuanihxon bi ta mato sirijaquin Criston bichiqui. Jahuenahbo rahsi Papa bebonbi sca mato nihmanoxon mato sirijaquin bihquin. Hohchajoma siribo sca tah man jatihi. Papa mato hinanyahnoxon cahen mato sirijaquin bihquin. ²³ Criston joi jascabijaquin nincacoinaibo tah man jano nihyaxihqui jaa joi jeneyamahibo, jaa mato yohimenoni

yohuan huetsajayamahibo, huetsa joi qui mahnejaqueyamahihbo jano nichí. Jaa joi huesti tah hen jatihibi noquebo yohihi, Jaa yohinica sca mia jahue Pablon, Papan hea janí.

Papan joi nincamanicah, Pablo

²⁴ Papan shinan man bihnon hihxon jahuen joi siri hen mato yohini copi ta hea rahma tiromajacaniqui. Tiroma hea jaábo bi tah hen tenehax jenimahi. Noquen Cristo ta tiromajacannishqui. Jaa tiromajaquin pishinmanixon ta hea sca tiromajacaniqui. Heen yora jaabaan tiromajahah bi tah hen Cristo tenexonai. Jahuen caisaibo ta jahuen yora qui. Jaabaan jahuen shinan bihnon hihxon tah hen tenehi. ²⁵ Matohon shinanxon ta mato jahuen caisaibo yohinica hea janon hihxon Papan hea yohinishqui, jahuen joi hen nincamaquin sirijanon. ²⁶ Neateman japahonibo honanmayamapahonixon bi ta rahma jaa jone joi jahuen caisaibo honanmati jaan yohihiqui. ²⁷ Mato tocan Cristo jihuetihi ta honanyamacanpahonishqui Papan jato honanmayamahah. Maton man honanscanon ta mato judiomabo honanmati noque yohinishqui. Mato chicho Cristo jihuetaiya man jahuentiho siri shinanyahpa jaa jaiquin man honannon hihxon ta mato honanmahiqui. Jaa Cristo huesti ta noque jihuemanicah qui.

²⁸ Hahqui hinamehue hahquin tah non jatihibi joni sirijaquin yohihi. Jatihibi joni sirijaquin honanmaquin honanahbo. Jatihibi joni shinanyahpa siri sca Cristo bebon nihmanoxon hihxon tah hen yohihi. ²⁹ Jascapahbo janon hihquish tah hen shinan caman hahtanax tee teetai. Jan hea hinanai coshin tah hen coshin bi res tee teetai jato yocaxoni.

2

¹ Hicha bi res hen mato yocaxonai man honannon hihxon tah hen mato yohihi. Laodicea janinhabo rihbi, jatihibi hea jisyananibo rihbi tah hen jaayocaxonai. ² Joni huetsahon shinanxon honanmahananax maton jointi sirinon hihxon tah hen mato yocaxonai. Jaatian tah man Papan honanya jacointihi. Jahuen jone joi tah man honanquin sirijascathi, Cristo honancoinquin. ³ Cristo ta jatihibi honan siri jaíqui, jatihibi siri shinan rihbi. ⁴ Siripi yohuanicama jaibaan mato paranyamanon hihxon tah hen mato yohihi. ⁵ Hocho jaax bi tah hen mato betanbi hihquish quesca hea jai. Jaa shinan huestiya man jihuetai siripai nincacax tah hen jenimahi. Cristo qui hinamehxon man jeneyamabiresai yohihah tah hen hihti jenimahi.

⁶ Noquen Hihbo Jesucristo bihnish res sca jaa shinanya sca jihuenahue. ⁷ Noquen Hihbo honanquin sirijanahue. Jahuen shinanya rihbi haninahue hen mato haxemani quescajaquin hashoan sca jahuen joi bihbonaquin. Hahxon tah min noque jai Papan, hahquin hicha bihbonanahue.

Criston shinanyahpa non behna jihuetai

⁸ Mato hihbojanoxon honanichama jaxon quesa joibo mato nincamacanmis coirame-nahue. Honancoinxonma bi jonibaan shinanai joi res ta mato honanmacatsihcanihqui. Cristonahma bi huetsa joi mato haxemacanmis yoshiman joi.

⁹ Cristo ta Papan shinanya qui, Papan coshiyahpa. ¹⁰ Jaa ta hihbo qui, jatihibi quiquin yoshimana, jatihibi hapo yoshimana rihbi. Jatihibichin hihboxon ta mato shinan hinan-coiniqui. ¹¹ Mato ta honantijanishqui Papan jihuetahbo man hihqui honanahbo. Jonin mequeman honantijahahma bi Criston honantijahahbo tah man qui jahuen honantiyah-pabo. Mai mehabo queenai quescajaquinma bi Cristo queenai quescaja non jai ta jaa honanti qui. ¹² Jeneho hihquimaha tah man Cristoyabi tsahonni quesca janiqui. Jene chicho queha huenihihnihah sca tah man Cristoyabi huenihihnihi quesca jai. ¹³ Hohcha hohchayahpabohax tah man mahuascaibo japahonihqui. Maton yora janin jahuen honanti yamani jahuenahmabo quen. Man jascapahbo que bi ta Cristoyabi Papan mato jihuemanishqui maton hohcha jatihibi mato sohuaxon, noquenah rihbi. ¹⁴ Non tiroma-japahoni copi ta noque casticanti joi janishqui. Noquen hohcha copi hihqui bi ta Cristo jato rehtemaquin noquen casticanti Papan queyonishqui, yamascanon. ¹⁵ Jascajaquin ta hihti tiroma yoshinbo Papan jaton yohuanbo bichinishqui netetahbo. Jaton tiroma sontaro yoshinbo rihbi jascajaquin jaton yohuanbo bichinquin. Janibi ta jato hihtimahmanishqui. Cristo mahuaquin ta jato netemanishqui.

Naiho quehabo shinannahue hihqui

¹⁶ Jaa copi nescapa joibo nincayamanahue. Noquen pitibo, pitimabo, xehatibo, xehatimabo, non nescajaquin fiesta netebo huinomatibo, jascajaquin huinomatimahibo, hoxne xoo hihquiya non jascaxonma nescajati jaíbo, tantiti neten non jascaxonma nescajati jaíbo. Jascapahbo joibo mato yohihahbo bi nincayamanahue. ¹⁷ Pitibo, xehatibo, fiestabo, hoxne xoo netebo, tantiti netebo, jaa joibo ta janishqui. Jahua jan noque hahx-onyaxihquiquin honanahbo hihxon res ta jaa joibo Papan yohinishqui. Cristoyahpaxon tah non jaa joi xenibo jenescai. ¹⁸ Caibo ta namaquen jahua ra jisish, shinancoinichama

sca jaiqui. Jahua copi jascatimahi bi jascari. Papan shinanjomahax res sca yanca bi res yohuani. Jascapahboxon ta mato haxemacanihqui man piti tenenon hihxon mato haxemaquin. Papan naihoh queha yoshinbo qui sca man horanon hihxon mato haxemaquin. Jato nincayamanahue. Papan shinan mato bichincanmis. ¹⁹ Jascapahbaan ta noquen Hihbo bihcoinyamahiqui. Noquen Hihbo huestichin ta noque coshi hinanihqui huesti yora sca jaax non haninon. Criston shinanyahpa rahsi jaax tah non yanapanhanani jihuetax coshi hinanhahnanax hashoan sca Papan shinan bihbonahi.

²⁰ Cristo betan mahuanihbo tah man qui, mai meha shinan potanihbo. ¿Jahua copi sca man mai mehakaan hahcai quescajaquin man mai mehabo nincacain jaabaan mato haxemanon? ²¹ Xecoyamahue, piyamahue, meheyamahue, hah ta jacanihqui. ²² Jaaban yohihibo ta non piquin queyobahinaibo rahsi qui. Jaton yohuan ta jonibaan shinanax yohuanresai qui, Papan jascahue hahcama. ²³ Honan quescapa hihquish bi honancoinaima joi tah qui. Noquen Hihbo queenai quescajaquinma bi ta hahmebi shinanxon noquen Hihbo hahxonti jacanihqui. Noquen Hihbaan yohinih quescajayamaquin. Piti jaxon bi piti tenequin. Jascaxon tah non mai mehabo shinanbo non potatimahi jahuentianbi.

3

¹ Cristo betanbi ta mato hahquirihbi huenihhinishqui. Jaa copi jaan hinanaibo shinan benanahue. Noquen naihoh queha Papa patax tsahoxon ta noque hinanihqui. Jahuen shinan benabonanahue. ² Jaa janin res maton shinan hahnahue. Mai mehabo janin hahyamaquin. ³ Man tah man mahuascaniqui. Cristo betanbi sca tah man jihuetai, Papanahbo sca. Mahuati qui raquetimasci. ⁴ Noque jihuemanica Cristo sanareneni jahuiya tah man mato rihbi hahbetanbi janibi sca nihyaxihqui xabayahpabo sca.

Tiromapahonish bi behna shinanyahpa

⁵ Jaa copi maton shinan tiromabo jenebahinnahue, Cristojomaxon man bihnibo shinanbo. Joni huetsa betan hihqui hohchati. Haiboaya yohuanti. Tsiniti. Tiromahihti queenti. Caibaan jahuabora jato bichinti shinanai. Jascaxon bichinah ta santo chibana hajasca rabe qui. ⁶ Jascapahbo copi ta nincayosmabo Papan casticanpaqueyaxihqui. ⁷ Mato rihbi tah man jascapahbo hihpahoniqui, jascapa shinanya jaax. ⁸ Jascapahbo hihnixon bi jenebahinscanahue nea jatihibi: rainyamati, sinati, tiromajati, huetsa joni qui yohuanti, rishtaya yohuanti. Jascapa yohuanbo jenebahinscanahue. ⁹ Man shinanpahoni jenebahinax res sca joni huetsa betan yohuani quesayamanahue. ¹⁰ Shinan behna sca tah man bichi. Papan rihbi ta mato honanmabonaquin shinan behnajaxonihqui. Mato joni-janicahton shinanai quescajaquin sca man shinannon maton shinan behnajabonaquin. ¹¹ Noque behnabo tah non judiobaan nahuaboma sca jai. Judioboma rihbi sca jai. Judio honantiyahpaboma sca jai. Jaa honantijomaboma sca jai. Nahuabo hihyamascai. Nahua bi res nahuabo hihyamascai. Hinabo hihyamascai. Hinaboma hihyamascai. Jascapahboma sca jaax bi Cristoyahpabo rahsi. Criston jonibo rahsi.

¹² Papan ta mato caisihqui, jahuenahbi jahuen baquebo man janon mato yohiquin. Maton shinanquin. Behna shinanyahpaboxon sca, Papan caisaiboxon rihbi sca joni huetsa yanapanti shinan bihnahue. Joni huetsahon shinanxon hahxonti shinanbo bihquin. Huetsan yohihah nincati shinanbo, honaxonbi yohiti shinanbo. Jatsanjaha bi copitima shinanbo. Jascapa shinanbo bihnahue. ¹³ Tiromahibo tenenannahue. Heen huetsa ta hehqui tiromahiqui hih min jacatsihxon bi jan mihqui tiromahibo shinanyamahue. Maton Hihbaan maton hohcha shinanyamascai quescajanahue. ¹⁴ Jaa shinanbo jatihibi bihxon bi noquen huetsabohon shinanti shinanbo hashoan bihbonanahue. Noquen huetsabohon shinanquin tah man texe maton shinan sirijabahinai shinanyahpa siri sca janoxon. ¹⁵ Criston maton jointibo sirijan hihxon rihbi janahue caibo betan siripi sca jihuenoxon. Man jascari jihuenon hihxon ta mato huesti yorajanishqui. Hahxon tah min noque jai Papan, hahribinahue.

¹⁶ Criston joi rihbi maton jointi janin bexojanahue hicha. Shinanquin sirijahax honanmahanannahue pontejaquin yohinani. Behuaribinahue. Papan huishani behuahi. Matonbi shinanax behuaribinahue noquen Hihbo qui behuahi. Maton jointinin shinanax Hahxon tah min noque jai Papan hihqui behuahi. ¹⁷ Man hahcai jatihibi noquen Hihbo Jesusen janen hahnahue. Maton janan yohuanquin, maton mequeman teequin rihbi jahuen janen hahquin. Jahuen janen rihbi yohiquin, Hahxon tah min noque jai Papan, hahnahue.

Papa nincaxon jonibo yanapanti

¹⁸ Maton benebaan yohihah nincanahue, haibobon. Man jato nincati ta noquen queenihqui. ¹⁹ Maton haibohon queennahue, bebobon. Jato rainyamahaxma jihuenahue. ²⁰ Maton papan, maton maman mato yohiha jatihibi nincanahue, baquebon. Man

nincati ta noquen Hihbo hihti queenihqui. ²¹ Baqueyahpabon, maton baquebo yohiquin sirijaxon jato sinamayamanahue. Tiromajaquin shinancanmis. ²² Maton patoronen mato yohiha jatihibi nincanahue, patoroyahpabon. Sirijaquin jato hahxonahue jaabaan jison hihxon res ma bi hahcoinqin noquen Hihbo shinanahnan. Patorobaan jison hihquish hihquibo quescayamanahue. ²³ Jonima bi noquen Hihbo man teexonai honanxon man hahcai jatihibi coshichinxon hahcoinnahue. ²⁴ Noquen Hihbo Cristo tah man teexonai. Jaan ta mato copijaquin sca jan mato bexojaxonai mato hinanyaxihqui. ²⁵ Tiromajanibabo rihbi ta copyaxihqui jan tiromajahi copi. Casticanquin ta tsoabi cahnetimahiqui.

4

¹ Sirijaquin maton jonibo copijanahue, jonyahpabon. Sirijaquin honanxon jato copijaquin. Naihoh maton Hihbo rihbi jai honanxon sirijaquin jato copijaquin.

² Papa yocaquin jeneyamanahue. Jaa yocacahnan coiramenahue huetsa janin maton shinan camayamaquin. Hahxon tah min noque jai Papan hahti shinanbehnoyamaribinahue. ³ Criston joi siri hen nenoxonbi yohiti hahtipahnon hea yocaxonnahue. Papan nincamayamanxon bi rahma nincamascai joi siri tah qui hen jato yohihi. Jaa copi tah hen nea sipo xoboho tsahotai hea tsahonhohbo. ⁴ Hen sirijaquin jato jaa joi nincamanon hihxon Papa hea yocaxonnahue, hean yohiti jai quescajaquin hen yohinon.

⁵ Shinanquin sirijaxon Cristojomabo yohuanquihnnahue. Yohiti siripai tihibi jato nincamanahue. ⁶ Nincati queenahbo hihxon shinanza yohuantiyaxon jato yohuanquihnquin. Jahua min shinanain hahca tah man jascapa yohuantiyaxon jatihibi joni yohiti honanscati.

Hahan quirica queyoti

⁷ Tiqiconen ta jatihibi hen huinotaibo mato yohiyaxihqui. Hahan hen shinanai noquen huetsa tah qui. Sirijaquin ta hea yanapaniqui, hehbe Criston yonotixon. ⁸ Non jenquetsahpi jihuetain hihxon tah hen mato qui jaa raanai man honannon hihxon. Jaan mato yohihah man sirijaquin sca shinannon hihxon tah hen jaa raanai. ⁹ Onésimo rihbi ta hahbetan cahiqui. Jaa rihbi ta hahan non shinanai noquen huetsa qui, Papan joi nincanica. Maton caibo rihbi tah qui. Nenoha joibo jatihibi ta mato yohiyaxihcanihqui rabexon.

¹⁰ Bernaben chahi Marcos mato qui cahiya sirijaquin bihnnahue. Nocotaiya jaa yanapan yaxahnnahue, hah tah hen mato janiqui. Aristarco ta heyabi sipo xoboho tsahoncanhoxqui. Aristarco, Marcos, Jesus Justo hahcaibo, jaabo rahsichin ta mato qui joi raaniqui man jascabi jayamahin, hahquin. ¹¹ Jaabo quimisha res ta heen caibo qui, hea yanapannicahbo. Papan jihuetahbo hichanon hihxon ta yanapanquin hea sirijaquin shinanmacaniqui. ¹² Maton caibo Epafra rihbi ta Criston yonotixon nenoxon mato qui joi siri raaniqui. Noquen Papa yocaxonquin ta mato jascabijaquin shinanon mato yocaxoniqui. Papan coshiyahpahax sca man hohchati queenyamabiresnon. Man jahuejati Papa queenihquin man honanquin sirijaribinon ta mato hihti yocaxoniqui. ¹³ Mato hihti yocaxonxon ta Laodicea janinhahbo rihbi hahxonxon Hierápolis janinhahbo rihbi jato hahxonihqui. Man honannon hihxon tah hen mato yohihi. ¹⁴ Noquen rahonnica Lucasen ta mato qui joi raaniqui. Demasen rihbi ta mato qui joi raaniqui, man jascabi jayamahin, hahquin.

¹⁵ Laodicea jema janinha noquen huetsabo yohixonnahue, man jascabi jayamahin, hahquin. Ninfas, jahuen xoboho tsinquitai noquen huetsabo rihbi jascajaquin yohixonquin. ¹⁶ Nea quirica jixson, Laodicea jema janinha noquen huetsabo sca jismanahue. Hen jato qui raanho quirica rihbi jisnahue, maton. ¹⁷ Arquipo yohinahue, noquen Hihbaan tee hen hinanni hahxonquin sirijanoxon jan jison.

¹⁸ Heanbi huishaxon tah hen mato man jascabi jayamahin, hahcai. Hea sipo xoboho tsahotai shinanbehnoyamanahue. Noquen Hihbaan mato shinan hinannon hihxon tah hen mato yocaxonai.

1 TESALONICABO

Tesalonicabo qui Pablonen raanni joi

Raannoxon Pablo betan huishahibo

¹ Pablo, Silvano, Timoteo, noque rahsibi hihxon tah non mato qui joi raanai, noque huetsabon. Man Papa Dios betan hihquibo, man noquen Hihbo Jesucristo betan hihquibo qui tah non nea joi raanai Tesalónica jema janin. ¿Jahuen shinanya man jihueyamahin? ¿Man shinanquin sirijahax sca jihueyamahin?

Ponte res jihuexon nincacoinaibo

² Noquen Papa Dios yocaxon tihibi tah non Hahxon tah min jai Papan, hahcai, matohon jatihibi shinanxon. Jascajaquin tah non cahnexionma mato yocaxonai. ³ Nincacoinxon man noquen Hihbo hahxonai, joni huetsahon shinanxon man teexonai, noquen Hihbo joyaxihqui honanxon man tenehi, man jascajahi honanxon tah non mato yocaxonai. ⁴ Matohon ta noquen Papa queenihqui. Papan caisaibo tah non mato honanai, noquen huetsabaan. ⁵ Yohuanquin res tah non joi siri mato yohiyamanihqui. Papan coshi jixxon, Dios Yoshiman coshin hahcai rihbi jixxon, Papan joiya non hihqui honanconxon tah man nincacoinnihqui. ¿Mato qui nocoxon, matohon shinanxon, non tenexon mato hahxonyamanihquin? Man tah man honanai.

⁶ Caibaan mato tiromajanon bi Dios Yoshiman mato hihti jenimamanon tah man Papan joi bihcoinniqui, noquen hahcai quescajanicaahbo sca janoxon, noquen Hihbaan hahni quescajanicaahbo rihbi sca janoxon. ⁷ Man tenexonai honanxon ta Macedonia mai janin jihuetai nincacoinaibaan jatihixonbi sca jascajaribicannishqui, Acaya mai janinhahbaan rihbi jascajanon. ⁸ Mato janinhax ta noquen Hihbaan joi yohuanchanicanacaniqui. Macedonia janin res ma, Acaya janin res ma. Jatihibinco ta jahuen joi nocotihqui. Man Papan joi nincacoinai ta jatihibincoxon nincacaniqui, jahua yohiti non pishinyamascanon. ⁹ Man noque Johue hahxon maton santobo potaxon jihuenica Papa Dios coin man hihbojamahi ta yohicaniqui jatihibi janinxon. ¹⁰ Jahuen baque naihoh quehax jonon tah man manasca. Jaa jahuen baque ta Jesus qui, hihquipi bi Papan hahquirihbi huenini. Jayaxihqui casticanti ta jaan noque xahbanjamatihiqui.

2

Janoxon Pablonen hahni

¹ Yanca res ma tah non mato qui noconihqui, heen huetsabaan. Matonbi tah man honanai. ² Filipos jema janinxon noque hihti tiromajahipibaan bi tah non tenexon, noquen Papa shinanxon, raque potaxon, Papan joi siri mato yohinihqui, hihti pantehibaan bi. ³ Yohuan rishtaya tah non jayamahi. Sirijaquin honanxon tah non yohihi, paraxonma. ⁴ Noque honanxon non yohiti siriscas jixxon joi siri yohiscatannahue Papan noque jaah tah non jaa joibi yohihi. Jonibo queenai quescajaquinma bi noquen Papa queenai quescajaquin tah non yohihi. Jaan ta noquen shinan honanihqui. ⁵ Siripi yohuanihcama tah non jayamahi. Hahan paranti joi tah non jahuentianbi yohiyamanihqui. Man tah man honanai. Jahuabi paraxonma jahua maton coriqui bichinnxonma tah non joi siri mato yohinihqui. Papan ta honanihqui. ⁶ Jonibo noque qui siripi yohuannon hihxonma tah non yohihi ni matobi ni huetsabo noque qui siripi yohuannon hihxonma. ⁷ Criston raantixon tah non pishinxon mato yocati hahtipahi. Coshin yocati hahtipahxon bi tah non honaxonbi res mato yohinihqui. Jahuen maman jahuen baquebo coiranquin hahcai quescajaquin honaxonbi mato yohiquin. ⁸ Jascajaquin matohon shinanxon tah non jenimahanan Papan joi siri mato hinanax noquebi rihbi mato qui hinamehniqui, matohon hihti shinanxon. ⁹ Yobacahini non tee teeni tah man honanai, noque huetsabaan. Mato jatsanjayamanoxon tah non mato jahuabi yocayamanihqui. Papan joi siri mato yohihahnan jahuabi pitibo mato yocayamanoxon tah non teebahinahax tee teeshinapahonihqui.

¹⁰ Mato nincacoinaibo tocan tah non noquen Papa qui mequejaquetax jihuenihqui ponte res. Noque qui tiromahi yohuanti ta yamanishqui. Man tah man honancoinai. Papan rihbi ta honancoinihqui. ¹¹ Noquen baquebo sirijaquin yohiquin hahcajaquin tah non mato huesti huestibo sirijaquin yohipaquenihqui. ¹² Janoxon jan jihuemahi janin man canon hihxon ta Papan mato quenahihqui, jano jahuen xaba jaiton man canon. Jaa queenai quescari man jihuenon hihxon tah non mato yohinihqui. Hihti yohi tah non mato janiqui, hea huetsabaan, jascari jihueti man honannon hihxon. Man tah man honanai.

¹³ Non mato yohihi joi nincaxon tah man Jonin joimah ta qui, Papan joi ta noque yohicoinihqui hihxon man bihcoinniqui. Papan joi coin tah qui. Man nincacoinaibaan

jointi janin ta jahuen joi teetihqui. Man sirijaquin bihni copi tah non jascabijaquin noquen Papa yohihi, Hahxon tah min jai Papan, hahquin. ¹⁴ Judea mainxon Papan joi nincacoinax Jesucristo qui hinamehtaibaan hahni quescajanicahbo tah man qui, noque huetsabon. Jatón caibaan jato tiromajani quescajaribiquin ta matón caibaan mato tiromajarihbinishqui. ¹⁵ Papan joi yohinicabo rehtexon ta noquen Hihbo Jesus rihbi sca rehtexon noque sca jaa judiobaan rehtecatsihcaniqui, Papan joi nincayosmabaan. ¹⁶ Jatón nahuabo sca Papan teehihmanon non yohicatsihqui bi ta nincayosmabon jaabaan noque pantehihqui, jatihibi jonibaan rahuixon. Jascajaquin ta jatón hohcha senenjacanihqui. Pantehibaan bi ta sinaxon Papan jato jascabijaquin sca casticanyaxihqui.

Tesalonicabo Pablonen jiscatsihqui

¹⁷ Basima tahni sca tah non mato betan hiyamascaxon mato jisyamascaxon bi matohon hihti shinanax mato hihti jiscatsihquish mato qui cati non queenbiresai, heen huetsabaan. ¹⁸ Mato jisi hea Pablo cacatsihquish cahi bi ta hea cahi tihibi Satanasnén hea pantehihqui. ¹⁹ Noquen Hihbo Jesus jahuiya tah non jaa bebonxon mato hihti jiscatsihyaxihqui. Jaa bebon tah non matohon hihti jenimatihí. Jaa jahuiya tah non hihti jenimatihí, nincacoinnish man jano rihbi hihquiya. ²⁰ Man nincacoinaiya tah non jenimahi, hihti jenimahi.

3

¹ Basi mato jisyamascaxon tah hen joi hihti nincacatsihxon Atenas janin hea banenoxon hihxon noquen huetsa Timoteo mato qui raanhohqui. ² Jaan ta Criston joi siri yohiquin noque yanapaniqui, Papa hahxonquin. Jaan yohihah man coshixon hashoan nincacoinnon hihxon tah non raanhohqui. ³ Mato tiromajacatsihquibaan bi man nincacoinquin jeneyamanon hihxon mato coshi hinannon jaa raanquin. Tiromabo non tenenon ta noquen Hihbaan noque yohihihqui. Man tah man honanscai. ⁴ Mato betan hihparixon tah non jayaxihquibo mato yohinihqui, Noque ta jascayaxihcanihqui, hahquin. Hen yohini quesca sca ta jaiqui. Man tah man honanai. ⁵ Jaa copi tah hen honancatsihquin teneyamascaxon, man nincacoinparihin hihxon honannoxon mato qui jaa raanhohqui. Jenquetsahaxon ra tiroma yoshiman mato tanahah noquen tee yamacahinmis hihxon tah hen raanhohqui honancatsihquin.

⁶ Mato jistani joxon sca ta noque yohihpishqui. Man nincacoinai, joni huetsahon man shinanai, jascabijaquin man noque shinanai, mato jiscatsihqui non hihqui quescarihibihi man mato jai, noque ta sirijaquin yohihihqui. ⁷ Man shinancoinai yohihah tah non jenimarenenipiqui, heen huetsabaan. Nenoxon noque tiromajaxon hohmis hohmis-jahibaan bi tah non jenimascai. ⁸ Man noquen Hihbo nincacoinquin jeneyamahi joi nincacax tah non sirijaquin sca shinanai. ⁹⁻¹⁰ Mato qui nocoxon man honanti pishinaibo mato yohinoxon tah non yame yocaxon bariyahpan rihbi noquen Papa hihti yocacai. Jascajaquin yocaxon bi tah non mato shinanxon Hahxon tah min noque jai Papan hah non jai, matohon shinanax hihti jenimahanan.

¹¹ Noquen Papa Dios betan noquen Hihbo Jesusen noque bahi jismanon tah non yocacai mato qui canoxon. ¹² Non matohon shinanxon hahxonai quescajaribiquin man hashoan sca joni huetsahon shinanxon hahxonnon tah non mato yocaxonai. Papan mato jahuen shinan hinannon, jatihibi jonibohon shinanxon man jato yanapannon mato yocaxonai. ¹³ Jatihibi noquen huetsaboya noquen Hihbo Jesus jahuiya noquen Papa Dios bebon man rishtajoma jatihobi mequexona niyahaxnon, jan mato shinan coshijanón, tah non mato yocaxonai.

4

Noquen Papa queenai quescajati

¹ Nea quirica janquenjanoxon sca tah hen mato hihti yohihi, hea huetsabon. Mato tah hen hihti yocacai. Non mato haxemani quesca jihuenahue. Noquen Papa queenai quesca jihuueti haxenish jascabihi jihuenahue. Man rahma jihuueti quescahax bi hashoan rihbi sca jihuenahue.

² Noquen Hihbo Jesusen janén non mato yohini joi honanax jascabihi jihuenahue. ³ Papan baquebo man jihuecointi ta Papa queenihqui, man tsinihaxma jihuenon. ⁴ Shinancoinax man matón haibo betan man jihuueti sirinon. ⁵ Papa Dios honanyamahibaan haiboyati res shinanai quescajayamaquin. ⁶ Jascajaquinma tiromahaxma matón huetsa qui hohchayamanon. Noquen Hihbaan ta jascapa jatihibi copinica qui. Non tah non mato sirijaquin yohi sca janiqui. ⁷ Non rishtanonma bi jahuen baque siribo non janón ta Papan noque quenanihqui. ⁸ Jaa copi honannahue: nea hen mato yohihi joi nincayosmabaan ta joni yohuanaima bi Papa Dios yohuanai joi

nincayamahihqui. Jahuen yoshin siri mato hinannica ta noquen Papa Dios qui. Jaa ta yohuanihqui.

⁹ Papanbi honanmaha tah man maton huetsabohon shinanai. Noquen huetsabohon shinannahue hen mato yohi yohihahma bi tah man Papan shinanyaxon jatohon shinanscai. ¹⁰ Macedonia mai janin jihuetai noquen huetsabohon shinanxon tah man jato jatihibi yanapanscai. Man jato hahxonscai bi tah non mato yohihi, noquen huetsabaan, hashoan rihbi man hahxonbonanon. ¹¹ Siripi jihuetai shinan queennahue. Tsoabi jatsanjayamanahue. Maton mequeman teenahue, non mato yohini quescabihi. ¹² Man jascapahbohi jixxon ta yohitimabaan mato honantihiqui. Jascajahax tah man jahuabi pishintimahi.

Noquen Hihbo joribiyaxihqui

¹³ Jenquetsahax hoxanihbo jihuerihbiyaxihqui. Hen tah hen mato yohiscai, heen huetsabaan, nincayosmabaan hahcai quescajaquinma man masa shinanyamanon hihxon. ¹⁴ Jesus hihquish bi hahquirihbi huenini tah non honanai. Jascarihbihi huenitahbo ta hoxanihbo Papan hahbeyaxihquiqui, Jesus betan.

¹⁵ Noquen Hihbaan yohihah tah non nea joi mato yohihi. Noquen Hihbo jonon caman jihueti banexon tah non hoxanihbo beboxontimahi. ¹⁶ Noquen Hihbobi ta coshin quenatax botopaqueyaxihquiqui. Jahuen quiquin yonotinin rihbi ta coshin quenayaxihquiqui. Huetsan rihbi ta jahuen corneta rehue hahyaxihquiqui. Jaatian ta noquen Hihbobi botopaquequihanyaxihquiqui. Joxon ta noquen huetsabo mahuanihbo pari hueniyaxihquiqui. ¹⁷ Jaatian ta noque jihuetax banetaibo jaaboyabi jaan bihinihnyaxihquiqui, jato betan nai cohin tocan noquen Hihbo non behchinon naihoxon sca. Jaa pecaho tah non jascabihi sca noquen Hihbo betan hihtih. ¹⁸ Jaa copi nea joi yohiquin joni huetsa sirijaquin shinanmahanannahue.

5

¹ Jenquetsahpabo netebo jayaxihquiquin. Jenquetsahpabo bari tian jayaxihquiquin. Man tah man honanscai. Jaa copi tah non jahuabi mato huishati pishinyamahi. ² Yame yometso sanareneni jahuicamahi ta noquen Hihbo joti nete nocorenentihiqui. Man tah man honanquin sirijasci. ³ Tsoabi ta rehtenanyamascai qui, jahua qui raquetima ta jaiqui jaibaan bi ta histon bi res Papan jato queyoyaxihquiqui. Haibo tohoya baque bihcatsihquish hisinrenenihcamahi histon jahui. Tsoabi ta cahnetimahiqui. ⁴ Mato tah man jaabo quescayamahi bahquish chian jihueyamahi, noquen huetsabaan, yometso quescayamahi ta jaa nete mato qui nocoyaxihquiqui. ⁵ Xaba baquebo rahsi tah man qui, nete baquebo. Noque tah non yame baqueboma qui, bahquish baqueboma. ⁶ Jaa copi caibo hihqui quescayamahi hoxan hihyamanahue. Mohinahue, pahenihcamayamahi. ⁷ Hoxanicabo cahen yame hoxahi. Pahenicabo cahen yame pahencani. ⁸ Nete mehabo hihquish coiramenahue. Hahan xohpaxti sahuexon hahcaxaxon nincacoinnahue, joni huetsahon shinanxon. Boxpaxti maixon hahcaxaxon man teehihribitihonannahue. ⁹ Noque rainyamanoxonma bi ta noquen Hihbo Jesucristonen noque teehihmanon Papan yohinishqui. ¹⁰ Noquen Hihbo ta noque copi mahuanishqui, mohiyamahax mahuatax non hahbetan hihnon. ¹¹ Jaa copi coshijahanannahue, sirijaquin shinannaho. Yohiquin joni huetsa shinan hinanhannannahue, man hahcai quescajaquin.

Noquen huetsabo jihueti Pablonen yohihi

¹² Maton pastorobaan ta mato beboxoniqui. Beboxonquin mato sirijaquin yohihah nincannahue, noque huetsabon. Jaa tah non mato hihti yohihi. ¹³ Jaton tee copi man jatohon hihti shinannon tah non mato yohihi. Maton huetsabo betan rihbi siripi jihuenahue.

¹⁴ Chiquishaibo teetahbo jato sirijaquin yohinahue, noquen huetsabaan. Man jascajati tah non hihti queenai. Yobacahinyamahibo coshiahbo jato shinan hinannahue. Yosmahibo yanapannahue. Noquen huetsabo jatihibi tenexon honaxonbi yohinahue.

¹⁵ Caibaan mato tiromajahah bi copiyamanahue. Copixonma maton huetsabo hahxonahue, jatihibi jonibo rihbi hahxonquin.

¹⁶ Jenimahi jihuenahue. ¹⁷ Noquen Papa jaayocannahue. ¹⁸ Hahxon tah min noque jai Papan hahnahue, jatihibi copi. Man Jesucriston jonibo jascati ta noquen Papa queenihqui.

¹⁹ Dios Yoshiman mato shinanmahiya jointi chahomayamanahue. ²⁰ Papan joi yohihiboya nincannahue. ²¹ Hihresyamanahue: jatihibi honannahue, siriti caisnoxon. ²² Jahuabi tiromahi quescapajati shinanyamabiresnahue.

²³ Mato tah hen yocaxonai, sirijaquin shinanmanica hihxon Papanbi mato jatihobi mequexonnon noquen Hihbo Jesucristo jonon caman. Maton yoshin, maton shinan, maton yora, jatihobi mato hohchajoma bexojanon, mato qui jahua tiroma yohuanti yamanon. ²⁴ Mato quenanicaton ta jan yohini quescabijaquin mato hahxonyaxihquiqui. Jaa ta pishinmatimahiqui.

Quirica janquenjahi

²⁵ Noque rihbi yocaxonnahue, noque huetsabon.

²⁶ Jatihibi noquen huetsabo noque yohixonnahue, Man jascabi jayamahin, hahquin.

²⁷ Noquen Hihbaan yonohah tah hen mato hihti yohihi, nea quirica man jatihibi noquen huetsabo nincamanon.

²⁸ Noquen Hihbo Jesucristonen jahuen shinan siri mato hinana jihuenahue hah tah hen jai.

2 TESALONICABO

Tesalonicabo qui Pablonen raanni joi, jahuen rabe sca

Raannoxon Pablo betan huishahibo

¹ Pablo, Silvano, Timoteo noque rahsibi hihxon tah non mato qui joi raanai, noque huetsabon. Man noquen Papa Dios betan hihquibo, man noquen Hihbo Jesucristo betan hihquibo qui tah non joi raanai, Tesalónica jema janin. ² ¿Noquen Hihbo Jesucristo betan Papa Diosen jahuen shinan mato hinanyamahihquin? ¿Jahuen shinan bichish man sirijaquin shinanax sca jihueyamahin?

Tiromabo Papan casticanyaxihqui

³ Papan joi nincacoinquin tah man shinan hihti caibojahi, noque huetsabon. Jatihixonbi tah man joni huetsahon shinanax hahxonnannanai yanapanhanani. Jaa copi tah hen jascabijaquin Hahxon tah min jai Papan hahcai, mato yocaxonxon. Hahxoncoinquin ta mato coshi hinanihqui. ⁴ Tiromabaan mato hohmis hohmisjaxon tiromajahibaan bi man tenexon jenexonma shinancoinai tah non noquen huetsabo tocanxon noquenbi jato yohihi. ⁵ Mato tiromajahiboya honannahue. Papan ta ponte shinanihqui. Janoxon jan jihuemahi janin man hihyaxahnon ta mato sirijahiqui. Jaa copi tah man yomanahaquehtai.

⁶ Mato tiromajahibo copixonquin ta Papan jato hihti tiromajayaxihquiqui, jascajaha ta ponte qui hihxon. ⁷ Hihti perehinhatai chihiyahpa ta naiho quehax noquen Hihbo Jesus sanarenyaxihquiqui, jahuen coshi yonotibo betan. Joxon ta matoyabi noque tantimayaxihquiqui, man rahma tenehivo. ⁸ Noque tantimaxon bi ta copixonquin noquen Papa Dios honacatsihyamahibo, noquen Hihbo Jesucristo joi siri nincayosmabo jaan casticanyaxihquiqui. ⁹ Jaan casticana ta jascabi sca queyonihbo hihyaxihcanihqui. Noquen Hihbo janin ta jaabo jahuentianbi jatimahiqui. Jahuen xabapan xabataima qui ta jato potayaxihquiqui. ¹⁰ Jaa noquen Hihbo jahuiya tah non noque huetsabo rahsixon jaa hihti coshi non jis yaxihqui, nete hihbo. Hihti coshihiya tah non rahte rahteyaxihqui, jahuen joi nincacoinnihbo. Mato rihbi tah man janobi hihtihi, non yohihah nincacoinnish.

¹¹ Jaa copi tah non mato jascabijaquin yocaxonai: Min jato yohini betanbi senenahbo jato sirijahue Papan, pishinyamahahbo. Sirijaquin shinanxon hahcatsihquibo jatihibi hahcábo miin coshin jato jascajamahue, shinancoinax teetai tihibi rihbi hahcábo jato coshi hinanhue Papan, hah tah non jai mato yocaxonquin. ¹² Jascapahboxon tah man jato noquen Hihbo Jesucristo hihti shinanyahi man jismatihi, mato rihbi jahuen shinanyahpabo jisibo. Noquen Papan ta mato jascaxonihqui, noquen Hihbo Jesucristonen rihbi.

2

Jayaxihqui yohitima joni

¹ Noquen Hihbo Jesucristo jahuiton behchinonxon non tsinquijaqueyaxihqui joi sca ta hen mato yohihi, noquen huetsabaan. ² Noquen Hihbo ta johuanhoxqui jaibaan bi jato nincayamanahue. Yoshiman jascajaquin yohihah bi nincayamanahue. Jonin rihbi jascajaquin yohihah bi nincayamaquin. Noquen huishahahcamaha joi rihbi mato qui nocotaiya bi nincayamaquin. Jasca jaibaan bi rahteyamanahue. ³ Ni jenquetsahpabi mato paranmayamanahue. Papa Dios potacatsihquibo pari ta jotihiqui. Hoa yohitima yoshin pari rihbi ta caintihiqui, hihti tiroma yoshin. ⁴ Jatihibi Dios hahcaibo potacatsihquin ta hahqui jonibo betihihpaquetai jatihibi rihbi potaquin tanayaxihquiqui, jaabi sca dioscatsihqui. Janoxon Papa yohiti xoboho tsahotax ta Hea ta hen dios qui, hihtihiqui parani.

⁵ ¿Mato betan hihxon pari hen jaa joi mato yohini man shinanyamahin? ⁶ ¿Jahuen nete nocotaiya pari jaa yoshin cainyaxahnon jahuatohon rahma jaa pantehihquin? Man tah man honanai. ⁷ Jaa yoshin jotihitsoan honannih que ma bi ta teescaiqui. Hashoan teepanan ta panteniconat jaa pantehihqui, jahuen pantetima nete noconon caman. ⁸ Jaan panteyamascaya ta yohitima yoshin cainscathihi. Jaa ta noquen Hihbo Jesusen yohuanxon res rehteyaxihquiqui. Sanareneni joquin jaa queyobahinquin. ⁹ Noquen Hihbaan jaa queyoyaxihqui ta cainxon yohitimatón jatihibi hahti hahtipahahcamayaxihquiqui, Satanassen yanapanah. Hahan honanti quescapahbo hahxon ta hahan rahteti quescapahbo hahtihiqui, hahcoinquinma bi paranquin. ¹⁰ Papan jato teehihmapanan ta hihcoinai joi nincacatsihyamahibo hihti tiromajaquin jaa yohitima yoshiman paranyaxihquiqui, queyonicabo. ¹¹ Nincacatsihyamahibo copi ta paramehti shinan Papan jato hinanyaxihquiqui, yoshin quesahi bi hihcoinai shinanahbo. ¹² Hihcoinai joi nincacatsihyamaxon bi tiromajati jenipahichaibo jatihibi hihti casticannoxon ta jascapa shinan Papan jato hinanyaxihquiqui.

Papan caisai jahuen jihuetahbo

¹³ Jato jascajayaxihqui bi ta matohon noquen Hihbo queenihqui. Maijamenoxon ta Papan mato caisnishqui, mato teehihmayahnoxon, Dios Yoshiman mato sirijaha hihcainai joi man shinancoinaiton mato teehihmanoxon. Jaa copi tah non noquen Papa Dios jascabi yohiti jai: Mia copi ta teehihcanihqui Papan, hahquin. ¹⁴ Mato teehihmanoxon ta Papan mato quenanishqui, noquen Hihbo Jesucristonen xaba man bihayaxhnon hihxon. Non mato yohini joi siripan ta mato quenanishqui. ¹⁵ Jaa honanxon shinancoinquin jeneyamaxahnahue, noquen huetsabaan. Non mato honanmahi joi bihquin sirijanahue, noquen janan non mato yohini joi bihxon, huishaxon rihbi non mato yohini bihquin. ¹⁶ Noquehon shinanxon ta Papa Diosen noque jahuentianbi queyotimahi hahan sirijaquin shinanti noque hinanishqui. Hahan jointi sirijahti noque hinanquin. ¹⁷ Noquen Papa Dios betan noquen Hihbo Jesucristonen mato jointi sirijanon tah hen mato yocaxonai. Jahuen shinan siri maton jointi janin nianon, man siribo janon, sirijaquin shinanax yohuanaibo man janon.

3*Noque yocaxonnahue hih Pablo jai*

¹ Nea quirica janquenjanoxon sca tah non mato yohihi, noquen huetsabaan. Noque yocaxonnahue, mato tocan noquen Hihbaan joi jani quescajarihbihi neno rihbi sca caicananon hichaxon nincacahbo. ² Nincayosmabo ta jaiqui tiroma jonibo. Jaabaan noque bihyamanon noque yocaxonnahue. Nincacoinnica rahsima ta jacanishqui hihxon tah non mato yohihi. ³ Noquen Hihbaan ta mato jenebahintimahihqui. Mato ta coshi hinantihiqui. Tiroma yoshiman mato jahuejayamanon ta mato jistihiqui. ⁴ Non mato yohihi quescabijaquin tah man hahtihí. Hahxon bi tah man hahribiyaxihqui, noquen Hihbo shinanxon tah non honanai. ⁵ Noquen Hihbaan mato honanmati tah hen mato yocaxonai, matohon noquen Papa hihti queenai man honannon, Criston mato tenexonni quescajaquin man teneti hahtipahnon.

Teeti ta jaiqui

⁶ Noquen Hihbo Jesucriston janen tah non huetsa joi rihbi sca mato yohihi, noquen huetsabaan. Non mato yohini quescayamahax bi chiquishax noquen huetsabo jihuetaiya hahbetan hihyamabiresnahue. ⁷ Mato tocan tah non chiquishax jihueyamapahonihqui. Man tah man honanai. Non coshin teepahoni quescarihbinahue, non teeni man honanai quescarihbihi. ⁸ Copijaxonma tah non tsoanahbi piti pihanyamanihqui. Bariyahpan teebahinahax tah non yame rihbi niscan niscanax tee teexon hahpahonihqui, pishinxon mato yocaxon jatsanjamis hihxon. ⁹ Mato yocaxon res piti hahtipahxon bi tah non noquen coriquinin maronihqui, non hahcai quescajaquin maton rihbi janon hihxon. ¹⁰ Mato betan hihxon cah non mato yohinih, teecatsihyamahibo man pimayamanon. ¹¹ Caibo man chiquishax teeyamahi yanca res yohuan yohuanaibo hi cah non nincacai. ¹² Jascapa jonibo tah non hihti yohihi, noquen Hihbo Jesucristonen janen yonoquin. Siripi teenahue, matonahbi maton piti pinoxon.

¹³ Caibo yanapanquin hahxonquin jeneyamanahue, noque huetsabon. ¹⁴ Nea huishaquin non mato yohihi joi nincacatsihyamahibo honannahue. Hihtimahpax jan pontenon hihxon jascapa manayamascanahue. ¹⁵ Jascapa tah man maton rahui quescama bi maton huetsa quescapa pontequin yohitihí.

Janquenjanoxon yohihi

¹⁶ Jahuen shinan siri hinanquin noquen Hihbaan mato jointi sirijanon tah hen mato yocaxonai, jatihibi tenehax man jointi hihti sirinon hihxon. Mato betanbi jaa jihuenon tah non yocaxonai.

¹⁷ Heen mequemanbi huishaxon tah hen hahan queyoti joi huishascaí. Jasca ta hen jai, hean raanai joi jatihibi ta heen huishaya qui. ¹⁸ Noquen Hihbo Jesucristonen jahuen shinan siri mato hinanah jaya jihuenahue.

1 TIMOTEO

Timoteo qui Pablonen raanni joi

Timoteo qui Pablonen raanai

¹ Jesucriston raanti joni jahue hah ta Papan hea janishqui, noque teehihmanicaxon. Jesucriston rihbi ta hea jascajaquin yohinishqui. Jahuen raanti joni sca tah hen qui. Jaan noquen hohcha sohuaxona hahbetan sca non queyoyamanox manayaxihqui tah non honancoinai. ² Hea Pablon tah hen mihqui nea joi raanai, heen baque Timoteon. Heen baque coin tah min qui, hean yohihah min Papa Dios qui hinamehni. ¿Papan shinanya min jihueyamahin? ¿Mihon shinanxon noquen Hihbo Jesucristo betan Papan sirijaha min jointi siripax jihueyamahin?

Hihcoinicamajaquin haxemahibo qui coirametahbo

³ Macedonia main cacatsihxon hen mia yohini quescabihi Efeso jema janin banehue jaamajaquin honanmahibo pontenoxon. ⁴ Judiobaan shinanax yohuanai joibo nincayamascahabo jato yohihue. Tsoabo noquen xenibo quin hihxon ta jaton xohtabo caibaan toponpaquehiqui, tantixonma. Jascapa joibo ta yanca qui, hahan jahua bihtima. Jascapa joi tah non noquen Hihbo nincacointi haxeyamahi. Jascapa joibo nincayamahabo jato yohihue.

⁵ Jaabaan jascapa joi haxemahi bi tah non joni huetsahon shinanahbo hihxon non jato haxemahi noquen. Noquen Papa nincacoinxon ponte jihueti honanax jascari jihuexon hohchataxma jihuexon joni huetsahon shinanxon hihxon tah non jahuen joi siri yohihi. ⁶ Papan joi jenebahinax ta caibo yanca res yohuan yohuanscaiqui. ⁷ Honanxonma bi ta Moisesnin huishani joi honanmacatsihcanihqui. Yohuanax ta Jasca tah qui hihcanihqui, yanca res. Jaabaan haxemahi joi honanxonma bi ta honanmacatsihcanihqui.

⁸ Pontejaquin haxemaha ta Moisesnin huishani joi siri qui. Non tah non honanai. ⁹ Ponte jihuetaiho pontenoxonma bi ta siripi jihueyamahibo pontenoxon Papan Moises huishamanishqui. Jaa honanxon tah non jaamajaquin hahyamahi. Pontema jihuetaiho; yohitimabo; Papahon shinanyosmabo; hohchataibo; tiromabo; Papan shinanjomabo; jaton papa, jaton mama rishquihibo; joni rehtemisbo; ¹⁰ tsinihibo; hahbe bebo betan hihcatisquibo; joni yometsohbo; quesamisbo; paranmisbo; ponte joi nincayamahibo. Jascapahbo copi ta Papan Moises huishamanishqui. ¹¹ Criston joi siri ta ponte joi qui, hahan Papan shinan honanti. Jaa hihti siri noquen Papan ta hea yohinishqui, jaa joi siri hen honanmahi sca jihuenon.

Hahxon tah min jai hahti

¹²⁻¹³ Mian hea coshijaha tah hen miin joi siri jato honanmahi, Hihbon, hih tah hen jai. Hea tah hen tiromahi noquen Hihbo qui yohuanpahonihqui. Jaa tiromajacatsihquin tah hen noquen huetsabo hean tiromajapahonihqui. Jaa hichaqui tah hen jihuepahonihqui. Hea jascapa jihuetai bi ta hea caisnishqui, hen sirijayaxihqui honanxon. Criston noque hahxoncoinai honanyamahax tah hen jascapa jihuepahonihqui. Jaa copi ta hehon hihti shinanxon hea caisnishqui. Hahxon tah min jai Hihbon hih sca tah hen jai. ¹⁴ Jahuen shinan yohuashihxonma ta hea hinanresnishqui, jahan hen shinannon hihxon, jahuen joi hen shinancoinnon hihxon rihbi.

¹⁵ Hohchataibo teehihmahi ta Jesucristo main jonishqui. Jaa ta bihcointi joi qui, jatihxonbi bihti. Jatihibi jonibo hohchayahpabo hihqui bi tah hen hea hashoan hihti hohchaya hihpahonihqui. ¹⁶ Hea jascapa hihqui bi ta hehon hihti shinanxon hea tenexon jaan heen hohcha sohuaxonnishqui. Jahuentiho tiromabo jaan tenehi honanahbo ta hea tenenishqui. Nincacoinax queyoyamanox jihueyaxihquibaan honannon hihxon ta hea tenehiqui. ¹⁷ Noquen Papa ta jatihibichina noquen quiquin hapo qui, japahonibaana, jayaxihquibaana rihbi. Mahuayosma, noquen Papa. Noquen jistimahi. Jaa huesti ta noquen Papa qui. Jaa yohinahue: Mia tah min Quiquin Hihbo qui Papan. Shinancoinya siri tah min qui, hahquin jascabijaquin yohinahue.

¹⁸ Mia tah hen hihti yohihi, heen baque Timoteon, Papan shinanyaxon mia yohinibo quescajahue. Jaabaan yohini joi shinanhannan hihti shinancoinxon Papan joi nincamahue. ¹⁹ Shinancoinquin jenexonma ponte jihueti shinan jenexonma rihbi jato nincamahue. Ponte jihueti shinan jenexon ta caibaan shinancoinyamascaiqui. Tiromabo sca jai. ²⁰ Jascapahbo ta Himeneo betan Alejandro qui. Jaabo rabe tah hen Satanas hinanscai, Papa qui tiromahi yohuantima honanahbo hihxon.

2

Noquen Papa yocaxonti

¹ Jaa copi tah hen nea pari mato yohihi. Papa yocanahue. Pishinaibo yocaxonnahue, Papan jato hahxonti pishinaibo rihbi yocaxonquin. Jan hahxonai copi Hahxon tah min jato jai Papan hihnahue, jatihibichina. ² Quiquin hapobo yocaxonxon texe hapobo rihbi yocaxonnahue, non raquetaxma sca jihuenon hihxon, rehtenanaibo jayamanon hihxon rihbi, shinan siriyabo non jihuenon hihxon rihbi. Papahon shinanhanan non siripi jihuenon hihxon rihbi yocaxonquin. ³ Non jascajaquin Papa yocaxona ta siri qui. Non jascajati cahen noque jihuemanica noquen Papa queenih. ⁴ Jaan ta jatihibi jonibo teehihmacatsihquiqui, hahan jihuemati joi jato nincacoinmaquin. ⁵ Jaa huesti ta naiho queha Papa qui. Noquen Papa janinxon noque yocaxonai ta huesti rihbi qui, jonihax bi Jesucristo. Jaan ta noque noquen Papan joi yohihiqui. ⁶ Jatihibi noquebo queyoyamanox manatahbo hihquish ta hinamehnishqui noquen hohcha copi mahuanoxon. Jonibo nincamati siriscaiya ta jaa joi Papan nincamascanishqui. ⁷ Hen jascajanon hihxon ta hea caisnishqui, jahuen joi yohicoinnon hihxon, jahuen raanti joni rihbi hea janon hihxon. Hihcoin tah hen jai. Quesayamahi. Judiomabo honanmanica hea janon hihxon ta hea caisnishqui, Papan joi coin yohixon hean jato nincacoinmanon.

⁸ Jatihibi janinxon bebobaan noquen Papa yocati jato honanmahue. Sinaxonma, join bahchinnanxonma, hohchajomaxon, jatihixonbi noquen Papa yocacahbo tah hen yohihi. ⁹⁻¹⁰ Haibobo rihbi yohihue. Chopa siribo sahueresnahue, haibobon. Chopa sirihax bi hahan tsinitima. Hahan tsiniti bohuexetijoma janahue. Oro morobo, copi joxo morobo, copi chopabo shinaryamanahue. Jascapahbo shinanquinma bi jato yanapanxon caibo hahxonti shinannahue. Papahon shinanai haibobaan ta jascajanich qui hahquin jato yohihue. ¹¹ Tsinquitaibo tocan haibobo netexon nincacahbo jato haxemahue. ¹² Haibobaan ta bebobo honanmatimahiqui. Bebo yonoyamarihbiquin. Netexon nincacoinahbo jato yohihue. ¹³ Adan pari ta Papan jonijanishqui. Jaa pecaho cahen Eva. ¹⁴ Adan ta Satanasnen paranyamanishqui. Jahuen haibo caya ta parannishqui. Paranah hohchayahpascai. ¹⁵ Jaabi ta haibobo Papan teehihmayaxihquiqui, baquebo bihxon hanijahanan shinancoinquin jeneyamahiboya, joni huetsahon shinanquin jeneyamahiboya, tsinixonma Papahon shinanquin jeneyamahiboya.

3

Pastoroyaxihquibo honantijati

¹ Nincacointi ta nea joi qui. Pastorocatsihquibo ta siri tee queenihqui. ² Pastorobo janon nescapahbo jonibo caishue. Jahua hahqui yohuanti yama. Huesti haiboyahpa. Tiromati qui hinamehyamahi. Hahri coirametai honan. Sirijaquin shinanax yohuannica. Jahuen xoboho nocotaibo jato sirijaquin bihnica. Papan joi nincamati shinanya. ³ Pahenyamahi. Joi coshin yohuanaima. Sinayamahi. Join bahchinanti shinaryamahi. Coriqui bihmisma. ⁴ Jahuen xoboho jihuetaibo sirijaquin jihuemanicah. Jaan yohihah jahuen baquebaan joi bichinxonma nincacai. ⁵ Jahuen baquebo jihuemati honanyamaxon ta jenquetsahaxonbi jaan Papan caisaibo nincamatimahiqui. ⁶ Rahma Papa qui hinamehtipibo ta pastorotimahiqui. Hea ta hen hashoan shinanya qui hih jan jamis, paramehtax. Jascani copi ta Papan tiroma yoshin casticanyaxihquiqui. Jascapa tiroma shinan bihmis hihxon behnabo pastoromayahue. ⁷ Nincacoinyamahibo siripi hahqui yohuanai nincaxon pari pastoromahue. Tiromahi hahqui yohuanaiyoba Satanasnen jaa tiroma shinan hinanmis.

Pastor yanapanyaxihquibo honantijati

⁸ Pastorobaan yanapannicahbo rihbi ta shinanya jonibo hihtihiqui. Yohuanresaima. Pahenyosma. Coriqui bihmisma. ⁹ Papan yohinihxonma bi rahma nincamahi joi ta Criston joi qui. Jaa joi ta jaton jointinin yanapannicahbaan bihtihiqui, ponte jihueti honanax jascabihi sca jihueti. ¹⁰ Jato tanatahhue. Siribohi honanscaxon jato caishue, yanapannicahbo hihnon hihxon. ¹¹ Jaton haibobo rihbi ta shinanya hihtihiqui. Tsoa qui bi yohuanayamahi. Pahenyosma. Shinanquin sirijaxon hahcai. ¹² Yanapannica cahen huesti haiboyahpa. Jaton baquebo, jaton xobon jihuetaibo sirijaquin jato jihuemaquin. ¹³ Sirijaquin yanapanaiboya ta jato qui siripi yohuancantihiqui. Sirijaquin yanapanax sca ta Jesucriston joi yohiti qui hihtimahtimahi qui.

Yohinihxonma bi Papan nincamascai

¹⁴ Mihqui hixon cacatsihxon bi tah hen huishaxon mia yohihi. ¹⁵ Hea basi sca jaiya tah min honantih, Papan baquebo jenquetsahpi jihuetihiquin hihxon. Papan baquebo rahsi ta jan caisaibo qui, jihuenicaxon jan caisai. Jaabo ta Criston joi coin bihnicaibo qui, Cristo

qui hihcoini yohuanaibo. ¹⁶ Papan yohinihxonma bi rahma noque nincamahi joi ta hahan rahteti qui, tsoan nincanihma joi. Jasca coin tah qui.

Yorayahpahax ta Cristo cainnishqui. Ponte shinanya jan hihqui ta Dios Yoshiman sca noque jismanishqui. Jan main nichí ta Papan yonotibaan jisnishqui. Judiomabo sca ta jahuen joi yohicaniqui jahuen jihuetahaan. Nai namaxon ta nincacoincانيqui. Naihohxon sca ta Papan bihinihinishqui.

4

Papan joi jenebahinyaxihquibo

¹ Dios Yoshiman sirijaquin yohihi joi sca tah hen mato yohihi. Noquen Hihbo joti hochoma sca jaiya ta caibaan Cristo jenebahinyaxihquiqui. Tiroma yoshiman joi nincaxon Cristo jenebahinquin, parannica yoshin nincaxon. ² Jenebahinahbo hihxon ta Criston joi yohicoinihcamaxon yoshiman joi honanmayaxihcanihqui parannicabaan. Ponte jihuetai honanpahoni que bi jaton shinan masascai, ponte jihuetai shinanyosmabo sca. ³ Queeyahpatima joi ta yohicaniqui. Bebo rihbi haibaan bihtima sca ta jacanihqui. Samati ta jato jayaxihcanihqui. Jascaja ta jacanihqui, jahuen haibo betan bebo jihuonon Papan janí que bi. Piti rihbi ta Papan hinannishqui, nincacoinnicabaan bihnon. Bihxon Criston joi honancoinxon, Hahxon tah min noque jai Papan, hahcabo noque hinanquin. ⁴ Papan hahní jatihibi ta siri qui. Mia copi tah non jarescai Papan hih non jaiya ta non bihtimabo yamahihqui. ⁵ Non jascahiya ta noquen piti Papan hinanah pitibo sca jatihiqui, jahuen joi yohixon non Papa yocacai copi.

Jesucriston joni siri

⁶ Hen mia yohihi joibo rahsi noquen huetsabo honanmahax tah min Jesucriston texonnica siri sca jatihi. Jascapahax Criston joi nincacoinax hen mia nincamani joi siri rihbi honanquin sirijahax tah min miin shinan coshi sca jatihi. ⁷ Honanma yohuanbo nincayamayaxahnue. Quesahi yohuanbo nincayamabireshue. Papahon shinanti caya shinan shinanhue. ⁸ Tee teequin tah non noquen yora coshijahi, hicha tahma. Jascajaquin hicha tahma coshi bihxon bi tah non Papahon shinanquin jatihibi shinan sca non bichi. Rahma jascapa shinaman jihuetax tah non jahan rihbi noquen Hihbo betan sca non jihueyaxihqui. ⁹ Jasca coin tah qui. Jatihibichin jaa honancoinpahinon. ¹⁰ Honanahbo hihquish tah non tee teetai, coshi coshihi. Noquen Papa ta jihuetahqui. Jatihibi jonibaan jihuemanicahxon bi ta nincacoinax hahqui hinamehtaibo rahsi jaan jihuematihiqui. Jaan noque jihuemayaxihqui honanxon tah non sirijaquin sca shinanai.

¹¹ Hen mia yohihi joibo honanmaquin jato yohihue jascahahbo. ¹² Beronaxon bi hihtimahxonma jatihibi jonibo nincamahue. Mia ponte res yohuanai quescari noquen huetsabo rihbi yohuanahbo hihquish yohuanhue. Mia ponte res jihuetai quescari jihuetahbo hihquish jihuehue. Mian joni huetsahon shinanai quescajaquin hahcabo hihxon jahue. Noquen Papa mian nincacai quescajaquin nincacahbo jahue. Mian pontejaquin shinanai quescajaquin shinanahbo hihxon jahue. ¹³ Hea noconon caman tsinquitaibo Papan huishani joi jato nincamahue. Jaa nincamaxon siripi jihuetahbo jato yohirihbihue honanmaquin. ¹⁴ Noquen Papa yocaxon ta jahuen pastorobaan Papa hahxonti tee mia hinannishqui. Papan shinanyaxon ta mia yohicannishqui, Papan joi nincamanica mia janon. Jaa joiya teeti shinanbehnoyamayaxahtahi min.

¹⁵ Hen mia yohihi quescabijahi jihuehue. Jaa res shinani jihuetai. Min hashoan shinan hichacanahi jisibo hihquish jascahue. ¹⁶ Coiramehue. Honanmaquin rihbi coiranquin. Hen mia yohiha joibo bihcoinhue. Jascajaquin tah min Papan jihuemati bahin nihxon mia nincacaibo rihbi min nihquihinyaxihqui.

5

Noquen huetsabo yohiti haxemahi

¹ Yosibobo pontequin coshin yohiyamahue. Miin papa yohiquin hahcajaquin tah min jato sirijaquin yohitihi. Yosibomabo rihbi miin huetsabo hahcajaquin yohuanquihnhue. ² Yoxabobo rihbi miin mama hahcajaquin yohuanquihnhue. Yoxabomabo rihbi miin chocabo hahcajaquin yohuanquihnhue, sirijaquin shinanxon.

³ Yononmacoinai haibobo yanapanhue jaabo pishinaibo hinanquin. ⁴ Baqueyahpa yononma jaiya, jahuen baque yamahi bi jahuen bababo jaiya, jaabo pari yohihue yanapanabo, jaton maman jato hanijani copiquin sca yanapanabo. Nincacoinnicaxon ta jaabaan pari jaton papa jaton mamabo yanapantihiqui. Jascajati haxeahbo hihxon jato honanmahue. Papan jisi ta jascajaha siri qui. ⁵ Yononmacoinai haibaan ta jaa huesti sca jihuexon Papa res shinanihqui. Jascapahton ta Papa yocabahinaxon yocashinaxon joni

huetsa yoca yocaxoniqui. ⁶ Jahuen bohuehtibo jahuen rajotibo jahuen chopa siribo shinani nichu yononma ta jascajayamahiqui. Jascapa ta mohitahpahax bi shinan yamahi qui, mahuatax quescapi. ⁷ Nea hen mia yohiha joibo jato sirijaquin yohihue, jato qui yohuanti yamanon. ⁸ Nincacoinnicaton ta jahuen baquebo, jahuen haibo, jahuen huetsabo, jahuen papa, jahuen mama, jaabo pari bihxontihiqui, piti, jahuaborabo rihbi. Jaatian sca jahuen jenabo rihbi bihxonquin. Jato bihxonyamahibaan ta Criston joi potascaiqui. Nincayosma mentan hashoan tiromasca.

⁹ Noquen huetsabo tsinquixon noquen choca yononmabaan jane huishapaquehue. Nescapahbo rahsi huishahue: sesenta bari huinoscaibo. Huesti bebo betan hihniibo. ¹⁰ Jan yanapanquin siribojaxonpahoni hichaxon honanaibo haibo. Jahuen baquebo sirijaquin hanijapahoni. Jahuen xobohoxon nincacoinaibo pimapahoni. Jahuen baque hahcajaan nincacoinnicabo yanapanpahoni. Nincacoinaibo yomanahaiton yanapanpahoni. Jatihibijaquin sirijaxonti shinanya jihuepahoni.

¹¹ Yoxabohaxma bi yononmabaan jane huishayamahue. Jascapahbaan ta Cristo shinanyamascaxon bebo bihribicatsihcanihqui. ¹² Jascapahbo ta Papan jato siri jisyamahiqui, noquen huetsabo yocaxonnica japahonixon bi jenescaiton. ¹³ Chiquishaibo sca ta jatihiqui. Xobo tihibi betseti. Chiquishax yohuan yohuanresi. Jahuen caibo qui yohuanrihbihi. Honanihma yohuanresi. ¹⁴ Jaa copi tah hen mato yohihi. Yoxabohaxma bi yononmaxon ta bebo bihtihiqui. Jahuen baquebo hanijaquin sirijaquin. Jahuen xobon jihuetaibo coiranquin. Jascajahiya ta maton rahui mato qui yohuantimahiqui. ¹⁵ Caibaan ta Satanas sca chibanihqui, bahinma sca bocani.

¹⁶ Jenaboyahpa yononma jaiya ta jahuen nincacoinai jenabaan jaa yanapantihiqui, noque huetsabaan jaa yanapanyamanon. Noque huetsabaan ta jenajoma yononmabo yanapantihiqui.

¹⁷ Sirijaquin nincamahi pastorobo rabejaquin copijati shinannahue hinanxon tian tihibi. Papan joi yohixon hononmahi nincamanicahbo hashoan sca hinanhihtiquin. ¹⁸ Huishani joi ta nescapax qui: Trigo bero xehmequin jamacai vaca tah min conextimahi, hihqui. Teenicaton ta jan cananai bihtihiqui hihqui huetsa huishani joi rihbi.

¹⁹ Pastorobo qui tiromahi yohuanai nincayamahue. Rabe hihiyamahax quimisha chancoinnica jaiya pari nincacoin. ²⁰ Hohchaquin jenecatsiyamahibo jato pontejaquin yohihue tiromati qui raquetahbo. Jatihixonbi nincanon bi jato hihti yohihue. ²¹ Papan noque jisnon bi Jesucriston rihbi noque jisnon bi jan caisai jahuen naihoh queha yonotibaan rihbi noque jisnon bi tah hen mia yohihi. Hen mia yohihi joibo bihcoinhue caibo mentan huetsahon hashoan shinanxonma bi jascapahbo rahsi hahquin hahan shinanxon. ²² Pastorobo janon hihxon jato honanquin sirijaxon pari jato caishue. Huetsa joni hohchaya hihquiya hahbe hohchaya jayamahue. Hohchajoma siri jihuehue.

²³ Jene paxa rahsima bi hompa pishca rihbi xehascahue, miin poco hisinrahsihi rohanoxon.

²⁴ Noquen jisnon bi ta caibo hohchatihqui, Papan jato casticanyaxihqui non honanon. Huetsabo cahen hohcharihbihi, chini sca non honanyaxahnon. ²⁵ Yanapanquin hahxonaibo ta honantih bi res qui. Non rahma honanyamahi bi ta Papan copiquin jato hahxonaiya non honanyaxihqui.

6

¹ Jatihibi patoroyahpabo yohihue, jaton patorobaan yonohah hahcabo. Jato nincati ta jaiqui hahxon, noquen Papa qui jaton patorobo tiromahi yohuanyamahahbo jaton jonibo jascajahue. Papan joi qui rihbi tiromahi yohuanyamahahbo. ² Nincacoinnica patoroyahpabo rihbi yohihue. Jaton huetsascaxon yonohah bi nincayamascati shinanyamahahbo jato honanmahue. Hashoan sca nincati ta jaiqui, jaabaan teexonai joni nincacoinnica sca copi. Jahan shinanxon copi hashoan rihbi teexonquin. Jascajahabo jato yohi yohihue honanmaquin.

Nincacoinax siri jihueti

³ Jaamajaquin yohihibo honanhue. Jaabo ta noquen Hihbo Jesucriston ponte joi bihyamahibo qui. Hahan Papa honanti joibo rihbi bihyamahibo, honanmabo. ⁴ Jascapahbaan ta honan hihqui shinanxon bi jahuabi honanyamahihqui. Join bahchianti res shinanquin. Yohuanai nincaxon joi bichinti res shinanquin. Jascapa shinanyabaan ta jonibo notsi notsimareshiqui. Sinacanannati shinanmaresquin. Noquen huetsa qui yohuanti shinanmaresquin. Huetsahon tiromajaquin shinanmaquin. ⁵ Jascapa joi bichish ta tiroma shinanyabo join rehtenanscaiqui Papan joijomabohax. Noquen Hihbo bihxon ta jayaxon coriqui bihti shinancaniqui honanyamaxon. ⁶ Noquen Hihbo bihxon tah non jayaxon coriqui bihti shinantimahi. Huetsa caya tah non hicha bihcoina,

coriqui tsamancatsihxonma bi shinanquin sirijaxon. ⁷ Jahuajomabi tah non nea nete qui cainnihqui. Jahuabi rihbi tah non caquin sca boti hahtipahyamahi. ⁸ Piti jaxon chopah rihbi jaxon tah non jayaxon shinanquin sirijascatihi jahua hashoan queenyamahi. ⁹ Coriquiyahpacatsihquibo ta tiroma yoshiman paranihqui. Jato bihnoxon cahen jato shinan hinanquin. Jonibo tiromajanoxon ta jato mai meha shinanbo queenmahiqui jato queyobahinnoxon. Hicha tiroma queenti shinan cahen jato hinanquin. Masataibo sca janon cahen jato jascapahbo shinanbo hinanquin. ¹⁰ Coriqui queenyoraxon ta jatihibi tiroma shinan bihressacanihqui. Coriqui queenxon rihbi ta Criston joi jenebahinscacanihqui caibaan. Criston joi jenebahinxon sca masa shinansacananquin hicha.

Hihcoirjaquin Cristo jenetima

¹¹ Jascapahbo queenyamabireshue, Papan baquen. Ponte hihti shinanhue, Papa shinanquin. Jan noque hahxonai honanrihbiquin. Joni huetsahon shinanrihbiquin. Noquen Hihbo jenexonma tenequin Honaxonbi rihbi caibo yohiquin. ¹² Shinan camahahtanxon Cristo hahxonhue jaa chibanquin. Hichaxon jisibo tah min Cristo bihniqui. Jaatianbi ta mia queyoyamanox mananica sca Criston mia yohinishqui. Min queyoyamanox manascai honanquin sirijahue. ¹³ Noquen Papan ta jatihibi mohitahpabo jonijanishqui. Jahuen nincanon bi tah hen mia yohihi. Jesucriston nincanon bi rihbi. Jaan ta Poncio Pilato yohinishqui: Hea tah jihuemanicah qui, hahquin. ¹⁴ Noquen Hihbo Jesucristo jonon caman jahuen joi jascabijaquin nincahue rishtaxonma. Mihqui jahuabi yohuan jayamanon siriresi jihuehue. ¹⁵ Noquen Hihbo joti tianbi ta Papan jaa raanyaxihquiqui, jaa huesti noquen quiquin hapo siri hihxon. Jaa ta jatihibi quiquin hapobaan quiquin hapo qui. Jatihibi hihbobaan hihbo rihbi. ¹⁶ Jaa huesti ta mahuayosma qui. Jonibaan teneyosma xabapan ta jaa jihuethiqui. Tsoanbi ta jaa jisyanishqui. Tsoanbi rihbi tah non jaa jisti hahtipahyamahi. Mia tah min Xaba Hihbo qui Papan, Noque jascabijaquin hihbojahue hahnahue, jascajaquin rahan hih hen janon.

¹⁷ Coriquiyahpabo sca sirijaquin yohihue, coriquiyahpahax tah hen hea hashoan shinan yahpa qui hihiyamahue hahquin yohiquin. Jaton coriqui ta yamacahintihiqui. Jaton coriqui shinaryamahabbo jato yohihue. Coriquima bi noquen Papa Dios shinanahbo jato honanmaquin. Noquen Papan ta noque jatihibi hinaniqui non jenimanon. ¹⁸ Jaa coriquiyahpabo yohihue caibo rihbi yanapannon. Siribojaxonnon jato yohiquin. Pishinaibo jato hinannon yohuashihxonma. ¹⁹ Jascajaquin ta jaya jihueointi tsinquicaniqui jihuecoinyahnoxon.

Quirica queyonoxon yohihi

²⁰ Papan mia hinanni tee jisquin sirijahue, Timoteon. Rishtaya yohuan yohuanaibo nincayamayaxahnue. Honanihcamaxon mia joi bichinaibo rihbi nincayamaquin.

²¹ Honanihcamaxon ta Papan joi bihquin bi cahnecaniqui caibaan.

Papan shinanya jihuenahue, mato.

2 TIMOTEO

Timoteo qui Pablonen raanni joi, jahuen rabe sca

Timoteo qui Pablonen raanai

¹ Hea Pablo tah hen Jesucriston raanti joni qui, jascajahue Papan hea janí. Non jihuenon Papan yohini quescabijaquin ta Jesucriston noque teehihmahihqui. Jaa joi yohinica tah hen qui. ² Mihon shinanxon tah hen nea quirica huishaxon mihqui raanai, heen baque Timoteon. ¿Papan shinanya min jihueyamahin? ¿Mihon shinanxon noquen Hihbo Jesucristo betan Papan sirijaha min jointi siripax jihueyamahin?

Cristo qui hinamehxon caibo sca yohiti

³ Ponte jihueti honanax jascarihbi jihuehahnan tah hen heen xohtabaan hahpahoni quescajaquin noquen Papahon shinancoinai. Hahxon tah min jaa jai Papan, hih tah hen jai, mia yocaxonbahinaxon mia yocaxonshinaquin. ⁴ Hea jahuiya min benani shinanrihbixon tah hen mia hihti jiscatsihqui, hihti jenimanoxon. ⁵ Papan joi min nincacoinai tah hen shinanrihbihi. Miin chichi Loidanen pari nincacoinni quescabijaquin tah min nincacoinai. Miin mama Eunicinin rihbi nincacoinni quescabijaquin tah min mian rihbi nincacoinscái. Honancoin tah hen jai.

⁶ Jaa copi tah hen mia yohirihbihi, min shinanbehnoyamanon hihxon. Noquen Papa hen yocacaiya ta Papan mia tee hinannishqui jahuen joi yohiti shinan min bihnon. Jaa shinan behnajahue. ⁷ Raqueti shinan ta Papan noque hinanyamahihqui. Coshiti shinan caya ta noque hinannihqui, joni huetsahon shinanti shinanbo rihbi, teneti shinan rihbi. Jascapahbo shinanbo ta noque hinanishqui. ⁸ Noquen Hihbaan joi yohiti qui hihtimahyamahue. Noquen Hihbo copi hen sipo xoboho tsahoxonai bi hea shinanax hihtimahyamahue. Noquen Hihbaan joi copi mia tiromajahibaan bi tenehue, Papan mia coshijahah. ⁹ Papan ta noque teehihmanishqui. Non jihuecoincanon ta noque quenanishqui. Non sirijaquin hahcai copima bi jaabi queenxon noque teehihmaquin. Jahuen shinanya non jihueyaxahnon hihxon Criston noque teehihmanon ta Papan yohinishqui, neateman bi res. ¹⁰ Jan jascajahi non honanscanon hihxon ta noque teehihmanica Jesucristo main jomanishqui. Non mahuyamascanon bi queyoyamanox mananon hihxon ta jahuen joi siri noque honanmanishqui.

¹¹ Jaa joi siri yohinica hea janon hihxon ta hea caisnishqui. Jahuen raanti joni rihbi hea janon. Jahuen joi siri nincamanicah rihbi hea janon. ¹² Jaa copi tah hen nescari hohmis hohmisai. Hohmis hohmisax bi tah hen hihtimahyamahi. Jaa hen shinancoinai tsoa quin tah hen honanai. Jahuen joi siri hen yohinon ta hea raannishqui. Casticani sca jonoxon caman jan yohini quescabijati jan hahtipahi tah hen honanai.

¹³ Jesucriston mia joni huetsahon shinanti shinan hinanah bihnixon jan yohini rihbi nincacoinax jihuehue. Mia tah hen joi coinbo yohiniqui. Jaa joibo shinani jihuehue. ¹⁴ Dios Yoshin ta noque betan hihquiqui. Jaan ta mia yohinishqui, noquen Hihbaan joi min yohinon hihxon. Jaa joi huetsajaxonma jeneyamanoxihhue.

¹⁵ Hea yanapancatsiyamaxon ta Asia janinhahbaan jatihibichin hea jenebahinhoxqui. Min tah min honanscai. Figelonen bocabi hea potabahinquin. Hermogenesenen bocabi hea potabahinquin. ¹⁶ Onesíforo, jaabo tah hen Papa yocaxonai, jatohon jan hihti shinannon. Hicha coti ta Onesíforonen hea yanapanpahonishqui, hen sirijaquin sca shinannon. Hea sipo xoboho tsahotai bi ta hea jisi joti qui hihtimahyamanishqui. ¹⁷ Hihtimahxonma bi Roma jema janin nocoxon, hea bona benaquin, hea meranoxon caman. ¹⁸ Efeso jema janinxon rihbi ta hea hihti yanapanishqui. Jaa tah min sirijaquin honanai. ¹⁹ Neque bichi joxon tian noquen Hihbaan hahan hihti shinanxon hahxonti tah hen yocaxonai.

2

Jesucriston sontaro siri

¹ Mia rihbi Jesucriston shinanya jihuehahnan coshiscahue, heen baquen. ² Hichaxon nincanon bi hen mia haxemani joibo shinanyahpa jonibo haxemaribihue, jaabaan sca caibo rihbi haxemanon hihxon.

³ Jesucriston siri sontaroxon yobaxon sca tenehue. ⁴ Sontarohax tah non noque sontarohimaiton yohihi quescabijaquin hahnoxon tsoabi non huetsa tee janin cayamascai. ⁵ Jaton coshi tanacatsihquibaan rihbi ta bishquihiti hihbaan yohihi quescabihi bishquihiyamaxon jahuabi bihtimahiqui. ⁶ Teemis huaijanicahten pari ta jahuen huai bimihhi bihtihiqui. ⁷ Hen mia yohihi joibo sirijaquin shinanhue. Noquen Hihbaan ta mia jatihibi sirijaquin honanmatihiqui.

⁸ Jesucristo shinanbehnoyamahue. Jahuen joi siri yohiquin hen chanicoinai quescabihi ta jaa mahuatipish bi huenirihbinishqui. David ta jahuen papa xeni japahonishqui. ⁹ Jaa joi siri hen yohicoinni copi tah hen sipo xoboho tsahotai, tiroma joni sipo xoboho tsahona quescas. Hea jascajahibaan bi ta Papan joi pantehahma caichihqui. ¹⁰ Jaa copi tah hen jatihibi tenehi, Papan caisaibo nincamanoxon hihxon. Jaabaan rihbi Jesucristo bihcoinax queyoyamanox mananon hihxon tah hen tenehi, jahuen queyoyosma xabapan jihuetahbo hihxon.

¹¹ Hihcointi ta nea yohuanbo qui. Hahbetanbi mahuatx tah non hahbetanbi rihbi sca jihueyaxihqui.

¹² Tiromajahahbaan bi tenexon tah non hahbetan rihbi jonibo jihuemayaxihqui. Jaa ta heen jahuama qui hih non jaiya ta jaa rihbi noque qui jascarihibiyaxihqui, jaabo ta heen jahuamabo qui, hihqui.

¹³ Jan yohihi quescabija non jayamahi bi ta jaan hahquiqui, jan yohihi quescabijaquin. Jahuen joi yohihi ta Henama ta qui, jaa jatimahiqui.

Hahcainai teexonnica

¹⁴ Jascapa joibo jato yohihue, shinanbehnoyamahahbo. Noquen Hihbaan jisnon bi tah hen mato yohihi hihxon jato yohihue, yohuanaibo joi bichinnannanyamahahbo. Join bahchinnannanon tah non nincacaibo shinan hinanyamahi. Jato tiromajaresquin. ¹⁵ Siri teexonnica mia Papan jisnon hihxon min hahtipahi tih hahhue, jahua copi hihtimahti yamanon. Jato pontequin jahuen joi jato honanmacoinhue. ¹⁶ Papan rahninai yohuanbo nincayamahue. Jascapa yohuanbo nincacax ta hashoan sca Papan shinanjomabo jaticaniqui. ¹⁷ Shomon hanihicamahi ta jaton yohuan caitihiqui. Jascapa yohuanya rabe ta Himeneo beten Fileto qui. ¹⁸ Papan joi coin jenebahinax ta yohuancaniqui: mahuataibo ta Papan huensicahoxqui, hihqui. Jascapahbo yohuanquin ta caibo nincacointi jenemacanihqui. ¹⁹ Jascajahibaan bi ta Papan joi coin jascabi sca banetihqui, huetsajahama. Papan ta honantijaquin nescajaquin huishamanishqui: Jahuenahbo ta Hihbaan honanihqui hihqui. Noquen Hihbo hihbomahibaan ta hohchati jeneti jaiqui hihqui huetsa jahuen huisha rihbi.

²⁰ Hapon xoboho ta horo quentiboya copi yami quentibo jatihiqui. Jascapa rahsima bi jihui xaxobo rihbi, mai quentibo rihbi jatihi. Caibo quenti ta hahqui pitibo naneti qui. Caibo rihbi ta hahqui huecaxbo naneti qui. ²¹ Jahuen rishta choquitai joni ta siriscaiqui, rishtajoma quenti quescapah, hahqui piti naneti quescapah can, siri. Xobo hihbo jaya teeti sca. Jayaxon siri teebo hahti sca jai.

²² Jascapahue: mai meha beronanbo hihqui quescari rishta shinanyahpabo jaiya jato tecayacahinhue. Pontehihti shinanhue. Noquen Hihbaan noque hahxonai honanrihbiquin. Joni huetsahon shinanrihbiquin. Jointi siripax jihuehue. Rishtajomaxon noquen Hihbo hihbomahibo betan tah min jascari jihuetai jai. ²³ Honanmabo hihresi yohuan yohuanax join bahchinanaibo betan hihyamahue. Jascapa yohuaman ta jonibo sinamahiqui. Min tah min honanai. ²⁴ Rainyamaxonma bi tah min jatohon shinanon Papan jonixon jatihibi jonibo yohitih. Sirijaquin jato honanmaquin. Jato tenequin. ²⁵ Mia nincacatsiyamahibo honahax bi yohuanxon pontejaquin yohihue. Huetsa shinan rah ta Papan jato hinantihiqui, jahuen joi nincoinahbo hihxon. ²⁶ Tiroma yoshin queenai quescabijaquin jaabaan hahnon hihxon ta tiroma yoshiman jato hihbojanishqui. Jan jato bihni que bi ta Papan joi honanon yoshin tenetihiqui.

3

Nete queyoti hochoma jayaxihquibo

¹ Nea honanhue: nete queyoti nea pishcasaiya ta hohmis hohmisayaxihcanihqui. ² Nescapahbo ta yayaxihquiqui. Hahmebi jahuen yora queemehtaibo. Coriqui hihti queenaibo. Hea tah hen siri bi res qui, hihquibo. Hea tah hen joni huetsa mentan hashoan shinanya qui hihquibo. Rishtaya yohuanmisbo. Jaton mama, jaton papa nincayosmabo. Hahxonah bi Hahxon tah min hea jai hihcatsiyamahibo. Noquen Papahon shinanyosmabo. ³ Jonibohon shinanti shinanjomabo. Rainyamati jenenyosmabo. Joni qui tiromahi yohuanmisbo. Jaton yora coirameti honanyosmabo. Sinabo. Siriti queenyosmabo. ⁴ Paranmisbo. Shinanjomaxon hahresaibo. Jaton jointi soohihquicamahax Hea tah hen shinanya qui hihqui paramehtaibo. Papahon shinanihma bi mai mehobo jai quescajati jenipahichaibo. ⁵ Papahon shinanihcama jaax bi Papan coshijoma jihuetaibo.

Jascapahbo tecayacahinhue. Jato nincayamahue. ⁶⁻⁷ Jascapa jonibo ta xobo hihbo paranax xoboho hihcohihqui. Hihcoxon ta honanma haibobo nincamaxon huetsa joi jato yohihihqui. Yohihah ta jascapa honanma haibobaan jaabo hohchani shinanax rabe shinanyahax haxe haxexon bi jahuentianbi Papan joi coin honantimahi qui. ⁸ Janes

betan Jambresnen Moises joi bichinni quescajaquin ta jaa jonibo jaton shinan masascaxon Papan joi nincacoinihcama jaxon sca Papan joi coin huetsajacatsihquiqui. ⁹ Basima ta jaabaan jonibo nincamayaxihquiqui. Moises joi bichinnihbo quescajahbo jaabo honanmabo hihqui ta jis yaxihcanihqui, jatihixonbi.

Jan Timoteo yohicoinei

¹⁰⁻¹¹ Heen honanmati joi tah min sirijaquin honanscai. Jenquetsahpi hen jihuetai tah min honanrihbihi. Jahua copi hen honanmahin tah min honanrihbihi. Noquen Hihbaan hahtihi hen shinancoinei. Noquen Hihbo hen jeneyamahi. Joni huetsahon hen shinanai. Hea tiromajahibaan bi hen tenehi. Hea hisinjahibaan bi hen tenehi. Jaa rahsi tah min honanscai. Antioquia janinxon hea tiromajanibho tah min honanrihbihi. Iconio janinxon hea tiromajanibho rihbi. Listra janinxon rihbi. Janoxon hea hihtijaquin tiromajahibaan bi ta hea jato noquen Hihbaan xahbanjamanishqui. ¹² Jesucriston joi nincacoinax Papahon shinanahnan siripi jihuecatsihquibo jatihibi ta caibaan tiromajayaxihquiqui. ¹³ Jasca ta tiroma jonibo hashoan tiromabahin sca jatihiqui. Siripihcama hibo rihbi hashoan tiromacanscai. Caibo paranquin. Caibaan rihbi jato paranquin.

¹⁴ Jaabaan jascajahi bi jascajayamahue, mian. Hean mia honanmapahoni quescajaquin jeneyamahue. Hen mia sirijaquin haxemani quescabijaquin. ¹⁵ Baque pishcahax tah min Papan huishamani joi haxepahonihqui. Jaa shinanhue. Jaa joi honanxon tah min Jesucristo nincacoinascaax moyoxanox manati min honanrihbihi. ¹⁶ Papan huishamani joi jatihibi ta Papan shinanmaxon huishamanishqui. Jaa huisha jisxon ta honanmati siri qui. Hohchataibo yohiti siri. Hahan ponteti siri. Hahan jihuecointi. ¹⁷ Jaa joi honanax ta Papan joi honanmanica jahuabi pishinyamascatihiqui. Jatihibi hahti siriscai.

4

¹ Papan noque jisnon bi tah hen mia yohihi. Siri hin, tiroma quin hihxon ta jihuetaibo jisxon mahuataibo rihbi Jesucriston jis yaxihquiqui. Jahuen jisnonbi rihbi tah hen mia yohihi. Jan hahquirihbi joyaxihqui honanxon jan jihuemayaxihqui rihbi honanxon tah hen mia yohihi. ² Jahuen joi yohihue. Tantixonma yohi yohihue, yohiti siripaiya yohixon siripaima bi rihbi yohirihbiquin. Jaabo hohchatai jato nincamahue. Jato yohihue, hohchayama sca jaabo. Siripi jihuetaibo sirijaquin jato yohihue. Tenexon jato honanmaquin jeneyamahue. ³ Ponte joibo nincacatsihyama bi res ta jaticaniqui. Huetsa joibo nincacatsihxon ta jaa queenai joibo res nincanoxon sca honanmanicahbo hichajayaxihcanihqui. ⁴ Papan joi coin nincati jenebahinxon ta hihcoinaima joibo sca nincaticaniqui. ⁵ Jascaraibaan bi mihri miin yora coirameti jihuehue. Hohmis hohmisquin bi tenehue. Papan joi siri yohinicahax teehue. Noquen Hihbo queenai quescabijaquin noquen Hihbo hahxonhue.

⁶ Noquen Papan joi hean yohihi copi hea rehteti ta nea pishcascaiqui. Hea huetsa main cati ta nocoscaiqui. ⁷ Shinan camahahtanax tah hen teenihqui. Hen tah hen queyo sca jai. Cristo chibanquin tah hen jeneyamanihqui. ⁸ Mia tah min heen siri baque qui hihxon jan hea hinanyaxihqui jahuen hinanti ta Papan hea bexoja sca jaxonihqui. Pontejaquin siri hin tiroma quin hihnicaxon ta jaa hinanti hea hinanyaxihquiqui, jahuen baquebo bichi joxon. Hea huestima bi jaa joti jenipahichaibo jatihibi ta jascapa hinanyaxihquiqui.

Hea hahxonhue hahquin jan yohihi

⁹ Hehqui joriyaxahnhue, histon. ¹⁰ Hea yanapancatsihyamascaax bi mai mehabohon queenax ta Demas hea potabahini cahoxqui, Tesalónica janin sca canoxon. Galacia janin ta Crescente cahoxqui. Tito ta Dalmacia janin cahoxqui. ¹¹ Lucas huesti ta hehbetanbi hihquiqui. Marcos benaxahnhue, hihueyahnoxon. Jaan ta hea sirijaquin yanapaniqui. ¹² Efeso janin tah hen Tiquico raanhohqui. ¹³ Joquin heen tari hea bexonyaxahnhue. Troas janin tah hen Carpon xoboho jaa potabehnanhohqui. Heen quiricabo rihbi hea bexonhue. Heen documentobo rihbi tah hen hashoan queenai. ¹⁴ Yami charjanica Alejandron ta hea hihtijaquin tiromajahoxqui. Jan jascacho quen ta Papan jaa copiyaxihquiqui. ¹⁵ Hahqui coiramexahtahi min. Coshin bi res ta jaan hea pantenishqui, hen yohicatsihqui bi.

¹⁶ Hea demandamenohi tian ta yohuanxonquin tsoanbi hea yanapanyamahoxqui. Jatihibichin hea jenebahinquin. Jaabaan hea jascahi bi Papan jato casticanyamapahinnon. ¹⁷ Hea jenehiboya bi ta Papan hea yanapanhoxqui. Jatihibi judiomabaan jahuen joi nincan ta hea coshi hinanohoxqui, jahuen joi hen sirijaquin yohi yohinon. Tiroma hapon hea rehtepanan ta Papan hea hihti yanapanhoxqui. ¹⁸ Jatihibi tiromabo quiha ta noquen Hihbaan hea xahbanjamatihiqui, jano jan naihohxon jihuemayaxihqui janin hea jihuemanoxon. Jascabijaquin sca tah non Hahxon tah min noque jai Hihbon, hah non jatihi, jahuentianbi tantixonma. Jascari rahan.

Raannoxon quirica queyoscai

¹⁹ Priscaya Aquila hea yohixonhue man jascabi jayamahin hahquin. Onesíforo jaabo jascajaribiquin. ²⁰ Corinto janin ta Erasto banehoxqui. Mileto janin tah hen Trófimo hisinai potabehnanhohqui. ²¹ Janin matsi tian noconon joriyaxahnue, histon. Eubulonen ta mihqui salud raaniqui. Pudente, Lino, Claudia, noque huetsabo jatihibichin ta jascajaribiquin mihqui joi raaniqui.

²² Noquen Hihbaan mia sirijaquin mananon yocaxonxon tah hen jan mato shinan ribhi hinannon hen mato yocaxonai.

TITO

Tito qui Pablonen raanni joi

Tito qui Pablonen huishahi

¹ Hea Pablo ta hen Papan yonoti qui, Jesucriston raanti. Hea ta raannishqui, Papan caisaibo hen hashoan sca nincacoinmanon. Papan shinanai quesca jaahbo ta hihcainai joi hen jato yohihi jonon hea raannishqui. ² Papa Dios ta jahuentianbi quesayamahihqui. Naiyahpa mai jariyamahi bi ta neateman noque hahxontijanishqui, non queyoyamanoxihnon. Jaa honanxon tah hen hahqui heen shinan camahi. ³ Neateman hahxontijanixon ta jonibo honanmati siripai tian sca Papan honanmascaiqui. Noque teehihmanicaxon ta Jesucriston joi jato yohitanhue hea jaxon jahuen joi honanmahiqui. Jascahah tah hen jato queyoyamanoxihqui joi hean yohihi. ⁴ Mia tah min heen baque coin qui, Titon, hean yohihah min noquen Hihbo qui hinamehni copi. Mihqui tah hen nea joi raanai. ¿Noquen Papa Dios betan noquen Hihbo Jesucristonen mia jointi sirijaha min jahuen shinanya jihueyamahin?

Creta main teeti Pablonen yohihi

⁵ Hen mia yohipi quescajaquin jema tihibi janin jaton pastorobo caisxahnue hahxon tah hen jaabo pishinaibo mian pontenon hihxon Creta mai janin mia potabehnanhohqui. ⁶ Nescapahbo pastorobo caishue: hahqui jahua yohuanti yahahi, huesti haiboyahpa, jaton baque nincacoinnica, yohitima jaton baque yahahi, jaton nincayosma baque yahahi. ⁷ Pastoro ta Papa hahxonnica qui. Papan baquebo jisxonnica copi ta hahqui yohuanti yamatihiqui, jaabi queenai quescajanicahma bi noquen Hihbo queenai quescajanicah, histon sinayamahi, pahenyosma, rainyamayosma, coriqui bihcatsihquin tiromajatimahi. ⁸ Jahuen xobohoxon noquen huetsabo pimaxon hoxamanicah. Sirijati costannica. Shinayahpa. Pontejaquin shinannica. Noquen Hihbo qui hinamehti jihueti, hahri coirameti. ⁹ Papan joi siri haxemaha bihxon jeneyamanica. Jaa joiyaxon caibo rihbi sca pontejaquin yohixon jascajaquin rahan jascajahue yohiquin janicah, joi bichinaibo rihbi netemanicah. Jascapahbo caishue pastornon.

¹⁰ Nincayosmabo ta hicha qui, yanca res yohuanresaibo, paranmisbo. Judiobo ta hashoan rihbi jascapahbo qui. ¹¹ Jato netemati ta jaiqui. Tiromajaquin coriqui bihnoxon ta jascajatima joi honanmaxon caibo masajacanihqui, jaton jenaboyabi jato masajaquin.

¹² Cretanobo ta jascabi quesabo qui, yohina tiromabo, pihanhuan chiquishbo hah ta janishqui jaton joi huishanicaton. ¹³ Jan yohini ta hihcainihqui. Jaa copi jato sirijaquin pontehue, ponte joi rahsi nincacoinahbo. ¹⁴ Judiobaan hihresai yohuan xeni nincayamahabo jato pontehue. Ponte joi potabahinti caibaan jato yohihah bi jeneyamahabo jato honanmahue.

¹⁵ Hohchajomabaan yohuan ta jatihibi siripihqui. Nincacoinyamahi rishtayahpabaan jai ta jahuabi siri yahamahihqui. Jaton shinan, jaton jointi rihbi rishta bi res. ¹⁶ Papa Dios tah hen honanai hih jan jai bi tah non jan hahcai jisxon jan Papa Dios honanyamahi non honanai. Rahnintibo tah qui, yohitimabo, Papan jisi jaabaan jahuabi siribojaxontimahi.

2

Nincati joi siribo

¹ Mia tah min jascapahma qui. Ponte joi rahsi nincacax jihuetahbo jato yohihue, mian. ² Yosibobo yohihue, pahenyamahabo, pontejaquin shinanax jihuetahbo, shinayahpaxon tenehi jihuetahbo, ponte joi rahsi bihcoinabo, sirijaquin noque huetsabohon shinanahbo, yobaxon tenegahbo. ³ Yoxabobo rihbi jascajaquin yohihue, noquen Hihbo qui hinamehtax jihuetahbo, caibo qui yohuanamahabo, pahenyosma jaahbo, siri joibo honanmahabo. ⁴ Siri joibo honanmaxon ta yoxabobaan texe haibobo jaton benehon quenti haxemarihbitihiqui, jaton baqehon rihbi quenti haxemaquin. ⁵ Shinayahpa haibobo jihuenon ta yoxabobaan jato haxematihiqui, tsiniyamahabo, jaton xobo coiranabo, siri haibobo janon, jaton benen yohihah nincanicabo. Nincacoinyamahibo Papan joi qui tiromahi yohuanamanon jato jascajaquin yohihue.

⁶ Bebobo rihbi jascajaquin yohiquin sirijahue, shinayahpahax jihuetahbo. ⁷ Mia jihuetai jisish jascarihibihi jihuetahbo jatihibi sirijaquin shinanax jihuehue. Ponte joi res honanmahue. Noquen Hihbo qui min hinamehtai jato jismahue. ⁸ Jahua tiroma yohuanaxma siri join res yohuanhue, noque qui jahua yohuanti yamahahax noquen rahuibo rabinnon.

⁹ Patoroyahpabo yohihue, jaton patoronen yonohah nincacahbo, patoronen yohihi quescabijaquin jaahbo, jaton patoronen yohiha joi bichinyamahahbo. ¹⁰ Jahuabi yomet-sohyamahabo. Jatihibijaquin ponte bi res sirijahabo jato yohihue. Noque teehihmanica Papan noque yohihi joi hihti siri jisibo hihquish jihuetai jato haxemahue.

¹¹ Noquehon shinanxon ta hahan jan jatihibi jonibo teehihmahi joi Papan noque hinaniqui. ¹² Noquen Hihbo shinanaxma jihuetai tah hen shinanyamascai, mai mehabaan jenipahichai tah hen jenipahiyamascai hih non janon jahuen joi siri noque hinanquin. Non shinanyahpahax jihuenon, ponte res Papan shinanai quescari non main jihuenon jahuen joi siri noque hinanquin. ¹³ Hihti coshi noquen Papa ta noque teehihmanica Jesucristo betan xabaya joyaxihquiqui. Jaa honanax manati jihuetai ta noque yohihiqui. ¹⁴ Hohchapan noque hihbojaquehahna ta noquen Hihbo hinamehnishqui, noquen rishta noque sohuanoxon, jahuenahbo sca non hihnon. Caibo sirijaxonti jenipahichaibo sca noque janon jaabi hinamehti.

¹⁵ Hen mia yohihi jato yohiquin sirijahue. Sirijaquin jato hihti yohihue, min jascajanon Papan mia yonohi honanxon. Jato nincayosmabomayahue, tsoabi.

3

Nincaquin sirijahax jihuetai

¹ Jato shinanmahue, jaton gobernadorbaan yohihah nincacahbo, tinintin rihbi yohihah nincacahbo, jatihibi siribojahiti queenahbo. ² Tsohquibi tiromahi yohuanyamahahbo, sinacananyamahahbo, sinataxma siripi jihuetahbo. Jatihibi joni sirijaquin yohuanquihabo jato shinanmaquin.

³ Noque rihbi tah non honanma hihpahoniqui, yohitima, paramehtah, Haitara hihquish jaa shinani nihresai. Tiromajaquin shinanax jihuetai. Notsi notsihi jihuetai. Huetsabaan noque jistahimajaquin. Noque rihbi jistahimahanani. ⁴ Non jascapahbo jihuepahoni que bi ta noque jihuemanica noquen Papan noque hahxonnishqui, noquehon shinanai noquen Papa hihti siri. ⁵ Non pontejaquin hahcai copima bi ta noquehon hihti shinanxon res noque teehihmahiqui. Hahquirihbi noque jonijanoxon noque chocaxon jahuen Yoshin siripan noque behnjaxon noque teehihmaquin. ⁶ Noque teehihmanica Jesucriston jihuetahbo non hihqui copi ta noque jahuen Yoshin siri hinaniqui. Jahuabi yohuashihxonma noque hinanresquin. ⁷ Jan noque jascaxonah tah non jahuen ponte siribo qui, jahuen jihuetahbo, jan yohini quescan non queyoyamanoxihnon non jihuenon.

⁸ Jasca coin tah qui. Jascajaquin yohiquin jeneyamahue, mian. Papan joi nincacoinaiban siribojaxonti haxxon shinanbehnoyamahahbo. Hen mia yohihi joi ta siri qui. Haxe hax jascari jihuetai, siri. ⁹ Hihresai yohuanyahpabo betan join bahchinnyamahue. Tsoabo miin xenibo quin hahxon Papan baquebo honanti shinanaiban bi jato joi bichinyamaquin. Sinacanancatsihquibo bi jato sinamayamaquin. Moisesnin huishani joi copi join bahchincatsihquibaan bi jato betan join bahchinnanyamahi. Yohuani ta hihres hihrescaniqui, jahua honantimahi.

¹⁰ Huesti shinanyahpabo noquen huetsabo japanan huetsa jonin huetsa joibo sca jato nincamacatsihqui jaibo huestijaquin hihti yohihue. Huestijaquin hahyamaxon rabejaquin yohiquin sirijaxon jascapa joni potabahinscahue. ¹¹ Jascapa joni jahuen shinan tiromahi cahcoyahax hohchatai honanscaxon jenehue. Jaanbi ta jahuen jananbi jahuen hohcha yohihiqui, Papan casticanyaxahnon.

Pishinaibo hahxonti

¹² Artemas hen mihqui raanaiya, jaa raanyamaxon hen Tiquico mihqui raanaiya, Nicópolis jema janin hea behchihi joyaxahnhue histon. Janoxon tah hen jene tian huinomacatsihqui. ¹³ Yohuanxonnicca Zenas betan Apolos mihqui nocotaiya shinanquin sirijaxon jaabo pishinaibo hinanhue, jahuabi pishinaxma caribihabo. ¹⁴ Pishincoinaibo yanapanabo jatihibi hahxonti noquen jonibo honanmahue, hicha bimiyahpa quescan hicha shinan jaahbo.

Jahan quirica queyoti

¹⁵ Hea manahibaan ta Min jascabi jayamahin huetsan hahquin mihqui joi raaniqui jatihixonbi. Noquehon shinanaibo yohixonhue, noquen Hihbaan shinanya man jayamahin hahquin, Papan shinanya janahue jatihibi.

FILEMON

Filemon qui Pablonen raanni joi

Filemon qui Pablonen joi raani

¹ ¿Noquen Hihbaan shinanya man siripi jihueyamahin, noque huetsabaan? Sipo xoboho hea tsahonihbaan tah hen sipo janinxon noquen huetsa Timoteo betan nea quirica huishahi, mato qui raannoxon. Noquen Hihbo Jesucristo copi ta hea tsahoncannishqui. ² Mia Filemon hehbe teenica, noquen choca Afia, noquen Hihbaan hehbe sontaro Arquipo, miin xoboho tsinquitai noquen huetsabo rihbi, mato jatihibi qui tah hen nea raani. ³ ¿Noquen Papa betan noquen Hihbo Jesucristonen mato xabajahah man jenimahi siripi jihueyamahin?

Filemonen noquen Hihbo nincacoinai

⁴ Papa Dios yocaxon tihibi tah hen mia rihbi yocaxonai, noque huetsan. ⁵ Noquen Hihbo jenexonma min jaa hahxonai, noquen huetsabohon rihbi shinanxon min jato hahxonai joi nincaxon tah hen Hahxon tah min jato jai, Papan, hahcai. ⁶ Noquen Hihbohon shinancoinxon min joni huetsabo hahxona jaabaan sca nincacoinnon tah hen mia yocaxonai. Criston noque hinanai jahuentiho siri quin jonibaan honanxon mia jai quescapa shinan bichíbo hihxon tah hen mia yocaxonai. ⁷ Pishinaibo min jato hinanah ta noquen huetsabo jointi siricahinihqui, noquen huetsan. Min jato hahxonai joi nincaxon tah hen shinanquin sirijahi hihti jenimahi.

Onésimo bihrohahue Pablonen jai

⁸ Jaa copi tah hen mia yocasai, noquen huetsan. Criston raanti hihxon mia yonotihí bi tah hen mia yonoyamahi. Mia tah hen yocaresai, min hea hahxonnon. ⁹ Yonohahma bi joni huetsahon shinanax miabi queenxon copi min hahxonnon hihxon tah hen mia yocaresai. Jesucriston raanti hihxon bi tah hen jahuen sipojahacamaxon mia yocaresai. ¹⁰ Heen baque Onésimo copi tah hen mia yocacai. Sipo janin jihuexon hean Cristo joi nincamaxon bihmaho ta heen baque coin qui. ¹¹ Neateman miin joni nincayosma hihpahonish bi ta rahma siriscaiqui, mia hahxonnica, hea hahxonnica rihbi. ¹² Mihqui caribinon tah hen jaa raanscai. Jahan hen shinanai heen baque tah qui. ¹³ Mian yohihah quescapaa jaa hea yanapannon hen jaa banepanan tah hen baneyamahi. Sipo xoboho tsahoxon Papan joi hen yohinon hea manatihí bi tah hen baneyamahi. ¹⁴ Jaa banehue min hea jayamaha copi tah hen jaa banecatsihyamahi. Min queenxonma hahti tah hen queenyamahi. Queenbochibi min hahxonnon tah hen raanscai. ¹⁵ Miin jonima bi miin huetsascaax mihqui caribiyaxahon rah tah min jaa xahbanjaniqui. Poyan tihixonpajaquin min jaa yamajani que bi jascabi sca mia mananon. ¹⁶ Rahma ta miin joni mentan hashoan hihti siri qui, miin huetsabi sca. Jahan min hihti queenai. Hean jisí ta jascapah qui. Mian jisí rah ta jascapahax bi hashoan siri rihbi qui. Miin jonihax bi ta noquen Hihbo copi miin huetsa coin sca qui. ¹⁷ Hean raanah sca sirijaxon sca bihhue. Heen huetsa hihxon min hehon shinanxon hea Johue hahcai quescajaxon, jaa rihbi jascajahue.

¹⁸ Mia tiromajahi jan janí tian, hea sca copi yocahue. Ribin jan mia janí tian hea sca copi yocahue. ¹⁹ Mia tah hen copijatihí. Hea Pablonen tah hen heen mequemanbi huishaquin mia yohihí. Miin jointinin min hea ribinai que bi tah hen mia jascahi. ²⁰ Hihcointi. Ribin tah min hea jai. Noquen Hihbaan noque rabebi jihuemahi honanxon hea pishca hahxonscahue. Cristo queenai quescajaquin hea jenimamahue.

Jan quirica queyohi

²¹ Hen yohihah min hahxoncointihí honanxon tah hen mihqui jascajaquin huishahi. Hen yocacai quescajaquinma bi hashoan rihbi min hea hahxontihí tah hen honanai. ²² Hea jaho hoxati chique hea mequexonhue. Man hea yocaxona copi Papan hea picohah tah hen mato qui catihí. Hean shinanah ta hea picoti pishcascai. ²³ Min jascabi jihueyamahin hahxon Epafra yohixonnahue noquen Hihbaan janen. Noquen Hihbaan joi yohihí copi ta sipo xoboho tsahotihqui, hea hihqui quescari. ²⁴ Hehbe teenicabo rihbi jascajaquin yohixonnahue, Marcos, Aristarco, Demas, Lucas.

²⁵ Noquen Hihbo Jesucriston xabapan jihuenahue.

HEBREOBO Hebreobo qui raanni joi

Jahuen baqueyabixon Papan yohihi

¹ Noquen xenibo nincamanoxon ta hicha coti jahuen joi Papan jato nincamanishqui, mesco yonotiyahpaxon. Jahuen joi yohinicaboyaxon jato yohiquin. ² Noquen xohtabo nincamanixon ta nete queyoyaxahnon jahuen baqueyabixon sca noque nincamanishqui. Jaa jahuen baqueyaxon jatihibi hahmenonixon ta jatihibi rihbi jaan hihbojanon Papan yohinishqui. ³ Jahuen xaba jenquetsahpa quin hihxon xaba jisxon non honanai quescajaribiquin ta Papan shinan jenquetsahpa quin hihxon jahuen baque yohuanai nincaxon non honanscai. Noquen Papa jenquetsahpa quin hihxon tah non jahuen baque jisxon non honan sca jai. Jascapahxon ta jahuen coshi shinaman yohixon jahuen baquen jatihibi hihmahiqui. Jaan hihmayamahah cahen queyotan. Noquen hohcha sohuahax ta quiquin hihbo sca Papa patax tsahoscai qui, jatihibichin hihbo sca.

Papan baque hihti shinanyahpa

⁴ Jascapahax ta Papan yonotibo mentan hashoan coshi qui. Papan yonotibo ta Papa betan hahbe shinanyahpa ma qui, yonoti cahron. Papan baque ca hahbe shinanyahpa. Jaa copi ta Baquen hahqui qui. ⁵ Papan huishani joi ta jascarihbiqui:

Mia tah min heen baque qui. Baquen hah sca tah hen mia jai hihqui jaa huisha. Jahuen yonotibo ta quenaquin jascajayamanishqui, jahuen baque huesti. Huetsa jahuen huisha ta nesca qui:

Hea tah hen jahuen Papa hihtih, jaa rihbi heen baque hihnon hihqui jaa huisha. ⁶ Huetsa janin rihbi ta jahuen baque beboquiha yohihi nea huisha jaiqui:

Jaa bebón ta Papan yonotibo jatihibi raboxonen tisquihahpaqueyaxihqui qui

hihqui. ⁷ Jahuen yonotibo yohihi ta nescari yohuannishqui:

Jahuen yonotibo ta Mia nihuetanhue yohihiqui. Jahuen hahxontibo cahen chihhi perehimatanhue hahcan.

⁸ Jahuen baque yohihi cahen nescari:

Jascabi sca tah min jatihi, Diosen quiquin hihbo. Miin hihboti ta jahuentianbi queyotimahiqui. Hahan ponteti shinaman tah min miin jihuetaho jihuemahi.

⁹ Sirijahibo tah min siri jisi. Tiromajahibo tah min casticanai. Jaa copi ta Papa Dios miin Papa hihxon, mia hihti jenimamahiqui, caibo jenimaribinon bi mia rihbi sca hihti jenimahi

hihqui jaa huisha. ¹⁰ Huetsa huishani joi rihbi:

Mian tsahonah ta mai jamenonishqui, Hihbon. Miin mequemanbi tah min naijaniqui.

¹¹ Coton payocanahi hihqui quescarihbihhi ta jatihibi payotihiqui. Jaabo queyocahinyaxihqui bi mia queyoyamanox manatai.

¹² Rahcoti hahcajaanquin tah min jato sebibahinyaxihqui, coton cahtoquin hahcajaanquin. Jascajaha ta huetsapahcanyaxihcanihqui. Jaabo huetsapahi bi ta mia jascabiyaxihqui huetsapahyamahi. Mia tah min queyoyosma qui

hihqui jaa huisha joi. ¹³ Huetsa jascapa huisha rihbi ta jaiqui, jahuen yonotibo jan yohiyamahi bi jahuen baque jan yohihi nescari:

Hea mecayaho tsahotihue, nenohax jatihibi hihbonoxon. Miin rahuiho tah hen mia bihxontih, namanajaanquin miin hinabo sca jaahbo

hihqui jaa huisha joi, jahuen baque yohihi. ¹⁴ Jahuen yonotibo ta huetsabo qui. Jaabo jatihibi ta jahuen hahxonnicabo qui. Jahuen jihuetaho yanapannon hihxon ta jato raanihqui.

2

Non hinamehcoinxon nincati

¹ Jahuen baquen noque nincamani copi tah non hihti nincati jai, nincaquin sirijaquin. Nincayamahax huaca noqueya tejabahcaini quescapi jano jahuen jihuetaho yamahiton non camis. ² Noquen xenibo nincamamenonixon ta jahuen yonotibo raanxon jayaxon Papan jato jahuen joi yohinishqui. Jaa joi nincamanixon ta jan yohini quescabijaquin noquen xenibo casticannishqui. Jascajahue hahca bi nincayamahibo copi casticanquin. Jascajayamahue hahca bi nincayamahiboya jato casticanquin. ³ Hihti sirijaquin jahuen jihuetaho jihueticaxonxon ta jahuen baqueyaxon sca noque jahuen joi siri nincamanishqui. Jahuen joi siri nincamamenoquin ta jaanbi yohinishqui noquen Hihbaan. Jaa

nincanilhaan sca ta noque sirijaquin yohirihbinishqui. Nincacatsihyamaxon tah non jenuetsahaxon bi jahuen casticanti noque xahbanen paquematomahi. ⁴Yohicoinnicabohi non honannon hihxon ta Papan yanapannishqui. Yanapanquin ta hahan honantibo jismaxon, hahan rahetibo jismaxon jahuen coshi jismaxon, non jahuen yoshin siriyaxon hahxonti teebo noque hinanpaquenishqui. Jaabi queenxon ta jascajanishqui, nincacahbo hihxon.

Noque quescapa yoraya Cristo jahui

⁵ Papan noque jihuetijaxonai tah hen mato yohihi. Jahuen yonotibo ta jihuetijaxonyamahiqui; noquenah ta qui. ⁶ Huetsa huisha joi ta jascari qui:

¿Jahua copi min noquehon shinanain, Hihbon? ¿Jahua copi min jonibo sirijaxonain?

⁷ Miin yonotibo mentan hashoan naman hihtatahnon tah min joni jananihqui. Hihti hapo sca tah min huenihhnihihqui.

⁸ Jatihibi sca jaan hihbojanon tah min hueninihqui hihqui jaa joi. Jatihibi jan hihbojanon jan hihqui ta jahuabi hihbojahama yamahi qui. Jan jascari yohuanai bi tah non jan jatihibi hihbojahi non jisyamaparihi. ⁹ Jatihibi hihbojahi jisyamaparihon bi tah non Jesus jisnihi, basima tahni Papan yonotibo mentan hashoan naman hihquish bi noquen hohcha copi mahuanish rahma quiquin hihboscai, hihti shinanya hihti coshi hihboscai. Jascahue Papan jaah ta jatihibi noquen hohcha copi mahuanishqui, noquehon shinanon Papan yohihah.

¹⁰ Jascapabojapan hihxon ta queenxon copi Papan jatihibijanishqui. Jatihibi hihboxon ta queenxon copi rihbi hicha baquebo jahuen jihue janin hihuehahnan jato beboxonnica hihti jihuemanica hihnon tiromabo tenemanishqui. Jaa copi ta yonotibo mentan hashoan naman Papan jaa hihmanishqui, basima tahni. ¹¹ Papan baquebo rahsi non janon ta noque beboxonnicahton noque hiohiqui. Jahuen Papa ta noquena qui, jaa papayahpabo rahsi. Jaa copi ta noque yohihi, Heen huetsabo tah man qui hihti jaa hihtimahyamahiqui. ¹² Papan huishani joi ta jascarihbihiqui:

Mia tah min jascanica qui. Honanahbo hihxon tah hen heen huetsabo yohitih. Tsinquitaibo tocan rihbi tah hen hihqui behuatih

hihqui jaa joi. ¹³ Huetsa huishani joi rihbi ta nescari qui:

Jan yohihi quescabijaquin hea hahxontih tah hen shinancoinai.

Huetsa huishani joi jascarihbih:

Neno tah hen qui. Papan hea hinanai baquebo betan tah hen qui hihqui jaa joi.

¹⁴ Noque huetsa copi ta jonibo yorayahpabo hihqui quescarihbih jaa janishqui, yorayahpa sca. Tiroma yoshiman ta mahuati jonibo hihbojanishqui. Noquen Hihbo sca ta mahuquin tiroma yoshin jahuen coshi bichinnoxon yorayahpanishqui. ¹⁵ Non mahuanish hihquish raqueya jihuetiabo Satanasnen hinabo hihquibo bi ta Satanas yosmajaxon noquen Hihbaan noque picohiqui, non Satanasnen hinabo hihyamascanon. ¹⁶ Jahuen yonotibo jascaxonnoxonma bi ta Abrahamen chini baquebo jascaxonnoxon yorayahpanishqui. ¹⁷ Jaa copi ta jahuen huetsabo hihqui quescaribiti janishqui, noque quescapahxon ca jaamajaquin jaibohon jaan shinanai. Papa beboxon sca noque sirijaquin yohuanxonai. Jascapahxon noquen hohcha sohuaxonquin. ¹⁸ Tiroma yoshiman hohchamacatsihquin tanahah bi tenenixon ta rahma tenehibo rihbi jaan yanapanti hahtipahiqui.

3

Jesusen Moises mahuinquin

¹ Jaa copi noquen Jesus shinanquin sirijanahue, hea huetsabaan. Hehbe Papan baquebo hihxon, Papan noque jatihibi quenahi honanxon rihbi noquen Jesus shinannahue. Papan ta jaa raannishqui. Noquen yohuanxonnica hihnon rihbi ta jaa janenishqui. Jaa tah non jatihixonbi honanai. ² Papan jihuetahbo jisxonquin Moisesnin jatihibi sirijaquin hahxonni quescaribiquin ta noquen Hihbaan jaiqui. ³ Xobojanicahton sirijaquin xobojahiya tah non jahuen xobo siri jisi. Jascarax bi cah non xobo hihbo qui hashoan rihbi siripi yohuanai, xobojati honanai copi. Jascarihbih tah non Moises siri jisxon, noquen Hihbo hashoan sca siri jisi. ⁴ Xobojanicahton xobojaha copi noquen xobobo jai quescari rihbi ta noquen Papan Jahue hahca jatihibi sca jaiqui. ⁵ Papan noque nincamayaxihqui joi non nincacoinnon ta Moisesnin sirijaquin teexonnishqui, Papan xobohoxon teexonai joni hihxon. ⁶ Jahuen teexonai jonima bi Papan baque hihxon ta Criston sca Papan baquebo jisxonihqui. Papan baquebo hen hihqui bi tah hen noquebi yohihi. Jointinin honanax, jonibo qui hihtimahpaxma non noquen Hihbo jenehaxma, jaya non joihibo tah non jahuen siri baquebo qui.

Haho tantiti Papan hahxonai

⁷ Jaa copi Dios Yoshin Siripan yohini joi nincacoinnahue: Rahma jahuen joi nincacax nincayosmayamanahue.

⁸ Papan jato teneresnon hihxon nihi naman cahuan cahuanai nincayosmabo jani quescayamanahue.

⁹ Jahuentiho tene Papan jaiquin hihxon ta maton papabaan hea janoxon tana tanacannishqui. Coshixon hen jato hahxon hahxonai jixxon bi ta cuarenta bari hea tanarecannishqui.

¹⁰ Jaa copi tah hen jato qui sinaxon yohinihqui: Huetsajaquin shinanax ta jascabihi paramehcaniqui. Heen bahibo honanaiboma ta qui.

¹¹ Sina sinaxon tah hen hihti yohinihqui: Heen jihue janin ta jaabo jahuentianbi hihquiyamayaxihcanihqui.

¹² Coiramenahue, hea huetsabaan. Nincatima tiromabo shinanbo maton jointi janin jamis, tiromahi. Jascapa shinanbaan ta mato noquen jihuemanica Papa Dios nincamamajahiqui. ¹³ Tsoabi hohchapan paramehtax nincayosmayamanon hihquish jatihibi neten joni huetsa betan yohinannahue. Rahmabi nincacoinhue Dios Yoshiman yohihah histon nincacoinahbo yohinannahue. ¹⁴ Nincacoinmenoxon non mahuanoxon caman jascabiyaquin sirijaquin nincacaibo tah non Criston hahbe jihuetoqui.

¹⁵ Rahma sca jahuen joi nincacax nincayosmayamanahue. Papan jato teneresnon hihxon nihi naman cahuan cahuanai nincayosmabo jani quescayamanahue.

hih ta janishqui. ¹⁶ Papan jato nincamaha bi ta noquen papabo nincacatsihyamanishqui. Egipto mai janinhax Moises betan jonibo jatihibi ta jascapahbo janishqui. ¹⁷ Papan ta cuarenta bari jato qui sina tenenishqui. Hohchanish copi ta nihi naman mehax mahuatah sca racarenencannishqui. ¹⁸ Nincayosmabo copi ta jaabo yohihi, Heen jihue janin ta jahuentianbi hihquiyamayaxihcanihqui, Papan janishqui. ¹⁹ Jan yohini quescabi ta janishqui: nincayosmabo copi jano hihquiti hahtipahyamahibo.

4

¹ Jaa copi coiramenahue. Jahuen jihue janin hihquiti mato yohiparihi bi jano hihquitima quescapahbo man jamis. ² Jahuen joi siri jan jato nincamani quescajaribiquin ta noque rihbi nincamahiqui. Nincacuin bi nincaresaibo copi ta yanca bi res jato nincamanishqui.

³ Nete jamenonon ta jahuen jihue noque hahxonnishqui. Jaa jahuen jihue yohihi ta Sina sinaxon tah hen yohinihqui, Heen tantiti janin ta jaabo jahuentianbi hihcoyamayahicanihqui

Papan janishqui, caibo sca jano hihcoyaxahnon. Non nincacoinax hinamehtaibo tah non jano hihconica qui. ⁴ Jahuen tantiti yohihi ta huishani joi nescapa jaiqui:

Jan hahrasihhi jahuen teebo jatihibi queyohax sca ta jahuen siete neten Papa tantiscannishqui.

⁵ Jahuen jihue yohihi ta hen yohiscail huisha jaiqui:

Heen tantiti janin ta jaabo jahuentianbi hihcoyamayahicanihqui

hihqui. ⁶ Jan nincamamenonibo ta nincayosmabohax jano hihcoyamanishqui, caibo sca jano hihcoxihnon. ⁷ Huetsa huisha janin rihbi ta David yohuanni joi jaiqui, Papa tantini pecaho basihax sca jahuen nete yohihi jan nescari yohuanni:

Rahma sca jahuen joi nincacax nincayosmayamanahue

hihqui. ⁸ Papan tantiti ta nai naman meha ma qui. Papan tantiti janin Josuepan jato hihcomaha jano hihresscaibaan cahen Papan tantiti janin hihconahue jato jayamahan.

⁹ Jaa copi ta Papan tantiti janin jahuen jonibo hihcotei japarhi non honanai. ¹⁰ Jahuen teebo queyohax Papa Dios teeyamascai quescarihibi ta Papan jihue janin hihquihibo jihue jihuethiqui, tee teeyamascai. ¹¹ Nincayosmabo hihquihaxma quescayamanoxon sca Papan jihue janin hihquinoxon histon hinamehxon hihti nincacoinnahue.

¹² Papa Dios yohuanaiya tah non nincati jai. Jahuen joi ta jahuen yoshinyahpa qui. Noquen jointi janin ta jaa join teetihqui. Hoquenbehcoinqi quehsho machitonon non histon nacoti hahtipahi quescahax bi ta hashoan rihbihi jahuen joi noquen jointi janin hihquihiqui. Noquen yoshin, noquen shinan, noquen xao rechi, noquen xao napo caxquexon jixxon hahcajaquin ta noquen jointi janin non yohuanai, non shinanaibo jaan honanishqui. ¹³ Jaan jisi ta jonetai jahuabi yamahihqui. Mahpohahbo ta mahpohahma qui, janibi racatai quescapahbo, jaan jisi. Noque jascajaquin jisi yohuanai tah non nincati jai.

Jesus noquen quiquin yohuanxonnicah

¹⁴ Naihoh huinocahini cahax ta Papa bebon noquen quiquin yohuanxonnicah jaiqui, Jesus, Papa Diosen baque. Jaa copi jascabi jahan shinannahue. ¹⁵ Paquemacatsihquin tiroma

yoshiman noque tanahi quescajaribiquin ta noquen yohuanxonnicah rihbi tananishqui. Tanahah bi ta hohchayamanishqui. Jascapahbo tenenixon ta noquehon shinanishqui. Non hohchataiya ta noque yohuanxoniqui. ¹⁶ Jaa copi jenimahanan Papa yocanahue. Noquehon shinanxon jan noque yanapantihí honanxon, yocaresnahue. Non pishinai tian ta noque hahxontihiqui.

5

¹ Mainxon Papa bebonxon yohuanxonnicahbo ta Papan caisah joni rahsi janishqui. Yohuanxonnicah meraxon ta jato janepahonishqui, jaa bebonxon sca caibo yohuanxonnon. Hohcha copijaxonquin hahcajaxon ta hohchataibo jaiya jaton hinanti hinanxonquin jato yohuanxoniqui. ² Hahbe joni hihxon ta honanyamahax tiromahiboya jato teneti hahtipahiqui. Papan bahin catihí bi bahinma cahiboya ta jaton hahbe joni hihxon jato teneti hahtipahiqui. ³ Hahbe coshijoma hihxon ta jonibaan hohcha copi hiná rehtexon Papa hinannonxon jahuenahbi jahuen hohcha copi jascajaribiti jaiqui.

⁴ Noquenbi shinanax tah non yohuanxonnicah timahi, tsoabi. Papan janehah pari tah non jascatihí, jan Aaron janeni quesca. ⁵ Cristo ta jascarihíbi qui. Jaabi hapocatsihqui ma bi ta Papan yohihah pari noquen yohuanxonnicah jaa jai qui. Jaa yohihí ta nea huisha joi jaiqui:

Mia tah min heen baque qui. Baquen hah sca tah hen mia jai.

⁶ Huetsa rihbi ta jaa yohihí jaiqui:

Jascabi yohuanxonnicah ta mia qui, Melquisedec japahoni quesca.

⁷ Main pari hihxon ta Papa hihti yocanishqui, hicha. Coshin quenaxon huaohihxon ta Papa yocanishqui, mahuatimajati Papan hahtipahi copi. Jaabi Papa queenai quesca janon hihxon jan yocacah ta nincaxon Papan hahxonishqui. ⁸ Papan baque hihxon bi ta Papa queenai quesca jati haxenoxon tiromabo tenenishqui. ⁹ Jatihibi huinosca jaax ta jihuemanicah sca jaa qui. Jaa nincacoinaibo jatihibi queyoyamanox mananon ta jato hihbohiqui. ¹⁰ Melquisedec japahoni quesca quiquin yohuanxonnicah hihnon ta noque jihuemanica janon Papan jaa janenishqui.

Nincacoinyamamis, nincanahue

¹¹ Jaa yohihí non hicha yohiti jai bi tah man pabe sca jai. Jaa joibo mato nincamati ta tee qui. ¹² Neateman nincanixon man haxemanicah boscatihí bi tah man honanyamahi. Haxemanicahbo sca man hihtihí bi ta Papan joi haxemenotibo mato yohirihbiti man pishinai. Xoma hahmatibo tah man qui; chahomabo piti hahtipahyamarihibo. ¹³ Xoma hahcaibo ta baquexobo hihxon, pontejaquin shinanax jihueti honanyamarihiqui. ¹⁴ Chahomabo ta hanibaan piti qui. Hanibaan ta jahua Papan costaniquin, jahua jan costanyamahiquin hihxon haxenon honanscaiqui, Papa queenai quescajaxonxon.

6

¹ Mato hanijanoxon sca tah hen hahan pehocohti joi yohirihbixonma hahan haniti Criston joi sca mato nincamacatsihqui. Non nincamenoti joi man honanscaí quen tah hen jaa joi mato hahquirihbi yohiti queenyamahi. Jaa joi tah man honanscaí: Papa noquehon jenimanon hihquish non quesahi hihrespahoni tah non jenebahinscatihí, Papa nincacoinxon. ² Nashimati joibo, mamanjaxon tee hinanti joibo, jenquetsahax mahuanihbo huenyaxihqui joibo, Papan jascabijaquin casticanyaxihqui joibo. Jaa joibo man honanscaí quen hahan haniti joibo sca hen mato yohinon. ³ Papa queenaiya tah hen jascatihí.

⁴ Hinamehnixon bi noquen Hihbo jenebahinscaibo tah non jenquetsahaxon bi jato hahquirihbi hinamehmatimahi. Jaa copi tah hen mato hahquirihbi hinamehti yohicat-sihyamahi. ⁵ Non jenimanon ta siri joibo Papan yohihiqui. Jayaxihqui coshi ta noque hinanishqui jaya non jihuonon. ⁶ Jascajaquin noque hahxonah bi tah non jenebahini bahimahhuan cahax jenquetsahax bi hahquirihbi hinamehtimascaí. Papan jisi ta jascapahbaan jahuen baque hosanxon hahquirihbi jihuín hueonaibo qui. ⁷ Noquen jointi ta huai quesca pah qui. Bexon hoin mehchajaha ta bana siribo joconihqui, huai hihbaan piti siri bihnon. Jascapa huai ta Papan hicha bimijahiqui. ⁸ Moxaya mohue boncohi huai ta tiroma qui, casticanti res pishini. Jascapa tah non mapojahi, jan jabiyahpa queyonon.

Hahan teneti shinan

⁹ Jascari yohuanxon bi tah hen jascapahboma mato honanai, hea huetsabaan. Papan mato jihuemayaxihqui tah hen mato honanai. ¹⁰ Jatohon shinanxon tah man Papan joiya cahibo yanapaniqui. Nincacoinaibo tah man sirijaquin hahxonpahonixon rahma caman jato hahxonai. Jaa ta Papan shinanbehnotimahiqui. ¹¹ Jascaxonti hihti queennahue. Jatihibi man jascanon tah hen queenai. Mahuanoxon caman jato hahxonti hihti queenxon

hahxoncoinquin man Papa qui hinamehtai jismanahue. ¹² Jascajati shinan jaax tah man pabebo hihtimascai. Jan yohini quescajaquin ta Papan noque hahxoncointihiqui hihxon jaa honan jeneyamahibo ta Papan jihuetaho sca qui. Jan yohini quescabijaquin ta jato hahxonihqui.

¹³ Abraham hahxonti yohiquin ta tsoa quenati yamaahiya jahuen yorayabi Papa yohuanishqui. ¹⁴ Hihcoini. Mia tah hen hihti hahxontih. Mia tah hen hihti cajatihi, hahquin. ¹⁵ Jaa honanyaxon tene sca Abrahanen jaiya ta Papan jaa hahxoncoinnishqui. ¹⁶ Non hihcain yohuanain honanahbo hihxon tah non hashoan coshi joni quenanica qui, non hihcoinyamaahiya noque mahumanon. Joni huetsa betan join bahchinanxon tah non jascapa quenaxon coshi joi tantimahi. Sinacananyamscanon. ¹⁷ Jascajaquin rihbi ta Papan yohinishqui. Jahuen jihuetaho jahuen jihue janin jihueti catihi ta yohicoinnishqui. Jahuentianbi jan shinan huetsajatimatih non hihti honannon hihxon ta jahuen yorayabixon jato yohinishqui. ¹⁸ Yohuani ta Papa jahuentianbi quesatimahiqui. Quesayomaxon ta rabejaquin yohicoinnishqui. Jahuentianbi huetsatima joi rabe nincaxon, hahqui hinamehtax jahuen baquebosaxon non sirijaquin shinanxon jahuen joi bihnon hihxon ta jascajanishqui. ¹⁹ Jaa joi copi tah non hihti honanax jaa honanya jihuetai, jahuatohonbi noque boti hahtipahyamascaquin. Jano Papa Dios jai janin tah non hihcoti hahtipahscai, Papa yocanoxon. ²⁰ Jano cahi ta Jesus bebonishqui, Melquisedec janí quescapa yohuanxonnicah tah qui, jascabi sca noquen yohuanxonnicah.

7

Melquisedec quescapa yohuanxonnicah Jesus

¹ Melquisedec ta Salem jema janin jaton quiquin hapo hihpahonishqui. Quiquin hapohax bi noquen naihoq queha Papa bebonxon yohuanxonnicah. Nahua hapoboya jaton sontarobo rehtetani jahuiton ta Abraham behchihi caxon Melquisedecnen noquen Papa jaa yocaxonnishqui. ² Abrahanen rihbi ta jan bihtanai jatihibi tsamanxon chonga tsama jaxon Melquisedec huesti tsama hinannishqui, Papa bebonxon yohuanxonnicah quen. Melquisedec ta ponte hapo hihcatsihquiqui. Jaa ta jahuen quiquin jane qui. Huetsa jahuen jane cahen Salem hapo. Jaa jane ta siri hapo hihcatsihquiqui, shinanyahpa joni. ³ Jaa Melquisedec ta papajoma, mamajoma janishqui. Jahuen xohtabo rihbi ta tsoanbi honanyamahiqui. Jahuentian cainnishquin jahuentian mahuanishquin ta tsoanbi honanyamaribihiqui. Jasca copi ta Papa Diosen baque quescapah janishqui, jascabihi yohuanxonnicah.

⁴ Noquen quiquin xohta Abrahanen ta hihti siribo rahsi caisxon jahuaborabo jaa hinannishqui, Papan yohuanxonnicah copi. Jaa shinannahue. Abraham mentan Melquisedec hashoan hapo hihqui honannahue. ⁵ Levi baquebo ta texe Abrahanen xohtabo quescapahbo qui, jahuen jenabo. Jaabi ta jaabo yohuanxonnicahbo jati Papan yohinishqui. Yohuanxonnicahbo copi ta Papa Dios hinanquin jaton caibaan jato texe bihmatai jaiqui, jascapanahue Papan jaah. ⁶ Melquisedec ta levitobaan caibo hihyamanishqui. Jaton caibo que ma bi ta jahuen metoti tihibichina tsamanpaquexon jahuen jahuaborabo Papa Dios hinanquin Melquisedec Abrahanen bihmanishqui. Mia tah hen hahxonyaxihqui Papan Abraham yohini quen tah non Abraham shinanya hihpahoni non honanai. Jaabi ta Papan jato hahxonti yohuanypaxon Melquisedecnen jayaxon Abraham yohinishqui Papan jaa hahxonnon. ⁷ Hashoan coshi yohuanypaxon ta jascajaquin huetsa joni yohinica qui. Jaa tah non jatihixonbi honanai. ⁸ Rahma jaibaan ta mahuanicabaxon bi noquen hinanti bihcaniqui, Papa hinanquin non jato bihmahi. Melquisedec ta huetsapah qui: jaa jihuetai ta yohihihqui Papan huishani janin. ⁹⁻¹⁰ Abraham behchihi Melquisedec cahiya ta Papa Dios hinanquin Abrahanen Melquisedec jahuen jahuaborabo bimanishqui. Jaa bihmahi tian ta levitobo yamaparinishqui, Abraham xohtabo yamaparinon. Chini sca ta jaa xohtahi levitobo janishqui. Jaa xohtanicaxon ta hahbe bihmanicabo qui, Papa hinanquin Melquisedec bihmanica.

¹¹ Moises yohixon ta jahuen joi Papan noque hinannishqui, jaa joiya teenicabohax sca levitobo noque yohuanxonnicahbo janon. Jaa levitobaan noque yohuanxonca non Papa bebon jahuabi pishinyamaahiya cahen Melquisedec quescapa yohuanxonnicah sca Papan janeyamahan. Aaron baquebo cahen janehan. ¹² Noquen yohuanxonnicah huetsajaxon ta jaa yohuanxonnicahon joi rihbi Papan huetsajati jaiqui. ¹³ Levitobo rahsi noque yohuanxonnicahbo hihpahoni bi ta huetsa sca jatihiqui, Jaa huetsa jan yohihi ta levitobabo qui, judabo sca, levitobaan tee hahyamapahonibo. ¹⁴ Noquen Hihbo ta judabo qui. Jaa jonibo yohuanxonnicah jati ta Moisesnin yohiyamanishqui, jahuentianbi. ¹⁵ Huetsa joiyahpa huetsa joni sca jan yohuanxonnicah hihmati ta sirijaquin yohihiqui, Melquisedec quescapah sca yohuanxonnicah jati. ¹⁶ Yohuanxonnicahbo mahuataya huetsa levitobo sca

jato xohtati ta Moisesnin yohinishqui. Nea huetsa ta jascayamahiqui; nea ta coshiyahpa qui, mahuayosma. ¹⁷ Jaa yohihi ta nea huisha joi jai qui:

Mia tah min jascabi yohuanxonnicca jatihi, Melquisedec japohoni quescapah.

¹⁸ Moisesnin yohini joi res nincacax bi tah non hohchayahpabo banenica qui, jaa join noque sirijati hahtipahyamahiya. Jaa joi coshima copi ta Papan noque jaa potamascaiqui, hahan jahuejatimahiya. ¹⁹ Huetsa sca ta noque yohihiqui, jaa nincacax noquen Papa Dios qui cati.

²⁰ Non honancoinnon hihxon ta jahuen yorayabi Papa yohuannishqui. Levito jonibo yohuanxonnicahbo hihnon ta jascari yohuanxonma Papan jato janenishqui. ²¹ Noquen quiquin yohuanxonnicah sca janon ta jahuen yoraya yohuanxon janenishqui. Jahuen huisha joi janin ta jaa yohihiqui:

Mia tah min jascabi sca yohuanxonnicah qui. Papan ta yohixon jahuen joi jahuentianbi huetsajatimahiqui. Honanahbo hihquish ta jahuen yorayabi yohuannishqui

hihqui jaa huisha joi. ²² Jascaxon jan yohini honanxon sca hashoan siri joi jan noque hinanai honanrihbinahue. Jesus jaa yohuanxonnicca hihqui quen hashoan sirijaquin Papan noque hahxoncointihi honancoinnahue, hihti honanquin. ²³ Mai meha yohuanxonnicahbo jascabihi yohuanxonnicca japanan ta mahuatax queyocanacanicui. Jaa copi ta hicha jaiqui, huetsa mahuataiya jaa xahbanen huetsa hihquinon. ²⁴ Noque quiquin yohuanxonnicah ta queyoyamanox jihuethiqui. Jaa copi ta jascabijaquin noquen yohuanxonnicah qui. ²⁵ Queyoyosmaxon ta jahuen joi nincacoinax Papa qui jahuibo jaan jascabijaquin yohuanxonti hahtipahiqui. Jaa copi ta jascabijaquin jato jihuematí hahtipahiqui.

²⁶ Queyoyosma yohuanxonnicah tah non hihti pishinpahonihqui. Jaa ta joni siri qui, hohchajoma, jahuabi jahuen tiroma yamaha, tiromabo manayamaha, naihoh hihti hapo sca jaa jai. ²⁷ Levito yohuanxonnicahbo jati jai quescayama ta jaa jaiqui. Levitobaan ta jatihibi neten jaton hohcha copi hinabo rehteti jaiqui, jatonahbi jaton hohcha copi rehtexon, jaton caibaana sca huetsa rehterihbiquin. Jascajaquinma bi ta noquen quiquin yohuanxonnicahon huestijaquin noquen hohcha queyonishqui, jaabi hinamehtax mahuajuon noquen hohcha copijaxoni. ²⁸ Moisesnin ta hohchayahpabo janeti yohinishqui, yohuanxonnicahbo janon. Jan jaa yohini pecaho ta Papan jahuen baque sca noque yohuanxonnicca janenishqui, jascabi hohcha yosma.

8

Behna hahxontijaxon Jesusen noque yohuanxonai

¹ Hashoan nincati joi sca tah hen mato yohihi: Hen mato yohiha quescapa quiquin yohuanxonnicah tah non jaressai. Papa Dios janin canixon ta Papa Dios betanbi quiquin hapoxon jatihibi hihbojahiqui. ² Papan quiquin jati janin tah qui. Jaa jahuen jati ta jonibaan xobojahi quescapahma qui. Papanbi hahni tah qui. Janoxon ta noquen Hihbaan noque yohuanxoniqui. ³ Jatihibi quiquin yohuanxonnicah ta jonibaan hohcha copi jahuabora hinanxonnicah qui. Jascapahbo hinanxonti ta jahuen tee qui, Jascajahue Papan janí. Jaa copi ta noquen quiquin yohuanxonnicah rihbi jahuara hinanxonnicah qui, noquen hohcha copi. ⁴ Moisesnin yohihah ta levitobaan hiná rehtexon hinanxoniqui, hinanxonnicahboxon. Jaa copi cahen rahma caman noquen Hihbo main jihueparihax yohuanxonnicca jaa hihyamahan. ⁵ Levitobaan ta hahcoinyamacanicui. Papan xobo hahxoncatsihquiton ta Papan Moises yohinishqui: Jatihibi hen mia mahchi janin jismahipi quescabijaquin hahue, hahquin. Naiho jascapa jahoxon hinanti jai non honannon hihxon ta jascajaquin Moises xobojamanishqui. Jahoxon levitobaan hinábo rehtexon hinanxonai ta jascapahax bi jaamah qui. ⁶ Hashoan sca noque sirijaxontijaxon ta hashoan siri joibo sca Papan yohihiqui, jahuen jihuetahbo coin sca non janon. Jaa siri joibo nincamanicah ta noquen Hihbo qui. Jahuen noque nincamati joibo hihti siribo hihqui quescarihibi ta hihti sirijaquin sca noque hahxontihiqui.

⁷ Jahuen jihuetahbo jati ta noquen xenibo Papan yohinishqui. Jaa huesti jaton Papa Dios hihnon, jaabo rihbi siripi jihuetaiya jato hahxonnoxon jato yohiquin. Jaabo jihuetai siripaiya cahen huetsa joi sca jato yohiyamahan. ⁸ Tiromahi jihuetai boyo ta huetsajaquin sca jato yohinishqui:

Huetsajaquin sca tah hen heen israelibo yohiyaxihqui: Heen Judea main jihuetaibo tah hen huetsajascaquin behna joi sca yohiyaxihqui. Heen jihuetahbo jati tah hen jato yohiyaxihqui hih ta Papa Dios jaiqui.

⁹ Jaton xenibo hen yohini quescajayamaquin tah hen behna sca jato yohiyaxihqui. Mehuetanxon tah hen jato Egipto mai janinhah hihuenihqui. Heen jihuetahboxon bi ta heen joi jenebahincannishqui. Jaa copi tah hen jato nincayamascanicui hih ta Papa Dios jaiqui.

- ¹⁰ Heen jihuetaħbo jaabo janon ta israeli baquebo hean yohiyaxihqui hih ta Papa Dios jaiqui. Hea queenai quescati shinan tah hen jaton jointi janin niatihi. Jointinin honanahbo tah hen jascajatihi. Hea ta jaton Papa Dios hihtihi, jaabo rihbi heen jonibo.
- ¹¹ Jaatian ta jaton caibo betan yohinani, jaton huetsabo betan yohinani, Noquen Papa Dios honannahue hihquinanyamascatihiqui. Jatihixonbi ta hea honanscatihiqui. Baquebaan, xenibaan, jatihixonbi.
- ¹² Jaton shinan tiromabo tah hen sohuaxonyaxihqui. Jaton hohcha tah hen shinanyamascatihi, hahquin.
- ¹³ Behna joi jan yohihi ta jan yohimenoni joi xeniscaiqui hihcatsihiqui. Xeni jahuabora cahen payotax queyocahinnicah, jahua yohitimascai.

9

Papan jihue jenquetsahpa quin honanahbo hihxon mainxon xobojanibo

¹ Jahuen jihuetaħboti jato yohimenoxon ta xobojati yohixon, hea yocacatsihquin jahoxon nescajanahue jato janishqui. ² Jaa copi ta xobojacannishqui. Jaho sca ta misa tsahonxon, johuebo pejanxon paan janacannishqui. Jaa xobo yohihi ta Papan xobo hihcaniqui. ³ Chicho sca ta xohpesahca qui rontamehtai chopa janishqui, hahan chiqueti. Hahan chichoxon chiquecai yohihi ta Papan jati hihcanihqui. ⁴ Hahan hininjatibo jano quetejanoxon cahen oro quencha jano janish. Oron rahco bohnanti jano jai, oro rahsi. Jaa cahen Papan jihuetaħboti joi bohnanti. Jaa chicho cahen oro quencha maná pitiya. Aaroman jihui taxo rihbi, joconnica taxo. Papan jihuetaħboti joi macan champani qui huishá, jaa rihbi jaa bohnanti chicho bexojahah. ⁵ Bohnanti cahchian sca cahen Papa jisxonai yoshin quescapahbo rabe hahxon bohnanti cahnimahah. Joni huetsa behchinanbecoinai rabe, jaa rihbi oro bi res. Hohcha sohuamati jimi potohahtani janin jisi cahen cahnich. Jaabo yohiti hicha jaibi tah hen rahmabi yohitimahi.

⁶ Jascajaquin xobojahax ta neri xobo xehqui janin jano teetaibo jatihibi neten hihconicabo qui, jaton tee hahqui hihcohi. ⁷ Hihcax bi hoa chicho queha chiqueho boyamacani. Jano cahen yohuanxonnicah huesti, hihcoti. Jimiya caxon cahen jahuen hohcha copi, texe jonibaan hohcha copi rihbi, jimi hinani hihcohi, jatihibi bari huesti coti res, jaa huesti jano hihconicah. ⁸ Jato jascajati yohixon ta Dios Yoshiman noque honanmahiqui, jaa xobo yamascaiya pari non Papan jati janin hihconica. ⁹ Noquen hohcha copi hinabo rehtexon jaa xoboho Papa Dios hinanxon bi tah non jascajaquin jahuentianbi noquen hohcha potatimahi. Potacointi non haxenon hihxon res ta jascajati Dios Yoshiman yohinishqui. ¹⁰ Pitimabo piyamaxon, xehatimabo xehayamaxon, jahuaborabo nashimaxon jai joibo ta basima tahni janishqui: joi coin nocoscaiya ta jamenohi joi yamascatihiqui.

¹¹ Nea ta jaa joi coin qui: Cristo ta quiquin yohuanxonnicah qui. Hihti sirijaquin noque hahxonnoxon ta jonishqui. Hashoan siri xobo janin sca ta canishqui. Xobo non hihqui bi tah non mequeman xobojahi yohiyamahi, nea neten mehama. ¹² Chibon jimi ta Criston boyamanishqui. Toro baque jimi rihbi boyamaquin. Jahuenahbi jahuen jimi ta bonishqui. Jascabi queyohah noquen hohcha janon ta huesti coti res hihcaxon jahuen jiminbi noquen hohcha copijanishqui. ¹³ Caibo betan tsinquiti hahtipahyamahibo qui ta jimi potojaha tsinquiti hahtipahscaiqui. Jato qui chibo jimi potojaxon toro jimi potojaxon, vaca mapojaxon jahuen chihhi mapo jato qui potojaha ta tsinqunicabo japahonishqui. ¹⁴ Jascajaha hihconica jaa jaiya ta Criston jimin nashimaha hashoan sca noque Papa janin tsinqunicabo qui. Dios Yoshin ta queyoyosma qui. Jaan yanapana ta jihuetai Papa qui Cristo hinamehnishqui. Jahuabi tiroma yamaxon copi ta jahuen jimin noquen hohcha copijati hahtipahxon noquen hohcha queyobahinnishqui. Jaa copi tah non noquen Papa yocati non hahtipahscai.

¹⁵ Moisesnin yohini quescabijahax bi jascabihi noquen hohchaya non banetai quen ta mahuaquin noquen Hihbaan jahuen jimin copijaxonnishqui. Jaa copi ta behna joi noque yohinica qui. Papan jihue janin non jascabi sca hahbetan jihuennon ta Papan noque jano huinomati yohinishqui. Noque jano huinomanicahxon ta Criston noque behna joi yohinica qui. ¹⁶⁻¹⁷ Jihueparixon noquen papabaan jaton jahuaborabo noque hinanrihyamacatsihquin bi hihxon sca noque hihbomayanoxon ta noque hinantijacaniqui, jaa hinantijati joi copi sca non bihyaxihqui. Jaa mahuascaiya pari tah non bihtihi. Jihueparihya cahen bihyamahan. ¹⁸ Jaa copi ta hinantijaquin noquen xenibo nincamamenoinquin Papan jato hina rehtemanishqui, mahua janon. ¹⁹ Jascajati jai copi ta noquen xenibo tsinqixon, Papan huisha joi jatihibi jato nincamaxon, chibo jimi bihxon, jaa bihyamahiya toro baque jimi bihxon, jeneya hichajaxon, carnero rani joshinjaxon toncojaxon, tahua qui queonxon, jimi qui maosahxon, jaa quirica qui huishcohahtanxon, jatihibi jonibo qui

rihbi huishcohahtannishqui. ²⁰ Jato mehchajaxon ta jato yohinishqui: Mato hinantijaxon ta jaa queenai quescari man jihuonon Papan mato nincamahiqui. Nea jimi ta hahan mato jahuen jihuetahbojati qui. ²¹ Jato qui huishcohahtanxon sca ta jaa Papan xobo qui rihbi jascajaxon, jano jai jahuaborabo qui rihbi jascajapaquenishqui. ²² Jahuen jati janin jahuabi tiroma non huinomayamanon ta jimin sirijati Papan yohinishqui, Moises huishamaquin. Jaan yohihah ta hina rehtexon pari hohcha sohuamatiqui.

Hinamehquin Criston noquen hohcha copijaxoni

²³ Papan quiquin jati janin cati jenuetsahpa hin non honannon hihxon ta noquen xenibo xobojamanishqui. Yohina jimin jano jaibo jaabaan sirijati jaiya cahen Papan naihoh jati sirijanoxon hashoan siri rehtexon pari sirijatih. ²⁴ Mainxon xobojanibo ta hahan haxeti res qui, naihoh noquen Papan quiquin jihue janin cati non haxenon. Cristo ta mequeman xobojanibaan hihcoyamahiqui. Naihohbi hihcoxon ta Papa janinxon sca noque yohuanxoniqui. ²⁵ Mai meha yohuanxonnica jonibo ta jaa chicho queha chiqueho yohina jimi boxoni jatihibi bari hihcohihqui. Cristo ta jascayamahiqui. Jascanicahax cahen hinamehti cari carichin. ²⁶ Huesti coti res noque copi mahuyamahax cahen netejamenai pecaho hicha coti mahuati jaquehan. Hicha coti ta hihyamanishqui. Nete queyoti hochoma ta huesti coti res jahuex hinamehxon huestijaquin noquen hohchabo queyobahinnishqui. ²⁷ Noque jonibo rihbi ta huesti coti res mahuanicabo qui. Jaa pecaho cahen hohchayabo Papan casticanyaxihqui. ²⁸ Jascarihbihi ta huesti coti hicha jonibaan hohcha copi hinamehtax, noquen hohcha queyoxonnish joribiyaxihqui, jaa joti manataibo jihuemanoxon.

10

¹ Noquen bari yoshin res jisxon noquen bemanan jenuetsahpa quin non honanyamahi quescarihbihi ta Moisesnin huishani joi qui. Jaa jisxon tah non Papan noque hahxonyaxihqui non shoco res honanai, honanhihtiyamaquin. Moisesnin yohini quescabijaquin jatihibi bari jaton hinanti hinani cari carixon bi ta jascapa hinanxon jahuentianbi jaton hohcha queyobahintimahiqui. ² Jascapa hinanxon jaton hohcha queyobahinxon cahen hinanyamascan. Huestijaquin jaton hohcha queyobahinti hahtipahxon cahen jaton hohcha shinanyamascan. ³ Jatihibi bari hinani caxon ta hinanxon, jahanbi jaton hohcha shinanrihbicaniqui. ⁴ Toro jimi, jaa hihyamahiya chibo jimi, jascapahbaan tah non jahuentianbi noquen hohcha potatimah. ⁵ Jaa copi ta noquen neten jahuex jan nescari yohuanni joi jaiqui:

Hinantibo tah min queenyamanihqui. Jaa queenxonma bi tah min hea yorajaxonai.

⁶ Jaton hohcha copi yohina rehtexon mapojati tah min costanyamahi.

⁷ Neno tah hen qui, Papan Dios. Min huishani joi hea yohihi jai quesca, Min queenai quescajati tah hen jahui

hihqui jaa huisha. ⁸ Hohcha potanoxon Moisesnin yohini quescabijaquin jaibaan bi ta jascapa hinanti Papa queenyamahiqui, non yohihi quesca: Hinantibo tah min queenyamanihqui. Hohcha copi yohina rehtexon mapojati tah min costanyamahi, hihqui. ⁹ Jascaxon cahen nea rihbi yohinishqui: Neno tah hen qui, Papan Dios, hea yohihi miin huisha joi jai quesca Min queenai quescajati tah hen jahui, hihqui. Jan yohimenohah yamascanon ta chini joi janishqui. ¹⁰ Papa Dios queenai quescajaquin ta jahuen yora hinamehxon huestijaquin Jesucristonen noque sirijahiqui, non Papa qui cati hahtipahscanon.

¹¹ Jonibaan hohcha copi hina rehtexon jimi hinanxonquin ta jatihibi hinanxonnicahaton jaahinanihqui. Jatihibi neten nihxon ta jascapa rahsi hinanxoncaniqui. Hinanxon bi ta jascajaquin jahuentianbi hohcha potati hahtipahyamahiqui. ¹² Criston caya, jaabi hinamehxon ta huestijaquin noquen hohcha queyobahinnishqui. Queyobahinax ta Papan mecayaho quiquin hapo sca tsahonishqui. ¹³ Papan jahuen rahuibo namanjanon caman ta jano manatihqui. ¹⁴ Jascabi sca siribo jahuen caisahbo janon ta huestijaquin hinamehxon noquen hohcha queyobahinnishqui. Jaa copi ta manati res jaa jaiqui. ¹⁵ Dios Yoshiman rihbi ta Papan joi huishamaquin jaa yohinishqui.

¹⁶ Hinantijaquin tah hen huetsa tian nea joibo jato nincamayaxihqui hih ta Hihbo jaiqui. Hea queenai quescati tah hen jaton jointi janin niatih. Jointinin honanahbo tah hen huishaquin hahcajaquin heen shinanbo jaton jointi janin hihquimatih.

¹⁷ Jato jascax nesca sca janish:

Jaatian tah hen jaton hohchabo, jaton tiromabo hean shinanyamascatih

hihqui. ¹⁸ Noque jascajaquin sohuaxon hohcha shinanyamascai copi tah non hina rehtexon jimi hinanti yamascai.

Papa pataxti

¹⁹⁻²¹ Papan jati janinbi non hihconon ta chique janin xehqui behna quehpenxonquin hahcajaquin jahuen yora hinamehnishqui. Xehqui quiri non pontecahini cahi quescari-hbihi tah non noquen jihuetai hihbo qui cahi, Papa qui bi nocoti cahi. Papan jihue janin jahuen jihuetahbaan quiquin yohuanxonnica jaresscai quen raque potahax hihconon bonahue, hea huetsabaan. ²² Papan noque Benahue jaiquin honancoinax hihconon bonahue. Shinanihcamahaxma bi shinancoinax hihconahue. Non hihconon ta noquen jointibo huishcohahtaniqui, non tiromapahoni non shinanyamascanon. Noquen yora ta jene nexnanin nashimaquin hahcajahiqui. ²³ Noque hinantijanicahton noque hincocinyaxihqui honanquin sirijaxon caibo nincamaquin jeneyamanahue. ²⁴ Hashoan sca joni huetsahon shinanxon yanapanhananahbo hihxon noquen huetsabo yohuanquihnahue. Caibo hahxonti jato shinanmanahue. ²⁵ Tsinquitaibo betan behuahi tsinquinahue. Caibo tsinquiyamahi quescas man jamis. Papan casticanti nete nocoti jahui jisish hashoan sca joni huetsa yohinannahue, jaton shinan coshijanoxon.

²⁶ Noquen hohcha copi Cristo mahuanishquin honanquin sirijahax bi jaabi queenax copi non tiromahi jihuetaiya tah non huetsa hahan hohcha potati yamascai. ²⁷ Hahqui raquetijaquin Papan casticanyaxihqui honanax, jaa shinanya jihuenahue. Johuehihnatai chihin nincayosmabo Papan queyoyaxihqui honanax, jaa shinanya jihuetai. ²⁸ Jascatimahi Moisesnin yohinih bi nincacatsihyamaxon hahresai joni tiromahi jisish chanihahbo ta jaa rehtecanpahonishqui. Rabexon jisxon, rabe hihyamaxon quimisha jonixon juxson yohihah ta jaa tiromahi rehtecanpahonishqui, homisbaxonma rehterescanquin. ²⁹ ¿Jahuentiho castican cahra Cristo jama jamacaibo jatihiquin? Jato jihuemanoxon jahuen jimi Criston potanib bi ¿Criston jimi jahuama hihqui quescajahibo copi Papan jato tiromajatimahiquin? ¿Jahan shinanxon Dios Yoshiman jato hihti hahxonah bi hosanaibo copi Papan jato casticancointimahiquin? ³⁰ Nea noque yohini tah non honanai: Heanbi tah hen jato copitih. Hean tah hen jato casticanyaxihqui, hihqui. Huetsa rihbi jaa yohuanai ta nesca qui: Papan ta jahuen jonibo casticanyaxihquiqui, hihqui. ³¹ Hihcointi Papan queyoyosma mequen ta hahqui raqueti qui.

³² Criston joi nincacoinxon man tenepahoni shinannahue. Hihti tiromaja mato jaahbo bi tah man tenenihqui. ³³ Caibaan ta mato hicha hichanishqui. Caibaan rihbi ta janibi-jaiquin mato hosanhahnan tiromajanishqui, costanahbo. Jascapa tenehibo rihbi tah man yanapaniqui, hahbe tenehibo sca janoxon. ³⁴ Sipo xoboho tsahonah tenehibo rihbi tah man yanapaniqui. Tiromajaquin maton jahuaborabo mato bichinahbaan bi tah man jenimahanan tenenihqui. Naihoh man hashoan siribo queyotimabo jai honanxon tah man jenimahanan tenenihqui. ³⁵ Jascapahonihboxon jaa teneti shinan potayamanahue. Man tenehiya ta Papan mato hihti hahxoniyaxihquiqui. ³⁶ Jaa queenai quescaja man jai quen mato hahxontijani jai bihyanoxon, tenenahue.

³⁷ Basima sca ta hihtihiqui. Jonicah ta joyaxihquiqui, basiyamahi.

³⁸ Heen siri joni ta nincacoinax jihuetaihiqui. Bahinbi jahuex bi banejaquetax jaridahax jahui qui caribihya tah hen jahan jenimatimahi hih ta Papa jaiqui. ³⁹ Jahan jan jenimayamahi yohihi ta noquenahma qui, hea huetsabaan. Bahin banetax queyotaboma tah non qui, jointinin nincacointi queyoyamanox manataibo tah non qui.

11

Nincacoinpahonihbo

¹ Papa yohuanai nincacoinnicaxon tah non nincaxon jan noque hahxoniyaxihqui non honanquin sirijahi. Jan noque hahxonai jisxonma bi tah non honancoinai. ² Jascapa honanya japahonibo copi ta noquen xohtabo qui Papa Dios siripi yohuanishqui siri yohiquin.

³ Jistimahiboya ta jistibo sca janon yohuanxon res Papan nea netejanishqui. Papa hihcointi yohuanai honanyaxon tah non jan netejani non honanai.

⁴ Jascapa nincacoinnicaxon ta Papa Dios hinanquin Cain mentan hashoan sirijaquin Abelnin jahuen hinanti hinannishqui. Nincacoinnicaxon hinanai copi ta siri joni Papan jaa jisnishqui. Siri joni jisxon, jahuen hinanti bihquin. Abel neateman mahuanib bi tah non jaa shinanxon, jascapa nincacoinnica non hihquiya noquehon Papa Dios jenimahi non honanrihbibi.

⁵ Jascapa nincacoinnica hihqui copi ta Enoc Papa Diosen bihinihnishqui. Jaa copi ta yamacahinnishqui. Bihinihniyahnoxon ta jaa yohihi jahuen hahan jenimati joni jaa hihqui Papan yohinishqui. Mohitahpa bihinihnini copi ta mahuyamanishqui. ⁶ Jascapa

nincacoinnica non hiyamahiya ta jahuentianbi noque siri jisyamahiqui. Papa qui canicahon ta Papa Dios jai shinantihiqui. Non Papa Dios benabonaha jaan noque meramatihitah non shinantihitah.

⁷Tsoan jisnima paquyaxihqui Papan yohihah ta nincacoinxon Noeman nontijanishqui. Nincacoinax ta jahuen haiboya jahuen baqueboya nanetax jihuenishqui. Caibo ta jascapa honanya hiyamahax jene meran cahax queyocahincannishqui. Jascapa honanyahpabo rahsi res siribohi jisxon ta Noen rihbi Papan siri joni jisnishqui.

⁸Hen mia jismayaxihqui mai janin catanhue mina sca jaa mai hihnon Papan jaah ta nincacoinax Abraham canishqui, jahuen hen nocoti cahin hihcanahaxma bi honanaxma jabiyahpa caresscai. ⁹Papan hinanyaxihqui main nocotax sca ta janohahbibaan nahuahax bi jano jihuenishqui. Jahuen baque Isaaque, jahuen xohta Jacobo rihbi ta hahbetan jaa xoboho jihuenishqui, jaa mai hahbetan hihboyaxihquiibo. ¹⁰Papan jato jemajaxonxihqui ta managuin tapasax res jano jihuecannishqui. Xoboyahpa queyoyosma jema manacani.

¹¹Abrahamen haibo cahen Sara. Baque bihyosmaxon bi ta nincacoin sca jaax baqueti coshi bihresscaxon, yoxabohax bi toho sca hihxon, baque bihnishqui. Hihcoini yohuanxon Papan hahxoncointihi honanxon copi ta jahuen baqueti queyoscanixon bi jaa baque bihnishqui. ¹²Jaa copi ta mahuascai quescapi huesti joni janish bi caicanacannishqui, huishi hicha jai quescarihibi caichi, huean quexa mashi bero jai quescarihibihi, topontimahi.

¹³Nea hen yohiha jonibo ta nincacoinax bi jatihibi mahuacannishqui. Papan jato hinantijani bichishma mahuacani. Hocho jisi quescarax ta jenimacannishqui. Noque tah non mai mehabaan nahuabo qui, nai naman tah non pasijaresai hih ta jacannishqui.

¹⁴Jatonahbi hihnon jaton mai manáparihibo ta jascanicabo qui. Jaa copi jascacani. ¹⁵Janohax piconihbo mai ta shinanyamascacannishqui. Shinanparihax cahen jano boribicanan, queenax tian. ¹⁶Hashoan siri mai queenax ta boribiyamanishqui, naiho queha mai queenax. Jaa copi ta Papa Dios jaton Papa hihti hihtimahyamahiqui, huetsa jema jato bexojaxonnish.

¹⁷Miin baque hea hinanquin rehtehue Papan jaah ta nincacoinxon Abrahamen hinannishqui, jaa huesti jahuen baque que bi. Papan hinantijani mai jahuen baquen bihtihi bi jahuen baque Papa Dios hinanquin. ¹⁸Miin baque Isaaque tah hen caijayaxihqui, hicha sca miin chini baquebo janon hah ca Papan janish. ¹⁹Isaaque mahuascai bi ta Papan hahquirihbi teehihmati hahtipahiqui hihxon ta Abrahamen hinannishqui. Jaa copi ta rehteyamahue Papan hahca rehtexonma bihribixon sca hahquirihbi teehiqui quescar jahuen baque jisnishqui.

²⁰Nincacoinnicaxon rihbi ta Isaaquen sca jahuen yohuanyaxon jahuen baque rabe yohinishqui, Papan jato hahxonyaxihnon yohiquin, jahuen baque Jacoboya Esaú. ²¹Papa yohuanai nincacoinnicaxon rihbi ta mahuacatsihscaxon Jacobon sca Josepan baque rabe yohinishqui, Papan jato hahxonyaxihnon jato yohiquin. Jato yohixon, jahuen mepitinin betihihxon Hahxon tah min jai, Papan, hahquin. ²²Nincacoinnicahax rihbi ta José sca mahuacatsihxon, Egipto mai janinhax jahuen caibo picoyaxihqui hihxon huetsa mai janin jahuen xao mihinti jato yohinishqui.

²³Nincacoinnicabохон ta Moisesnin papabaan rihbi sca Moises siri pishca jisxon, quimisha hoxne jaton baquexo pishca jonenishqui quiquin hapon rehteyamanon. Nincacoinnicabohax ta hapo qui raqueyamacannishqui. ²⁴Nincacoinnicahax ta haniscaax Moises sca quiquin hapon haibo baquen baque hihamascanaxon jahuen caibo betan sca canishqui. ²⁵Neno pari hohchaquin costantahpan hihxonma bi ta Papan jonibo betan tiroma tenetanpan hihxon jato tenequihnnishqui. ²⁶Egiptobaan quiquin hapon xoboho jahuabi pishinyamahi, siri siripi jihueti hahtipahxon bi ta Criston tenehi quescajaquin tenehax ta hashoan siri qui hihxon tiromabo Moisesnin tenenishqui. Papan hinanyaxihqui bihyanoxon hihxon ta tenenishqui. ²⁷Jistimabo jisxon quescajaquin ta Egipto mai potabahinnishqui, noquen Papa nincacoinxon. Nincacoinnicahax ta sinatai quiquin hapo qui raqueyamarihibinishqui.

²⁸Nincacoinnicaxon rihbi ta pascua piti pitijamanishqui, rehtenica yoshiman jaton beboquiha baquebo meheyamanon hihxon rihbi ta nincacoinnicaxon jaton xobo xehqui janin jimin sicanishqui. ²⁹Non mai potoni nabebacahini cahi quescarihibihi ta nincacoinax joshin hian nabebacahini pohquejaquēcannishqui Moises betan. Jato chibani sca ta Egiptobo rihbi nincayosmabohax pohquejaquēcatsihquish bi jenen jato mahponishqui, hahsacanon.

³⁰Nincacoinax rihbi ta Jericó jema mayaconatani siete neten nihcannishqui, jaa jema chiquebo poxoscanon. ³¹Nincacoinscaxon copi ta hahresti haibo Rahabanen jahuen jema jisi jahuibu sirijaquin mapemanishqui, jahuen jema janin jihueti nincayosmabo betan mahuayamanoxon.

³² Hicha jascapa nincacoinnicabo yohiti jai bi tah hen yohihi hashoan basitihí, Gedeon, Barac, Sanson, Jefté, David, Samuel, Papan joi yohinicabo. ³³ Jaabaan ta nincacoinnicabonxon jaton quiquin rahuibo jaton sontaroboyabi camaxon, pontejaquin jaton jonibo jihuemaxon, Papan jato hahxontijanixon hahxonah bihxon, hinon jana xehponishqui. ³⁴ Johuehihnatai chíhi nocajahax ta noque reramis sontarobo quihax jabatax, yosmahax bi coshichini, coshi sontaroscaxon jaton rahui sontarobo camacannishqui. ³⁵ Jaton haibobaan ta jaton baquebo mahuatax bi hahquirihbi teehihqui hicotancannishqui.

Caibaan rihbi ta Papan joi jato jenemacatsihquin tiromabaan hisinjajah bi tenenishqui, rehtehah bi Papan joi jeneyamabiresquin, hashoan siri jihue jayanonxon teneresquin. ³⁶ Caibaan rihbi ta hosan hosannah bi tenenishqui, jihuín rishqui rishquihah bi tenequin, cadenanen nexahahbo bi tenequin, sipo xoboho tsahonahbo bi tenequin. ³⁷ Rehtecatsihquin macaman tsacahahbo bi mahuanonxon caman tenequin. Caibaan cahen siran naxtehabbaan bi Papan joi jeneyamaquin. Machitonen rehtehahbo bi jeneyamaquin. Chopa pishinxon carnero bichi chopajaxon sahuehax cahuan cahuani. Chibo bichi chopajaxon sahuequin. Pihan hihcane. Yomanahcane. Tiromajahah bi teneresquin. ³⁸ Texe jonibaan jisí jaabo tiromabohi, hashoan siribo que bi. Jano tsoa jaitonma ta metisihcanahi cahuan cahuanishqui, mahchi janinbo jonecane, mai xanqueman jonecane. ³⁹ Jaabo jatihibichin ta nincacoinnicabonxon bi Papan jato hahxontijani bihyamacannishqui. ⁴⁰ Jaabo res siribo hihnonma bi ta jato betan noque rihbi sirijayanonxon Papan neateman yohinishqui, hihti siri noque hahxontijaquin.

12

Jesusen teneni quescajati

¹ Jaa hen yohihah nincacoinaibo ta hicha qui, nai cohin tsamati quescajati. Jaabaan teneni quescajati ta jaiqui. Coshin bishquihihcananoxon jatihibi hihuebo potabahinquin hahcajaquin noque rahhuehihtaibo hohchabo potabahanahue. Jato potabahini coshin bi res canon bonahue, noquen Hihbaan noque hinanah bahin canonxon yobacahinnahue. ² Noquen Hihbo Jesus qui noquen shinan camahahan coshin caquin hahcajaquin teneahue. Teneti shinan hihbo hihxon ta jaan noque hinanxon non hihti shinayahpa hihnon caman noque hinanbonahiqui. Jaan noque hahxonni shinannahue: jihuín hueonxon rehtehah bi ta noquehon jenimaxon jaan tenenishqui. Tiromajaquin rabinmahahbaan bi ta noquehon jenimaxon jaa rabinmahi hen jahuama quescaxon jaan tenenishqui. Rahma ta Papa Dios patax hihbohi tsahoscaiqui, Quiquin Hihbo sca.

³ Jaan jascapa tiromabo teneni shinannahue. Teneyosmayamanahue Man yobacahinyamamis. ⁴ Hohchapan mato bihti tenequin bi tah man maton jimí potanoxon caman teneyamaparihi. ⁵ Mato jahuen baquebo jan yohicoinali huisha tah man shinanbehnohi. Jaa huishani joi ta nea qui: Miin Hihbaan mia pontehah nincayosmayamahue, baquen. Jaan mia casticana bi yosmayamahue.

⁶ Hahan queenxon copi ta miin Hihbaan jahuen baquebo pontehihqui. Nincayamahiton ta jahuen baquebo jatihibi jaan rishquihiqui hihqui jan huishani joi.

⁷ Jaan mato haxemanon tenenahue. Jahuen baquebo copi ta Papan mato pontehiqui, mato hanijaquin. ¿Jatihibi baquebo jaton papabaan hanijaquin ponteyamahihquin?

⁸ Caibo pontexon bi mato jaan ponteyama hah tah man jahuen baquema qui. Jahuenahma sca. ⁹ Noquen papabaan noque hanijaquin pontehah tah non jato nincanishqui. ¿Hashoan sca non noquen naihoh queha Papa non nincatimahin jihuénonxon? ¹⁰ Jaabaan bi shinanai quescajaquin res ta noquen papabaan noque pontenishqui. Noquen naihoh queha Papan ta non hashoan siri hihnon noque pontehiqui, jaa naihoh hihqui quesca non noque rihbi jihuenon, ponte. ¹¹ Noque pontehah tah non bitsayamahi. Pontehah tenequin. Tenehax haxescax, ponteboscai, jenimascai.

Noquen Hihbo man nincayamamis hihqui

¹² Jaa copi coshinahue. Meyosmahax bi mecoshinahue. Maton raboxobo yosmascai bi tacoshahinnahue. ¹³ Nihnoxon bahi pontebo hahnahue cojocanahibo cahax xao rechibo tseqecahinyamanon. Tarabehquetaxma man rohacananon.

¹⁴ Jatihibi jonibo sirijaquin yohuanquihnahue. Hohchaya jatima queenyorannahue. Hohchatima queenyamahibaan ta noquen Hihbo jisyamayahihquiqui. ¹⁵ Noquen Papan matohon shinanxon mato jihuemahi bi caibo nincayamahax camis hihxon joni huetsa coirannahue. Mato tocan tiroma shinayahpa jonin mato jahuen shinan hinanah man jaa chibanmis. ¹⁶ Tsiniyamabiresnahue. Esaunen hahni quesca man jamis. Jaan ta huesti coti pinonxon Papan hinantijani jenenishqui, beboquiha baque hihxon jaan bihtihí bi.

¹⁷ Jaa pecaho jan jenedi bihribicatsihquin cahen huaohihxon yocaxon bi bihyamascanish. Huetsa hihbomascaxon hahquirihbi bichinti hahtipahyamascaquin.

¹⁸ Mequeman meheti mahchi qui cahen noquen xenibo noconish, jano chihi perehiqui, cohiman mahpohah yamecahini, hihti bahquishihpi, raqueticahini. Jascapah qui tah man nocoyamahi. ¹⁹ Jaabaan ta corneta rehue corotai nincaxon, Papa yohuanai nincaxon, nincati teneyamascaxon Noque yohipahiyamahue hahcannishqui. ²⁰ Huesti yohina bocabi joxon nea manan mehehiton tah man macaman jaa rehtetihi Papan jato jaah cahen raque teneti hahtipahyamacannish. ²¹ Hahqui raqueti jisish ta Hea tah hen hihti raquetai, raquepahhuani tah hen jai hih Moises janishqui.

²² Jascapa mahchi qui tah man nocoyamahi. Man hahqui nocotai ta Papan manan qui, jahuen jati, jano jaan jihuemahi jahuen naihoh queha Jerusalem, jano jahuen yonotibo tsama jai, topontimahi jano jenimahi tsiniquijaquetaibo hichahi. ²³ Naiho jaton janebo huishapaquenixon jaan tsiniquihah, jano Papan beboquiha baquebo tsinquitai, janoxon jatihibi jisxon Papan caibo hahxonxon caibo casticanai, jano yamanicabo siribo jai, hahqui tah man nocotai. ²⁴ Noque hahxontijanixon jayaxon Papan noque hahxonscai joni jano jai, Jesus; hahan sirijati jimi jano jai, Abelnin potani jimi quescayamahi jaa jimi copi Papan noque sirijaquin hahxonai. Jascapah qui tah man nocotai.

²⁵ Jaan mato yohihah, nincayamayamanahue: man nincayosmamis. Jaan jato hihti yohihah bi nincacatsiyamahibo copi ta cahnexonma Papan noquen xenibo mahuamanishqui. Jaton casticanti jaabaan xahbanjamati hahtipahyamahiya tah non jan naihohxon noque hihti yohihi hashoan sca noquen casticanti non xahbanjamati hahtipahyamahi. ²⁶ Jan jato yohihah ta mai mihuannishqui, xayati. Rahma ta jan yohini quessa sca jatihiqui: Huestijaquin sca tah hen mai res ma bi nai rihbi xayanyaxihqui, hihqui jan yohini joi. ²⁷ Huestijaquin jan hihqui bi ta non rahma jisibo naiyahpa mai queyobahinti yohihiqui, xayayosmabo sca janon. ²⁸ Xayayosma jihuemati ta noque hinantijanishqui. Jaa copi Hahxon tah min noque jai Papan hahxon, jaan siri jisi quescajaxon, raquetax bi jahan queenxon, jaa yocanahue. ²⁹ Noquen Papa Dios ta queyomanica chihyahpa qui.

13

Papa queenai quescajati

¹ Maton huetsabohon shinannahue. ² Huetsa janinhax nocotaiibo sirijaquin johue hahnahue. Jascajati pishinyamanahue. Jascajanicaixon ta jato qui Papan yonotibo nocotaiya jascapahbohi honanxonma bi caibaan jato sirijaquin bihnicah qui.

³ Hahbe sipojahabo quescaxon sipo xoboho tsahotaibo yanapanti shinanbehnoyamanahue. Tiromajahah tenehi joni yanapanannahue, hahbe yorayahpaxon copi jato shinanbehnoyamaquin.

⁴ Jatihibijaquin maton haibo maton bene sirijaquin jihuequihnahue, jaa huesti betan hihqui, huetsa betan hihyamabiresi. Tsinihi haibo, tsinihi bebo, jascapa haibobo, jascapa bebobo ta Papan casticanyaxihqui.

⁵ Coriqui queenaxma jihuenahue. Man jai pishca senenscai hihquish jihuenahue, Papan yohini honanax. Jan yohini ta nesca qui: Mia tah hen jenetimahi. Jahuentianbi tah hen mia potabahintimahi, hihqui. ⁶ Noque yohihi jan jascari yohuanni copi tah non jointi siriscas: Hea yanapanannahue ta heen Hihbo qui. Jaa copi tah hen raqueyamahi. ¿Jahueja hea jatihiquin jonibaan, heen hihbaan hea yanapanaiya? hih tah non jai.

⁷ Mato Papan joi nincamani shinannahue. Nincacoinnicabohax jenquetsahpabo jaabo jacannishquin hihxon jaabaan hahni quescajaquin hahnahue nincacoinquin. ⁸ Jesus Cristo ta jascabi qui, jan hihni jascabihi, jan rahma hihqui jascabihi, jan hihiyaxihqui, jascabihi. ⁹ Mesco joibo yohiquin caibaan mato nincamamis hihxon huetsa joibo bihyamanahue noquen Hihbaana res. Noquen Hihbaan hahxonah tah non noquen shinan coshihi. Nea pihue, jaa piyamahue jaibaan bi tah non jascapa joibaan noquen shinan coshiyamahi. Yanca bi res ta jascapa joibo yohicaniqui.

¹⁰ Noquen hohcha copijaxonnica tah non noque jai. Jaan hahan copijaxonai ta Moisesnin yohini quescajacatsihquibaan piti hahtipahyamahiqui. ¹¹ Jaabaan ta hohcha copijacatsihxon, yohina rehtexon Papan xobo janin jahuen jati chiqueho jaton yohuanxonnica jaa jimia caxon, hoque jemama qui sca jaa yohinahbo potaxon mapojacanihqui. ¹² Jascajaquin rihbi ta Jesusen jahuen jimini noquen hohcha copijaxonnoxon Jerusalem jemama qui cahax mahuanishqui. ¹³ Jaa copi jano Jesus hihqui janin res canon benahue, judiobaan jemama qui. Noquen Jesusen teneni quescabijaquin jaa tenexonannahue, caibaan noque tiromajahah bi tenequin. ¹⁴ Neno tah non queyoyosma jano jihueti yahahi. Noqena ta jayaxihqui. Jaa caya tah non manatai. ¹⁵ Hinamehxon noquen Hihbaan

noque jascaxon hihti hahxonni copi sca jascabijaquin noquen Papa Dios yohinahue, Hahxon tah min noque jai Papan, hahquin. Jascajaquin noquen Hihbaan janen yohinonhue. ¹⁶ Maton huetsabo hahxonquin jeneyamanahue. Pishinax yomanahatibo jaiya jato hinanresnahue. Jascajaquin tah man noquen Papa Dios hahxonai. Jascahiya ta jenimahiqui.

¹⁷ Maton pastorobaan mato Papan joi nincamaha, jato nincaquin sirijaxon jan yohihi quescajanahue. Jaabo ta maton coirannicahbo qui, noquen Hihbo hahxonquin. Man jato nincamaquin sirijayamaniquin hah ta Papan jato jayaxihquiqui. Jaa copi jato nincanahue, jenimahanan mato nincamanon. Man nincayamaahiya ta benáxon mato nincamatihiqui. Benáxon mato nincamahiboya cahen Papan mato siri jisyamahan.

¹⁸ Hen honanai hen hohcha ta yama bi res qui. Jatihibijaquin tah hen ponte jacatsihquin hean jai. Hea yocaxonnahue, hen hahnon. ¹⁹ Hashoan histon sca hen mato janin hihnon, hea yocaxonnahue. Jaa tah hen hihti queenai.

Jato yocaxonquin jahuen quirica queyohi

²⁰ Noquen Papa Dios ta noque sirijaquin shinanmanicah qui. Jaan ta noquen quiquin coirannica teehihmaribinishqui, noquen Hihbo Jesus, hihquipi que bi. Papan ta jahuentianbi queyotimajaquin noque hahxontijanishqui, noquen Hihbaan jimi copi noque hahxontijaquin. Jahuen jimi copi ta jaa noquen quiquin coirannicah qui. ²¹ Jatihibi hahxonti coshi Papan mato hinannon tah hen mato yocaxonai, jaa queenai quescajaquin man hahnon. Jahan jaa jenimahibo sca man janon jan maton jointi janin Jesucristo betan teexon mato sirijaxonnon tah hen yocaxonai. Mia tah min Shinan Hihbo qui Hihbon, hihqui non jascabi yohuannon. Jascari rahan.

²² Huishaquin hen mato yohiha nincanahue, hea huetsabaan. Hashoan yohiti hahtipahxon bi tah hen joi tsamanxonma mato yohihahqui. ²³ Noquen huetsa Timoteo ta sipo xobohoh queha cainmahipicanaxqui. Man honannon hihxon tah hen mato yohihi. Histon jaa jahuiya tah hen hahbetanbi caxon mato jisi cayaxihqui.

²⁴ Maton pastorobo jatihibi hea yohixonnahue, man jascabi jayamahir hahquin, noquen huetsabo jatihibi rihbi. Neno Italia mai janin jaibaan ta mato qui salud raaniqui nea huishayaxon.

²⁵ Papan shinanya jihuenahue. Jascari rahan.

SANTIAGO Santiagonen huishani joi

Jabisnibo qui Santiagon huishahi

¹ Hea Santiago tah hen Papan joni hihxon, noquen Hihbo Jesucriston joni hihxon, hen mato jatihibi jabisni judiobo yohihi, man jascabi jayamahin, hahquin.

Papan hinanai shinan

² Mesco tiromabo tenehahnan hihti jenimati shinannahue, hea huetsabon. ³ Mato yosmajacatsihquin maton shinan tanahah bi tenexon man hahan teneti coshi bihtihi honanax jenimannahue. ⁴ Coshinoxon jatihibi shinanya siri janoxon tenequin jeneyamaxahnahue, jahuabi pishinyamascanoxon.

⁵ Shinan pishinxon noquen naihoh queha Papa yocahue. Mia ta hinantihiqui. Yohuashihxonma ta jatihibi joni jaan hinanresiqui, jahua copi min yocacain hihxonma. ⁶ Bihti shinancoinhue. Hinanyama rah ta jatihiqui hihxonma yocahue. Hinan ra jaquin, hinanyama ra jaquin hihnicah ta hian behchonihcamahi qui, nihuen xotonquin potajaquehacamahi. ⁷ Jascapa joni hihxon noquen Hihbaan mia hinantihi shinanyamahue. ⁸ Jascapa rabe shinanyahpaton ta shinan mitisahaquiqui, jan hahcatsihqui jatihibi.

⁹ Jahuaborabojomahax siribo Papan mia hinanyaxihqui honanax jenimahue. ¹⁰ Coriquiyahpahax jahuabi min yamacoinai Papan mia jismaha jenimahue, barin hahca huasi joa histon xanahihcamahi miin coriqui queyoyaxihqui honanax jenimahue. ¹¹ Bari queyascaax xana sca jaiya ta huasi xanahihqui. Jahuen joa reochoiti. Siriyamascas. Jascarihibi ta coriquiyahpa queyotihiqui jahuen teeboyabi.

Noque tiromajahabaa bi teneti

¹² Tenehax tah min hahan jenimati jai. Tanahah bi tenehax tah min jihuecointihi, Papan jihuemahah. Hahan shinanaibo cahen Papan jascajaquin hahxontijanish. ¹³ Hohchamaquin tanahah, Papan ta hea hohchamacatsihquin tanahihqui, hihyamahue. Tsoanbi ta Papa Dios hohchamati hahtipahyamahiqui. Jaan rihbi ta tsoabi hohchamaquin tanayamahihqui. ¹⁴ Miabi queenax tah min hohchacatsihqui, miin queemanbi mia ninihah. Mihmebi paramehtax queenscai. ¹⁵ Queen sca jaax jascati shinanax hohcha sca jai. Hohchapan sca ta queyoquin noque mahuamahiqui.

¹⁶ Paramehyamanahue, hea huetsabaan. ¹⁷ Non bichi siribo jatihibi ta Papan noque hinanahqui, jaan noque hinanah siribo jatihibi. Xaba Hihbo hihxon ta noque hinanresiqui. Jaan ta huetsa huetsajayamahiqui. Mayáxon bahquishjayamaquin. ¹⁸ Jaabi queenxon ta jahuen hihcoinau join noque jonijahiqui, jahuen beboqitha baquebo quesca noque janon.

Nincacoinaibaan shinancoinau

¹⁹ Haxecoinnahue, hea huetsabaan: histon nincati, honaxonbi yohiti, histon rainyamacahintima haxenahue jatihibi. ²⁰ Sinaxon tah non Papan ponte shinanai quescajahti hahtipahyamahi. ²¹ Jaa copi jatihibi rishtaya yohuan potaxon, bonco huenaajaquin hahcajaquin jatihibi tiromahibo potaxon, shinan man pishinai honanxon, mato qui niaha joi bihnahue, hahan mato teehihmahu jahuen joi.

²² Paramehaxon nincaresquinma bi jaa joi nincacoinxon hahnahue. ²³ Jaa joi nincaxon bi hahyamaxon tah non espejonen bejishticamaxon jai quescajahi. ²⁴ Noquen bemanan jisish tah non caresscaxon jenquetsahpa hin hihxon bi shinanbeho sca jai histon res. ²⁵ Papan joi coin siri jisish tah non hinabo hihyamascatihi. Jaa joi jisquin jeneyamaxon nincaxon shinanbehnnoxonma bi jan yohihi quescabijaxon jaax tah non hicha hahan jenimati jai, jan yohihi quescajajaquin jaax jenimahu.

²⁶ Papa Dios queenai quescaja tah hen jai hihquish bi noquen janan tiromahi yohuanparihax tah non yanca bi res jaa shinan jai. ²⁷ Papa Dios queenai quescajajaquin hahcaibaan ta yononmabo yomanahaiton yanapanxon, papajomabo mamajomabo baquebo yomanahaiton yanapanax, mai mehabaan rishta shinan bichishma jihuethiqui. Jascapahbo ta Papa Diosen jisí noquen Hihbo queenai quescajahibo qui, hihti siri, tiromayamahu.

2

Coriquiyahpabo hashoan siri hihqui non shinantimahi

¹ Noquen Hihbo Jesucristo ta Nete Hihbo qui. Jaa nincacoinxon coriquiyahpabo hashoan siri hihqui shinanyamanahue, hea huetsabaan. ² Man tsinquijaquetai xoboho rah ta oro mehesehtiyahpa siri chopaya joni hihcotihiqui. Chopa payoyahpa jahuabijoma joni rihbi rah ta jano hihcorihbitihiqui. ³ Jaa siri chopayahpa jisxon, Neno tsahohihnarohahue,

hahxon bi jahuaborajoma joni sca, Janobi nihue hahyamaxon, Taponbi mitsahohhue hah ra tah man jai. ⁴ ¿Jascajaquin man mato tocanbi caibo hashoan siri hihqui man jayamahin? ¿Jascajaxon man mato tiroma shinanyahpaxon man joni honanti shinanyamahin?

⁵ Hea nincanahue, hea huetsabaan. ¿Hicha shinayahpa jaahbo mai meha jahuaborajomabo Papan caisyamanishquin? Papahon shinanaibo jahuen quiquin jihuetaibho janon ta jaan yohinishqui. ¿Janoxon jan jihuemahi hihbobo hihnon jaan jato caisyamanishquin? ⁶ Jahuaborajomabo jahuen jihue hihbobo janon jaan jato caisni bi tah man jato shinanjomabo quesca jai. ¿Tsoabaan mato maton coriqui bichinihquin? ¿Coriquiyahpaboma hin? ¿Tsoabaan mato demandaniquin? ¿Coriquiyahpaboma hin? ⁷ Noquen Hihbo siripan ta mato quenahihqui. ¿Hahqui tsoabo tiromahi yohuanihquin? ¿Coriquiyahpaboma hin?

⁸ Noquen Hihbaan huishani joi jai quescajahax man jaiya cahen siri. Miabi min shinamehtai jai quescajaquin mihbe jihuetaibohon shinanhue hah cahen janish. ⁹ Jascacatsihquin bi caibo joni hashoan siri hihqui quescajaquin jaax cah man hohchayahpa sca jai, Papan huishamani joi jai quescajayamahax copi. ¹⁰ Huesti res noquen Hihbaan joi nincayamahax hohchayahpa sca jai, jatihibi jan yohini nincayamahax quesca sca noquen Hihbo qui hohchayahpa sca jai. ¹¹ Tsiniyamanahue hah noque jaxon ta joni huetsa rehteyamanahue noque jaribinishqui, noquen Hihbaan. Jaa huestichin rabebi joi yohiquin. Mian cah min tsinixonma bi joni huetsa rehtehan. Hohchayahpa sca tah min jatihi, noquen Hihbo qui hohchati. Jatihibi jan yohini quescabijaxon bi huesti jan yohini nincayamahax tah min hahqui hohchayahpa sca jai, nincayamahax. ¹² Hahan jan noque hinaboma sca hihmahi jahuen joi nincacax non jihuetai ta Papan jisiqui. Siri hin tiroma quin hihxon ta noque yohiyaxihquiqui. Jaa copi yohuani coiramenahue. Jihuetai coiramenahue jan yohihi quescabinon. ¹³ Huetsa yomanahai bi non hahan shinanxon hahxonyamahiya ta jascajaxon rihbi Papan noque casticanyaxihquiqui, siri hin tiroma quin hihxon. Huetsahon shinanxon hahxonquin tah non noquen casticanti hahbanjamahi.

Nincacoinaibaan hahxonti jai

¹⁴ ¿Hen tah hen hihcainai shinanai hihxon bi jahuabi hahyamaxon jahua non bihtihin? ¿Jan hihcainai non shinanai copi res Papan noque hahquirihbi teehihmatihiquin? ¹⁵ Chopanma jihuetax piti rihbi yamahax mato janin noque huetsa jaiya, jaa hihyamahiya noquen choca jascari jaiya cah man yanapanyamahan. ¹⁶ Piti hinanxonma, sahuetai hinanxonma, pishinaibo hinanxonma bi man Yora xanax yanihue, siripax cahue hah man jaah ¿siritihiquin? ¹⁷ Jascarihibi tah man hihcainai shinanxon bi yanapanquin hahxonyamahax man jahuabi shinanjoma quesca sca jai. Mahuatax quesca sca tah man jai.

¹⁸ ¿Mian min noquen Hihbo hihcainai shinanain? hah ta caibaan jatihiqui. Hean tah hen jato hahxonai. Jahuabi hahxonxonma min hihcainai shinanai hea jismahue. Jahuabi hahxonxonma min hea jismacatsihqui bi tah hen yanapanquin hahxonquin hean hen hihcainai shinanai hean mia jismatihi min honannon. ¹⁹ Papa Dios ta huesti qui hah rah tah min jai. Huesti coin tah qui, min tah min hihcainajquin shinanai. Tiroma yoshinbaan rihbi ta jaa honanihqui. Jaa honanya jaax ta tastahihcanihqui. ²⁰ Noquen Hihbo ta hihcainiqui hihxon bi joni huetsa hahxonyamahax ta tiroma bi res qui. ¿Hicon nan hihxon min hen mia jismati min queenain, honanman? ²¹ Jishue. Noquen Papa Dios hinanquin ta jahuen baque Isaac janoxon mapojati janin Abrahamen racannishqui, hinanquin mapojanoxon. Papan yohihi quescabija jan jaiya ta Mia tah min siri qui Papan janishqui. ²² Hihcainai shinanxon jan hahní tah min jisi. Shinanxon jan shinanai quescabijaquin jaan jaiya tah non jahuen shinan honanai. ²³ Jan jascajahiya ta Papan huishani joi quescabi jaresscansihqui, hihcainai Abrahamen shinanaiton ta siri joni hihqui Papan jisnishqui hihqui jaa joi. Mia tah min heen hahberabeti sca qui hah can Papan janish Abraham yohiquin.

²⁴ Jaa copi honannahue: non hihcainai shinanai copi res ma bi jan yohihi quescabijahi non jaiya ta Mia tah min siri qui hah Papan noque jaiqui. Jaa honannahue. ²⁵ Hahresti haibo Rahabo rihbi ta jascapa shinan siri jaiton Papan siri jisnishqui. Jatón mai jisi jahuibo hihcomaxon ta paxajaxonquin huetsanco jato camanishqui. Jan jato jascajaxonaiya ta siri haibo tah qui hih Papa janishqui. ²⁶ Yoshinjoma yora ta mahuascaiqui. Jascarihibi ta non shinanai quescabija non jayamahiya noquen shinan mahuatai quesca qui.

3

Non tiroma yohuantima

¹ Honanmanicahbo hichayamanahue, hea huetsabon. Honanmanicahbo ta hashoan sirijaquin Papan jisnyaxihquiqui non hahnibo siri hin tiroma quin hihxon. ² Jatihixonbi

tah non jaamajahi hicha. Hihti shinanyahpaxon pari tah non yohuanquin jaamajayamahi. Jascapahxon pari tah non jatihibijaquin sirijatih, jaamajayamaquin. ³ Non queenai janin noquen cabacho camanoxon tah non jaton jana janin hahan mayati jarehuinai, jaton mapo mayaxon cabacho yora jatihobi rebibohannoxon. ⁴ Hani nonti cahen jascarihbih. Hani nonti que bi cah non nonti chibicai. Coshin nihuen xotonai bi tah non hanitahma chibitinin chibicai, non jano cacatsihquiton. ⁵ Noquen jana jascarihbih. Hexti pishcahax bi hanibo qui yohuani. ¿Hexti pishca chihi requeman non jahuentihopa chihi perehinnanon requenjatihin, hani taxabo maponon? ⁶ Noquen jana ta chihi qui. Nai tana tiromaboya. Noquen yora meha que bi tah non jahan noquen jointi jatihobi tiromajahi. Hihti tiroma chihin quetejaha quesca ta noque tiromajahiqui, non hahcai jatihobi mapojaquin hahcajaquin noque tiromajaquin. ⁷ Jatihibi yohinahbo, hihsabo, ninotaibo, hiaman cahibo, jato jatihibi ta jonibaana raejati hahtipahtihiqui. Jato raeja sca ta jacanishqui. ⁸ Jonin jana ta jascayamahihqui. Noquen jana tah non tsoanbi raejati hahtipahyamahi. Noquen jana ta tiromahi tantiyamahihqui. Hahan mahuati pahe bochohi. ⁹ Hahan tah non noquen Hihbo sirijaquin yohihi, hahan tah non noquen Papa rihbi sirijaquin yohihi. Hahan rihbi tah non jonibo rihbi tiromajaquin yohihi, Papa Dios quescapahbo jan jato jonijani que bi. ¹⁰ Jaa jana huesti janinhax ta yohuan siriya yohuan tiromabo cainihqui. Jascajatima ta jaiqui, hea huetsabaan. ¹¹ ¿Huesti mai quini chicho quehax jene siriya jene cachani bahihihquin? ¹² ¿Xebon nohue bohro pama sca bimitihiquin? ¿Huaran nishin xebon nohue sca bimitihiquin? Hihyamahi. Jene jahuini janinhax rihbi ta jene siri bahitimahihqui.

Shinanquin sirijahibo

¹³ ¿Mato tocan tsoabo shinanyahpabo jaiquin? ¿Tsoabo honanbo jaiquin? Jascapahboxon siripi jihuexon sinayosmaxon pishinaibo min hahxoncoinai jismahue. ¹⁴ Caibo qui yohuanax notsi notsihax sina sinatax, Shinanya ta hen qui, hihyamahue. Quesayamahue. Shinancoin tah min yamahi. ¹⁵ Jascapa shinan ta Papan hinanahma qui. Jascapa ta mai meha qui, Dios Yoshimanama bi tiroma yoshimanah. ¹⁶ Notsi notsiti shinanboya queemehtax jaa huesti hihbocatsihqui shinan jano jaiton ta rehtenanti jatihiqui. Jatihibi tiromabo rihbi ta jano jatihiqui. ¹⁷ Naihoh quehax jahui shinan bihxon tah non hohchatima shinanscai. Rainyamatima rihbi, honaxonbi yohiti, caibaan yohihah nincati, hihti yanapanti, caibo hahxoncointi, caibo res hahxonpan jatima, hihcoinicamatima. Jascapahbo ta naihoh queha shinan jaiqui. ¹⁸ Rainyamahiboya jato tantimanicahen ta sina tantimahiqui, bimi banaquin hahcajabonaquin sirijaquin yohibonaquin.

4

Mai meha shinanya non jatimahi

¹ ¿Jahua copi man caibo rehtenanain? ¿Jahua copi man join bahchinnanain? Man jahuaborabo bichincatsihquibo copi, man tsinicatsihquibo copi, jahuabora man hihbocatsihquibo copi, jascapahbohax tah man rehtenanai. ² Costancatsihquin tah man hihti queenax bi man yamahi. Yamaxon tah man rehtehi. Caibaana jenipahixon bi tah man bihasquimah. Bihasquimahax tah man rehtenanscai, bahchinnanscai. Papa Dios yocayamahax copi tah man yamahi. ³ Yocaxon bi tah man bihyamahi, jaamajaquin yocaxon copi. Matonbi noitahnoxon res tah man yocacai. Nohuejacatsihxon, hihbocatsihxon rihbi tah man yocacai. ⁴ ¿Tsinibon! ¿Mai mehakaan shinana qescati ta Papan rahuiti qui, man honanyamahin? Mai mehabo quesca japan hihquish tah man Papan rahuibo sca qui. ⁵ Nea huishani joi ta jaiqui. Noque chicho jan jihuemahi jahuen yoshinhon ta hihti jenipahichihqui hihqui. ¿Yanca res jaa joi jai shinan man jain? ⁶ Yanca res ma, rahan. Noque ta yanapaniqui hicha. Jaa copi ta nea huishani joi jaiqui: Jaton shinan pishinyamahi shinanaibo pantexon bi ta jaton shinan pishinai honanaibo Papan yanapaniqui. ⁷ Jaa copi noquen naihoh queha Papan yohihi quescanahue. Tiroma yoshin tenenahue. Man tenehiya ta mato janinhax jabascatihiqui. ⁸ Papa Dios pataxnahue. Jaatian ta jaan rihbi mato pataxtihiqui. Maton mequen rishta potanahue, hohchayahpabon. Maton jointi rishta potanahue, rabe shinanyahpabon. ⁹ Huiniscanahue. Huaohihscanahue. Jihihscanahue. Bitsapahonish bi benascanahue. Coincoinpahonixon bi masa shinanscanahue. ¹⁰ Papa bebon man shinan hihti pishinai honannahue, jaan mato hicha shinanya huenyaxahnon.

Noquen huetsa qui tiromahi yohuantima

¹¹ Joni huetsa qui tiromahi yohuanyamanahue, hea huetsabaan. Noquen huetsa qui tiromahi yohuani tah min noquen Hihbaan joi qui tiromahi yohuanai. Noquen huetsa jisquin Jaa ta tiroma qui hihnicahax tah min noquen Hihbaan joi yohihi Jaa ta joi tiroma qui hihnicah qui. Jascajaquin tah min noquen Hihbaan yohihi quescajayosma qui, jahuen

joi qui tiromahi yohuanai. ¹²Noquen nincati joi hinannica ta huesti res qui. Noque jisxon Tiromayamahax siri quin hahxon jisnicah ta jaa huesti rihbi qui. Jaan ta noque teehihmati hahtipahiqui. Noque queyoti rihbi ta hahtipahiqui. ¿Jahuaxon sca min miin huetsa jisxon tiromayamahax siri quin hah min jatihin?

Non janoxihquibo non honanyamahi

¹³Caibo tah man nescari yohuanai: Rahma cayamahax tah non bahquish hoa jeman catihi, huesti bari janoxon maroxon maromaxon tah non coriqui tsamantihi hih tah man jai. Hen mato yohinon hea nincanahue, hea huetsabaan. ¹⁴¿Jahua bahquish jatihiquin? ¿Jahua mato huinotihiquin? Man tah man honanyamahi. Nete coro quescapahbo tah man qui, basima tahni hihquish yamacahinscai, jihueyamascai. ¹⁵Man yohuanai quescahahma jihuenahue: Noquen Hihbo queenaiya tah non jihuethi, hihnahue. Jaa queenaiya tah non nescajatihi, hihnahue. Jaa queenaiya tah non jascajatihi, hihnahue. ¹⁶Jascajayamaquin tah man honanquin hahcajahi yohuanai. ¹⁷Hohmis hohmisaibo yanapanti honanxon bi hahyamahax tah man hohchascái, hahxonyamahax.

5

Coriquiyahpabo yohiti

¹Mato sca, coriquiyahpabon. Huaohihnahue. Tiromabo mato qui nocoti jahui honanax saisaiihnahue. ²Maton jahuequibo ta payoscaiqui, maton chopabo ta mahsaman piha tiromascaiqui. ³Maton coriqui ta hanitahmaboya hanibo pohiscaiqui. Jatón pohi ta mato qui chanicoinal joi quescapah qui. Hahan ta chihin queyohahcamahi maton yora queyotihiqui. ⁴Netebo queyotaiya pishinmis hihxon tah man coriqui tsingui tsinguihi. Maton huai horoxonnica hbo man copijaquin pishinmani ta joi quescá qui, saisaiihniqui. Maton horoxonnica hbo noquen Papa yoca yocacah ta nincacaihuqui. ⁵Main jihuetax tah man noitahpahoniqui, jatihibiyahpahax. Caibo rehtehebaan bi tah man pihi yani yaniti jihuepahonihqui. ⁶Ponte joni maton hohcha hihbomaxon tah man jaa bahchinai, jan mato cahnemacatsihnonma bi.

Tenexon Papa yocati

⁷Hen mato yohihi quescá noquen Hihbo jonon caman mananahue, heen huetsabaan. Bero banahax bimi siri janon caman huai hihbo mana manatai shinannahue. Hoi jomenonon manatipish ta chini rihbi hoi benon manatihqui. ⁸Jascajaribiquin mananahue. Yobacahinnahue. Noquen Hihbo joti ta hochoma qui. ⁹Joni huetsa qui renen renyamanahue, heen huetsabaan, mato jisxon ¿tiromayamahax siri quin? hihxon noquen Hihbaan mato casticanyamanon. Jahuen xehqui janin ta nihresscaiqui, jocatsihqui. ¹⁰Papan joi yohinicabaan teneni quescajanahue, hea huetsabaan. Hohmis hohmixxon bi jaabaan teneni quescajanahue. ¹¹Tenequin jeneyamanihbo ta hahan jenimati jaiqui hih tah non jai. Shinannahue. Jooban teneni tah man nincaniqui. Jaa pecaho ta hahxonnicaxon hahan shinannicaxon noquen Hihbaan jaa hihti hahxonnishqui. Jaa tah man honanscai.

¹²Nea hen mato yohihi ta hihti nincati qui, hea huetsabon. Man hihcointi yohuanai honanahbo jahuabi quenayamanahue. Naihoh queha quenaxonma mai mehabo quenaxonma rihbi honanahbo jahuabi quenayamaquin. Jeenhihcatsihquish jeenhihresnahue. Hiyamahí rahan hihcatsihquish hihyamahi rahan hihresnahue, jahua copi mato casticanti yamanon.

¹³¿Min hohmis hohmisain? Papa yocahue. ¿Min jenimahin? Noquen Hihbo qui behuahue. ¹⁴¿Min hisinain? Pastoro yanapannicahbo quenamahue. Jaabaan sca noquen Hihbaan janen mia xenin besquixon mia yocaxonnon. ¹⁵Shinancoinxon mia yocaxonah tah min hisinax bi rohathi. Noquen Hihbaan ta mia huenitihiqui. Miin hohcha jaiya ta mia sohuaxonrihbitihiqui. ¹⁶Jaa copi maton hohcha yohinannahue. Man rohscanon yocaxonnanannahue. Hohchajomaxon yocaxon tah non hicha hahcai. ¹⁷Elías ta noque quescapa joni hihpahonishqui, noquen shinanya. Hoi beyamanon jaan yocacah ta quimisha bari seis hoxne main hoi paqueyamanishqui. ¹⁸Hahquirihbi jan yocacah cahen naihoh quehax hoi quexto paquenish, bimibo jaribiyaxahnon.

¹⁹Heen huetsabaan, mato meha huesti bahinma sca cahi quescajaquin Papan joi jenehi bi bahin sca huetsan nihmarihbihiya jaa pontenica siri honannahue. ²⁰Hohchatai joni pontexon bahin sca nihmahí jonin ta jahuen huetsa teehihmahihqui, jan mahuaquehana. Hicha hohcha rihbi ta mahpohiqui.

PEDRO Pedronen raanni joi

Jabisnibo qui Pedronen joi raanai

¹ Hea Pedro tah hen Jesucriston raanti joni qui. Jahuen raantixon tah hen huishahi, man jabisnibo qui raannoxon. Ponto mai janin, Galacia main, Capadocia main, Asia main, Bitinia main. Man janobo jabisnish Papan baquescaax bi janobo jihuetahbahibo qui tah hen nea raanai. ² Papan ta mato caisnishqui. Mato caisxon ta yohinishqui, Heen baque Jesucristo nincacoinaibo janoxihnahue. Jahuen jimin jan mato chocanon heen baquebo janoxihnahue, hahquin. Jascapahbo man janon ta jahuen yoshin siripan rihbi sca mato jahuen shinan siri hinanishqui.

Jenimahi jihueti

³ Hahxon tah min noque jai Papan hahnahue, noquen Hihbo Jesucriston Papa Dios yohiquin. Noquehon hihti shinanxon ta behnajaquin noque jonijahiqui. Jesucristo hihquipi bi hahquirihbi teehihmaxon ta noque honanmahiqui, noque jihuemanica jihuerihbiscai non joni behnaxon sca honannon. ⁴ Behnaboxon sca tah non queyoyosma siribo sca bihyaxihqui, payoyosmabo. Jascapa tiromayosma siribo ta Papan mato naihoxon beboxaxonihqui. ⁵ Man nincacoinaiya ta jahuen coshiyaxon mato coiraniqui. Nete queyó sca jaiya ta jahuen jihue mato jismayaxihquiqui, man janohax queyoyamanox mananon. Rahma jismati siri sca jai bi ta jaatian pari mato jismayaxihquiqui.

⁶ Jaa copi jenimanahue. Rahma basima tahni mesco tenetibo jaax bi jenimanahue. ⁷ Maton teneti shinan ta oro mentan hashoan hihti copi qui. Oro hashoan mapojaha queyótihi bi ta chihin jaa tanacanicuqui, siri hin hihxon. Jascajaribiquin ta maton shinan tanacanicuqui. Tana tanahah bi man nincacoinaiya ta noquen Hihbo jahuiya sca hahqui sirijaquetax yohuanyaxihcanihqui, jaa siri quen, Nete Hihbo quen, Shinan Hihbo quen.

⁸ Jaa jisnixonma bi tah man hahan shinanai. Rahma jaa jisxonma bi tah man nincacoinai. Nincacoinax res sca tah man hihti jenimahi. Hihti coin coin sca jai. ⁹ Nincacoinax tah man queyoyamanox manati sca jai.

¹⁰ Papan matohon jascajaquin shinayaxihqui ta jahuen joi yohinicabaan yohinishqui. Jaa huishaxon sca ta jenquetsahaxon Papan noque teehihmatihiquin hihxon shinan shinancanpahonishqui. Jatón quirica jis jisxon bi jisribicanquin. ¹¹ Criston yoshinyaxon ta huishaxon yohicanishqui, Cristo tiromajatibo, jaa pecaho hihti shinan hihbo sca jaa hihtihiqui yohicanquin. Dios Yoshiman yohihah bi ta Tsoa jaa quin, jahuentian Papan jascajatihiquin jacanishqui honanyamahax. ¹² Jaatian ta Papan jato honanmanishqui. Jaabo jihuetai tian ma bi man cain sca jaiya pari jan mato hahxonquin jihuematihí jato honanmaquin. Chini sca ta naihoxon jahuen Yoshin raannishqui, jayaxon sca jahuen joi siri yohihahbo. Papan mato hahxonai ta jahuen Yoshinyaxon sca mato yohicaniqui. Jan noque hahxonai hihti jiscatsihquish ta jenquetsahpa jatihiquin hihcanihqui Papan yonotibo.

Non ponte res jihueti jai

¹³ Jaa copi shinan coshijanahue. Shinancoinnahue, Jesucristo jahuiya noquen Papan matohon shinanxon mato hahxontihí honanquin sirijahax jihuenuahue manati. ¹⁴ Jahuen siribaquebonahue. Man honanyamahax tiromabopahoni quescayamascanahue. ¹⁵ Man japahoni quescayamascanahue, jatihibi ponte res sca. Jaa mato hihbohi quescarihbinahue, ponte res. ¹⁶ Hea ponte hihqui quescari tah man mato rihbi pontebo hihtihí hih ta Papan huishani joi jaiqui. Jaa copi jascanahue.

¹⁷ Noquen Papan ta jahua copi jahuen shinan huetsajatimaxon jatihibi joni jisiqui, non hahcai siri hin tiroma quin hihxon. Jaa Papan hahxon, hea casticanpaho hihxon shinanquin sirijahax jihuenuahue, hahqui noconoxon caman. ¹⁸ Maton xenibo yanca bi res japahoni quescabihi tah man janiqui, jato chibani. Man jascapahbo que bi ta Criston mato bihnishqui. Jaan ta oron mato bihyamanishqui, ni coriquinin bi bihyamaquin. Jaan ta queyonicabo hinanquin mato bihyamanishqui. ¹⁹ Jahuen jimin caya ta mato bihnishqui. Jatón hohcha copi mahuanon ta noquen xenibaan hihti siri carnero caispahonishqui, jahuen yora janin jahuabi cahcoya yamahi, jahuenbi jahuabi tiroma yamahi. Siriresi. Jascarihbihi ta Cristo janishqui, hihti shinanya, jahuabi hohcha yamahi. Jascapahxon ta mato jahuen jiminbi bihnishqui. ²⁰ Naiyahpa mai hahriyamaxon ta Papan jaa mahuyaxihnon yohinishqui. Yohinixon bi ta rahma noquen nete queyoti hochoma sca Papan jaa raannishqui, matohon hihti shinanxon. ²¹ Jaa Cristo nincacoinxon tah man noquen Papan rihbi nincacoinai. Jaa ta Papan hahquirihbi hueninishqui, hihquipi que bi. Jaa

huenihihnixon yohiquin, nete hihboscanon. Jaa copi tah man Papa Dios nincaxon jan mato hahxontihí honanrihbihi.

²² Papan joi nincacoinquin tah man maton jointi rishta potasca jai. Noquen huetsabohon shinancoinpan hihnicabo sca janahue. Jascjaxon maton jointiboyaxonbi joni huetsahon shinannahue. ²³ Papan ta mato hahquiritihbi jonijascaiqui, mahuanicama bi mahuyosma Papayahpabo sca. Jahuen join mato jonijaribiquin. Jaa jahuen joi ta hahan jihuetai qui, queyoyamanoxihqui jihuetai. ²⁴ Papan huishamani joi jai quesca tah qui:

Jatihibi yorayahpabo ta huasi quescaqui jaton rajotibo huasi joa quescaqui. Huasi ta pehuahihqui, jahuen joa rihbi paqueti.

²⁵ Papan joi ta jascapahma qui: jaa jahuen joi ta queyoyamanox manatihqui hihqui Papan huishamani joi. Jaa joi ta non mato yohini joi qui.

2

¹ Jaa joi nincacax tiromayamascanahue. Panyamascanahue, ni pishcabi. Hahxonquin quesajayamascanahue, notsi notsihax joni huetsa qui yohuanymascai. ² Rahma cainipish baquexo xoma jene queenihcamahi hahan haniti joi queennahue, Criston jihuetaiho sca hanicananoxon. ³ Matohon jaan hihti shinanai tah man honanquin sirijaribiscái.

Cristo noquen hahqui xobojati

⁴ Hahqui xobojati jihuibo caixon tiromabo potaquin hahcajaquin Cristo potanibho que bi ta siri bi res Papan jaa caisihqui, mohitahpa jihui. Hahqui bi sca nocóhíhnanahue.

⁵ Mohitahpa hahan jan xobojati quescahho janahue, jahuen xobo sca. Jahuen xobohoxon shinanmanicabo jai quescahbihi jahuen joi yohinicabo janahue. Hahan Papa Dios jenimatibo hinanquin hahcajaquin Papa queenai quescajaquin hahxonahue Jesucristo betan. ⁶ Papan huishamani joi janin ta nea jaiqui:

Jise, heen jonibo tocan tah hen hean caisai jihui nichinhihni sca jai, siri bi res hahqui xobojati siri. Jaa nincacoinaibo ta tocanbi hihtimahmatimahihqui

hihqui jaa joi. ⁷ Jaa copi ta jaa hihti siri qui, man nincacoinabaan jisi. Nincayosmabo yohihi ta huetsa huishani joi jaribihiqui:

Xobojahibaan queenyamaxon potani jihui ta hahqui xobojati sca jaiqui hihqui. ⁸ Huetsa rihbi:

Jonibo hahqui joxcorohti jihui tah qui, hahqui jonibo joxcorohti tobiti jihui

hihqui. Papan joi nincacatsiyamahax joxcorohtax paquetihcamajaquin jaamajaquin. Jaabaan jascajayaxihqui ta Papan yohinishqui.

Papan baquebo

⁹ Jaabo jascapahbo que bi ta Papan caisaibo mato qui. Quiquin hapo bebonxon yohuanxonnicahbo sca tah man qui, Papa Dios qui jonibo nocomanoxon. Papan jonibo sca tah man qui, jahuen baquecoinbo sca. Bahquish chian man jihuetai bi ta mato queenishqui, jahuen siri xabapan man jihuenon. Noque ta sirijaquin hahxonihqui, hih man janon yohihi. ¹⁰ Jahuama hihpahonish bi tah man Papan baqueboscai. Mato bihyamanixon bi ta rahma Papan mato sirijaquin sca bichiqui.

Papan shinanya non jihuetai jai

¹¹ Matohon shinanxon tah hen mato yohihi: Maton main tah man jihueyamahi. Mai mehakaan nahuabo sca tah man qui. Jascapahbohax tah man mai meha shinanbo man queentimascai. Jascapa shinaman ta tiroma yoshiman mato bichiqui, mato hahbetan hiocatsihquin. ¹² Nahua tocan jihuetaibohax sirijaquin shinanax jihuenahue. Jaatian ta mato qui jaabo tiromahi yohuanax bi noquen Hihbo jores sca jaiya sca man joni huetsa yanapanai jisnish, Papa Diosen ta jato jahuen shinan hinannishqui, hihyaxihcanihqui.

¹³ Noquen Hihbaan joniboxon jatihibi hapobo nincanahue. ¹⁴ Quiquin hapo rihbi nincanquin. Jaan raanai tinintibo rihbi nincarihbiquin. Tiromajahibo casticannon ta jaabo raanihqui. Siribo rihbi yohihi, Jaa ta siribo qui jaahbo hihxon jato raanquin.

¹⁵ Honanyamahax yohuanresabохон bi ta honanai jonibaan mato shinancoinyabohi jisish netetihiqui. Jascati ta Papa queenihqui.

¹⁶ Hiná quescahbo sca janahue. Hinabo hihyamascaxon bi tah man tiromajatihahi. Papan hahxontibo sca jihuenahue. ¹⁷ Jatihibi jonibo yohuanquihnixon nincanahue. Noquen huetsabohon shinannahue, Papa qui tiromati qui raquexon. Noquen quiquin hapo rihbi shinannahue.

Criston teneni quescajaquin non tenetihí

¹⁸ Patoroyahpaxon maton patoronen yohihah nincanahue, jato shinanquin. Maton patoro siri jaiya jaa shinanquin sirijaquin. Tiroma patoro jaiya shinanrihbiquin. ¹⁹ Man siripi jihuetai bi tiromajaquin shinanxon caibaan mato casticana bi noquen Papahon

shinanxon man teneresaiya ta Papan mato siri jisiqui. ²⁰ Man tiromahiboya mato rishqui rishquihahbo ta man tenehi que bi noquen Papan mato siri jistimahiqui. Man ponte res jihuetai copi caibaan sca mato tiromajahah bi man shinanquin sirijaxon teneresaiya pari ta Papan mato siri jisiqui. ²¹ Matohon shinanxon ta tiromabo Criston tenenishqui. Jaan teneni quescajaribiti ta Papan mato yohihiqui. ²² Cristo ta hohchayamanishqui. Jaan ta jahuentianbi paranyamanishqui. ²³ Tiromajaquin joinjahabo bi joi bichinyamaquin. Tiromajahahbaan bi jato tahtijayamaquin. Sirijaquin shinanxon casticannica noquen Papa jai honanxon jaan teneresquin, Papan jato jison. ²⁴ Jihuin hueonahbo hueoxon ta jaanbi noquen hohcha bihnishqui, jahuen yora janin. Mahuascaibo hohchayosma hihqui quescapahbo non hohchayamascanon ta jaa mahuanishqui, sirijahibo sca non jihuenon. Jahuen tsehueyaxon ta mato sohuaxon jihuemahiqui. ²⁵ Carnerobo quescapahbo tah man janiqui, behnoti. Behnonish bi rahma maton coirannicah qui nocorihbiscai, maton jihuemanicah qui nocoscai.

3

Haibo betan bebo jihuetai

¹ Jascajaribinahue, haibobon. Maton benen yohihah quescajaquin hahnahue. Jaatian ta caibaan Criston joi nincacatsiyamahon bi jaton haibo jascapa shinanyahpa sca jison nincascatihiqui, jaton haibaan yohihahma bi. ² Man tsiniyamabiresi jihuetai jison, man jato nincacai jison rihbi ta nincascatihiqui. ³ Caibo haibo ta bemacanya res siripihqui, raotiyahpa, hahan tsiniti bohuexetiya, bebobaan jison res oro paronohtiya, bebobo queenmati chopayahpa. Jascapahboyamanahue. ⁴ Shinan siri ta maton hahan siriti qui, haibobon. Man sinaxonma bi sirijaquin shinanai, man sirijaquin teneresai, jascapah ta Papan jisi hihti siri qui. Jascapah ta queyoyosma hahan siriti qui. ⁵ Jascapah ta Papahon shinanai haibobo japahonishqui, Papa hihcoina shinanai haibobo. Jaton benen yohihah nincacanquin. ⁶ Saran ta jahuen bene Abraham nincanishqui, jaa quenaquin Hihbon hahquin. Caibaan mato raquejacatsihqui bi tah man raqueyamahax jihuecoinax Saran baquebo sca qui.

⁷ Jascarihibinahue, queyehpabon. Maton haibohon shinani jihuenahue. Haibo betan bebo man jihuenon ta Papan mato rabebi jihuemahiqui. Haibo hashoan coshijoma copi hahan hihti shinannahue. Man Papa yocacaiya jahuatohonbi maton yocati panteyamanon jascajanahue.

Sirijahibaan teneti jai

⁸ Mato jatihibi sca tah hen yohihi: huesti shinanya janahue. Hahxonmani. Noquen huetsabohon shinanhahnani. Yanapanhanani. Caibo mentan mia hashoan shinanya hihqui shinanyamaquin. ⁹ Caibaan mato tiromajahah bi copiyamanahue, mato tiromajaquin yohihahbaan bi jato copiyamarihbiquin. Copixonma Papa jato yocaxonnahue. Man jato yocaxonti ta Papan yohihiqui, mato shinan siri hinannoxon. ¹⁰ Papan huishamani joi jai quescari:

Basi jihuecatsihquish siririhbihi jihuecatsihquish tiromahi yohuanymabiresnahue, tsoabi paranyamanahue.

¹¹ Man tiromapahoni jenebahinax ponte sca janahue. Rehtenantima shinan bichish hahan jihuenahue.

¹² Papan ta pontebo jisiqui. Jaabaan yocacah ta nincaquihqui. Tiromajahibo jaan jascajayamaquin; jato casticanquin hihqui jaa huishani joi.

¹³ Man sirijati hihti jenipahichaiya tsoan mato casticantihiquin? ¹⁴ Man jihuecoinaiya caibaan mato tiromajahi que bi ta Papan mato jaa copi shinan hinantihiqui. Jato qui raqueyamanahue. Masa shinanyamaquin. ¹⁵ Cristo noquen Hihbo jai sirijaquin honannahue, maton jointi janin. Jahua copi min Cristo joi nincacain hahquin yocacaibo jatihibi yohinoxon shinannahue, man jaa copi nincacoinai yohiquin. ¹⁶ Shinanquin sirijaxon tah man jato honaxonbi yohitih. Jihuecoinxon jato yohiquin. Jaatian ta man siripi jihuetai bi tiromahi jihuetai quesca yohuanax mato qui quesa hibo hihtimahscatihiqui. ¹⁷ Noquen Papa queenaiya ta non jihuecoinxon tenehah siri qui. Tiromahax hohmis hohmisah ta sirima qui.

¹⁸ Cristo rihbi ta hohchayabo copi huesti coti mahuanishqui. Jaa ponte hihquish bi noque pontemabo copi mahuati, noquen Papa qui noque hionoxon. Jahuen yora rehtehibaan bi ta Dios Yoshiman teehihmaha jihuerihbiscaiqui. ¹⁹ Dios Yoshiman teehihmahah sca ta mahuanihbo yoshinbo jaan yohitannishqui, Papan xehponihbo. Jato ta joi siri yohinishqui. ²⁰ Jaabaan ta Noen jihuepahoni tian nincayamapahonishqui. Papan jato teneparinon ta Noeman nontijanishqui, hahan sca hicha tahma joni jihuetai piconon. Jenen

jato casticanaiya ocho joni res jaa nontin nanetax jihueni. ²¹Jascarihbihi tah man jenehoh hihquimatanah sca jaa jene copi man jihuerihbihi. Maton yora rishtha chocahah copima bi ta Jesucristo noque jihuerihbixonah man hohcha yamascai copi jihuerihbihi. Jesucristo copi res sca jihueti. ²²Jascahue Papan jaah ta Papan yonotibo hihbohax jato yonoxonaibo rihbi hihbohax, coshiyahpabo rihbi hihbohax, naihoh cahax res sca Papa jato jisxoni sca tsahoscaiqui.

4

Papan shinanyaxon non hahxonti jai

¹Yorayahpaxon ta tiromajahahbo Criston tenenishqui. Jan teneni quescajaribiquin shinan coshinahue, tenenoxon. Noquen yora tiromajahah bi tenexon tah non hohchati shinanyamascai. ²Hohchayabo queenai quescajajamaahi bi Papa queenai quescajahi jihueti shinanscaquin. ³Neateman tah man nahuabaan costanai quescajaguin hicha hahpahoniqui. Joni huetsa betan hohchati res tah man jihuepahonihqui. Tsiniti shinani res jihueti. Pahen paheni. Cahtimahti. Coro coroti. Papan joi jenebahini tiromabiresi. Jascatima sca ta jaiqui. ⁴Jato betan man jascabi honanma hihyamascai jisish ta rahtecaniqui. Rahtetax ta mato qui tiromahi yohuancaniqui. ⁵Jato casticanscanoxon ta noquen Hihbaan jato yocayaxihqui: Jahua copi man jascaniquin hahquin. Jihuetaiboya mahuataibo casticannicahxon ta siri hin tiroma quin hihxon jato jisresscaiqui, noquen Hihbaan. ⁶Jaa copi ta mahuanibho rihbi joi siribo jaan yohinishqui. Jonibo hihqui quesca yorayahpahax jihuetaiton casticanah hihquibo bi ta Papa hihqui quesca sca jaton yoshin jihueti janon hihxon joi siri jato yohinishqui.

⁷Jatihibi queyoti ta nea pishcascaiqui. Jaa copi Papa yocanoxon shinanquin sirijahax jihuenahue. Hahan hihti shinani jihuenahue. ⁸Nea joi ta hashoan hihti nincati qui: Maton huetsabohon shinanquin hahxonquin jeneyamanahue. Joni huetsahon shinanquin hahxonaiboya tah non jaton hohcha hicha jai bi jaa shinanyamascai. ⁹Yohuani renen rerenaxma yanapanhanannahue, hocho quehax jahuibo piti hinanxon, xobo rihbi hinanquin. ¹⁰Papan ta mato shinan hinanpaquehiqui. Papan hinanah mesco shinanyabohax jaa shinaman sca yanapanhanannahue. ¹¹Yohiti shinanyahpaxon Papan joi man yohixonai honanxon yohinahue. Yanapanquin hahxonti shinanyahpaxon Papan mato hinanai coshin hahxonannahue. Man hahcai jatihibi tah man Criston joniboxon hahtihi, noquen Papa shinan hihbohi honanahbo. Jaa ta shinan hihbo coin qui, jatihibi joiya. Jaa ta jascabi qui, jahuen shinan queyoyamaahi, jahuentianbi jahuen yohuan queyotima.

Papan baqueboxon non teneti jai

¹²Chihin mapojaquin hahcajahabo bi rahteyamanahue, heen huetsabaan. Jascapa tiromabo ta hahan maton shinan tanati qui. Rahteyamanahue. ¹³Jascapahbo tah man Cristo tenexonai. Man Cristo tenexonai honanah jenimanahue. Jaatian tah man janibi shinanya jaa jahuiya man hihti jenimatihhi, coin coinscai. ¹⁴Man Criston baquebo copi mato sinajahabo bi shinanquin sirijanahue. Papan yoshiman manahah sirijaquin shinanquin, Papan yoshiman mato manahiya sirijaquin shinanquin. ¹⁵Joni rehteti shinan tah man jatimahi, tsoanbi. Tsoanbi tah man yometsohti shinantimahi. Tiromajati shinantimahi. Coro coromamis jatimahi. Jascapaboxonma tenenahue. ¹⁶Man Criston joni copi mato tiromajahahbaan bi hihtimahyamanahue. Hihtimahpaxma Criston jonihax siripi jihuenahue, noquen Papa maton hihbo jai honanahbo.

¹⁷Noque pontecatsihquin ta siri hin tiroma quin hihxon rahma Papan jahuen baquebo jisresscaiqui. ¿Noque pari jascaxon, jahuen joi nincayosmabo sca jan jahuentiho tiroma-jatihiquin? ¹⁸¿Siri jonibo queyoquin bi rohajaxon shinanyosma hohchataibo jahuentihoja Papan jatihiquin? ¹⁹Jaa copi honannahue. Man teneti Papa queenaiya siri res jihuenahue. Noque jonijanicahon ta jan yohini quescajajaquin mato hahxonyaxihqui. Jan mato hahbetan jihuemayaxihqui sca honannahue.

5

Noque huetsabo yohiti joi non jai

¹Jaa copi tah hen mato janin jai pastorobo hen hihti yohihi, hahbe pastoroxon. Tiromajahahbaan bi Criston tenehi jisnixon, jano Papan jihuemayaxihqui janin hea rihbi hihtihi hihxon rihbi, mato hihti yohiquin. ²Papan mato coiranmahi jahuen baquebo coirannahue. Yonohahma bi queenxon res coiranquin, Papa queenai quescajaguin. Coriqui bihnoxonma bi hihti hahxoncatsihquin jato coiranquin. ³Jato yononicaxonma bi man jihuetai quescaji jaahbo hihxon Papan baquebo coirannahue. ⁴Noquen quiquin coirannica joxon sca ta mato queyoyosma xababo hinanyaxihqui.

⁵ Chini baquebo sca tah hen yohihi: Maton pastorobo nincannahue. Caibo hihqui quescari man mato rihbi shinan pishinai honanax shinanahannannahue jatihibi sca. Shinanya tah hen qui hihquibo pantexon bi ta jaton shinan pishinai honanaibo Papan jahuen shinan hinanihqui. ⁶ Jaa copi jan mato coshin mehemis hihxon man pishincoinai honannahue, hihti shinancoinaya sca jan mato hueniyaxahnon. ⁷ Man hahan masa shinanai jatihibi jaa yocannahue. Matohon ta shinanihqui.

⁸ Pahenaxma coirameti jihuenahue. Maton sinatah yoshin ta hino notsihihcamahi nichiqui, tsoa sca pipan hihqui. ⁹ Jaan mato tiromamacatsihquiya jahuen shinan bihyamanahue, Cristo jeneyamaquin. Man tenehi quescajaribiquin ta maton huetsabaan rihbi tenehihqui jatihibi janinxon. Jaa nincaxon tenenahue. ¹⁰ Man basima tahni jascapa tenehiya ta Papan mato coshijatihiqui. Jaa ta jatihibi shinan hihbo qui. Man Criston jihuetahbohax hahbetan sca jahuen shinanya man jascabi sca jihueyaxihqui hihxon mato quenanihon ta Papanbi mato coshijatihiqui, coshi shinan hinanquin. ¹¹ Jaa ta jascabi Hihbo qui. Jahuentianbi queyotima jahuen yohuan. Jascari rahan.

Hahan quirica queyoti

¹² Silvano ta noquen huetsa siri qui, hean shinanah. Hahbetan tah hen nea quirica pishca mato qui raanai. Papan shinanai joi coin mato sirijaquin yohinoxon tah hen huishahi. Papan shinanai quescabijanahue.

¹³ Babilonia jema janinhah noquen huetsabaan ta Papan caisaiboribixon mato qui joi raanihqui, Man jascabi jayamahin hahquin. Heen baque Marcosnen rihbi ta mato qui jascajaquin joi raanihqui. ¹⁴ Noquen huetsabo behchinani hicocananannahue, jatohon shinani.

Mato Cristonahbo jatihibi man jointi sirinon hihxon tah hen Papa yocacai.

2 PEDRO

Pedronen raanni joi, jahuen rabe coti

Noquen huetsabo qui Pedronen raanai

¹ Hea Simon Pedro tah hen Jesucriston raanti jonixon jahuen yonoti rihbi hihxon mato qui nea joi raanai. Mato man hehbe shinancoinaibo qui tah hen raanai. Noque teehihmanica Jesucriston ta ponte hihxon noque jahuen shinanyahpabo sca noque jisiqui. Papan rihbi ta noque jascaxonihqui. ² Noquen Papa honanbonaxon noquen Hihbo Jesus rihbi honanbonaxon jahuen shinan bihbonanahue. Hahan jointi sirijaqueti shinan bihbonaquin.

Papan hinanai shinanbo

³ Jahuen coshi shinanyaxon ta noquen Hihbaan noque hahan jihuetibo jatihibi hinan-scaiqui. Jahuen hihti siri shinanyahpaxon cahen noque yohiquin, jahuen baquebo non janon jahuen hihti coshi shinanyaxon noque yohiquin. Jaa noquen Hihbo non honanaiton ta noque jatihibi hahan jihuetibo hinanbonahihqui. Noquen Papahon shinanti noque hinanquin. ⁴ Jahuen coshi shinaman ta hihti siri joibo noque yohinishqui, jan noque hahxontibo noque yohiquin. Hicha jan noque hahxonyaxihqui. Jan noque hahxontihibo honanxon tah man jayaxon coshixon tenetihi, neno main jai rishta shinanbo mato qui mahnejaqueyamanon. Jaton shinanbo ta tiromabo qui, tiromati queenaibo quen. Jascapa bihxonma tah man Papan shinan bihtihi, jan noque yohihi nincaxon. ⁵ Jascapa rishtajomabonoxon sca nincacoinnixon ponte hihti shinanbo sca bihnahue. Ponte jihueti shinanxon honanbo sca janoxon honanti shinan bihbonanahue. ⁶ Honanti shinanbo bihbonaxon jatihibi qui coirameti shinan sca bihnahue. Jascapa shinanbo bihxon shinanquin sirijahanan teneti shinan sca bihnahue. Jascapa bihxon sca Papan shinanai quescajatibo sca bihnahue. ⁷ Jascapa bihxon sca noquen huetsabo yanapanti shinanbo bihnahue. Jascapa bihxon sca joni huetsahon shinanti shinanbo sca bihnahue.

⁸ Jascapa shinanbo hicha jaax tah man noquen Hihbo betan nichish yosmabotimahi, jahuabi hahyamahiboma. ⁹ Jascapa shinanjomabo ta benchebo qui. Hocho jisya-maquin hahcajaquin ta jaabo hohchanibo Papan jato sohuaxonai shinanbehnoscacaniqui. ¹⁰ Jahuenahbo sca man janon Papan mato yohini honanquin sirijanoxon sca hihti nincanahue, hea huetsabaan. Jascajahax tah man jahuentianbi tiromatimahi. ¹¹ Jaatian sca tah man siri bi res noquen Hihbo Jesucristo qui catihi. Noque jihuemanicahton mato jano jascabi sca jihuemayaxihqui janin tah man siri bi res hahqui nocotih.

¹² Jaa copi tah hen jascabijaquin mato jascapa jati shinanmacatsihqui. Man jascapa jati honanscai bi tah hen shinanmahi, man Papan joi texe honanscai bi. ¹³ Jihuetahxon tah hen shinanmaquin mato siriti queenmatih. Jascajati ta jaiqui, hean jis. ¹⁴ Noquen Hihbo Jesucristonen hea yohini quescabihi hea mahuati nea pishca jaonahi tah hen honanai. Jaa honanxon tah hen mato shinanmahi. ¹⁵ Shinan siribo bihti man shinanbehnoyamanon hihxon tah hen huishaxon mato yohihi, hea mahuasca jaiya man jaa joi shinanyaxahnon.

Criston coshi jisnibo

¹⁶ Noquen Hihbo Jesucriston coshi mato jismaxon tah non jaa joribiyaxihqui mato yohinihqui. Jasca coin ta jaiqui hihxon tah non honanquin sirijahi. Jahuen xaba jisnixon tah non mato yohinihqui. Paranyamabiresquin. ¹⁷ Jaa hihti shinanya jai noque jismahahnan ta xaba coin janinhax Papa hahqui yohuanishqui: Nea ta heen hahan hen queenai heen baque qui. Hahan tah hen hihti jenimahi, hihqui. ¹⁸ Jaa tah non naihoh quehax yohuanai nincaniqui, noquen Hihbo betan Papan manan manixon nincanquin.

¹⁹ Jaa copi tah non Papan joi yohinicabaan huishani joibo hashoan sirijaquin sca honanai. Yame chian hahan xabajati quescas tah qui. Jaa joi jisquin sirijanahue, maton jointi janin xaba paquenon caman. Jointinin honancoinnixon caman jisquin sirijanahue. ²⁰ Papan huishani joi jisquin bi nea pari honannahue: Papan huishani joi jisquin tah min mia huestichin shinanxon jan yohihi mian honanquin sirijatimahi. Papan yoshinyaxon pari. ²¹ Hahmebi shinanxon ta jonibaan jaa joi huishayamanishqui. Dios Yoshiman shinanmaha ta Papan joi huishacannishqui.

2

*Quesa honanmahibo
(Jud 4-13)*

¹ Papan joi yohihihcamahibo ta jonibo tocan janishqui, mato tocan honanmahicamahibo jaresscathi quescari. Jonexon ta jaamajaquin yohiyaxihcanihqui, hahan

shinan tiromati joibo. Noquen Hihbaan jato hohcha copijaxonni que bi ta jaa yohihi Heen jahuama tah qui jaticaniqui. Jascahibo ta histon bi res Papan tiromajabahintihiqui. ²Tiromahi hihresaibo ya jaabo hihqui quescari caibo rihbi hicha jatihiqui. Jascaraibo ya ta Papan joi qui caibo rihbi tiromahi yohuan yaxihiqui. ³Maton coriqui bichincatsihqui ta quesa quesayaxihcanihqui. Mato paran paranquin. Jascaraibo ta Papan jato casticanyanoxon jato jisquin sirijascaiqui. Hahan jato queyoti ta jaresscaiqui.

⁴Jahuen yonotibo tiromahiton ta Papan jato cahneyamanishqui. Hihti yame chian ta jato potanishqui, quinihuan neminiho jato xehpoquin, jato casticanti nete noconon caman. ⁵Neateman jihuapahonihbo rihbi ta Papan cahneyamanishqui. Ponte res jihueti yohinica Noen huesti, siete joniboya jaan xahbanjamaquin. Jene mai mahpomaxon ta texe nincayosmabo rehtenishqui. ⁶Sodoma betan Gomorra jema rabe rihbi queyocahinscanon ta jato mapojanishqui. Nincayosmabaan honannon hihxon jato queyoquin. ⁷Jano siri jihuapahoni Loto huesti ta Papan xahbanjamanishqui. Nincayosma tiromabo hihti tiromahi jishish ta Loto rahte rahtenishqui. ⁸Jaa sirihax bi jato tocan jihuexon, jaabaan hahcai jixxon nincaxon nete tihibi jahuen jointinin tiromajaquin shinanscaquin, hihti tiromahibo ya. ⁹Jascapa tiromabo casticanquin bi ta siribo xahbanjamati Papan honanishqui. Tiromabo casticanti nete noconon caman hahan jato casticanti Papan bexojaxonai honannahue.

¹⁰Jaton tiroma shinaman tiromahi hohchati hihresaibo ta hashoan sca jaan casticanyaxihqui. Jaabaan ta jaton hapobo jistahimahihihi. Shinanquin sirijahaxma ta hihrescaniqui. Papan coshi yonotibo japahoni ta hichá hichacanicu. ¹¹Hihti coshiyahpaxon, hihti shinanyaxon que bi ta Papan yonotibaan bocabi tiroma joi yohiquin jato caheyamahiqui, Papa bebonxon jato yohiquin.

¹²Hoa hihresaibo ta jascayamahihqui. Honanma yohinahbo quescapahbo tah qui, bihxon rehteti yohina quescapahbo. Jaabaan honanyamahi joiboya tiromahi yohuacani. Jaaboyabi ta texe Papan queyobahinyaxihqui. ¹³Tiromabojani quen ta Papan jato tiromajarihbiyaxihqui. Bariyahpan bocabi ta hihtimahpaxma tiromacanicu. Jascapah ta rishta jaromabo qui. Tiromajati jenipahixon ta mato betanbi picanishqui.

¹⁴Haibo betan hihrescatsihxon ta haibobo jiscaniqui. Hashoan res tiromacatsihquibo. Shinanjomabo paranmisbo. Coriqui bichinquin tsamancatsihquish jaa shinanya nichibo. Tiroma yoshiman baquebo. ¹⁵Ponte bahi potabahinax ta bahinma sca bocanishqui. Beornen baque Balaam sca ta chibancaniqui, jan tiromajaquin coriqui canancatsihqui hihni quescari. ¹⁶Balaam tiromahiya ta Papan pontequin yohinishqui. Yohinoxon ta yohuanayosma caballo yohuanmanishqui, jonin join yohuanxon jaa tehquehiqui yohinica pontenon.

¹⁷Hoa hihresaibo ta texpa taraxihcama jaibo qui. Nihuen hueranai nete coro quescapah. Bahquishihpahuan yame chian jato potayahnoxon ta jascapa yamepahuan Papan bexojacanishqui. ¹⁸Honanihcamahax ta honanma joibo coshin yohuacanicu. Jaamajahi bi rohataibo sca ta jaton yohuaman paranxon haibo ya hihresti jato shinanmacanicu. ¹⁹Tiroma yoshiman hinábohax bi ta Hináboma sca tah man jatihi, hihcanishqui quesahi. Hihbojani joni ta hiná qui, hihbojaha copi. ²⁰Noque teehihmanica noquen Hihbo honanxon ta mai mehabaan rishtabo bihquin bi caibaan rohajacanicu. Jaatian sca ta jaa rishtabo bihribiha, hahan hihbojaribiha, jaabo hihmenohi mentan hashoan tiroma sca jaticaniqui. ²¹Papan joi siri honanyamahah siri que ma bi ta honanxon bi jenebahinah hihti tiromascatihqui. ²²Hihcoini yohuani janí quesa ta jaabo jaiqui. Jananxon ta jaabo rihbi hochitinin pihiqui. Cochi nashimaha bi ta huaho chian caribihiqui, hihqui jaa joi.

3

Noquen Hihbo joti nete

¹Neayanish ta rabe sca hen mato qui raanai quirica qui, heen huetsabaan. Rabebichin tah hen mato shinanmahí, man shinanquin sirijanon. ²Papan joi yohinicabaan huishaquin jayaxihquibo yohini joi shinannahue. Noque teehihmanica noquen Hihbaan raantiboxon non mato yohini joi rihbi shinanquin sirijanahue.

³Nea pari honannahue: nete queyoti nea pishca sca jaiya ta hosanmisbo jotihiqui. Tiromati jenipahixon ta mato hosan hosanyaxihcanihqui. ⁴Jan joribiyaxihqui jan yohini cahran? Noquen xenibo mahuaní tian ta rahma caman jatihibi jascabi jaiqui, Diosen jato jonijani quescapahbo, hih ta jayaxihcanihqui. ⁵Nea hen mato yohixihqui ta honancatsihyamacanicu. Jahuen join ta Papan najjanishqui, neateman bi res. Jahuen join rihbi maijaquin, jene chicho quehax cainnon, jene naponbi sca mai janon maijaquin. ⁶Jahuen join rihbi ta jene mai mahpomanihqui, jaatian jihuetaibo mahuanon. ⁷Jaa join rihbi

ta rahma caman jai naiyahpa mai manamahiqui jato mapojayanoxon. Casticanquin jan nincayosmabo queyobahinyaxihqui neten caman ta naiyahpa mai manamahiqui.

⁸ Nea shinanbehnoyamanahue, heen huetsabaan. Huesti nete ta huesti mil bari quesca rihbi qui, Papan jisí. Huesti mil bari rihbi huesti nete quesca. ⁹ Jan yohini quescabijaquin ta noquen Hihbaan chiquishbochi bi hahyamahiqui, chiquishbochi bi hahcai caibaan shinanai bi. Matohon shinanih bi ta joriyamahihqui. Tsoabi queyotima bi ta non jatihixonbi noquen shinan ponteti jaa queenihqui.

¹⁰ Yometso sanareneni jahuicamareneni ta histon res jaa joti nete nocoyaxihqui. Jaatian ta nai coshin corotax queyocahinyaxihqui. Nai naman mehabo rihbi mapohi queyocahini. Jonibaan teeboyabi mai mapohi queyocahini.

¹¹ ¿Jaabo jatihibi queyotihi honanxon man siri jihueta shinanyamahin? ¿Papa shinani jihuetai siribo man jatimahin? ¹² Papan tiromajati nete nocotaiya ta naiho mapojaha queyocahinyaxihqui. Maiboya jenebo rihbi mapohi cohincahini. Jaa nete noconon mananahue. Jaa joti manati jihuenahue. ¹³ Jan yohini quescabijaquin tah non nai behna sca bihyaxihqui, mai behna rihbi sca bihquin, jano tsoabi tiroma yamascai. Jaa tah non manatai.

¹⁴ Jaa manahannan sca rishtajoma siripi jihuetaiho jan mato merahi jonon, jascari jihueti hihti shinannahue, hea huetsabaan. ¹⁵ Jahuerohahi ta noquen Hihbo joriyamahiqui, hea hihbohue hah non janon, hihnahue. Hahan non queenai noquen huetsa Pablonen rihbi ta jascajaquin mato qui joi raannishqui, Papan shinan hinanah. ¹⁶ Raannoxon huishaxon tihibi ta jascajaquin jaan yohihiqui. Jan yohihi ta caibo joi histon honantima qui. Shinanjomabaan ta jaa huisha jisxon bi honanyamaxon jaamajaquin yohihiqui. Texe Papan huishamani joibo jascajaribiquin. Jaa copi ta Papan jato queyoyaxihqui.

¹⁷ Hen yohihah tah man honanscai, heen huetsabaan. Coiramescanahue, jaamajaquin tiromabaan mato paranah man Cristo joi bihquin bi jenebahin jenebahinmis. ¹⁸ Jascapahxonma bi noquen Hihbaan shinanya hichajabonanahue. Jaa noque teehihmanica Jesucristo hashoan sca honanbonaquin. Jaa ta Nete Hihbo qui hihnahue, rahma, jascabihi sca jascari. Jascari rahan.

1 JUAN Juaman raanni joi

Hahan jihueti joi

¹ Jihuemanican joi mato yohinoxon tah non nea joi huishahi. Jihuemanicah ta janishqui, naiyahpa mai sca jamenonon. Jan jahuex yohuanai sca tah non nincanishqui. Noquen beron rihbi jaa jisquin. Jan hahcaibo noquenbi jisquin. Noquen mequeman rihbi jaa mehequin. ² Jaa jihuemanicah tah non jisniqui. Jisnixon tah non mato yohicoinei. Noquen jihuemanicah ta noquen Papa betan hihquish bi noque janin sca yorayahpa picoti jonishqui. Jaa tah non jisniqui, queyoyamanox jihuemanicah. Mato tah hen yohicoinscai. ³ Jaan hahnibo jisnixon mato yohicoinxon tah non jaan yohihah non nincani joibo rihbi mato yohicoinei. Man noque betan yohuani jihuenon hihxon tah non yohihi. Noquen Papa betan yohuani tah non jihuecoinei, jahuen baque Jesucristo betan rihbi. ⁴ Shinanquin sirijahax hihti jenimanoxon tah non huishaquin mato yohihi.

Noquen Papa Xaba Hihbo

⁵ Criston ta noque yohinishqui, noquen sca jaa joi rihbi yohinon hihxon. Jaa tah non mato yohihi. Noquen Papa ta Xaba Hihbo qui. Jaa janin ta yame yamahihqui. ⁶ Hahbetan tah non yohuani jihuetai hihanah bahquish chian jihuetahbax tah non quesa sca jai. Hihcoinyamahi jihuescai. ⁷ Noquen Papa hihqui quescari xaba chian nichish tah non hahbetan yohuani nihresscai. Jaatian ta jahuen jimi noque copi potanixon jahuen baque Jesusen noquen hohcha jatihibi sohuaxoniqui.

⁸ Heen hohcha ta yamahihqui hihquish tah non paramehscai. Noquen jointi janin jahuen joi yamahi. ⁹ Hohcha tah hen jai Papan hih non jaiya ta jaan noquen hohcha noque sohuaxoniqui. Ponte hihxon jan yohihi quescabijaquin noque sohuaxonquin. Noquen rishta jatihibi sohuaxonquin. ¹⁰ Papa ta quesa qui hihnicahax pari tah non Hen tah hen hohchayamanihqui hihti, noquen jointi janin jahuen joi yamahiya.

2

Cristo noquen yohuanxonnicah

¹ Man hohchayamanon hihxon tah hen nea huishaquin mato yohihi, heen baquebaan. Non hohchataiya bi ta noquen Papa janin noque yohuanxonnicah jaiqui. Jesucristo ta jaa qui, hohchajoma joni. ² Jaabi hinamehquin ta noquen hohcha copijanishqui. Noquena huestima jatihibichina jaan copijaquin.

³ Jan noque yohihi quescabijanichahax tah non noquen Hihbo tah hen honanai hih non jathi. ⁴ Jaa tah hen honanai hihxon bi noquen Hihbaan yohihi quescajayamanicah ta quesa qui. Jahuen jointi janin ta Papan joi yamahihqui. ⁵ Noquen Hihbaan noque yohihi quescabijaquin hahcaibo ta noquen Papahon shinanxonnicah qui. Jasca coin tah qui. Jascajaquin tah non non hahbetan hihqui non honanai. ⁶ Hahbetan tah hen hihqui hihquish tah non jaa jihuetai hihni quescarihbiti jai.

Joi behna

⁷ Nea hen mato yohihi tah hen mato yohimenoyamahi, heen huetsabaan. Mato yohini joi tah hen mato yohirihbihi, mato nincamamenoquin non mato yohini joibi. Man nincapahoni joi tah qui, man hahnon hihxon non rahma huishahi. ⁸ Jaabi ta behna qui, huishaquin hen mato yohihi. Criston raanai joi behna tah qui, maton rihbi man nincacoinscai joi. Bahquishihyama sca ta jatihiqui. Xaba coin ta paquescaiqui.

⁹ Xabapan tah hen jihuetai hihxon bi jaton huetsa jistahihmahibo ta bahquish chian jihuethiqui. ¹⁰ Jaton huetsahon shinanaibo ta xabapan jihuethiqui. Jaa xabapan nichibo ta jahuabi hohcha yamahihqui. ¹¹ Jaton huetsa jistahihmahibo ta bahquish chian jihuethiqui. Yame chian nichu. Jano jaabo cahi honanyamahibo, yamepan jaton bero jistimjabahinah.

¹² Huishaxon tah hen mato yohihi, baquebon, noquen Hihbaan maton hohcha sohuascaibo. ¹³ Huishaxon tah hen mato yohihi, papabon, noquen Hihbo man honanai quen. Jahuabi jariyamanon ta jaa janishqui. Huishaxon tah hen mato yohihi, beronanbon, troma yoshin man camahi quen.

Huishaxon tah hen mato yohihahqui, baquebon, noquen Papa man honanscai quen. ¹⁴ Huishaxon tah hen mato yohihahqui, papabon, jahuabi jariyamanon bi janí noquen Hihbo man honanai quen. Huishaxon tah hen mato yohihahqui, beronanbon, man

coshiscái copi. Papan joi rihbi maton jointi janin jai quen. Tiroma yoshin rihbi man camahi.

¹⁵ Nea mai queenyamanahue. Nea mai mehabo rihbi queenyamanahue. Nea mai queenaibo ta noquen Papahon queenyamahihqui. ¹⁶ Nea mai meha shinanbo ta Papanahma rahsi qui. Mai mehabaan costanai quescajati, jahuabora jixxon bihti sca, jahuabora hichahax shinanya hihqui shinanti, jascapa shinanbo ta Papanahma bi nea mai mehabo qui. ¹⁷ Nea mai ta queyocahinyaxihqui, jahuen queenboyabi. Jascapa yamacahinyaxihqui bi ta noquen Papa queenai quescajahibo queyoyamanox manatihiqui.

Paramehtaibo betan hihcoinaibo

¹⁸ Noquen Hihbo joti nete ta jaonahiqui, baquebon. Criston sinatah ta jahuiqui yohihibo tah man nincaniqui. Moa ta jahuen sinatahbo hicha nocohihnascaiqui. Jaa copi ta nete queyoti nea pishcascaiqui non honanai. ¹⁹ Noque janinhax ta bocannishqui noquen huetsabomahax. Noquen huetsabohax ta banequehancannishqui. Noquen huetsaboma rahsihax ta bocannishqui, jascapahbo non honannon.

²⁰ Jaabo jascapahbo bi ta noquen Hihbaan mato caisnishqui. Jahuen yoshin siri rihbi mato hinnanquin. Jatihibichin tah man honanai. ²¹ Papan joi man honanyamahi copima bi man honanscaiya tah hen huishaxon mato yohihi. Quesa joi ta Papanahma qui. Jaa tah man honanrihbibi.

²² Jesus ta Papan caisai jonima qui hihnica ta quesa bi res qui. Jascapah ta Criston sinatah qui. Jaa ta noquen Papama qui, jaa ta jahuen baquema qui, hih ta jahuen rahui jaiqui.

²³ Jesus ta Papan baquema qui hihnicabo ta Papanahma rahsi qui. Jesus ta Papan baque qui hihnica ta Papan baque rihbi qui.

²⁴ Man nincamenoni joi jascabijaquin bihnahue. Jaa joi maton jointi janin jascabihi jaiya tah man jascabihi Papan baque betan jihueti, Papa betan rihbi jascabihi jihueti. ²⁵ Jaan ta noque yohinishqui, non queyoyamanox jihueyaxihnon.

²⁶ Mato parancatsihqui boya ta hen jascajaquin huishahi. ²⁷ Hen mato yohihibo tah man honansaax tsoanbi mato honanmati pishinyamahi. Jahuen Yoshin siri maton jointi janin hihquinish janobi jaiya tah man honanscai. Jahuen siri yoshiman sca ta mato jatihibi honanmahiqui. Jaa ta hihcoiniqui, quesayamahi. Jaan mato honanmani quescasca jascabihi noquen Hihbo betan janahue.

²⁸ Jascabihi sca hahbetan janahue, baquebon. Jaatian ta jan cainquihranscaiya non shinanquin sirijascatihi. Jaa joresscaiya tah non jaa bebon nichish hihtimahpax jahómaho rabejaquetimahi. ²⁹ Ponte jan hihqui honanxon pontejaquin hahcaibo jatihibi jahuen baquebo hihqui honanrihbinahue.

3

Papan baquebo

¹ Noquehon hihti queenxon ta Papan noque Heen baquebaan hahqui. Jaa coin tah non qui. Noquen Papa honanyamaxon copi ta noque rihbi honanyamacaniqui, Papanahmabaan. ² Rahma tah non Papan baquebo qui, heen huetsabaan. ¿Jenquetsahpabo non jayaxihquin? Noque ta yohiyamaparihiqui. Jaa honanyamaxon bi tah non nea honanai: noque qui jaa cainquihranaiya tah non jaa hihqui quescarihbibi noque jatihi. Jan rahma hihqui quescapahbi tah non jaa jisyaxihqui. Jaa copi tah non honanai. ³ Jaa jopahinon hih non jaibo jatihibi tah non hinamehtax coirametai, Papanah rahsi, jaa hihqui quescari.

⁴ Hohcharesaibo jatihibi ta noquen nincati joi nincayosmabo qui. Hohchati ta nincayamati qui, jasca rabe. ⁵ Noquen hohcha queyohi ta Cristo jonishqui. Jaa tah non honanai. Jahuen hohcha ta yama bi res qui. ⁶ Hahbetan jihuetai bo ta hohchati jihueyamahihqui. Jatihibi hohchataibaan ta jaa jisyamanishqui. Jaa honanyamarihbiquin. ⁷ Mato tsoabi paranmayamanahue, heen baquebaan. Pontejaquin hahcai joni ta ponte joni qui, noquen Hihbo ponte hihqui quescarihbibi. ⁸ Hohchati jihuetai bo jatihibi ta tiroma yoshimana qui. Jaa tiroma yoshin ta hohchamenonish, jascabihi hohchatihqui. Tiroma yoshiman hahcai jatihibi queyohi ta Papan baque jonishqui.

⁹ Papan jonijahibo jatihibi ta hohchati jihueyamahihqui, hahan jihueti Papan hinanah. Behnajaquin Papan jonijaha tah non tiromati shinani jihueyamascai. ¹⁰ Pontema jihuetai bo ta Papan baqueboma qui. Noquen huetsahon shinanyamahibo jahuen baqueboma rihbi. Jaa joi honanxon tah non Papan baquebo honanscai. Tiroma yoshiman baquebo honanrihbiquin.

Joni huetsahon shinanti

¹¹ Noquen huetsabohon tah non shinantihi. Joi siri nincamenonquin tah man jaa joi rihbi nincaniqui. ¹² Caiman hahni quescajatima tah non noque jai. Tiroma yoshiman

baquexon ta jaan jahuen huetsa rehtenishqui. Jahuen huetsa siri hihqui bi ta jaabi tiromaxon jahuen huetsabi rehtenishqui.

¹³ Nincayosmabaan mato jistahihmahah bi rahteyamanahue, heen huetsabaan. ¹⁴ Noquen huetsabohon shinanaiboxon tah non noque mahuayaxihquiibo hihnish bi jihueyaxihquiibo sca non jai non honanai. Noquen huetsahon shinanyamahibo ta mahuayaxihquiibo jaiqui. ¹⁵ Jatoh huetsa jistahihmahibo ta joni rehtemisbo qui. Rehtemisbo ta queyonox manatihqui. Jaa tah man honanscai. ¹⁶ Noque jihuenon hihxon ta noquen Hihbaan hahri jato rehtemanishqui, noque paxajahi. Jaan noque jascjaxoni honanxon tah non joni huetsahon shinanti honanrihbiscai. Jihuetahbo hihxon tah non noquen rihbi noquen huetsabo paxajati sca jai, nincayosmabaan noque rehtehi que bi. ¹⁷ ¿Jahuaborayahpaxon bi noquen huetsa pishinai jisxon bi non yanapanyamahiya cahran? Jascapahbaan ta noquen Papahon shinanyamahiqui. ¹⁸ Join res tah non noquen huetsahon shinantimahi, janan res hahxonti yohiquin. Hahcoinquin jato hahxonahue, heen baquebaan, shinanconxon.

Papa bebon mehax hihtimahtima

¹⁹ Noquen huetsabo hahxoncoinnicaxon tah non Papan baque coin non jai non honantih. Noquen hohcha jai noquen jointinin honanxon bi tah non noquen Papa yocacatsihxon non masa shinantimahi. ²⁰ Jahuen baque coin non jai honanxon tah non sirijaquin sca shinantih. ²¹ Jaan sohuaxona noquen hohcha yamascai noquen jointinin honanax tah non noquen Papa yocati qui hihtimahyama sca jai, heen huetsabaan. ²² Jahua copi hihtimahtima sca jaxon, jan noque yohihi quescabiyaquin hahxon, jaa queenai quescajaquin hahxon non yocacah ta noque yocacaiibo jaan noque hinanscai. ²³ Noque ta nincacointi yohihiqui, jahuen baque Jesucristo non nincacoinnon, jan noque yohini quescajaquin non noquen huetsahon shinannon. ²⁴ Jan noque yohini quescajaquin hahcaibo jatihibi ta hahbetan hihquiqui, jaa rihbi jato betan hihqui. Jan noque hinanni jahuen yoshin noque betan hihqui copi tah non noquen Hihbo rihbi noque betan hihqui non honanai.

4

Dios Yoshin siri betan Papan rahui yoshin

¹ Dios Yoshiman ta hea shinanmahaxqui hihquish yohuanaibo bi hihcoinaibo rahsihi shinanyamanahue, heen huetsabaan. Dios Yoshiman jato shinanmahaxquin hihxon jato honanquin sirijanahue. Tiroma Yoshiman shinanmaha yohuanaibo ta hicha jaiqui, jaan raanah. ² Jesus ta Papan raanni joni qui, yorayahpahax ta joresscansishqui hihnica ta Dios Yoshiman shinanmaha yohuanihqui. Jaa yohuan ta hahan yoshin honanti qui. ³ Jesus ta jaama qui hihnica ta Dios Yoshiman shinanmahama bi huetsa yoshiman shinanmaha yohuanihqui. Jascapa yoshin ta Criston sinatah qui. Criston sinatah ta jahuiqui chanihibo tah man ninca sca janiqui. Nocotax ta nihniscaiqui.

⁴ Mato tah man Papanah qui, heen baquebaan. Tiroma yoshiman shinanmaha yohuanaibo tah man honanai, mato paranpanan. Nincayosmabo betan hihqui yoshin coshihi bi ta mato betan hihqui Dios Yoshin hashoan hihti coshi qui. ⁵ Jaabo ta tiroma yoshimana qui. Jaa copi ta tiroma yoshiman shinanmaha yohuancaniqui. Jaabo yohuanaiya ta tiroma yoshiman jonixon jato nincarihbihihqui. ⁶ Noque tah non Papan baquebo qui. Noquen Papa honanaibaan ta noque nincacoihqui non yohuanai. Papanahmabaan ta noque nincayamahihqui. Tsoa nincacoihquin hihxon tah non jato honanscai, caibo cahen Dios Yoshinyahpabo, caibo cahen tiroma yoshinyahpabo.

Noquen Papa noquehon hihti queeni

⁷ Noquen huetsabohon shinannahue, heen huetsabaan. Jascapa shinan ta Papan hinana shinan qui. Noquen huetsabohon shinanaibo ta Papan baquebo qui. Jascapahbo ta noquen Papa honanaibo qui. ⁸ Noquen huetsabohon shinanyamahibaan ta noquen Papa honanyamahibiresihqui. Noquen Papa ta jonihon shinanti hihbo qui. ⁹ Non jaa copi jihuenon hihxon ta jahuen baque jaa huesti Papan raannishqui, yorayahpahax jonon. Jaa raanquin ta jan noquehon shinanai noque honanmanishqui. ¹⁰ Noquen Papahon tah non hihti shinanyamahi. Jaan caya ta noquehon hihti shinanihqui. Noquehon hihti shinanxon ta jahuen baque raannishqui, noquen hohcha copi mahuati jonon. Jan jascajaquin shinanni ta shinan coin qui.

¹¹ Jascajaquin jan noquehon shinanni quen tah non noquen rihbi shinanhahnantih, heen huetsabaan. ¹² Tsoanbi ta noquen Papa jisyananishqui. Non shinanhahnanaia ta noque betanbi noquen Papa hihquiqui. Non sirijaquin noquen huetsahon shinannon ta noque hicha bi res hinanihqui. ¹³ Hahbetan tah non hihqui, jaa rihbi noque betan hihqui. Jahuen Yoshin jan noque hinanni quen tah non jan noque betan hihqui non honanai. ¹⁴ Nai

naman jihuetaibo teehihmanica hihnon hihxon ta jahuen baque Papan raannishqui. Jaa jisnixon tah non yohicoinscai. ¹⁵ Jesus ta Papan baque qui hihnicah ta hahbetan noquen Papa hihquiqui, jaa rihbi noquen Papa betan hihqui.

¹⁶ Noquen Papan noquehon shinanai tah non honanai, shinancoinquin. Noquen Papa ta huetsahon shinanti shinan hihbo qui. Jatón huetsahon shinani jihuetaibo ta Papa betan hihquibo qui, Papa rihbi jato betan hihqui. ¹⁷ Noquen huetsahon shinanti shinan hicha hinanah tah non jointi siriyaxihqui, hohchayahpabo casticani noquen Hihbo jahuiya. Jaa hihqui quescarax tah non jaa bebon mehax sca jointi siriyaxihqui. ¹⁸ Noquen huetsabohon shinanax tah non raquetimascai. Noquen huetsabohon shinanquin sirijaquin tah non raque potahi. Noque casticanyaxihqui shinanax tah non raquetihi. Jascari raquetaibo ta joni huetsahon shinanxon hahxonti pishinihqui.

¹⁹ Noquen Papan noquehon shinanni quen tah non noquen sca jahan shinanrihbiscai. ²⁰ Heen Papahon tah hen shinanai hihxon bi noquen huetsa jistahihmahihquish tah non quesa sca jai. Non jisi noquen huetsahon shinanyamanicaxon tah non non jisyamahi noquen Papahon non shinantimarihbihi. ²¹ Noque ta yohinishqui, Papahon shinanaibaan non noquen huetsahon shinannon.

5

Mai mehabaan noque hihbojati hahtipahyamahi

¹ Jesus ta Papan raanni joni qui. Jaa jai nincacoinaibo jatihibi ta Papan baquebo qui. Jahuen Papahon shinanaibaan ta jahuen baquehon shinanrihbihiqui. ² Papahon shinanxon jan noque yohini quescajaquin hahxon tah non jahuen baquebohon non shinanai non honanrihbihii. ³ Papahon shinanquin tah non jan yohihi quescabijaquin hahtihii. Jan noque yohihi ta teema qui. ⁴ Papan baquebo jatihibi ta tiroma yoshin hihbocasihqui bi hahtipahyamahiqui. Noquen Papa non nincacoinaiya ta noque hihbojacasquimahihqui. Noque hihbojacasquimahiton tah non jahuen yohuan bichinai. ⁵ Jesus noquen Papan baque jai non honancoinai copi ta noque hihboti tiroma yoshiman hahtipahyamahiqui.

Hahan Papan baque honanti

⁶ Jesucristo ta jeneya jimin jonishqui. Jenen res ma. Jenen, jimin rihbi. Jaa copi tah non tsoa Jesus quin hihxon honanai. Dios Yoshiman rihbi ta noque yohihihqui, hihcoinnicaxon. ⁷ Hahan Jesus honanti ta quimisha qui. ⁸ Jahuen Yoshin, jahuen jene, jahuen jimi. Jaa quimisha jatihibichin ta hahan jaa honanti qui. ⁹ Jonibaan yohihah nincaxon tah non noquen Papan noque yohihah hashoan rihbi non nincatihii. Jahuen baque non honannon hihxon ta noque yohicoinnishqui, jaa ta heen baque qui hahquin. ¹⁰ Papan baque nincacoinxon tah non noquen jointinin honancoinscai, Dios Yoshiman honanmahah. Noquen Papa nincayamahi joni ta Quesa ta jaiqui hihquiqui, noquen Papa yohihi. Jahuen baque non honannon Papan yohihah bi nincayamaxon paranai shinanquin. ¹¹ Papan ta yohicoinihqui, jan noque queyoyamanox jihuemahi non honannon hihxon. Jahuen baquen noque jihuemahi non honannon hihxon noque yohicoinquin. ¹² Jahuen baque bichish tah non queyoyamascanox manatai. Jahuen baque bihyamahax tah non queyonox manatai.

Quirica queyonoxon jan yohihi

¹³ Maton tah man jahuen baque nincacoinscái. Man queyoyama sca janox manascái man honannon hihxon tah hen mato yohihi.

¹⁴ Noquen Papa nonanscaax tah non jaa yocati qui hihtimahyamahi. Jaa queenai quescapahbo non yocacah ta noque nincacuihqui. Non tah non honanai. ¹⁵ Non yocacai tihibi jaan nincacai honanxon tah non non yocacabo non bihtihii non honanrihbihii.

¹⁶ Hahan mahuatima que bi noquen huetsa hohchatai meraxon tah non Papa yocaxonquin jaa joni jihuematihii. Hahan mahuatima hohchataibo yocaxonquin jato jihuemaquin. Hahan mahuatima hohcha ta jaribihiqui. Man jascapa yocaxonti tah hen yohiyamahi. ¹⁷ Jatihibi tiroma ta hohcha qui. Hihcax bi hahan mahuatima hohcha jai.

¹⁸ Papan behnajaquin jonijahibo ta hohcha hohchayamahihqui, Papan baquen jato coiranah. Tiroma yoshiman ta jato mehetimascaiqui. Non tah non honanai. ¹⁹ Papan baquebo noque jai tah non honanscai. Nai naman mehabo ta tiroma yoshiman hihbojahi qui.

²⁰ Noquen Papa coin non honannon ta jahuen baque jonishqui, shinan noque hinani. Jaa noquen quiquin Papa betan tah non hihqui. Jahuen baque Jesucristo betan rihbi tah non hihqui. Non tah non honanai. Noquen Papa ta Dios coin qui. Jaan jihuemaha tah non queyoyamanox manascái. ²¹ Santobo qui coiramenahue, heen baquebaan.

2 JUAN

Juaman raanni joi, jahuen rabe sca

Noquen huetsahon shinanaibo

¹ Pastoro hihxon tah hen mato qui nea quirica raanai, Papan caisai baquebon. Maton baquebo rihbi qui tah hen nea hahxonai. Matohon tah hen shinancoinai. Hea huestichinma bi Papan joi honanaibo rahsichin ta matohon shinancoiniqui. ² Papan joi coin ta noque betan hihquish jascabihi sca noque betan hiyahixhiqui. Jaa copi tah non matohon hihti shinanai. ³ Papan ta noque jahuen shinan hinantihiqui. Noquen jointi rihbi ta sirijabahintihiqui, noquehon shinanxon. Jahuen joi jan yohini quescabijaquin ta noquehon shinaniqui. Jahuen baque Jesucristo betan ta Papan noque jascaxontihiqui.

⁴ Papan noque yohihi quescabihi caibo maton baquebo jihuetaiton merahax tah hen hihti jenimahi. Papan noque yohini quescabija ta jacaniqui. ⁵ Mato tah hen yohiscai, hea huetsabon. Joi behna mato yohiquin hahcaxonma bi tah hen non nincamenoni joibi hen mato yohihi: Noquen huetsahon shinannahue. ⁶ Noquen Hihbaan noque yohini quescabijaquin hahnicahboxon tah non joni huetsahon shinanscai. Man nincamenoni quescabihi ta jan noque yohini joi qui, non joni huetsahon shinani jihuenon.

Parannicabo

⁷ Hicha paranmisbo ta nihresscaiqui. Jaabo ta Jesucristo ta yorayahpahax jonishqui hihamahiqui. Jascapahbo ta paranmis qui, Criston sinatahbo. ⁸ Coiramenahue. Maton tee man yohyomis. Jaa yohyoxonma bi noquen Hihbaan mato hinanyaxhiqui jatihibi bihyanoxon coiramenahue.

⁹ Criston noque honanmani joiya banexonma bi jaa potabahini caresaibo ta noquen Papajomabo qui. Criston honanmani joiya banetaibo ta noquen Papayahpabo qui, jahuen baqueyahpabo rihbi ta jaabo qui. ¹⁰ Mato qui nocoxon bi jaa joi yohiyamahibo maton xoboho mapemayamanahue. Jascapahbo metsonyamarihbiquin. ¹¹ Jascapahbo metsonxon tah non tiromajati yanapanai.

Jahuen quirica queyonoxon jan yohihi

¹² Hicha hen mato huishaxon yohiti jai bi tah hen quirica raanxon yohiti queenyamahi. Mato qui nocoti caxon mato yohuanquihnxon yohiti tah hen queenai. Jaatian tah hen jenimacointihi.

¹³ Papan caisai maton huetsabaan ta nenoxon mato man jascabi jayamahin, noque huetsabaan, hahquiqui.

3 JUAN

Juaman raanni joi, jahuen quimisha sca

Gayo qui jan siripi yohuanai

¹ Pastoro hihxon tah hen mihqui nea joi raanai, heen huetsa Gayon. Mihon tah hen shinancoinai.

² Min siripi jihuenon tah hen mihqui yocaxonai, heen huetsan. Min hisinyamanon tah hen yocarihbihi, miin shinan coshiscai quescarihbihi miin yora jascarihbinon. ³ Neno no-coxon ta noquen huetsabaan hea yohirahsihiqui. Min jihuecoinxon sirijaquin shinanxon hahcai hea yohiquin. Papan joi min nincacoinai hea yohicanquin. Jaa nincacax tah hen hihti jenimahipiqui. ⁴ Papan joi heen baquebaan nincacoinai honanax tah hen hihti jenimahi, heen jointiboyabi hihti jenimahi.

⁵ Noquen huetsabo mihqui nocotaiya min jato yanapana ta hihti siri qui, heen huetsan. Min jijnima noquen huetsabo rihbi mihqui nocotaiya yanapana ta siri qui. Jascajacoin tah min jai. ⁶ Min jatohon shinanai ta neno joxon noquen huetsabo rihbi yohihipicanaxqui. Jascapahbo mihqui nocorihbihiya jaya cati sca jato hinanrohayahnhue, noquen Papa hahxonaibo copi. ⁷ Criston joi yohihi ta bocaniqui. Nincayosmabaan hinanah bi jahuabi bichintima ta shinancaniqui. ⁸ Jaa copi tah non jato hinanti jai, hahbe yohinicabonoxon.

Diótfefes tiromahi jihuetai

⁹ Papahon shinani jano tsinquitaibo qui tah hen quirica raanhohqui. Hen raanhoh bi ta Diótfefes jato tocan yohuan hihbocatsihxon jato nincamayamahiqui. ¹⁰ Jaa copi tah hen jano caxon jan tiromahi hean shinanyaxihqui. Jan hehqui tiroma bi res yohuan yohuanai tah hen jaa shinanmayaxihqui. Tiromahi yohuanax bi ta yohuanti res queenyamahihqui. Noquen huetsabo jano nocotaiibo bi ta jato mapemayamahiqui, janohahbo jaanbi Mape-mayamanahue hahxon. Tsinguihnataiboma qui ta jato camahihqui.

¹¹ Tiromabo jai quescayamahue, heen huetsan. Sirijaquin shinanax jihuehue. Sirijaquin shinanxon hahcaibo ta Papan baquebo qui. Tiromajaquin shinanxon hahcaibaan ta noquen Papa jisyamanishqui.

Demetrio siripi jihuetai

¹² Demetrio qui ta jatihibi siripi yohuanihqui. Jan Papan joiya hihqui ta honantihbiresi qui. Hea rihbi tah hen hahqui siripi yohuanai. Hen yohuani hihcoinai tah min honanrih-bihi.

Hahan quirica queyoti

¹³ Hicha mia yohiti shinanax bi tah hen quirica huishaxon yohiti queenyamahi. ¹⁴ Mia jisi tah hen histon cacatsihqui. Jaatian tah hen mihbetan yohuantihi.

¹⁵ Min jointi siripax jihuenon tah hen Papa yocacai. Nenoha noquen huetsabaan ta mihqui joi raaniqui, min jascabihi jayamahin noquen huetsan hahquin. Janoha noquen huetsabo jascajaquin rihbi yohixonhue jatihibi.

JUDAS

Judasen huishani joi

Papan caisaibo qui Judasen joi raanai

¹ Jesucriston joni hihxon tah hen hea Judasen nea joi huishaxon mato qui raanai, noque huetsabaan. Santiagonen huetsa hihxon tah hen mato qui raanai. Noquen Papa matohon hihti queenaibo tah man qui, Jesucristonen quenaxon bexojahabo tah man qui, jahuenah sca. ² Matohon shinanxon Papan mato yanapannon, jahuen shinan siri jan mato hicha hinannon, jan matohon hihti siribojaxonnon, hih tah hen jai.

Quesajaquin yohihibo (2 P 2.1-17)

³ Noquen Hihbaan noque jihuemahi jenquetsahpaquin hihxon mato qui huishati shinrahsihixon bi tah hen huetsa joi man hashoan pishinaiyi jaa huetsa joi huishati hen shinanscai, heen huetsabaan. Jaa copi tah hen mato hihti yohihi, hahan jihueti joi Papan noque huestijaquin yohihah bihxon tenexon tsoabi mato paranmayamanahue, heen huetsabaan. ⁴ Caibo ta nincayosmahax bi noquen huetsahihcamahax mato tocan hihquiqui. Jan jato tiromajayaxihqui ta neateman Papan huishanishqui. Noquen hohcha sohuaxon ta Papan noque casticanyamascatihqui, hohchati hihresnonhue hih ta jacanihqui, Papan shinanjomahax. Jascajaquin ta Papan joi huetsajacanihqui. Jascajaquin rihbi ta noquen Hihbo Jesucristo potacaniqui, jaa huesti noquen Hihbo que bi.

⁵ Hen mato yohihi jatihibi man sirijaquin honanpahonih bi tah hen behnajaquin sca mato shinamacatsihqui. Egipto mai janin jaibo ta jascapahbo qui. Namaquen hohchataibo jisish ta jascacatsi sca jaax jaton yora qui bi sca hohchacaniqui. Tsoabi nincacatsiyamahax ta xabayahpabo qui tiromahi yohuanrihbcaniqui. ⁹ Papan quiquin yonoti Miguel ta coshixax bi jascayamanishqui. Moisesnin yora Satanasnen bichincatsihquiya ta hahbetan join hihquinannanxon Satanas hichayamanishqui. Heen Hihbaan mia netemanon hahresquin. ¹⁰ Mato tocan jaibo ta jascayama qui. Jaabaan honanyamahibo ta hichacaniqui. Shinanjoma yohinahboxon hahcajaquin jaibo copi ta Papan jato hihti tiromajayaxihquiqui.

⁸ Hen yohihah mato janin jaibo ta jascapahbo qui. Namaquen hohchataibo jisish ta jascacatsi sca jaax jaton yora qui bi sca hohchacaniqui. Tsoabi nincacatsiyamahax ta xabayahpabo qui tiromahi yohuanrihbcaniqui. ⁹ Papan quiquin yonoti Miguel ta coshixax bi jascayamanishqui. Moisesnin yora Satanasnen bichincatsihquiya ta hahbetan join hihquinannanxon Satanas hichayamanishqui. Heen Hihbaan mia netemanon hahresquin. ¹⁰ Mato tocan jaibo ta jascayama qui. Jaabaan honanyamahibo ta hichacaniqui. Shinanjoma yohinahboxon hahcajaquin jaibo copi ta Papan jato hihti tiromajayaxihquiqui.

¹¹ Caiman hahní quescapahboja ta jacanihqui, Papan hihti cascantibo sca, Balaaman hahní quescajaquin rihbi ta coriqui queenyoraxon Papan jonibo hohchamacaniqui. Coré hihní quesca ta nincayosmabohax queyocahinyaxihcanihqui. ¹² Man pinoxon tsinquitaiya ta rabinxonma mato betanbi picanihqui, hahan masati sca mato tocan janon. Jaton yora res ta jiscanihqui, caibo hahxonquinma. Hoijoma nai cohin quescapahbo ta jaabo qui, nihuen hueranah caresi. Bimiti tian bimiyosma jihuibo quescapahbo tah qui. Jihui xanascái, mexabahinah quescapahbo, jabiyahpa mahuanicabo. ¹³ Jaabo ta nihuen potaquehah hian behchonax baxox potohahtanai quescapahbo qui, jaton hahqui rabinti shinanbo potohi. Huishi paquetai quescapahbo tah qui. Jascabi sca bahquish chian baneti cahi.

¹⁴ Adaman chini xohtabo toponah, jahuen siete ta Enoc qui. Jaan ta jascapa tiromabo jayaxihqui yohinishqui, nescajaquin: Jise. Non topontimahi jahuen yonotiboya ta noquen Hihbo jahuiqui. ¹⁵ Jatihibi casticani joxon ta nincayosmabo jatihibi jaan yohihihqui, nincayamaxon jaabaan tiromajapahoni jatihibi jato cahepaquequin. Hahqui tiromahi yohuanpahonihbo joi jatihibi ta jato cahepaquehahqui, hihqui. ¹⁶ Reren rereni yohuanaibo tah qui, jahua pishca costanyamahax sinati tiromahi yohuanaibo, mai mehabaan costanai quescacatsihquibo coshi pari pahichax yohuani, paranxon coriqui bichinonxon pari noque sirijaquin yohuanquihnquin.

Nincacaibo jan hihti yohihi

¹⁷ Noquen Hihbo Jesucriston raantibaan yohini joibo shinanbehnoyamanahue, heen huetsabaan. ¹⁸ Nete queyoti hochoma ta hosanaibo jayaxihquiqui. Papan costanyamahi shinanbo qui ta hinamehyaxihcanihqui, tiromati queenyorascaí. ¹⁹ Huetsa joibo yohixon

ta mato shinan mitisahmacaniqui. Mai meha shinanyahpabo tah qui, Papan yoshin siri jaton jointi janin yamahi.

²⁰ Mato tah man jascatimahi, noque huetsabo coshijanahue, hashoan sca noquen Hihbo nincacoinahbo. Dios Yoshinyaxon noque huetsabo yocaxonnahue. ²¹ Papa Dios queenai quesca jihuenahue, matohon queenai quescajaquin jan mato hahxonnon. Noquen Hihbo Jesucristonen matohon shinanxon mato queyoyamanox manamahi jonon caman manahue.

²² Rabe shinanyabo yanapannahue, shinancoinahbo. ²³ Caibo rihbi chihi quiha bihquin hahcajaquin hihti yohinahue, hohchapan jato queyomis hihxon. Caibo rihbi maposcaiton raquexon chihima qui bihbohannahue. Rahninti rishta chopa potamaquin hahcajaquin jaton mai meha shinanbo potamanahue, mato qui mahnemis.

Noquen Hihbo jan yocascai

²⁴ Papan ta mato tenemati hahtipahiqui, man paqueyamanon. Rishtajoma jaa bebonbi man jahuen xabapan jenimahanan nihnon ta mato bexojati hahtipahiqui. ²⁵ Jaa huesti ta Papa Dios qui, noque jihuemanica. Noquen Hihbo Jesucristo betan ta noque jihuemahiqui. Jaa copi tah non Mia tah min xaba hihbo qui, Papan, non jai. Quiquin shinan hihbo tah min qui. Min hihbohi ta jatihibi qui. Min hihboyamahi yamahi. Mia huesti tah min noque yohinica qui. Nete jariyamahi bi tah min jascapa janíqui, rahma jascarihibi. Jascarihibi tah min queyoyamanox manatai hih tah non mia yohihi jai, Papan. Jascari rahan.

JAYAXIHQUIBO

Jayaxihquibo Juaman huishani

Jayaxihquibo Jesusen yohi yohihi

¹ Jahua janoxihquiquin noquen jonibo yohihue noquen Papa Diosen jaah ta Jesucristonen hea yohihpishqui. Jahuen yonoti hehqui raanxon ta hea yohihpishqui, hea Juan, jahuen joni. ² Papan joi jan hea yohihah tah hen huishaxon mato yohihi. Jismaxon jaan hea honanmahah tah hen Jesucriston joi mato yohisca.

³ Janoxihquibo ta neno pishca sca jaonahiqui. Jaa copi ta nea Papan quirica jisxon caibo sca nincamahax man hahan jenimati shinan jaresscai. Nea hen huishahi joibo nincaquin sirijahax ta mato nincacaibo rihbi jahan jenimati jaresscai qui.

Siete jemabo qui Juaman joi raanai

⁴ Asia mai janin jihuetai noquen huetsabo pari tah hen yohihi, jano siete jemabo jai janin jihuetaibo. Papa Dios ta rahma jihuetaiqui, neateman rihbi japahonish bi jascabihi jihuetai. Hahquirihbi ta jahuiqui. ¿Jahuen shinan siriya man jihueyamahin? ¿Jaan hahxonah man sirijaquin shinanyamahin? Jano jan tsahoxon yonohi bebonbi ta siete yoshinbo jaiqui, jahuen hahxonnicabo. Jaabaan rihbi ta nea quircayaxon man jascabi jayamahin mato jaiqui. ⁵ Jesucriston ta ponte yohinica qui, Papan joi noque nincamaxon ponte yohiquin. Jaa pari ta yamanicahax teehihribinishqui. Main jai quiquin hapobo jatihibi sca ta hihbojahiqui. Jaan ta noquehon shinaxon jahuen jimín noquen hohcha sohuaxoniqui. Hihboxon ta nea quirica huishamaxon mato yohihiqui, Man Papan shinanya jihueyamahin hahquin, Man siripi jihueyamahin hihxon. ⁶ Noquen hohcha sohuaxon ta noque jahuen jihuetaiho hihmahihqui, jahuen Papa Dios yocanicabo sca non janon. Hahxon tah min noque jai, Hihbon. Mia tah min Xaba Hihbo qui hahquin jascabijahi jihuenahue. Jascari rahan.

⁷ Jistahi man. Nai cohiman ta jahuiqui. Jatihixonbi ta jaa jis yaxihcanihqui. Jaa naconihbaan rihbi ta jis yaxihquiqui. Jatihibi mai mehabo ta hihti benatax huaohihyaxihquiqui. Jasca ta jayaxihquiqui. Jascari rahan.

⁸ Hea tah hen jatihibi Hihbo qui, jatihibi janon tah hen hean hihmahi, queyotahbo tah hen hean queyohi, hih ta noquen Hihbo Dios jaiqui. Jascabihi ta jaa jaiqui, rahma jai, neateman japahoni, joyaxihqui, jatihibi hihbo.

Cristo Xaba Hihbo Juaman jisi

⁹ Hea Juan tah hen maton huetsa hihxon, mato betan tenenica hihxon, mahbe jihuetai hihxon, mahbe Cristo tenexonnica hihquish, Patmos janeya mai tonco pishca janin tsahotai. Papan joi yohixon raquexonma Jesusen joi yohiquin sirijahiton ta nea main hea tsahoncannishqui. Tsoabi hen nincamayamascan hihxon ta hea neno sipo xoboho tsahoncannishqui. ¹⁰ Papahon shinani non tsinquitai neten ta Dios Yoshin siripan hea hihbojaha namaquen hahcajaquin hean nincaquikipiqui, hehchon coshin yohuanai hean nincaquin, corneta rehue coshin corotai quesca coshin yohuanai.

¹¹ —Min jisibo huishahue, siete jema janinhahbo qui jaa quirica raannoxon, Efeso, Esmirna, Pérgamo, Tiatira, Sardis, Filadelfia, Laodicea, jaa jemabo janinhahbo noquen huetsabo qui raannoxon huishahue —hahquin hea.

¹² Hea yohihi nincacax, tsoa yohuanihquin hihquish rabejaquexon jisí bi siete johue jai, oro johuebo, jaton oro tsahontibo janin tsahotai. ¹³ Jaa johue quetehi tocan cahen noquebaque quescapah nichí, tari chaiya, oro cinturon pextiman pishnexehtax jano nichí. ¹⁴ Jahuen mapo ta joxo bi res hihquishqui, carnero rani joxojaha hihqui quesca cahen jahuen boo joxo bi res joxo. Chihí perelihquicamahi jahuen bero. ¹⁵ Jahuen tahe cahen bronze quesca, pehneni. Chihín pehnejaha quesca. Jahuen joi cahen coshin yohuani, hani huaca coshin paquetihcamahi. ¹⁶ Jahuen mecayahe mequeman xecohah cahen siete huishi jai. Jan yohuanaiya cahen jahuen jana janinhax hoquen behcoín bi quenoya machito bahrítan bahrítani. Jahuen bemanan cahen xabati, bari coshin xabathicamahi.

¹⁷ Jascapa jisish tah hen jaa taracahrenenipiqui, mahuatax quescapi. Jahuen mecayahe mequeman hea mehaxon sca, hea yohiquin:

—Raqueyamahue. Jatihibi janon tah hen hean jananihqui. Queyónicabo queyonon tah hen heanbi jato queyohi. ¹⁸ Jihuenica tah hen qui. Hihquish bi hahquirihbi teehihquish tah hen queyoyamanox manascaí, jascabi sca jihuetai. Hea ta hen jatihibichin jato queyonica qui. Mahuataibo tah hen jano jascapahbo potaxon hean xehpohi. ¹⁹ Min jisibo huishascahúe. Rahma jaiboya jayaxihquibo hen mia jismahah huishahue. ²⁰ Nea min jisí heen mecayahe mequeman hen siete huishi xecohi tah hen mia yohiparihi. Nea

siete oro johuebo rihbi jahua quin tah hen mia yohiscái. Nea siete huishi ta siete yoshin qui, heen yonotibo, hoa siete jema janin jai noquen huetsabo coirannicah, jema tihibichina huesti. Nea siete johuebo ta tsinquitaibo qui, tsinquitaibo tihibichina huesti.

2

Efeso jema janin Juaman raanai joi

¹ Efeso jema janinha nincacoinaibo coirannicah qui raannoxon pari nescajaquin huishahue. Jahuén siete oro johue tocan nihnicahxon jahuen mecayaho mequeman siete huishi xecohiton ta mato yohihiqui. ² Jenquetsahpabo man jihuetain tah hen honanai. Jenques man tee teetain nonanxon tah hen jenquetsahaxon man tenehin honanrihbihi. Tiroma jonibo man hihquihinyamarihbihi tah hen honanai. Hea tah hen Papan raanti qui hihquish bi quesahibo tah man tanaxon jato honanscai. ³ Mato tiromajahahbo bi tah man heen joniboxon hea tenexonai. Yobacahinax tah man paxquinyamahi. ⁴ Man jascaxonai bi tah hen nea mato yohihi: man hehon queenmenoni quescayama sca tah man jai. ⁵ Paquerihyamahax man siripi jihuepahoni shinannahue, jascarihbinoxon. Pontejaquin sca shinanxon man hahmenoni quescajanahue. Man hahyamahiya tah hen histon mato qui nocoxon maton johue bichintihi, jahuen tsahonti janin yamascanon. Man pontejaquin shinanyamahiya tah hen mato jascajatíhi. ⁶ Jaabi tah man nicolaitobaan hahcai rahninai. Hean rihbi tah hen jascapahbo rahninai. ⁷ Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacoinnahue. Mai meha shinanyahpabo tenehax chitíhihyanahue. Man tenehiya tah hen Papan huai janin jai bimi mato pimatíhi. Hahan jihueti jihui quíha queyoyamanox mananon pítí tah hen mato pimatíhi.

Esmirna jema janin jan raanai

⁸ Esmirna jema janinha nincacoinnicabo coirannicah qui raannoxon sca nescajaquin huishahue. Jahuabi jaríyamahi bi janish jatíhibi queyotaiya janicah tah hen qui, hihquish bi hahquirihbi teehihnicahxon tah hen mato yohihi. ⁹ Mato tiromajahibo tah hen honanai. Man jahuabi yamahi tah hen honanrihbihi. Jahuaborajomabohax bi tah man hichayahpa qui. Hea tah hen judio qui hihquish bi quesahibo ta mato janin jaiqui, hehqui tiromahi yohuanaibo. Satanasnen tsinquitaibo ta jaabo qui, henamahbo. ¹⁰ Mato tiromajayaxihquibo qui raquyamanahue. Caibo ta tiroma yoshiman mato sipo xoboho tsahonyaxihquiqui, maton shinan jenquetsahpa hin honancatsihquin. Chonca neten tah man tiromabo teneyaxihqui. Mato rehtehibaan bi tenenahue. Man hea tenexonaiya tah hen mato hahan jihueti sca hinanyaxihqui, man queyoyamanox mananon. ¹¹ Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacoinnahue. Mainxon man Cristo tenexonaiya ta mato hahquirihbi mahuamatimahiqui. Quiquin mahuapan sca tiromabo hahquirihbi mahuamaquin bi ta mato hahquirihbi mahuamatimahiqui.

Pérgamo jema janin jan raanai

¹² Pérgamo jema janinha nincacoinaibo coirannicah qui raannoxon sca nescajaquin huishaxon yohihue: Hoquen behcoín bi quenoya machitoyahpaton ta mato yohihiqui. ¹³ Jano man jihuetai tah hen honanai. Janoxon ta Satanasnen jahuenahbo yonohihqui. Jascapa jano jai bi tah man tenexon hea jenebahinyamahi. Jano Satanas jihuetai bi heen joni Antipasnen jato heen joi sirijaquin yohihiton jaa rehtehibaan bi tah man heen joi jeneyamahi. ¹⁴ Man jascajaquin siríjahi bi tah hen nea costanyamahi: Balaaman haxemani quescajaquin haxemahibo ta mato tocan jaiqui. Balaaman ta Balac yohinishqui, israeli baquebo jan hohchamanon, yoshin rehtexona pítí pihábo, tsinibo rihbi jábo. ¹⁵ Nicolaitobaan ta jascajati yohihihqui. Jascapahbo que bi tah man jato hihquihinai. ¹⁶ Maton shinan pontenahue hih ca hen jai sen. Man ponteyamahiya tah hen mato qui histon nocoxon heen jana janin jai machitonen mato hahtíhi. ¹⁷ Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacoinnahue. Jaabo mato chitíhihmayamanahue. Man tenehax chitíhihyanahiya tah hen tsoan honannihma maná pítí mato hinanyaxihqui. Macan bero joxoni pishca rihbi tah hen hinanyaxihqui, maton jane behnaya macanbo, tsoanbi jaa jane honanahma, jaa macan bichi huestichin honannon.

Tiatira jema janin jan raanai

¹⁸ Tiatira janinha nincacoinaibo coirannicah qui raannoxon sca nescajaquin huishahue. Papan baquen ta mato yohihiqui. Chíhi perehíhqui beroyahpaxon, bronce pehneni taheyahpaxon ta jaan mato yohihiqui. ¹⁹ Jenquetsahpabo man jihuetain tah hen honanai. Jono huetsahon tah man shinanai. Papan joi tah man nincacoinai. Nincacoinxon tah man

hahxonai. Man tah man tenexonai. Man chini hahxonai ta man hahmenoni mentan hashoan hicha qui. ²⁰ Man jascajaquin sirijaxonah bi tah hen man mato janin jai haibo tiroma man potayamahi copi hen maton jati costanyamahi. Jaa Jezabel haibo ta Papan joi chanihicamahi yohuanihqui. Paraxon ta heen jonibo tiromajaquin haxemahiqui. Tsinihahbo hihxon haxemaxon ta yoshin rehtexona nami piti rihbi jato haxemahiqui. ²¹ Miin shinan pontehue hahcax hen manatah bi ta jahuen shinan pontecatsiyamahihqui. Jahuen tsiniti ta jenecatsiyamahihqui. ²² Hani hisiman ta hen jahuen bachiho jaa potayaxihqui. Hahbetan tsinixon bi shinan ponteyamahiboya tah hen jahuen hahbe tsinihibo rihbi jayabi potayaxihqui. ²³ Jahuen baquebo rihbi tah hen mahuamaquin queyobahinyaxihqui. Jaatian ta jatihibi janin tsinquitai nincacoinaibaan honanyaxihqui. Noquen Hihbaan ta noquen shinanboya noquen jointibo honanihqui hih ta jayaxihcanihqui. Jasca tah min janiqui hihxon tah hen siribo hahxoncoinquin bi caibo rihbi sca rishquipaquyaxihqui. ²⁴ Man Tiatira janin jaa haibo betan hihamahibo sca tah hen yohihi. Jaan haxemahi quescajayamahiboxon, nincanahue. Jaabaan jisi jahuen yohuan hihti honan joi hihqui bi ta Satanasnena qui. Jascapa joi tiroma bihyosmaboxon hean yohihi nincacoinnahue. Mato tah hen jahuabi hashoan joi tsamanyamahi. ²⁵ Nea res tah hen mato yohihi: man jai quescabinahue, hen mato qui canon caman. ²⁶ Tenexon man queyónoxon caman chitihihxonma man hean yohihi quescam jaiya tah hen mato yohiyaxihqui, maton nahuabo man yonoscanon. ²⁷ Chantiyaxon nincamaquin hahcajaquin tah man jato nincamatihi. Quentijanicahton quentijaquin jahuen mai quenti tiromahi jisxon hahribinixon moshabahinai quescajaquin tah man jato hahtihi. ²⁸ Papan ta hea jascajati yohinishqui. Yamequiri xabanica huishi rihbi tah hen mato hinanpaquyaxihqui. ²⁹ Nincacoinaibaan nea nincanon ta Dios Yoshin yohuanihqui. Hahan nincati pabinquiyahpaxon jan yohuanai nincacoinnahue.

3

Sardis jema janin jan raanai

¹ Sardis janinha nincacoinaibo coirannicah qui raannoxon sca nescajaquin huishahue: Papan siete yonotiyahpa ta yohuanihqui. Jahuen siete huishi xecoxon ta mato yohihihqui. Jenquetsahpabo man jihuetaim, hen tah hen honanai. Mohi mohinihcamahax bi tah man jirijomabo qui, mahuatahbo. ² Mohinahue. Mohixon, maton shinan queyocahincatsihqui bi coshica hinnahue, mohitahpabo sca jihuenoxon. Jihuetai man shinancoinaxma hihresai tah hen mato jisi. Heen Papa Dios bebonxon jisxon tah hen hihresaibo mato jisi. ³ Papan mato hahxonni shinanbehnoyamanahue. Jahuen joi jan mato nincamani shinannahue. Shinanbehnxonma bihqin sirijaxon maton shinan pontenahue. Man mohiyamahiya tah hen yometsoh nocorenenihcamahi mato qui nocorenentih. ¿Jahuentian hen mato qui nocotihin? Man tah man honantimabirestih. ⁴ Man Sardis janin jascapahbo hicha hihqui bi ta mato tocan huestibo res jaiqui, jaton tari rishtajayamahibo. Jaabo caya ta siri chopa joxoni hean sahuemaha sca hehbetan nihyaxihquiqui, siribo copi. ⁵ Jascajaquin tenehizo tah hen joxo chopa sahuemayaxihqui. Jihuenoxihquibo copi tah hen jaton jane huishaxon jahuentianbi heen quirica janinha jaton jane tsecatimahi. Heen Papan nincanon, jahuen yonotibaan rihbi nincanon tah hen Jaa ta hena qui hahxon jaton jane yohipaquyaxihqui. ⁶ Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacoinnahue.

Filadelfia jema janin jan raanai

⁷ Filadelfia jema janinha nincacoinaibo coirannicah qui raannoxon sca nescajaquin huishahue. Hihcoinxon ta maton Papan mato yohihihqui. Davidin jihuetahbo queyotimajati ta Papan yohinishqui, jato jihuemanicah hinantijaxon. Jaa jihuemanicahxon tah hen johue hahcai. Hean johue hahcayia ta tsoanbi pantetimahihqui. Hean johue hahyamahiya ta tsoanbi hihcomati hahtipahyamarihbihiqui. ⁸ Jenquetsahpabo man jihuetaim hen tah hen honanai. Mato tah hen bahixonai. Hean bahixona ta tsoanbi xehponti hahtipahyamahiqui. Man hicha tahma res coshi jai honaxon tah hen mato yohihi. Heen joi tah man bihxon jeneyamahi. Hea maton hihbo hihtima tah man jahuentianbi yohiyamanihqui. ⁹ Maton jema janin ta Hea tah hen judio qui Papan baque coin tah hen qui hihquibo jaiqui, quesahibo. Jaabo ta Satanasnen baquebo qui. Jaabo tah hen huetsa shinan hinanyaxihqui, mato qui canon mato tah man noque mentan hashoan shinanya qui mato jaahbo. Matohon hean xinanai ta jaabaan honanyaxihcanihqui. Man honannon hihxon tah hen mato yohihi. ¹⁰ Tenexonnahue hen mato jaah tah man tenexonniqui. Hean rihbi tah hen mato paxajaxonyaxihqui. Jatihibi mai janin jihuetaibo qui tah hen tiromabo paquyaxihqui. Jato qui tiromabo paquexon bi tah hen mato jaa tiromabo qui paxajayaxihqui. ¹¹ Histon tah hen mato qui canoxihqui. Man hahcai quescajaquin

jeneyamaxahnahue, hen mato hinanyaxihquibo tsoanbi mato bichinyamanon. ¹² Hen mato bihnon caman tenexonaibo tah hen heen Papan xoboho jihuemayaxihqui. Siri bi res tah man jano hihyaxihqui. Tsoanbi ta potatimahihqui. Xobo janinhax jahuen xobo jihu picoyamahi quescari tah man janobi siri bi res Papa Dios betan hihyaxihqui. Mato behuishquin tah hen heen Papa Diosen jane huishayaxihqui, Papa Diosen jeman jane rihbi tah hen mato qui huishayaxihqui, naihoxon Papan mato botomaxonai jahuen Jerusalem jema behna. Heen jane behna rihbi tah hen mato behuishyaxihqui. ¹³ Nincacoinaibaan nincanon hihquish ta Dios Yoshin yohuanihqui. Jahan nincati pabinquiyahpaxon jan mato yohihi nincanahue.

Laodicea jema janin jan raana

¹⁴ Laodicea jema janinha nincacoinaibo coirannicah qui raannoxon sca nescajaquin sca huishahue. Hihcoinxon tah hen mato yohihi. Hen yohihi quescabi ta jatihiqui. Papan hahní jatihibi hihboxon ta hen yohihi. ¹⁵ Jenquetsahpabo man jihuetaín hen tah hen mato honanaí. Jene yoho quescá tah man qui. Matsihaxma bi tah man xanayamarihibi. Matsi hihamahax man xanapahinon. ¹⁶ Yoho pishca res tah man qui, matsima, xanayamarihibi. Jaa copi tah hen toshbanhahxon quemo potaquin hahcajaquin mato potatíhi. ¹⁷ Noque tah non coriqui hichahi hih tah man jai. Tsama bi res tah non jai, jahuabi tah non pishinyamahi, hih tah man jai. Huaohihtíhi bi tah man jascarai. Homisbati tah man jai, hihti jahuajomabo, benchebo. Chopanma hihquibo tah man qui. ¹⁸ Chihin tana oro marohi benahue, coriquiyahpanoxon. Chopa joxoni marohi benahue, sahuenoxon, hahqui rabin-tibo chopanma nichibo hihamascanoxon. Bero rahon besquinahue, jísti hahtipahnoxon. ¹⁹ Hean costanaibo tah hen hean pontehi. Baque hanijaquin hahcajaquin tah hen jato pontehi. Jaa copi maton shinan ponteti queenbiresnahue, pontenoxon. ²⁰ Maton xehqui janin nihxon tah hen quenahi. Hen quenahi nincaxon man quehpenxonaiya tah hen hihcoxon mato betan pinoxihqui, maton rihbi man hehbetan pinon. ²¹ Hen mato bihnon caman man tenehiya tah hen quiquin hapobo sca mato hihamayaxihqui, hehbe quiquin hapobo man hihnon. Tenenixon heen Papa betan hen hihbojahi quescaribiquin tah man tenenixon hehbetan hihbojayaxihqui. ²² Nincacoinaibo honannon hihquish ta Dios Yoshin yohuanihqui. Hahan nincati pabinquiyahpaxon nea jan yohihi nincanahue.

4

Naihoh quehax betihihpaquetaibo

¹ Jaatian sca hen jisí bi nai janin xehqui xecabohanah quehpemehti. Hen nincamenoha joi sca tah hen nincarihbihipiqui, corneta rehue coshin hahcai quescá.

—Hinahihnaquihranhue. Janoxihquibo sca tah hen mia jismanoxihqui —hea jaquin.

² Jan yohihya sca cahen heen yoshin hinahihnati. Hinahihnaxon jisí bi naihoh sca janoxon yonoti jai, quiquin jati. Hen jisí bi Papa Dios jano tsahoti, jahuen janoxon yonoti janin. ³ Jahuen jati cahen pehneni, jasper macan pashini hihqui quescari, cornalina macan joshini hihqui quescari. Jano jan hihquiton cahen xabahahtancahuanai jai, yoshin bahi quescapa, esmeralda macan joshini pehneni hihqui quescapi. ⁴ Jahuen quiquin jati mayahahtancahuanai cahen huetsa tsahotibo jaribihi, veinticuatro tsahoti. Hahan tsahotaibo cahen joxo chopa sahuehax tsahohahtancahuanai jai, jahuen yonoxonnicahbo. Oro maitiyahpabo rahsi. ⁵ Jahuen jati coin janinhax cahen cana bacatan bacatanihcamaahi. Terehnhqui, coshin bi res toshiti. Jaa bebon cahen siete johue xabati. Jaa siete johue ta Papan siete yonoti yoshinbo qui. ⁶ Hoque jahuen jati bebon rihbi cahen hian quescapa jai, nexnani siri.

Jahuen jati tocan cahen chosco noyanica yoshin quescapahbo jai, jahuen quiquin jati mayahahtancahuanai yoshinbo. Bero sahuetaibohi, caibo bero cahen bebo quiri, caibo cahen hahchon quiri, hahan jísti berobo bochohi rahsi. ⁷ Bebo quiha yoshin cahen hino quescapah. Jaa hahchon sca cahen toro quescapah. Jaa chini sca cahen jonin bemananyahpa quescapa. Jaton chini sca cahen chiqui noyahi quescapah. ⁸ Seis pehiyahpabo rahsi ta jaa noyanica yoshinbo qui. Bemaanya bero sahuenon cahen chicho rihbi bero hichahi. Tantihamaxa yohuanbahinahax yohuanshinacani:

Hihti shinanya xaba hihbo,
hihti shinanya xaba hihbo,
hihti shinanya xaba hihbo,
hihbo bi res tah min qui
noquen Papa Dios.
Jatihibi hihbo,
rahma jacoínai,
neateman japahoni,

joyaxihqui tah min qui
hihcani.

⁹ Papa Dios qui jascari siripi yohuancani, jaa hihti xabayahpa copi, hihti shinanyahpa, hihti siri. Papa Dios queyoyamanox mananica copi jahuen chosco yoshin hahqui siripi yohuanaiya cahen jahuen veinticuatro yonoxonnicahbo hahqui betihihpaqueti. ¹⁰ Jascari yohuanaiboya quiquin Hihbo qui betihihpaquecani. Raboxonen tisquihahpaquehax jaa bebon betihihpaquexon jaton oro maitibo mabiquihnxon jaa taracancanquin. Jaton maitibo janaxon:

¹¹ Hihcoini,

Mia tah min xaba hihbo qui, noquen Hihbon.

Hihti shinanyahpa tah min qui,

Hihti coshi noquen Papa Dios.

Jatihibi tah min mian hahniqui.

Shinanxon res tah min Jahue hahniqui,

jatihibi sca janon

hahcanquin jaton maitibo taracanaxon.

5

Carnero huestichin quehpenti hahtipahi quirica

¹ Hen jisribiha bi Papa Dios quiricayahpa qui, jahuen mecayaho mequeman jan xecohah. Jahuen quirica cahen chicho huisha janon ramiho huisha jaribihi. Huishaxon xehpoxon boipan besmiha quirica, siete boi toncon taxnahah. ² Hen jisi bi hihti coshi jahuen yonoti coshin bi res yohuani:

—¿Tsoan jaa quirica quehpenti hahtipahiquin? ¿Tsoan jahuen boi pasqueti hahtipahiquin? —hihqui.

³ Jan quenahah bi tsoanbi jaa quirica quehpenti hahtipahyamaquin. Naihoh jaibaanbi, main jaibaanbi, mai chicho jaibaanbi, tsoabi jaa quirica jisnica yamahi. ⁴ Tsoanbi jaa quirica quehpentimahiya tah hen huaohihquippiqui, tsoanbi jaa jisti yamahiya, huaohihscai, hicha.

⁵ —Huaohiyamahue. Judá baquebo hihxon ta Davidin xohtan noquen rahuibo namanjapaquexon jaa boi pasquexon jahuen quirica quehpenti hahtipahiqui —huesti yononicon hea jaquin.

⁶ Jaatian hen jisi bi jaton tsahoti tocan huesti carnero nichu, nacoxon rehtehah quescapa. Jaa mayahahtancahuanai cahen jaa yonoxonnicahboya hoa chosco noyanica yoshinbo. Jaa carnero cahen siete machanyahpahi, siete beroyahparihbihi. Jahuen siete bero ta Papan siete yoshinbo qui, jatihibi mai janin raanti jahuen yoshinbo. ⁷ Papa qui caxon sca jan xecohi quirica jaa carneronen bihquin. ⁸ Jahuen quirica jan bichiya cahen hoa chosco noyanica yoshinbo raboxonen nichish jaa carnero qui betihihpaqueti. Hoa veinticuatro yonoxonnicahbo rihbi jascarih. Hahan chimati arpayahpabo rahsi hihxon chimacancanquin. Jaton oro tasonbo rihbi xecohax, raboxonen nihcani, hahan hininti jaton tason bochohi. Jaa hahan hininti cohini ta nincacoinaibaan joibo qui, Papa Dios yocacaibo. ⁹ Behua behna sca behuacani.

Mian tah min jaa quirica bihti hahtipahi.

Bihxon tah min quehpentihi.

Papa Dios bihxonquin tah min miin jimin jatihibi janinhahbo jonibo bihniqui.

Jatihibi joiyahpabo, jatihibi huaca quiha, jatihibi mai quiha tah min jonibo bihniqui,

miin jimin copijaquin.

¹⁰ Min tah min jato janenihqui, Papan jihuetahbo jaabo janon, jaa bebonxon yohuanxonnicahbo jaahbo.

Mainxon ta jano jaibo yonoxonyaxihcanihqui, Papa Dios hahxonquin

hihcani, behuahi.

¹¹ Hen jisribiha bi tsama bi res Papan yonotibo sca jahuen quiquin jati mayahahtancahuanai. Jaabo hichabiresax behuahi sca hean nincaquin. Papa betan jahuen noyanica yoshinbo naponbi hihnon, jahuen yonoxonnicahbo rihbi jano hihnon, jaya mayahahtancahuanax Papan yonotibo behuahi. Topontimabiresi jaabo tsama bi res tsama.

¹² Naconiho ta Papan carnero qui.

Hihti siri hihbo,

coshi hihbo,

jatihibi jahuabora hihbo,

honan hihbo,

yonotibo hihbo,

shinan hihbo,
 xaba hihbo,
 hahqui behuati hihbo siri
 hihcani, coshin bi res.

¹³ Naihoh jai jatihibichin jato nincanon, main jai jatihibichin nincarihbinon, mai chicho jai jatihibichin nincarihbinon, quebjistima hiaman cahibaan nincarihbinon, jeneho cahibaan rihbi jatihixonbi nincacanguin. Nincacax:

Jahuen jati janinxon noque jihuemahi ta hihti siri qui,
 jahuen carnero ta hihti siri qui.

Jaabo rabe ta shinan hihbo qui, xaba hihbo,
 jatihibi yonoti hihbo.

Jascabi sca quiquin hihbo tah qui
 hihcani, behuahibo nincacax.

¹⁴ Jaabo jascaraiya, hoa chosco noyanica yoshin sca:

—Jascari rahan —hihqui. Jaabo jascanon sca jahuen yonoxonnichahbo raboxonen nichish quiquin Hihbo qui betihhpaquecani.

6

Jahuen siete boi toncobo

¹ Jaatian hen jisí bi carneronen huesti boi tonco pasquescaquin, siete tonco pishca jai bi huesti pasquequin. Jaatian, terenhiqui coshin corotai quesca sca jahuen noyanica yoshin huestichin quenahi hean nincaquin.

—Johue —hahquin.

² Jan quenahi quiri hen jisí bi cabacho joxoni jahui. Jaa cahtsahotai joni rihbi jai, pihayahpa. Hapon maiti maimaha sca cahí caresscai, main jaibo namanjaquin hihbo-janoxon.

³ Huetsa rihbi sca jahuen rabe sca boi tonco pishca jan pasquehiya cahen yonoti chinin jahuen noyanica quenahi sca hean nincaquin:

—Johue —hahquin.

⁴ Jan quenahah huetsa cabacho sca picoti, cabacho joshini sca. Main jihuetaibo rainyamahi rehtenani jihuescanon cahen joni huetsa betan rehtenanti shinan jato hinanon jaa cabacho cahtsahotai sca hahan joni rehteti machito hinanquin.

⁵ Jahuen quimisha jahuen boi tonco pishca sca jan pasquehiya cahen chinitai huetsa noyanica yoshiman quenahi hean nincarihbiquin.

—Johue —hahquin.

Hen jisí bi cabacho huisoni sca jahui. Jaa cahtsahotaiton hahan hihue toponti xecobe-naquin. ⁶ Jaa noyanica yoshinbo tocan yohuanai quesca sca jai:

—Trigo ta huesti neten teexon jaa neten piti res jonin canantihiqui. Huesti neten teebahinaxon ta quimisha neten cebada piti cananti qui. Xehatibo tah min tiromajatimahi, hahan pitijati xeni rihbi tiromajayamahue —hihqui.

⁷ Jahuen chosco jahuen boi tonco sca jan pasquehiya, chinitai huetsa noyanica yoshin yohuanscai:

—Johue —hahquin.

⁸ Hen jisí bi pehi quescapa yanconi cabacho sca jahui. Jaa cahtsahotai cahen mahuá janeya. Mahuataibo coirannicahbo rihbi hahbetan becani. Sontarobaan jonibo rehtenon, pihan hihquish caibo mahuanon, nahuan pahen hihquish caibo mahuanon, mai meha yohinahbaan piha caibo mahuanon, main sca jato raanquin, hicha mahuatahbo. Quimisha joni cahnexon huesti mahuamaquin, quimisha cahnexon huesti mahuamaquin, jascjabonaxon jato mahuamaquin. Jatihibi jonibo toponpaquenon jaa pehi quescapa yancon cabacho cahtsahotai carneronen raanquin.

⁹ Jahuen pichca jahuen boi tonco jan pasquehiya sca cahen jisí bi jano Papa Dios janaxonti naman yamanicabo hichahi, Papan joi jeneyamahiton rehterahsihibo. Cristo joi yohihiton rehterahsihibo yamanicabo sca jai. ¹⁰ Coshin yohuanai sca hean nincaquin:

—¿Jahuentiho basi pari min copiquin sca noque rehtehohbo copiyaxihquin, Quiquin Hihbon? Mian tah min sirijaquin shinanai, pontejaquin tah min hahcoinaí. ¿Jahuentian min noque rehtehohbo casticanyaxihquin? —hahcanquin yocaquin.

¹¹ Jato tari joxoni hinanpaquexon sca:

—Manátahnahue, mahbe teexonnichahbo pari rehtehahbo, maton huetsabo rihbi rehtehahbo, mato rehterahsi quescajaquin senenjahabo manátahnahue —jato jaquin.

¹² Hen jisí bi jahuen seis sca jahuen boi tonco pishca jan pasquehi. Jan quehpenaiya cahen mai coshin bi res mihuani, bari rihbi huisojaquecahinscai, chopa huison beracoha

quescapi. Hoxne rihbi joshinjaquecahinscai, jimi quescahahini joshini. ¹³ Naihoh quehax cahen huishi rihbi reocohpaquetax main paqueti, jihui bimibo nihuen xayannah reocoh-ticamahi. ¹⁴ Nai rihbi sebibahinah yamascai, non papira sebibahinahcamahi. Main rihbi cahen jatihibi mahchi xequecahuani, quebjistima hiaman jai mai toncobo rihbi hihcahuani, jano jan tsahopahoni tsahoyamascai. ¹⁵ Mai mehabo quiquin hapobo betan jaton santaro hapobo joneti. Patorobo, coshi jonibo, patoro teexonaibo, patorojomabo, jaabo jatihibi jonecani. Mai quiniho hihcocahincani, macan mahchi janin quexba janin hihquicahinax jonecani.

¹⁶—Noque qui paquéhue, mahchin. Noque mahpohue, macaman. Noque qui paquéhue. Noque mahpohue. Quiquin Hihboxon Diosen noque jisyamascanon noque mahpohue. Jahuen carneronen noque sinajayamascanon noque mahponahue, mananbon. ¹⁷ Sinaxon ta noque casticanscaiqui. ¿Tsoan jascapa tenetihiquin? —hihcani.

7

Israeli baquebo honantijahibo

¹ Jaa pecaho sca hen jisí bi chosco yonoti jai, Papan yonotibo. Cahchinacahini cahibo. Huetsa cahen reboqui cahi, huetsa cahen chiponqui, huetsa cahen cahchiho, huetsa cahen ramiho. Jano nihxon sca jahuenbihax nihue joyamascanon nihue pantecanquin. Hian janin xoó hihyamascanon, main xoó hihyamascanon, nihi rihbi xoopan xayanyamascanon nihue pantecanquin. ² Maiboya quebjistima hianbo tiromajati carneronen jato yohihah cahen maiya hianbo tiromajati jaabaan hahtipahquin. Jaatian hen jisí bi bari cainai quirihax huetsa yonoti sca sanarenenex jaonahi. Jayaxon huishaxon honantijati xecobenahax, jahuen hahbe chosco yonotibaan nincanon coshin bi res nincati yohuani:

³ —Jaton bemanan qui non noquen Papa Diosen jonibo honantijanon caman mai tiromajayamanahue; hianbo, nihi rihbi tiromajayamapariquin —hahquin.

⁴ Jaatian hen nincacah bi jahuentihi non honantijahin hihxon toponah ca ciento cuarenta y cuatro mil honantiyahpabo jai, Israeli baque tihibichina doce mil jonibo. ⁵ Judábo cahen doce mil honantiyahpabo. Rubenbo cahen doce mil, Gadabo cahen doce mil, ⁶ Aserbo cahen doce mil, Neftalibo cahen doce mil, Manasésbo cahen doce mil, ⁷ Simeonbo cahen doce mil, Levibo cahen doce mil, Isacarabo cahen doce mil, ⁸ Zabulonbo cahen doce mil, Josébo cahen doce mil, Benjaminbo cahen doce mil.

Joxo chopayahpabo

⁹ Toponaibo nincaxon hen jisí bi tsamá jonibo sca jai, hihti caibo, tsoan toponquin queyonihma. Jatihibi mai mehabo, jatihibi jonibaanaahbo, jatihibi huean mehabo, jatihibi joiyahpabo. Noquen Papa Dios bebon nichibo sca, jahuen carnero bebon nichibo. Joxo chopah sahuehibo rahsi. Jepe pehi xecohibo rahsi. ¹⁰ Coshin bi res quenacani:

Jatihibi hihbohi ta noque jihuemanicah qui,

jahuen carnero rihbi ta noque jihuemanicah qui

hihcani. ¹¹ Papan yonotibo sca jahuex, Papa Dios, jahuen yonoxonnicahbo, jahuen noyanica yoshinbo, hahqui mayahahtancahuanxon raboxonen nichish jahuen yonotibo jatihibi Papa Dios qui betihihpaquecani. ¹² Betihihpaquetax:

Hihcoini. Jascabihi hihti shinanyahpa tah min qui, Papan.

Xaba Hihbo tah min qui, Shinan Hihbo.

Noque quiquin hahxonnica. Siri shinanyahpa.

Coshi shinanyahpa.

Jatihibi Hihbo tah min qui, jascabihi, queyotimahi.

Jascari rahan

hihcani.

¹³ Jascaraiboya huesti yonoxonnicahon sca hea yocaquin:

—¿Nea joxo chopayahpabo tsoabo hin? ¿Jahuerahnohah hin?

¹⁴ —Mian caya tah min honanai, hapon —hahquin hean.

—Nea ta hihti tiromabo netebo huinoquihrani jahuibo qui. Jaton chopah Papan carneronen jimín chocaxon joxojahibo ta qui. ¹⁵ Jaa copi ta Papa Dios bebon nihti hahtipahcanihqui. Jahuen xobohoxon ta jaabaan jaa yocati hahtipahiqui, bariyahpan, yame rihbi. Papa Diosen ta jato jihuequihnyaxihquiqui. ¹⁶ Jahuabi ta pitin pahiyamascanoxihcanihqui. Xehatinin pahiyamascai. Bari teneyamascaquin. Jahuabi xana teneyamascaquin. ¹⁷ Janoxon Papan yonohi janinxon ta jahuen carneronen jato coirannoxihquiqui. Hahan jihueti noabo janin xehahahbo ta hionox manatihqui. Papan jato hahxonah ta jahuabi benayamascanoxihcanihqui.

8

Jahuen siete tonco pasquehiya hinintiyahpa jahui

¹ Jahuen siete jahuen boi tonco pishca carneronen pasquehiya cahen naiho jatihibi netecahinscai. Poyan tihixonpa jahua nescapi. ² Hen jisi bi Papa bebon nichu jahuen siete yonotibo corneta rehue Papan hinanpaquequin, huesti huestibo jato hinanpaquequin, yonoti tihibichina huesti rehue. ³ Papa Dios bebonbi jano racanxonti jai, oro bi res. Hininjati hahqui nanenoxon oro quenti pishca xecobenahi huetsa jahuen yonoti sca jahue, jano racanxonti patax nihreneni. Jahuen baquebo rahsichin Papa yocati joiboya jahuen hininti cohinya mesconon cahen hicha hininti jaa yonoti Papan hinanquin. Quetejaxon jano racanah cahen jaton joibo jahuen hininti cohinya mescoti. ⁴ Papa bebonxon jahuen quenti qui nanexon jan mapojaha cahen jaton joiya cohinhnati. ⁵ Jahuen quenti pishca bihxon sca jano racanxonti quihya chihya bihxon quenti qui bochojaxon, naihoxon Papan yonotinin mai qui chicopaquequin. Jan potahiya cahen terenhihqui, coshin coroti, cana bacahi, mai mihuani.

Jaton rehue hahcaibo

⁶ Jahuen siete rehueyahpa yonotibaan sca jaton rehue hahnoxon sanahihnixon tocanquin.

⁷ Bebohilton pari jahuen rehue hahresscaquin. Jan hahcaiya cahen naiho quehax matsi toncobaan mai rahtsaquin. Jimiya chihya rihbi mescohah reocohti, main paqueti. Jahan cahen hicha mai mapohi, quimisha mai tihibichina rabe mai banenon huesti mai mapohi tsistecahini. Nihi jascarihbibi, texe banenon texe cohiti. Jatihibi huasi paxahax cohocahini.

⁸ Huetsan jahuen rehue hahresscaquin. Jan hahcaiya cahen mahchi tihopa chihya tonco quebjistima hian qui paqueti. Quebjistima hian qui paquetaiya cahen jene jimicahinscai. Rabeo hian siri banenon huestibo jimiyahpa hiancanascai. ⁹ Jascahiya cahen jaa jeneho cahi yapabo mahuati. Jan cahi nontibo rihbi jene meran cahax queyocahini. Rabe banenon huetsa hihquihya, rabe banenon huetsa hihquihya, jascacanahi hicha queyoti. Yapa jascarihbibi.

¹⁰ Huetsan sca jahuen rehue hahquin. Jan hahcaiya cahen naiho quehax hihtihosi huishi cohocanahi huacabo qui paqueti. Huetsa janin rabe texpa banenon huetsa qui paqueti, huetsa janin rabe banenon huetsa qui paqueti, huetsa janin jascarihbibi, huetsa janin jascarihbibi, jatihibi janin. Texpabo jascarihbibi. ¹¹ Jaa huishin jane cahen mocani. Hahqui huishi paquetai cahen jene mocanihbo rahsihi. Jaton jene mocasaiya cahen jano jihuetaibo hicha mahuati. Jaa jene xehahax mahuati.

¹² Huetsan sca jahuen rehue hahquin, jahuen chosco sca. Jan hahcaiya cahen berishquiha ramiho bari nocascai. Ramiho rabe xabanon ramihoque huesti nocahi. Hoxne rihbi ramiho rabe siriparimon ramihoque huesti berishquiha nocahi. Huishibo jascarihbibi, caibo xabanon caibo rishquihah nocahi. Non toponpaquexon quimisha huishi toponai tihibichina huesti nocahi. Texe neten bari xabanon texe xabayamahi. Yame jascarihbibi, texe yame hoxneya huishi janon, texe yame jayajoma.

¹³ Jaatian sca hen jisi bi noque huinobohani huesti chiquihuan noyahi. Coshin bi res queocanahi noyahi:

—Hahrai. Hahrai. Hahrai. Quimishachin pari ta jaton rehue hahnoxihquiqui. Main jihuetaibo ta hihti tiromabo sca huinonoxihquiqui —hihcanahi cahi, chanihi.

9

¹ Huetsa yonotinin sca jahuen rehue hahquin, jahuen pichca sca. Jahuen rehue jan hahcaiya cahen naiho quehax huesti huishi paquetai quescapah hean jisquin. Nemini mai quinihuan jai bi xehpotiyahpa. Jaa huishi cahen hahan quehpenti hinanah, jaa xehpoti quehpensaquin. ² Jaa quehpenah cahen quiniho quehax cohin potohi, boyomahuan janinhax cohin cainihcamahi. Cohiman mahpohah bari huisojaquecanscai. Huee rihbi huisojaquecanscai. ³ Cohin mehax picotax sca champobo michabahcanascai. Niho pahenihbo hihqui quescari pahayahpa champobo, Papan jato jaa pahe hinanah.

⁴—Huasibo tiromajayamanahue, champon. Pehiyahpabo tiromajayamanahue, jahuabi nihi tiromajayamaquin. Papan honantjahahmabo rahsi tah man hahtihya, jaton bemanan janin jahuen honanti yamahibo rahsi hahnahue. ⁵ Jato rehteti tah hen mato hinanyamahi. Pichca hoxne jaa hisin tenehahbo tah hen mato jatihya hoxne hisinjati mato hinanai. Jato hahtannahue —hahcá, jonibo hahqui becani. Hahca, nibon hahca quescapi hisincani. ⁶ Jaa champon hahca ta Hahrai, teneyama ta jai, hea mahuamahue hihyaxihcanihqui. Mahuati queenxon bi ta hahtipahyamayaxihcanihqui. Hisin tenecasquimahax ta hihti mahuacatsihquish bi mahuayamayaxihcanihqui.

⁷ Rehtenani canoxon sontarobaan jaton cabacho bepaxti sahuemaxon xohpaxti sahuemaha quescapahbo ta jaa champobo qui. Oro maitiyahpabo quescapahbo. Jonin bemananya quescapahbo. ⁸ Haibaan booyabo, boo chaiyabo. Hino xetaya quescapahbo. ⁹ Yami xohpaxti quescapa sahuehibo. Noyahiboya cahen cabachonen ninihah tsama bi res sontarobo coshin bi res jaton taramehtinin bocanihcamahe coshin bi res corocanahi, jaton pehin payanah. Sontarobo rehtenani cahicamacanahi coro coroti. ¹⁰ Jaton jina cahen nibon jina quescapahbo, chahchitiahpabo. Hahan chahchihah cahen pichca hoxne hisintiyahpa. ¹¹ Jaton quiquin hapo cahen jaa quinihuan chicho quehax picotai yoshin. Abadon cahen jahuen jane, hebreobaan join tiromajanichah hihcatsihqui. Griegobaan join cahen Apoli6n, jahuen jane.

¹² Jano ta chiqui quenatah hahrai huesti quey6scaiqui, huetsa hahrai jahuen rabe sca jaresscanon.

¹³ Huetsa yonotinin sca jahuen rehue hahcaiya cahen Papan racanxonti patax jahuen yonoti quenatai hean nincaquin:

¹⁴ —Jaton Eufrates janeya paro janin nexá jai yoshinbo pecascanahue jatihibi canon, chosco —jahuen siete jahuen hahbe rehueyahpa jaquin.

¹⁵ Jaa baritian, jaa hoxnepan, jaa neten, jaa horabi cayaxahnon mequeni jahuen chosco yoshin sca bocani, pecahahbo. Boxon jatihibi jonibo toponxon quimisha toponxon tihibi huesti rehtexon rabe texejacanquin. Rabe jihuenon huesti mahuati, rabe jihuenon huesti mahuati, jascacanahi. ¹⁶ Cabachonen cahi sontarobo toponxon yohihah cahen doscientos millones jai hean nincaquin. Toponaibo nincacah jatihi.

¹⁷ Hen jisi bi cabacho cahtsahotaibo. Cabacho tihibi jaton hihbo hihqui quescari, chihiyahpa xohpaxtiyahpabo rahsi, yanconibo xohpaxtiyahpabo, polvora coshin mapohi quescapahbo xohpaxtibo. Cabachobo cahen hino mapoyabo. Jaton jana janinhax chihi cainihcama jaibo. Cohin pototani pototani. Toohahti toohihquicamahibo. ¹⁸ Jaton pahe ta quimisha qui. Huetsa cahen chihi, huetsa cahen cohin, huetsa cahen pishiti, jaton jana janinhax chihitan chihitanai pahebo. Jaa quimisha pahen tsama jonibo rehtecanquin, huesti rehtexon tihibi rabe texejabonahibo. ¹⁹ Jaa cabachon pahe ta jaton jana janin qui, jaton jina janin rihibi. Jaton jina cahen rono quescapahbo, ronon mapoya jinayatibo hahan piha joni mahuanon.

²⁰ Jaton pahen rehtequin bi texejahibaan bi jascabi nincayosmabo jonibo jai. Jaton mequemanbi jaton diosbo hahcanquin, caibo oro, caibo plata, caibo bronce, caibo macan, caibo jihui. Jisti hahtipahyamahibo, nincati hahtipahyamahibo, nihti hahtipahyamahibo. Jascapahbo diosbo hahxon raboxonen tisquihahpaquexon jato yocacanquin. Jascapahboxon jaton shinan ponteyamacanquin. ²¹ Jonibo rehtexon bi jaton shinan ponteyamacanquin. Yobe jaxon, tsini jaxon, yometso jaxon, jascapahboxon bi jaton shinan ponteyamacanquin.

10

Quirica pishca xecohi joni

¹ Hen jisi bi huetsa sca Papan yonoti naihoh quehax botopaqueti, hihti coshi jahuen yonoti. Nai cohiman rahcotax bototi. Jahuen mapo machibi yoshin bahi joyotihcamahi. Jahuen bemanan cahen bari quescapai. Jahuen tahe cahen chihi perehinhatai quescapi. ² Jan xecohi cahen quirica pishca, quehpenah sca. Bototax jahuen mecayaho tahen queb6jistima hian benichi, memiho tahen main nichí. ³ Nichish res sca coshin bi res quenati, hinobo sinatax coshin queoti quescari. Jan quenataiya, terenhihscai siete coti terenhihqui. ⁴ Terenhihqui tantiscaiya hen huishacatsihqui bi:

—Jaa siete coti terenhihqui yohuanai huishayamahue. Tsoabi jaa yohiyamahue —naihoh quehax yohuanaiton hea jaquin.

⁵ Jeneya mai benichi yonotinin sca jahuen mecayaho mequen bochiquiri sanahihnixon:

⁶ —Jahuentianbi queyoyamanox mananicaxon ta naibo jatihibi naijanicahxon, maiyabi jano jai jatihibi jonijanichaxon, hianbo jatihibi jano jaibo jonijanichaxon Papan yohicoinihqui. Hashoan ta basitima sca jaiqui. ⁷ Jahuen siete jahuen yonotinin ta jahuen rehue hahresscanoxihquiqui. Jahuen rehue jan hahmenohiya ta Papan joi yohinicabaan yohini quescas sca jaresscathiqui, Papan jato yohini jayaxihquibo jaresscanon —hahquin jeneya mai benichiton.

⁸ Hean nincacah naihoh quehax yohuanrihibi:

—Hoa jeneya mai benichi yonotinin xecohi bihtanhue, quehpenah quirica pishca —hea jaquin.

⁹ Caxon sca:

—Miin quirica pishca hea hinanhue —hean jaa yonoti jaquin.

—Bihhue. Bihxon piqin queyobahinhue. Miin poco janin cachapi hihnon bi ta min piha hihti batatihui, bonajene tiho batapi —hahxon jahuen quirica pishca hea hinanquin.

¹⁰ Hinanah, bihxon pihá bi hihcoini bonajene tiho batapi. Piqin queyobahinah sca cahen heen poco janin cachascai.

¹¹—Hicha jonibo, huetsa mai mehabo, huetsa joiyahpabo, jaton quiquin hapoboyabi tah min hicha jonibo pari jato yohiti jai —hea jaquin.

11

Papan joi yohinica rabe

¹ Hahan hen toponnon hahan toponi jihui taxo quescapa hea hinanxon sca:

—Jahuentihopa hin hihxon Papan xobo topontanhue. Jahuen jano racanxontiyabi topontanhue, Papahan shinanax jaho tsinquitaiboyabi. ² Jaabo toponxon bi jahuen xobo jemanhihti toponyamatanhue. Jaa ta cuarenta y dos hoxne pari nahuabaan jama jamayaxihquiqui, Papan jato hinanah. Jerusalem jemarihi bi ta jama jamayaxihcanihqui, jato hinanah. ³ Jaatian tah hen heen joi yohinica rabe raanyaxihqui. Hean raanah ta hahan benáti chopa sahuexon mil doscientos sesenta neten heen joi jato nincamayaxihquiqui, rabebichin.

⁴ Jaabo rabe ta mai Hihbo bebon nicho olivo jihui rabe qui, Hihbo bebon tsahona johue rabe ta jaabo qui. ⁵ Tiromabaan jato tiromajacatsihquiton ta jaton jana janinhax chihitanxon jaton rahuibo queyobahinyaxihquiqui. Jato tiromajati shinanaibo jatihibi ta jascajaquin queyoyaxihquiqui, chihin. ⁶ Hoi paquetimajati coshi ta Papan jato hinanyaxihquiqui, jaabaan yocacah hoi paqueyamascanon, Papan joi yohiquin queyonon caman. Texpaboya hianbo rihbi jimicahinscanon ta jascajati coshi jato hinanyaxihquiqui. Queenxon tian res mesco pahen mai rishquinon mesco coshi jato hinanquin. ⁷ Rabebichin Papan joi yohiquin queyoscaiya sca ta quinihuan janinhax picotai yohina jato betan rehtenanyaxihquiqui. Jato betan rehtenaxon ta jato rehteyaxihquiqui, rabebi. Jato namanjaxon rehtequin. ⁸ Noquen hani jema janinxon jato rehtexon ta bahinbi jaton yora janibi minchinon tsahonmayamayaxihquiqui. Jaa jema ta janoxon noquen Hihbo rehteni jema qui, Sodoma hahcaibo jema, caibaan cahen Egipto hahquin, tiromaboyahpa copi jascajaquin. ⁹ Jatihibi mai mehabaan ta jaton yora racatai jis yaxihcanihqui, jatihibi nahuabaan, jatihibi joiyahpabaan, jatihibi texpa janin jihuetabaan jato jisquin, rehteha racatai rabe. Quimisha nete racabahinahax racashinahax jahuen chosco sca barin manan tsacanon caman jano racanon ta tsoabi jato tsahonmayamayaxihquiqui. ¹⁰ Jaton yora racatai jisish ta mai mehabo coincinyaxihquiqui, jenimahi. Jaa copi ta bexnanboya piti joni huetsa hinanyaxihcanihqui. Jaa joi yohinica rabechin jato tiromajapahonish bi mahuascai copi ta jascajaquin joni huetsa piqihinyaxihcanihqui, jenimaxon. ¹¹ Hen jisí bi cahen jaton chosco neten barin manan tsacascaiya sca jaton yoshin Papan hahquirihbi hinanxon Huenínahue jato jaah huenicahuani, rabebi. Nihresscaiton merahax hihti raquepahnhuanax tastahicani, jaa jisibo jatihibi. ¹² Bochiquihax yohuanai sca nincacacquin, coshin bi res yohuanai joi:

—Neno hinahihnaquihrrannahue —jato jaah naiho h rabebi cahi. Nai cohiman cahiton jaton rahuibaan namanxon jisnon bi naiho bocani. ¹³ Jaabo rabe cahiya cahen coshin bi res mai mihuani. Mai mihuana cahen jaa jema janin xayanah hicha xobo paqueti. Jaton xobonbi jato bishtax cahen siete mil jonibo mahuati. Texe jatihibi hihti raqueti. Naiho queha Diosen ta noque casticaniqui, hihcani raquetax.

¹⁴ Janobi ta jahuen rabe sca jahuen hahrai queyóscacaiqui. Huesti sca pishini. Jaa sca ta jahuiqui.

Jahuen siete jahuen rehue

¹⁵ Huetsa yonotinin sca jahuen rehue hahquin, jahuen siete sca. Jan hahcaiya, coshin bi res naiho quehax yohuanai jai.

Noquen Hihbaan jihuemati nete ta nocoscaiqui,

jahuen baque Cristo betan jahuen jihuetahbo jan jihuemascanon.

Queyoyamanox manatahbo ta jascabijaquin jato jihuemascatihiqui

hihqui yohuani. ¹⁶ Jascari coshin yohuana joi jaiya cahen Papa Dios bebon tsahoxon yonoxonai jahuen veinticuatro yonoxonnicahbo raboxonen nichish betihihpaquecani, Papa Dios quiri jisish jaa Nete Hihbo copi jaa naman betihihpaquecani.

¹⁷ Papan, noquen Hihbon,

Mia tah min jatihibi hihbohi,

Neateman japahonish bi tah min jascabihi jai.

Hahxon tah min noque jai, Hihbon.

Miin hani coshiyaxon tah min jatihibi hihbojahi.

¹⁸Noquen nahuabo sina sinatai bi tah min jato sinajaxon mahuanihbo casticanscai. Mia hahxonnicabo tah min mianbo sca copiquin hahxoncoinscai. Miin joi yohinicabo, miin jonibo, mia nincacoinnicabo, haniboya hanitahmabo tah min jato hahxoncoinscai. Mai tiromajanibabo rihbi tah min tiromajascai hahcanquin.

¹⁹Hen jisí bi noquen Papan naihoh jati quehpemehscai, janibi sca jahuen bohnanti jano racanon, jahuen jihuetaibo hahxontijaxon huishani joi jaa bohnanti chico jan bexojani. Jaatian cana bacatan bacatanah terenhiqui. Coshin bi res toshi toshiti. Hani matsi toncobaan rihbi mai tsacaquin.

12

Haibaan baque xehancatsihqui capepahnhuan

¹Hen jisí bi naihoh quehax sca haibo sanareneni, jaa jixxon honanti, non jahueja Papan jaiquin hihxon non honannon. Bari xabapan rahcotax hoxne jamacax nichí. Doce huishiyahpa maiti maihax. ²Tohoyahax baque bihcatsihquish huaohihscái, camicasquimahax hisini. ³Hoque sca hen jisí bi naihoh huetsa hahan honanti jaribiscái, capepahnhuan sca. Chihiyahpa quesca capepahnhuan joshini. Siete mapoyahpa, chonca machanyahpa. Quiquin hapon maiti maihi, mapo tihibi jai jahuen maiti. ⁴Jahuen jina huinguin huinguin hahxon nai behuaxxon hicha huishi potaquin main paquenon. Rabe janin huishi janon huetsanco huishi yamascai, jan nai behuasah. Haibaan jahuen baque bihcatsihqui bi jaa bebonbi capepahnhuan nichí manati, cainscaiton jahuen baque pihannoxon. ⁵Baquexo cainah bi bebo baque, jatihibi nahuabaan quiquin hapo hihxon jato cahnxonma yono yonoyaxihqui bebo baque pishca. Cainaiton bi bochiquixon Papan bihininiquin, Papa janin hihnon, janoxon jan yonohi janinbi. ⁶Jahuen baquexo cain sca jaax, haibo jabati, jano tsoa yamahiton cahi nihi naman joneti. Jano jati ta Papan jaa bexojaxonnishqui, mil doscientos sesenta neten jano pimaxon coiranabo.

⁷Naihoh hen jisribiha bi rehtenannanscacani. Papan quiquin yonoti Miguel jahuen habbe yonotiboya jahux jaa capepahnhuan betan rehtenani. Jahuen habbe yoshin-boyahpahax capepahnhuan coshin rehtenani, Miguelninabo betan. ⁸Miguelnin coshi betan capepahnhuan senenyamahi. Miguelnin jabamaha bi naihoh jahuenbi catimahi. ⁹Miguelnin potahah main sca jahuen habbe yoshinbo betan jaa capepahnhuan paqueti. Jahuen jane huetsa cahen rono xeni, huetsa jahuen jane cahen diablo, huetsa jahuen jane cahen Satanas, main jihuetaibo rahsi parannica.

¹⁰Naihoh sca coshin yohuanai hean nincaquin:

—Papan ta noque hihti hahxonscái. Jahuen coshi jismaxon ta jahuen jihuetaibo jihuemascanoxihqui. Jahuen baque Cristo betan ta jahuen jihuetaibo jihuemascanoxihqui. Noquen huetsabo cahenica ta potascái, Papa bebonxon noquen huetsabo cahebahinaxon caheshinahi yoshin. ¹¹Noquen carneronen jimín ta jahuen jonibaan jaa yoshin namanjahiqui, Papan joi yohixon rihbi jaa namanjaquin. Mahuanoxon caman ta Papan joi jeneyamacannishqui. ¹²Jaa copi jenimanahue naibon. Jenimanahue naihoh quehabon. Huaohihnahue maibon, hianbon. Mato qui ta tiroma yoshin paquetihqui. Sina sina ta jaiqui. Jaa casticanti nea pishca jaonahiqui honanax ta sinatihqui —hihqui.

¹³Main potahah bochiqui jenquetsahax catima sca jaax, jaa baquexon mama sca benahi cahi, jaa sca rehtecatsihquin. ¹⁴Jaan rehteyamanon hihxon chiquihhuan pehi rabe hinanscanquin. Pehiyahpa sca jaax noyacahini cahax Papan jaa bexojaxonai janin cahi. Tiroma yoshiman merayamascanon jano sca coirancanquin. Quimisha bari huinotax huetsa bari pochinicon sca noconon caman piti hinancanquin. ¹⁵Jaa haibo rehtecatsihquin cahen jaa yoshin janán janani, jahuen jana janinhax jene bahihax huacacahinax haibo quiri bahihi. Haiboya jene tejabahti canon hihquish jascari. ¹⁶Janan janaxon tiroma yoshiman potahi jene haibo quiri coshin bahihi bi nocoyamahi. Nocoti pishinai bi mai sca quehpemehtanxon jaa huaca xehaquin. Main jascajaquin yanapanah cahen haibo mahuyamahi. ¹⁷Haibo qui tiroma yoshin hashoan sina sinatax haibaan baque texebo betan sca rehtenani cahi. Papan joi nincacoinaibo betan rehtenani, Jesus joi bihcainabo betan rehtenani cahi, jato queyocatsihqui. ¹⁸Cahax, quehijistima hian quexa sca nihreneni.

13

Yoshin yohina rabe

¹ Hen jisí bi quebjíjstima hian mehax yohina huesti mapeti, siete mapoyahpa, chonca machanyahpa. Jahuen machan janin chonca quiquin hapon maiti jai, machan tihibi maiti jai. Jahuen mapo qui huishá cahen janebo jai, Papa Diosen jistahihmahí janebo. ² Jahuen yora cahen hahua hino quescapah. Jahuen tahe cahen xahe tahe quescapah. Jahuen jana cahen hinon jana quescapah.

—Heen coshi tah hen mia hinanai, heen yonotibo rihbi mia hinanxon tah hen mia yohihi, min queenai quesca sca jahue jonibo hihbojaquin —capepahhuanen hino jaquin. ³ Jaatian hinon mapo huesti sca tsehueyahpa sca jai, hahan mahuati tsehueyahpa. Hahan mahuatihi bi rohahi. Rohahi jisish cahen jatihibi mai mehabo rahtexon hahqui sca jaton shinan camacanquin. ⁴ Jahuen coshi jan hino hinanai copi sca raboxonen nichish capepahhuan qui jonibo betihihpaqueti, jaa sca jaton dios quen. Hino qui jascarihbicani. Tsoa jaa hino quescapah quin, tsoan jaa teneti hahtipahiquin hihquish hahqui betihihpaquescani.

⁵ Tiroma yoshiman yohuanmaha sca hihti tiromabo hino yohuanscai. Hanibo yohuanbo. Cuarenta y dos hoxne jan jascanon cahen tiroma yoshiman jahuen coshi hinanquin. ⁶ Papa Dios qui tiromahi yohuani, Papan xobo qui tiromahi yohuanrihbihi, naihoh jihuetaibo qui tiromahi yohuanrihbihi. ⁷ Tiroma yoshiman coshi hinanah sca Papan baquebo betan rehtenaxon jato rehtescaquin. Jascajahax jatihibi mai mehabo, jatihibi texpa janinhahbo, jatihibi joiyahpabo, jatihibi jonibo, jatihibi main jihuetaibaan quiquin hapo sca hihqui, jaa hino. ⁸ Hahqui betihihpaquexon cahen jatihibi main jihuetaibo raboxonen nihpaqueyaxihqui, Papan baquen quirica janin jaton jane huishayamahihbo rahsi. Jahuen baquen quirica janin jaton jane huishá jaibo ta jihuenicabo qui. Papan jihuetaibo ta jaa hino qui betihihpaqueyamayaxihquiqui, capepahhuan qui betihihpaqueyamarihbihi. Naiyahpa mai jariyamahi bi ta carnero rehtequin hahcajaan rehtehahbo jahuen baque mahuayaxihqui Papan honannishqui, noquen hohcha copi hihqui bi.

⁹ Hahan nincati pabinquiyapaxon nincanahue. ¹⁰ Sipo xoboho tsahotibo ta sipo xoboho Papan tsahonyaxihquiqui. Nacoxon rehtetibo ta nacoxon Papan rehteyaxihquiqui. Jaa honanxon ta Papan baquebaan teneti hahtipahiqui, nincacoinquin rejeyamaquin.

¹¹ Hen jisí bi mai chicho quehax sca huetsa yohina caini. Rabe machanyahpa yohinah, chaxo machan quescapah. Jan yohuanaiya cahen capepahhuan yohuanai quescapi. ¹² Hiaman meha hinon jascahue hahcá, jaan rihbi sca jahuen coshin hahquin, hiaman meha hino hahxonquin. Hiaman meha hino qui betihihpaquenhue hahquin cahen jatihibi mai janin jihuetaibo raboxonen nihti jaan yohiquin. Mahua tsehueyahpahax bi rohahi hino qui betihihpaquenhue jato jaquin. ¹³ Jato nincamanoxon jahuen coshin jaan hahquin, jato rahtequin. Jaton jisnon bi cahen naihoh quehax chihi paquenon jaan paquequin. ¹⁴ Jahuen habhe yohinahnen jascajahue hahcá, jahan rahtetibojaxon main jihuetaibo jaan paranquin. Jato paranxon:

—Hiaman meha hino quescapahbo santojanahue, rerahah bi jihuetai yohinahbojaquin —jato jaquin. ¹⁵ Jascapah yohina santo yohuanscanon cahen jaan jato yoshin hinanquin, Jascajahue tiroma yoshiman jaah. Yohuanxon cahen joni rehteti jaton santobaan jato yohiquin.

—Raboxonen nichish hino santo qui betihihpaqueyamahibo jatihibi rehtenahue —jato janon santobo yohuanmaquin, mai meha yohinahnen. ¹⁶ Jascaxon jonibo honantijati jato yohiquin. Jatihibi jonibo honantijanahue, hanitahmaboya hanibo, coriquiyahpaboya jahuaborabojomabo, patorojomaboya patoroyahpabo, jatihibi jonibo mequen qui honantijayamaxon bemanan qui honantijanahue hahquin. ¹⁷ Jaa honantijomaxon cahen maroti hahtipahyamascacanquin. Jayajomaxon maromati hahtipahyamascabicancanquin. Honantijaquin cahen jaa hinon jane huishacanquin, jaayahpabonon. Jahuen jane huishayamaxon cahen jahuen numero sca huishacanquin, caibo mequen qui, caibo cahen bemanan qui. ¹⁸ Honanquin sirijanahue. Shinanxon jaa hinon numero toponnahue. Jonin numero tah qui, seiscientos sesenta y seis.

14

144,000 behuahibo

¹ Hen hahquirihbi jisí bi Papan mahchi janin jahuen baque nichí. Hahbetan ciento cuarenta y cuatro mil jonibo jano nichí, jaton bemanan qui carneronen jane huisha jaibo rahsi, jahuen Papan jane rihbi jaton bemanan qui huishá. ² Naihoh quehax yohuanai sca hean nincaquin, coshin bi res hani join yohuani. Hicha jene tejabahti paquetihcamahi hean nincaquin. Coshin terenhiqui quescapi. Hichaxon jaton chimati chimahibo quescapi, siri bi res. ³ Behua behna behuahibo hean nincaquin, Papa Dios bebon nichish behuahibo, jahuen chosco noyanica yoshin bebon nichish, jahuen yonoxonnicahbo bebon nichish behuahibo. Jaabo behuahi ta tsoabi haxeti hahtipahyamahiqui, jano jai ciento

cuarenta y cuatro mil jonibo res jaa behua haxenicabo. Jaabo ta maroquin hahcajaquin Papan bichiqui, jahuen baque copi jato bihquin, main jihuetaibo. ⁴ Jaabo ta haiboya rishtayamahibo qui, haibo honanyamahibo rahsi. Jano carneronen jato hiohi janin canicahbo rahsi. Mai mehabo tocan jihuetaibo ta jahuen jimín copijaquin Papan baquen jato bihnishqui, Papanahbo sca jaábo, carneronahbo jaábo. ⁵ Quesayosmabo ta qui, rishtajomabo.

Quimisha yonotibo yohuanai

⁶ Bejisihnixon hen jisí bi huetsa yonoti noyahi huinobohani cahi. Main jihuetaibo yohihi cahi, jatihibi mai mehabo, jatihibi texpa quehabo, jatihibi joiyahpabo, jatihibi nahuabo yohihi cahi, jatihibi tian yohiti joi siri jato yohihi cahi. ⁷ Cahí coshin bi res chanicana:hi:

—Papa Dios qui raquenahue. Hohchayahpabo ta casticanscaiqui. Jaa copi Mian tah min pontejaquin hahcai Papan, hahnahue. Jaan ta naibo hahnishqui. Maibo, hianbo, texpabo, jaan ta jatihibi janishqui. Jatihibi hahnica huesti qui raboxonen nichish betihihpaquenahue —hihqui yohuancanahi cahi. ⁸ Huetsa yonoti sca hahchon cahi, yohuancanahi cahi:

—Babilonia jema ta paquescaiqui. Paque ta Babilonia jaiqui. Hani jema ta poxotihqui. Haibo tsinixon jatihibi mai mehabo hahmaxon ta jahuen hohcha Babilonianen jato hinanpahonishqui —hihqui yohuancanahi. ⁹ Huetsa yonoti sca jaabo rabe chibani cahi coshin yohuancanahi:

—Jaa yohina yocacaibo, jahuen santo yocacaibo, jahuen honanti jaton bemanan qui jaibo, jano hiyahmahibo jaton mequen qui jaa jaibo. ¹⁰ Jascapahbaan ta Papan mocani xehati xehanoxihquiqui, sina sinaxon huehaxon jahuen hahan casticanti tason qui bochojaxon ta jaan jato xehamaquin texejamayamanoxihquiqui. Carneronen jisnon bi, Papan yonotibaan jisnonbi rihbi ta perehinhnatai chihí qui jato potahah hisin tenenoxihcanihqui. ¹¹ Jaabaan tenehi ta jascabi sca cohin potohihnayaxihquiqui, queyóyamahi. Tenebahinaxon teneshinahi tantiyamacani. Jaa hino yocanihbaan, jahuen santo yocanihbaan, jahuen honantiyahpabaan, jahuen janeyahpabaan jaabo jatihibichin ta jascapa coshi hisin teneti jaiqui. ¹² Papan jato jascajatihi honanxon ta tirona jonibo Papan nincacoinaibaan teneti hahtipahiqui. Jahuen joi bihcoinxon jahuen baque bihnixon jeneyamahibaan ta tenetihiqui.

¹³ Naihoh quehax yohuanai sca hean nincarihbiquin:

—Huishahue. Jaton Hihbo qui hinamehtax mahuataibo ta hahan jenimati jaresscaiqui. Jahuabi teneti ta yamascatihiqui, jahuabi tee teeti yamascai. Papa Dios jaabaan hahxonni quen ta jaton teebo jato betanbi cayaxihquiqui. Jascari rahan hih ta Dios Yoshin siri jaiqui —hihqui bochiquihax yohuani.

Tsinquiquin hahcajaxon casticanaibo

¹⁴ Jaatian hen jisí bi nai cohin joxoni. Jaa nai cohin cahtsahotai cahen noquebaque quescapah. Oro maitiyahpa, quiquin hapon maiti. Jan xecohi cahen tsinquinoxon hahan arroz xateti quescapah, hihti queno. ¹⁵ Papan jati janinhax sca huetsa yonoti picoquihrani jahui coshin yohuanjonahi:

—Miin xateti niascahue hoh. Tsinquiscahue hoh. Tsinquiti sca ta jaiqui, main jaibo. Noquen tsinquiti ta choshiscaiqui hoh —yonotinin nai cohin cahtsahotai jaquin.

¹⁶ Yohihah cahen jahuen xateti main potaquin. Jan main potahah cahen mai mehabo tsinquí sca jai.

¹⁷ Papan naihoh queha jati janinhax huetsa rihbi sca jahuen yonoti picoti, jaa rihbi tsinquinoxon hahan xateti quenoyahpa. ¹⁸ Huetsa rihbi sca Papa racanxonti janinhax picoquihrani jahui, chihí hihbomaha joxon, coshin yohuani:

—Miin xateti queno niascahue hoh. Xatexon mai meha bimibo tsinquiscahue hoh. Johue sca ta jaiqui hoh.

¹⁹ Jascajaha, jahuen xateti main niascaquin. Mai meha bimibo tsinquixon Papan bishtaxmati janin jato potaquin, sinaxon casticanquin Papan bishtaxmanon. ²⁰ Jemama qui caxon bishtaxmatinin bishtaxquin jamá jamaca jahuen bishtaxmati janinhax jimi bahiscaí, nemin. Joni masohi tiho nemin bahihi, trescientos kilometros caman bahihi.

15

Papan siete pahe xecohibo

¹ Hen jisí bi naihoh sca huetsa hahan honanti jai, hani, hahqui raqueti. Siete yonoti, paheyahpa rahsi, maibo Papan casticanquin queyonoxon hahan casticanti paheyahpa rahsi. Jaa pahen casticanquin jaabijaxon Papan casticanyamascanon.

² Jascapahbo jisnoxon cahen hori pari jisí bi hian quescapah sca jai, nexnanihax bi bahrini, chihí quescapi. Jaa hian quexa nichibo hicha jonibo jai, hiaman meha hino tenenihbo, jahuen santo yocaxonma tenenihbo, jahuen jane número bihyamanibo, jaabo jaa

hian nexnani quenichi, Papan jato hinanah hahan chimati arpayahpabo rahsi. ³ Jaa hian quenichi Moises behuaya behuacani, Papa Diosen joi yohinicaxon Moisesnin huishani behua. Carnero qui behuacani nescari:

Mian hahcai ta hanibo qui, Hihbon.

Hahqui raquetibo tah min hahcai.

Mia tah min noquen Hihbo Dios qui, jatihibi hihbo.

Miin bahibo ta pontebo bahi coinbo qui.

Jatihibi jonibaan quiquin hihbo tah min qui.

⁴ ¿Tsoa mihqui raqueyamahihquin, Hihbon?

Mihqui ta jatihibi jonibo ponte bi res siripi yohuanti jaiqui.

Mia huesti tah min jascapa hihti siri qui.

Ponte bi res min hahcai copi ta jahuex jatihibi nahuabo raboxonen nichish mihqui betihhpaquexihqui qui

hihcani behuahibo.

⁵ Jaa pecaho sca hen jisí bi Papan naihoh queha xobo janin jahuen jati quehpemehti. Moises huishamaxon jan hahxontijani joiyahpa bohnanti jano jan bexojani chique quehpemehti. ⁶ Jaa chique quehpemehtaiya jahuen siete yonotibo picoti, jahuen siete paheyahpa hihnoxihquibo. Pehneni siri joxo chopa sahuehax oro cinturonen pishnexehtax picocani. ⁷ Jahuen noyanica yoshin huestichin sca jato oro tason hinanpaquequin. Papan hahan casticanti bochohi rahsi. Jayaxon noquen queyoyosma Papan nincayosmabo casticanti bochohi. ⁸ Papan xaba hihti coshi copi jahuen jati janin cohin quextoti, jahuen coshin jan jato casticannoxihqui copi. Jaa copi cahen jahuen yonotibaan jaton siete pahe chicoquin queyonon caman Papan jati janin tsoabi hihquiti hahtipahyamanish.

16

Jaton tason chicohibo

¹ Papan jati chico quehax yohuanai sca hean nincaquin:

—Botannahue. Maton tason mai qui chicotannahue. Papan jato hahan casticanti jahuen siete pahebo mai qui chicotannahue —hahquin.

² Bebo quiha yonoti caxon sca cahen jahuen tason mai quiri chicoquin. Hahqui chicohah cahen main jihuetaibo nobescái. Hihtihosi tiroma nobebo. Capepahhuanen honantiyahpabo, jahuen santo yocacaibo, jaabo rahsi nobeti.

³ Huetsa sca caxon quebjistima hian qui jahuen tason chicoquin. Hahqui chicohah cahen hian jimicahinscai, mahuatipi jimi pisihi. Jaa copi cahen jeneho cahibo jatihibi mahuati.

⁴ Huetsa rihbi sca cahi jahuen quimisha sca. Caxon huacabo qui jahuen tason chicoquin. Texpabo qui. Jaabo rihbi sca jimicahinscai. ⁵ Jene coirannica Papan yonoti yohuanai sca hean nincaquin:

—Sirijaquin tah min jato casticanai, Papan. Min tah min rahma jai, neateman rihbi tah min japahonihqui. ⁶ Miin jihuetaibo ta jimi potamacanpahonishqui. Miin joi yohinicabo rihbi ta jimi potamacanpahonishqui. Jimi sca tah min jato xehamahi. Sirijaquin tah min jato casticanai, ponte bi res —hihqui Papan yonoti.

⁷ Papa racanxonti janinhax huetsa sca yohuanai hean nincarihbiquin:

—Jascari rahan, Papan. Mia tah min jatihibi hihbo qui. Hahcoinquin tah min jato casticanai, ponte bi res —hihqui.

⁸ Huetsa sca cahi, jahuen chosco sca. Caxon bari qui jahuen tason chicoquin. Jan hahqui chicohah sca bari xanascai jonibo mapojati tiho xanapi. ⁹ Barin hahca cahen mapohax jonibo hihti hisini. Barin hahca Papa Dios qui hihti tiromahi yohuancani, jahuen pahe jan jato qui chicohah copi. Casticana bi jaton shinan ponteyamacanquin. Papan ta noque casticanihqui, pontejaquin shinanscapan, hihyamanqui.

¹⁰ Huetsa sca cahi, jahuen pichca sca. Caxon, janoxon capepahhuanen yonohi janinbi jahuen tason chicoquin. Hahqui chicohah tiroma yoshiman shinanyahpabo jaton shinan xehpocahinscai. Hihti hisincani, hisin tenecasquimascaax hahri jaton jana rebo pihatax hashoan sca hisincani. ¹¹ Jaton hisin copi noquen naihoh queha Papa Dios hichacanguin. Jaton nobebo copi jaa roacanguin. Casticana bi jascabihi tiromacani, jaton shinan ponteyamacanguin.

¹² Huetsa rihbi sca cahi, jahuen seis sca. Caxon Eufrates janeya jaton paro qui jahuen tason chicoquin. Jascajaha taraxchahinscai. Taraxchahinaiya cahen bari cainai quirihihax jahui hapobo jaton sontaroyabi histon pohqueti sca jai.

¹³ Hen jisí bi capepahhuanen jana janinhax jiri quescapah yoshin tiroma caini, hihti jaroma. Jaa hinon jana janinhax sca huetsa rihbi caini, jascapahribi. Hoa huetsa yohinahnen jana janinhax huetsa rihbi jascapa caini. Quimisha yoshin tiromabo caini,

jirí quescapahbo. ¹⁴ Yoshin hihxon, hahan rahtetibo hahxon jonibo rahtexon jato jahuen shinan hinanquin. Jatihibi mai janin caxon, jano jai meyahapabo rehtenanti shinan hinanquin, Papa Dios betan rehtenannoxon sca jaton hahbe sontarobo betan tsinquitahbo jato shinan hinanquin. Jatihibi hihbo hihxon Papan jato casticanscanon Papa betan rehtenani bocani.

¹⁵ —Rahma tah hen yometso sanareneni cahi quescapi hen mato qui sanareneni canoxihqui, jisnahue. Hoxa tenexon maton chopa coiranax tah man hahan jenimati jatihí. Chopanma nihyamanoxon coirannahue, chopanma nichiton mato merayamahabo coirannahue —Papan jaiya bi rehtenani bocatsihcani.

¹⁶ Jaatian yoshiman hiohah tsinquiti bocani. Armagedon janeya main tsinquiti bocani, hebreobaan join janehah cahen Armagedon mai.

¹⁷ Huetsa yonoti sca cahi, jahuen siete sca. Caxon hueé qui jahuen tason chicoquin. Jan chicohiya, Papan jati janinhax coshin yohuani jai:

—Hen tah hen hahresscai —hihqui.

¹⁸ Cana bacatan bacatanscai. Coshin rihbi terenhiqui, toshiti. Mai hihti mihuani. Jahuentianbi jatihó coshin mihuanyamani, tsoan jisníma mihuani. ¹⁹ Mai mihuanaiya jaton hani jema caxque caxqueti, quimisha teque sca banenon. Nahuabaan jemabo cahen poxocahincani. Jaton Babilonia jema casticanti cahen Papan shinanbehnoyamaquin. Jahuen hahan casticanti mocani jato sehamaquin, sina sinaxon jahan jato casticanti. ²⁰ Mai coshin mihuanaiya cahen hiaman racatai mai toncobo yamacahinscai, queyocahini jene meran cahi. Mahchibo rihbi xayanah yamacahinscai, mispancahini. ²¹ Matsi toncobo rihbi hanibo paqueti. Naihoh quehax paquexon jonibo tsahcaquin, tsoan jisnímabo, hanibo tonco chahomabo. Papan tsacahah teneti hahtipahyamaxon bi Papa Dios hichárescanquin.

17

Hahresti haibo casticanti

¹ Jaa siete pahayahpa yonoti quihua huesti sca joxon:

—Hehbetan cahi johue. Jan tsinihi copi hani hahresti haibo Papan casticanscai hen mia jismahi canon johue. Hicha texpa janin nichí haibo tah qui. ² Mai meha hapobaan hahcá tah qui. Mai mehabo ta hahbetan hihquish pahen pahennishqui —hea jaquin jaa yonotinin.

³ Hea jascaxon cahen jemama qui hocho sca heen yoshin boquin. Hahbetan caxon hen jisí bi haibo, yohina joshini cahtsahotai haibo. Jaa yohina cahen jahuen yora janin jane tiromabo huishá hicha jai. Papan jistahilmahi janebo. Siete mapoyahpa, chonca machanyahpa yohinah. ⁴ Haibo cahen joshiniya yanconi chopayahpa. Oro tejotiyahpa, hihti copi macan bero romishin morojahax tejotiyahpa, moro copibo joxonihbo jaribihí. Jan xecohi cahen oro tason. Jahuen tason cahen rahntitibo bochohi, jahuen tsini hohchabo nanehah jahuen tason qui bochohi. ⁵ Jahuen bemanan qui huishá cahen jahuen jane jai, tsoan honanyamapahoni jane. Hani Babilonia jema, jaa cahen jahuen jane, tsinibaan mama, mai meha rahntitibaan mama. ⁶ Hen jisí bi Papan jihuetahaan jimi xehahax jaa haibo paheni, Jesusen joi jeneyamahibaan jimi xehahax jaa haibo pahen paheni. Jascapa haibo jisish cahen hea rahte rahtetah.

⁷ —¿Jahua copi min rahtetain? Jaa haibo jahua quin tah hen mia yohixihqui. Jan cahtsahotai siete mapoyahpa, chonca machanyahpa yohina jahua quin hen mia yohinon nincahue. ⁸ Hoa min jisi yohina ta japahonish bi yamascaiqui. Mai quinihuan janinhax ta hahquirihbi picoyaxihquiqui. Jaa pecaho ta Papan jaa rehteyaxihquiqui. Main jihuetaibo ta rahte rahteyaxihquiqui. Naiyahpa mai jananaxon ta jahuen quirica janin jahuen jihuetahaan janebo Papan huishanishqui jatihibi. Jaa quirica janin jan jaton jane huishayamanihbo rahsi ta nea yohina jisish rahteyaxihquiqui. Jaa yohina japahonish bi queyonish, queyonish bi hahquirihbi jaresscai quen rahte rahtecani. ⁹ Honannoxon nincahue hen mia yohinon. Jahuen siete mapo ta siete mai qui. Jano jaa haibo jihuetai maibo siete quiquin hapo jai. ¹⁰ Jaa hapobo ta pichca mahuascanishqui, huetsa ta rahma jaiqui. Huetsa rihbi ta joriyamahiqui. Jahuextian rihbi ta basimatahni baneyaxihquiqui. ¹¹ Jaa japahonish bi yamascai yohina ta huetsa quiquin hapo rihbi qui, jayanish ocho sca. Jaa ta texe jahuen hahbe hapobo xohtayaxihquiqui. Jaa pecaho cahen Papan jaa rehteyaxihqui.

¹² Hoa min jisi chonca machan ta chonca quiquin hapo qui, jayaxihquibo rahsi. Jaa yohina joribiscaiya ta basima tahni res huesti hora res hapoyaxihcanihqui, yohinahnen jato hapomahah. ¹³ Jaa chonca hapobo ta huesti shinanyaxon jaa yohina huesti sca jaton quiquin hapo hihnon hapomayaxihquiqui, jatihixonbi jaa yanapanquin. ¹⁴ Carnero betan

ta rehtenanyaxihcanihqui. Carnero betan rehtenanax bi ta hahbetan senenyamayaxihcanihqui. Jaan ta jato rehteyaxihqui. Quiquin hapobaan hapo hihxon jatihibi hihbo hihxon jato namanjaquin. Jaa carnero manahibo ta jahuen quenahahbo qui, jahuen caisahbo, jahuen joi nincacoinaibo —hea jaa yonotinin jaquin.

¹⁵ Jaatian sca hea yohirihbiquin:

—Hoa min jisi texpabo ta jonibo qui, jano jaa haibo tsini nich. Jahuen jonibo can, mesco mai meha jonibo, mesco texpa quehabo, mesco nahuabo, mesco joiyahpabo. ¹⁶ Jaa yohina, jahuen chonca machanbo min jisi, jaabaan ta jaa hahresti haibo jistahihmayaxihcanihqui. Jistahihmaxon ta potayaxihcanihqui, benejoma sca hihnon, chopanma sca nihnon. Jahuen yora nami ta piyaxihcanihqui. Piquin texejaxon ta chihin sca mapojayaxihcanihqui. ¹⁷ Jascajati shinan jaton jointi janin Papan janahah ta jascayaxihcanihqui. Jaan shinanmaha ta huesti shinanyaxon jaa yohina jaton quiquin hapo sca hihnon jascajati yohiyaxihcanihqui. Jasca ta jayaxihqui hihxon Papan yohini quescabi janon ta jascayaxihcanihqui. ¹⁸ Jaa hahresti haibo min jisi ta jaton hani jema qui. Janoxon ta jahuen hapobaan huetsa mai mehabo yono yonoyaxihqui —hea jaquin.

18

Babilonia potojaquetanaibo

¹ Jaatian hen jisi bi naihoh quehax botopaqueti huetsa yonoti jahui, Papan coshi hinanah hihti coshi. Coshiyahpahax jahui nihrenenxon cahen mai xabajarenenquin. ² Hihti coshin jaa yohuani, coshin bi res:

—Babilonia janeya quiquin jema ta paquescaiqui. Poxocahin sca ta jaiqui. Tiroma yoshinbo jano jihueta sca tah qui, Satanasnen yoshinbaan jati sca tah qui. Jano rishta hihsabo paichi, rahnintibo jano paiti tah qui. ³ Hea nohuejahue, Hea nohuejahue, hahxon ta jatihibi mai mehabo hahmanishqui, jahuen hahmatibo sca jaabo hihnon, hahbe tiromabo. Mai meha quiquin hapobo ta hahbetan tsininishqui. Hicha patorobaan ta jaa tsini haibo rajisti shama copi hicha jonibo hahan queenmaxon tsama coriqui bihcannishqui —hihqui jaa coshi yonoti.

⁴ Hen nincacah bi naihoh quehax yohuanai jaribih:

—Jaa janinhax piconahue, heen jonibaan. Hahbe hohchayahpayamanoxon janohax piconahue. Jaa casticanquin hen matoyabi casticanyamanon piconahue. ⁵ Jahuen hohcha ta nai queya tiha tsamatihqui. Jan tiromani copi ta Papan casticancatsihscaciqui. ⁶ Jaa jema mehabaan tiromajapahoni quescabijaquin jato hahnahue, copiquin. Jaabaan hahni quescabijaquin hahxon bi rabejaquin sca hahribinahue. Jaa jema mehabaan huetsa jonibo tiromajapahoni quescabijaxon bi rabejaquin sca jaa jema tiromajanahue. ⁷ Hea ta rajisti siri qui, jahuabi tah hen pahiyamahi hih ta japahonishqui. Jan hicha janí quescarhibi sca tsama hisin tenemanahue. Hihti benamanahue. Hea ta quiquin hapo haibo qui, yononma tah hen hihiyamahi, jahuentianbi tah hen benatimahi hih ta japahonishqui. ⁸ Jaa copi ta jaa huesti netenbi non rishquihah mahuanoxihcanihqui, benanoxihcanihqui, pihan hihquish mahuanoxihcanihqui, cohahah ta queyocahinyaxihcanihqui. Jascapahbo casticannicah ta Hihbo Dios qui, hihti coshi —hihqui.

⁹⁻¹⁰ Hahbetan hihresax hohchapahoni hapobo ta jaya huaohihnoxihqui, jaya jihihqui. Mapohax hani cohin xohtóhihnatai hochoxon jisish ta huaohihquish jahuen casticanti qui raquetax hocho res nihrenennoxihcanihqui.

—Hahrai, noquen hani jema, noquen coshi Babilonia jema. Jaatian huesti ta jatihibi pahen mia merahihqui, Diosen raanah —hih ta janoxihcanihqui, hapobo.

¹¹ Jaton nontin napocohtai tsoanbi jato maronyamascaiya ta patorobo rihbi benatax jaya huaohihnoxihcanihqui. ¹² Maromacatsihquin jaabaan bohi oro bero romishin, yami peheniyahpa mai, poquinxon nanegah macan copibo, hahan paronohitjati quescapahbo, morobo, joxo chopabo, chopo yanconihbo, seda chopabo, joshin chopabo, hinini jihuibo, yohina xeta jahuaborabo, quenchabo quescapahbo siribo jihuibo, bronce, yami, macan pehenibo, ¹³ hahan pitijati canela, yochi, hahan hininjati, yora payotima raho, rasquifax hinintibo, xehatibo, xeni, hatsapoto quescapahbo, trigobo, ganado hani-boya hanitahmabo, cabachobo, carrobo, hina jonibo rihbi. Jascapahbo tsoanbi jato maronyamascaah:

¹⁴ —Min hihti picatsihpahoni bimibo ta mia janin yamascaiqui. Xoapahonish bi tah min jascayamascai, xaba shama hihpahonish bi tah min jascayamascai, jascapa hihpahonish bi tah min jahuentianbi jascayamascatihi —hihcani.

¹⁵ Jaa jema janinxon hicha coriqui cananpahonibo ta jan mapohi copi raquetax hocho manahitax, benatax huaohihyaxihqui.

¹⁶ —Hahrai, noquen hani jema, joxo chopa sahuehi haibo quescasca tah min siripahoni-hqui, yanconiboya joshini rajotiboyahpa quescapah hihpahonish bi tah min jascayamascaí. Oro rajotiboyahpa quescapahax, siri macan beroya joxoni moroyahpa hihpahonish bi tah min jascayamascaí. ¹⁷ Hihti siripahonish bi tah min huestijaquin rishquihah tiromacahinscaí —hihquish huaohihscacani.

Nonti hihbobo jatihibi, nontin cahibo jatihibi, nontin teetaibo, hiaman teetaibo jatihibi, ¹⁸ jaabo jatihibichin cahen hocho nihxon jahuen cohin naihoh xohtóhíhnnatai jisish:

—Jascapa jema hani ta jahuenbi yamanishqui —hihcani huaohihhanan.

¹⁹ Bena benatax mai poto hahrí mapocohtax huaohihcani:

—Hahrai, jano tah non quebjistima hiaman cahi nontiyahpabo jatihibichin hicha coriqui bihniqui, jano hicha coriqui janish bi ta histon res tiromacahinaxqui —hihcani huaohihqui.

²⁰ Jaa jemahhuan tiromacahinaíya jenimanahue, naihoh quehabon. Jenimanahue, Papan jihuetahton. Jenimanahue, Papan raantibon, jahuen joi yohinicabon. Mato copixonquin ta Papan jaa casticanaxqui.

²¹ Jaatian hihti coshi yonotinin hani macan bihxon hian janin potahi hean jisquin. Hani renti tihopa macan. Hiaman potaxon:

—Nescajaquin potahah quescasca tah min queyocahinnoxihqui, Babilonia jemahhuan, jahuentianbi jistima sca mia janon. ²² Chimataibo, rehue hahcaibo, behuahibo, musica hahcaibo jatihibi ta mia janin yamascatihiqui. Ni jenguetsahpabo mequeman teetaibo ta mia janin yamascatihiqui. Mia janinxon rentin renehibo ta tsoanbi nincayamascatihiqui. ²³ Tsoanbi ta mia janinxon johue quetejayamascatihiqui. Haibo bichish huanohi ta mia janin tsoanbi nincayamascatihiqui, benohi yohuanai haibobo rihbi ta mia janin jahuentianbi yamascatihiqui. Mia janin jihuapahoni patorobo ta hanibo patorobo janishqui, caibo mahuinquin. Miin yobebeaan ta jatihibi mai mehabo paranpahonishqui.

²⁴ Jaa jema janinxon ta rehtequin Papan joi yohinicabo jimi potamacannishqui. Janoxon ta Papan jihuetahbo rihbi jimi potamacannishqui. Main jaibo jatihibi rehteheh ta jaa jema janin jaa hohcha banetihqui —hihqui jaa coshi yonoti.

19

¹ Jaa pecaho sca hen nincacah bi naihoh tsama joni tsinquitax behuahi quescapi, coshin behuahibo.

¡Aleluya! Noquen Papa Dios ta noque jihuemanicah qui.

Jahuen shinan ta hihti siri qui.

Jahuen coshin ta hahcoiniqui.

² Casticanquin ta ponte hahquiqui.

Casticanquin ta sirijacoinihqui.

Jaa tsinipahhuan haibahhuan ta casticancoinaxqui, tsinixon jan mai mehabo tiromajani copi casticancoinquin.

Papan jonibo jaa haibaan rehteni ta copiquin sca jaa sca tiromajahaxqui hihcani behuahi.

³ Jascari behuahax, hihribicani:

—¡Aleluya! Cohoti ta jascabi sca jahuen cohin xohtóhíhnnayaxihqui.

⁴ Jaatian sca jaa veinticuatro yonoxonnicahbo betan jahuen noyanica yoshinbo raboxonen nichish Papa Dios qui betihihpaquetax:

—Jascari rahan. ¡Aleluya! —hihcani.

⁵ Jaatian janoxon Papan jisi janinhax yohuanai hean nincaquin:

Noquen Papa Dios qui behuanahue,

Papan jonibon, jaa nincacoinaibon, hanibo betan hanitahmabo

hahqui behuanahue.

Carnero huanomahibo

⁶ Jascaraibo nincaxon, tsamatax behuahibo sca hean nincarihbiquin. Coshin bi res behuahibo, hani huaca mahchi janinhax tejabahticamahi coroti, coshin bi res terenhiqui quescari behuahibo:

¡Aleluya! Jatihibi hihbo hihxon ta noquen Papan hihboja sca jaiqui.

⁷ Jenimanon benahue,

coin coinnon benahue,

hahqui behuanon benahue.

Carnero ta huanoscanoxihqui.

Jahuen haibo ta jaya huanoti chopa sahuehax nihresscaíqui.

⁸ Pehneni joxo chopa siri hinanah ta jaayahpahax manatihqui

hihcani. Jaa pehneni joxo chopo ta Papan jihuetahbaan sirijaquin shinanxon joni huetsa yanapanpahonibo qui.

⁹Jaatian:

—Huishahue —hea jaxon— Carnero huanohiya piti pihi benahue hihquiboya ta hahan hihti jenimati jaiqui —hea jaquin. Jaa hea huishamaxon:

—Jaa joibo ta Papan joi coin qui —hahquin hea.

¹⁰Hea jascajaha cahen raboxonen nichish jaa yohuanai qui betíhhipaquecatsihqui bi:

—Jascayamahue. Mihbe Papan joni tah hen hea qui, miin huetsabaan hahbe joni rihbi tah hen hea qui, Jesusen joi yohihibaan huetsa. Papa huesti qui betihhipaquehue. Papan joi yohihibo jatihibi ta Jesusen joi yohinicabo qui —hea jaquin.

Cabacho joxoni cahtsahotax jahui joni

¹¹Jaatian nai quehpemehtaiya hen jisí bi cabacho joxoni. Cabacho joxoni cahtsahohtax jahui cahen Papa queenai quescabijanica hahcoinnicah. Ponte hahxon jonibo yononica, ponte hahxon tiromabo namanjanoxon jato betan rehtenannicah. ¹²Jahuen bero cahen chihi quescapi. Jahuen mapo cahen quiquin hapon maitiyahpa. Jahuen maiti janin cahen jahuen jane jai, huishá. Tsoan honanaima jane, jaa huestichin honanah. ¹³Jahuen chopo cahen jimi bi res, jimi qui maosahca. Jahuen jane cahen Papan Joi. ¹⁴Hahchon sca Papan sontarobo cabacho joxonihbo cahtsahohtax becani. Joxo chopayahpabo rahsi, rishtajoma joxoni siri jaton chopo. ¹⁵Jahuen jana janinhax cahen hahan rehtenanti machito quenoya picotan picotani, hahan nahuabo rerati. Coshin bi res ta jato hihbojaxihquiqui. Jato qui sinaxon jatihibi hihbo hihxon jato hihti casticannoxon noquen Papa Diosen raanah cahen jato rehtehi cahi. ¹⁶Jahuen chopo qui huishá cahen jane jai, jahuen quishi qui jascarihibi. Jaa jane cahen hapobaan quiquin hapo, hihbobaan quiquin hihbo.

¹⁷Jaatian hen jisí bi bari namanbi huesti yonoti nihxon coshin quenaquin. Jatihibi hishminbo quenaquin:

—Pihi benahue, Papan mato hichaxon pitijaxonah pihi benahue. ¹⁸Man pinon ta rehtexoniqui, quiquin hapobo, sontaro hapobo, coshi jonibo, cabachobo, jato cahtsahotaibo, patorojomabo jatihibi, patoroyahpabo jatihibi, hanitahmaboya hanibo, nami hichahi pihi benahue —jato jaquin.

¹⁹Hen jisí bi jaa hen jismenoha hino, mai meha quiquin hapobo, jaton sontaroboya hichahi, jaabo jatihibi tsinquití. Naihoh quehax jahui bo betan rehtenannoxon tsin-quicani. Cabacho cahtsahotax jahui rehtenoxon tsinquicani. Jahuen sontarobo rihbi rehtecatsihquish tsinquicani. ²⁰Rehtenoxon tsinquitaon bi jaan pari jaton hino yoshin bihquin. Hिनon quesa joi yohixonnica hihbi bihquin rabebi. Jaa quesa joi yohixonnica-ton cahen jahuen coshin hahxon, rahtexon, hinon janeyahpabo paranpahonish, jahuen santo yocacaibo jaan paranpahoni. Mohitahpa jato rabebi bihxon, chihi hianencanya sca jato rabebi potaquin. ²¹Texebo cahen jahuen jana janinhax picotan picotanaon reraxon jato rehtepaquequin. Jato pihi sca jatihibi hishminbo yani yanicahini cahi.

20

Mil bari yonohibo

¹Jaatian hen jisí bi naihoh quehax Papan yonoti huesti botopaqueti. Hihtihosi cadenaya jahui, hahan xehpoti llave rihbi xecohax. ²Joxon cahen jaa capepahuan yahtanquin. Jaa capepan jane huetsa cahen rono xeni, huetsa jahuen jane cahen Tiroma Yoshin, huetsa jahuen jane cahen Satanas. Mil bari jaa tiroma yoshin nexáscanon cahen jahuen cadenanen jaa nexaquin. ³Nexaxon nemimahhuan qui potaquin. Potaxon jahuen xehpotinin xehpoxon boyaquin, jahuen mil bari senennon caman. Jaa pecaho ta basima tahni nihnon hahquirihbi quehpentihiqui.

⁴Jaatian hen jisí bi hahan tsahoxon jonibo yonoti tsahotibo hichahi. Jano cahen tsahotaibo jai, jonibo yononoxon haponahue Papan jato jaah jano tsahocani. Jesusen joi jeneyamahibo copi textenihbo yamanicabo jano jaribihi, Papan joi jeneyamahibo copi textenihbo, hino qui betihihyamanibo, jahuen santo qui betihihyamanibo, jaton bemanan qui tiroma yoshiman jane huishamayamanibo, jaton mequen qui jahuen jane huishamayamanibo jaabo rihbi jano jai, textexon rehtenihbo yamanicabo. Hahquirihbi jihuexon cahen Cristo betan mil bari yonocanquin. ⁵Texe yamanicabo jascayamahi: jaabo cahen mil bari senennon caman jihueyamahi. Hen yohihi Cristo betan yonohibo ta jahuen huenimenonicabo qui. ⁶Criston huenimenonicabo ta jahuenahbo qui, jaan hahxonah hihti jenimahibo. Jaabo cahen mahuyosmabo sca, jenquetsahax hahquirihbi mahuatimabo, Papa Dios betan yohuanyaxihquibo, Cristo betan yohuanyaxihquibo. Mil bari ta Cristo betan yonoyaxihcanihqui.

⁷ Jahuen mil bari queyoscaiya sca ta quehpenxon cainmaha jahuen sipo quinihoh quehax Satanax picoyaxihquiqui. ⁸ Picoxon ta jatihibi mai janin jihuetaibo jaan paranyaxihquiqui, jatihibi texpa janin jihuetaibo paranquin. Gog janeya mai mehaboya Magog janeya mai mehabo. Paranson ta jato hiyaxihquiqui, Papa Dios betan rehtenani bohábo. Jaan paranson tsinguihah cahen hichahi topontimahi, texpa quexa mashi bero jai tihí. ⁹ Hen jisi bi mai mehabo tsinqui tsinguijon Papan jihuetaibo rehtecatsihquin jano jaabo jai jato bahi xehpohahtanbohancanquin. Papan jihuetaibo jema janin jaibo jatihibi rehtenonon cahen hichaxon xehpohahtanbohancanquin. Papan jihuetaibo rehtecatsihscabaan bi naihoh quehax chihi paqueti. Satanax chibanaibo qui paquexon jato queyobahinquin. ¹⁰ Jato parannica yoshin bihxon sca chihi hianencanya Papan potaquin. Jano jan yoshin hinoya jahuen quesa yoshin potani janin Satanax sca potarihbiquin. Jano potahah cahen jascabi mapohi. Chihi tenebahinaxon teneshinaxon jascabijaquin teneti jai, chihi nocayosma.

Yamanicabo tsinquixon noquen Hihbaan jato casticanai

¹¹ Jaatian hen jisi bi haaani tsahoti, hihtihosi tsahoti joxoni. Hahan tsahoxon jonibo casticanti. Noquen Hihbo hahan tsahoscai bi hean jisquin. Jaan yohihah cahen naiyahpa mai yamacahinscai, jahuenbi yamascai. ¹² Yamanicabo sca hicha hean jisquin, patoroboya jaton jonibo hihpahonibo, Papa Dios bebon nichinah manataibo rahsi. Jato casticanxon cahen hicha huishayahpa quiricabo caxquexon huetsa rihbi noquen Hihbaan caxquehah. Jaa quirica huesti cahen jihuenicabaana. Jano nichí yamanicabo tiromabo quen jaabo tiromahi jihuepahoni huishapaquenihsxon jaa joi jato nincamapaquexon sca jato casticanscaquin. ¹³ Noquen Hihbo bebon nichibo cahen caibo jene meran canish bi jaa bebon sca nichibo, caibo cahen mahuanish bi jaa bebon sca nichibo jaan jato quenahah. Jaabo tiromapahonibo tihojaquin jato casticanquin: hihti tiromanibo hihti casticanxon, hashoan hicha tahma tiromanibo hashoan hicha tahmabojaquin casticanquin. ¹⁴ Casticanquin ta jato jatihibi chihi qui potahihqui. Jaa hian quescapah chihi janin potahihnihaabo ta hahquirihbi mahuataibo qui, rabejaquin mahuumaha jano sca banetaibo. ¹⁵ Jihuenicabaan quirica janin jaton jane yamaha quen chihi janin canicahbo rahsi, Papan jato jano potahah.

21

Naiyabi mai behna

¹ Jaatian hen jisi bi nai behna jaresscai, mai behna rihbi jaresscai. Jamenoni naiyahpa mai cahen yamascai, queyoni. Quebjistima hian rihbi yamascai. ² Bochiqui sca hen jisi bi Papan jema naihoh quehax botopaqueti jahui. Jahuen Jerusalem behna, jaan raanah botopaqueti jahui. Hihti siri, huanomaha jahuen benen bihnon haibaan hihti siri rajotibo sahuehi quescari hahan hihti siritiboya Papan jema botopaqueti. ³ Hen nincacah bi Papan janoxon yonoti janinhaxcoshin yohuani:

—Jisnahue. Jonibo tocan ta Papan jati qui. Jato betanbi ta jihuenoxihquiqui. Jaabo rihbi ta jahuen jihuetaibo hihnoxihquiqui. Papa Diosen ta jato jihuequihnoxihquiqui. ⁴ Jaan jihuemaha ta tsoabi benayamascatihiqui, tsoabi mahuayamascai, tsoabi huaohiyamascai, huiniyamascai, hisinyamascai. Jascápahonish bi jascayamascai —hihqui.

⁵ Noquen Hihbo sca yohuani:

—Jisnahue. Behna sca tah hen jatihibi hahquirihbi janahi —hihqui. Jascaxon hea sca yohiquin:

—Huishahue. Nea hen mia yohihi ta hihcoinaí joibo qui. Hen yohihi quescabi ta jatihiqui. Huishahue.

⁶ Hen huishascanon sca yohuanrihbíhi:

—Hen tah hen queyoscai. Hea tah hen jatihibi hihbo qui. Jatihibi jananixon tah hen hean queyohi. Jiricatsihquibo tah hen hahan jihueti jene hean xehamatihí, hianresquin.

⁷ Jascapa tah hen hea tenexonibo hean hianai. Hea ta jaton Papa Dios qui, jaabo rihbi heen baquebo. ⁸ Caibo cahen jascapahmabo: teneti qui raquetaibo, nincacatsihyamahibo, rahninti rishtayahpabo, joni rehtehibo, tsinihibo, yobebo, santo yocacaibo, jatihibi quesabo, jascapahbo tah hen chihi janin potahi, rabejaquin hean mahuumahi rahsi ta chihi janin canicahbo qui —hea jaquin.

Papan Jerusalem jema behna

⁹ Jaatian, hen jisi bi jaton sieté tasonya canicahbo huesti hehqui jahuí, Papan jayaxon mai casticanai pahe boxonnica. Joxon sca:

—Johue. Carneronen bihnoxihqui jahuen haibo mia jismanon johue.

¹⁰ Hea jascaxon, hani mahchi queya janin heen yoshin boxon, noquen Hihbaan Jerusalem jema hea jismaquin. Papan raanah jaa jema naihoh quehax botopaquetai hea

jismaquin. ¹¹ Xabayahpa jema, Papan xabapan xabati. Copi macanbo pehnethcamahi, jaspe macan non jisquin hoque pecabahinquin jai quescari. ¹² Hani chiqueyahpa, queyani. Jahuen chique cahen doce xehquiyahpa. Xehqui tihibi janin cahen Papan yonoti huesti quenichi, jatihibiyanish doce yonotibo quenichi. Jahuen xehquibo cahen janeyahpa rahsi, xehqui janinbi huisha rahsi. Jatón jane ta Israeli doce baquebaan jane qui. ¹³ Bari cainai quiri quimisha xehqui janón, chiponquiri quimisha rihbi, reboquiri quimisha rihbi, jari bari cahi quiri quimisha rihbi. ¹⁴ Chiquequin macan tsamanhihninoxon cahen hahqui tsamantibo macanbo jaribihi, doce queco hahqui tsamantibo. Hahqui tsamantibo macan quecobo cahen janeyahpabo rahsi, carneronen raantibaan janeyahpa.

¹⁵ Hehbetan yohuanai yonotinin sca hahan toponti oro taxo xecoxon jaa jema toponscái hean jisquin. Jahuentihopa hin hihxon jema toponxon, jahuen xehquibo toponrihbixon jahuen chiquebo toponpaequin. ¹⁶ Jaan toponah cahen jahuen nenque jatihí janón, jahuen queya jatihí rihbi janón, jahuen naखा jatihí rihbi. Jahuen nenque hihqui quescar-ihbihi ta jahuen naखा qui, jahuen topontinin jaan toponah dos mil doscientos kilómetros. Jahuen nenque, jahuen naखा, jahuen queya, jatihixónpa rahsi. ¹⁷ Jahuen chique toponah cahen jahuen queya sesenticuatro metro, jonibaan toponai quescajaquin jaan toponah.

¹⁸ Jaspe macaman chiquecah cahen yancon shama. Jema cahen oro bi res, oro pionihax bi non jene nexnani jisquin hoque pecabahinai quescapi. ¹⁹ Hahan chique tsahontibo cahen hihti siribo macan berobo copibo hueonah, hihti siri hihnon. Naman meha queco cahen jaspe. Jaa cahchian tsahotai cahen zafiro. Jaa cahchian tsahotai sca cahen ágata. Jaa cahchian tsahotai sca cahen esmeralda. ²⁰ Jaa cahchian tsahotai sca cahen ónice. Jaa cahchian tsahotai sca cahen cornalina. Jaa cahchian tsahotai sca cahen crisólito. Jaa cahchian tsahotai sca cahen berilo. Jaa cahchian tsahotai sca cahen topacio. Jaa cahchian tsahotai sca cahen crisopasa. Jaa cahchian tsahotai sca cahen jacinto. Jaa cahchian sca cahen amatista. ²¹ Jahuen xehquibo ta moro qui, xehqui tihibi huesti moropahhuanen xehquijaha, jatihibiyanish doce xehqui. Jema chicho cahen oro bi res, oro que bi jisquin hoque pecabahinquin, hihti siri.

²² Hen jisí bi jema janin jano tsinxiixon Papahon shinanti xobo yamahi. Carnero betan Papa Dios janobi hihqui copi jascapa xobo pishinyamahi. Jatihibi hihbohax bi noquen Papa Dios janobi hihqui. ²³ Bari rihbi jano pishinyamahi, hoxne rihbi pishinyamahi. Papan xaba jano xabatai copi bari xabati pishinyamascai. Carnero ta jahuen xaba qui. ²⁴ Jahuen xabapan ta jatihibi jonibo nihyaxihquiqui. Mai meha quiquin hapobo ta shinanquin sirijahax Papa qui siripi yohuani hihcoyaxihquiqui. ²⁵ Jano yame yamascai copi ta jahuen xehquibo jahuentianbi xehpoyamayaxihcanihqui. ²⁶ Noquen quiquin Hihbo qui hihti siripi yohuancatsihquish ta mesco jonibo, hicha mai mehabo jano hihcoyaxihquiqui. ²⁷ Papan jihuetahmabo ta jano hihcotimahiqui. Papan jihuetahmabo, rishtayahpabo, quesabo, jascapahbo ta jahuentianbi hihcotimahiqui. Carneronen jahuen quirica janin jahuen jihuetahbaan jane huishá cahen jaabo rahsi jano hihconicabo.

22

¹ Papan yonotinin hea jismahah cahen janoxon Carnero betan Papa Diosen jihuemahi janinhax huaca tejabahti hean jisquin. Jahuen jene cahen nexnani siri, jaa jene xehahax non jihuescatihi. ² Jema naponbi bahi naखा janón, jaa bahi naponbi sca jaa huaca tejabahti. Huaca quexa nihbecoinai cahen hahan jihuetai jihuibo. Doce bimiboyahpa jihui, hoxne tihibi huetsa bimiyahpa. Jahuen pehi rihbi cahen hahan rahomehti, nahuabo hahan rahomehti. ³ Jahuabi tiromabo ta yamascatihiqui. Jaa jema janinbi ta Papa Dios betan Carneronen jato jihuemayaxihquiqui. Jahuen jihuetahbaan ta hahbetanbi hihxon hahqui jatón shinan camayaxihquiqui. ⁴ Jatón bemanan qui huishá ta Carneronen jane jayaxihquiqui. Carnero bejisabo ta jayaxihcanihqui jahuen jihuetahbo. ⁵ Jano ta yame rihbi yamascatihiqui. Johue quetejati pishinyamascai. Bari xabati rihbi pishinyamascai. Noquen Hihbo Diosenbi jato xabajaha huetsa xaba pishinyamascai. Jahuen jihuetahboxon ta queyoyamanox manaquin jascabijaquin sca yonoxonyaxihcanihqui.

Jesucristo nea pishca sca jaonahi

⁶—Hihcoin tah hen jai. Hen mia yohihi quescabi ta jayaxihquiqui. Papan ta jahuen yoshin jato hinaxon jahuen joi chaninicabo yohuanmanishqui, jahuen joi yohihahbo. Hea sca ta raanaxqui, jahuen yonotixon hen jahuen jonibo yohinon, janoxihquibo hen jato yohinon.

⁷ Histon tah hen mato qui catihi hih ta jaiqui. Nea hen mia huishamahi joibo bihcoinax ta nincacoinabo hahan jenimati jaresscáiqui —hea jaquin Papan yonotinin.

⁸ Jaan jismahah tah hen nincaxon jisiqui, hea Juaman. Nincaxon jisish tah hen hea yohihi yonoti naman raboxonen nichiqui, hahqui betihihpaquenoxon.

⁹—Jascayamahue. Mihbe hahxonnicca tah hen qui. Papan joi yohinicabo, jahuen hahxonnicabo hihqui quescarihbinica tah hen qui, hen mia huishamaha joi nincacoinaibo Papan hahxonnicabo hihqui quescarihbinica. Papa huesti qui betihihpaquehue —hea jaquin, raboxonen nichiton.

¹⁰Jascajaxon:

—Hen mia huishamaha jatihibi jato yohipauehue. Hen mia yohihi quescati ta nea pishca sca jaonahiqui. ¹¹Tiromaparihibo jascabi tiroma janon. Rishtayabo jascabi rish-tayabo janon, sirijaquin hahcaibaan jascabijaquin sirijahi jan janon, Papanahbo jascabi Papanahbo janon —hihqui.

¹²—Coiramenahue. Histon tah hen mato qui catihi. Hea teexonaibo copijahi tah hen catihi. Hea hahxonpahonibo quescabijaquin tah hen jato hahxontihí, jan hahxonni betan senenjaquin. ¹³Hea tah hen jatihibi hihbo qui. Jatihibi jananixon tah hen hean queyohi. Hean hihmahah ta jatihibi jaiqui. Heanbi tah hen queyorihbihi.

¹⁴Jaton chopapahtsacaibo ta hahan jenimati jaiqui. Jaabaan ta hahan jihueta jihui quiha piti hahtipahiqui. Jaabo ta jema xehquiibo janin hihconicabo qui. ¹⁵Hihcoyosmabo cahen hochiti quescapa jonibo, yobebo, joni rehtehibo, santo yocacaibo, quesahibo, quesajaquin paranaibo, jascapahbo ta hihcoyosmabo qui.

¹⁶—Hea Jesusen tah hen heen yonoti mato qui raanai, hen mato yohihi joibo man Papan baquebo nincamanon tah hen raanai. Hea tah hen Davidi xohta qui, hean hihmahah ta jaa janishqui, jahuen chini rihbi sca tah hen joniqui. Quiquin xabaya tah hen qui, Xaba Hihbo.

¹⁷Johue hih ta Dios Yoshin jaiqui. Johue hah ta Criston bihtibaan jaiqui. Nincaxon Johue hahnahue maton rihbi. Jiricatsihquish benahue. Queenxon hahan jihueta jene bihresnahue, hinarresa tah qui —hah sca noquen Hihbaan hea jaquin.

¹⁸Nea hen huishahi joi nincaxon huetsajayamanahue. Man honannon hihxon ta hen mato yohihi. Hean huishahi qui huetsa joi sca rechihibo ta Papan rishquiyaxihquiqui, nea quirica janin jai quescabijaquin. ¹⁹Nea joi man texe potahiya ta Papan rihbi mato jahuen hahan jihueta jihui bichinyaxihquiqui. Huishaxon hen mato yohiha jema janin rihbi ta jascapahbo hihcomatimahiqui.

²⁰Nea joibo huishamanicah ta yohuanihqui. Mato qui tah hen histon catihi hihqui yohuani. Jaa copi tah hen Jascari rahan. Johue Hihbo Jesusen, hen jai.

²¹Noquen Hihbaan shinanya sca jihuenahue.